


Melč Mékōlē



New Testament in Akoose (CM:bss:Akoose)

Melɛ Mékōlē

New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-21

PDF generated using Haiola and XeLaTeX on 4 Mar 2019 from source files dated 29 Nov 2017

0143729f-907e-5098-b6ce-63b1629b8e48

Contents

Matyo	1
Makøsse	46
Lukasø	74
Jøne	119
Mbøltéd	150
Roma	192
1 Kørinto	212
2 Kørinto	231
Galesia	244
Efesus	251
Filipi	258
Kolose	263
1 Tøsalonika	268
2 Tøsalonika	273
1 Timoti	276
2 Timoti	282
Titus	286
Filemøn	289
Hibru	291
Jemøse	307
1 Petro	312
2 Petro	318
1 Jøne	322
2 Jøne	327
3 Jøne	328
Jude	330
Mam	332

Nkalaŋ mí bwâm míme Yesue ngáne
Matyo
 átélé
Ndibned ní kálag

Nkalaŋ mí bwâm ngáne Matyo átélé níhóbe nén bán Yesue mó adé Nsoode awé Dyöb dénhöbpé aá móðlom á nköjsé te. Mbwiined ne mó dôo Dyöb dénlönëdté mekan míme ánhöbpé aá móðbelé ábē bad se' boód. Mmén nkalaŋ mí bwâm níde áyäl e nköjsé nísyäel.

Mekan míme Yesue áyágté'áá békábé mó áte metón métáan. (1) Abé áde bad bé nkamlen í Dyöb bétángéné awój ne mbeltéd mímab, mekan míme mébë mímab ne mekan míme mébenléd ne bó (E'ped 5-7); (2) Nsón míme bembapë dyôm ne bébe bétángéné abel (Eped 10); (3) Ngáne nkamlen í Dyöb nídií (Eped 13); (4) Ngáne mod átángéné Dyöb abele (Eped 18); (5) Mekan míme mébenlad ne ngáne ébëë áde Krïstæ ápëe (E'ped 24-25).

Nkabtéed ní kálag

Nchyáátén ne echyáá éche Yesu Krïstæ 1.1-2.23

Nsón míme Jøne, Ndusene 3.1-12

Edusen ne mekägsen míme Yesue 3.13-4.11

Nsón míme Yesue á mbwög e Galilia 4.12-18.35

Nsón míme Yesue áde áhídté á Galilia ápe á Jerusalém 19.1-20.34

E'pun bé asog ábe Yesue á Jerusalém ne benben ne á Jerusalém 21-27

Mpuu ne alúmed áde Sáñgwéé álúmtáá bad yël áde ámáá apuu 28.1-20

Betaa ábe Yesue *(Luk 3.23-38)*

¹ Tónjé e betaa ábe Yesu Krïstæ edíi nén. Yesue ambíd á nchyáátén míme këj Dabide, Dabide mó-'e abíd á nchyáátén míme Abrahame.*

² Abrahame mó abédé sáá awé Aisige. Aisige-'e ambé sáá awé Jakobë, Jakobë-'e mó anchyáá Judaa bóobë baányan. ³ Judaa bó mwaád Tamaa, bénchyáá Përeë ne Zeraa. Përeë ambé sáá awé Heserøne, Heserøne-'e sáá awé Rame. ⁴ Rame mó abédé sáá awé Aminadabe, Aminadabe-'e abédé sáá awé Nashøne. Nashøne ambé sáá awé Salmøne. ⁵ Salmøne bó mwaád, Rahabe bó-'áá bénchyáá Boase. Boase bó mwaád Rute bénchyáá Obëde, Obëde-'e ambé sáá awé Jese. ⁶ Jese ambé sáá awé këj Dabide.

Këj Dabide bó Uria mwaád béchyáá Solomone. ⁷ Solomone ambé sáá awé Rehoboame, Rehoboame-'e mó ambé sáá awé Abijaa, Abijaa ambé sáá awé Asaa. ⁸ Asaa ambé sáá awé Jehosafadë, Jehosafadë mó-'e ambé sáá awé Jorame, Jorame mó-'e ambé sáá awé Uzzia. ⁹ Uzzia abédé sáá awé Jotame, Jotame mó-'e ambé sáá awé Ahase. Ahase mó-'e ambé sáá awé Hezekaya. ¹⁰ Hezekaya-'e ambé sáá awé Manase. Manase-'e sáá awé Amose. Amose mó ambé sáá awé Josia. ¹¹ Josia mó anchyáá Jekonyase bóobë baányan, á póndé eche bad bé aloj á Israël bénkwéé nzum boj bad bé Babilon bésweéen bó áwab aloj.

¹² Áde nén démmadté atóm, káoj ne á póndé echë bénchyáá'ë Yesue, betaa ábe Yesue békédé; Jekonyase mó ambé sáá awé Shelyele, Shelyele-'e mó ambé sáá awé Zerubabelë. ¹³ Zerubabelë ambé sáá awé Abutee, Abutee-'e sáá awé Elyakime. Elyakime-'e ambé sáá awé Azoo. ¹⁴ Azoo abédé sáá awé Zadoge, Zadoge mó-'e ambé sáá awé Akime, Akime-'e sáá awé Eliude. ¹⁵ Eliude mó ambé sáá awé Elizaa. Elizaa-'e sáá awé Matane. Matane mó-'e ambé sáá awé Jakobë. ¹⁶ Jakobë mó abédé sáá awé Josebe. Josebe mó awój Maria awé anchyáá Yesue awé békagéé bán Krïstæ.

¹⁷ Né-oo, nyongel ésyäel, mbooted ne Abrahame ápe wéé Dabide, édé dyôm-é-nyongel ne éniin. Mbooted ne Dabide ápe póndé eche bésweéené bad bé Israël á Babilon áde bénkwéé nzum, édé dyôm-é-nyongel ne éniin. Bootya póndé eche bénswéénné bad bé

* 1:1 Mmén nchoo níde káojne á kálag e Dyöb e'só 5.1, 6.9, 10.1, 11.10, 27.

Israël á Babilon áde bênkweé nzum, káéjne á póndé eche béchyáá Yesue, ádé dyôm-é-nyongel ne éniin.

*Echyáá éche Yesue
(Luk 2,1-7)*

¹⁸ Echyáá éche Yesue ébédé nén: Maria, nyaá awé Yesue, ábédé ngon e mmwaád eché enkembíí mwenchóm. Bénnkií mó mod nhóg awé béchágé’áá bán Josebe. Boj byánán Maria šsú á e’wóngé wéé Josebe, ényinnéd nén bán adé nkog á ngíne e Edéadəj éche Ésáá. ¹⁹ Josebe-’e, ngáne ábédé mó mod a bwám, enkendəngé Maria e’sôn awóged. Né-óó, abelé’áá mbojsén áchene mó á mesoom-té. ²⁰ Á póndé eché mímmé mewémten médií mó áte, ángel e Dyöb empií mó áde ánángé nló. Ángel ne enláá mó nén aá, “Á-Joseb, mod á myaa míme Dabide, weebáá’ Maria atéd néé mmwaád awóij, áyale Edéadəj éche Ésáá chóó épíidé mó boj abé nkog. ²¹ Áchyáá mwán a mwenchóm, échuu-’e mó dín wéé Yesue† áyale nén móðhūd ábē bad á mbéb-te.” ²² Mmén mésyāél mêmbeñléd âloned e’yle ábe Dyöb dénlómenné nkal é’déadəj aá,

²³ “Nyénøne’, ngon e mmwaád eché eebíí mwenchóm ēbē nkog, echyáá-’e mwán a mwenchóm, béchág-ke mó bán Emmanuel.”

Ádén dín ádé nén bán, “Dyöb ádé ne sé.” ²⁴ Néé Josebe ásyángé ásé, ambél ngáne ángel énláá’é mó. Antéd Maria néé awé mmwaád. ²⁵ Boj káéj ne póndé eche Maria áchyáá mwán, Josebe enkendyénné mó. Josebe anchuú-’e ane mwán dín aá Yesue.

2

Beláj-bé-betintine békídé á akuu áhye dé abe Yesue edúbé

¹ Béndhyáá Yesue á dyad á Betelhem á mbwógi Judeya á póndé eche Herode ábédé kēj. Bad behög ábe béláá’áá betintine ábíí mekan, bémbrid á akuu,* bérpē á Jerusalém. ² Áde bérpédé á Jerusalém, bénseñdéd bánken, “Héé kēj e bad bé Israel, ane awé achyáádté wén ádífí? Sénnyíné tintine á akuu awé alúmte nén bán achyáádté. Né dós ákéá boj sépag ábe mó edúbé.” ³ Ádě kēj Herode áwógi nê, nê dêntagéd mó á mewémten-té bwâmbwam. Dêntagéd mó, átágéd-te bad bé Jerusalém bésyāél. ⁴ Herode anlăd ábe beprise bémbridá ne bemeléede bé mbéndé bésyāél áte. Boj ásedté bó aáken, “Héé Ane awé Dyöb Áwógté, awé bésineé, áchyáádté?” ⁵ Dós békwennténé mó bán, “Béchyáá mó á dyad á Betelhem, á mbwógi Judeya. Nkal é’déadəj antél aá,

⁶ ‘Á-bad bé Betelhem á ndoob e Juda, ádén dyad ádé dyad ahög áde ádé etógnén bwâmbwam átinté e myad mé aloj á Juda.

Áyale mod ábíd átinté echén, awé ályágéd ábêm bad bé aloj á Israel.’ ”

⁷ Néé Herode áwógi nê, anchélé ábê beláj-bé-betintine á kun-té, boj ásedté bó nyaá e póndé eché tintine ne ámbidté. ⁸ Dós álómé bó á Betelhem aá, “Nyékag, nyétónj anón. Nzé nyénnyíné wéé ane mwán áchyáádté, nyétim ámbid nyéhye nyéláá me, ábel boj mémpé íké ríbe mó edúbé.” ⁹ Áde bémáá mekan míme kēj álángé bó awög, bémbootéd ake ámpé. Boj áde bénóné ámín, bénýin melemlem mé tintine míme bénynnéné á akuu néé ákagké bó á’sō. Ane tintine anké káéj atyéém wéé ane mwán áchyáádté. ¹⁰ Anyín áde bénýíné ane tintine, bénwógi menyinje bwâmbwam. ¹¹ Bénsől á ndáb-te. Néé bésolé, bénýin ane mwán bó nyaŋ, Maria. Bémbridé ane mwán mebóbón ábe mó edúbé. Bémbridéd mendé áwed míme bénwánlédté mó, bérpē-’e mó. Mmê mendé mébédé gól,† mđg mé e’lod é’ bwám míme béchágéé bán frankinsen‡ ne mia.§ ¹² Néé bémáá ane mwán edúbé abe,

† ^{1:21} Yesue: Ádén dín ádífí bán Mod a e’sooson. * ^{2:1} Á akuu: Péd eché etondée ábídéé.

† ^{2:11} Gôl: Edí ekii éche édé nkun bwâmbwam éche élümte bán Yesue adé kēj. ‡ ^{2:11} Frankinsen: Abédé dyög áde békagnéé Dyöb mendé. § ^{2:11} Mia: Mébédéé dyög áde bénabnadté ndim.

bémbwōgē esú áwāb aloj, boj bēmpōj nzii empée, áyāle Dyōb dénlāā bō á nló-te aá bétimé' ámbid wéé Herōde.

Bésōbnē Yesue, békééné mó á aloj á Egipto

¹³ Áde ábê beláj-bé-betintine bémáá ake, ángel e Dyōb enláá Josebe á nló-te aá, "Hidé ásē, étêd anén mwān bō nyaj ésoben bō, étimen bō á Egipto. Nyédye-'e áwed kááj né nlángé nyé meé nyéhide, áyāle Herōde álōm bad áhéd anén mwān, áwúu mó." ¹⁴ Mmē nkoo dën, Josebe anhidé ásē, atéd mwān bō nyaj, ákéén bō nkoo ne nkoo, átimnád bō á Egipto. ¹⁵ Áwed dōo bendyeé' e kááj ne póndé eche Herōde áwédé. Nén démbenléd álóned e'yale ábe Dyōb dénlōmēnnē nkoo é'déadəj aá, "Nlébpé awem Mwān meé ábíd á aloj á Egipto."

Béwúú e'ched é' bän á Bétehlhem

¹⁶ Áde Herōde ásónjténé nén aá beláj-bé-betintine bē bédogé mó, anlij bwâmbwam. Anlóm éche sánze á Bétehlhem ne ene pēd e mbwógs esyāl, aá béwúu bän bē baachóm bésyāl ábe béepede mwé níláán. Ambel nē átājgen ne póndé eche beláj-bé-betintine bénlāā' e mó bán bénkōlē tintiné awé anlúmēd echyáa éche Yesue anyín. ¹⁷ Nén démbenléd álóned e'yale ábe Dyōb dénlōmēnnē nkoo é'déadəj Jeremayaa. Jeremayaa anhób aá,

¹⁸ "Bad bénwōg e'saad ne awé á ngíne ádě ábídé' aá á Rama, áde Rashelé áchyee' e ábe bän. Bélenté' aá mó awé, boj eékobpe aléned áyāle nén bän bémmod mó awé."

Josebe, Maria, ne Yesue bébídé á Egipto bétim á Nazaret

¹⁹ Ámbid e kwéed eche Herōde, ángel e Dyōb empií Josebe á nló-te áde ámbēē abé á Egipto, élāngé mó nén aá, ²⁰ "Téd awōj mmwaád bō mwān, nyétime ámbid á aloj á Israél. Herōde ne ábē bad ábe bégédé' aá ane mwān awúu bémáá awé." ²¹ Néé Josebe áwogé nē, anlad yōl, atéd Maria bō mwān, bóebō bétim ámbid á aloj á Israél. ²² Boj áde Josebe áwogé bán Achelause atédé atii dé nkamlen áde sáá, kāj Herōde á mbwógs e Judeya, ambaj atim ámbid áwed. Ángel e Dyōb enhyé mó mekan mémpée aláá á nló-te. Né démbel, á mbwógs e Galilia dōo ántimmé ake. ²³ Anké aloj á dyad ámbáá ahog áde bégédé' aá bán Nazaret. Nén démbenléd álóned e'yale ábe Dyōb dénlōmēnnē bekal bē'déadəj tāngene Yesue aá, "Ábyéen née Mod a Nazaret."

3

Nkalaŋ níme Jōne, Ndusene

(Mak 1.1-8; Luk 3.1-18; Jōn 1.19-28)

¹ Etún é póndé ámbid ené, Jōne, Ndusene ambid nkoo é'déadəj a Dyōb. Akalé' aá eyale é Dyōb á ehyájge á Judeya, álāngé bad aá, ² "Nyétede abel dé mbéb áyāle nén nkamlen ní Dyōb índé benben." ³ Jōne mó abédé mod awé nkoo é'déadəj Yesayaah áhóbé' aá, áde ánhōbpē aá,

"Ehángé ébíde' á ehyájge bán, 'Nyébojseñ epe éche Sájgwéé. Nyéti eché nzii.'"

⁴ Jōne ahágé' aá mbóté éche békénlé nyoj éche ébídé á yōl e kamél.* Awáá' aá ngáá a ngob e nyam. E'chuu ne bengóméé bōj békédlé ndyéed eché. ⁵ Bad békédlé' aá á Jerusalém, ne mímínií myad mé mbwógs e Judeya esyāl ne á melon mémpée níme mébédé á nkag mé edib é mbáá é Jodan, békag wéé Jōne. ⁶ Néé béképaléé nímāb mbéb áte, Jōne ádusen bō á edib é Jodan. ⁷ Boj áde Jōne ányiné née Befarisia ne Besadusia békédlé' ábel boj ádusen bō, anlásá bō aá, "Píi é nyé chén! Nzéé mímó alángé nyé aá nkáásé ní Dyōb níhúe' boj aléb-pe nyé aá nyékúme abágé? ⁸ Nyéke nyébèle mam níme mélumēd nén bán nyétdé ádén abé dé mbéb. ⁹ Nyéewémtán nén bán nzé nyéhóbé bán, nyéde bän ábe Abrahamé, nyéekudté nkógsen ní Dyōb. Boj ríláa nyé nén meé, Dyōb áhélé ábenléd nímén meláá átímēd mó bän ábe Abrahamé. ¹⁰ Bóob-póó ehón émáá anaa á nkañ m mel. Né-óó, bwel ké é'héé ábe béképhyáa' e'pum é' bwám, békwel bō békewm-me bō á muú-te. ¹¹ Ndusen

* ^{3.4} Kamél: Edíi nyam eché edé née nyag eché békénladté á ehyájge ápém nted.

nyé bɔɔb ne mendib âlúmed nén bán nyēhəyléné ádən abé dé mbéb. Boj mod ampée ahúe', awé atómé mε. Meékwognedéé ké âpém míme metámbé. Ădusén nyé ne Edəádəŋ éche Ésáá, ádusén-ne nyé ne muú. ¹² Awánlé échē epeben á ekáá, âbel nén, ápeb míme menyán ámīn. Nzé amadé, ălăd mbum é bwâm áte, ákōo chó. Boj ălăd e'pəá, ahyáád bó á ebonde é muú éche éédimé.”

*Bédúséné Yesue
(Mak 1.9-11; Luk 3.21-22)*

¹³ Bɔɔb-pɔá, Yesue ambid á mbwóg e Galilia, áke wéé Jøne á edib é Jodan âbel nén Jøne ádusen mó. ¹⁴ Boj Jøne anwanén mó mewémten ahəylén, áhōbē nén aá, “Néé édíí bán wε-εé wembé edusan mε, chán étímé abé éche wewé éhyagké áwêm wεé ñdusen wε?” ¹⁵ Boj Yesue ankwentén mó aá, “Mwε ébē nē bɔɔb âbel nén débel mam mésyāäl bwâm ngáne Dyōb áhdeéé.” Né-ó, Jøne ankwentén mó adusen. ¹⁶ Melemlem mé póndé míme Jøne ámáá Yesue adusen, Yesue ansyəá á mendib-te. Dóo ngob e dyōb énédnédé, boj ányiné néé Edəádəŋ é Dyōb ébídé ádyōb ésudé ásē néé éləä, étyéém-mε mó á nló mīn. ¹⁷ Ehób chó- e ámpē ébídé ádyōb nén, “Awem Mwǎn a nlém nén, awógté mε menyinje bwâmbwam.”

4

*Satane akəgé Yesue
(Mak 1.12-13; Luk 4.1-13)*

¹ Ámbid e póndé, Edəádəŋ é Dyōb êntimén Yesue á ehyánge âbel nén Satane ákəg mó. ² Yesue andid yél nzaa á mekáne-tê móom mé e'pun méniin. Ámbid e ene póndé nzaa ewagé'áá mó. ³ Dóo Satane ápédé boj álāngé mó aá, “Nzé Wε-εé edé Mwǎn a Dyōb, kamlén mímén meláá métim e'wεle.” ⁴ Boj Yesue antitmén mó aá, “Éténlédé á kálag e Dyōb nén bán, ‘Saké ndyééd chěmpen edide moonyon á alongé. Boj eyale téé éche Dyōb áhōbé, chóo édídé moonyon á alongé.’” ⁵ Dóo Satane ákééné Yesue á Jerusalem, dyad áde ásáá boj átyéemān mó á nzonge e Ndáb-e-Dyōb mīn, ⁶ álāngé mó aá, “Nzé wε-εé edé Mwǎn a Dyōb, éheb á bwεle-mīn hén éhūn á ndɔob, áyale éténlédé á kálag e Dyōb nén bán, ‘Dyōb dékamlén éche ángel ásáb wε, épēm-mε wε ámīn âbel weébōmē ekuu á aláá.’” ⁷ Yesue- e antitmén mó aá, “Boj kálag e Dyōb ehóbé ámpē nén aá, ‘Weékāgē Sāngwéé ádoj Dyōb áte.’” ⁸ Satane antéd Yesue ámpē, bùmō bétyleém á mbɔɔd mīn, boj álūmtē mó melonj mé nkōjsé mésyāäl ne nhon ísyāäl míme ñidé áwēd-te. ⁹ Dóo álāngéé mó aá, “Měbě we ábén bwěm é'syāäl nzé ebwókgé mε mebóbón boj ébāg-ke mε edúbé.” ¹⁰ Dóo Yesue álāngéé mó aá, “Syəá mε á díd-te, a-Satan! Éténlédé nén bán, ‘Ébwókgé’ Sāngwéé ádoj Dyōb mebóbón, ébage- e mó edúbé. Mwěnpren-naá étānjégné abele.’” ¹¹ Né-ó, Satane antédé Yesue, ákē. Ángel êmpɛ, éwóngén Yesue.

*Yesue aboótédé míme nsón á Galilia
(Mak 1.14-15; Luk 4.14-15)*

¹² Ene póndé bénhë Jøne, Ndusene á mbwòg. Áde Yesue áwogé nê, antím ámbid á mbwóg e Galilia. ¹³ Anhidé á dyad á Nazaret, áke ádyéé á dyad á Kapenahum. Kapenahum abédé á nkag mé edib-é-nzab é Galilia, á abwóg á hōm á túmbé e Zebulon ne e Naftali. ¹⁴ Yesue anké á Kapenahum âlóned mekan míme nkal é'dəádəŋ Yesayaá ánhōbpē aá, ¹⁵ “A-mbwóg e Zebulon, a-mbwóg e Naftali, ntimned ne edib é nkwe, ámúde mε edib ní Jodan, Galilia mbwóg echē bad ábe béesé bad bé Israel bedyee'á, ¹⁶ Bad ábe békúdé á ehíntén-tê békúdé e'nyínén bé ekíde; Bad ábe békúdé á nsəl ní soj békúdé e'soósor.” ¹⁷ Bootya póndé echē Yesue ánkéé á Galilia ambootéd eyale é Dyōb akal áhōbē nén aá, “Nyéhəylén abé dé mbéb, áyale nkamlen ní Dyōb ñidé benben.”

*Yesue apwedé bembapee bé'sō
(Mak 1.16-20; Luk 5.1-11)*

¹⁸ Epun ehág Yesue akagé'áá á nkin mé edib-é-nzab é Galilia. Annyín bǎn bé baachóm béké; Simone awé békagé'áá bán Petro, bó mwanyaŋ Andreyo née békewméé mbínzé. Békédéé bekób-bé-súu. ¹⁹ Dóo álāngeé bó aá “Nyéhíde me. Ngáne nyékobeeé súu baoob, méesyāgēd nyé ngáne nyétedté bad nlém á abum áhíd me.” ²⁰ Ábwōg-ábwōg békétedé échab mbínzé, békidé-'e mó. ²¹ Née bésídté á'sō, Yesue annyín bǎn bé baachóm béképedé béké; Jemse bó mwanyaŋ Jone, bǎn ábe Zebedié. Bóobé saá békéb á béké-té, békewméé'áá échab mbínzé. Hé dóo Yesue áchénleé bó bad béké aá békide mó. ²² Ábwōg-ábwōg békétedé saá ne béké, békidé-'e Yesue.

*Yesue ayágté'áá, áchonté-'e bad
(Luk 6.17-19)*

²³ Yesue akagé'áá myad mésyāel á aloj á Galilia áyágté eyale é Dyōb á ndáb é mekáne, ákalé-'e nkalaŋ ím bwám mé nkamlen í Dyōb. Achonté'áá bad béké nkole békéyāel ne nyaa e nkole téé eché émbé átinté echâb. ²⁴ Né-oó mekan míme Yesue ábélé'áá nwógnádtáá á mbwōg e Siria esyāel. Nê dênkäj bad békééné'áá bad béké nkole békéyāel áwé. Békééné'áá bad áwé ábe békónlé'áá nkole ne mewé nyaa ne nyaa. Bad ábe e'déadaj béké mbéb békéb áte, bad ábe békéhúne ekikíd, ne bad ábe békéwéde eped, Yesue áchonté ábélé bad békéyāel. ²⁵ Nê dênkäj, ndun e mod ehídé'áá Yesue. Bad békébíde'áá meloj bootya á Galilia ne mbwōg e Myad Dyōm, Jerusalém, Judeya, ne ped eché edé á múde mé edfb é Jodan mímínií.

5

Yesue ayágté bad á ekone mîn

- ¹ Áde Yesue ányíné ene ndun e mod, anchágé é ekone mîn, ádyéé ásé. Áhed-taá ábéké bembapee bétáné mó ² boj ábootéd bó ayáged, áhōbē aá,
- ³ “Nnam ímbé ne bad ábe béké atog á edéadaj-té áyále béké ásé e nkamlen ím míni.
- ⁴ Nnam ne bad ábe békélebe', áyále Dyōb déwōgēd bó menyinje ámpé.
- ⁵ Nnam ne bad ábe békéwítéde, áyále nköjsé rísyāel mélbē mímáb.
- ⁶ Nnam ímbé ne bad ábe béké nzaa ne píd ábel mam míme Dyōb áhedeé aá mélbenled, áyále Dyōb dékódéed bó.
- ⁷ Nnam ne bad ábe békéwóge bad béképedé ngol, áyále Dyōb dómpe déwōg bó ngol.
- ⁸ Nnam ne bad ábe békénlé nlém á abum, áyále békéyin Dyōb.
- ⁹ Nnam ne bad ábe békóme nsaj, áyále Dyōb déchag bó ábélé bǎn.
- ¹⁰ Nnam ne bad ábe békude metake áyále békéleé mam míme Dyōb áhedeé. Béké ásé e nkamlen ím míni.
- ¹¹ Nnam ímbé ne nyé ábe bad békéyáé, nyé ábe békétagteé, békébáné nyé e'békétedé' mam áyáel, békidé-'e nyé mbón é metóm áyáel, á dín ádém. ¹² Nyéwóge bwám, nyébé-'e menyinje áyále nsábe míme nyékudté ádyōb ríchábé ámín. Nén dóo bad békétagté'áá bekal békédaj béké' bōód.

*Nkwé ríme rímbádé e'nyin, ne etrúkáj éche békóngé
(Mak 9.50; Luk 14.34-35)*

¹³ “Nyéde etógnén á alongé á bad béké nköjsé ngáne nkwé ndíí etógnén áyále ndyéed. Boj nzé nkwé rímbádé alaj chán békéhele-se békéyinéd mó ámpé? Méesaá dyam dé abelén ámpé. Né-oó, apim dóo béképimeé, bad békégtáád mó ámín. ¹⁴ Nyéé nyéde nêngáne etrúkáj álúmed bad béké nköjsé békéyāel nzii e Dyōb. Dyad áde álóyñédé á ekone mîn déesoméé. ¹⁵ Mod eémáa-'áá etrúkáj achod se ákoo chó á ebwōg-sé, boj abelé ákélé chó ámín, ábel nén ényínte kénzéé awé adé á ndáb-te ekíde. ¹⁶ Nyémpé nyépene', melemlem née etrúkáj. Nzé bad békéyiné nsón ím bwám míme nyébéléé, békéen Dyōb, awén Titéé awé adé ámín.

Ayáged áde Yesue tângene mbéndé

¹⁷ “Nyéewémítán nén bán mpedé á nkȫnsé âbóded mbéndé éche Mosee ne mekan míme bekal bé’dáédəŋ béyägté nyé. Meépedeé âbóded mó, boj mpedé âlóned mó. ¹⁸ Ne mbále nlângé nyé nén meé, káój ne á asog dé nkøj ní sé ne mí mín, ké mwâmpin mé eyale nhög awé aténlédé á mbéndé e Dyöb eéhidtéé ásé káój né mésyääl mélóné.* ¹⁹ Né-oo, kénzéé awé aboo mbéndé póg átînté échê mbéndé é Dyöb, ké ene eché bewémténé bán eesaá etógnén, áyägté-’e bad bëmpée aá bëbel melemlem, ene ndín e mod ëbë ndimtene átînté e bad ábe bédé ásé e nkamlen mí mín. Boj kénzéé awé abele ngáne mbéndé éhóbé, áyägté-’e bad bëmpée âbel melemlem, ăbë etógnén bwâmbwam átînté e bad ábe bédé ásé e nkamlen mí mín. ²⁰ Né-oo, nlângé nyé nén meé, ésebán abele á Dyöb ádëñ átómé áde Befarisia ne bemeléede bé mbéndé, né nyémpë nyéesónlé á nkamlen mí mín mbëd.”

Ayágéd áde Yesue tângene melingá (Luk 12.57-59)

²¹ Yesue ambád ahób aá, “Nyéwogé nén bán bénlää bad bë’ bôód bán, ‘Mod eewúé mod. Kénzéé awé awúú mod, bétângéné mó akáad.’ ²² Boj nlângé nyé nén meé, kénzéé awé alijné† mwânyan bétângéné mó akáad. Kénzéé awé ásyäŋ mwânyan bëpeén mó á kóte e bad bëmbáá békáad mó. Kénzéé-’e awé áchäg mwânyan aá, ‘Edimdim é chöm chén’, bëhèle bëbwém mó á dû-á-muu. ²³ Né-oo, nzé ekag á menyán mé mende áke dé abe Dyöb mende, boj ekämténé nén weé nyé mod nyéwánléné kôkôo, ²⁴ ébânë mímôñ mende ásé á’sô े menyán mé mende. Ésébe éke ébél nsaj ne ane mod boj étim ámbid éke ébe mende. ²⁵ Nzé mod ahede we ake dé asómén á kóte, bël káój nyúmô nyépe á nchemten byánán nyéepé á kóte. Ésebé nê, ahelëse asómén we á kóte. Kóte-’e ăbëé we ámekáá mé plûse, plûse chô-’e éhë we á mbwøg. ²⁶ Ne mbále, nlângé we meé, weéhëlëë-se ebíd á ndáb e mbwøg-tê wë káój né etwedé ádõñ alúm ásyääl.

Ayágéd áde Yesue tângene akáb dé mesón

²⁷ “Nyéwogé ngáne bëhóbé nén bán, ‘Nyéekábé mesón á ndáb e’wóngé.’ ²⁸ Boj nlângé nyé meé, kénzéé awé anané mmwaád boj awémtén aá né mënnañnéd mó, amaá asón akáb ne ane mmwaád áwe nlém-tê. ²⁹ Nzé ádon dïd ábelte we mbéb, ehûd dô, épim. Édë mboj âbôd dô, tómaa bô âbwém echoj yël esyääl á dû-á-muu. ³⁰ Melemlem nê, nzé échoj ekáá ébelte we mbéb, esél chô, épim chô. Édë mboj âbôd chô tómaa bô âbwém echoj yël esyääl á dû-á-muu.

Ayágéd áde Yesue tângene aboo-dé-e’wóngé (Mat 19.9; Mak 10.11-12; Luk 16.18)

³¹ “Kálag e Dyöb ehóbé ámpë nén, ‘Kénzéé awé anané mwaád á e’wóngé atângéné ábe mó apab áde álûmte nén bán anané mó á e’wóngé.’ ³² Boj nlângé nyé nén meé, nzé mod anané mwaád á e’wóngé ésebán ane mmwaád akábé asón, boj ane mmwaád akií mod ampée awój, né nchóm awé anané mó á e’wóngé mó atímté mó mmwaád awé akábé mesón. Kénzéé-’e awé awóo mmwaád awé bénáné á e’wóngé né mómpë akábé asón.

Ayágéd áde Yesue tângene amwé dé melë

³³ “Nyéwogé nén bán bénlää bad bë’ bôód bán, ‘Mod eemwág melë ngén, boj nzé mod amwédé melë atângéné ábél dyam áde ámwéené melë á’sô é Dyöb.’ ³⁴ Boj nlângé nyé nén meé, nyéemwág melë ké mehög. Nyéemwág melë á dïn dé nkamlen mí mín, áyäle áhed dô Dyöb áwóó e’dií bë nkamlen. ³⁵ Nyéemwág-ke á dïn dé nkȫnsé, áyäle áhed dô Dyöb ásúmé mekuu. Nyéebenläd-te ké dïn á dyad á Jerusalem, áyäle ádfí dyad áde kâj embáá. ³⁶ Nyéemwág melë ké á dïn dé nló mímen, áyäle nyéehëlëë ké mbum e esid póg ahäjlen áwen nló, ápúbed ké’ áhíned chô. ³⁷ Boj nzé ehóbé weé móbële dyam, ehób weé, ‘Ee, mëbel dô.’ Ké-’e weé, ‘Aáy, méebenlë.’ Kéchéé éche ébádé áhed né ébídé weé Satane.

* ^{5:18} Né mésyääl mélóné káá ádë ayáge ásyääl álóné. † ^{5:22} Kénzéé awé alijné; donge á kálag áwóó kénzéé awé alií ngén.

Ayéged áde Yesue tâŋgène akun-á-yél
(Luk 6.29-30)

³⁸ “Nyêwôgé ngáne böhóbé nén bán, ‘Nzé mod atúbé mod díd, bétub mómpé díd. Nzé mod ahúdé-’e mod asoj, böhûd mómpé ason.’ ³⁹ Boj nlânge nyé nén meé, nzé mod abelé we mbéb, éched yĕl. Nzé mod abomé we abén á akag ahóg, ékunnéd mó ádíníí ámpé. ⁴⁰ Nzé mod ahede we asómén á kóte âkoben we ímôoj nkobe, ébag mó káej ne echoij súte. ⁴¹ Nzé mod anyágté we aá ékeen mó máyl mehóg, ékeen mó máyl mébe. ⁴² Kénzéé awé achómé we chôm, beé mó. Nzé mod ahóbé-’e aá, ébâl mó chôm éche éwóó, ebâl mó.

Ayéged áde Yesue tâŋgene bad bé ekoyí
(Luk 6.27-28, 32-36)

6

Ayáged áde Yesue tângene âwóngen bad

¹ “Nyétêd póndé! Nyéebélē nsón n̄ Dyöb âbel boj bad bénŷn nyé. Nzé nyêbèle n̄, né nyéekudté nsábe wéé awêñ Titée awé adé á nkamlen mí míñ.

² “Né-óó, nzé ebage mod chōm éche átognéné, weékumē nkáy nêjgáne bad ábe bédoge yšl. Békume nkáy á ndáb é mekáne ne á dyad-tê wéé bad bédíí, âbel boj bénŷin bó. Ne mbále nlângé nyé meé, bémáá mmab nsábe nísyääl akud. ³ Boj nzé ebage mod chōm éche átognéné, weébélé'-sse ké awoŋ wén awě étomténe adən abíí. ⁴ Né débél mod ké nhóg éebíí'é chōm éche ébagé mó. Dyöb, awoŋ Titéé awě anyíne mam mme mébenled á e'konnéed-te móɔsābē we.

**Ayáged áde Yesue tângene mekáne
(Luk 11.2-4)**

¹⁰ Mmōn nkamlēn ñhye ñtēd etál.

Bad bé nkɔ̃nsé bébel mekan míme éhedeé, ngáne ébenlaadté ámin.

¹¹ Bag sé echéd ndyééd e epun e bín ê' chii.*

¹² Lagsén sé mímed mbéb, ngáne sémpé sélagsanné mod téé awě abelé sé mbéb.

¹³ Weémwāg-se sêhún á mekägsen-tê, bon húd sé á mekáá mé Satan.†

¹⁴ Nzé nyêlagsan bad mewusé ímme békénlé nyé, né Dyöb Titée awêń awě áde ámîn mómpê älagsén nyé. ¹⁵ Bonj nzé nyêlagsán bad, né ké Dyöb awêń Titée éelagsénné nyé.

* 6:11 Bag sé ndyééd e epun é běn é' chii káa ndyééd e epun é běn é' chǎn. † 6:13 Donge á kálag dé' sō ábádē bán Nkamlēn, ngíne ne ehúmé bédíi ábōn á ngíndé ne á ngíndé.

Ayéged ádĕ Yesue
tângene adid á yĕl nzaa á mekáne-tê

¹⁶ “Nzé edide yël nzaa á mekáne-tê, weésudné’ ngáne bedog-badé békbeléé. Békhemte’ e’só á nlô âbel boj bad békhem bénédide yël nzaa á mekáne-tê. Ne mbále, nlânge nyé néen mée bémáá rímmâb nsâbe nísyââl akud. ¹⁷ Boj nzé edide yël nzaa á mekáne-tê, éwôbê e’só, ésesdë-’e nlô áte. ¹⁸ Bél nê, âbel boj bad békhemé bén edide yël nzaa á mekáne-tê, étoméé awôj Titéé awé mod éenyinéé. Anyíne’ mam mímé médé á e’kojnéd-te, mó-’aa šsâbë we.

Ayáged áde Yesue
tângene awón á bwém

(Luk 12,33-34)

¹⁹ “Nyéékojnád yěl nhon á nköjsé wén, wée síi ne ngag békébédté, bechib-pe ámpé békóó ndáb, békib. ²⁰ Boj nyékoo mímén nhon wée síi ne ngag békébédté, bechib-pe ámpé békóó’é ndáb se békib. ²¹ Nyébíí bán wée nhon míbagké mod, áhed dóo nlém-me míbagké mó.

²² “Díd dőá ádé ngáne etrúkáŋ é yěl e mod. Nzé díd ákénlé we áte, echoŋ yěl esyəál chómpē ebelé ekélé. ²³ Nzé déekénle, yěl chómpē ēlōn we áte ne ehíntén. Né-oo, nzé chōm éche ényînte nyé ekide étímé abé chōm éche étímté nyé á ehíntén-tê, né échê ehíntén échë nyébëë áte étōmtëñ ngíne abé.

²⁴ "Modmod eéhēlēs-sé abé mbəlede a bewój bébe. Ālūmēd nhóg edənge tómaa aníníí, kék' e átīmēn nhóg, abán'-e aníníí áyāl. Weéhēlēs-sé ebé mbəlede a bad bébe abé ahógo. Weéhēlēs-sé ebé mbəlede a Dyōb se ebé'-e mbəlede a mɔnē.

Ayáged áde Yesue
tângene bad ábe békáadte baáb

(Luk 6.37-38, 41-42)

‡ 6:27 Abád ké epun ehóğ áwē alongé káa áchab tómaa ngáne ádíi.

6 Weetédé mam mé Dyōb se ébē mbwé, áyāle ékunnéd wε yěl ékūm-mε wε. Weebwémmé nguu échōŋ ngese áyāle édyanjtéd chó ámīn.

*Hedén Dyōb kchéé éche éhēdeé
(Luk 11.9-13)*

7 “Hedén Dyōb, ábē wε. Hēd, Dyōb débēl enyín, kǔm ekob, Dyōb dēdibnéd wε. **8** Áyāle kénzéé awē ahēdné Dyōb, ākūd, awē ahēdē-’ε, anyin. Kénzéé-’ε awē akumé ekob, Dyōb dēdibnéd mó. **9** Sáá-a-mwān ahéé mwān áhēdenné ewele, boj ábe mó aláá? **10** Ké-’ε nyé ahéé mwān áhēdenné súu, boj ábe mó nyá? **11** Nzé e'bébtéd é' bad néé nyé nyébage ábēn bān kāse é bwēm, tógtén-naá echēn Sáŋ awē adé ámīn? Chán-nō éebaá bad ábe bēhédné mó kāse é bwēm? **12** Né-óó, kchéé éche édāá wεé bad bēbel áwōŋ, ébel chó áwāb. Nén dōo mbéndé e Dyōb ne bekal-bé-e'dēdāŋ ékoo’é ayágēd.”

*Nzii e alongé áde déemaá’,
elēlē áte
(Luk 13.24)*

13 Yesue ambád aá, “Bwεé á ekob éche échíné áte, áyāle ekob éche ékag á dǔ-á-muú ékálé áte, nzii eched-tε etánlédé, bad ábe bēbwag-kε áhed bēbúú áte. **14** Boj ekob é nzii e alongé ádē déemaá’ edé mwāmpīn. Nzii-’ε echē etime áwed elēlē abwε áte. Nguse é bad chóá ébwag-kε áhed.

*Bekal-bé-e'dēdāŋ bé metóm
(Luk 6.43-44)*

15 “Nyétéd póndé ne bekal-bé-e'dēdāŋ bé metóm. Bélümte byánán bépwéédtédé néé nýdyøŋ mí mbód, boj áwab nlém-tē bédé ebébtéd néé ngø. **16** Nyééchem bó á mbeltéd mímāb. Mewáj méchyáa e'pum é' besabé-yε? Ké-’ε mekôd méchyáa' e'pum é' mángæleye? **17** Melemlem-’áá bwel ké é'héé ábe é'kwoge' bwām, é'chyáa-’ε e'pum é' bwām. Boj ké é'héé ábe bēekwøgé' bwām, bēechyāa-’ε e'pum é' bwām. **18** Bwel é' bwām bēeheléé e'pum bé mbéb achyáa. Bwel bé mbéb-pe bēeheléé e'pum é' bwām achyáa. **19** Bwel ké é'héé ábe bēechyāa-’ε e'pum é' bwām, nwóó-nzag ákwel bó, abwém bó á dǔ. **20** Né-óó, nyéébīí bekal-bé-e'dēdāŋ bé metóm á mbeltéd mímāb.

*Bad ábe bēhíde Yesue
ne nlém míbē
(Luk 13.25-27)*

21 “Saké mod téé awē achəgtaad mε aá, ‘A-Sáŋ, A-Sáŋ,’ ăsōl á nkamlen mí míñ. Bad ábe bēbele ngáne echem Sáŋ awē adé ámīn áhēdneé bó, bōo bésōl. **22** Áde epun é nkáásé mε asogé épéé, bad híin bēpē áwēm, bélāŋgē mε bán, ‘A-Sáŋ, A-Sáŋ, ngómē sēkānlé’áá bad mam míme Dyōb álómné’áá sé aá mēbenléd, á dñi adōŋ, sēbenléd-tε ádoŋ dñi ábíded bad e'dēdāŋ bē mbéb áte, sēbelé-’ε menyáké híin! **23** Héé mélāa-’é bó mεé, ‘Meebíí’é mε nyé. Nyésyø aá díd-te! E'bébtéd é' bad ngēn!’ ”

*Belóŋ-bé-ndáb bēbē:
a debyéé ne a eyókél
(Luk 6.47-49)*

24 Yesue ambád ámpē aá, “Né-óó, mod téé awē awogé ábēm e'yale bén, boj ábelé-’ε ngáne é'hóbeé, adíi néé mod a mekínzé awē alóó ndáb á ebēn é aláá mñ ábel boj éwúu ásē. **25** Ámbid e nê, mbúú e ngíne enhá, e'dib é'lone, ekukud-tε étom wée ene ndáb émbēé, boj enkēnkweé, áyāle enlónjnéd á aláá mñ. **26** Boj kénzéé awē awogé ábēm e'yale bén, boj eébele ngáne é'hóbeé, adíi nēngáne eyókél é mod éche élóó eche ndáb á nsíí mñ. **27** Ámbid e nê, mbúú e ngíne enhó, e'dib é'lone, ekukud-tε étom wée ene ndáb émbēé. Ene ndáb enkwé. Enkúme émād-tε ahented áte.”

Kunze eche Yesue awóó âyáged

²⁸ Áde Yesue ámáá rítmén mésyāēl ahób, amute áde áwóglánnáá mó démbē menyáké bwâmbwam áyāle nyaa eché áyágté'áá. ²⁹ Ayágté'áá bó néé mod awé nzé ahóbé, né émáá. Eeyágté'áá, nêngáne bemeléede bé mbéndé.

8

*Yesue achõjté mod
awě meləŋ mékóbé*

(Mak 1.40-45; Luk 5.12-16)

¹ Yesue ansúd á ekone sé. Áde ápédé é ekone sé ndun e mod ehídé’áá mó. ² Hê dão mod nhóg awé meləŋ mékóbé ápédé áwē boj ábwōgē mebóbón ne edúbé ésyāsl, áhōbē néñ aá, “A-Sáy, nzé edaé ehèle ébél me nsáy.”* ³ Dóo Yesue ábídté ekáá, ábānē mó á yǎl boj áláŋgē mó aá, “Ndəá, sáy!” Ábwōg-ábwōg rímē meləŋ mêmmaá ane mod á yǎl. ⁴ Dóo Yesue áláŋgēé mó aá, “Weeláŋgē modmod dyam áde ábénlédé, boj kě élúmed yǎl wééprise, ásimen we. Ébag-ke mendé ngáne mbéndé e Mosee éhedéé, álúmed bad wéé móssáá.”

*Yesue achőjté mbəledə
a mod ambáá a sénze*

(Luk 7.1-10)

⁵ Ámbid e nê, Yesue anké á dyad á Kapenahum. Néé ápédé áwed, mod ambáá a sánze é Roma ambé awé akamlaan mbwókel e sánze. Ane mod anhye mó acháñ, áhōbē ⁶ aá “A-Sáñ, awêm mbølede eédyé’é bwâm, adé á anoy de nkole á ndáb. Eéhélëë ahide ásé. Atage bwâmbwam.” ⁷ Yesue anláá mó aá, “Mæépë, níchööd-te mó.” ⁸ Dóo mod ambáá a sánze ne átintanné Yesue aá, “A-Sáñ, mmén meékwognedéé ákob we nken áwêm ndáb, boj hób ké eyale, awêm mbølede ädyéé bwâm.” ⁹ Mmén ndíi mod awé adé ásé e nkamlen, mmén-ne nwóó sánze éche níkamlanné. Nlânge póg meé, ‘Käg’, ékäg-ke né dën, empée meé ‘Hyäg’, éhyäg-ke né dën. Nzé nlânge awêm mbølede meé, ‘Bël échéñ’, ábelé-’e né dën.” ¹⁰ Áde Yesue áwógó nê, yäl enkóm mó áte. Dóo álângeé bad ábe böhídé’áá mó aá, “Ne mbále, nlânge nyé meé, meényínëë mod a alor á Israel ké nhógg awé awóó nyaa e adúbe eché anén nken-e-mod áwóó. ¹¹ Nlânge-’e nyé néen meé póndé eché ngande ébëë á nkamlen í Dyöb, bad híin ábe bénkëntájgén abé áhed bëbíd á akuu ne á mbøj ábé á ngande nchoo ne betaa, Abrahame, Aisige ne Jakobé. ¹² Boj bëbídëd bad ábe bëntängëñ abé á nkamlen í Dyöb á ewwóg-te, bëbwém bô á ehíntén-tê. Áhed-taá bëchyéé’é bédyäg-ke meson á nsäl.” ¹³ Dóo Yesue álângeé ane mod á sánze aá, “Súé’ á ndáb, ébenled ngáne édúbpé.” Melemlem mé póndé mbølede awé ane mod ambáá a sánze andyé bwâm.

Yesuε achõnté ekud é bad

(Mak 1,29-34; Luk 4,38-41)

¹⁴ Ádë Yesue ápedé á ndáb wée Petro, antán Petro mwaád nyaá á anɔŋ dé nkole, ahéb dênsog mó. ¹⁵ Néé Yesue ácháŋgé mó á ekáá, ahéb ámāā mó. Anhidé ásē, ákōb-pe Yesue nken. ¹⁶ Ene ngukél bad bêmpéén bad hiín wée Yesue, ábe e'déadəŋ bé mbéb bémbeé áte. Yesue ambenléd ábē e'yale bé nsəl abídéd ábē e'déadəŋ bé mbéb, áchōod-te bad bésyə́el ábe békónlé áá. ¹⁷ Yesue ambéł mímén mésyə́el âlóned e'yale ábe Dyōb dénlómenné nkal e'déadəŋ Yesayaa nén áá,
“Ankobéń syánē nkole nísyə́el ne rímmed metake.”

Bad ábe bêmpon Yesue ahíd

Bau des Schiffes (Luk 9,57-62)

¹⁸ Áde Yesue ányíné ngáne ndun e mod élájnédé mó, anláá ábē bembapee aá bóbôo bétime á ped e edib-é-nzab eníníí. ¹⁹ Hê dôô meléede a mbéndé nhóg ápédé áwē boj áhôbê aá, “A-meléed, mëhîd wé kékéé áde ékagkké.” ²⁰ Yesue antimtén mó aá, “E'bubwógo

* 8:2 Mmén nteltéd índé á Kálag e Levitikus eped dyôm ne é'láán nchoo móom méniin ne ntáan ápe nchoo móom méniin ne ntóób (Lev 13:45-46).

é'wóó ábab e'lóm wéé bésóléé, menən-ne ámpē méwóó rímbab műm, boŋ Mwǎn-a-Moonyor eewóó'é hőm ádě ábánneé nló.” ²¹ Dóo mod ampée awě mómpē ahídé'áá Yesue álāngeé mó aá, “A-Sáj, mwě, ínsébe nké nílime echem sáj.” ²² Dóo Yesue átintanné mó aá, “Hídé me, chené ndim ím bad mén nílmme rímāb ndim.”

*Yesue ahjóódté ekukud
(Mak 4.35-41; Luk 8.22-25)*

²³ Ene póndé dóo Yesue ásólé á bőle-tê ne ábē bembapęe boŋ bébwōgē eke. ²⁴ Ádě běpédé á edib-te, dóo ekukud é ngíne ébóótédé atóm. Émbē ngíne nyaa echě káéjnē bőle běmponné asú ásē á mendib-te. Á póndé eched Yesue akúné'áá. ²⁵ Hé-'áá bembapęe bényemee mó ásē boŋ bélāngē mó bán, “A-Sáj, sôn, wóngén, pón syánē dewág-oo!” ²⁶ Yesue ankwentén bő aá, “Cheé ékáá boŋ nyewōgē mbwōg? Cheé ékáá boŋ ádēn adúbe ábē mwāmpīn né?” Dóo átyéémé ámīn, boŋ ákamlán ekukud éche étomé'áá, ne edib éche éhódé'áá áte. Ábwōg-ábwōg ekukud énsēle, edib ámpē éche éhódé'áá áte énsōg ahod. ²⁷ Yěl enkóm bembapęe áte bwāmbwam áde bényíné nē, bésedté bánken, “Ebál é mod éhéé chén éche káéjn ne ekukud ne mendib běwógné?”

*Yesue achjójté bad běbe
ábe e'dádəj bě mbéb běmbēē áte*

(Mak 5.1-20; Luk 8.26-39)

²⁸ Áde Yesue ne ábē bembapęe běpédé á múde mé edib-é-nzab rímíníí, á mbwōg e bad bě Gerasin, bad běbe ábe běmbid á soóbade běmbomén mó. E'dádəj bě mbéb běmbē ábē bad běbe áte. Ábē bad běmbē nganjen nyaa echě mod kě nhog éechue'aá ene nzii abwe. ²⁹ Anyín áde bényíné Yesue, běmbootéd abón bán, “A-Mwǎn a Dyōb, cheé syánē déwójnē? Epedé hén ákógsen sé áde póndé éepēdēē-ye?” ³⁰ Esōg é nguu chó-'é ébédé běnben ne áhed, édyāg medyé. ³¹ Héé ábē e'dádəj bě mbéb é'cháa-'é Yesue bán, “Sébíí bán wěbídēd sé, boŋ tédé sésål á esōg é nguu-tê éche édé hínií nē.” ³² Dóo Yesue ákamlanné ábē e'dádəj bě mbéb aá, “Nyébíd!” Abíd áde ábē e'dádəj bě mbéb é'bídé ábē bad áte, běnsōl nguu ché áte. Ábwōg-ábwōg, échě esōg é nguu émpadē ásē, ényagté' á eláá é nkin mé edib-é-nzab, éhún á edib-tê, éwé-'é. ³³ Benón bě nguu běntōm mehélé á dyad-tê, běkag běkanlé bad dyam áde ábénlédé ne ábē bad ábe e'dádəj bě mbéb běmbēē áte. ³⁴ Awōg áde ábē bad bě dyad běwóge nē, běmpadē ásē áke dé atán Yesue. Néé bényíné mó, běnchāj mó bán, áhide áwab mbwōg.

9

*Yesue achjójté mod
awě awédé eped*

(Mak 2.1-12; Luk 5.17-26)

¹ Ámbid e ene póndé, Yesue ansól á bőle-tê ámpē, áchābē edib-é-nzab, átím ámbid áwē dyad wéé ádyéé'áá. ² Apę áde Yesue ápédé áwē dyad, bad behóg běmpęen mod á mekále mīn awě awédé eped. Áde Yesue ányíné adúbe áde ábē bad, anláá ane mod awě awédé eped aá, “A-mwǎn, weewóngé mbwōg, nlagséné wé mbéb.” ³ Hé dóo donje dé bemeléede bě mbéndé bényongee áte bán, “Anén mod asyáé Dyōb!” ⁴ Yesue anchém bő mewémten áte. Héé ásedtēe bő aáken, “Cheé ékáá boŋ nyewój rímmén mewémten mé mbéb áte? ⁵ Ahéé adé dyam ásad, áhób wéé, ‘Nlagséné wé mbéb,’ káa áhób wéé, ‘Syáé ásē, ébooted ake?’ ⁶ Boŋ mělūmēd nyé mée Mwǎn-a-Moonyor awóó kunze á nkōjsé álagsen mbéb.” Héé álāngeé ane mod awě awédé eped aá, “Syáé ásē, étēd rímmón mekále, ésúe’ á ndáb.” ⁷ Dóo ane mod áhídté ásē boŋ ásūé-'é á ndáb. ⁸ Mbwōg ménkōb bad ábe bényín ngáne ádén akan ábénlédé. Bébootéd-te Dyōb aken áde ábágé baányon kunze ábel échén ndín é mam.

*Yesue achénlé Matyo
âhíd mó
(Mak 2.13-17; Luk 5.27-32)*

⁹ Ámbid enê Yesue ansyəá ádê abwóg á hōm. Áde ákagké nê, annyín mod awé békagké'áá bán, Matyo. Matyo andyεé ásē á ndáb eche ásánté'áá táásé áte. Héé Yesue álāngeé mó nén aá, "Hídé me." Dóo Matyo átyéémé ámīn, boj áhīdē-'e mó. ¹⁰ Ámbid e póndé Yesue anké á ndáb wée Matyo* ádyé ndyéed. Ekud é besaad bé táásé né bad bé mbéb běmpē běmpē bedyēen Yesue ne ábē bembapē áhed. ¹¹ Néé doŋge dé Befarisia bénýíné ngáne Yesue ádyééné échē ndín é bad, běnsédéd ábē bembapē bánken, "Cheé ékáá boj awen meléede ádyág ndyéed ne besaad bé táásé ne bebel bé mbéb běmpē?" ¹² Dóo Yesue ákwentanné bó aá, "Bad ábe bedyéé bwâm běetógnené mod-a-bwel. Bad ábe békonele' bó bětógnené mod-a-bwel. ¹³ Nyéke nyéhéd áte ábel nyésônten ábén e'yale ábe é'ténlédé á kálag e Dyöb nén bán, 'Chōm éche ínhedneé bad édíi nlém n̄ ngol, saké mende.' Meépedee á nkörjsé áchéle bad ábe békobnédé á'sō é' Dyöb, boj mpedé áyäle bad bé mbéb."

*Nsédtéd tângene âdid yǎl nzaa
á mekáne-tê*

(Mak 2.18-22; Luk 5.33-39)

¹⁴ Hé dóo bembapē ábe Jōne, Ndusene běpédé wéé Yesue boj bésedté mó bánken, "Cheé ékáá boj sé ne Befarisia sédidé yǎl nzaa á mekáne-tê, boj ábōj bembapē pen běedidé?" ¹⁵ Yesue ankwentén bó ne ngan aá, "Chán bad ábe bélébpé á ngande e e'wóngé běhèle běhèle' áde bědíi ne mod awé akudé sómbé? Béeheléé. Boj epun épé éche békobenné bó mod awé akudé sómbé. Échê epun dóo bědiddé yǎl nzaa á mekáne-tê. ¹⁶ Nyébíi nén bán, nzé mod anabpe' mbóté, eetédéé eped é abad ékōslē se ánabnéd nchun íi mbóté, áyäle nzé échê eped é abad ékōslē ébóótédé abób áte ébélé éhabnéd abad dé nchun. Né ábelé' échê epen é mbóté ékèle' áte tómaa ngáne énsébēē abé. ¹⁷ Melemlem nêngáne mod éetédéé mím mékōslē se ápen mó á nchun mé ntyág n̄ ngob e nyam. Áyäle nzé abelé nê, né mím méhöd káéñ ntyág n̄ yéed? Mím mémād asyøge, ntyág-ke ámpē ímbéb. Boj bétédeé mím mékōslē běhé á ntyág mékōslē-te. Né ábelé' mím mébé bwâm, ntyág-ke ámpē ímbé bwâm."

*Yesue apuúdté ngondéré póg
eché enwé*

(Mak 5.21-43; Luk 8.40-56)

¹⁸ Áde Yesue álāngeé bad rímén mekan, mod a nkamen nhög ampé áwé abwóg mebóbón ne edúbé ésyääl, áhōbē nén aá, "Awem mwän a mmwaád awédé bōob nén dën, hyág ébân mó ekáá á yǎl ábel nén ápuu." ¹⁹ Né-ó Yesue ampádé ásē ne ábē bembapē běhídé ane mod. ²⁰ Áde békagké nê, mmwaád nhög ambé awé anwón nkole ríme mekií mébídé'áá mó á yǎl póndé ésyääl. Mmē nkole mbédé mó á yǎl á etún é dyom-a-mwé ne ímbé. Héé ane mmwaád ábídé Yesue á mbíd, ásitán mó mesó mé nkobe ríme ánwāä'ë. ²¹ Ambel nê áyäle ánwálé mewémten aá, nzé móositéné rímē nkobe, aá né móödyéé bwâm. ²² Dóo Yesue ákúnnédé boj anyín ane mmwaád. Anyín áde ányíné mó dóo álāngeé mó aá, "A-mwän-a-mmwaád, adúbe ádöj ádídé we bwâm." Ábwōg-ábwōg ane mmwaád andyéé bwâm. ²³ Yesue ampé á ndáb eché ane mod a nkamen. Áde ásólé á ndáb-te, antán ndun e mod ebæle ntøgag n̄ ngíne ne bad ábē bétóo e'lór, békōnē-'e nkángé n̄ kwééd. ²⁴ Dóo Yesue áhōbée aá, "Nyé moosyääl nyébít áebwóg, áyäle anén mwän-a-mmwaád eewédéé, akúne kúnén." Héé bó moosyääl běbóótédé mó awɔo. ²⁵ Boj áde ene ndun e mod émáá abíd áebwóg dóo Yesue ásólé á ton eché bénnaádté ane mwän. Néé Yesue áchéngé mó á ekáá, apádé-'e ásē ábwōg-ábwōg. ²⁶ Ádén akan dēnkanléd ene ped e aloj esyääl.

Yesue achöñjté bad bé ndím běbe

²⁷ Néé Yesue áhídté ádê abwóg á hōm, bad běbe ábe běnkwé ndím běhídé'áá mó ámbid, bělēbpē-'e e'saad bán, "A-Mwän a mbyaa ríme Dabide, wógo sé ngol." ²⁸ Áde Yesue ásólé á ndáb-te, ábē bad běbe ábe běnkwé ndím běntan mó. Dóo Yesue ásedteé bó aá, "Nyédu bpé

* 9:10 Ndáb wéé Matyo káa ndáb eche Yesue.

nén bán nhèle míbel nyênyínen-ε?” Béñkwentén mó bán, “Εε. Α-Σάη, sédúbpé.” ²⁹ Dóo Yesue ábáné bó mekáá á mǐd, boj áhōbē nén aá, “Nyêwóó adúbe bán nyéenýinén, né-óó ébenled ngáne nyédúbpé.” ³⁰ Ábwōg-ábwōg bébootéd-te anyínen. Boj Yesue asím bó etúu áte, álāngē bó aá, “Nyéelángé mod ké nhóg ádén dyam áde ábénléde.” ³¹ Boj ké nê, née békibidé áhed, bémbe békéen nkalaŋ ene péd é aloj ésyāel ngáne Yesue ábélé menyáké.

*Yesue achöjté mod
awě eehōbe’áá dyam*

³² Néé ábē bad béké mod wéé Yesue awě ankwé ebóbé áyāle edéadəj é mbéb émbé mó áte. ³³ Boj áde Yesue ámáá ane mod échē edéadəj é mbéb abíded áte, ambootéd dyam ahób. Nén dénkobéd ndun e mod echē ebédé áhed menyáké, békibé-’e bán, “Dyam néé ádén déebenlēdē á Israel mbéd.” ³⁴ Boj Befarisia pen békibé nén bán, ahèle bad e’déadəj békibé ahúd áte áyāle kâj e e’déadəj békibé chóo ebage mó ngíne ábel nê.

Yesue awogé bad ngəl

³⁵ Né-óó Yesue akagé’áá myad mésyāel, mémbáá ne mésad ene péd e aloj, áyāgté eyale é Dyōb á ndáb é mekáne, ákalé-’e nkalaŋ mí bwám mé nkamlen í Dyōb. Yesue achöjté’áá bad békibé nkole bésyāel ne nyaa é nkole ésyāel éche émbé átíté echâb. ³⁶ Áde Yesue ányíné ndun e mod, ngol enlög mó á nlém-té bwâmbwam áyāle echâb. Ambé bó ngol áyāle bétágé’áá áte, béewoo-’e nwóngen. Békibé néé ídyoj mí mbód míme méewoo nnən. ³⁷ Dóo álāngéé ábē bembapées aá, “Nzag echyáá bwâmbwam, bwém é’hednaad apád, boj bepád békibuu’é áte. ³⁸ Né-óó, nyékânné nén bán nwóó-nzag álôm bepád.”

10

*Bembapées békibé nlómag
dyom ne békibé*

(Mak 3.13-19; Luk 6.12-16)

¹ Ámbid e nê Yesue anlăd ábē bembapées dyom ne békibé áte. Ambé bó kunze ábíded bad e’déadəj békibé áte, áchood bad békibé nkole ne nyaa é nkole ésyāel. ² Mín míme bembapées békibé nlómag dyom ne békibé ábe Yesue mômén: A’só, Simône awě békibé’áá bán Petro ne mwânyaŋ Andreyá. Jemse békibé mwânyaŋ Jóne, bân ábe Zebedie, ³ Filibe ne Batolomyo, Tomaſe ne Matyo nsaad-a-tááse, Jemse mwâń awě Alföse, ne Tadiose, ⁴ Simône awě ambé á epepé é kén e aloj, ne Judas Iskariode awě antím Yesue asóm.

*Yesue alângé bembapées békibé nlómag
ngáne békibenlé míme nsón*

(Mak 6.7-13; Luk 9.1-6)

⁵ Ábē bad dyom ne békibé bós Yesue ánlömmé. Anláá bó aá, “Nyéekág á myad míme méesé myad mé aloj á Israel, nyéekág-ke dyad ké ahógi á aloj á Samaria. ⁶ Boj nyéekág wéé bad békibé Israel. Bédé néé ídyoj mí mbód míme míbóó. ⁷ Nyéekág, ngáne nyéekágké, nyéhâjte nén bán, ‘Nkamlen mí míndé benben.’ ⁸ Nyéchojte bad békibé nkole, nyépuudte bad ábe békibé, nyéchojte bad ábe békibé nkole mé meləj ábel békibé, nyébídte-’e bad e’déadəj békibé áte. Mbagé nyé ngíne ábel mímén mésyāel, meéhedené nyé nsábe. Né-óó nyémpé nyéke nyébélé melemlem nyéhedené bad nsábe. ⁹ Nyéewánlé morné ké nhóg áyāl. ¹⁰ Nyéewánlé ekwe, ké’e mbóté ébe áyāl. Nyéewánlé metámbé, ké’e ntój. Áyāle mod a nsón atájgéné ndyéed akud wéé mod awě ábenléé nsón. ¹¹ Nzé nyéssólé dyad ké ahéé, nyéhedené mod awě akwénténé nyé nken akob, nyédyéé áwe ndáb káéj ne póndé éche nyéhidteé ádē dyad. ¹² Ndáb káéj echē nyéslé áte, nyésléed bad ábe békibé áwéddte nén bán, ‘Nsaj míbé ne nyé.’ ¹³ Nzé bad ábe békibé áwéddte békibé nyé nken, mímén melenten mé nsaj í Dyōb míbé ne bós. Boj nzé békibé nyé nken, mímén melenten nísú ne nyé. ¹⁴ Boj nzé nyépedé ndáb káéj dyad ké ahéé, boj békibentene nyé awóglén, nyéküd ebumbú á mekuu áde nyéhidteé áhed, álúmed nén bán, Dyōb déekobéé bós. ¹⁵ Ne

mbále, nlângé nyé nén mée á Epun é Nkáásé, nkógsen míme myad mé Sodom ne Gomora bényinné mēbē mwămpin tómaa míme bad ábe bédé ádê dyad.”

*Metake míme
bembap  e b  ekudt  *

  á d  in áde Yesue

(Mak 13.9-13; Luk 21.12-17)

¹⁶ Yesue amb  d a  , “Ny  n  ne”, nl  me ny   n  e n  dyo   m   mb  d   t  nt   e ng  . N  -  o ny  b   mek  n  z   n  e ny  , ny  p  iited-te n  e   l    . ¹⁷ Ny  t  d p  nd  ,   y  le bad b  b   ab   b  ke  n ny      k  te, b  sw  dt  d ny   e’ tan  g   awab nd  b     mek  ne. ¹⁸   y  l e ech  m b  p  e  n ny     s     benkam  ne ne    k  n. B  b  l n     bel ny  kale b   nkala   m   bw  m, ny  kale-  e   bad ab   b  es     bad b   Israel. ¹⁹ Nz   b  p  e  n ny     k   ah  e   k  aad ny  , mod e  t  g     at     y  l ch  om-  s     h  b  p     k  e   ng  ne   h  b  p     ch  .   de p  nd     p  e  , ch  om   b  b     e  che   h  b  p  . ²⁰ E’ yale ab     h  b  p     b  eb  a     b  , b  h  u     ne Ed    d     e  che S  y   aw     h  b  p     m  . ²¹ Mod   b     m  w  ny     mek  a     bad b  mp  e     bel b  ew  u     m  . S  e     m  w    n     amp     b  l melemlem ne   m  w    n. M  w    n   k  unn  n s  a     ne ny     y  l   b  el b  ew  u  -  s     b  . ²² Mod asy  l   k  o     ny  ,   y  l ech  m, bo     k  nz  e     aw     a  ka  n   m  m     metake   nl  m   k  o     ne a   as  g,   k  ud e’ so  son. ²³ Nz   b  t  gt     ny     dyad ah  g, ny  ny  ged ny  k     ad  n  i  . Ne mb  le, nlâng   ny   n  n m  e  , ny  ep  a   ns  n amad   myad m     alo     Isra  l m  sy  l, bo   M  w    n-a-Moonyo       p  ag. ²⁴ M  w    n-a-ay  ge eet  m  e     mod aw     ay  g  te   m  . Mb  led  -  e eet  m  e     e  che s  y. ²⁵ N  -  o   m  w    n-a-ay  ge eet  n  g  e  n  e   n  e   h  d  e     ed    d     e  che   t  t  m  e     e  che mod aw     ay  g  te   m  . Mb  led  -  e   amp     e  t  n  g  e  n  e   n  e   h  d  e     ed    d     e  che   t  t  m  e     e  che s  y. Nz   b  ch  u  d     s  a  -a-mbw  g b  n B  l  zebul  , n     b  chu     bad ab   b  d     a  we nd  b   m  n m  b  b  b     t  maa n  .

Mod aw   b  t  n  g  e  n  e ab  y
(Luk 12.2-7)

²⁶ “N  -  o ny  eb  a  ” moonyo  .   y  le dyamdyam d  esa     a   e’kojn  d-te   ade d  eb  d   aw  d. K   ah  g-  ke d  esa  ,   ade   s  s  om     bo     b  n d  e  by    nn  . ²⁷ Mam m  sy  l   m  íme nlâng  e     ny     eh  nt  n-t  , ny  h  b     m     e’ ny  n  n   b   ek  de. M  sy  l-  le   m  íme ny  ew  g     k  un-t  , ny  kal   m     nh  n  . ²⁸ Ny  ew  g     mbw  g   ne moonyo     aw     ah  e   aw  u     ek  b     y  l, bo     e  h  l     ed    d     aw  u  . Bo     ny  b  a   Dy  b     ade   ah  e   ab  b  d   ek  b     y  l, ab  b  d-te ed    d     a  d  -  mu  . ²⁹   esa     mb  le n  n b  n, b  s  o  m     nd  n   e  b     a  y  l   k  b  p     p  g-  ? K   n  ,   k     p  g   ee  h  n  e     a  nd  b       s  b     a  n  k  w  n  t  n     m  íme   e  ch  n S  y   Dy  b  . ³⁰ Bo     ne ny  , Dy  b     b  b     k  a  y  ne meson  g     m     e’ sid   ab       d     ny     n  l  . ³¹ N  -  o, ny  ew  g     mbw  g, ny  d     et  gn  n   t  maa   nd  n,   k       m  b     bu     k     áte.

Âb  d Yesue mb  y,
  e   âb  y   m       y  l

(Luk 12.8-9)

³² “K  nz  e     aw       b  d   m     b  y     s       s     ba  nyo  ,   m  -  e   m  b  d   m     b  y     s     w  e     e  ch   S  y   aw     ad       m  in. ³³ Bo     k  nz  e  -  e   aw       b     m       y  l     s     ba  nyo  ,   m  -  e   m  b     m       y  l     s     w  e     e  ch   S  y   aw     ad       m  in.

Yesue a   ngab  n ch  o  
m  p  e  n     t     ba  nyo  

(Luk 12.51-53; 14.26-27)

³⁴ “Ny  ew  mt  n n  n b  n, nh  y  d     nk  js       p  e  n   ns  j  . A  y, m    ped       p  e  n   ns  j  , bo     ngab  n. ³⁵ M  ped       k  on   mw  n a   m  w  n  ch  m     t     n  g  n   s  a  , mw  n a   mmwa  d     t     n  g  n   nya  , mmwa  d-te     t     n  g  n   ny  a  . ³⁶ Bad b     ek  y     b     mod b  b  d   a  we nd  b  -te d  n.

³⁷ “K  nz  e     aw     ad     nya     k  e   s  a     t  maa   m     e  kwogn  d     aw     mb  p  e     ab  . K  nz  e  -  e   aw     ad     awe   mw  n a   m  w  n  ch  m   k  e   awe   mw  n a   mmwa  d   t  maa   m  , e  kwogn  d     aw     mb  p  e     ab  . ³⁸ K  nz  e  -  e   aw       p         d     aw     se     h  idn     m  , e  kwogn  d       b     aw     mb  p  e     ab  . ³⁹ K  nz  e     aw     ah  de     d     along     as  j  ,   b  d     d  . Bo     k  nz  e  -  e   aw       b  d     d     along       y  l   ech  m,   k  ud   along       d     d  e  ema  ’.

*Nsábe n̄ Dyōb ne bad
ábe békobe' ábē bembəledε
(Mak 9.41)*

⁴⁰ “Kénzéé’ awě akobé nyé nken, né m̄e-eé ákóbé nken. Kénzéé’-e awě akobé m̄e nken né echem Sáj awě alómé m̄e móō ákóbé nken. ⁴¹ Kénzéé’ awě akobé nkal é’dədəŋ nken áyāle ádií nkal é’dədəŋ, ákud nsábe m̄e nkal é’dədəŋ. Kénzéé’-e awě akobé mod awě asáá nken áyāle ásáá, ákud nsábe r̄ime mod awě asáá. ⁴² Ne mbále, nlânge nyé nén m̄e-e, kénzéé’ awě abagé ké mendib mámwé ngēn wéé anén nhóg awě ahíde m̄e, ké ane awě eebude etógnén abé, atáŋgéné néé ákúdē nsábe n̄ Dyōb.”

11

*Jōne, Ndusene alómé
ábē bembapεε wéé Yesue
(Luk 7.18-35)*

¹ Áde Yesue ámáá ábē bembapεε dyōm ne bēbe mímén mésyāēl alyāgtεn, anhidé ádē abwóg á hōm áke déyáged ne ákal eyale é Dyōb á myad r̄ime mēbédé bēnben ne áhed.

² Ene póndé Jōne, Ndusene ambé á mbwōg. Áde áwogé mam mésyāēl míme Kr̄istəe ábélē’áá, anlóm ábē bembapεε áwē. ³ Anhōb aá bésedē mó bánken, mó adé ane awě Dyōb áhóbé aá mółōm-ε, ngé bésine’ mod ampée? ⁴ Héé Yesue átintanné bō aá, “Nyétime’ ámbid, nyéke nyéláa Jōne mekan r̄ime nyewogé ne r̄ime nyenyínné dīd. ⁵ Nyéláa mó bán, bad ábe bēnkwé ndím bénýinne’, ábe bésyāgtáá, békag bwām, ábe meləŋ ménkōbpē, bésáá. Ábe bēnkwé ndág bēwōgne’, ábe bénwē, bēpuude’, nkalaŋ mí bwām-m̄e ámpē n̄kalte’ wéé betóótōkē bē bad. ⁶ Nnam míbē’-e ne kénzéé’ awě eehəŋlēne nlém á abum tâŋgēne m̄e.”

*Yesue ahóbé tâŋgēne
Jōne Ndusene*

⁷ Áde bembapεε ábē Jōne bétiméé ámbid n̄e, dōo Yesue ábóótédé ndun e mod echē embé áhed akale tâŋgēne Jōne. Ansedéd bō aáken, “Póndé echē nyembidtē áke détán Jōne á ehyāngé, cheé nyewemtēnné bán nyéeniyin? Apab á chyaá áde epub éságteé-yε? ⁸ Cheé nyenkongé abíd áke dé anyín? Mod awě ahédé mbóté echē ébóó bwāmbwam-ε? Bad ábe bēhāg échē ndín é mbóté bedyee dásō á ndáb é kāŋ. ⁹ Nyéláa m̄e, cheé nyembidtē áke dényín. Nkal é’dədəŋ móo nyenkeé anyín-ε? N̄e děn! Ne mbále nlânge nyé m̄e-e, nyenyínné mod awě atómé nkal é’dədəŋ. ¹⁰ Jōne mó adé ane awě bēhōbē’áá áde bétélé e’yle ábe Dyōb áhóbé aá, ‘Nōnē’, nlóme mímēm mésenzené r̄ime mésēbē we á’sō, ábojseñ we nzii.’ ¹¹ Ne mbále, nlânge nyé nén m̄e-e, mod k̄e nhóg awě abídé á abum dé mmwaád eetómeé Jōne, Ndusene. Boŋ k̄e n̄e, mod awě adé ndimten áyāle bad ábe bédé á nkamlen mí m̄ín, adé etógnén tómaa Jōne. ¹² Bootya ne póndé echē Jōne, Ndusene ábóótédé nkalaŋ n̄ Dyōb akal káéj ne epun é’chii, nkamlen mí m̄ín nkude metake híin á mekáá m̄e bad, e’wanje é’ bad-te é’kume mímē nkamlen nzum.* ¹³ Mbéndé ne bekal bē’dədəŋ bēhōbē tâŋgēne mímē nkamlen káéj ne póndé echē Jōne. ¹⁴ Né-ɔ́, nzé nyēbōjséné échab ehōb adúbe, Jōne mó adé ane awě bēhōbē’áá áde bēnhōpē bán, Elaija ahúe’. ¹⁵ Kénzéé’ awě awóó metúu áwōge’.

¹⁶ “Boŋ cheé méhāgténné nyongel e’chii? Enén nyongel edíi n̄eŋgáne běndem ábe bedyéé á dyad-tê, boŋ bélēbpē nhóg ne aníníí,

¹⁷ bán, ‘Sétóŋgé nyé e’loj,
boŋ nyéeságéé.

Sékónné nyé nkáŋgé n̄ kwééd,
boŋ k̄e n̄e nyéelēbēé.’

¹⁸ Áyāle, Jōne abédé, eeyoke'aá ndyéed adyé, eemwáge'aá-’e m̄im, bēhōbē bán, ‘Edədəŋ é mbéb édē mó áte.’ ¹⁹ Mwǎn-a-Moonyon apedé, ádyāg ndyéed, ámwāg-ke m̄im, bēhōbe

* 11:12 E’wanje é’ bad-te é’kume mímē nkamlen nzum káa ímpag ne ewarje.

bán, ‘Nyénóne mó, adəá ndyééd bwâmbwam. Mmwé-míme ngén, awojne belad bé táásé ne bebel bé mbéb.’ Boj káéj ne á asog, mam míme mébenléd méluméd nén bán, debyéé á Dyöb átângéné.”

Myad míme bad bénkêndúbéé Yesue

(Luk 10.13-15)

²⁰ Bad ábe bébédé á myad míme Yesue âmbenlé ekud é menyáké áte bénkênhøjlénné ádab abé dé mbéb. Né-óó Yesue ambootéd bó akáne áte, ²¹ áhôbē aá, “Á-bad bé Korazin, ébëen nyé ebébtéd! Ébëen nyémpé ebébtéd á-bad bé Betsaida! Áyäle nzé émbé bán, ndæle é mekan éche Dyöb ábélé áwén myad, mémbenléd nê á dyad á Tire ne dyad á Sidon, né bénwâa melebe se etûn, bémwagtéd-te mbúmbú áyäl âlumed nén bán, böhøjlénné ádab abé dé mbéb. ²² Mbále, nlângé nyé nén mée, á mbwe mé nkáásé, nkáá míme bad bé Tire ne bé Sidon móbë mwämpin tómaa ímmén. ²³ Nyé bad bé Kapenahum ámpé, nyéwêmtan bán, nyémaá ape ádyöb, boj bésudé nyé káájse ásé á dû-á-muú. Nzé menyáké míme Dyöb ábélé áwén dyad mémbenléd á Sodom† né ádê dyad ádîi ádë chii. ²⁴ Boj ne mbále nlângé nyé nén mée á mbwe mé nkáásé Dyöb déluméd ngol ne bad bé Sodom tómaa ne nyé.”

*Yesue alébpe bad aá,
béhyag áwé*

(Luk 10.21-22)

²⁵ Ene Póndé Yesue anhób aá, “A-Tê, Sájgwéé a nkoy mí míne ne ní sé, nságnen móbë ne wé, áyäle elúmté mpín mí bëndem mam míme ébájné bad bé debyéé ne bad bé nsôjten.

²⁶ Εε, A-Tê, nê dën dôo édâá wéé ébënled.” ²⁷ Dôo ábádeé aá, “Echem Sáj ebagé mekan mésyäel áwem mekáá. Mod ké nhög eekontéé mwän abíi ésebé Dyöb Titéé. Mod ké nhög-ke ámpé eebíi’é ngáne Titéé ákónté abé ésebé mwän, ne kenzéé awé mwän ádâá aá móólumed mó.

²⁸ “Nyéhyag áwêm, nyé bad bésyäel ábe nyékómé nted míme ídélé apém, mëbe nyé nkóme-áte. ²⁹ Nyékwenten âhid mímêm mekuu, nyéyágke-’e awêm, áyäle mpwiítéde, nchií-’e nlém á abum. Nyéhyag, nyéekud nkóme-áte. ³⁰ Áyäle ayáged ádêm déelseté áte, nted mímêm-me méedeleé.”

12

*Atón dé Mbwe-mé-nkóme-áte
(Mak 2.23-28; Luk 6.1-5)*

¹ Mwämpin mí póndé ámbid e nê, Yesue ne ábë bembapéé bétomé’áá á nzag é ngun-tê.* Nén ábédé á mbwe-mé-nkóme-áte. Nzaa ewagáá ábë bembapéé. Né-óó bëmbootéd e’sog é’ ngun apád, bëpäke’, bëdyâg. ² Befarisia bényin nê, dôo bélângéé Yesue bán, “Nõné’, áböj bembapéé bëbële dyam áde mbéndé éebageé kunze abel á mbwe-mé-nkóme-áte.”†

³ Dôo Yesue átimtanné bó aá, “Néde nyééláá’é mbëd á kâlag e Dyöb dyam áde kâj Dabide ámbenlé áde nzaa ékobé mó ne ábë bad-ε? ⁴ Éténléde nén bán, ansól á Ndáb-e-Dyöb mó ne bad ábe bénwoón mó, bëdyé e’wële ábe ébédé nde e Dyöb, ábe echëd mbéndé eébagéé mod ké nhög kunze ádyé. Ké bad ábe bénwoón mó bénkêntângénné adyé. Beprise bënpen bôo bëntângéen adyé. ⁵ Káa nyééláá’é á mbéndé eche Mosee nén bán, mbwe-mé-nkóme-áte téé, beprise bé Ndáb-e-Dyöb békweg mbéndé e mbwe-mé-nkóme-áte áyäle nsón míme bëbëleé boj ké nê, nê déesaá mbéb á’sô é’ Dyöb-ε? ⁶ Nlângé nyé nén mée dyam áde hén bôob áde áde etognén tómaa Ndáb-e-Dyöb. ⁷ Éténléde ngáne Dyöb áhôbë aá ‘Chöm éche nhedneé bad édii nlém ní ngol saké abe dé mende.’ Nzé nyénkoj ábén e’yle asôjten né nyéehelë-’se nyéchagé bad bán, bëdë bebel bé mbéb áde bëbëleé mbéb. ⁸ Nyébíi-óó nén bán Mwän-a-Moonyon awóó nkamlen káájne ámín e mbwe-mé-nkóme-áte.”

† ^{11:23} Dyöb démbëbëd dyad á Sodom áyäle ebébtéd éche émbé áwed. * ^{12:1} Échê ngun ébédé nyaa e ngun eche bëbënlëé e’wële. † ^{12:2} Bad bénkêntângénné nsón abel á mbwe-mé-nkóme-áte. Ne Befarisia, apád ádë bembapéé bëpádë’áá ngun ébédéé néé abel dé nsón.

*Yesue achõjnté mod
awé ekáá éwédé
(Mak 3.1-6; Luk 6.6-11)*

⁹ Ámbid e póndé, Yesue anhidé hê, áke asól á ndáb e mekáne. ¹⁰ Mod abédé áhed awé ekáá éwédé. Bad behógr ábe béhédé'áá Yesue awusé akóbén, bênsedéd mó bánken, “Eched mbéndé ebagé kunze âdid mod bwâm á mbwe-mé-nkóme-áte-ye?” ¹¹ Dóo ásедtę́e bó aáken, “Nyé ahéé rínmē mpõm mí mbód méhünné á echög-te á mbwe-mé-nkóme-áte boj eékag mó ahúd? ¹² Nzé nyéhele-sé nyébel nê ne mbód ngén, tógténné moonyon awé adé etógnén tómaa mbód. Né-oó, mbéndé eésaá nén bán mod eébélē bwâm á mbwe-mé-nkóme-áte.” ¹³ Dóo álângę́e ane mod awé ekáá énwéé aá, “Sálé ekáá áte.” Asále áde ane mod ásánlé ekáá áte, ekáá êndyę́e mó bwâm ámpē née échíníí. ¹⁴ Áde nén ábénléde, Befarisia bémibid á ndáb e mekáne, bébootéd Yesue ahäge, áwúu mó.

Yesue, mbalede awé Dyöb ápwédé
¹⁵ Yesue ambíí aá bégake mó. Nê dêmbél anhidé ádē abwág á hõm. Áde áhídté, ndun e mod enhíd mó, anchoód-te bad bé nkole bésyāel. ¹⁶ Boj ansím bó etúu áte aá béélângę́e bad nyaa e mod eche módií. ¹⁷ Ambel nén áloned e'yale ábe Dyöb dénlomenné nkal é'dáédərj Yesayaa aá,
¹⁸ “Nyénɔne’, awêm mbalede nén awé mǐpwédé, ndəé mó nwogne-’e mó menyinje.
Mélom échêm edaádərj ébē ne mó.

Äbídēd mbakú echě etyéémé átinté e bad ábe béesé bad bé Israël.
¹⁹ Éebeléé nswaj ne bad, éetögé-’aá.
Béewág-kaá mó ehób á dyad-té.
²⁰ Éekögédté ngén echě enögké, éediméd-taá etrukáj éche éhede adím.
Ábel nén kááj né mbeltéd mí bwâm mûmô ítédé etäl.
²¹ Á dín ádē dóo bad ábe béesé bad bé Israël bësummé nlém.”

*Bad bán Yesue abenlaad
ngíne eche Belzebule
(Mak 3.20-30; Luk 11.14-23)*

²² Dóo bëpééné mod wéé Yesue, awé ankwe ndím, ákwē-’e ebóbé áyäle edaádərj é mbéb émbē mó áte. Yesue anchoód mó. Ambootéd anyínén, áhōbē-’e akan. ²³ Áde bad bésyāel bényíné nê, yäl enkóm bó áte bwâmbwam. Bën ne bën bémbootéd ahób nén bán, “Éhelle- se ébē né anén mod adfi mwän a mbyaa ríme Dabide awé bésineé-yoo?” ²⁴ Boj áde Befarisia bëwogé nê, bénhōb bán, “Saá ngíne eche Belzebule awé akamlan e'dáédərj bë mbéb chòo ábenlaadté ábíded bad e'dáédərj bë mbéb áte-ye?”

²⁵ Yesue ambíí rímmab mewémten, né-oó, anláá bó aá, “Aloj ké ahéé áde ákábné áte, boj nchemten méesé, débëb. Dyad ké áhéé-’e, ké’e abum á ndáb áde ákábné áte, boj nchemten-ne méesé, déétyéeméé. ²⁶ Né-oó, nzé Satane awanne Satane, né awanne eche yäl. Chán-nō rínmē nkamlen méhenlé atyéem? ²⁷ Nzé ngíne eche Belzebule chòo ímbenladté ábíded bad e'dáédərj bë mbéb áte, né ngíne eche nzéé-’o ábēn bad ábe bëbítde e'dáédərj bë mbéb bëbenladté? Bën bôo békwid nyé nkáá. ²⁸ Boj ngáne édii nén bán ngíne e Edaádərj é Dyöb chòo ímbenladté ábíded bad e'dáédərj bë mbéb áte, nê álumte nén bán nkamlen í Dyöb mǐpédé átinté echén.

²⁹ “Mod eéhēlēé-sé asól á ndáb e mod a ngíne se ádum ábē bwém ésebán asébpé mó ahañ. Amaa-’áá mó ahañ boj atéd ábē bwém é'syāel.

³⁰ “Kénezéé awé éesé ne me, né atângan me. Kénezéé-’e awé eewóngán me âlad, né apáa páán. ³¹ Né-oó, nlângé nyé meé, Dyöb délagsén bad mbéb ké níhéé ríme bébélé ne nzyájé ké ehéé eche bésyáé Dyöb. Boj kénezéé awé ahóbé e'bébtéd é' mekan tângene Edaádərj éche Ésáá éekudté alagsen. ³² Dyöb délagsén kénezéé awé ahóbé eyale é mbéb tângene Mwän-a-Moonyon, boj déelagsénné kénezéé awé ahóbé eyale é mbéb tângene Edaádərj éche Ésáá, ken bôob ké’e á póndé echě ehúe’.

**Á epum dóo béchemeé bwel
(Luk 6.43-45)**

³³ “Nzé epum é’ bwel ébóó, né bwel ábe é’chyáá échê epum bómpe é’bóó. Nzé epum é bwel ébébé, né bwel ábe é’chyáá échê epum bómpe é’bébé. Áyâle á epum dóo béchemeé bwel. ³⁴ Píi e nyâ chén! Chán nyéhèleé-se nyéhób mekan mé bwâm, áde nyé bén nyédií mbéb? Mam míme níloné mod á nlém-tê, mó-’áá mébide mó á nsol. ³⁵ Mod a bwâm abele bwâm áyâle é’bídé mó á nlém-tê wéé bwâm é’kónjnéde. Mod a mbéb-pe abele mbéb áyâle míbídé mó á nlém-tê wéé mbéb íkónjnéde. ³⁶ Nlânge nyé nén meé, á mbwë míme Dyöb dékâädté bad bé nköjsé, mod téé ábë nzom eché enkâj boj ahób ekúkú é eyale téé éché ámbidédté á nsol. ³⁷ Né-óó, kchéé éche wénhöbpé chôo ékâj boj ésûñ nzom káa ékwë nkáá.”

**Béhédne Yesue e’chemléed
(Mak 8.11-12; Luk 11.29-32)**

³⁸ Dóo dojge dé bemeléede bé mbéndé ne Befarisia bélângéé Yesue nén bán “A-meléed, sêhede nén bán élumed sé e’chemléed ábe é’lûmte nén bán echoj ngíne ehúú ne Dyöb.” ³⁹ Yesue antimtén bó aá, “Échén ebébtéd é nyongel, nyéhédéé Dyöb awógen, nyéhede-’e e’chemléed bé menyáké! Boj nyéekudté nzese e’chemléed bé menyáké ábe nkal é’dædæj Jonaa. ⁴⁰ Jonaa ambé e’pun é’láán á abum á súu e mbáá-tê. Melemlem dóo Mwâñ-a-Moonyon ábëë á ndjöb-sé e’pun é’láán. ⁴¹ Á mbwë mé nkáásé, bad bé Ninivé bényemé á soj-tê nchoo ne enén nyongel e bad. Bétyéem mbój eché ékwid enén nyongel e bad nkáá, áyâle áde Jonaa ákánlé’áá bad bé Ninivé eyale é Dyöb, bêntedé abel dé mbéb. Boj mod adé hén bøøb awé atómé Jonaa, boj nyéewoglanné mó. ⁴² Á mbwë mé nkáásé, mmwaád awé akamlánnáá aloj á Seba, anyemé á soj-tê, nchoo ne nyongel e bad b’ chii, átyéem mbój eché ékwid b’ nkáá. Békwé nkáá áyâle áde Solomone áyágté’áá, ane mmwaád ambid se nchabnede wéé nköjsé nísogé áhye dé awóglén mam mé debyéé míme Solomone áyágté’áá. Boj chii nén mod adé hén awé atómé Solomone.”

**Nzé edædæj é mbéb
étímé mod á yël ámpé**

(Luk 11.24-26)

⁴³ Yesue ambád ahób aá, “Nzé edædæj é mbéb ébídé mod áte, ébelé ébwágé á ehyângé áhëd abwág áde ékômméé áte. Nzé eekude, ⁴⁴ ébelé éhób aá, ‘Mëtím ámbid á ndáb eche mémbidté áte.’ Apé áde épakké ébelé étán néé chömchöm eesaá á ndáb-te, néé ndáb esáá áte ne néé bénábpé-’e chô áte. ⁴⁵ Héé ékagkké bøøb, éke épëen e’dædæj bé mbéb bëmpée saámbé ábe é’dé ebébtéd tómaa mwën, boj é’hye é’sól ane mod áte, é’bwög-ke e’dii áhed. Ené póndé, ane mod abâg ebébtéd tómaa ngáne ánsébëë abé. Né-óó, nê dóo ébenlédté ne nyongel e ebébtéd e’chii.”

**Tumbé eche Yesue
(Mak 3.31-35; Luk 8.19-21)**

⁴⁶ Áde Yesue álângéé bad mímén mekan, nyaá ne Yesue baányañ bëmpé bëtyéém á ebwág-te. Béhédé’áá Yesue ábel boj bôðbôó békál. ⁴⁷ Hé dóo mod nhög álângéé Yesue aá nyaá ne baányañ bëpédé, bésine mó ebwág-te, ákalen mó.‡ ⁴⁸ Héé átímtné ane mod aá, “Nzéé adé echém nyaj, benzéé-’e bédé bånned?” ⁴⁹ Hé dóo Yesue ányítanné ábë bembapsekáá boj áhóbë aá, “Echém nyaj ne bånned bôó bén! ⁵⁰ Kénzéé awé abele mam míme awêm Titéé awé adé ámín áhëdëé adíi mwånned abé-’e echém nyaj.”

13

**Ngan e mbál-e-bü
(Mak 4.1-9; Luk 8.4-8)**

¹ Mmê mbwë mën ámbid e nê, Yesue ambid á ndáb-te wéé ámbëë, áke ádyëë ásë á nkin mé edib-é-nzab é Galilia, áyáged bad. ² Bad ábe bëmpé áhed bëntömtén abuu áte. Né

‡ 12:47 Dojge á kálag dé e’só déewóó’é mímén nchoo.

dénkəŋ ansól á bølε-tê, ádyēē ásē âyáged bó. Ábê bad bésyāəl bétyéēm á nkin bëwōglān mó. ³ Abënládtáá ngan âyáged bó mekan híin. Ankalé bó ngan aá, “Nkwel-é-nzag nhógo anké mbál asob á nzag-tê. ⁴ Ade ásobeé mó nê, doŋge dénhūn á nzii-tê, menjøn mémpé, mémad mó asômted. ⁵ Doŋge dénhūn á meláá-tê wéé ndøɔb énkëmbuu'́é áte. Énwâmsen abíd ásē ngáne ndøɔb énkêñchabpé ásē áhed. ⁶ Boŋ née enyen é ngíne épédé, énhyâad ábê bwěm é 'wé-'ε, áyäle nkaj ménkênsónlé bó á ndøɔb-tê bwâm. ⁷ Mbál mémpéé ménhūn wéé mekôd médíí. Née mekôd mêt mékwogé, mékár akwog ade ábê bwěm. ⁸ Boŋ doŋge dé mbál démpéé dénhūn á ndøɔb e bwâm. Mmén mbál mémbid ásē bwâm, ínchyáá-'ε bwâmbwam. Doŋge dé e'sog dénwâlē mbwókel é mbum, doŋge móom ntóób, ábíníí-'ε móom méláán.” ⁹ Ade Yesue ámádé nê, ambád áte aá, “Kéñzéé awë awóó metíú awóge’!”

Nzom echě ekáé boŋ Yesue
ábenláád ngan âyáged bad
(Mak 4.10-12; Luk 8.9-10)

¹⁰ Ámbid e nê, bembapee ábe Yesue bëmpé mó bënben boj bésedté mó bánken, “Cheé ékáá boj ébenláád ngan âyáged bad?” ¹¹ Yesue ankwentén bó aá, “Dyöb ábágé nyé kunze ábíi kun é nkamlen mí míin, boj ene kunze eébagneédé ne bad bëmpée. ¹² Kéñzéé awé awóó nsôjten í kun é nkamlen mí míin, Dyöb débäd mó mímê nsôjten abe, ábel néñ átômtén awój. Boj kénzéé awé eewóo, Dyöb dékobén mó ké mwă nsôjten awé áwóó. ¹³ Nzom eché ekaá boj níkanlé bad ngan edíi áyäle bényíne’, boj bëecheméé, bëwóge’, boj bëesõjtnanné. ¹⁴ Nén álônte e’yle ábe Dyöb dénlómenné nkal é’dædæj Yesayaa aá, ‘Nyééwög awóg-ne-awóg boj nyéesõjténné, nyéényín, anyín ne anyín boj nyéechemmé.

¹⁵ Nhóbe nén áyēle ábén bad béeheléé dyam ayáge ámpē.
Békólé metúu, béládé-’e míd. Béewóhké, béenyín-naá dyamdyam.
Nzé énkembé nê, né bényin, béchém-’e.

Né bēwōgēn metúu, nlém ímāb-pe ísôjten.
Nzé bébélé-’e nê, né bétimén me, né měchoód-te bó.’ ”

¹⁶ Héé Yesue ábádéé ábē bembapéé aláa aá, "Nsíme índé ne nyé áyāle nyênyíne' mam míme nyênyíneé, nyéwōgē-'e mam míme nyéwógeé. ¹⁷ Ne mbále, nlângé nyé nén mée, bekal-bé-'dáédəj ne bad bé Dyōb híin bénwanén ânyín mekan míme nyênyíne ne âwog mekan míme nyéwogé bon bénkênyínné, bénkênwog-kaá.

Yesue atógvé ngan e nwén-é-imbál

(Mak 4.13-20; Luk 8.11-15)

¹⁸ “Bəəb-pəó nyésöjtən ngáne enén ngan e nwén-é-mbál édíí. ¹⁹ Nzé mod awóge eyale tângene nkamlen m̄ míñ, boj eesöjtene chó, Satane abelé áhye, ahúd mó chó á nlém-tê. Échén ndín é bad édíí nêngáne mbál ríme ínhúné á nzii-tê. ²⁰ Mbál ríme ménhūn á meláá-te ínlûmte bad ábe békobe’ eyale é Dyöb ne menyinje ábwōg-ábwōg áde bewóge chó. ²¹ Boj échê eyale éewennādtē bó á nlém-tê. Bédúbpe chó á esónj é póndé boj nzé ndutul ne metake bépédé áyâle échê eyale, bédol yâl ámbid. ²² Mbál ríme ínhúné á mekâd-te ínlûmte bad ábe bewóge eyale é Dyöb, boj kâéj ne á asog, mpulé mé nköjsé ne adaj dé abud á bwém awój ákajj bô nlém áte. Nê ábele’, béeheléé ahæjlen âbel mam mé bwâm. ²³ Mbál ríme mó-’e méntân kâse e ndəəb ínlûmte bad ábe bewóge eyale é Dyöb boj bésöjtán-ne chó. Ábén bad békere kâse é mekan nêngáne e sóg é’ ngun ábe é wánlé mesongé mé mbum é ngun mbwókel móom ntóób, ne móom méláán.”

Ngan e mesisonj

²⁴ Yesue ankalé ene ndun e mod ngan empée aá, “Nkamlen mí míñ ríde nêngáne mod awé awéné kunze é mbál áwē nzag-tê, ²⁵ boj ámbid e nê, nkuu nhóg áde bad bémáá akún, mod a ekoyí awé ane mod nhóg, anké á nzag e ngun-tê wê, awén mbál mé mesison ²⁶ Áde ngun chê ébóótédé akwog, dôo bad bényíné bán mesison mómpé mékwoge’ áwédt-te. ²⁷ Bembalede ábe ane nwóó-nzag bêmpé áwē, bésedté mó báñken, ‘A-Sáñ, éesaá

mbále bán, mbál n̄ ngun m̄ bwâm móo wénwennē á nzag-tê-ye? Chán ébénlédé boj mesisoj mékwōg áwēd-te?’²⁸ Dóo ákwentanné bó aá, ‘Mod a ekoyí awêm nhóg mó awéné ímmê mesisoj.’ Ábê bembæledé bênsedéd mó bánken, ‘Séke séhub mesisoj mêt ásē-ye?’²⁹ Ankwentén bó ámpē aá, ‘Aáy. Nyéehubé’, áyâle nzé nyéhóbé bán nyéhubé’, nyééhubén bôobé ngun.³⁰ Nyémwé ngun bôobé mesisoj békwoge’ káej ne áde póndé épée eche bépâdté chó. Ene póndé dóo mélâa’é bepâdté meé, bésébe béhûd mesisoj, bélad mó áte boj béhyáad mó. Ámbid e nê, dóo bépâdté ngun, bélâné chó áwêm etág-te.’”

Ngan e mbál-e-bú

(Mak 4.30-32; Luk 13.18-19)

³¹ Yesue ankalé ene ndun e mod ngan empée aá, “Nkamlén mí míñ índé nêngáne mbál-e-bü eché mod átéde bon awén áwē nzag-tê. ³² Mbál-e-bü edé mwămpin bwâmbwam nzé béhágténé chó ne mbál mémpée. Bon nzé ekwogé, ekale’ tómaa mel mésad mésyáðil. Menon méhyag-ke müm alón á ngen-tê.”

Ngan e esulten

(Luk 13,20-21)

³³ Yesue ambé ákālē bó ngan empée aá, “Nkamlēn mí míñ ndé nêngáne esultēn éche mmwaád ámuúnéndé asii á pân é mbumé n̄ ngun éláán kéón̄ ésule.”

Nzōm echē ekəá boŋ Yesue
ábenláád ngan

(Mak 4.33-34)

³⁴ Yesue abénládtáá ngan âyáged bad. Eeyágte'aá dyamdyam ésebán aběnlédé ngan.

35 Ambel nén âloned e'yale ábe nkál e'déadən ánhōbpē nén áá,

“Mëbënwléd ngan nzé nhóbe wéé bad. Mëyägëd bô mam mme bénkembíí’é bootya ámbooted mé nkönisé.”

Yesue atógké ngan e mesison

³⁶ Yesue antedé ene ndun e mod, áke asól á ndáb-te. Áhed dōo ábē bembapēs bétánemó, boj bélāngē mó bán, “Tógnéd sé ngan e mesisoj.” ³⁷ Yesue antimté bó aá, “Mod awé anwén mmmē mbál m̄ bwām adíi Mwǎn-a-Moonyoŋ.” ³⁸ Nzag edíi nkōjsé. Mbál m̄ bwām n̄díi bad ábe bédé ásē e nkamlen í Dyōb. Mesisoj médií bad ábe Satane. ³⁹ Mod a ekoyí awé ane nwóó-nzag-ke, awé anwén mesisoj áwē nzag-tê mó adé Satane. Póndé eche bépádeé ngun chó edé asog dé nkōjsé. Bepád bé ngun-ne bédíi ángel. ⁴⁰ Ngáne béladeé mesisoj áte boj běhyáad mó, melemlem nê dōo ébēe ne bad ábe Satane, nzé nkōjsé mpédé á asog. ⁴¹ Mwǎn-a-Moonyon ālōm éche ángel áhúd bad ábe běbelte bad běmpēe mbéb, ne bad bésyāel ábe běbèle mbéb. ⁴² Bébwēm bó á dū-á-muú, áhed-taá běchyeé’é, bědyāg-ke mesoj á nsəl. ⁴³ Ene póndé bad ábe běmběl-le ngáne Dyōb áhedeé, běpené’ née enyen á nkamlen wéé echab Sáŋ. Mod ké ahéé awé awóó metúu, áwóge’.”

Ngan tângene Nkamlen mímín

Ngan e nhon m̄me mēnkoné

⁴⁴ Yesue ambád ngan empée áá, “Nkamlén ím míñ índé nêngáne nhon íme ménkojnéd á nzag-tê, boj néé mod nhóg ádibté mó, akútén mó. Menyinje míme ámbéé ménkăj anke bwém ésyéél ábe ánwōngé asóm, ábel nén áke áchan ene nzag.

Ngan e aláá dé etóqnén

⁴⁵ “Nkamlen mí mínl índé nhægtén ámpē nêngáne mod a nyongé awě ahedé’áá meláá mé etognén míme índé nkun bwâmbwam míme áchanee. ⁴⁶ Anyín áde ányiné aláá áde átómtené abon bwâmbwam, áde bésoméé, anké ábē bwem ésyäel asóm, áchän-ne dó.”

Ngan e mbínzé

⁴⁷ Yesue ankăl ngan empée aá, “Nkamlen ím míin índé nêngáne mbínzé eche bekób-bésú békób-wémé á edíb-te boj békób nyaa é súu ésyāēl. ⁴⁸ Áde mbínzé émáá alón, bêndöl

chó á nkin, bedyéé ásē ábən súu áte. Éche êmboj adyé bénhē chó á melongé-te. Éche chó-'e énkémboj adyé, bempim. ⁴⁹ Né-oó enén ngan elûmte ngáne asog dé nkörjsé débē. Dyób délom éche ángel áhúd bad bé mbéb átintê e bad ábe bésáá. ⁵⁰ Bébwém ábê bad á dű-á-muú. Áhed-taá béchyéé bedyág-ke mesoŋ á nsəl.”

Ayáge dékōolé ne dé nchun

⁵¹ Yesue ansedéd ábē bembapee ké bésójténé mímén mam. Béñkwentén mó bán bésójténé. ⁵² Né-oó Yesue anláá bó aá, “Meléede a mbéndé ké ahéé awé ayágké tângene nkamlen mí min adíi nêngáne nwóó-ndáb awé abítde bwém bé ekóolé ne bé nchun wéé ákoŋgeé bwém.”

Bad bé Nazaret béekobeeé Yesue

(Mak 6.1-6; Luk 4.16-30)

⁵³ Áde Yesue ámáá ayáged ne ngan, anhidé ádē abwóg á hōm, ⁵⁴ asú ámbid áwe dyad wéé ámbidté. Áwed ayágté'áá bad á ndáb e mekáne. Bad ábe bénwōg ngáne áyágtéé, yäl enkóm bó áte bwâmbwam. Bésedté bánken, “Héé mûmó ákúdé enén ndín e debyéé? Chán mûmó ámwagké-'e mímén menyáké mésyääl abel? ⁵⁵ Kíné saá mwän a kápéntaa ádíi-yé? Saá Maria achyáá mó-yé? Kíné saá Jemse, Josebe, Simone ne Judase bóo bédé baányaŋ-ε? ⁵⁶ Baányaŋ bé bebaád bésyääl-le ámpē báedyéé'á dyad-tê hén ne syáné-yé? Héé ákúdé enén ndín e debyéé? Héé ákúdé enén nyaa e ngíne éché ábenleé mímén menyáké?” ⁵⁷ Né-oó, bénkoó Yesue. Anláá bó aá, “Nkal e'dáédaŋ awóó” edúbé hōm ásyääl étómeé áwé dyad ne áwe túmbé.” ⁵⁸ Ngáne bénkendubéé Yesue, enkémbeñlé menyáké híin áhed.

14

Kwééd eché Jõne Ndusene

(Mak 6.14-29; Luk 9.7-9)

¹ Ene póndé Herode awé akamlánnáá alon á Galilia anwóg mam míme Yesue ábélé'áá. ² Dóo álângéé ábē bembalede aá, “Anén mod, Yesue, adíi Jõne, Ndusene awé ammad awé boj apuúdé. Néé ákáá boj awón ngíne ábel mímén menyáké mésyääl.” ³ Herode anhób nê áyále anlóm bad aá békôb Jõne, béhaŋ mó, böhé-'e mó á mbwóg. Ambel nén áyále mwaád, Herodyase, awé mwányar Filibe ánsébëë awón. ⁴ Herode anhé Jõne, Ndusene á mbwóg áyále Jõne anláá mó nén aá, “Weewoo'é kunze áwónj Herodyase, mmwaád awé mwányon.” ⁵ Kénéé Herode áhédé'áá Jõne, Ndusene awúu, abédé mbwóg ne bad bé Israel. Bad bé Israel bénđubé bán Jõne adíi nkal e'dáédaŋ. ⁶ Boj Herode antím Jõne awúu. Nén démbenléd epun-éé Herode ábélé'áá ngande áwémten epun-éé áchyáadté. Échê epun mwän-a-mmwaád awé Herodyase anság esáke á'só é' bad bésyääl. Nén dénwögëd Herode menyinge bwâmbwam. ⁷ Nén démbél ambe mó akag. Anhób nén aá, “Mmwâg melé nén, měbë we kchéé éche éhedeé.” ⁸ Nyaá anláá mó chõm éche átahgené saá ahedéen. Né-oó anláá Herode aá, “Bág me nló míme Jõne, Ndusene á taplét-te hén bɔɔb.” ⁹ Nén dénwögëd käh Herode ndutul boj ngáne ámmadté melé amwé á'só wéé ábē beken, ambeé kunze aá böhýene nló míme Jõne ábē ane mwän-a-mmwaád. ¹⁰ Né-oó anlóm bad á ndáb e mbwóg ásél Jõne nló. ¹¹ Bémpseén nló mímed á taplét-te, böhë ane mwän-a-mmwaád, mó-'e ábē nyaa. ¹² Ámbid e nê bembapee ábe Jõne bénkë á ndáb e mbwóg bétéd mó ndim béké bélime, boj béké bélângé Yesue dyam áde ábenlédé.

Yesue adídté ndun e mod

(Mak 6.30-44; Luk 9.10-17; Jõn 6.1-14)

¹³ Áde Yesue áwóge dyam áde ábenlédé ne Jõne, ansol á bölé-tê áke á abwóg á hōm wéé ábédé mwëmpen. Boj áde bad bëwóge bán Yesue amaá ake á bölé-tê, bénchené mímâb myad békéen mekuu áhíd mó ámbid. ¹⁴ Áde Yesue ábídé á bölé-tê, boj anyín ndun e mod, antómtén bó ngoł abé, ámād-te bó nkole. ¹⁵ Áde bín é'bóótédé ahín, ábē bembapee bëmpé áwé, böhöbë nén bán, “Hén áde á etún-tê, póndé emaá-'e atóm bwâmbwam. Láá ábén bad bétimé' á myad-tê míme méde benben, ábel béchan ndyéed eche bedyéé.” ¹⁶ Dóo Yesue

átímtanné bó aá, “Béētājeneé ake. Nyébó nyébe bó chōm éche bédysé.” ¹⁷ Dóo béhóbéé
bán, “Sêwóó e’wle é’taan ne súu ébe chémpen.” ¹⁸ Yesue aá, “Nyéhyeeene.” ¹⁹ Áde ábē
bembapēs békabééndé mó chó, anláá ene ndun e mod aá bédysé ásé á nkəákə mîn. Hê dóo
Yesue awánlé ábē e’wle é’taan ne échē súu ébe á mekáá boj ánəné ámīn áságñān Dyöb.
Ankabtéed bó áte, boj ábagé ábē bembapēs aá békabe ene ndun e mod. ²⁰ Bad bésyāél
béndyé ene ndyéed békód, élyāg-ke ásé. Néé béládē eché elyāgé ásé, enlón e’lón dyôm
ne é’be. ²¹ Mesongé mé bad ímme méndyé ene ndyéed mémbē ké e’kálé é’taan. Mmē
mesongé mé bad mébédé-e baachóm. Bénkéntóngé bebaád ne bëndem.

Yesuε akií á mendíb-mîn
(Mak 6.45-52; Jøn 6.15-21)

15

Ayéged á bad bé' baoód
(Mak 7,1-13)

⁸ ‘Ábēn bad bēbage mē edúbé é nsəl ngēn, bon rímab nlém méesaá áwêm.

⁹ Edúbé éche bébageé me éesaá dyamdyam, áyāle békágte bad âhid mbéndé é baányon byánán édii mbéndé é Dyöb.’ ”

* 15:6 Sáá bó nyan; donge á kálag dé e'só déewoo'é bó nyan.

*Mam míme méb*ele boj
mod eesáá' á'sō é' Dyöb
(Mak 7.14-23)

Adúbe áde mmwaád a Kanahan (Mak 7.24-30)

Yesue achõnté ndun e mod

Yesue adídté ndun e mod
(Mak 8,1-10)

³⁴ Yesue anseédé bó aáken, “E’wele é’tâj nyéwóó?” Bénkwentén bán, “E’wele saámbé ne nguse é’súj ésad.” ³⁵ Dáj Yesue álángé ene ndun e mod aá hédyee ásé á ndzab-h-té

ne níguse e suu esad. ³⁵ Dóð Yesue alarje ene ndun e mod aa bedyee ase a riðjoo-te. ³⁶ Héé átéde ábê e'wele saámbé ne échê súu, ásagnán Dyðb, ákabtáád bó áte, ábagé ábê bembapee, bó-'e békabpé ene ndun e mod. ³⁷ Bad bésyáðl bénđyé ene ndyéed, békódte, káøn elýäg-ke ásē. Echë enlyäg ásē enlón e'lón saámbé. ³⁸ Mesongé mé bad rímse

méndyē ene ndyééd mébédé e'kálé é'niin. Mmê mesongé mé bad mébédéé baachóm, bénkéntóngé bebaád ne bëndem. ³⁹ Héé Yesue álângéé ene ndun e mod aá bésūé' áwab mendáb. Áde ámáá bó aláa nê, ansól á bõlé-tê, áke á mbwóg e Magadan.

16

Béhédné Yesue e'chémled é' menyák

(Mak 8.11-13; Luk 12.54-56)

¹ Ámbid e nê, Befarisia ne Besadusia bênké wée Yesue ákag mó. Bénlää mó bán álumed bô e'chemléed ábe é'húú ádyob. ² Dóo Yesue álângéé bô aá, "Nzé ngukél epedé, nyêhóbe bán, 'Abobe áyage ámîn, nê álûmte bán bîn bêboj chän.' ³ Nzé bîn é'sângé-'e, nyêhóbe bán, 'Abobe áyage ámîn, bîn-ne é'wâbpé, nê álûmte bán mbúú échä.' Nyêbíe' bîn alâj ámîn, ngâne bêbëé, boj nyéehëlëé mam ímme mébenlad chii achem.* ⁴ Échén ebébtéd é nyongel, nyéehëdëé Dyöb awógen, nyêhëde-'e e'chemléed bé menyáké! Boj nyékudté nzese e'chemléed bé menyáké ábe nkal é'dâdëñ Jonaas bënpen." Dóo átédté bô, boj ákag.

Esulten éche Befarisia ne Besadusia

Easter scene
(Mark 8.14-21)

¹⁰ Nyêchâténé kâáj ne adíde áde méndidéé e'kélé é' bad é'niin ne e'wele saámbé. Ámbid eché bómpé bémáá adyé, eché enlyág ásé chó-'e enlón e'lón é'táj? ¹¹ Áde nílángé nyé meé nyétédén esulten póndé, saké ewele chén chóó níhbé'áá. Nyétéd póndé ne esulten é Befarisia ne Besadusia." ¹² Dóó bembapee bétímé asôjten bán saké esulten éche bébenléé ewele chóó Yesue ahóbé'áá áá bétédén póndé boj ayáged áde Befarisia ne Besadusia býágté'áá dóó ákónté'áá ahóó.

Petro áá Yesue mó
adé Ane-awě-Béwógté

(Mak 8.27-30; Luk 9.18-21)

¹³ Yesue anké á mbwógi e Kaisaria Filipi. Áde ápédé áwed, dôo ásedteé ábë bembapee aáken, “Nzé-módé bad bô béhóbeé bán Mwän-a-Moonyor adé?” ¹⁴ Béntimtén mó bán, “Donje á bad béhóbe bán edíi Jøne Ndusene, bémpée bán Elaijaa, ábíníí-’e bán Jeremayaaké’e nkal é’déadéji nhög ampée.” ¹⁵ Héé Yesue ásedteé bô aáken, “Boj nyébën-ne, nzé-módé nyéhóbeé bán ndé?” ¹⁶ Simøn Petro ankwentén aá, “We-éé edé Ane-awé-Bewógté, Mwän a Dyöb áde á alongé.” ¹⁷ Yesue antimtén aá, “Nnam ndé ne we, a-Simøn, mwän awé Jona. Saké moonyor álájngé we nê, boj echem Sáy awé adé ámín móo ahóbté we.

¹⁸ Né-oó a-Petro nlânge we,† weé edé ndim-e-aláá. Ámín e ene ndim e aláá dôo mélóngé ímmêm mwembé. Ké ngíne e kwééd éehenlé ímmê mwembé ahóbed ásé. ¹⁹ Áwôj dôo mébeé mekii mé nkamlén mí mí. Kéchéé éche ébéné á nkönsé, né ébennédé ámín. Kéchéé-’e éche ébagé kunze a nkönsé, né ébagnédé kunze ámín.”

*Yesue ahóbé tângene
ŕímē metake ne echě kwééd
(Mak 8 31-9 1; Luk 9 22-27)*

²⁰ Héz Yesue ásiméé ábē bembapēs etúu áte nén bēēhōbē bán móo módē Ane-awé-Bewógté. ²¹ Bootya ene póndé. Yesue ambootéd ábē bembapēs alúmed áte áá mótāngēnē

* 16:3 Dongé á kálag déēwóó' É e'yale ábë Yesue ngáne é'ténlédé á nchoo 2 ne 3. † 16:18 Petro: á ehbëh é Grikia adíi ndim e aláá

ake á Jerusalém. Áwed-taá mókudté metake híin á mekáá mé bad bémbáá, beprisë bémbáá ne bemeléede bé mbéndé. Aá bétwūú mó, boj e'pun ábe é'lonténé é'láán móžpuú. ²² Dóo Petro átímne Yesue á nkèg boj ákègé átimed mó áte, áhōbē nén aá, "A-Sáj, Dyöb déekwénténné mbéd aá nén ábenled ne wé." ²³ Héé Yesue ákúnnédé boj áhōbē wéé Petro aá "Hidé me á'so-te, a-Satan! Cheé ekéa'é me ábel mewémten mé Dyöb? Ehóbe nê ne mewémten mé moonyon saké mé Dyöb." ²⁴ Dóo Yesue álângéé ábē bembapé aá, "Kénzéé awé awémténé me ahíd, atángéné ásob yél mendib, ápém ádē awog, boj áhíde me. ²⁵ Áyäle kénzéé awé ahede ádē alongé asoŋ, ábōd dó. Kénzéé-'e awé ábōd ádē alongé áyäle echém, ákud dó. ²⁶ Nsyáj níhéé mod ákudté nzé akudé nköjsé ísyāel boj abódé ádē alongé? Ké-'e, cheé mod áhèlesé ábē ákade ádē alongé? ²⁷ Nlângé nyé mmén mekan áyäle Mwän-a-Moonyon ápě ne ehúmé éche eche Sáj nchoo ne éche ángel. Ene póndé dóo ákōgsenné ké'e ánamédté kénzéé tângene chom éche ámbeñl. ²⁸ Ne mbále nlângé nyé nén meé doŋge á bad átinté echén béenyínenné kwééd díid ésebán bényíne néé Mwän-a-Moonyon ápééné mmé nkamlen á nköjsé."

17

Yél ehäyléné Yesue
(Mak 9.2-13; Luk 9.28-36)

¹ Ámbid e epun ntóób Yesue ankeén Petro ne Jemse bó mwányan Jone á mbóod eché echabé ámín. Bénpen-eé bémbé áhed. ² Dóo ábē bembapé bényíné néé áhärjléné, e'só é'pené mó á nló nêngáne enyen. Mbóté chó-'e épübē mó féréd émwaá-'e áte. ³ Ábwōg-ábwōg, ábē bembapé bényín néé Mosee ne Elajaa békale. ⁴ Dóo Petro álângéé Yesue aá, "A-Sáj, ébóó ngáne syáá dédií hén. Nzé edéá, mélōj e'bem é'láán, échōj, éche Mosee ne éche Elajaa." ⁵ Eépedéé ké amad á nsəl boj mbag eché ekine áte ekútán bó. Héé bégwógeé ehób ébíde á mbag-té nén, "Awem Mwän a nlém nén, awógté me menyinge. Nyéwógne mó." ⁶ Áde ábē bembapé bégwóge échê ehób, bémbwōg mebóbón, bésöj-'e e'só ásé ne mbwōg ní ngíne. ⁷ Dóo Yesue ápédé wéé bémbéé boj ábānē bó ekáá á yél, áhōbē aá, "Nyéhíde ásé, nyéebáá." ⁸ Áde bényíné nló ámín, bényín Yesue mwénpen. ⁹ Áde bóbóo bésudeé á mbóod mîn nê, dóo Yesue ásímeé bó etúu áte áhóbe' aá, "Nyéelângé modmod dyamdyam áde nyéyíné káéj ne á póndé eché Dyöb dépuúdté Mwän-a-Moonyon á kwééd." ¹⁰ Héé ábē bembapé bésedteé mó bánen, "Cheé ekáá boj bemeléede bé mbéndé békabé néen báni Elajaa atángéné asébe dé ape boj Ane-awé-Bégwógté ápě?" ¹¹ Yesue antímtén bó aá, "Ne mbále, Elajaa atángéné asébe dé ape, atíi-'e mam mésyāel. ¹² Boj nlângé nyé nén meé Elajaa ammád ape, boj bad bénkénchemmé mó, bémbeł-le mó ngáne bêndængé. Melemlem né-'aá Mwän-a-Moonyon átagké áwab mekáá." ¹³ Enén póndé dóo ábē bembapé bésöjténné néen báni Jone, Ndusene móo áhóbeé.

Yesue achöjté mwän a mwenchóm
awé edéadæj é mbéb émbéé áte
(Mak 9.14-29; Luk 9.37-43a)

¹⁴ Áde Yesue ne ábē bembapé bétímé ámbid ámpé boj bétán ndun e mod, mod nhög ampé awé, akog mebóbón, boj áhōbē nén aá, ¹⁵ "A-Sáj sôn, wógo awem mwän ngol. Awem mwän a mwenchóm akonle nkole mé ekikíd, atage bwâmbwam. Ayägké ahún káéj ne á muú-te ne á mendib-te. ¹⁶ Mempeén mó wéé ábōj bembapé, boj béeheleé mó achood." ¹⁷ Dóo Yesue átímtné aá, "Wáá! Nyé bad bé' chii, mbeltéd mmén méetyéeméé, nyéewoo-'áa adúbe. Chán mépeé nyé adyen hén-éé? Chán mépeé nyé awesén-é? Hyenáád me mwän awed hén." ¹⁸ Dóo Yesue ákamlanné edéadæj é mbéb éche étágté'áá ane mwän aá ébíd, boj ébíd-te. Ábwōg-ábwōg ane mwän áchōj-'e. ¹⁹ Ámbid e póndé bembapé ábe Yesue bénkénhél échê edéadæj é mbéb abíded?" ²⁰ Dóo Yesue átímtné bó aá, "Áyäle adúbe ádē nyé mwämpin. Ne mbále nlângé nyé nén meé, nzé nyéwóó adúbe

áde ádé mwămpīn nêngáne mbél-e-bŭ, né nyéēkamlén échén ekone bán éhide hén, étim híníí, étim-me nê dĕn. Dyam ké ahóg déetómmé nyé áte. ²¹ Nyéhèle-sé nyébídéd enén ndín e edədən é mbéb nzé nyékânné, nyédidé-'e yĕl nzaa á mekáne-tê.”*

Yesue ahóbé ámpē

ngáne bad békúú'é mó

(Mak 9.30-32; Luk 9.43b-45)

²² Yesue ne ábē bembapēs bénladén áte hōm ahóg á mbwógs e Galilia. Héé álângéé bó aá, “Bébée Mwǎn-a-Moonyon á mekáá mé baányoŋ. Bó-’aá békéwū mó. ²³ Boŋ Dyōb dépuúd mó ámbid e e’pun é’láán.” Áde bembapēs békéwógs né, bénwógs ndutul bwâmbwam.

Yesue asăngé tááse e Ndáb-e-Dyöb

18

Nzéé atómténé mod ambáá
abé á'sō é' Dyōb?

(Mak 9.33-37; Luk 9.46-48)

¹ Éebeméé áte ámbid e nê, bembapée ábe Yesue bêmpé áwé, bésédé dmó bánken, “Nzémódé-’e atómténé mod ambáá abé á nkamlen mí míin?” ² Hé dôo Yesue áchénlé mwéndem nhög, átiidé mó áwab tîntê, ³ boj áhôb aá, “Ne mbále nlângé nyé néen méé ésebán mod ahäyléné adé alongé boj abé nêngáne anén mwán, eéhélëé-se asól á nkamlen mí míin.” ⁴ Né-oo, kenzéé awé asüdté yél nêngáne anén mwán né móo atómténé mod ambáá abé átintê e bad ábe bédé ásé e nkamlen mí míin. ⁵ Kenzéé awé akobé enén ndín e mwán á dñi ádêm, né akobé me. ⁶ Boj kenzéé awé abëlté enén ndín e mwéndem awé adúbpé me mbéb, émbé mboj né bêntáé ene ndín e mod sánkalaa a aláá á nkéj, boj böhünéd-te mó wée edib é nkwé étómténé achab ásé. ⁷ E'béb é' yél áte ne nkörjsé áyële mekägsen ríme mébelte bad mbéb. Mekägsen métángéné ape, boj e'béb é' yél áte ne mod awé abëlté mod ampée mbéb. ⁸ Nzé échoj ekáá ké’ ekui ébelte we mbéb, esél chó, épim. Édé mboj we âkud alongé ne eped é yél tómaa we âwónj mekáá mébe ké’ mekuu mébe boj bëbwém we á muú ríme méedimé’. ⁹ Melemlem nzé ádoj dïd ábelte we mbéb, ehúd dô, épim. Édé mboj we âkud alongé ne dïd ahög tómaa we âwónj mïd mébe boj bëbwém we á dû-á-muú.

Nqan e nídyəŋ mí mbód míme mémbə̃

Projekttag **(Luk 15,3-7)**

¹⁰ "Nyényin nén bán nyéetédeé mímén mpín mí băń ké nhóg nkójtéd, bán méesaá etógnén. Nlânge nyé nén meé ángel éche énōne' bó ébâg á'sō ábe echem Sán awě adé ámīn áhóbe bó.* ¹² Chán nyényiné ádén dyam? Nzé mod awóó mbwókel é ídyoŋ mí mbód, boŋ nhóg míbóó, ngómē ätedé mímínií móom mé ídyoŋ mí mbód abog ne abog wéé bédyáké medyé á ekone mîn áké dé ahed mímê nhóg míme míbóó? ¹³ Ne mbále nlânge nyé nén meé, nzé adibté'-e mó abelé awágén mó menyinge tómaa mímínií móom abog

* 17:21 Donge á kálag dé e'só déewóó' É mímén nchoo. † 17:25 Ene póndé beken bóst bésáñgé'áá táásé é kâj. * 18:10 Donge á kálag dé' sō ábáde nchoo 11: Nyébíí néñ bán Mwán-a-Moonyonj apedé âson bad ábe bébóó.

ne abog míme ménkembóo. ¹⁴ Melemlem nê dóo echen† Sáŋ awě adé ámīn éehedéé áá ké mpín mí mwéndem néé mmén mbóo.

Mwănyor awě aběnlé wę awusé

¹⁵ “Nzé mwānyoŋ aběnlé wé awusé, tán mó wéé nyúmō bad béké běnpen nyédií, échu mó dó aláa. Nzé achemé ádē awusé, né nyé mwānyoŋ nyêtimé ásé.[‡] ¹⁶ Boŋ nzé eékwentene áá mópānné wé, etéd mod ampée nhóg ké’é béké ékēén áwé, ábel nén, ‘Mbéb ké ínhéé míme éhóbé wéé abelé wé míbyén ne mbóny ébé ké’é éláán.’[§] ¹⁷ Nzé eékobé káéjne chōm-éé échê mboŋ éhóbé, épēén mó á mwembé. Nzé eékwentene ké bó awóglén, etéd mó née mod awé eedúbpe áyāl e míme nsônten káa nêngáne nsaad-a-tááse.*

¹⁸ “Ne mbále, nlânge nyé nén meé, kchéhéé éche nyébéné á nköjsé ébennédé ámín. Kchéhéé-’e éche nyébágé kunze á nköjsé, ébagnédé kunze ámín. ¹⁹ Nlânge nyé ámpé né n meé, nzé nyé bad bébe nyéchémténe áyâle kchéhéé boj nyéhédé chó ámekáne-tê, echem Sáj awé adé ámín ábë nyé chó. ²⁰ Áyâle wéé bad bébe kë’ë béláán béládné áwêm dñ, mémpé ndé áwab tîntê.”

*Ngan e mod-a-nsón a kâñ
awě enkênlagsén waáb*

[†] 18:14 Echēn: donge á kálag dé'sō áwóó echem. [‡] 18:15 Aběnlé we awusé: donge á kálag dé e'sō áwóó abelé awusé. [§] 18:16 Nén áténlédé á kálag e Dyōb, Diötteronomi: 19.15.

* 18:17 Bad bé Israël bénédubé néen bán besaad bé tááse bőo bétómténé bad bé mbéb abé, bán béesól-laá á nkamlen mí míin. † 18:22 Moom mé ngen saámbé ne saámbé: donje á kálag dé e'só awóó móom mé ngen saámbé ngen saámbé.

19

Ayáged tângene anan
dé mmwaád á e'wóngé
(Mak 10.1-12)

¹ Áde Yesue ámáá mímén mekan ahób, anhidé á Galilia áké á mbwág e Judeya, áchābē á péd e edib é Jodan eníníí. ² Ndun e mod enhíd mó áwed, áchōōd-te bad bé nkole. ³ Donge á Befarisia bémpe áwé âkèg mó. Bénsedéd mó bánken, “Mbéndé echéd ebagé kunze nén bán, mod ánan awé mwaád áyäle nyaa e nzom ké ehéé-ye?” ⁴ Yesue ankwentén bó áaken, “Nyéeláá’é á kálag e Dyöb nén bán á mbooted, Dyöb dênhag bó mmwaád ne mwenchóm-e?” ⁵ Dyöb á hóbpe aá, “Áyäle né-óó, mwenchóm átedé saá ne nyaj abé ne mwaád, boj búmō bad bébe bétim mod nhög. ⁶ Né-óó, búmō béesaá ámpē bad bébe, boj bédii mod nhög. Né-óó, échë Dyöb áladé, modmod eepáá’.” ⁷ Hé dós ábê Befarisia bésedteé mó bánken, “Nzé édé nê, cheé-ð ênkäj boj Mosee ábagé bad kunze aá, mod ábe mwaád kálag echë elümte nén bán, e’wóngé é’máá boj ánan mó.” ⁸ Dós Yesue álângéé bó aá, “Mosee ambäg nyé enén kunze áyäle nyélélé nlém á abum. Énkembáá nê á mbooted mé nköjsé. ⁹ Né-óó, nlângé nyé nén meé, mod ké ahéé awé anané mwaád ésebán ane mmwaád akábé asón, nzé ene ndín e mod awóó mmwaád ampée, né akábé asón.” ¹⁰ Hé dós ábê bembapéé bélângéé mó bán, “Nzé nén dós mekan mé mmwaád ne nchóm médii, né éesaá nsyáñ âwónj mmwaád.” ¹¹ Yesue antimtén bó aá, “Saké mod asyäál ahele ákob ádén ayáged. Boj dékobnéd ne bad ábe Dyöb ábagé dós. ¹² Nyébíí nén bán, nzom édé híin échë ékáá boj bad békewóó bebaád. Behóg bédé ábe békhyááténé nê. Bémpée-’e bédé nê áyäle bad békélé bó nê. Ábíníí-’e, békélé yäl nê ábel boj békélé nsón mé nkamlen í Dyöb. Kénzéé awé ahele ádén ayáge akob, ákob dós.”

Yesuε anămté běndem
(Mak 10.13-16; Luk 18.15-17)

¹³ Bad bêmeéén bëndem wê Yesue nén bán ábân bó ekáá á nló, ákânned-te bó. Ábë
bembapee bénkâné ábe bad áte. ¹⁴ Boj Yesue anláá bó aá, “Nyétëde bëndem béhyag
áwêm, nyéekáé bó, áyäle nén, nyaa é bad néé bó chóó éwóó nkamlen mí míin.” ¹⁵ Né-óó,
Yesue ambán ábê bän ekáá á nló. Ámbid e nê, anhidé áhed.

Nh&on m̄ bad
ne nkamlen n̄ Dy&ob

(Mak 10.17-31; Luk 18.18-30)

¹⁶ Póndé póg mod nhóг ampé wéé Yesue, ásédté mó aáken, “A-meléed, dyam á bwâм áhéé nítângéné abel, âbel nén nkud alongé áde déemaá?” ¹⁷ Héé Yesue ákwéntanné mó aá, “Chán éhelleé ésédté me dyam áde ádé dyam á bwâм? Mod nhóг mwěnpen mó adé awé adé mod a bwâм. Kongé’ mbéndé é Dyöb nzé ehede wé mókud alongé áde déemaá.”

¹⁸ Dóo ane mod ásedteé mó aáken, “Mbéndé éhéé?” Yesue ankwentén mó aá, “Weewúé’ mod, weekábé asón á ndáb e’wóngé, weechíbé’, weebídé mbój e metóm, ¹⁹ bée sóó ne nyonj edúbé, édəŋ-’e mwányoj nêngáne echoj yǎl.” ²⁰ Héé ene kódemod élângéé Yesue aá, “Nhídé échén mbéndé ésyāəl; cheé émpēé éhedne me abel.” ²¹ Yesue antimtén mó aá, “Nzé ehede weé móowóó awusé á yǎl ké ahóg, kág ésôm bwěm é’syāəl ábe éwóó, étêd rímê mənē ébe betóótöké bé bad. Nzé ebél nê, wěkünd nhən ádyōb. Ene póndé éhyé éhíde me. ²² Áde ene kódemod áwóégé nê, anwóg mbéb áte bwâmbwam áhídē-’e áyâle ambé nhən bwâmbwam.”

²⁵ Áde bembap  e   bew  og   n  n, y  l enk  m b   at   bw  mbwam. B  ns  d  d b  nken, “Nz  -   ah  le ak  ud e’so  so  ?” ²⁶ H  e   Yesue ´ n  n   b   ch  o  n boy ah  b   a  , “Ne ba  nyon n  n d  ehel  e   se ab  enl  d boy ne Dy  b dyamdyam d  e  el  e   at  .” ²⁷ H  e   Petro ah  b   a  , “N  n  n  ”, s  t  edt   ch  om esy  a  l ah  id w  , che  -   eb   m  med nsy  n.” ²⁸ H  e   Yesue ´ l  ang  e   b   a  , “Ne

mbále, nlângé nyé nén mée, póndé eché Mwán-a-Moonyoŋ ádyee' é á atii dé nkamlen ne éche ehúmé ésyāel á nkōjsé míme nhúe', nyé bad dyom ne bébe ábe békide me nyémpé nyéedye' é metii mé nkamlen, nyékaadte metúmbé mé Israel dyom ne mébe. ²⁹ Kénezé-’é awé atédté éche ndáb, baányaŋ, sáá, nyaá, bän, ne eche mbwág áyel echém, ákud chó mbwókel e ngen, ákud-te alongé áde déemaá'. ³⁰ Boj bad hín ábe bédé á'sō boab belyag mbíd, híin-ne ábe bénlyag mbíd béké á'sō."

20

Ngan e bad bé nsón

¹ Hé dão Yesue ákaleé ngan aá, "Nhóbe nê áyale nkamlen mí míne nhagtén nêngáne nwóó-nzag nhóig awé ambid á ndáb epog é mbwembwe áke dé ahed bad ábe ásabéé, ábel nsón áwé nzag-té. ² Bóobdó bempé á nchemten áyale nsábe mé epun é bín boj álómé bó áwé nzag-té. ³ Ane nwóó-nzag antím ámbid ámpé á dyad-té á ngáy abog. Antán bad bé nsón bempé áhed. Béntyéem ngén, béebélé'aá chomchom. ⁴ Héé álângéé bó aá, 'Nyémpé nyébel nsón áwém nzag-té, mésabé nyé nsábe míme nkwognédé.' ⁵ Né-óó, bénké. Ambél melemlem mé dyam á käd, ne á ngáy éláán. ⁶ Dyam ngáy étáan néé ane mod átímé á dyad-té ámpé, antán bad bé nsón ábe bompé bentyéem, béebélé'aá dyamdyam. Héé ásedteé bó aá, 'Cheé nyébébtéé epun é bín ésyāel hén ngén áde nyéebeléé dyamdyam.' ⁷ Bénkwentén mó nén bán, 'Modmod eetédeé sé á nsón.' Héé ane mod álângéé bó aá, 'Nyémpé nyékag-koo nyébel nsón áwém nzag-té.'

⁸ "Áde ngukél épédé, ane nwóó-nzag anláá awé mod awé anone ábē bad bé nsón aá, álad bad béké nsón áte, ásábe bó. Aá, ábooted ne bad ábe bédímténé ape, ásog-ke ne ábe bésébpé ape. ⁹ Ambeé bad ábe bémbooted nsón á ngáy étáan nsábe mé epun é bín ¹⁰ Áde bad ábe bensébé nsón abooted bédé ákob nsábe, bénwémtén bán, békud nsábe míme ntómé mí bad ábe bémbooted nsón á ngáy étáan. Boj bompé bénkúd melemlem mé nsábe. ¹¹ Áde békobé mōné míme bembéé bó, bémbooted anyoo áte. ¹² Béhóbé bán, 'Abén bad béké bénwémtén bán, békud nsábe míme ntómé mí békobé mōné míme bembéé bó, bémbooted anyoo áte. ¹³ Nwóó-nzag antimtén ábē bad nhóig aá, 'Amúé, meédogéé nyé. Éesaá mbále bán dentíi bán mēbe nyé nsábe mé nsón mé epun é bín-e? ¹⁴ Nyékob-poo mímén mōné, nyékag. Mmén-eé ntíidé mée mésabé anén mod awé adímténé ape melemlem ngáne hásápé'áá wémpé. ¹⁵ Meewoo'é kunze ábenled mímén mōné ngáne ndáé-yé? Cheé ékáá boj nyébébté nlém á abum áyale ábém e'boj béké nlém?" ¹⁶ Yesue ansógtén ene ngan aá, "Né-óó, béké bétim béké mbíd, béké mbíd-te bétim béké e'só."

Yesue ahóbé ngen eché elonténé
éláán ngáne béké wéwúú' mó

(Mak 10.32-34; Luk 18.31-34)

¹⁷ Yesue ne ábē bembapé békágé'áá á akuu á Jerusalem. Áde békagké nê dão áchágé bó á nkag, boj álângé bó á kun-té aá, ¹⁸ "Pón nyébíi bán dekag á Jerusalem, áwed-taá békéé Mwán-a-Moonyoŋ á mekáá mé beprise bembáá ne bemeléede béké mbéndé. Bó-'é békéé mbakú bán aténgéné awé. ¹⁹ Béké mó á mekáá mé bad ábe béesé bad béké Israel. Bó-'é békéé mó, békéé mó e'tangú, békéé mó á awog. Boj ámbid e e'pun é'láán Dyób dépuúd mó."

Nyé-mwán ahedte bán metii
(Mak 10.35-45)

²⁰ Ámbid e póndé dão Zebédie mwaád ápédé wéé Yesue ne ábē bán béké baachóm béké, abwág mebóbóy, ácháá-’é Yesue aá ábélé mó dyam. ²¹ Yesue ansédeé mó aáken, "Cheé éhedeé?" Dão ákwentanné mó aá, "Bág me akag nén wéé, póndé eche wébéé á nkamlen, ábém bán béké békéé wé á nkag, nhóig ekáá émbáá, aníñí-’é á ekáá é emwéed." ²² Héé Yesue ákwentanné bó aá, "Nyébíi'é chom éche nyéedteé. Nyéehéel metuné míme mepémmé apém-e?" Bénkwentén bán béké. ²³ Dão Yesue álângéé bó aá, "Ne mbále,

nyéēpēm boj meewoo'é kunze âpwed mod awé ädyeeé mε á ekáá é mbáá ké'e á ekáá é emwed. Ábē e'tál é'díi e'tál ábe é'bagnédé ne bad ábe echem Sáj ánábnédé bó." ²⁴ Áde ábíníí bembapēe dyōm bégwogé nē, bénliín ábē baányaŋ bēbe. ²⁵ Né-oó Yesue anlad bó áte, boj álāngē bó aá, "Nyébíí nén bán, benkamlene ne bad bémbará bé nkörjsé bébenlad ngíne ákamlen bad ábe bédé ásē echâb. ²⁶ Boj éetângeneé abé nē átinté echê. Kénezéé awé ahede aá móbb mod ambáá átinté echê, atângéné abé mbalede awen. ²⁷ Kénezéé-'e awé ábē mod a'só átinté echê, atângéné abé awen ntâj. ²⁸ Melemlem née Mwán-a-Moonyonj epepedéé aá bad bébenle mó, boj apedé ábelle bad, ábē-'e ádē alongé ákade bad híin."

*Yesue achöjté bad bēbe
ábe bénkwé ndím
(Mak 10.46-52; Luk 18.35-43)*

²⁹ Áde Yesue ne ábē bembapēe bēhidteé á Dyad á Jeriko, ndun e mod ehídé'áá mó. ³⁰ Ene póndé-'oó bad bēbe ábe bénkwé ndím bēndyeé á nkag nzi. Áde bégwogé bán, Yesue atóme', bémbootéd abón bán, "A-Mwán a mbyaa míme Dabide, wog sé ngol!" ³¹ Ndun e mod echē embé áhed enkáné bó áte bán bédib nsəl. Boj bó-'e bémbará abón ne ngíne bán, "A-Mwán a mbyaa míme Dabide, a-Sáj, wog sé ngol!" ³² Yesue antyéem, achélé bó boj ásédté bó aáken, "Cheé nyéhedeé bán, mbele nyé?" ³³ Bénkwentén bán, "A-Sáj, sêhede bán, ébel sényínén." ³⁴ Yesue anwog bó ngol, né-oó ambán bó mekáá á mǐd. Ábwōg-ábwōg bémbootéd anyínén, bēhídé-'e mó.

21

*Yesue asólé á Jerusalem née kâj
(Mak 11.1-11; Luk 19.28-40; Jón 12.12-19)*

¹ Áde Yesue ne ábē bembapēe békowgé ape á Jerusalem, née bérpédé á dyad á Bétpag á ekone é menzab Yesue anlóm bembapēe bēbe á'sō. ² Anláá bó nén aá, "Nyékag á dyad áde ádē nyé á'sō nē. Nzé nyéslé sólén, nyéétán née bétângé ésel ne mwán ánkag. Nyéhune bó nyéhyiinad mē. ³ Nzé mod asédté nyé aáken, cheé ekáá boj nyéhunne', nyéláá mó bán Sángwéé* atógnéné bó. Nzé nyéhóbé nē, ábwōg-ábwōg ane mod áchennéd nyé." ⁴ Nén dêmbenléd áloned e'yale ábe Dyob dénlómenné nkal é'déadəj aá,

⁵ "Áláa dyad á Zayon aá,
Nyénone', echēn kâj ehyag áwēn,
asúdté yél, adiídé ésel, etum é nchóm a ésel."

⁶ Né-oó ábē bembapēe bénké békél-le ngáne Yesue ánlýégténné bó. ⁷ Bémpéén échē ésel ne mwán, bétéd échab mbóté, bétal chó ámīn, boj Yesue ádiide'. ⁸ Ekud é bad bénatlé échab mbóté á nzi-té, ábíníí-'e béselé' e'kikag é' mií, bétalé' á nzi-té. ⁹ Ndun e mod echē ekágé'áá mó á'sō ne echē ehídé'áá mó ámbid bémbootéd abón bán,
"Hosána, mekenag mébē ne mwán a mbya míme Dabide.
Nnam ríbē ne ane awé apedé á dín áde Sángwéé."

Hosána, mekenag ne Dyob áde ádē se ámīn!"

¹⁰ Née Yesue ásólé á Jerusalem néen sólén, bad bésyáel bérpuitéd, bésedté-'e bánken, "Nzéé ne?" ¹¹ Dóo ene ndun e mod ékwentanné bán, "Yesue mó adé, nkal é'déadəj a dyad á Nazaret á mbwog e Galilia."

*Yesue anané bekáb bē nyongé
á Ndáb-e-Dyob*

(Mak 11.15-19; Luk 19.45-48; Jón 2.13-22)

¹² Ámbid e nē, Yesue anke asól á Ndáb-e-Dyob. Annán bad bésyáel ábe békábé'áá dyon áwēd-te. Ankuné betébelé ábe bad bérpnlé'áá mōné ámīn mekuu ámīn, áküné-'e metii mímé bad ábe bésómmé'áá mbəngé mekuu ámīn. ¹³ Anláá-'e bó aá, "Éténléde néen bán, Dyob áhóbé aá,

* 21:3 Sángwéé: káa nwónj.

‘Echem ndáb etáŋgéné achəgned bán ndáb e mekáne.’ Boj nyētimté chó, ‘mbwəg mé bechib!’ ”

¹⁴ Bad ábe bénkwě ndím ne bad ábe mekuu ménwēs ábe bémbs áhed bēmpě áwē, ádīd-te bó bwām. ¹⁵ Boj áde beprise bémbsá ne bemeléede bē mbéndé bényíné menyáké míme Yesue ábelé, boj bewog-ké e’saad ábe bēndem bēbóné á Ndáb-e-Dyōb bán, “Mekənag mébē ne mwān a mbyaa míme Dabide,” bēnljy bwāmbwam. ¹⁶ Bēnsedéd Yesue bánken, “Ewóge chōm-éé ábē bán bēhōbeé-yé?” Yesue ankwentén bó aá, “Eε, nwóge”. Nyéelāá’ é mbēd á kálag e Dyōb nén bán, Dyōb ábónjsné e’ched é’ bēndem ne é’ bán bē nkáél ábe mó mekənag mé bwām-é?” ¹⁷ Ámbid e nê Yesue antedé bó á Jerusalem áke ánāá á dyad á Betani.

Yesue ne alín á ngəl

(Mak 11.12-14, 20-24)

¹⁸ Epəg é mbwəmbwə áde átíméé ámbid á Jerusalem nzaa enkób mó. ¹⁹ Áde ákagké nê annyín alín á ngəl. Anké áhed, boj enkēnyínné epum ké ehōg áwedé-mín étoméé byaá. Héé Yesue álāngéé ábē bwel aá, “Wéechyáá’ é epum ámpē mbēd.” Ábwōg-ábwōg bwel bénhyéle. ²⁰ Áde ábē bembapəs bényíné nê, yəl enkóm bō áte bwāmbwam. Héé bésedteé bánken, “Chán ádēn alín á ngəl ámwédé ayéle á mehélé-te nén-é?” ²¹ Yesue ankwentén aá, “Ne mbále nlāngé nyé nén meé, nzé nyēdúbpé ne nlém n̄syəəl, né saké dyam áde míbélé ábén bwel áyəl dēmpen nyēbenlé. Boj né nyēhəle-sé nyēláá kádyne enén mbəođ nén bán, ‘Hidé hén, éke ébwəm yəl á edib é nkwē-te,’ ébenléd-te nê dēn. ²² Nzé nyēwóó adúbe bán, kchéé éche nyēhédné Dyōb á mekáne-té nyēeküd, né nzé nyēhədé nyēeküd.”

Nsədtéd tāŋgēne kunze eche Yesue

(Mak 11.27-33; Luk 20.1-8)

²³ Yesue ansól á Ndáb-e-Dyōb, áyəgtē bad. Áde áyəgtéé nê, dōo beprise bémbsá ne bad bémbsá bē Israel bēpédé áwē, bésedté mó bánken, “Kunze ehéé éwóó ábel rímén mekan? Nzé-módé abagé-’é wé ene kunze?” ²⁴ Yesue antimtén bó aá, “Mé ámpē mēsedéd nyé dyam ahōg. Nzé nyēkwenténé dō né me-’é mēlāá nyé kunze eché n̄wóó ábel rímén mekan. ²⁵ Edusen éche Jōne ádúsánnáá bad héé émbidtē? Émbid ne Dyōb-é ngé ne baányoŋ?” Bēn ne bēn bēmbootéd apenten bán, “Nzé dehōbé nén bán, ‘Jōne eché kunze enhúú ne Dyōb,’ né ásedéd syánē aáken, ‘Cheé-ō enkəjy boj nyēnkēndubé mó?’ ²⁶ Boj nzé dehōbé bán, ‘Eché kunze ehúú ne baányoŋ,’ né échén ekud é mod ébel syánē mbéb áyəle bad bēsyəəl bēndubé bán Jōne abédéé nkal é’dādərj.” ²⁷ Né-ōó bēnkwentén Yesue bán, “Séebíi’ é.” Mó-’é antimtén bó aá, “Né ké me-’é ámpē méeláá’ é nyé kunze eché n̄wóó ábel rímén mekan.”

Ngan e bān bē baachóm bēbē

²⁸ Yesue ambé ásēdēd beprise bémbsá ne bad bémbsá bē dyad aáken, “Chán nyēyíné ádén akan tāŋgēne enén ngan? Mod nhōg abédé awé anchyáá bān bē baachóm bēbē. Héé ákíí mwān ambáá aláa aá, ‘A-mwān, kē ébel nsón á nzag-té chii.’ ²⁹ Mwān antimtén mó aá móokaá. Boj ámbid e póndé anhəylén mewémten, áke. ³⁰ Dōo ane mod ákíí wéé mwān asad, aláá-’é mómpē melemlem mé dyam. Anén mwān antimtén sáá aá, ‘A-Sáj, mēké’ boj eékii.’ ³¹ Héé Yesue ásēdteé beprise bémbsá aáken, “Átinté ábén bān bēbē, ahéé ambēl ngáne sáá áhédé’áá?” Bēnkwentén mó bán, “Ambáá.” Né-ōó, Yesue anláá bó aá, “Ne mbále, nlāngé nyé nén meé, besaad-bé-táásə ne bēkwalee bēdē asól á nkamlən n̄ Dyōb tómaa nyé.” ³² Nhōbe nén, áyəle Jōne, Ndusene ampē, alúmēd nyé nzii eché etyéémé, nyēnkēndubéé mó, boj besaad-bé-táásə ne bēkwalee bēndubé. Ké néé nyēnnyin-naá nê, nyēnkēnhəylénné, nyēnkēndubé-’áá mó.”

Ngan e bebel bē nsón ntéd

(Mak 12.1-12; Luk 20.9-19)

† 21:31 Baá mbáá bē Israél bēndubé nén bán bēkwalee ne besaad-bé-táásə bēesónlē á nkamlən mí míin.

³³ Yesue anláá bó aá, “Nyéwóglən ngan empée. Nwóó-nzag nhóg abédé awé ankwéł nzag e e’pum é’ mel ábe bébenleé mím. Ankág chó, ábel bwál wéé bémineé ábê e’pum é’ mel ábel mím, alónj-’e ebem áwēd-te wéé bédyeé’ é’ânón nzag áte. Ambéé ene nzag wéé bad ábe báðbádó békab mbote áte, áké á alorj démpée. ³⁴ Ádē póndé épédé eche bépadéé e’pum, ane nwóó-nzag anlóm ábê bembalede wéé ábê bebel-bé-nsón ákobe mó ádē asii dé e’pum. ³⁵ Héé ábê bebel-bé-nsón békóbé ábê bembalede, bélwanné’ nhóg, bélwúé’ ampée, aníníí-’e bélwúéné meláá. ³⁶ Ámbid é póndé ane nwóó-nzag anlóm bembalede bélwéé ábe bémboú áte tómaa ábíníí. Ábê bebel-bé-nsón bémboé ábê bembalede melemlem ngáne bémboenlé bésō. ³⁷ Ámbid e póndé anlóm awe mwán áwāb, ne mewémten néen bélbéé mó edúbé. ³⁸ Boŋ áde bebel-bé-nsón bénýiné ane mwán néen áhúé’é, dóo bó běn ne běn bélbéé néen bán, ‘Ndyé-a-mbwóg néen, nyéhyag! Déwúu mó, ábel néen, eche mbwóg ésuuned syáné.’ ³⁹ Hé dóo békóbé mó, bélbídén mó á nzag-té, boŋ bélwúú-’e mó.” ⁴⁰ Héé Yesue ásédtéé ábê bad bémboáá bél dyad ne beprise bémboáá aá, “Béob-poá, nzé nwóó-nzag ne apedé, cheé ábenlé ábê bebel-bé-nsón?” ⁴¹ Hé dóo bélwéntanné bán, “Áwúú ábê e’bébtéd é’ bad e’bébtéd é kwééd, ábē-’e ene nzag wéé bebel-bé-nsón bélwéé ábe bélbé mó ádē asii á mbote nzé póndé epedé eche bélwéé e’pum.” ⁴² Yesue anláá bó ámpé aá, “Nyéeláá-’e mbéed wéé eyale é Dyób éhóbe néen bán, ‘Aláá ádē belónj-bé-ndáb béncheneé dóo átímé aláá dé etógnén abé. Sájgwéé mó ambel néen, édé-’e syáné menyáké.’

⁴³ Né-óó nlângé nyé néen mée, békobén nyé etál éche nyéwóó néen bad bél nkamlen ní Dyób, bélwéé wéé bad ábe bélbélé’ ngáne Dyób áhedeé.”[‡] ⁴⁴ Áde beprise bémboáá ne Befarisia bélwogé échén ngan éche Yesue ákálé, bénchem bán, bóó ákanléé chó. ⁴⁵ Né-óó bélhédé’áá mó akób, boŋ bémboŋ abel nê, áyale bénýin bán, ene ndun e mod enyiné’áá Yesue néen nkal é’déadé.

22

Ngan e ngande e e’wóngé (Luk 14.15-24)

¹ Yesue ambé ábenléé ngan ámpé ákalen ábê bad. Anhób aá, ² “Nkamlen mí míni ndé nêngáne kâj póg eché enláá ábê bembalede aá bélboŋsen ngande e e’wóngé ábe awé mwán a mwéñchóm. ³ Ene kâj-’e anlóm ábê bembalede aá béké bélchag bad ábe álébpé áyale ene ngande, boŋ ábê bad bénkénkwénténné ape. ⁴ Héé áloméé bembalede bélwéé aá béláa bad ábe mólébpé néen bán, ‘Nyébíí néen bán, mmaá nyag ne e’lem ábe é’bóó yél awíu. Chóm ésyáéel-le édé mboŋsén, nyéhyag-kóó á ngande.’ ⁵ Boŋ ké nê ábê bad ábe bénlēbēé bénkéntédté mímē nlébtéd néen dyam. Mod téé ahídé’áá mímē ntíi ámbid. Behóg bénké áwāb nzag-té, ábíníí bélhédé mímab nsón mémpée ámbid. ⁶ Ábíníí-’e bénkob ábê bembalede, bélbóm bó, bélwúú-’e bó. ⁷ Ene kâj enlín bwâmbwam. Né-óó, anlóm éche sánze. Néen épédé, éwúú bad ábe bénwúú ábê bembalede, éhyáad-te ábê bad dyad. ⁸ Dóo álângéé ábê bembalede bélwéé aá, ‘Ngande e e’wóngé emaá mboŋsén abé, boŋ bad ábe nlébpé békowginedéé chó abé ásé. ⁹ Béob-poá, nyékag á mbom ní nzii á dyad-té, nyéchéle bad bésyáéel ábe bénýiné bán, bélhyag á ngande.’ ¹⁰ Né-óó ábê bembalede bénké á dyad-té, bélád bad bésyáéel ábe bénýinné, ken mod a bwám kék mod a mbéb, kááj ndáb e ngande enlág áte.

¹¹ “Kâj empé á ndáb-te ânón bad ábe bélwéé á ngande. Áde ápédé anyín mod awé enkénhé asaj áde ánténgénné ahé á ngande e e’wóngé. ¹² Héé ásédtéé mó aá, ‘Amúé, chán émwéde ape hén áde wééhédéé asaj á ngande e e’wóngé.’ Boŋ ane mod enkénhóbpé dyamdyam. ¹³ Dóo kâj élângéé ábê bembalede ábe bélhágé’áá beken aá, ‘Nyéhaŋ mó mekáá ne mekuu, nyébwém mó á ewwóg, á ehíntén-té. Áhed-taá bélhyag-ke

[‡] 21:43 Doŋge á kálag dé’sō ábáde nchoo 44: Mod kék ahéé awé alúmé ádē aláá ámín ábogté áte. Boŋ ane awé déhüntédté ámín, anyogté áte.

meson á nsəl.’ ” ¹⁴ Héę Yesue ásógtę́ enén ngan ne e'yale nén aá, “Dyōb áchēnle’ bad hín âbé ásē e nkamlen rímmē, boj nguse chōo épwēdnéd.”

Yesue ne asaa á táásę
(Mak 12.13-17; Luk 20.20-26)

¹⁵ Ébédé póndé póg eché Befarisia bēnkéé mbom, âhęge Yesue, âbel békóben mó awusé tēngene e'yale ábe bēbid mó á nsəl. ¹⁶ Bénlōm ábāb bembapęe nchoo ne bad bę epępę éche Herōde wée Yesue. Néę bępédé áwē, bélāngę mó nén bán, “A-meléed, sēbíi nén bán, ekale mbále. Sēbíi'-e ámpę nén bán, ayęge ádōŋ tāngene mbéndé e Dyōb ádē mbále. Mewémten mé bad ne e'só é' mbom é' bad bęehəjlánné ádōŋ ayęged. ¹⁷ Láá'-e sé ngáne ényiné ádén akan. Mbéndé eche syánę ehőbe nén bán désaŋę' táásę wée Kaisęe, kęj e Roma-yę?” ¹⁸ Boj Yesue ambíi rímmab mewémten mé mbéb. Né-ɔ́ ansedéd bō aáken, “Nyé bedog-badé, cheé nyéhągkęe me? ¹⁹ Nyélúmed me mɔnę́ m̄me bésajnadté táásę eched.” Bęmpiinéd mó mɔnę́ mé ekii. ²⁰ Dōo ásédté bō aáken, “Ediídingę éche nzéé chén? Děn áde nzéé'-e dén?” ²¹ Bēnkwentén mó bán, “Ábe Kaisęe.” Dōo álāngę́ bō aá, “Nyébag-kę́ Kaisęe éche édę́ éche Kaisęe, nyébag-ke Dyōb éche édę́ é Dyōb.” ²² Áde bęwogę́ n̄e, ȳl̄ enkóm bō áte. Né-ɔ́ bēnhidé áhed, békę'-e.

Ayęged áde Yesue
tāngene mpuu ámbid e kwééd
(Mak 12.18-27; Luk 20.27-40)

²³ Échę epun chěn dojge á Besadusia bēmpę́ wée Yesue. Besadusia bēndūbę́ bán mpuu méesaá ámbid e kwééd. ²⁴ Dōo bęhōbeé bán, “A-meléed, mbéndé e Mosee ehőbe nén bán, ‘Nzé mod awóó mmwaád boj awédé áde bō ane mmwaád bęepedeé mwān awále, mwānyan a abum ahōg atāngéné ane nkúd awój, âbel boj děn áde mwānyan dēebōž.’” ²⁵ Bęob-poó, bad bębédé hén mod saámbé ábe bęmbid abum ahōg. Mod a'só anwónę́ mmwaád, boj awé áde bō mmwaád ne bęepedeé bǎn awále, né-ɔ́ mwānyan awé anhíd mó anlyognéd ane nkúd a mmwaád. ²⁶ Ane mómpę́ anwé áde bō ane mmwaád bęepedeé bǎn awále. Melemlem mé dyam mēmbenléd ne awé alonténé béláán, kęáŋ bębōm bō mod saámbé. ²⁷ Kęáŋne á asog ane mmwaád mómpę́ anwé. ²⁸ Bęob-poó á póndé e mpuu, mmwaád awé nzéé ane mmwaád áchęgnédę́ áyęle bō moosyę́l saámbé bénwōŋ mó?” ²⁹ Yesue antimtén bō aá, “Nyépane’ áyęle nyéesönteneé chōm éche eyale é Dyōb éhōbeé, nyéesönteneé'-e ngáne ngíne e Dyōb ésogę́ abé. ³⁰ Áyęle póndé echę bad bępuú' e ámbid e kwééd mewónę́ méebáá ámpę́. Bad bębē nēngáne ángel éche édę́ ámīn, bęewónę́. ³¹ Nyéeláá' e mbēd dyam áde Dyōb ahōbę́ áwēn tāngene mpuu-yę? Dyōb áhōbę́ tāngene ábēd beta aá, ³² ‘Mę-ę́ ndé Dyōb áde Abrahamę, Aisige ne Jakobę.’ Dyōb ádī Dyōb á bad ábe będę́ á alongę́, sakę Dyōb á bad ábe bęwédę.” ³³ Áde ene ndun e mod echę embé áhed éwogę́ n̄e, bęmbę́ menyákę bwāmbwam tāngene ayęged áde Yesue.

Mbéndé ébę́ éche étomténé
etógnén abé
(Mak 12.28-34; Luk 10.25-28)

³⁴ Áde Befarisia bęwogę́ bán nkwenten ríme Yesue ámbeé Besadusia mēmbel bęehęle dyamdyam ahōb, bēnladén áte. ³⁵ Hę́ dōo bō mod nhōg awé abédé meléede a mbéndé, áhyédé Yesue akęg, ásédté mó aá, ³⁶ “A-meléed, átintę́ mbéndé esyę́l, ehę́ etomténé etógnén abé?” ³⁷ Yesue ankwentén bō aá, “Etāngéné édę́l Sájgwéé ádōŋ Dyōb ne m̄mon nlém n̄syę́l, ne échoj edę́dę́l esyę́l, édę́l'-e mó ne m̄mōŋ mewémten m̄syę́l. ³⁸ Enén mbéndé chō etomténé etógnén abé, ebę́'-e mbéndé e'só. ³⁹ Mbéndé echę elonténé ébę́ echę chōmpę́ edę́ etógnén melemlem nēngáne e'só edīi nén ‘Édę́l mwānyan ngáne édę́ echoj ȳl̄.’” ⁴⁰ Échęn mbéndé ébę́ chōo éwánlę́ mbéndé éche Mosee esyę́l ne mekan m̄me bekal-bę́-e'dę́dę́l bęyę́gtę́.”

Nsedtéd tângene
Ane-awě-Bewógté
(Mak 12.35-37; Luk 20.41-44)

⁴¹ Hê dôa Yesue ásedteé ábê Befarisia ábe bênladén áte aá, ⁴² “Chán nyewémtnné tângene Ane-awě-Bewógté? Á mbyaa míme nzéé áhúú?” Héé békwténténé mó bán, “Abídé á mbyaa míme kâj Dabide.” ⁴³ Yesue ansedéd bó aá, “Cheé-đ enkâj boj Dabide áde Edéadéj é Dyöb élyágté mó ânchágké mó aá, ‘A-Sáj,’ áde ahóbé aá,

⁴⁴ ‘Sáj Dyöbé anláá awêm Sájgwéé aá,

Dyeé áwêm ekáá émbáá,

kááj ne á póndé eché mébenlé boj ékogtéd ábôj bad bé ekoyí ámín ne mekuu.’

⁴⁵ Néé Dabide mwén ásébpé mó achág aá, Sájgwéé, chán-nô Ane-awě-Bewógté áhéléé abé awe mwän?” ⁴⁶ Bó modmod bénkêhénlé mó dyamdyam akwenten. Bootya échê epun bénkênhchu’ mó dyamdyam asedded ámpé.

23

Elébé tângene bemeléede
bé mbéndé ne Befarisia
(Mak 12.38-39; Luk 11.43, 46, 20.45-46)

¹ Ámbid e nê, dôa Yesue álângéé ene ndun e mod ne ábê bembapé aá, ² “Bemeléede bé mbéndé ne Befarisia bó bétédé etál éche Mosee bôjb âyáged bad. ³ Né-óó, nyétângéne bô awóglén nyébelé-’e mekan mésyâäl míme bélângéé nyé, boj nyéebéle’ mekan míme bébeléé, áyâle bébeléé mekan míme böhobéé. ⁴ Békaa’ e’deltéd bé nted, bëpêmtad bad, boj béesaá mbojsén âbán ké ekáá âwóngen bô âpém mó. ⁵ Kéchéé éche bébeléé, bëbële châ ábel boj bad bénýin bô. Békelte’ bân bé ntyág ábe böhágké nchoo mé e’yle e’ Dyöb áte, boj bétâä á mbom ne á mekáá, bëchabte e’tûd* ábe bëwáa’é á mengombe mîn bwâmbwam. ⁶ Bédæa e’tál bé edûbé adyee á höm á ngande, bédâj-’e metii mé edûbé adyee á ndâb é mekáne. ⁷ Bédæa bán, bad bélente bô ne edûbé ésyâäl á dyon-tê, bédâj-’e bán, bad bëchäge bô bán, ‘A-meléed.’ ⁸ Boj nyé, nyéemwâg-se bëchagé nyé bán, ‘Meléede.’ Áyâle meléede nhög móo nyewóó, baánya bô-’aá nyédií. ⁹ Nyéechâg-’e mod ké nhög á nkörjsé wén bán Titéé áyâle nyewóó-’e Titéé nhög, awén Titéé awé adé ámín. ¹⁰ Nyéemwâg-ke se bëchagé nyé bán, ‘Sájgwéé’ áyâle nyewóó Sájgwéé nhög, Ane-awě-Bewógté. ¹¹ Mod awé adé ambáá átinté e echén atângéne abé mbalede awén. ¹² Kénzéé awé achágté yâl, Dyöb désudéd mó, kénzéé-’e awé asüdté yâl, Dyöb déchâgéd mó.”

Yesue aselé bad bé medogké
(Mak 12.40; Luk 11.39-42, 44, 52, 20.47)

¹³ Dôa Yesue áhobéé aá, “Ébëen nyé bemeléede bé mbéndé ne Befarisia ebébtéd, nyé bad bé medogké! Nyédibe’ ekob é nkamlén mí míni ábel boj bad bëesôl’. Nyé bën nyéesóléé, nyéemwâg-kaá bán bad bëmpée ábe bëhede asól bësôl.† ¹⁵ Ébëen nyé bemeléede bé mbéndé ne Befarisia ebébtéd, nyé bad bé medogké. Nyékag meloñ ne meloñ ábel boj mod nhög átimen nyé. Boj nzé amaá nyé atimen, nyébelé nyébéd mó nyaa eché ákwognédé ákud nkógsen á dû-á-muú míme ntómé mímen ngen ébc.

¹⁶ “Ébëen nyé ebébtéd nyé bad ábe békwdé ndím, boj belyágté bad bëmpée. Nyéyágte bán, ‘Nzé mod amwédé melé á dñi á Ndáb-e-Dyöb, né nê déesaá dyam, boj nzé mod amwédé melé á dñi á bwém é’ gôl ábe é’ dé áwéd-te, átângéne abel dyam áde ámwééne melé.’ ¹⁷ E’yókél é’ bad bén, nyékwedé ndím! Cheé étómténé etógnén abé, gôl-le, ngé Ndáb-e-Dyöb eché ebélé boj gôl ebé chôm éche ésaá á’sô é’ Dyöb? ¹⁸ Nyéyágte’ ámpé bán, ‘Nzé mod amwédé melé á dñi dé menyán mé mende, né nê déesaá dyam. Boj nzé

* ^{23:5} Etûd: Bëwáa’áá e’tûd álúmed bán bëbenle Dyöb. † ^{23:13} Dojge á kálag dé’só ábádé nchoo 14: Ébëen nyé bemeléede bé mbéndé ne Befarisia ebébtéd, nyé bad bé medogké. Nyélûmtan yâl ne ntój-ntój mí mekáne, nyédumé-’e mbwôg é bekûd. Né-óó, nyéekud nkógsen míme nchábé ámín.

mod amwédé melč á dčn dé mende ríme médé á menyán mîn, atáŋgéné ábel dyam áde ámwéené melč.’ ¹⁹ Bad bé ndím bén! Cheé etómténé etógnén abé, mende ngé menyán ríme mébélé boj rímmé mende mébé chóm éche ésáá á'sō' Dyöb? ²⁰ Né-oo kénzéé awé amwédé melč á dčn dé menyán mé mende, né amwédé rímmé melč á dčn dé menyán ne mende ké méhéé ríme médé áwedé-mîn. ²¹ Kénzéé-'e awé amwédé melč á dčn á Ndáb-e-Dyöb, né amwédé rímmé melč a dčn á Ndáb-e-Dyöb ne á dčn á Dyöb áde ádyee' áwēd-te. ²² Kénzéé-'e ámpē awé amwédé melč á dčn dé nkoy rí min né amwédé melč á dčn dé atii dé nkamlen ní Dyöb ne á dčn á Dyöb áde ádíidé ádē atii.

²³ “Ébēen nyé bemeléede bé mbéndé ne Befarisia ebébtéd, nyé bad bé medogké! Nyêbage Dyöb akab ahóg átíté e mekab dyôm, ké dé mekûle ríme bêchâmneé ndyéed néé mînt, dîl ne kúmin.‡ Boj nyéehédeé nló áte ábel ndín é mekan éche mbéndé éhôbé aá nyébele’. Nyéesaá mbále ne Dyöb, nyéewoo' nlém ní ngol, nyéedúbpe-'aa Dyöb. Nyéntáŋgén rímmén mésyáāl abel, ésebán nyéchobte' rímmíi. ²⁴ Nyé bad ábe békwdé ndím boj belyägté bad bëmpée. Nyébude' mekan ríme méesé etógnén ahíd ámbid. Nyéhúde' púuted á mendib ríme nyémwágké-te, boj nyétedte mbinde émbáá éche édé áwēd-te.

²⁵ “Ébēen nyé bemeléede bé mbéndé ne Befarisia ebébtéd, nyé bad bé medogké! Nyêwobpe mbwendé ne díse ámbid e ewög, boj medyé ríme médé áwēd-te médíi medyé ríme nyékúdné ndumbán ne ngoód. ²⁶ Nyé Befarisia, bad bé ndím bén! Nyésébe nyéwobe mbwendé ne díse áte, káéjne mbid e ewög chómpé ēsāj.

²⁷ “Medim ne nyé bemeléede bé mbéndé ne Befarisia, nyé bad bé medogké! Nyédií néé sonj éche bëpúbté. Ékine' áte ámbid e ewög boj e'hid ne e'bøø bë ndim rí bad bøø é'lóné áwēd-te. ²⁸ Melemlem nê døø nyényinnadté á'sō' bad néé bad ábe bésáá boj áte nyélóné ne edogké ne mbéb.

*Dyöb dékōgsen bemeléede
bé mbéndé ne Befarisia
(Luk 11.47-51)*

²⁹ “Medim ne nyé bemeléede bé mbéndé ne Befarisia, nyé bad bé medogké! Nyélóo' sonj é bekal-bé-e'dædæj bwám, nyélojté-'e mebón ríme bad ábe bésáá. ³⁰ Nyékag, nyéhóbe-'e bán, ‘Nzé sêmbé á póndé eché ábëd betaa, né sênkênlaténné bô áde bénwüü' bekal-bé-e'dædæj áte.’ ³¹ Nê d  n ál  mte n  n bán ny  nkwent  n néen bán ny  b  d   á myaa ríme bad ábe b  w  ' bekal-bé-e'dædæj. ³² Nyékag-k  o' á'sō' ny  mad ns  n ríme áb  n betaa b  mbootédt  . ³³ Ny   ch  n! Et  d é p  i ng  n. Ch  n ny  mw  e nk  gsen n   d  -  mu   abame? ³⁴ N  -oo, m  l  m   ny   bekal-bé-e'dædæj ne bad b   deby  e ne bemeléede. Ny  ew  u   dojge, ny  b  m  -'e b   á aw  g. Ny  sw  dt  d dojge e'tang  u á nd  b é mek  ne. Áb  n  i-'e ny  nan   myad ne myad. ³⁵ Aw  u áde ny  w  ' b   déb  l Dyöb ák  gsen ny   áy  le meki   mé bad ábe b  s  á b  sy  áel ábe ny  w  u eben á nk  js  , bootya kw  ed eche Ab  le aw   b  w  u ng  n, âpe kw  ed eché Zakariyaa, mw  n aw   Ber  kayaa. Zakariyaa aw   ny  w  u át  nt   e Nd  b-e-Dyöb ne h  m áde b  bage  e mende. ³⁶ Ne mb  le nl  nge ny   néen m  e  , en  n ny  ngel ch  o   ek  d nk  gsen áy  le éch  n kw  ed esy  áel.

*Yesue adé ngol
ne bad b   Jerusalem
(Luk 13.34-35)*

³⁷ “W  ow  ! Á-b   Jerusalem, ny  w  s bekal-bé-e'dædæj, ny  w  n  -'e bad mel  á ábe Dyöb ál  m  ! Nk  nw  n áte ngen ne ngen âlad ny   áte n  nj  ne nya  -k  b   ák  tann   b  n, boj ny  eh  deé et  l! ³⁸ Ny  n  ne', Dyöb d  t  d   ech  n nd  b, modmod éeb  á-'a   áw  d-te. ³⁹ Á mb  le, nl  nge ny   néen m  e  , ny  eny  n  né me d  d ámp   k  áej ne á p  nd  e eche ny  h  bp   b  n, ‘Nnam ne ane aw   aped   á d  n á S  ng  u.’ ”

‡ 23:23 M  nt, d  l ne k  min: b  d  i bya   áb   b  énl  ld  t  á âch  m ndy  ed.

24

Mbooted mé metake (Mak 13.1-2; Luk 21.5-6)

³ Anké á Ekone é Menzab ádyēē ásē. Héé ábē bembapēs bétáné mó wée békodé běnpēn boj bésedtē mó bán, “Láá sé póndé echē mMén mekan mésyāāl mébenlédté. E’chemléd é’héé bélumēd epe échōn ne asog dé nkōjsé?” ⁴ Yesue antimtén bó nén aá, “Nyétēd póndé nén modmod eédōgē nyé. ⁵ Bad híin běpē bán bōo bédé Ane-awē-Bewógté. Bédōg-ke bad híin. ⁶ Nyéēwōgē ngáne nzum éwantéé, nyéēwōgē-’e nzunze é nzum. Boj nyé modmod nyéēnāā. Mmén mekan mésyāāl métāngéné abenled, boj saké móo mélumēd bán asog ámáá ape. ⁷ Aloj ahóg détyéēmēn ádíníi nzum. Nkamlen nhóg-ke ntyéēmēn ímmíníi. Nzaa ēbē, ndaoob-pe eénəgnéd ásē mebwógs ne mebwógs. ⁸ Échén ndutul ésyāāl ébē nēngáne mewé mé’sō mmwaad áwógeé nzé ahede achyáa. ⁹ Ene póndé békodé nyé, běbe nyé ámekáá mé bad ábe békōgsen nyé, běwúú-’e nyé. Meloj mésyāāl mékoo nyé áyāle dín ádém.

¹⁰ “Bad híin béeuwóηgé adúbe ámpē. Bébeé nhóg ne aníníi á mekáá mé bad ábe békóó bó. Bó běn-ne békóón. ¹¹ Bekal bé'déadəŋj bé metóm híin bébíd, bédōg-ke ekud é bad âhíd bó. ¹² E'béb bé nlém á abum béchāgē, né-ó edəŋge é bad híin ésüd. ¹³ Boj kénzéé awé äkaán mímē metake nlém káéŋ ne á asóg, äkünd e'soósoŋ. ¹⁴ Mmén nkalaj ím bwâm tâŋgëne nkamlen í Dyöb mékanléd nköňisé áte nsyääl âbel boj melonj mésyääl méwôg. Ene póndé dő asog dépeé.

E'bébtéd é' mekan ábe bépé
(Mak 13.14-23; Luk 21.20-24)

¹⁵ “Nyēnyīn née ekúkú é akan éche épεεne e’sôn á’sō é Dyōb ébénlédé á Ndáb-e-Dyōb á hōm áde ásáá * ngáne nkal é’déadəŋ Danielé ánhōbpē áá ébenléd. (Nyé ábe nyéláá’ ímmén mekan nyésöŋten mó bwâm.) ¹⁶ Nzé nyênyíne nê, bad ábe bédé á Judeya bétôm mehélé, békε bésɔɔm á e’kone mîn. ¹⁷ Mod awé adé á nnoŋ n̄ ndáb mîn eétogné asud áke détéd chōm éche édé mó á ndáb-te. ¹⁸ Mod awé mó-’ε ámpē adé á nzag-tê, eétimē ámbid á ndáb áke détéd sóte. ¹⁹ Ébē ebébtéd ne bebaád ábe békε nkog ne ábe bémwāŋtē mm̄ne mesú. ²⁰ Nyékânné nén bán ádē abâŋgé détānē nyé á póndé e nkog áde ahéb ádíi ngíne bwâmbwam, kékε á mbwε-mé-nkóme-áte. ²¹ Áyâle ndəŋge eché ébē ene póndé ébē ndín eché eebénlédé mbêd bootya nkörnsé ímbootede káerj ne epun é’chii. Dyamdyam née ádē déebebnléd-taá ámpē mbêd. ²² Dyōb ámáá ábê e’pun é’ metake asél áte. Nzé énkembé nê, né modmod éechonjé. Boŋ á etútú é bad ábe ápwédé, ásél ábê e’pun áte. ²³ Ene póndé nzé mod alângé nyé aá, ‘Nyénəne’, Ane-awé-Béwógté mó nén’ káa aá, ‘Môníníí’, nyéedúbpé’. ²⁴ Áyâle bad híin békibidé ábe békálé metóm nén bán, bôo bédé Ane awé Dyōb Áwógté. Bekal békibidé ábe metóm ámpē békibid. Békbel menyáké mé ngíne, bélumtē-’ε e’chemléd híin. Békbel nén ábél boŋ bédog káerjne bad ábe Dyōb ápwédé, nzé nzii edé ádog bô. ²⁵ Nyénəne’, nlâŋge nyé mm̄mén mekan á’sō é’ póndé. ²⁶ Né-oó nzé bad bélângé nyé nén bán, ‘Nyénəne’ adé á ehyâŋge,’ nyéekâg áwed. Káa nzé bélângé nyé bán, ‘Nyénəne’, adé á toŋ-tê hén,’ nyéedúbpé’. ²⁷ Epe éche Mwǎn-a-Moonyoŋ ébē melemlem nêngáne emwedmwed étómeé á akuu ne á mbəŋ. ²⁸ Ké héé wéé ndim mbaŋké dôo benhognoné béladneé.

* 24:15 Hōm ádě ásáá: ádī hōm ádě bēbagéé Dyōb edúbé ne wéé bad bénđūbēé bán, Edəádəŋ éche Ésáá édé.

Epe é Mwǎn-a-Moonyoŋ
ne asog dé nkɔ̄jsé

(Mak 13.24-27; Luk 21.25-28)

²⁹ “Áde póndé e ndər̄ge ne étōmmē tómén, etondee ăkwé ehíntén, ngɔ̄n-ne esog apen. Betintine békibid ámīn, běhūn ásē, ngíne-’e éche édē ámīn énəyñéd á e’dii. ³⁰ Ene póndé dōj nyényinnē née e’chmléd é’ Mwǎn-a-Moonyoŋ é’bídé ámīn. Hé dōj metúmbé mé nkɔ̄jsé mésyā̄l mébootédté achii ne mbwó̄g. Bad bén̄yin née Mwǎn-a-Moonyoŋ áhúe’é á mbag mīn, ne ngum, ne ehúmē ésyā̄l. ³¹ Esaád é elon émbáá éwōgnēd. Ene póndé ălōm éche ángel á metóngé mé nkɔ̄jsé mésyā̄l mén̄iin, âlad ábē bad áte ábe Dyō̄b ápwéde, bootya atóngé dé nkɔ̄jsé ahó̄g ápe ádíníi.

³² “Nyétēd elájsén wéé alín á ngə̄l. Nzé ngə̄n ébóótédé byaá békō̄lē abíded, nyébele nyébíi bán nchorj ndé benben. ³³ Melemlem nzé nyényíné mímén mekan mésyā̄l mébenlad, nyébíi nén bán, Mwǎn-a-Moonyoŋ akwogé ape,† adé-’e benben. ³⁴ Ne mbále, nlângé nyé nén meé, enén nyongel e bad éemaá’é káéj né mímén mekan mésyā̄l mébenlédé. ³⁵ Nkor mímín ne nkɔ̄jsé bém̄aá, boj ábēm e’yle békē abé ne abé.

*Modmod eebíi’é epun
éche Mwǎn-a-Moonyoŋ ápēsé*

(Mak 13.32-37; Luk 17.26-30, 34-36)

³⁶ “Modmod eebíi’é epun pén ké-’e póndé eché mímén mam mébenlédé. Ké ángel éche édē ámīn eebíi’é, ké mwǎn ámpē eebíi’é.‡ Titéé mwěmpen mó abíi póndé eche mímén mekan mébenlédé. ³⁷ Melemlem ngáne émbéé á póndé eche Noa, nê dōj ébēé póndé eché Mwǎn-a-Moonyoŋ ápēsé. ³⁸ Áyâle á póndé eched, byánán mendib mé mbúú mélōn á nkɔ̄jsé-te bad bedyágé áá bwém, bémwāg-ke, bebaád ne baachóm běwōjne, káéj ne mbwé ríme Noa ásólé á bō̄lē é’mbáá-te. ³⁹ Bénkembíi’é dyam áde ábenlad, káéj ne póndé eche mendib mé mbúú mélónné, méhoođ-te bō̄. Melemlem nê dōj ébenlédé á póndé eché Mwǎn-a-Moonyoŋ ápēsé. ⁴⁰ Bad békē békbelé nsón á nzag-tê, Dyō̄b átēd nhó̄g, átēdē aníníi. ⁴¹ Bebaád békē békogé medyé, Dyō̄b átēd nhó̄g, áchēnē aníníi. ⁴² Né-óó nyétēd póndé áyâle nyéebíi’é epun éche awen Sá̄ngwéé ápēsé ámpē. ⁴³ Boj nyébíi nén bán, nzé nwóó-ndáb abyéé’áá póndé eche nchib ápēsé nkuu, né ádyéé epin ânōn ndáb. Né enkēmmwaá aá nchib ábóo mó ndáb. ⁴⁴ Né-óó nyémpē nyétyéngéné mboj̄sén abé, áyâle Mwǎn-a-Moonyoŋ ápē á póndé eché nyéekamtenéé.

*Mbalede a bwám ne mbalede a mbéb
(Luk 12.41-48)*

⁴⁵ “Né-óó, nyé mod té ábē née mbalede awé awóó debyéé, awé abele-’e mam ríme eche sáj álájgé mó aá ábel. Mó adé mbalede awé eche sáj ábánné aá ákamlén bembalede ábíníi, anyín-ne nén aá békudé echab ndyéed póndé eché etéyégné. ⁴⁶ Nnam mébē ne ane mbalede awé eche sáj áhūu’é, boj atán nêngáne ábeléé mam ríme ánlýägténné mó. ⁴⁷ Ne mbále nlângé nyé nén meé, ane mbalede eche sáj ábané bwém é’syā̄l ábe áwóó áwemeká aá ákamlan. ⁴⁸ Boj nzé ane mbalede adé mbalede a mbéb, boj ahóbé áwe nlém-té aá, ‘Ébém áte boj echem sáj áhūu.’ ⁴⁹ Né-óó aboótédé ábíníi bembalede ábe bédé ásē eché awanen, ádyág bwém, ámwāg-ke mím ne be-mmwé-míme. ⁵⁰ Boj ane mbalede eche sáj áhūu epun éche éewémtenéé ne á póndé eché énkembíi’é aá áhūu. ⁵¹ Ane mbalede eche sáj ákōgsén mó heén. Ákōgsén mó melemlem ngáne ánkōgsenné bedog-badé, áhed dō-’áá áchyéé’é boj ádyág-ke meson á nsəl.”

25

Ngan e ngondéré dyôm

¹ Yesue ambenléd ngan empée, áhobé nén aá, “Póndé eche Mwǎn-a-Moonyoŋ ápēsé, nkamlén mím mébēé nêngáne ngondéré dyôm éche éntēd ábab e’trukán âké dé asin

† 24:33 Mwǎn-a-Moonyoŋ akwogé ape káá póndé ekwogé ape. ‡ 24:36 Ké mwǎn-né ámpē eebíi’é: dojge á kálag déewóó’é ábén e’yle.

mod awé akude sómbé áke délyáged mó. ² Átîntê échê ngondéré dyôm, étaan émbé eyókél, étaan-ne énwōn̄ debyéé. ³ Ábe bémbe eyókél bénwâlē e'trükâj boj bénkénwáléé dyög dé etrukáj áde ákwognédé. ⁴ Boj ábe bénwōn̄ debyéé bénwalé ábab e'trükâj ne dyög démpée á e'pid te. ⁵ Mod awé akudé'áá sómbé enkénkobéé ape, né-óó e'chá e'tágte'áá bó, békún-ne. ⁶ Melúde mé nkuu dôo esaád ébídé bán, 'Mod awé akude sómbé mó ahúe' nén! Nyéhyag-kóó nyétán mó.' ⁷ Dôo échê ngondéré dyôm ésyángé ásé, échágéd ábab e'trükâj. ⁸ Héé éche ébédé eyókél élângéé éche énwōn̄ debyéé bán, 'Nyéwôngén se ádén dyög dé etrukáj áyâle e'trükâj ábéd e'dímmé.' ⁹ Ngondéré éche énwōn̄ debyéé entimtén bó nén bán, 'Aáy! Dyög áde séwoó déekwogké syáne moosyâl. Nyéke nyéchan ádén wéé bésoméé.' ¹⁰ Né-óó, ngondéré ché énké dyög dé etrukáj achan. Áde békíí nê, dôo mod awé akude sómbé ápédé. Échê ngondéré é debyéé étaan éche émbé mbojsén bôóbôó bénké bésol á ndáb e ngande e e'wóngé bédib-pe ekob. ¹¹ Ámbid e pónré dôo échíníí ngondéré épédé boj bélébpé bán, 'A-Sáj dibnéd sé ekob!' ¹² Dôo mod awé akude sómbé átimmanné bó aá, 'Ne mbále, nlângé nyé nén meé meeblí'é nyé.' " ¹³ Héé Yesue ásógtéé ene ngan nén aá, "Nyétéd pónré áyâle nyéebí'é pónré eche Mwän-a-Moonyon ápeé."

*Ngan e bembalede béláán
ábe bérlyágnédé ngáb
(Luk 19.11-27)*

¹⁴ Yesue ambád ámpé aá, "Ene pónré nkamlen mímin mébé nêngáne mod nhógr awé anlédé eke ake, boj achélé ábē bembalede alyág eche ngáb áwâb mekáá. ¹⁵ Ambe bó mod té tângene eché ngude. Ambe nhógr e'kâlé e' kâbpe e'taan, ábe anínií e'kâlé e'be, ábe-'e anínií ekâlé ehógr. Amaá-'áá bó abe boj ákag. ¹⁶ Mbalede awé ankûd e'kâlé e'taan antéd mímē melemlem mé pónré áke akabén nyongé, ákudé' e'kâlé e'taan bémpeé néé nsyáj. ¹⁷ Awé mómpé ankûd e'kâlé e'be ambél melemlem ákûd-te e'kâlé bémpeé e'be néé nsyáj. ¹⁸ Boj mbalede awé ankûd ekâlé ehógr anké echógr alím, atéd mímē mâné ríme awé sângwéé ámbeé mó, ákóó mó áwéd-te.

¹⁹ "Etûn é pónré ámbid ené, sângwéé awé ábê bembalede anhúu, bôóbôó bélúmtén áte ngáne bó mod téé ábénldé mímē mâné. ²⁰ Mbalede awé ámbeé e'kâlé e' kâbpe e'taan ampé wéé eche sáj, áhôbê nén aá, 'A-Sáj, wembé me e'kâlé e'taan ábe ménkâbenné nyongé boj nkud e'kâlé e'taan bémpeé néé nsyáj, móomén.' ²¹ Dôo eche sáj élângéé mó aá, 'Né ábóó, edíi mbalede a bwâm, edé mod a mbále, ebelé bwâm. Ngáne éhélé nsongé ísad alyáged, mëbë wé nsongé mbaáá ályáged. Hyág-kó, déwôg menyinje.'

²² "Mbalede awé bembéé e'kâlé e' kâbpe e'be mó-'e ampé, áhôbê nén aá, 'A-Sáj, wembé me e'kâlé e'be ábê ménkâbenné nyongé boj nkud e'kâlé e'be bémpeé néé nsyáj, móomén.' ²³ Dôo echab sáj álângéé mómpé aá, 'Ebelé dyam áde ábóó, edíi mbalede a bwâm. Ngáne éhélé nsongé ísad alyáged, mëbë wé nsongé mbaáá ályáged. Hyág-kó, déwôg menyinje.' ²⁴ Dôo ane-'e awé bembéé ekâlé e' kâbpe ehógr ápédé boj áhôbê nén aá, 'A-Sáj, mbií meé edíi mod awé alelé áte. Ehúde' wéé wéewénéé, épâdé-'e wéé wéesobeé. ²⁵ Menwôg mbwôg, né-óó, menké mímôj mâné alíme á ndoab-tê. Mmôj mâné móo níde, mó-'e wé mén.'

²⁶ "Héé echab sáj álângéé mó aá 'A-ebébtéd ne ewomwom é mbalede! Wembíi wéé ndíi mod awé ahúde' wéé éewénéé, wéé mpáde-'e wéé méesobeé. ²⁷ Cheé-ó ênkâj boj weehéde mímêm mâné á ndáb eche békongéé mâné ábel nén á ehúu échém nítan néé níchyáá mâné mémpée ámín?' ²⁸ Dôo ane mod álângéé bembalede bémpeé aá, 'Nyékoben mó mímê mâné nyébe wéé mod awé awóó e'kâlé e' kâbpe dyôm. ²⁹ Kénzéé awé awóó, Dyôb débâd mó abe, ábûd-te awóó bwâmbwam. Boj ane awé mó-'e eewóó, Dyôb dékobén mó káájne mwâmpin awé awóó. ³⁰ Né-óó anén mbalede awé eésé dyam dé abenled, bébwêm mó á ebwôg-te, á ehíntén-tê. Áhed-taá áchyéé'é, ádyág-ke meson á nsel.' "

Mbakú e asog

³¹ Yesue ambád ahób ámpē aá, “Á póndé eché Mwǎn-a-Moonyonj ápēé néé kāj ne ángel é Dyōb ésyāél ădyeé á atii dé nkamlen âkáad bad. ³² Bad bésyāél a nkōjsé béladén áte áwē e'só. Ene póndé ăkab bó áte monje mébe melemlem nēngáne nnōn-a-mbód ákabéé éche mbód áte, ábānē ídyøj ní mbód péd pög, ábānē-'e tón é mbód échíníí eped. ³³ Né dāo ene kāj ébanéé bad ábe bésáá á ekáá émbáá, ábānē-'e bad ábe bésaá á ekáá é emwed. ³⁴ Áde nén débenlédté, ălāa bad ábe bédé mó á ekáá émbáá aá, ‘Nyéhyag, nyé bad ábe echem Sáj ánamté! Nyéhye nyékob nnam mé nkamlen ní Dyōb míme ábójséné nyé bootya póndé eche áhágé nkōjsé. ³⁵ Nyéekúd mímén nnam áyāle áde nzaa ékóbé me, nyêmbéé me chōm éche méndyēé. Áde píd ékóbé me nyênhé me mendib mémwē. Áde mpédé-'e nken, nyenkōb me bwâm. ³⁶ Áde ménkénwójé chōm éche íwáa'é, nyêmbé me mbóté. Áde ménkéndyé'é bwâm, nyéntøgén me. Áde míbédé-'e á mbwøg, nyénhýe me anōn.’ ³⁷ Héé bad ábe bésáá békwenténné mó bán, ‘A-Sáj póndé ehéé sénnyinné we ne nzaa boj sébē we ndyéed, káa áde píd ékóbé we boj sébē we mendib? ³⁸ Póndé ehéé-'aá sénnyinné we boj sékōb we nken áwed mendáb, ké'ë sébē we mbóté ádě wéewoo'é chōm éche éhágkē? ³⁹ Póndé ehéé wénkéndyé'é bwâm, boj sétogēn we, ké'ë séhyé sénōn we ádě édíí á mbwøg?’ ⁴⁰ Héé ene kāj étimtanné bó aá, ‘Ne mbále, nlângé nyé meé, póndé ké ehéé eché nyêmbenlé nê ne mwânned ké ahéé, ké awé eésé etógnén, né meé nyêmbeléé.’

⁴¹ “Hé-'aá ălāa'é bad ábe bédé mó á ekáá é emwed aá, ‘Nyésyøe me á díd-te, nyé ábe nyékudé nkógsen ní Dyōb. Nyékag á dű-á-muú míme méedimé’, míme Dyōb ábójséné áyāl e Devâle ne éche ángel. ⁴² Nzaa ewagé'áá me boj nyenkémbáá me chōm éche ídyágkē. Áde píd énköbpé me, nyenkéháá me mendib. ⁴³ Mbédé nken, boj nyenkénkobpé me áwen mendáb. Áde ménkénwóngé chōm éche íwáa'é, nyenkémbáá me mbóté. Áde ménkéndyé'é bwâm, mbé-'e á mbwøg nyéetøgne'áá me.’ ⁴⁴ Hé dōo békwenténné mó bán, ‘A-Sáj, póndé ehéé sénnyinné néé nzaa, ké'ë píd ékóbé we, ké'ë néé édíí nken, ké'ë áde wéewoo'é chōm éche éwáa'é, ké'ë ádě ékonlëé, ké'ë édíí á mbwøg boj séewóngene we?’ ⁴⁵ Héé ene kāj étimtanné bó aá, ‘Ne mbále, nlângé nyé meé, póndé ké ehéé eché nyenkénwóngénné ábén bad ké ahéé awé eebéde etógnén, me-ee nyénkénwóngénné.’ ⁴⁶ Ábén bó-aá béké âkud nkógsen míme méemaá’. Bad ábe bésáá-'e béké á alongé ádě déemaá’.”

26

*Bad bémبáá bé Israel
béhágke Yesue âwúu mó*

(Mak 14.1-2; Luk 22.1-2; Jón 11.45-53)

¹ Áde Yesue ámáá mím   mam m  sy  l ay  ged, d  o   l  ng  e   ab   b  mbap  e   a  , ² “Ny  b  íí né   b  n,   mb  d e e  pun   'be Ngande e Nny  me-  m  n   b  .   ch   epun d  o b  be   Mw  n-a-Moonyonj   mek  áá mé bad ábe b  bom   mó   aw  g.” ³ Beprise b  mb  áá ne bad b  mb  áá b   dyad b  mb  m   nd  b w  e   Kaifase, pris   amb  á  mb  áá. ⁴ Áhed d  o b  b  l  '  áá nt  i   k  b Yesue   mes  om-  t  , âw  u mó. ⁵ Boj b  nh  b b  n, “De  b  l    n     n     mbw     ngande, áy  le né   bad b  pe  n epuut  d.”

*Mmwa  d nh  g aw  gt  
Yesue á dyad á Betani*

(Mak 14.3-9; Jón 12.1-8)

⁶ Yesue amb   á Betani   nd  b w  e   Sim  ne aw   ak  kol   nkole mé mel  j. ⁷ Áde ády  gk   ndy  ed n  , d  o mmwa  d nh  g ap  d  e   aw   ne apom   dy  g dé elod   bw  m áde d  enl  l nkun, asy  g mó d     nl  . ⁸ N  e   ab   b  mbap  e   b  ny  n  e   n  , b  nl  j  , b  sedt  -'   b  nken, “Che     k  áá boj an  n mmwa  d ab  bt  , en  n ny  a e dy  g?” ⁹ B  h  l  '  áá se b  s  m   ad  n dy  g nkun mb  áá, b  w  ng  n bet  t  k   b   bad.” ¹⁰ Yesue amb  íí mam míme ab   b  mbap  e   b  h  b  '  áá. N  -  o an  l  áá b   a  , “Che   ny  tagte   an  n mmwa  d? Dyam ád   áb  enl   me át  omt  n   abo  j. ¹¹ Bet  t  k   b   bad b  b  ne ny   p  nd   ésy  l, boj me pen m  e  ba   ne ny   p  nd   ésy  l. ¹² Asy  g   me ad  n dy  g   nl     bojnsen me áy  le nl  me m  m  m  . ¹³ Ne

mbále, nlânge nyé nén mée kéhéé ádě rímén nkalaŋ íy bwâm mékanlédté nköjsé áte ínsyääl, békib dyam ádě anén mmwaád ábélé, âkamtén mó.”

*Judasé akwěnténé Yesue asóm
(Mak 14.10-11; Luk 22.3-6)*

*Yesue ne ábē bembapæs bétómté
Ngande e Nnyíme ámín
(Mak 14.12-21; Luk 22.7-13, 21-23; Ior 13.21-30)*

¹⁷ *Par 1. ó 1. ó 1. N. 1. E. 1. ó N. ^*

¹⁷ Bœb-pœ, ponde e Ngande e Ewele-e-Ngen empe. A epun e so e ngande, bembapœs ábœ Yesue bëntän mó, bësedté mó bânen, “Héé wédøngé weé sébojsen we ndyéed e Nnyíme-ámín?” ¹⁸ Dôo Yesue áloméé bô á dyad-tê wéé mod nhog aá, bélâa mó bân meléede ahjbé nén aá, “Echem póndé emaá ape. Áwôn ndâb dôo syâabe ábêm bembapœs sédyéé ndyéed e ngande e Nnyíme-ámín.” ¹⁹ Né-ôo bembapœs bëmbel ngâne Yesue ánlâaá’ bô, bëmbojsén-ne ndyéed e Ngande e Nnyíme-ámín. ²⁰ Ene ngukél Yesue ne ábë bembapœs bëndyeé ásë, bédyâg ene ndyéed. ²¹ Á ndyéed mîn wê, dôo Yesue álângéé bô aá, “Ne mbâle, nlângé nyé nén meé nyé mod nhog âbë me á mekâá mé bad bé ekoyí.” ²² Nén dénwögëd bembapœs ndutul bwâmbwam. Bëmbootéd mó asedé nhog ámbid aninií, bân, “A-Sâñ, ndúbpé meé saké me.” ²³ Dôo Yesue átintanné bô aá, “Mod awé súmô séëtôdë ewele á dïse-tê atode ahog móôsôm me. ²⁴ Mwän-a-Moonyoŋ ãwë ngâne éténléde, boj medim ne ane mod awé ãsôm mó. Ébagé’âa bwâm ne ane mod nzé bénkëntögen mó achyâa.” ²⁵ Héé Judasë awé ankwentén Yesue asóm ásedteé mó aá, “A-meléed, me-yë?” Héé Yesue átintanné mó aá, “Ngâne éhôbë.”

Ndýééd e Sánqú

(Mak 14,22-26; Luk 22,14-20; 1 Kor 11,23-25)

²⁶ Áde bédyákē ndyéed nê, dôo Yesue átéde ewele, ásagnân Dyöb, boj ákabtáad áte, ábagé ábë bembapës áhöbë nén aá, "Nyékob, nyédyê, echem yël nén." ²⁷ Ámbid e nê, antéd mbwendé m̄ mím, ásagnân Dyöb, ábagé bô, boj áhöbë nén aá, "Nyé moosyæél nyémwê. ²⁸ Mmêm mekií mômén. Mmén mekií médíi melë mékôslë. Mmén mekií mésyógké á nló m̄ bad híin, âbel nén Dyöb álagsen bó mbéb. ²⁹ Nlânge nyé nén mëé, méemwáá mímén mím ámpë káéj ne epun éche mémwëë mó ekóólé ne nyé á nkamlen ímmë echem Sáj." ³⁰ Bénkõn nkéngé mé nsagnen. Néé bémáá akón, bénkë á Ekone é menzab.

*Yesuε ahóbé ngáne
Petro ábāŋgē mó áyēl*

(Mak 14,27-31; Luk 22,31-34; Jon 13,36-38)

**Yesue akánné á Getsəmani
(Mak 14.32-42; Luk 22.39-46)**

Békóbé Yesue
(Mak 14.43-50; Luk 22.47-53; Jón 18.3-12)

Bépéné Yesue á kóte

(Mak 14.53-65; Luk 22.54-55, 63-71; Jon 18.13-14, 19-24)

⁵⁷ Hé dōo bad ábe bénkōb Yesue békééné mó á ndáb wée Kaifase awé ambé Prise Ambáámbáa. Áhed dōo bemeléede bé mbéndé ne bad bémbará bé Israél bémpe bénladénné áte. ⁵⁸ Áde békéeneé Yesue nê, Petro ahídé'áá mó ámbid mwă etún káejé bérpē nchiiten ne eyáde éche Kaifase. Néé ápédé áhed ansól á eyáde-tê, ádyé ásé ne benon bé Ndáb-e-Dyöb, ábel nén ányin ngáne nkáásé mme Yesue mésögké. ⁵⁹ Baob-poo, beprise bémbará ne bad bé káansel bésyääl békédé'áá bad ábe békib mbónj é metóm á nló wée Yesue ábel nén bérwúu mó. ⁶⁰ Ké nénjáne ekud é bad ênhyé mbónj é metóm abíd áwe nló, bénkénkóbénné mó awusé ké ahog. Kéajé ne á asog, dōo mbónj ébe ebídé, éhjibé nén bán, ⁶¹ "Anén mod anhób aá, móhele móbôotéd Ndáb-e-Dyöb aá mólöñ-'e chó ámbid ámpé átinté e e'pun é'láán." ⁶² Áde Prise Ambáámbáa éwogé nê, dōo átyéémé ámín boj ásedté Yesue aáken, "Weewoo'é dyamdyam áhób tângene dyam ádë ábén bad bérhóbé we

* 26:50 Amúē, wéebeléé chōm éche éhyédé abel'ē? Káa, Amúē, cheé éhyédé abel hén?

á yĕl-ε?”⁶³ Boj Yesue enkēnkədénné mó. Hê dôo Prise Ambáámbáa álāngéé mó ámpē aá, “Ne melé á dîn á Dyōb áde ádé á alongé, láá sé mbále, we-εé edé Ane-awé-Bewógté, Mwān a Dyōb-ε?”⁶⁴ Hê dôo Yesue ákwentanné mó aá, “Ngáne éhóbé.” Yesue ambádté ámpē aá, “Á mbále, nlângé nyé nén meé bootya enén póndé, nyéenýin néé Mwān-a-Moonyonj ádyéé á ekáá émbáá é Dyōb a Ngum. Nyéenýin-ne néé ádyéé á mbag mîn, ásudeé á nkōjsé.”⁶⁵ Dôo Prise Ambáámbáa ányábé mbóté álúmed nén aá mólií, boj álāngé bad bé kóte aá, “Asyáá Dyōb! Mbónj éhéé épée déhedeé? Nyé baásyāél nyéwogé bɔob ngáne ásyáá Dyōb!”⁶⁶ Dôo ásedeé bó aáken, “Chán nyéwémténé?” Héé békweíténé bán, “Akwedé nkáá, aténgéné-’e awé.”⁶⁷ Dôo donge á bad békóótédé mó meléed asobted á’só, békómá-’e mó. Ábíníí-’e békómá mó mebén,⁶⁸ békóhbé-’e bán, “Á-mod awé ahóbé aá móó módē Krístæø, láá-’e sé mod awé abómé we.”

Petro abáá Yesue áyāl

(Mak 14.66-72; Luk 22.56-62; Jón 18.15-18, 25-27)

⁶⁹ Ene póndé Petro andyéé ásé á eyáde é kóte-tê. Hê dôo ngondéré e mbalede póg épédé awé, boj éhóbé aá, “We néen, edé nhógo awé awójné’áá Yesue, ane mod awé abídé á mbwógo Galilia.”⁷⁰ Boj Petro antáj á’só wéé ábê bad bésyāél, ákwentén aá, “Meebíí’é dyam áde éhóbéé.”⁷¹ Áde ámáá ahób nê, antím á mmwé mé eyáde é kóte. Áhed dôo mbalede a ngondéré ampée ányíné mó, boj álāngé bad ábe békóótédé áhed aá, “Anén mod abédé ne Yesue, mod a dyad á Nazaret.”⁷² Boj Petro antáj ámpē, áhóbé nén aá, “Mmwág melé nén meé meebleí’é me ane mod.”⁷³ Éebeméé áte, bad ábe béntyéém áhed bémpe wéé Petro, boj békóhbé nén bán, “Etáa ngén, edé nhógo awé ahídé’áá ane mod. Mbwéd e ehób echônj epanle we áte, nén ebídé á mbwógo Galilia.”⁷⁴ Dôo Petro ámwáké melé aá, “Dyōb ákógsen me nzé nkale metóm! Meebíí’é ane mod!” Áde ámáá ahób nê hóbén, nchóm-a-kúb antój.⁷⁵ Dôo Petro ákámténé ehób éche Yesue ánláá’é mó aá, “Nchóm-a-kúb adéhób aá mótoó’, wébánj me áyāl ngen éláán.” Dôo Petro ábídé á ebwógo te, boj ábənlé awé Anchíí bwâmbwam.

27

Békééné Yesue wéé Payledé

(Mak 15.1; Luk 23.1-2; Jón 18.28-32)

¹ Néé bín é’sájgé sájgén, beprise békóábáá ne bad békóábáá bé Israël bésyāél bémbootéd Yesue ahäge ngáne békóubé’é mó.² Béñhaq mó, békóag-ke mó á mekáá wéé Payledé awé kâj e aloj á Roma êmbanéé aá ákamlan bad bé mbwógo Judeya á póndé eched.

Kwééd eche Judasé

(Mbél 1.18-19)

³ Áde Judasé, ntúré awé Yesue ányíné nén aá kóte ebagé mbakú nén bán békóú Yesue, ambé ngol ne awusé áde ábél. Nê dênkéj, antéd móom mé káppe méláán míme beprise békóábáá ne bad békóábáá bé Israël békóbeé mó, áke átimtéed bó ámbid.⁴ Anhób aá, “Mbélé békóé áke mod ntúré awé eébèle dyamdyam, awé békóubé’áá bɔob ngén.” Dôo bétimtanné mó bán, “Cheé séwóó abel ne nê? Nê ánōne we.”⁵ Néé Judasé áwogé nê, ambwémé bó mímmé móom mé káppe méláán ásé wéé békóbeé á Ndáb-e-Dyōb. Néé ámáá abwém, ambid áke ápan yĕl.⁶ Beprise békóábáá bénlăd mímmé mōná áte, békóhbé nén bán, “Mmén mōná índíí mōná mé ebén. Né-ó, mbéndé eébagéé kunze nén bán déladten mímmé mōná ne mōná í Ndáb-e-Dyōb.”⁷ Áde békóábáá ahögten tângene mímmé mōná, bénéd mó, békchánén etúú éche békóótédé etúú é mod nhógo awé atumé’áá mbeé. Béñchan chó, álíme beken.⁸ Nê dôo ákéá boj káoj ne’ chii, békchágé échê etúú bán, Etúú é Mekíí.⁹ Nén, dêmbeñléd áloned e’yle ábe nkal é’déadéj Jeremayaá ánhóbé aá, “Bétéd móom mé káppe méláán míme índé nsongé mí mōná míme donge á bad bé Israël békweíténé asábe áwe nló,¹⁰ békóenléd áchanen etúú éche ntumé-mbeé. Nén dôo Dyōb dénláá’é me aá, míbel.”

Payledé akáádté Yesue

(Mak 15.2-5; Luk 23.3-5; Jón 18.33-38)

¹¹ Enén póndé-ó Yesue antyéém á nkáásé á'sō wéé Payledə awě akämlánnáá mbwóóg e Juda. Payledə ansedéd mó áá, "Wéé edé kāj e bad bé Israél-ε?" Yesue antimtéen mó áá, "Ngáne éhóbé." ¹² Boj áde beprise bémبáá ne bad bémبáá bé Israél bénhōbpé mó mam áyāl, enkēnhōbpé dyamdyam. ¹³ Né-óó Payledə ansedéd mó aáken, "Weewógeeé mímén mam mésyāel míme ábén bad békébéeé we áyāl-ε?" ¹⁴ Boj ké nê, Yesue enkēnhōbpé ké eyale, nê-'e dénkōmēd Payledə yäl áte bwâmbwam.

*Mbakú e kwééd eche Yesue
(Mak 15.6-15; Luk 23.13-25; Jon 18.39-19.16)*

¹⁵ Bɔɔb-pɔó, mwɛ́ téé nzé Ngande e Nnyíme-ámīn empɛ́, Payledɛ ammentén mod a mbwɔg nhóg abíded á mbwɔg. Ane mod abágé'áá mod ké ahéé awě bad bé dyad bémPWDté. ¹⁶ Ene póndé mod a mbwɔg nhóg ambé awě béchágé'áá bán Barabasɛ. Ane mod ambyéén bwâmbwam áyāle e'bébtéd é mekan ábe ábél'áá. ¹⁷ Né-ɔó áde ndun e mod éládné áte á ndáb wée Payledɛ, ansedéd bó aá, "Nzé-módé nyéhedeé bán ímbídɛ, Barabasɛ ké'e Yesue awě béchágéé bán Kr̄istə?" ¹⁸ Ambel nén áyāle ambíi bwâm aáprise ambáá ne baámbáá békágé Yesue áwemekáá áyāle kónjí embé bó áte. ¹⁹ Áde Payledɛ ádyéé á atii wée ákáádté'áá bad, mwaád anlómé mó nsəl aá, "Weewóó dyamdyam ábel ne mbakú eche ane mod awě eébèle dyamdyam, áyāle nnāngé mó nló nkoo níme nítomé nén níme nítagté me bwâmbwam." ²⁰ Beprise bémbaráá ne bad bémbaráá bé Israel bénsoł ábê bad áte nén bán béláa Payledɛ ábíded dásō Barabasɛ boj ábe mbakú nén bérwúu Yesue. ²¹ Né-ɔó, áde Payledɛ ásédté ábê bad aá, "Áyāle ábén bad béké, ahéé nyéhedeé bán, ímbídɛ?" Bó moosyaál bérnkwentén bán, "Barabasɛ!" ²² Dóo Payledɛ ásédtéé bó ámpē aá, "Chán-nō nyéhedeé bɔɔb bán móbel ne Yesue awě béchágéé bán Kr̄istə?" Dóo békwentanné bán, "Békome mó á awɔg!" ²³ Héé Payledɛ ásédtéé bó ámpē aá, "Áyāle chán? Ebébtéd éhéé ábél'áá?" Boj bennabé abón bán, "Bomé mó á awɔg." ²⁴ Áde Payledɛ ányiné aá móshélëë se móhæylén ábê bad mewemtén tângene mbakú eche Yesue, ábán nén aá, ábê bad békpeene' mpuutéd, dóo átéde mendib boj áwobpé mekáá áwab e'só, áhobé-'e aá, "Mekáá mésáá me áyāle kwéed eche anén mod. Né ánøne nyé bën." ²⁵ Héé ene ndun e mod ékwentanné bán, "Sékwénténé. Mmē mekií mébë áwëd nló, nchoo ne rímëd nchyáatén!" ²⁶ Né-ɔó, Payledɛ ambídtéd bó Barabasɛ. Ambë kunze aá, sénze ébom Yesue, boj béké békome-'e mó á awɔg.

Sénze éwélé Yesue (Mak 15.16-20; Jon 19.2-3)

²⁷ Sánze éche Payledē étēd Yesue, ékēēn mó á eyáde é nkamlenē, bélād-te baáb ábíníí
bésyāēl áte áhed. ²⁸ Bénhūd mó mbóté áyāl, béhé mó mengombe míme n'yage' míme
níwágné mengombe mé kāj. ²⁹ Béntēd ngen é mechă, bélóó mó ekoté éche émbē néē
ekoté é kāj, béhé mó chó á nló. Bénhē mó ntój á ekaá é mbáá te, bébwōgkē'-e mó
mebóbónj âwel mó. Béhóbé'áá nén bán, "Edúbé ébē ne wε, a-kāj e bad bé Israël!" ³⁰ Dóo
bébóótédé mó meléed asob á yǎl, boj bétēdē mímē ntój, bék̄omé mó á nló. ³¹ Áde
bémáá mó awel, bénhūd mó mímē mengombe á yǎl, bétimēd éche mbóté. Néē bémádē
nê, bénkeén mó âkē dé ábome mó á awəg.

Bébómmé Yesue á awəg
(Mak 15.21-32; Luk 23.26-43; Jon 19.17-27)

³² Áde békagké nê, née échê sánze ébídenné Yesue á dyad-tê, dôo bébómné mod awé ambíd á dyad á Sirine awé békâchége áá bân Simone. Héé békobé mó, boj békâchéte mó awog áde Yesue bân áhíidne mó dô ámbid. ³³ Dôo békâchéte hōm áde békâchége áá bân, Golgota, awé adé nén bân, "Hōm dé Ebóygél é Nló." ³⁴ Áhed, bémbe Yesue mím mímé békâchéte achachæe áte. Boj ádë áwogléné mó á nsel, enkénkwenténné amwé. ³⁵ Áde bémáá mó abome á awog bênsid mbambú âkab éche mbóté. ³⁶ Néé bémáá mó mbóté akab, bénkyéé áhed ânón mó. ³⁷ Béntél eché nzom e kwééd á abámbé nén bân, "Yesue mó nén, kây e bad bé Israël." Bénted ádë abámbé, békâchéte mó nló-mín. ³⁸ Bémboomé bechibé békâchéte á awog

nchoo ne Yesue, nhóg á ped e ekáá émbáá, aníñíí'-e á ped e ekáá é emwed. ³⁹ Bad ábe bétomé'áá nzii benben ne áhed békómá'áá nló békómmé'-e mó nzyáj ⁴⁰ bán, "Wenhób weé móðbóötéd Ndáb-e-Dyöb, weé móloñj-é chó ámpé átínté e e'pun é'láán. Nzé we-ee edé Mwän a Dyöb, sönj echoñ yël, ésud ásé á awög hê." ⁴¹ Beprise békómbáá, bemeléede bé mbéndé ne bad békómbáá bé Israël bómpe békówelé'áá mó, békóhbé bán, ⁴² "Achöjté'áá bad, baob eéhleé yël awöngén. Nzé ne mbále módé kénj e alon á Israël, ásud-toó á awög hê baob. Hê dóç sédübëë bán módé Ane-awë-Béwógté. ⁴³ Adúbpé aá Dyöb ádé ne mó, aá módë'-e Mwän a Dyöb. Ahâ! Dyöb áwöngén-noo mó baob dényin." ⁴⁴ Kéáj ne bechíb ábe békomboméé á awög nchoo ne Yesue bómpe bésyáá'áá Yesue.

Yesue awédé

(Mak 15.33-41; Luk 23.44-49; Jon 19.28-30)

⁴⁵ Áde bín é'pé dé kəd, ehíntén ênkwě hōm ásyəäl kéáŋ ne ngéŋ éláán. ⁴⁶ Dóo Yesue álébpé esaád aá, "Elí, Elí, láma sábátani," awě adé néñ bán, "A-Dyöb ádêm, a-Dyöb ádêm, cheé ékáé boŋ étedté me?" ⁴⁷ Née doŋge á bad ábe bémbeň benben bewóge nê, bénhöb bán, "Achénle Elaijaa aá áhye áwôŋgen mó." ⁴⁸ Ábwög-ábwög bó mod nhóg annyəgéd, antéd kuchá, ásõm á ntónj, átõdē á ebéntéd é mím tê, boŋ áhāg mó á nsəl aá ámwé. ⁴⁹ Ábíníi'-e béhöb néñ bán, "Nyémwé, dényîn nzé Elaijaa áhye mó awôŋgen." ⁵⁰ Hé dáo Yesue álébpé esaád ámpē boŋ ámyě'-e nlém. ⁵¹ Ene póndé chěn abad ádě děnkăb Ndáb-e-Dyöb áte, děnsalé áte e'ped é'be bootya ámín kááŋ ne ásē. Ndooob ennəjnéd, meláá mésanlé áte, ⁵² soŋ énednad. Ekud é bad bé Dyöb ábe bémmod awé bëmpuú, ⁵³ békíd á soŋ-tê. Ámbid e póndé áde Yesue ámáá apuu, bénkě á dyad tê á Jerusalem. Á dyad tê wé, ekud é bad énniyin bó. ⁵⁴ Née mod ambáá a sánze ne sánze éche énóné'áá Yesue bényíné néé ndooob énájnédé, bényín-ne mekan mésyəäl míme mébénlédé, mbwóg ménkób bó bwâmbwam, béhöb-é'néñ bán, "Ne mbále, anén mod abédeé Mwän a Dyöb." ⁵⁵ Ekud é bebaád éche êmbootéd Yesue ahíd ámbid se á Galilia, bëwōngān-ne mó, béntyéem etûn, bénjóné mekan mésyəäl míme mébenlad. ⁵⁶ Átinté e ábê bebaád, Maria Magdalene, Maria awě abéde nyaá awě Jemse bó Joseb, ne nyaá awě bän ábe Zebédie bémbeň áhed.

Nlíme móre Yesuε

(Mak 15.42-47; Luk 23.50-56; Jon 19.38-42)

⁵⁷ Néé ngukél épédé, nhon m̄ mod nhógríme béchágé'áá báñ Josebē mēmp̄. Ane mod abédéé mod a dyad á Arimatia. Mómp̄ abédé nhógrawé ahídé'-áá Yesue. ⁵⁸ Anké wéé Paylede áá ábe mó kunze âténdim ríme Yesue. Paylede ambé kunze nén aá bébe mó ndim m̄me Yesue. ⁵⁹ Josebē antéd ndim m̄me Yesue, ákāan mó mbóm e ekóólé, ⁶⁰ alímé mó á soj eche běpwōgé á eláá-té. Ene soj ebédé'-e soj e ekóólé eché Josebē mwěn ánwōngé. Ámbid e nê, antínéd aláá ámbáá akólén nsəl n̄ soj, ákē'-e mó. ⁶¹ Maria Magdalene ne Maria awé anchyáá Jemse bó Joseb, bénlyäg bédyyëë á nkëg n̄ soj.

Payledε alómé sénze

*Fayéde aénnie son
âñon son eche Yesue*

⁶² Néé bín é'sáŋgé, nê démbē á Mbwe-mé-nkóme-áte, beprise bémbáá ne Befarisia bénladén, béke bénýin Paylede, ⁶³ bélāŋgē mó nén bán, "A-sáŋ, sékamtan nén bán ádě nkál a metóme ne ábédé ámín, anhóó aá móðpuú ámbíd e e'pun é'láán. ⁶⁴ Né-óó tóméed akale nén, weé bénøne' eché soj bwám, káájn ne e'pun é'láán ábel nén boj ábē bembapee béeħelé mímē ndim achíb se bélāŋgē bad bán apuúdé. Né nén débē metóm míme íchábé ámín tómaa míme ásébpé akal." ⁶⁵ Doo Paylede álâŋgée bó aá, "Nyétêd sánze ânɔn soj bwám, ábel nén dyamdyam déebenlád." ⁶⁶ Héé békíí, boj békíí e'chem á aláá ádě démbē á nsəl í soj, ábel nén békíí nzé mod anédté, bétēdē-'e sánze áhed ábel boj békííbé' Yesue ndim.

Yesuε apuúdé

(Mak 16,1-10; Luk 24,1-12; Jon 20,1-10)

¹ Ámbid e mbwε-mé-nkóme-áte, á epun é'sō é sôndé,* epog é mbwembwε, Maria Magdalene ne Maria awě anchyáá Jemse bó Joseb, benké soj eche Yesue anon. ² Esám-éek̄mtēnē, ndɔob ennəjnéd, ángel e Dyōb ebíd ámīn épε. Entínéd ádē aláá ádē démbē á nsəl n̄ soj, édīr-’e dó ámīn. ³ E'só é'péné'áá ene ángel áte néε emwedmwed, mbóté-’e épübē mó féréd. ⁴ Mbwóg ménkōb sánze éche énóné'áá ene soj. Né dēnkāj bennəjnéd, békwe ásē, béké néε ndim mí bad. ⁵ Héε ángel élângεé ábē bebaád aá, "Nyéebáá". Mbíi meé Yesue awě bemboméé á awög móo nyéhyédé anon. ⁶ Eésaá hén. Apuúdē ngáne ánlāā'nyé aá ébenlé. Nyéhyε nyénən wéε bennnaádté mó. ⁷ Nyékag-kóó mehélé bɔob, nyéláá ábē bembapεe bán, apuúdē, amaá-’e akε á'sō á Galilia, áwed-taá bényinē mó. Nyéechatán dyam áde nílāngé nyé." ⁸ Né-ɔó, bennhidnéd mehélé áhed, kε néε békédé mbwóg, menyinje mémbē bó áte. Bénnnyagéd akε déláá bembapεe ábe Yesue dyam áde ábénlé. ⁹ Áde ábē bebaád békagké n̄, dóo Yesue átáné bó téléd, boj áhōbē aá, "Nl̄enté nyé." Bémpε awē, békóbén mó á mekuu ábe mó edúbē. ¹⁰ Héε Yesue álângεé bó aá, "Nyéebáá". Nyéke nyéláá ábēm bembapεe ábe bédé néε ábēm baányaŋ nén bán, békag á Galilia. Áwed dóo bényinē me."

Sánze éhóbé dyam áde ábénlé

¹¹ Ngáne ábē bebaád békagké áláá bembapεe ábe Yesue dyam ádē ábénlé, donge á sánze ádē áñóné'áá soj eche Yesue dēnké á dyad-tê akε dé aláá beprise bembáá chōm ésyāäl éche ébénlé ádē ángel épédé. ¹² Beprise bembáá ne bad bembáá bé Israel bemböm átii ngáne békénlē. Néε bémáá atii, bembë échê sánze nsonjé mí mənē míme níchábé ámīn. ¹³ Béláá-’e bó bán béláá bán, "Yesue ábē bembapεe bénhyε mó ndim achib nkuu ádē nyékúné. ¹⁴ Nzé Paylede awögé, né séebél adúbé nén aá awusé déesaá ádēn. Né débél nyéesónlé á ndutul-tê." ¹⁵ Né-ɔó éche sánze ênkōb mímē mənē, bél-’e ngáne bénlāā'nyé bó. Kááj ne' chii, bad bé Israel bédíi békale mímē nkalaŋ.

Yesue apiídé ábē bembapεe

(Mak 16.14-18; Luk 24.36-49; Jón 20.19-23; Mbé 1.6-8)

¹⁶ Bɔob-pɔó, bembapεe dyōm-ne-nhóg ábe Yesue benké á ekone-mín á Galilia wéε ánlēbē áá békε. ¹⁷ Anyín ádē bényiné mó, bembε mó edúbē, kénée bó donge á bad bénkēnkonjé adúbe nén bán Yesue mwén-εé akɔjté abé. ¹⁸ Héε Yesue ásídté bó bennben, boj álāngé bó aá, "Kunze esyāäl ebagnédé me, ádyōb ne á nkōj n̄sé. ¹⁹ Nyékag melonj mé nkōjsé mésyāäl, nyébélé bad ábēm bembapεe. Nyédusan-ne bó á dín ádē Titéε, á dín á Mwǎn ne á dín dé Edəádəŋ éche Ésáá. ²⁰ Nyéyágte-’e bó áhíd mekan mésyāäl míme nísgöténe nyé. Nyébíi nén bán mēbē-’e ne nyé kááj ne á asog dé nkōjsé."

* 28:1 Nédē á Sôndé.

Nkalanj m̄ bwâm m̄me Yesue ngâne
Makɔsé
átélé
Ndibned n̄ kálag

Nkalaŋ ím bwâm ngáne Makjose átélé nhóbe tâhgene Yesu Krîstæ, Mwän a Dyöb. Nlúmté Yesue ngáne mod awé abele mekan, awónj-’e kunze âbel rímmê mekan. Ene kunze enyínnédé áyâl e mekan mme áyágté’áá ne mme ábél’áá. Yesue ahóbé áá móð móðé Mwän-a-Moonyonj awé ampë, âbe ádë alongé, âbel bon bad békud alagsen dé mbéb.

Á kálag tê wén, Makəse ábídté mekan áwed ímme Yesue ábélé'áá tómaa ímme áhóbé'áá ne ímme áyágte'áá. Ahóbe ngáne Jøne áhójgé epε éche Yesue, ahób tāngene edusen éche Yesue, ahób-pe mekəgsen ímme Yesue ânkudté. Âsoged, alúmté áte ngáne bēmboméé Yesue á awəg ne ngáne âmpuu'έ. Nyaa édē ébε éche enén kálag ésogé, élümte-'e nén bán saké Makəse atelé chό.

Nkabtéd n kálag

Mbooted mé nkalaŋ mí bwâm 1.1-13

Nsón m̄me Yesue á Galilia 1.14-9.50

Nsón míme Yesue áde áhídté a Galilia âpe á Jerusalém 10.1-52

E'pun bé asóg ábe Yesue á Jerusalém ne bénben ne Jerusalém 11-13

Akáad áde békáádté Yesue ne kwééd eche áwédé 14-15

Mpuu m̄me Yesue 16.1-8

Alúmed áde Sángwéé álúmté yĕl ámbid e mpuu ne mpume ímmē 16.9-20

Ehángé éche Jōne, Ndusene

(Mat 3.1-12; Luk 3.1-18; Jon 1.19-28)

¹ Nkalanj mí bwâm ímme Yesu Krîstæə Mwân a Dyöb mâmén. ² Mbóótédé ngáne nkál é'dâdâñ Yesayaa ântenlé áá,

“Dyĕb áhóbé aá,

‘Nóné’, nlóme mímêm mésénze míme mésébē we á’sō, ábonṣen we nzii.’

³ Móbelé' ehéngé á ehyángé néñ,

‘Nyébonjsen epe éche Sángwéé. Nyétíi echě nzii.’ ”

⁴ Né-óó Jøne ampé á éhyánge, ádusén bad, ákalé-’e eyale é Dyöb aá, “Nyétede abel dé mbéb, nyékud edusen âbel boj Dyöb álagsen nyé mbéb.” ⁵ Bad békag áwé âwóglén mó. Née bêmpaléé ímmâb mbéb áte Jøne ádusén bó á edíb é Jodan. ⁶ Jøne ahágé’áá mbóté éche békénlé nyoj éche ébídé á yél e kamél.* Awáá’áá ngéá a ngob e nyam. E’chuu ne bengóméé bóó ádyágé’áá. ⁷ Ahájnté’áá aá, “Mod ăpé ámbid echém awě atómé me. Meékwognedéé ké ábwaam ásē áhune ímē nkœd mé metámbé. ⁸ Ndusan nyé ne mendib, boj ádusén nyé ne Edædæj éche Ésáá.”

Yesue akudé edusen ne mekəgsen

(Mat 3,13-4,11; Luk 3,21-22; 4,1-13)

⁹ Mmê mesú Yesue ambíd á dyad á Nazaret á mbwóg e Galilia ápé wée Jõne. Jõne andusén mó a edib é Jodan. ¹⁰ Áde Yesue ábídeé á edib-te dôo ányíné née ngob e dyöb énednadte. Edædæj é Dyöb émbid ádyöb, ésud mó á nló mîn née élâa. ¹¹ Héé ehâb ébídeé ádyöb nén, “Edíi awem mwän a nlém awë ñidáa bwâmbwam. Ndé menyinge ne we.” ¹² Ábwög-ábwög échê Edædæj ênkid Yesue á ehyânge. ¹³ Andyee áwed móom mé e’pun méniin, Satane ákægé mó. Nyam échê ékaa’ ébédé áwed, ángel-le éwõngân mó.

* ^{1:6} Bébénládtáá nyoñ é nyam eche békchägeé bán Kamêl âbel mbóté. Mbóté éched éebágé'aá kunze é mbóté.

*Yesue apwedé bembapēs bē'sō
(Mat 4.12-22; Luk 4.14-15, 5.1-11)*

¹⁴ Ámbid e póndé bénhē Jōne á mbwōg. Áde bémáá mó ahé á mbwōg, Yesue ampē á mbwōg e Galilia ákalé nkalaŋ mí bwām ní Dyōb, áhōbē néen, ¹⁵ “Póndé epedé, nkamlen ní Dyōb índé bēnben. Nyé mod téé áhəŋlen ádē abé dé mbéb, nyédubē-'e nkalaŋ mí bwām.” ¹⁶ Áde Yesue ábammeé nkin mé edib-é-nzab é Galilia annyín Simōne bō mwānyan Andreya, néee bēbwémeé mbinzé. Bébédée bekób-bé-súu. ¹⁷ Héé Yesue álāŋgeé bō aá, “Nyéhíde me. Ngáne nyékobéé súu bōob, mēeyāgēd nyé ngáne nyétēdtē bad nlém á abum áhid me.” ¹⁸ Ábwōg-ábwōg bēntedé échab mbinzé, bēhīdē-'e mó. ¹⁹ Néé ákíí mwā etūn, annyín bān ábe Zebodie, Jemse bō mwānyan Jōne á bōle-tē néee bēbwémeé mbinzé. ²⁰ Anyín ádē ányiné bō, anchélē bō. Bēntedé echab sáŋ Zebodie ne bad bé nsón á bōle-tē bēhīdē Yesue.

*Yesue abídté mod edədəŋ é mbéb áte
(Luk 4.31-37)*

²¹ Yesue ne ábē bembapēs bēniin bēnkē á dyad á Kapanahum. Ádē mbwē-mé-nkóme-áte ímpédé, Yesue anké asól á ndáb e mekáne, ábootéd bad ayáged. ²² Nyaa eche áyágté'áá enkóméd bad yěl áte bwāmbwam áyāle ayágté'áá néee mod awē nzé ahóbé né emáá. Eeyágté'áá nēngáne bemeléede bē mbéndé. ²³ Héé mod nhog awē edədəŋ é mbéb émbēē áte ápédé tēlēd, ábōnē aá, ²⁴ “A-Yesu, mod a Nazaret, cheé syánē déwōjnē? Ehyedé sé awúu-yē? Mbíí wē bwām. Edī mod awē Dyōb álomé, awē asáá.” ²⁵ Héé Yesue ákānnéé échē edədəŋ é mbéb áte aá, “Lám, bíd ane mod áte!” ²⁶ Dōo échē edədəŋ é mbéb éságte ane mod áte ngíne-ngíne, éhé-'e esaád é ngíne, boj ébíd-te mó áte. ²⁷ Menyáké ménkōb ábē bad bwāmbwam. Bésedté nhog ne anííi bánen, “Nzé-dyámé dén! Ayáged dékōjēlē dén-e? Anén mod awóó ngíne ákamlen e'dədəŋ bē mbéb, é'wōgnē-'e mó!” ²⁸ Nén dēmbēl nkalaŋ míme Yesue mēnkanlēd mbwōg e Galilia esyáel.

*Yesue achōjté ekud é bad
(Mat 8.14-17; Luk 4.38-41)*

²⁹ Néé bēhīdē á ndáb e mekáne hidtén, Yesue nchoo ne Jemse bō Jōn bēnkē á ndáb eche Simōne bō Andreya. ³⁰ Simōne mwaád nyaá ambé á anoj dé nkole, ahéb dēnsog mó. Áde Yesue ápédé peén, bēnlāá mó tāŋgene nkole míme ane mmwaád. ³¹ Dōo ákíí wēe ane mmwaád ábédé, boj áchāŋgē mó á ekáá, awónjgen mó ásyə ásē. Ahéb dēmmaá mó, ákōb-pe bō nken. ³² Ene ngukél áde enyen emáá asud, bad bēmpēén bad bē nkole bésyāel ne bad bésyāel ábe e'dədəŋ bē mbéb bēmbēē áte wēe Yesue. ³³ Bad bē dyad bésyāel bēnkajnén mmwe ndáb míme Simōne. ³⁴ Yesue anchoód bad hín ábe békónlē'áá nkole nyaa ne nyaa, abídéd-te bad e'dədəŋ bē mbéb hín áte. Eémwage'aá pēn aá ábē e'dədəŋ bē mbéb é'hōb dyamdyam áyāle bēmbíi mod awē ádīi.

*Yesue akalé nkalaŋ mí bwām á Galilia
(Luk 4.42-44)*

³⁵ Epog é mbwēmbwē áde běn bēkēnlēē, Yesue anhidé ásē, áhīdē á dyad-tē, áke á aháŋgē á hōm, ákānné'. ³⁶ Simōne ne bad ábe bōbōo bēmbē, bēmbootéd Yesue ahed. ³⁷ Bédibté-'áá mó, dōo bēlāŋgeé mó bān, “Moosyāel ahede wē!” ³⁸ Yesue anláá bō aá, “Dékag hōm démpēe. Dékag á myad míme índé bēnben ábel boj nkalaŋ mí bwām áwed ámpē, áyāle míme nkalaŋ móo nkéá boj mípē á nkōjnsé.” ³⁹ Né-awá, anké mbwōg e Galilia esyáel, ákalé nkalaŋ mí bwām á ndáb é mekáne, ábídē-'e bad e'dədəŋ bē mbéb áte.

*Yesue achōjté mod awē meləŋ mékóbé
(Mat 8.1-4; Luk 5.12-16)*

⁴⁰ Mod nhog awē meləŋ mékóbé ampē wēe Yesue, abwōg mebóbóy, áchāā mó aá áwōnjgen mó. Anhōb aá, “Nzé edəá ehèle ébēl me nsáy!” ⁴¹ Ngōl enkonnéd Yesue. Dōo ábídētē ekáá, ábānē mó á yěl, boj álāŋgē mó aá, “Ndəá, sáŋ!” ⁴² Ábwōg-ábwōg míme meləŋ

mêmmaá ane mod á yĕl, áchōŋ-’ε. ⁴³ Yesue anláá mó aá ákag, asím-mε mó etúu áte aá, ⁴⁴ “Nóné’, weelángé modmod dyam áde ábénléde, boŋ kě élúmed yĕl wééprise, ásimen wε. Ébag-ke mendé ngáne mbéndé e Mosee éhedeé, álúmed bad wéé móssāā.” ⁴⁵ Boŋ kě nê, áde ane mod abídé, ankč, áke ákalé mó rímmē nkalaj hōm ásyāəl. Ankal mó bwâmbwam nyaa eche Yesue éehele’áá dyad ké ahóg asól ámpē á ntálé. Antím ádyeé’ á meháŋgé wéé bad béesaá. Ké nê, bad békidé’ mebwôg mésyāəl béhyāg áwē.

2

Yesue achōŋtē mod awĕ awédé eped

(Mat 9.1-8; Luk 5.17-26)

¹ Néé nguse é e’pun étómé, Yesue ansú ámbid á Kapenahum. Bad bénwôg bán ahúú. ² Ekud é bad énkūmēn áwe ndáb nyaa eché etál éebédeé á ndáb-te, ké á mmwe. Yesue akánlé’áá bó eyale é Dyōb. ³ Héé dōo bad bénin bépééné mod awĕ awédé eped. ⁴ Boŋ ngáne ndun e mod émbēē áhed, bénkēnhenlé mó apeen wéé Yesue ábédé. Né-áó, bénchāgē á ndáb mîn, bénédē nnɔŋ n̄ ndáb á nló mîn wéé Yesue ántyēēmmē. Áde bémáá nnɔŋ anede, bênsudtén ane mod ebúm éche ânnáá’é ámīn wéé Yesue ámbēē. ⁵ Áde Yesue ányíné adúbe ádē ábe bad bewóó áte anláá ane mod awĕ awédé eped aá, “A-mwǎn, nlägséné we mbéb.” ⁶ Donge dé bemeléede bē mbéndé ábe bêndyeé ásē áhed bémbootéd anyoo áte á nlém-tê bán, ⁷ “Chán anén mod áhelleé se áhōbē’ enén ndín e akan? Asyāə Dyōb. Nzéé ahelše álagsén mbéb ésebán Dyōb dëmpen?” ⁸ Ábwôg-ábwôg Yesue anchém bó mewémten. Héé ásedteé bó aáken, “Cheé ékáá boŋ nyewōō’ enén ndín e mewémten? ⁹ Ahéé ádē dyam ásad, naa áhōb wéé ‘Nlagséné we mbéb,’ káa áhōb wéé, ‘Syáá ásē, étêd échōŋ ebúm ébooted ake?’ ¹⁰ Boŋ, mélumēd nyé nén mēé Mwǎn-a-Moonyoŋ awóó kunze á nkōŋsé álagsen mbéb.” Dōo álāŋgeé ane mod awĕ awédé eped aá, ¹¹ “Nlāŋge we nén, syáá ásē, étêd échōŋ ebúm, ésú’ á ndáb.” ¹² Hé děn wéé moosyáél áñɔneé mó nê, ane mod anhidé ásē, atéd éche ebúm ábootéd-te ake. Yĕl enkóm bó áte bwâmbwam, békēnē Dyōb, běhōbē bán, “Séenýinéé sé enén ndín e dyam mbéb!”

Yesue achénlé Levié

(Mat 9.9-13; Luk 5.27-32)

¹³ Ámbid e nê, Yesue antím ámbid ámpē á nkin mé edib-é-nzab é Galilia. Ndun e mod empé awĕ, ábootéd-te bó ayáged. ¹⁴ Áde átómeeé á nzii, annyín nlad-é-tááse nhóg awĕ běchágé’áá bán Levié, mwǎn awĕ Alpasée. Levié andyeé ásē á ndáb eché ákóbé’áá tááse áte. Héé Yesue álāŋgeé mó aá, “Hídé me.” Dōo Levié átyéémé ámīn boŋ áhídē-’é mó.

¹⁵ Ámbid e pónđé Yesue adyágé’áá ndyééd á ndáb wéé Levié. Ekud é besaad bē tááse ne bad bē mbéb běmpēe běhídé’áá mó. Bóbōo bêndyeé á tébelé ne ábē bembapē. ¹⁶ Áde donge dé bemeléede bē mbéndé ábe běbédé Befarisia bénýíné Yesue ádyág ndyééd ne ábē bad bē mbéb, ne besaad bē tááse, dōo bésedteé ábē bembapē bánken, “Cheé ékáá boŋ ádyág ndyééd ne échē ndín é bad?” ¹⁷ Áde Yesue áwogé nê, anláá bó aá, “Bad ábe bědyéé bwâm bětognené mod-a-bwēl. Bad ábe békōnle’ bóo bětognené mod-a-bwēl. Meépedéé á nkōŋsé áchélé bad ábe békōbnédé á’sō é’ Dyōb, boŋ mpedé áyāle bad bē mbéb.”

*Nsédtéd tâŋgēne adid á yĕl
nzaa á mekáne-tê*

(Mat 9.14-17; Luk 5.33-39)

¹⁸ Pónđé pogg ebédé, bembapē ábe Jōne, Ndusene ne Befarisia běndid yĕl nzaa á mekáne-tê. Dōo bad behóg běpédé wéé Yesue boŋ bésedte mó bánken, “Cheé ékáá boŋ bembapē ábe Jōne, Ndusene ne ábe Befarisia bědidé yĕl nzaa á mekáne-tê boŋ ábōŋ pén běedidé?” ¹⁹ Yesue ankwentén bó ne ngan aá, “Chán bad ábe bělébpé á ngande e e’wóngé, běhélé bědidé yĕl nzaa á mekáne-tê áde mod awĕ akude sómbé ádíi adé ne bó? Běedidéé, bětâŋgēneé yĕl nzaa adid á mekáne-tê pónđé eché mod awĕ akude sómbé ádíi ne bó. ²⁰ Boŋ epun épě éche békobénné bó mod awĕ akude sómbé. Échê epun dōo

Ns  dt  d t  ng  ne
Mb  w  -m  -nk  me-  te
(Mat 12.1-8; Luk 6.1-5)

²³ Mbwe-mé-nkóme-áte nhóg Yesue atómé'áá á nzag e ngun-tê. Ambé ne ábē bembapēs. Áde békagké nê, dôo ábē bembapēs bébóótédé e'sog é' ngun apád. ²⁴ Héé Befarisia bélângéé Yesue bán, "Nóné", cheé ékáá boj ábōn bembapēs békéle dyam áde mbéndé éebageé kunze ábel á mbwe-mé-nkóme-áte?" ²⁵ Yesue antimtén bó aá, "Nédē nyéélāá'é mbêd á kálag e Dyöb dyam ádë kâj Dabide ámbeñlé ádë bétogé chõm éche bedyágké ne ádë nzaa ékóbé mó ne ábē bad-ε? ²⁶ Ansól á Ndáb-e-Dyöb á póndé eché Abyataa ábédé prise ambáámbáa. Andyé e'wélé ábe é'bédé nde e Dyöb. Boj echénd mbéndé eébagéé mod ké nhóg kunze ádyé ábê e'wélé étoméé Prise. Mwén andyé ábë-ε káéjne bad ábe bénwoón mó donge." ²⁷ Dôo Yesue ásógtéé aá, "Dyöb dénsëbë moonyoñ ahëg, boj átiidé epun éche békômmës áte. Enkênsébëé epun atíi boj áhagé moonyoñ aá ákômme áte échê epun. ²⁸ Né-ó, Mwän-a-Moonyoñ awóó nkamlen káéjne ámín e mbwe-mé-nkóme-áte."

3

*Yesuε achöjnté mod
awě ekáá éwédé
(Mat 12.9-14; Luk 6.6-11)*

¹ Héę Yesue átímé ámbid á ndáb e mekáne. Mod abédé áhed awě ekáá éwédé.
² Bad behóę ábe békédé áhed békédé'áá Yesue awusé akóben. Né-óó bénóné'áá Yesue chodchod, ânyín nzé ădíd ane mod bwâm á mbwε-mé-nkóme-áte. ³ Héę Yesue álângę́é ane mod aá, "Hyę́ étýéem á'sō hénl!" ⁴ Dóo Yesue ásedteé ábē bad aáken, "Nyéláa mε ké édé mbéndé ábel mboŋ á mbwε-mé-nkóme-áte, káa ábel mbéb. Édé mbéndé áson alongé á mod, káa âwúu mó?" Boŋ bénkênhóbpé dyamdyam. ⁵ Anwóğ ndutul á nlém-tê bwâmbwam áyěle ábāb e'ləl bé nlém á abum. Héę árnóne bó ne melingá, boŋ álângę́é ane mod aá, "Sálé ekáá áte." Asále áde ane mod ásánlé ekáá áte, ekáá êndyeé mó bwâm ámpē.
⁶ Héę Befarisia békídé á ndáb e mekáne, boŋ békē bétanē bad bé epepé éche Herōde, ábwōg-ábwōg bóbōo békagké Yesue âwúu mó.

Ndun e mod ehídé Yesue á edib é Galilia

⁷ Yesue ne ábê bembap  e b  nhid   b  k  k   e mod enh  d m  o awed. Âb   bad b  mb  id m  bw  g e Galilia, ´  Judeya, ⁸ ´  Jerusalem, ´  mbw  g e Idumeya, ´  mbw  g ech   ed   echin  i   ep  d e Jodan, ne ´  myad m  me m  d   benben ne myad m  mb  a   m   Tire ne Sid  n. Âb  n bad b  p  g  '   w  e   Yesue ´ y  le b  n  w  g mam m  me ab  l  '  . ⁹ Bad b  mb  bu  u ´ te nyaa ech   echab   am  n. N  -  o  , Yesue anl  a   ab   b  mb  p  e   a   b  boj  sen b  l  e ab  l boj bad b  ekajn  n m  . ¹⁰ Amm  d ekud e bad achood, n  -  o   bad b  sy    l b  mp  e   ab   b  k  n  l  '   b  ebun   ape w  e   ad  i  , ´ sit  en m  o ab  l boj b  dy  e   bw  m. ¹¹ P  nd   t  e   ech   e'd  ad  n b   mb  b   ab   e'b  d  e   bad ´ te b  ny  nn   m  , e'b  l  '   a   bad ab   e'd  i   ´ te b  h  n  n   as  , e'b  n  -  e   b  n, "We-e   ed   Mw  n a Dy  b!" ¹² Yesue ans  m b   et  u   at   a   b  l  n  g  e   bad nyaa e mod eche m  d  i  .

* 2:22 Ntyág mímmé békénlé ngob e nyam móo békénládtáá póndé eched.

*Yesue apwedé bembapēs
dyōm ne bēbe*

(Mat 10.1-4; Luk 6.12-16)

¹³ Héé Yesue áchágké á ekone mîn, áchēnlē bad ábe áhédé'áá, boj bépág áwē. ¹⁴ Dóo ápwédé bad dyōm ne bēbe ábē ne mó, áchágé bó aá bembapēs bé nlómag ábe álōmmē-'e ákal eyale é Dyōb. ¹⁵ Ambág-ke bó ngíne ábíded bad e'déadəj bē mbéb áte. ¹⁶ Ábē bad dyōm ne bēbe bélédé: Simōne awe Yesue ânchuú'é mbəj aá Petro; ¹⁷ Jemse bó mwānyan Jōne, bǎn ábe Zebedie, (ábe Yesue ânchuú'é mbəj aá Bwanegese, awē adé bán, Bǎn bē nging.) ¹⁸ Andreya bó Filibe, Batolomyo, Matyo, Tōmasé, Jemse mwān awē Alfōse, Tadiose, Simōne awē ambé á epepé é kán e aloj, ¹⁹ ne Judas Iskariōde awē antím Yesue asóm.

Béchágé Yesue bán Belzebule

(Mat 12.22-32; Luk 11.14-23, 12.10)

²⁰ Héé Yesue átímé á dyad. Ekud é bad ênkaán ámpē nyaa eché Yesue ne ábē bembapēs bénkēnwóngé póndé âdyé ndyééd. ²¹ Áde Yesue baányaŋ bégwogé nê, bénké mó ahed, átéed mó áswēn mó á ndáb áyāle bad bélóbé'áá néen bán, "Nló méésáa'é mó áte." ²² Donge dé bemeléede bē mbéndé ábe bémibid á Jerusalém bélóbé'áá bán, "Belzebule adé mó áte. Ene kāj e e'déadəj bē mbéb ch̄ ebagé mó ngíne ábíded bad e'déadəj bē mbéb áte." ²³ Héé Yesue áchēnlé bó boj ákanlé bó ngan aáken, "Chán Satane áhèle se abídéed Satane? ²⁴ Nzé bad bē aloj ahág békábné áte, boj nchemtén méesé, ádē aloj déehelé atyéem. ²⁵ Nzé abum á ndáb-pe ákábné áte, boj nchemtén méesé, ádē abum á ndáb déehelé atyéem. ²⁶ Né-jo, nzé nkamlen í Satan íkábné áte, boj běn ne běn bégwane, mímē nkamlen méebemmé, mékwé, ímpē-'e ásōg. ²⁷ Né dōo mod eéhélē se asól á ndáb e ngíne-e-mod se ádūm ábē bwēm ésebán asébpé mó ahanj. Amaa'-áá mó ahanj, boj atéed ábē bwēm é'syāel. ²⁸ Ne mbále nlângé nyé néen mée Dyōb délagsén bǎn bē baányoŋ mbéb ínsyāel míme bélélé káéyne nzyájné kē ehéé eché bélíté á nsəl. ²⁹ Boj kénzéé awē ahóbé e'bébtéd é' mekan tângene Edéadəj éche Ésáá, éekudté alagsen mbéb. Abelé mbéb míme méewoo alagsen." ³⁰ Yesue anhób néen áyāle bad bélóbé'áá bán, "Edéadəj é mbéb édē mó áte."

Yesue nyaá ne baányaŋ

(Mat 12.46-50; Luk 8.19-21)

³¹ Héé Yesue nyaá ne Yesue baányaŋ bégwodé, bégwog-te, boj bélomé mó achág. ³² Ndun e mod enlājnéd Yesue. Béndyeé ásē. Dóo bélângéé mó bán, "Echōj nyon ne baányoŋ bédé á bégwog-te bélude wé." ³³ Héé Yesue ásédtéé bó aáken, "Nzéé adé echém nyaŋ, benzéé-'e bédé bannned?" ³⁴ Dóo Yesue ánōneé bad ábe bélâjnédé mó nê, boj áhóbé' áá, "Echém nyaŋ ne bannned bó bén! ³⁵ Kénzéé awē abele mam míme Dyōb áhedeé adíi mwānned, abé-'e echém nyaŋ."

4

Ngan e mbál-e-bú

(Mat 13.1-9; Luk 8.4-8)

¹ Yesue ambootéd bad ayáged ámpē á nkag mé edib é Galilia. Bad ábe bénlājnéd mó bénntōmtén abuu áte, nê dēmbél asól á bōlē-té ádyé áwēd-te. Ábē bōlē bémibē á edib-té. Ene ndun e mod chó-'e enlyéng á nkin mé edib. ² Abénládtáá ngan áyáged bó mekan hín. Ankalé bó ngan aá, ³ "Nyéwóglē! Nkwel-é-nzag nhág anké mbál asob á nzag-té. ⁴ Áde ásobéé mó nê, donge dénhūn á nzii-té, menon mēmpé mémad mó asómtded.

⁵ Donge dénhūn á meláá-té wéé ndəob énkēmbuú'é áte. Énwāmsén abíd ásē ngáne ndəob énkēnchabpé ásē. ⁶ Boj néé enyen é ngíne épédé énhyaād ábē bwēm é'wé-'e, áyāle nkaj ménkēnsónlé bó á ndəob-té bwām. ⁷ Mbál mēmpée ménhūn wéé mekôd médií. Néé mekôd mē mékwogé, mékaj akwog áde ábē bwēm, nê ábel bénkēnchyáá'é. ⁸ Boj

donge dé mbál dénhūn á ndoob e bwâm. Mmén mbál mémbid ásē bwâm, nkwōg, nchyá-’e. Donge dé e’sog dénwâlē móom mé mbum mélâán, donge móom ntóob, ábínií-’e, mbwókel.”⁹ Yesue ansogéd enén ngan aá, “Kénzéé awé awóó metúu, áwóge.”

Nzōm echě ekəá boŋ Yesue ákalé ngan

(Mat 13.10-17; Luk 8.9-10)

Yesue atóké ngan e nsob a mbél-e-bú

(Mat 13,18-23; Luk 8,11-15)

¹³ Dóo Yesue ásdedtéé bó aáken, “Nédē nyéesôjnteneé enén ngan-ε? Nzé nyéesôjntene chó chán-nō nyémwéé échíníí ngan asôjnten? ¹⁴ Nsob-a-mbál awéne eyale é Dyöb. ¹⁵ Donge á bad bédé nêngáne mbál míme ínhúné á nzii-tê. Nzé bewóge eyale é Dyöb ábwög-ábwög Satané abelé áhye ahúd bó chó á nlém-tê. ¹⁶ Ábíníí bédé nêngáne mbál míme ínhúné á meláá-tê. Béwóge’ eyale é Dyöb, ábwög-ábwög béköb-pe chó ne menyinge. ¹⁷ Boj échê eyale eewénnäadtë bó á nlém-tê, bédubpe-’e chó dásö á esónj é pondé. Né-oó, nzé ndutul ne metake bëpédé áyæle échê eyale bëdol yäl ámbid ábwög-ábwög. ¹⁸ Ábíníí-’e bëdii néé mbál míme ínhúné á mekôd-te. Bëdii bad ábe béwóge eyale é Dyöb, ¹⁹ boj mpûlé mé nköjsé ne adæj dé abud á bwëm awój, ne ahed á bwëm bëmpée ákáj bó nlém áte nyaa eché bëehsléé e’pum achyáa. ²⁰ Boj bad ábe bédé nêngáne mbál míme ínhúné á ndoob eché eboó yäl, bëdii bad ábe béwóge’ eyale é Dyöb, béköb-pe chó, bëchyáa-’e e’sog ábe é’wánlé mesongé mé mbum móom méláán, móom ntóób ne mbwókel.”

Nzé béchódé etrukán békongéé chó

(Luk 8,16-18)

²¹ Héé Yesue ásédtéé ene ndun e mod aáken, “Mod asónleé etrúkáj échě ámáá achod á ndáb-te, ábānē chó á ebwog-sé ké’ε á anoj sé-ye? Saá á atii dé etrúkáj mîn dôo ábelé ábānē chó? ²² Chöm ké éhéé éche ékójnédé ébíd á enyen. Ké éhéé-’ε éche békúténé bédibé chó. ²³ Kéñzéé awé awóó metuu, áwóge’.

²⁴ “Nyétôn chōm-éé nyéwógeé anón áte bwâm! Melemlem mé nhægtéd míme ébénlédé wéé wén móo Dyöb dómpé débenlédté, ábenléd-te mó tómaa ngáne wêmbenlédté wéé wén. ²⁵ Kénezéé awé awóó nsôjten í kun é nkamlen mí min, Dyöb débâd mó mímê nsôjten abe. Ane awé mó-’s eewóo, Dyöb dékobén mó káéhne mwâmpin awé awóó.”

Nqan e mbél-e-bü

²⁶ Yesue ambé áhóbe aá, “Nkamlen í Dyób índí nêngáne mod awé akií mbál-e-bú asob á nzag-tê, ²⁷ átím ámbid á ndáb, nkuu ákûne’, mûte ábelé míme nsón. Ene póndé esyæál, mbál ébíde ásē, ékwoge’ ésebán abíe’ ngáne nê ábenladté. ²⁸ Ndøob chën-éé ebele boj bwém é’kwogé, é’chyāā-’e e’pum. Nlóm mí byaá móo ísébpe abíd, ámbid e póndé mbwéem káéjne ásög, e’sög bómpe é’bíd. ²⁹ Boj nzé e’sög é’máá awúu, ábwög-ábwög ane mod abelé atéd páá áke dé apád áyæle póndé eché bépadéé epedé.”

Ngan e mbál míme nchíné

(Mat 13.31-32, 34; Luk 13.18-19)

³⁰ Héé Yesue áhóbeé ámpē aáken, "Cheé déhēleé-se déhəgtén nkamlen í Dyōb-ē? Ngan ehéé débenlédte eché élümēd ngáne mímē nkamlen índíí-ye? ³¹ Índíí nêngáne mbwé e mbál-e-bü eché mod átéde boŋ ásob á nzag-tê. Mbál-e-bü edé mwămpin bwâmbwam nzé béhágténé chó ne mbál mémpée míme índé á nkönse. ³² Boŋ nzé ékwogé, ékale' tómaa

e'sum* é'syāēl, éwóo-'e ngən éche menən méhyagké mǔm alónj áte." ³³ Yesue akānlé'áá bad eyale é Dyōb, ábenláád ekud é ngan émpēe nêngáne échén. Akānlé'áá bó nyaa eché bésōjtēnnē. ³⁴ Eékanle'áá bó áde éebenlédeé ngan, boj nzé anlyág mwěmpen ne ábe bembapēe aláá bó mam mésyāēl ímme échê ngan éhōbeé.

*Yesue ahóódté ekukud
(Mat 8.23-27; Luk 8.22-25)*

³⁵ Échê epun děn ngukél, dōo Yesue álāngéé ábē bembapēe aá, "Syáā déchabe ped e edib eníníi." ³⁶ Héé ábē bembapēe békenné ene ndun e mod boj bésōlē á bōle-tê wéé Yesue ámbéé boj békenné mó. Myōle mémpēe mémbē áhed. ³⁷ Ábwōg-ábwōg dōo ekukud é ngíne ébóotédé atóm, boj mendib mésōlē á bōle-tê nyaa eché bōle bémponné asú á mendib sé. ³⁸ Yesue ambé á bōle-tê á ped e mbíd. Annaá ásé ábānē nló á mbóngé mīn, ákūne'. Héé bényemee mó ásē, boj bélāngé mó bánken, "A meléed, weewoo'é we póndé ée syánē dédií á kwééd-te-ye?" ³⁹ Héé Yesue átyéémé ámīn boj ákānnē échê ekukud áte aá éhōo, aláá-'e mendib aá mésud. Ekukud énsōg awan, ekíde-'e éhōotéd áte. ⁴⁰ Héé Yesue ásedteé bó aáken, "Cheé ékáá boj nyewōgē mbwōg? Nyewoo'é adúbe kááñ ne bōob-e?" ⁴¹ Boj mbwōg ménkōb bó bwāmbwam, bésedtē nhóó ne aníníi bánken, "Ebál e mod éhéé chén éche kááñne ekukud ne mendib běwógnéé?"

5

*Yesue achōjté mod awe
awóó e'déadəj bě mbéb
(Mat 8.28-34; Luk 8.26-39)*

¹ Yesue ne ábē bembapēe běmpě á ped e edib eníníi, á mbwōg e Gerasin. ² Áde Yesue ábídé á bōle-tê bídén, ambomén mod awé abídé á soóbade. Edéadəj é mbéb émbē ane mod áte. ³ Á soóbade dōo ádyéé'áá. Modmod enkēnhenlé mó abane á mehanj ámpē, kē ne bengōbengōbē. ⁴ Áyāle ngen ne ngen, běháá'áá mó ne e'pwōg ne bengōbengōbē boj kē nē aselé'áá bengōbengōbē áhentéd-te e'pwōg bē áte. Antómtén ngíne awój nyaa eché modmod éehelé'áá mó abwōge. ⁵ Atamnádtáá á soóbade ne á e'kone-tê nkuu ne műte, ábōnē e'saad ákweltáád-te yěl ne meláá.

⁶ Ane mod abédé mwā etún áde ányíné Yesue. Héé ányágté mehélé, boj ábwōgē mebóbón áwē e'só-te, ⁷ ábōnē esaád é ngíne, áhōbē aá, "A-Yesu, Mwǎn a Dyōb á Ngum, cheé sóo déwójnē? Ncháa we á dīn á Dyōb meé weekógsán me." ⁸ Ane mod anhōb nē áyāle Yesue anláá edéadəj é mbéb aá, "Á-edéadəj é mbéb, bíd ane mod áte!" ⁹ Dōo Yesue ásedteé mó aáken, "Chán dīn ádīí we?" Ankwentén aá, "Dīn ádīí me bán Amudtēe, áyāle s̄ebuú áte." ¹⁰ Ambé áchāá Yesue aá eénānē' ábē e'déadəj bě mbéb ene mbwōg.

¹¹ Bōob-pōó, sáŋkalaa a esōg é nguu chó-'e ébédé benben ne áhed, édyāg medyé á mbám mé ekone. ¹² Héé ábē e'déadəj bě mbéb é'cháá'é Yesue bán, "Lóm sé á nguu-tê wē, émwē sésōl chó áte." ¹³ Héé Yesue ábágé bó kunze boj é'bídé ane mod áte. Abíd áde é'bídé ane mod áte e'sōlē échê nguu áte. Échê esōg ébédé dyam e'kálé é' nguu é'be. Ábwōg-ábwōg échê esōg émpādē ásē, ényəgté' á eláá é nkin mé edib-é-nzab, éhún á edib-tê, éhō-'e.

¹⁴ Benən bě nguu běntōm mehélé á dyad-tê ne á mebwōg ímme médē benben, ákale bad dyam áde ábénlédé. Ábē bad běmbid ákē dényin. ¹⁵ Áde běpédé wéé Yesue boj bényin ane mod awé ndun e e'déadəj bě mbéb émbē áte, néé ádyéé' ásē, ahédé-'e bwěm á yěl bwām, adyéé-'e sen, mbwōg ménkōb bó. ¹⁶ Bad ábe bényin ádē dyam běnlāá ábē bad ngáne émbenlédé ne ane mod awé e'déadəj bě mbéb běmbē áte. Běnlāá-'e bó dyam áde ábénlédé ne échê esōg é nguu. ¹⁷ Héé ábē bad běbóotédé Yesue acháj bán ásyə áwab mbwōg. ¹⁸ Áde Yesue ásōlēé á bōle-tê, ane mod awé e'déadəj bě mbéb běmbē áte nē ancháj mó aá búmō békag. ¹⁹ Boj Yesue enkēnkwenténné. Anláá mó aá, "Súé' áwōj dyad, éke éláá áboj bad ndəle e dyam eche Sáŋgwéé ábénlē wé ne ngáne ápédé wé ngol

* 4:32 Bǎn bě mel néé ndóy.

awóg.”²⁰ Hê dôo ane mod áhídté boj ákag á mbwóg e Dekapolis.* Ákanlé mod té dyam áde Yesue ábénlê mó. Bad bésyäel ábe bénwög, yäl enkóm bé áte bwâmbwam.

Yesue achõjté mmwaád nhóg,
ápūud-te Jairuse mwān

(Mat 9.18-26; Luk 8.40-56)

21 Yesue antím ámbid á péd e edib enínií ne bôlę. Áde ápédé á nkin rímíníí, ndun e mod enkajnén áhed. **22** Dóo mod nhóg awě akamlan ndáb e mekáne awě bêchágé'áá bán Jairuse ápédé áhed. Anyín áde anyíné Yesue, ankwě ásē áwe mekuu. **23** Ne mechángé mé ngíne áhōbē aá, "Awem mwǎn a mmwaád awâg. Sôn, hyě ébân mó ekáá á yĕl, âbel néń ádyee bwâm, ábé-'e á alongé." **24** Héé Yesue áhídé mó. Ekud é bad éhídé'áá Yesue nyaa eché bênkajnénné mó.

²⁵ Mmwaád nhóg-ke ambé áhed awé anwóy nkole míme mekií mébídé’áá mó á yél pondé ésyāél. Mmê nkole mbdé mó á yél á etûn é dyôm-a-mwé ne mbe. ²⁶ Atagé hín á mekáá mé bad bé e'bó, abébéd-te ngáb esyāél eché ánwōngé, boj ké nê enkêndyé’é bwâm, nkole mbadé bádén. ²⁷ Anén mmwaád anwóg mam míme Yesue ábélé’áá, dôo ábídé mó ámbid átîntê ene ndun e mod boj ásitán mó nkobe. ²⁸ Áyèle anhób áwe nlém-tê aá nzé mósiténé ké mímē nkobe, né módyé’é bwâm. ²⁹ Asiten áde ane mmwaád ásiténé Yesue nkobe, mekií míme mébídé’áá mó á yél ménselé, awóg-ke á yél aá móchoó. ³⁰ Ábwôg-ábwôg Yesue ambíi aá ngíne ebídé mó á yél. Hê dôo ákúnnédé átîntê ene ndun e mod, boj ásedté aáken, “Nzéé asiténé me nkobe?” ³¹ Dôo ábē bembapee békwentanné mó bánken, “Néé ényinéé bad békájné we á yél nén ésedté” weé ken nzéé asiténé we-ye?” ³² Ké nê, Yesue ambé áñoné’ ekide ânyín mod awé asiténé mó. ³³ Héé ane mmwaád ábótédé anej ne mbwôg áde ányiné chom-ee ébénlé dé mó. Dôo ápédé wéé Yesue boj ákwag mó á mekuu, álângé mó mbále esyāél. ³⁴ Héé Yesue álângé’é mó aá, “A mwán-a-mmwaád, adúbe ádõn ádídé we bwâm. Kág ne nsan. Ndutul echôn chó-’e émaa.”

³⁵ Áde Yesue áhóbeé nê, dôo bad behógo ábe bóbídé á ndáb wée Jairuse bélângéé Jairuse bán, "Awoj mwán amaá mó awé. Cheé étognéé Meléede ataged?" ³⁶ Boj Yesue enkéntédté dyam áde böhóbé néé dyam. Héé álângéé ane mod a nkamlén aá, "Weewogé mbwág! Dúbé dúbpen." ³⁷ Yesue enkémmwéé aá mod ampée áhíd mó étoméé Petro ne Jemse bó mwânyaj Jøne. ³⁸ Áde bépédé á ndáb wée Jairuse dôo ányíné mpuutéd, awág-ke mewé mé ngíne míme bad böhyeé. ³⁹ Héé ásólé á ndáb-te boj ásédté bó aáken, "Cheé ékáé boj nyébelé' mímén mpuutéd, nyéchyé-’e mewé? Ane mwán eewédeé, akúne kúnén." ⁴⁰ Boj bêmbootéd mó awøo. Ambídéd bó mod asyøál á ebwág-te. Antéd ane mwán sáá bó nyaj ne ábë bembapee béláán, bésôl á toj echë ane mwán ámbëë áte. ⁴¹ Héé Yesue áchângé ane mwán á ekáá, boj álângé mó aá, "Talíta kûm," (awé adé bán, "A-mwán a ngondére, nlânge we meé, hidé ásë.") ⁴² Ane mwán anhidé ásë ábwág-ábwág, ábootédté ake. (Abédé dyôm á mwë ne ímbë.) Yël enkóm bó áte hín áde nén ábënlédé. ⁴³ Héé Yesue ásímeeé bó etíú áte aá bëélângé modmod dyam áde ábënlédé, aláá-’e bó aá bëbe ane mwán ndyéed.

6

*Bad bé Nazar t b ekob   Yesue
(Mat 13.53-58; Luk 4.16-30)*

* 5:20 Dekapolis: adíi mbwóg e myad dyôm.

ásyēēl étómeé áwē dyad, áwē túmbé-te ne áwē abum á ndáb.”⁵ Eéhеlеé menyáké ké mehóg abel áhed, étómeé nguse é bad bé nkole ábe ábáné mekáá á yǎl, bédýēē-’e bwām.
⁶ Yǎl enkóm mó áte bwāmbwam ne adúbe ádē bad bénkēnwóngé.

Yesuε alómé bembapεε dyôm ne bébe

(Mat 10.5-15; Luk 9.1-6)

Dóó Yesue ákií á myad mésad míme médé bənbən, áyəgtē bad. ⁷ Anchélé ábē bembapee dyōm ne bébe. Anlăd bó áte, alóm bó bébe ne bébe. Ambě'-e bó kunze âbídèd bad e'dəádəŋ bé mbéb áte. ⁸ Anlyágtén bó aá, "Nyéewánlé chömcchöm á eke étomée ntój. Nyéewánlé ndyéed ké'-e ekwé, mod eesóó'-e mənē á mesó mé abad. ⁹ Nyéhē metámbé boj nyéewánlé mbóté ébe." ¹⁰ Ambád aá, "Ndáb ké ehéé eché ekobé nyé nyédyēē áhed kááj ne póndé eché nyéhidteé ádē dyad. ¹¹ Nzé nyêpedé dyad áde békobéé nyé, káá békwsnteneé nyé awóglén, nyétédé dó, nyéküd-ts ebumbú á mekuu, âlúmed nén bán échab ebébtéd énəne běn." ¹² Né-ɔó, bənké békale' eyale é Dyōb bán bad bétéde ádab abé dé mbéb. ¹³ Bémbidēd bad e'dəádəŋ bé mbéb híin áte, běwōgtē bad bé nkole híin ne dyōg dé menzab, běchōōd bó.

Kwééd echě Jøne, Ndusenę

(Mat 14.1-12; Luk 9.7-9)

¹⁴ Bəəb-pəá, Herōde anwóg mam mésyāēl míme Yesue ábélé'áá. Áyèle mam mé bwâm míme Yesue ábélé'áá mêmbeł ambyéen hőm ásyāēl. Donge á bad békhabé'áá bán, "Jōne, Ndusene apuúdē. Néé ákáá boj awón̄ ngíne ábel mímén menyáké mésyāēl." ¹⁵ Bémpée békhabé bán, "Elaijaa móodé." Ábíníi'-e bán, "Adíi nkal e'déadəŋ nêŋgáne nhög átinté e bekal bék'adədəŋ ábe békabé se' bōd." ¹⁶ Áde Herōde áwogé nê anhób aá, "Jōne, Ndusene awé mêmbeñlé boj bésel nló móodé. Atimé ámbid á alongé." ¹⁷ Herōde anhób nê áyèle anlóm bad aá békôb Jōne, békhaŋ mó, béké'-e mó á mbwəg. Ambel nén áyèle Herodyase, mwaád awé mwânyan, Filibe ánsébëë awón̄, awón̄ mó. ¹⁸ Jōne alángé'áá Herōde póndé téé aá, "Weewoo'é kunze âwón̄ Herodyase, mmwaád awé mwânyon." ¹⁹ Né-ɔó, Herodyase anhíi Jōne pél á nlém-tê, áhedé'-e aá mówíu mó. Boj Herōde ambel enkêñhenlé. ²⁰ Herōde ambé mbwəg áte tâŋgëne Jōne áyèle ambii aá adíi mod a bwâm awé asáá. Né-ɔó akëngé mó bwâm, ábel boj dyam dé mbéb dëebenläd mó. Adæ'áá mó awóglén kénée édíi bán póndé téé nzé anwóglén mó, atagé'áá áte á mewémten-tê bwâmbwam. ²¹ Kéáŋne á asóg, Herodyase anküd nzii eché áhédé'áá. Nén ábédé epun-éé Herōde ábélé'áá ngande âwémten epun-éé ánchyāādté. Á ngande wê, Herode anlábé ábē bad békabáá bé ngómenaa, bad békabáá bé sánze, ne kæse é bad é mbwəg á Galilia. ²² Échê epun mwâñ a mmwaád awé Herodyase anhyé aság esáke. Nê dénwōgëd Herōde ne ábë beken menyinje. Né-ɔó, Kéŋ Herōde ansedé ane mwâñ a mmwaád aáken, "Cheé édáá weé mó we? Mëbë we kékheé échë éhëdëé." ²³ Nén dëmbël ammwé melë, álängë mó aá, "Mmwâg melë meé, mëbeé we kékheé éche éhëdëé. Ké eped é mbwëg échë nkamlanné." ²⁴ Né-ɔó ane mwâñ ankë nyaá asedé aáken, "Cheé méhëdënné mó?" Dóo nyaá átímtené mó aá, "Hedén mó nló míme Jōne, Ndusene." ²⁵ Hëe ane mwâñ átímé ámbid ábwëg-ábwëg wéé kâŋ, boj álängë mó aá, "Bäg me nló míme Jōne, Ndusene á taplët-te hén bôob." ²⁶ Nén dénwōgëd kâŋ Herōde ndutul bwâmbwam, boj ngáne ámmadté melë amwé á'sö wéé ábë beken, enkêñhenlé mó nló míme Jōne abáan. ²⁷ Hëe álómé sánze póg aá épëen nló ríme Jōne. Ene sánze enkë á ndáb e mbwëg, esél Jōne nló, ²⁸ épëen rímë nló á taplët-te, ábë ane mwâñ a mmwaád. Ane mwâñ a mmwaád mó'-e ábë nyaá. ²⁹ Áde Jōne ábe bembapës békhabé nê, békhabé mó ndim, békë békë.

Yesue adídté e'kálé é' bad é'taan

(Mat 14.13-21; Luk 9.10-17; Jon 6.1-14)

³⁰ Bembapee bé nlómag ábe Yesue ánlömmē bénhūu bétán mó béláá'-e mó mekan mésyāäl míme béláá'-e ne míme býágté. ³¹ Ekud é bad épágé' áá wéé Yesue ne ábē bembapee bétimé'-e ámbid nyaa eché Yesue ne ábē bembapee benkénwóngé etál âdyé ké ndyéed. Dóó Yesue álângéé ábē bembapee áá, "Syáā détim á ahéngé á hōm. Boŋ nyékóme áte

mwāmpīn.” ³² Hē dōo bésolé á bōle-tê, boj bétimé’ á aháŋgē á hōm. ³³ Ekud é bad énnynin áde békagké, bênchém-me bó ábwōg-ábwōg. Ábê bad bémibid myad ne myad, békéen mekuu, bényágéd á’sō ne mekuu, bésébé ape wéé Yesue ne ábē bembapēs békágé’áá. ³⁴ Áde Yesue ábídé á bōle-tê boj anyín ene ndun e mod, antómtén bó ngol abé áyâle békéedé néé índyoy m̄ mbód míme méewōo nnən. Né-oó ambootéd bó ekud é mekan ayágéd. ³⁵ Áde bín é’bóótédé ahín, ábē bembapēs bémpe’ awē, békobé nén bán, “Hén áde á etùn-tê, póndé emaa-’e atóm bwâmbwam. ³⁶ Láá ábén bad bétimé’ á myad-tê míme médé benben, ábel běn békchan medyé míme bedyéé.” ³⁷ Boj Yesue antimtén bó aá, “Nyé bó nyébe bó chōm éche bedyéé.” Héé bésedteé mó bánken, “Ehede wéé séke séchan e’wele é’ mbwókel é kábpe ébe, * sébe bó, bedyé-ye?” ³⁸ Héé ásedteé bó aáken, “E’wele é’téy nyéwóó? Nyéke nyénən.” Áde bémáá anən dōo bélânggeé mó bán, “E’wele é’dé é’taan ne súu ébe.” ³⁹ Héé Yesue álânggeé ábē bembapēs aá békbel bad, békabən áte monge ne monge bedyee á nkəákə mîn. ⁴⁰ Né-oó ábe bad bénidyéé ásē, donge á monge, mbwókel é bad, donge-’e móom mé bad métáan. ⁴¹ Hē dōo Yesue átéde ábē e’wele é’taan ne échê súu ébe, ánəné ámīn, ásâgnān Dyöb, ákabtáad bó áte, boj ábagé ábē bembapēs aá békabpe ene ndun e mod. Ankabé-’e ábē bad kékonye échê súu ébe. ⁴² Moosyaél andyé, akód-te. ⁴³ Bembapēs bénlăd e’wele ne súu éche ênlyág ásē, enlón e’lón dyôm ne é’be. ⁴⁴ Mesongé mé baachóm ábe bényéé ene ndyéed mémbē e’kálé é’taan.

Yesue akií á mendíb mîn
(Mat 14.22-33; Jón 6.15-21)

*Yesue achőjté bad
bé nkole á Genesaret
(Mat 14.34-36)*

⁵³ Née béchábpé edib-é-nzab, bêmpě á múde mímíníí, á mbwóg e Genesaret. Áhed-taá bêntaá-’é bõle. ⁵⁴ Bébídé-’áá á bõle-tê bídén bad béchém-me Yesue. ⁵⁵ Héé bényágté mbwóg áte esyáél běpěmě bad bé nkole á mekále mîn, békænen’ hõm téé áde bénwõgké bán Yesue adé. ⁵⁶ Hõm téé-’é áde Yesue árnkeé, á myad mémbáá ne mésad, ne wéé bad bélóó á nzag-tê, bad běpěené’áá bad bé nkole wéé bad běbúdé aladén á dyad-tê âkâb nyongé. Née běmpéenné bó, běchāā mó bán ámwé bad bé nkole bésiten ké mesó mé mbóté mímē. Né-óó bad bé nkole běsyääl ábe běnsitén míme mesó mé mbóté běndyeé bwâm.

Ayéged dé betaan
(Mat 15,1-9)

¹ Befarisia ne doŋge dé bemeléede bé mbéndé ábe bém̄bid á Jerusaleм bēnləjnéd Yesue âwóglən mó. ² Bénnyin bán doŋge dé bembapɛ̄s ábe Yesue bédyaг medyé ne mekáá

* 6:37 Mbwoókel é kábpe ébę: ébédé nsábe ím mod nhög áyäle ngon waam.

mé mbinde, nédē béewobpe'aá mekáá nyaa eché Befarisia bélhóbeé bán bétáŋgéné awobe. ³ Befarisia ne bad bé Israël ábe belyágé ásē bésyāel bélhídē ayáge áde bénkudté wéé ábab betaas. Béedyágké ndyéed ésebán bélwóbpé mekáá nyaa eché etáŋgéné. ⁴ Póndé eché mod ábfidéé á dyon-té, eedyágké chomchom ésebán asébpé yál awobe. Mbéndé édé-'e ámpé híin eché bélhídéé, nêngáne awobe á bwém bwám. Bwém nêngáne kôb, mbeé, kúmbe é e'kii, ne bwém néé mebendé. ⁵ Héé Befarisia ne bemeléede bé mbéndé bésedtceé Yesue bánken, "Cheé ékéá boj ábōj bembapé bélhídé ayáge áde ábēd betaa bétédnédé sé? Bédyág ndyéed áde bélwopeé mekáá nyaa eché éhēdnadté." ⁶ Yesue antimtén bó aá, "Nkal é'déadən Yesayaantáŋgén áde ánhōbpé ne e'yale ábe Dyōb dénlōmenné mó tâŋgēne nyé bedog-badé, ngáne éténlédé néen,

'Ábēn bad bélbage me edúbé é nsəl ngén, boj mímab nlém méesaá áwêm.

⁷ Edúbé éche bélbageé me eesaá dyamdyam, áyale býagte bad áhíd mbéndé é baányoŋ byánán édíi mbéndé é Dyōb.'

⁸ Nyéetdíté mbéndé é Dyōb boj pen nyéhíde ayáge á baányoŋ." ⁹ Héé Yesue ábádeé aá, "Nyébenlad mwane átēde mbéndé é Dyōb ábel nén nyéhíde ayáge ádēn dēn. ¹⁰ Mosee ahóbé aá, 'Beé sóó ne nyon edúbé.' Ahób-pe ámpé aá, 'Kéñzéé awé ahóbé sáá ké' nyaá dyam dé mbéb áyāl bétáŋgéné bélwúu mó.' ¹¹ Boj nyéyagte néen bán nzé mod awóó chom éche ántáŋgenné sáá ké' nyaá awóŋgen boj ahóbé aá, 'Échén chom édē Kóban,' (Né adé bán édīi chom é Dyōb), ¹² né eewóó'é nzom áwóŋgen sáá ké' nyaá. ¹³ Né-ɔj, ádē ayáge áde nyébagéé bad ábélé nyéetdēé eyale é Dyōb néé dyam. Mam médé-'e ámpé híin néé mmén mme nyébeléé."

*Mam ríme mébəle boj
mod eesaá' á'sō é Dyōb*

(Mat 15.10-20)

¹⁴ Héé Yesue áchénleé ene ndun e mod boj álāŋgē bó aá, "Nyéwóglən, nyésoŋten-ne me. ¹⁵ Chomchom éesaá éche ébíde á ebwógl boj néé ésólé mod áte ébel mó abé mbinde á'sō é Dyōb. Boj chom éché ébíde mod áte chóo ébəle boj abé mbinde á'sō é Dyōb."* ¹⁶ Yesue anchené ene ndun e mod, asól á ndáb-te. Dóo ábē bembapé bélpédé boj bélāŋgē mó bán átānled bó ene ngan. ¹⁷ Héé Yesue ákwəntanné bó aáken, "Nyémpé nyésoŋtánne-ye? Nyéenyínéé néen bán kékchéé éche ésólé mod áte, éche ébídé á mbíd e ebwógl, éebeléé-sé mod abé mbinde á'sō é Dyōb-e?" ¹⁸ Ngáne ésóléé mod áte, éepagké mó á nlém-té. Ébelé ésud mó dásō á abum-té ébíd-te." (Yesue anhób nê álúmed néen aá ndyéed ké ehéé eboó adyé.) ¹⁹ Ambád aá, "Chom éché ébídé mod áte chóo ébəle boj eesáá' á'sō é Dyōb. ²⁰ Áyale, á nlém mí mod-té dóo mewémten mé mbéb nêngáne akáb dé mésón, echíb, ne ewúen bélbídéé. Mmē mewémten móo mébelte mod mbéb. ²¹ Akáb dé mesón á ndáb e'wóngé, abé dé metəg, ne abel á mam mé mbéb mémpeé nêngáne edogké, ábel mbinde é mekan, akón á bad, akal á bad metóm áyāl, abé á kúmbe ne abel dé e'yókél é' mekan. ²² Mmén mam mé mbéb mésyāel mébíde mod á nlém-té mébelé-'e mod eesáá' á'sō é Dyōb."

*Adúbe dé nken-a-mmwaád
(Mat 15.21-28)*

²³ Dóo Yesue ásyáŋgé boj ákág á eped é mbwógl eché enchiitén myad mé Tire ne Sidon. Héé ásólé ndáb póg, eehede'aá-'e aá modmod ábíi aá módē áwēd-te. Ké nê bémbe bélbi.

²⁴ Néé mmwaád nhógl awé edəadəjé é mbéb ébédé awe mwán a mmwaád áte áwóglé bán Yesue adé áhed, ampé ákwē-'e mó á mekuu. ²⁵ Ane mmwaád abédéé mmwaád a aloj á Grikia awé békhyáá á ped e mbwógl e Siria eché békhyéé bán Fonisia. Héé ácháa'é Yesue aá ábíded mwán éché edəadəjé é mbéb áte. ²⁶ Boj Yesue ankwendtén mó aá, "Sé sébe sédide běndem. Eesaá bwám átēd ndyéed e bānbān ábwēme mbwé." ²⁷ Ane mmwaád ankwendtén aá, "Né děn a-Sáj, boj káéjne mbwé eché edyéé á tébelé-sé ebélé edyé púuted

* 7:15 Donge á kálag dé'só ábádē nchoo 16: "Kéñzéé awé awóó metúu áwōg."

é medyé éche běndem běhúnté.”²⁹ Dóo Yesue álângéé mó aá, “Áyâle échén ehób éche éhóbé néen, ehele ésūē we á ndáb. Edəádəŋ é mbéb éche ébédé awoj mwǎn áte étédté mó.”³⁰ Né-oo, ane mmwaád ansú á ndáb, atán nêngáne mwǎn ánângé á anon mîn. Echê edəádəŋ é mbéb êmmǎd mó atede.

*Yesue achönté mod awě
eewógne'aá, eehóbé'aá-'ɛ dyam bwâm*

³¹ Héę Yesue áhídté á mbwóǵ e Tire, átimé á Sidən á pęd e edib é Galilia, átimnád á pęd e mbwóǵ e Myad Dyōm. ³² Bad behóǵ bēmpęén mod áwē awě eewóǵne'aá, eehóbe'aá-'e dyam bwām. Ábē bad bénchāń Yesue bán ábān ane mod ekáá á yěl. ³³ Héę Yesue áhídnédé mó wée ene ndun e mod édíí boj átímēn mó á aháŋgé á hōm. Ansóléd memii á metúu ríme ane mod, ásob meléed boj ásitén mó echém. ³⁴ Héę Yesue ánóné ámīn, áheeméd áte, boj áhōbē aá, "Efáta," nē ádé néń bán, "Dibnéd." ³⁵ Ábwōg-ábwōg, ane mod ábootédt-e awógen, echém étyééém mó á nsəl, ábootédt-e dyam ahób bwām. ³⁶ Héę Yesue ásímeé bó etúu áte aá békutípę modmod ádén akan dín. Boj póndé téé echě áhōbē aá békutípę, bó-'e bénabpę bó ahób hóbén. ³⁷ Bad bésyäəl ábe bénwōg, yěl enkóm bó áte nyaa echě echabé ámīn bwāmbwam. Békutípę aá bán, "Abele' mam mésyäəl bwām. Abele kékéjne bad bé ndóǵ békutípę, ábelé-'e e'bóbé é'hōbē dyam."

8

*Yesue adídté e'kálé é' bad é'niin
(Mat 15.32-39)*

¹ Mmê mesú mën ndun e mod empée empē wéé Yesue. Ngáne bénkênwónjé chóm-éé bédyágké, Yesue anchélé ábē bembapëe, álāngé bó aá, ² “Ndé enén ndun e mod ngol áyäle békébë ne me e’ pun é’láán, béewóo-’áa chöm éche bédyáké bœob. ³ Nzé nsúúténé bó nzaa bœob, né béhün ásé á nzii áyäle bó dojge á bad bchéhábé abíd.” ⁴ Héé ábē bembapëe bétimtanné mó bánken, “Héé mod áhèle ákud ndyééd á ehyángé-tê hén eché ékwög ábëñ bad adyé-yé?” ⁵ Yesue ansedéd bó aáken, “E’wéle é’táŋ nyéwóó?” Bénkwentén bán, “E’wéle saámbé.” ⁶ Dóo álāngéé ene ndun e mod aá bédyëe ásë á ndœob-tê. Héé átédé ábë e’wéle saámbé, ásägnän Dyöb, ákabtad bó áte, ábagé ábë bembapëe, bô-’ë békabpë ene ndun e mod. ⁷ Bénwöñ-’ë baá nguse bé súu ésad. Yesue annaméd chómpë. Amaá-’áa chó anamed, ábagé bembapëe aá békabe bad. ⁸ Bad bénnyé ene ndyééd, békód-të, káónj élyäg-ke ásë. Eché enlyäg ásë enlón e’lój saámbé. ⁹ Mesongé mé bad ímme méndyé ene ndyééd mébédé dyam e’kélé é’niin. Yesue ansúúd ábë bad áwab mendáb. ¹⁰ Asúúté-’áa bô súútén, asj-lë mó á bölë-të ne ábë bembapëe, békë-’ë á mbwög e Dalmanuta.

Befarisia béhede' e'chemléd (Mat 12,38-42; 16,1-4)

¹¹ Befarisia bêmpé wée Yesue bébootéd mó apenten, bêhèdné mó e'chemléed ábe é'húú ádyób. Bébélé áá nê âkəg mó. ¹² Héé Yesue áhéémédé áte, boj áhōbē aáken, "Cheé ékáá boj nyongel e'chii éhedé e'chemléed? Ne mbále, nlânge nyé nén mæé, nyongel e'chii éekudté e'chemléed ké' ehóg." ¹³ Héé áchénné bó, boj ásôlê á bôlε-tê, átimé á pεd e edib enínií.

Esulten é Befarisia (Mat 16.5-12)

¹⁴ Bəɔb-pɔ́, áde bembapéε ábe Yesue bésolé á bɔ́lε-tê, bénchatén e'wélé awále áyāl. Ewélé ehóg chěmpen chóɔ bénlyəgnédte á bɔ́lε-tê. ¹⁵ Héε Yesue álângéé bó aá, "Nyétéd póndé ne esultén é Befarisia ne éche Hérədē." ¹⁶ Dóɔ békaleé bén ne bén bán, "Ahóbé nê áyāle deewânleé e'wélé áyāl." ¹⁷ Yesue ambíi chōm éche béhóbeé, héε ásédtéé bó aáken, "Cheé nyéhóbeé áyāle e'wélé ábe nyéewōo'é? Kááŋ ne' bəɔb nyéebíi'é ké'ε nyéesónjteneé-yε? Chán nyélélé nlém á abum néń? ¹⁸ Nyéwóó mǐd, nyéenyínnéé-yε? Nyéwóó'-ε metúu nyéewógnéé-yε? Kááŋne bəɔb nyéekamtánné-yε? ¹⁹ Áde ménkabpé e'wélé é'táan âdíde e'kálé é' bad é'táan, e'lón é'táŋ e'wélé ábe bénlyəg ásé ábe nyénladté bénlōnné?"

Bênkwentén mó bán, “Dyôm ne é’be.” ²⁰ Ambád bó asëded ámpé aá, “Áde mënkapbé-’e ewele saámbé âdíde e’kélé é’ bad é’niin, e’lój é’tój e’wélé ábe bénlyag ásé ábe nyênladté bénlönné?” Bênkwentén mó bán, “E’lój saámbé.” ²¹ Ambád bó asëded aáken, “Boj ké nê nyéesônteneé-yé?”

Yesue achõnté mod awě akwedé ndím

Yesue mó adé Ane-awě-Béwógté

(Mat 16.13-20; Luk 9.18-21)

²⁷ Yesue ne ábē bembapee békágé'áá á myad míme médé á mbwógi e Kaisaria Filipi. Bépéde'-áá á nzii wê, dôo ásédtéé bô aáken, "Nzé-módé bad bô béhóbeé bán ndé?" ²⁸ Héé békwéntanné bán, "Donge á bad béhóbe bán edíi Jøne Ndusene, bëmpée bán Elaijaa, ábíníi'-e bán nkal é'déádən nhógi." ²⁹ Dôo ásédtéé bô ámpé aáken, "Boj nyébën-ne nzé-módé nyéhóbeé bán ndé?" Héé Petro ákwéntanné mó aá, "Wéé edé Ane-awé-Béwógté." ³⁰ Áde Petro amaá'-áá ahób nê, Yesue ansím bô etúu áte aá béélāngé modmod nyaa e mod eché módií.

*Yesue ahóbé tângene metake mímě
ákudté ne kwééd echě áwēē*

(Mat 16.21-28; Luk 9.22-27)

³¹ Yesue ambootéd ábē bembapεε ayáged, áhōbē aá, "Mwān-a-Moonyoŋ atángéne ákūd metake híin. Bad bémbáá bé dyad, beprise bémbáá ne bemeléede bé mbéndé bēbāŋ-'e mó á yĕl. Béwūú mó, boŋ e'pun ábe é'lónténé é'láán, ápuú." ³² Yesue anhób ádén dyam nyaa eché énkénkonjnédté bó mbále ké póg. Héé Petro átímné Yesue á nkəg, boŋ ákəgé átimed mó áte. ³³ Boŋ Yesue ankuré, ánōn ábē bembapεε. Dóo ákánné Petro áte aá, "Hidé me á'sō-te, a-Satan! Mmoŋ mewémten méesaá mewémten mé Dyöb, médíi mewémten mé moonyoŋ." ³⁴ Dóo Yesue áchénlé ene ndun e mod ne ábē bembapεε, boŋ álāŋgē bó aá, "Kéñzéé awě adáé me ahíd, ásob yĕl mendíb, ápêm-mé ádē awəg áhíde me. ³⁵ Áyəle kéñzéé awě ahede ádē alongé asoŋ ábōd dó. Kéñzéé-'e awě abódé ádē alongé áyəle echém ne áyəle mímén nkalaŋ mí bwâm né ákud alongé áde déemaá'. ³⁶ Nsyááŋ níhéé mod ákudté nzé akudé nkōŋsé nísyááŋ boŋ abódé ádē alongé. ³⁷ Cheé mod áhelésé ábe ákəde ádē alongé? ³⁸ Kéñzéé awě ákwágēn me ne ábēm e'yale á nyongel e'chii eché ehídne Dyöb nlém ímbε, abé-'e ebébtéd, Mwān-a-Moonyoŋ mó ámpē ákwágēn mó á póndé eché ápeé ne ángel eché ésáá ne ehúmé éche Sáá."

9

¹ Héé álângéé bó áá, “Ne mbále, nlângé nyé nén mée, doŋge á bad átîntê echêñ bényínenné kwééd díd áde bényíneé néé nkamlen n̄ Dyöb ímpédé ne ngíne.”

Yĕl ehăŋléné Yesue

(Mat 17.1-13; Luk 9.28-36)

² Ámbid e epun ntóób Yesue ankeén Petro, Jemse ne Jøne á mbood eché echabé ámín. Bëmpen-ee bémbé áhed. Áwâb e'só-te hê dôo ábë bembapës benyiné néé Yesue áhánléné.

³ Mbóté éche ánhēē épéné áte, épübē-’e féréd. Épübé’áá nyaa echě modmod á nkōjsé éeheléé-sé apúbed. ⁴ Héé bényíné Mosee ne Elaijaa békídé téléd, bóobé Yesue békale’.

⁵ Dóo Petro álângéé Yesue aá, “A meléed, ébóó ngáne syáā dédíí hén. Délöñ e'bem é'láán, échöñ, éche Mosse ne éche Elajaa.” ⁶ Petro enkembíí’é chöm éche áhóbeé áyäle mbwógo

ní ngíne mímbe bóobé baáb á yĕl. ⁷ Hé dóo mbag ékúténé bó boj ehób-pe ébídé' á mbag-tê wê nén, "Awem Mwǎn a nlém nén, nyewógne mó." ⁸ Ábwōg-ábwōg dóo bénóné ekide boj béenýne modmod ampée nzése Yesue. ⁹ Áde bésudeé á mbəad mîn nê, Yesue ansim bó etúu áte, álāngé bó aá, "Nyéelángé modmod dyam áde nyényiné káéj ne á póndé eché Mwǎn-a-Moonyoŋ ápuú'é." ¹⁰ Né-ɔó, ábē bembapēs bénkoó áde dyam ne bén, bésedtē yĕl chóm-éé mpuu ídii. ¹¹ Héé bésedtē Yesue bánken, "Cheé ékáá boj bemeléede bé mbéndé békóbé nén bán Elaijaa atángéné asébe dé ape boj Ane-awé-Béwógté ápĕ?" ¹² Dóo átimtanné bó aá, "Ne mbále Elaijaa atángéné asébe dé ape atíi'-é mam mésyōö. Cheé-ɔ ékáá boj étenléd á kálag e Dyōb nén bán Mwǎn-a-Moonyoŋ ákúd metake híin, bad békáj-é mó á yĕl? ¹³ Boj nlângé nyé nén mée Elaijaa ammăd ape, bembél-le mó ngáne bêndangé. Né dénlónéd mam mímbe ménthenléd áyōl e eché."

*Yesue achójté mwǎn
awé edəádəjé é mbéb étageé
(Mat 17.14-21; Luk 9.37-43a)*

¹⁴ Áde bérpédé wéé ábíníí bembapēs békobé, bénťan née ndun e mod élárñédé bó. Bemeléede bé mbéndé bérpétannáá ne bó. ¹⁵ Anyín áde ábē bad bénýiné Yesue, menyáké ménkōb bó bwâmbwam. Bénnyagéd áwē áléléd mó. ¹⁶ Héé Yesue ásedtē ábē bembapēs aáken, "Cheé nyáabōo nyépentanné?" ¹⁷ Dóo mod nhógo átinté e ene ndun e mod ákwentanné aá, "A-meléed, mpeéné awêm mwǎn a mwenchóm áwōj áyāle edəádəj é mbéb édé mó áte, ébélé eehóbéé-é dyam. ¹⁸ Nzé ékóbé mó, ébelé éhúnéd mó ásé, mehod-te mébídé mó á nsəl. Ene póndé ádyág meson á nsəl, anámén-ne. Nlângé-é ábōj bembapēs mée békibidé mó chó áte boj békoheléé." ¹⁹ Dóo Yesue ákwentanné aá, "Wáā, nyé bad bé' chii, nyéewoo'é adúbé. Chán mépéé nyé adyen hén-éé? Chán mépéé nyé awesén-é? Hyenáad me mwǎn awed." ²⁰ Dóo bérpínédé mó ane mwǎn. Anyín ádē échē edəádəj é mbéb ényiné Yesue, énsög ane mwǎn, éhúnéd mó ásé, áhējlâd á ndəob, mehod-te mébídé mó á nsəl. ²¹ Héé Yesue ásedtē saá aáken, "Á etûn é póndé éhéé ákétagké nén?" Dóo saá ákwentanné aá, "Bootya se á mwéndemé. ²² Éyógké mó ahúned á muú-te ne á mendib-te áwúu mó. Boj nzé dyam ádē áde éheliéé-se ébel, ewóg sé ngol, ewóngén sé." ²³ Héé Yesue átimténé mó aá, "Wéé nzé dyam ádē ádē níheliéé se míbel-é? Chóm ésyōö áheliéé békohelé ne mod awé awóó adúbe." ²⁴ Ábwōg-ábwōg dóo ane mwǎn saá ákánté ehób ámīn aá, "Ndúbpé, wóngén adúbe ádêm áde déekwognede." ²⁵ Ndun e mod enyägté'áá áladén áte áhēd. Áde Yesue ányiné nê, ankáné échē edəádəj é mbéb áte aá, "Á-edəádəj é ndógo ne é ebóbé, nkamlan wé mée ébíd mó áte, weesólé-é mó áte ámpé." ²⁶ Échē edəádəj élébpé-áá esaád, éságéd ane mwǎn ne ngíne, ébíd-te. Ane mwǎn antím née ndim mí mod káojé donje á bad békóbé bán, "Awédé." ²⁷ Boj née Yesue áchángé mó á ekáá, átiiidé mó ámīn, ane mwǎn atyéém-me. ²⁸ Yesue ansol á ndáb-te. Héé ábē bembapēs bésedtē mó á kun-tê, bánken, "Cheé énkéj boj sénkênhéll échē edəádəj é mbéb abídé?" ²⁹ Ankwentén bó aá, "Mekáne mwěmpen móo méhele mébídé enén ndín e edəádəj."

*Yesue ahóbé ámpé tângene eche kwéed
(Mat 17.22-23; Luk 9.43b-45)*

³⁰ Yesue ne ábē bembapēs békíté-áá hê, bérpōj á mbwogé Galilia. Enkénmwaá aá modmod ábíi wéé módií, ³¹ áyāle ayägté'áá ábē bembapēs aá, "Béké Mwǎn-a-Moonyoŋ ámekáá mé baányoŋ. Bó-áá békowú mó. Nzé bémáá-é mó awúu ápuú ámbid e epun é láán." ³² Boj ábē bembapēs bénkênsónjténné chóm éche ánhōbpé, békáá-é mó ased.

*Nzéé atómténé mod ambáá abé?
(Mat 18.1-5; Luk 9.46-48)*

³³ Yesue ne ábē bembapēs bémpe á Kapenahum. Áde bérpédé, bénsoł á ndáb-te. Dóo Yesue ásedtē bó aáken, "Cheé nyéswántannáá á nzii bwéed?" ³⁴ Boj bénkênhóbpé dyamdyam áyāle bén ne bén bérpétannáá tângene mod awé atómténé mod ambáá abé átinté echâb. ³⁵ Héé Yesue ádyéé ásé, áchágé ábē bembapē dyom ne béké boj álāngé

bó aá, "Kéñzéé awě ahede mod a mbáá abé, atángéné abé ndimtene, abé-'e mbalede a moosyəál." ³⁶ Hé dő́ átéddé mwëndem boj átiidē mó áwab tîntê. Dóo abwáadé ane mwän, boj áhöbē aá, ³⁷ "Kéñzéé awě akobé enén ndín e mwän á dín ádêm, né akobé me. Kéñzéé-'e awě akobé me, eékobéé mmën-pen. Akobé kéájne ane awě alómé me."

*Kéñzéé awě eetáŋgán syánē,
né adé ne syánē*

(Luk 9.49-50)

³⁸ Jone anláá Yesue áá, "A meléed sennyyín mod abídte bad e'déadəj bé mbéb áte á dín ádōŋ, sénláá-’e mó bán ásôg abel nê, áyəle eésáá mod a echoŋ éche syánē." ³⁹ Boŋ Yesue anláá bó áá, "Nyéeláŋgé mó bán ásôg abel nê. Mod ké nhóg eésáá awé ămad menyáké abel á dín ádêm, boŋ ámbid e póndé áhɔbē me mam mé mbéb á yěl. ⁴⁰ Áyəle, kénzéé awě eetáŋgán syánē né adé ne syánē. ⁴¹ Ne mbále, nlâŋge nyé nén mœé, kénzéé awě abagé nyé ké kôb e mendib âmwé á dín ádêm, áyəle nyédíí bad bé Kr̄sto, atáŋgéné míme nsábe akud.

Mekəgsen míme mébelte bad mbéb

(Mat 18.6-9; Luk 17.1-2)

⁴² “Kénzéé awě abělté enén ndín e mwěndem echě edúbpé mɛ mbéb, ébē mboŋ âtəə mó sánkalaa aláá á nkéŋ, běhúnéd-te mó á edíb é nkwé. ⁴³ Nzé échoŋ ekáá ébelte we mbéb, esél chó, épim. Édé mboŋ we âkud alongé áde déemaá’ ne eped é yěl tómaa we âwónj mekáá mébe boŋ běbwém we á dě-á-muú.* ⁴⁵ Nzé échoŋ ekuu ébelte we mbéb, esél chó, épim. Édé we mboŋ âkud alongé áde déemaá’ ne eped é yěl tómaa we âwónj mekuu mébe, boŋ běbwém we á dě-á-muú.† ⁴⁷ Nzé ádon díd ábelte we mbéb, ehúd dó, épim. Édé mboŋ we âsól á nkamlen í Dyōb ne díd ahóg tómaa we âwónj mǐd mébe boŋ běbwém we á dě-á-muú. ⁴⁸ Áhed, ‘e’kuu ábě é’dyág bad běewāgkē, muú rímed-te méedimēē.’

49 “Muú ményāā mod ké ahéé á yäl ngáne nkwé nínyâ̄ngéé á ndyéed-te. **50** Nkwé m̄bóó, boj nzé m̄bódé alaŋ, chán béhele-sé bényinēd mó ámpē? Nyényine’ néé nkwé, nyédyεε-’ ne nsan ne nhóó ne aníníi.”

10

Ayáged tângene anan
dé mmwaád á e'wóngé

(Mat 19.1-12; Luk 16.18)

¹ Yesue anhidé ádē abwóg á hōm, ampōj á mbwóg e Judeya, áchābē á pēd e edib é Jodan enínií. Ndu e mod epagé'áá áwē, áyāgtē-'e bō ngáne ámenténné bō ayaged. ² Befarisia běmpé áwē ákag mó. Bēnsedéd mó bánken, "Eched mbéndé chóchó ebagé kunze nén mod ánan mwaad á e'wóngé-ye?" ³ Héé Yesue átimtanné bō aáken, "Chán mbéndé eche Mosee ékalee?" ⁴ Bēnkwentén bán, "Mbéndé eché Mosee ebagé kunze nén, mod ábe mwaad kálag eché elúmte nén bán, e'wóngé é'máá boj änán mó." ⁵ Héé Yesue álāngeé bō aá, "E'lél bé nlém á abum ábēn báo běmbél boj Mosee ábe nyé échén mbéndé. ⁶ Boj se á mbooted, áde Dyōb áhágé bad, anhág mmwaad bō mwenchóm. ⁷ 'Né-óó, mwenchóm atedé saá ne nyaj, abé ne mwaad. ⁸ Búmō bad bébe bétim mod nhóg.' Né-óó, béesaá ámpē bad béké, boj bédii mod nhóg. ⁹ Né-óó, éché Dyōb áládé, modmod eepáá." ¹⁰ Áde bétímé ámbid á ndáb-te, Yesue ábē bembapee bēnsedéd mó tāngene dyam áde áhóbé. ¹¹ Héé Yesue álāngeé bō aá, "Kénzéé awé anané mwaad boj awój mmwaad ampée né akábé asón. ¹² Nzé mmwaad-te atédté nchóm boj awóó mod ampée, né akábé asón."

Yesue anămté běndem
(Mat 19.13-15; Luk 18.15-17)

* 9:43 Donge á kálag dé'só ábádē nchoo 44: Áhed, e'kuu ábě é'dyāg bad bēēwāgkē, muú m̄med-te méēdīmēē. † 9:45 Donge á kálag dé'só ábádē nchoo 46: Áhed, e'kuu ábě é'dyāg bad bēēwāgkē, muú m̄med-te méēdīmēē.

¹³ Bad bépééné'áá běndem wéé Yesue bán ábân bó ekáá á yél ânamed bó. Boj ábē bembapee bénkānē ábē bad áte. ¹⁴ Áde Yesue ányíné nê, anlīŋ, aláá-'e ábē bembapee aá, "Nyétede běndem béhyag áwêm. Nyéekáá bó áyāle nén nyaa e bad née bó chóó éwóó nkamlen í Dyöb. ¹⁵ Ne mbále nlânge nyé nén mœé, kénzéé awé eékobe nkamlen í Dyöb nêngáne mwěndem, éesónlé áwēd-te." ¹⁶ Héé Yesue áládé ábē bän áte, ábâné bó mekáá á nló nhógē-nhógē, ánamté-'e bó.

*Nh&on m̄ bad ne nkamlen n̄ Dy&ob
(Mat 19.16-30; Luk 18.18-30)*

¹⁷ Áde Yesue ábwókgké eke ámpē, dōo mod nhóg ányágté áwē, abwóg mebóbój áwē e'só-te, boj ásédté mó aá, "A-meléed a bwâm, dyam áhéé ntáŋgéné abel, ábel néñ nkud alongé áde déemaá?" ¹⁸ Héé Yesue ásédtéé mó aáken, "Cheé ékáá boj échágé me meléede a bwâm? Mod ké nhóg eésáá mod a bwâm étōmee Dyöb dëmpen. ¹⁹ Ebíí mbéndé éche éhóbe bán, 'Weewúé' mod, weekábé asón á ndáb e'wóngé, weechibé', weebídé mbój e metóm, weédögé bad, bęé sóó ne nyon edúbé.' " ²⁰ Héé ane mod áhóbeé aá, "A meléed, nhídé échén mbéndé ésyääl booty se á mwëndemé." ²¹ Héé Yesue ánøneé mó chóój ne nlém mé edənge, boj álāngé mó aá, "Dyam ahóg áhëdne we. Käg, ésôm bwëm é'syääl ábe éwóó, étêd mímé mòná, ébę betóótöké bé bad. Nzé ebél nê, wéküd nhòn ádyöb. Ene póndé éhye éhíde me." ²² Áde ane mod áwóge nê ansudén, asú-ę ne ndutul á nlém-té áyäle ambé nhòn bwâmbwam.

*Yesue ahóbé ngen éche elónténé
éláán ngáne békéwūn’é mó*

(Mat 20.17-19; Luk 18.31-34)

Jemse bó Jøne béhede' e'tál
(Mat 20.20-28)

³⁵ Ámbid e nê Jemse bó Jøn, bän ábe Zebedie bêmpë wée Yesue. Áde bépédé, bénlää mó bán, “A meléed, dyam ádé áde séhedeé bán ébèle sé.” ³⁶ Héé Yesue ásedteé bó aáken, “Cheé nyéhedeé bán mbele nyé.” ³⁷ Dóo béhóbeé bán, “Séhede bán áde wédyee’é ádöñ atii dé nkamlen, émwé sédyee we á nkæg, nhög á ekáá émbáá anínií’-e á ekáá é emwed.” ³⁸ Héé Yesue ákwéntanné bó aá, “Nyéebí’é chöm éche nyésedteé. Nyééhél

metuné míme mépemmē apém-e? Nyéhél edusen é metuné éche mékudté akud-e?”³⁹ Dóo békwentanné mó bán böhél. Héé Yesue álāngéé bó aá, “Nyépem metuné míme mépemmē, nyéeküd edusen é metuné éché mékudté,⁴⁰ boj meewoo’é kunze âpwed mod awé ádyeé me á ekáá é mbáá ké-e á ekáá é emwéd. Dyób dóo débě mímē metii wée bad ábe ánábnédé mó.”

⁴¹ Áde ábíníí bembapess dyom béwogé dyam áde Jemse bó Jón bésédté, bénliín bó bwâmbwam. ⁴² Héé Yesue áchägeé bó moosyáál benben boj álāngé bó aá, “Nyébíí néen bán bad ábe bébyéené néen benkamléne bé nkörnsé ne bad bémbáá bé dyad, békennlad ngíne ákamlén bad ábe bédé ásé echâb. ⁴³ Boj éetângeneé abé né átinté echén. Kénezéé awé ahede aá móbê mod ambáá átinté echén, atângéné abé mbalede awén. ⁴⁴ Kénezéé-e awé ábë mod a’só átinté echén, atângéné abé ntâj a moosyáál. ⁴⁵ Áyale ké Mwán-a-Moonyor eépedeé aá bad békennle mó, boj apedé ábèle bad, áb-e-e ádë alongé ákade bad híin.”

*Yesue achöjté mod
awé ankwe ndím
(Mat 20.29-34; Luk 18.35-43)*

⁴⁶ Yesue ne ábë bembapess bêmpé á dyad á Jeriko. Ndun e mod ehídé’áá bó. Áde bémadté dyad áte né, dóo bétané mod nhóg awé bêchágé’áá bán Batimuse. Batimuse abédé-eé mwán awé Timause. Ankwe ndím. Andyéé á nkag ní nzii, áchomé bwém. ⁴⁷ Áde áwogé bán Yesue a dyad á Nazaret mó atóme’ né, ambootéd abón, áhobé aá, “A-Yesu, Mwán a myaa míme Dabide, wog me ngol!” ⁴⁸ Bad híin békanné’áá mó áte, bélângé-eé mó bán ádib nsel. Boj mó-e ambé ábônē aá, “A-Mwán a Dabid, wog me ngol!” ⁴⁹ Héé Yesue átyéémé boj áhobé aá, “Nyéchéle mó.” Dóo bêchénlé, bélângé mó bán, “Weétâgé áte. Tyéém ámín achénle we.” ⁵⁰ Héé ane mod ábwémé kóte wínií, apadé ásé, ápág-ke wée Yesue. ⁵¹ Héé Yesue ásedteé mó aáken, “Cheé éhedeé weé míbèle we?” Ane mod anhób aá, “A-meléed, nhede meé nnyinén ámpé.” ⁵² Héé Yesue álângéé mó aá, “Kág, adúbe ádónj ádídé we bwâm.” Ábwôg-ábwôg ambootéd anyinén, áhidé-eé Yesue.

11

*Yesue asólé á Jerusalem néé kâj
(Mat 21.1-11; Luk 19.28-40; Jón 12.12-19)*

¹ Áde Yesue ne ábë bembapess békowogé ape á Jerusalem, benben ne myad mé Bétpes ne Bétni á Ekone é Menzab, anlóm ábë bembapess bêbe ásó, ² álângé bó aá, “Nyékag á dyad áde ádé nyé ásó né. Nzé nyéslé sólén nyéétán néé bétângé etum é nchóm a ésel awé mod éediidéé mbêd. Nyéhune mó, nyéhyeene”. ³ Nzé mod asédté nyé aáken, ‘Cheé ékéé boj nyébelé né?’ Nyéláa mó bán, ‘Sângwéé atógnéné chó, álom-me chó ámbid ábwôg-ábwôg.’” ⁴ Héé békíí boj bétané etum é nchóm a ésel éche bétângé á mmwé-nzii boj böhunné’. ⁵ Héé bad ábe bêntyéem benben ne áhed bésedteé bó bánken, “Cheé nyébelé né, nyéhunne échê ésel-e?” ⁶ Bembapess bêntimtén bó ngáne Yesue ánhobpê aá böhôb. Dóo ábë bad-te bêtædté bó bán békag. ⁷ Bêmpesén échê ésel wée Yesue, bétal chó échab mbóté ámín boj mó-e ádiidé’. ⁸ Bad híin bêntâl échab mbóté á nzii-tê ábe mó edubé, ábíníí-e bésel-e’ e’kikag é’ mií, bétalé’ á nzii-tê. ⁹ Bad ábe békágé’áá mó ásó ne ábe böhídé’áá mó ámbid böhágé’áá e’saad bán,

“Hosána, Mekenag!

Nnam míbê ne ane awé apedé á dñi áde Sângwéé.

¹⁰ Nnam míbê ne nkamlén míme echet sáj Dabide, míme nhyúe’.

Hosána, Mekenag ne Dyób áde ádé se ámín!”

¹¹ Yesue apedé’áá á Jerusalem, asól á Ndáb-e-Dyób. Ansimén ekide ésyâäl. Ngáne póndé emmadté atóm, antím ámbid á Bétni ne ábë bembapess dyom ne bêbe.

*Yesue abagé alín á ngel ebómán
(Mat 21.18-19)*

¹² Chǎn é'bíníí áde békúé'á Bétni, nzaa enkób Yesue. ¹³ Annyín alín á ngel nchabnede ne byaá ámīn. Dóo ákií áhed ânyín nzé móhèle se mókud e'pum áwedé-mîn. Áde ápédé áhed enkéntánné epum ké ehóg étōmeeé byaá áyâle enén póndé eebédeé póndé eché ngel échyáá'á e'pum. ¹⁴ Héé álângéé ábê bwel aá, "Wéechyáá'á epum ámpē mbêd." Ábê bembapee bénwôg áde Yesue áhóbé nê.

Yesue anané bekáb bé nyongé
á Ndáb-e-Dyöb

(Mat 21.12-17; Luk 19.45-48; Jon 2.13-22)

¹⁵ Yesue ne ábē bembap  e b  emp   á Jerusal  em. Áde b  p  d  , ans  l ´ Nd  b-e-Dy  b, ´boot  d-te bad ´abe b  k  b  '   dy  n ´w  d-te ananted. Ankun   bet  bel   ´abe bad b  p  nl  '   m  n   m  kuu ´m  in, ´k  n  -'   metii m  me bad ´abe b  s  omm  '   mb  ng   m  kuu ´m  in. ¹⁶ Enk  mmwa  -'   a   modmod ´at  men ch  m ´ nyong   k   eh  g ´ ey  de ´ Nd  b-e-Dy  b-te. ¹⁷ H  e   ´y  gt  e   b  , ´h  b   a  , "Eesa   mb  le b  n ´t  enl  d   n  n b  n, 'Echem nd  b ´ch  gn  d b  n nd  b e mek  ne e melo   m  sy  l  -'  ?" Boj ny  timt   ch   mbw  g m   bech  b  !" ¹⁸ Beprise b  mb  a   ne bemel  ede b   mb  nd   b  nw  g ´ade Yesue ´h  b   n  , b  boot  d-te nz  i ah  d ´w  u   m  . Boj b  mb   mbw  g ´y  l   ndun e mod esy  l   ech   emb   ah  d ´m  b   meny  k   ne mekan m  me ´y  gt  '  . ¹⁹ ´de nguk  l   ´p  d   Yesue ne ´b   b  mb  p  e b  nhid   ´ dyad-t   w  .

**Ayáged tângene alín á ngəl ádě dénwē
(Mat 21.20-22)**

²⁰ Mbwembwé, áde bétiméé ámbid, bényín ádê alín á ngöl ngáne áwédé káéjne á nkan. ²¹ Héé Petro ákámtené dyam áde Yesue âmbenlé, boj álângé mó aá, “A-Sán, nənè’, alín á ngöl áde wêmbeé ebómán áwédé.” ²² Héé Yesue ákwentanné aá, “Nyédúbe Dyöb ne nlém ñsyääl. ²³ Ne mbále, nlângé nyé nén meé, kénzéé awë ălâa enén mbɔɔd aá, ‘Hidé ásé, éhûn á edib é nkwe-te’ boj adubé ne nlém ñsyääl aá dyam áde móhóbeé débenléd ésebán apide’, né débenléd. ²⁴ Né-oo, nlângé nyé meé kechéé éche mod ásédté Dyöb á mekáne-tê, boj ádúbe nén aá móðkud chô, ákünd-te chô. ²⁵ Póndé ké ehéé échë étyéémé weé mókanne’, nzé ewánléné mod melingá, élagsen mó, ábel nén awôj Titée awë adé ámín mó-’e ámpë alagsen we mímon mbéb.”*

Héé kunze eche Yesue ébídé?
(Mat 21.23-27; Luk 20.1-8)

12

*Ngan e bebel-bé-nsón
ábe békébéké nlém á abum
(Mat 21.33-46; Luk 20.9-19)*

* 11:25 Donge á kálag dé'só ábádé nchoo 26: "Nzé nyéélagsán bad bémpēe mbéb, ké awen Titée awě adé ámīn éelagsénné nyé rím̄mēn mbéb."

¹ Héé Yesue ábóótédé ngan abenled ákalen bó. Anhób aá, “Mod nhóg ankwl nzag e e’pum é” mel ábe békobé mím. Ankág chó, ábel bwál wéé béminéé ábê e’pum é” mel ábel mím, alónj-’e ebem wéé bédyeé’ é áwéed-te ánan menon. Ambé ene nzag wéé bad ábe békab mbote áte, áké á aloj démpée. ² Néé póndé épédé eché bérpádée e’pum, ane nwóó-nzag anlóm awé mbalede wéé ábê bebel-bé-nsón ákobe mó ádē asii dé e’pum. ³ Héé ábê bebel-bé-nsón békobé ane mbalede, bérwánén mó, bésúúd-te mó ámbid ne mekáá mé ngén. ⁴ Dóo ane nwóó-nzag álomé mbalede ampée. Bénlögén mó á nló, bérwogéd-te mó e’són. ⁵ Nwóó-nzag ambé alóm mbalede ampée, ábê bad bénwūú ane ámpé. Bémbeél melemlem ne ekud épée, bérbomé donje, bérwūé-’e ábíníí. ⁶ Mod awé anlyag mó alóm abédéé awe mwán-a-mwenchóm awé ándængé bwâmbwam. Kéájne á asog, dóo áloméé ane mwán ne mewémten nén aá, ‘Ngáne ádíí awem mwán, bérbér mó edúbér.’ ⁷ Boj áde ábê bebel-bé-nsón bénýiné néé ane mwán áhúé’ é, dóo bén ne bén bérhóbeé bán, ‘Ndyé-a-mbwog nén, nyéhyag déwúú mó ábel nén eche mbwog ésuuned syáné.’ ⁸ Héé békobé mó, bérwūé’ mó, bérwém-me mó ndim ámbid e e’ké.” ⁹ Héé Yesue ásedteé áaken, “Béeb-poó, cheé nwóó-nzag ábenlé ábê bebel-bé-nsón? Ápě awúú bó, ábē-’e ene nzag wéé bebel-bé-nsón bérpée. ¹⁰ Eyale é Dyób éhóbe nén aá, ‘Aláá áde belój-bé-ndáb bénchenéé, dóo átímé aláá dé etógnén abé.

¹¹ Sájgwéé mó abelé nén, édé-’e syáné menyáké á díd-te. Nyéeláá’ é nê-yé?’ ”

¹² Né-oó, bad bémbeáá bér Israel bérhédé’ áá Yesue akób áyéle bémbeíi bán áyéle echâb dóo ákálé enén ngan. Boj bémbe mbwog áyéle ene ndun e mod embé áhed. Né-oó bérntedé mó béké.

Nsédtéd tângene asaa á táásé

(Mat 22.15-22; Luk 20.20-26)

¹³ Bénlóm Befarisia ne bad bér epepé éche Herôde áke dé asedde Yesue dyam ábel nén békoben mó awusé. ¹⁴ Héé bérpédé áwé boj bélângé mó nén bán, “A meléed, sérbií nén bán ekale mbále. Weékwognádté modmod. Weebáá-’e bad mesó mé mbom. Boj ekojte bad mam mé Dyób ayáged. Mbéndé eche syáné ehóbe nén bán désange’ táásé wéé Kaiséé, kâj e Roma-yé?” ¹⁵ Boj Yesue anchém mímáb medogké, héé ásedteé áá, “Cheé nyékagéé me. Nyéhyiined me mòné mé ekii ínón mó.” ¹⁶ Héé bérpéné mòné mímed boj ásedteé ááken, “Edíidiyge éche nzéé chén, dín áde nzéé-’e dén?” Bénkwéntén mó bán, “Ábe Kaiséé.” ¹⁷ Dóo álângéé bó aá, “Nyébag-kóó Kaiséé éche édé éche Kaiséé, nyébag-ke Dyób éche édé é Dyób.” Áde bérwogé nê, yél enkóm bó áte.

Nsédtéd tângene mpuu

(Mat 22.23-33; Luk 20.27-40)

¹⁸ Besadusia bérmpé wéé Yesue. Béndubé bán mpuu méesaá ámbid e kwéed. Dóo bérhóbeé bán, ¹⁹ “A-meléed, mbéndé e Mosee ehóbe nén bán, ‘Nzé mod awóó mmwaád boj awédé áde bó ane mmwaád bérpedéé mwán awále, mwânyaj a abum ahóó atângéné ane nkúd awónj ábel boj dín áde mwânyaj déebôó.’” ²⁰ Béeb-poó, bad bérédé mod saámbé ábe bérpádée abum ahóó. Mod a’só anwónj mmwaád boj awé áde bó mmwaád ne bérpedéé bán awále. ²¹ Mwânyaj awé anhíd mó anwónj ane nkúd a mmwaád. Móompé awé áde bó ane mmwaád bérpedéé bán awále. Melemlem mé dyam mémbeñléd ne awé alonténé bérâán. ²² Kéáj bó mod saámbé asyéál bénwóoj ane mmwaád bérwé-’e, áde bérpedéé mwán awále. Kéájne á asog ane mmwaád mómpé anwé. ²³ Béeb-poó á póndé e mpuu, mmwaád awé nzéé ane mmwaád áchagnédté áyéle bó moosyéál saámbé bénwóoj mó?” ²⁴ Héé Yesue átimtanné bó aá, “Nyépané’ áyéle nyéesôjteneé chóm éche eyale é Dyób éhóbeé, nyéesôjteneé-’e ngáne ngíne e Dyób ésogé abé. ²⁵ Póndé eché bad bérpúú’ é ámbid e kwéed, mewóngé méebaáá ámpé. Bad bérbér nêngáne ángel éche édé ámín, bérwójnáé. ²⁶ Béeb-poó, tângene mpuu, kíné nyéeláá’ é á kálag e Mosee á eped éché éhóbe áyéle mwá bwel awé ahyáá’ áá-yé? Áhed, éténléde bán áde Dyób álângéé Mosee tângene Abrahame, Aisige ne Jakobé ábe bémmod awé, Dyób dénhôb aá, ‘Méé ndé Dyób áde Abrahame, Aisige

ne Jakobé.’²⁷ Nê álûmte nén bán bédé á alongé. Dyöb ádíi Dyöb á bad ábe bédé á alongé, saké Dyöb á bad ábe béké. Nyépane’ bwâmbwam.”

Mbéndé ébe éche etómténé etógnén abé
(Mat 22.34-40; Luk 10.25-28)

²⁸ Meléede a mbéndé nhág awé ambé áhed anwóg chöm éche bélhbéé. Ádě ányíné aá Yesue abagé Besadusia nkwenten ín bwâm, ansedéd Yesue aá, “A meléed, átîntê e mbéndé ésyääl, mbéndé ehéé etómténé etógnén abé?”²⁹ Yesue ankwendén mó aá, “Mbéndé eché etómténé etógnén abé edíi mbéndé eché ehóbe nén aá, ‘Á-bad béké Israel nyewóglén: Sángwéé áded Dyöb, mwëmpen-eé adé Sángwéé. ³⁰ Édæj Sángwéé ádoj Dyöb ne mímon nlém ísyääl, ne échoj edædæj ésyääl, ne mímon mewémten mésyääl, édæj-’e mó ne echoj ngíne esyäál.’³¹ Eché elonténé ébe eché chómpé edé etógnén, edíi eché ehóbe nén aá, ‘Édæj mwânyoŋ nêngáne édáé echoj yäl.’ Mbéndé empée eesaá eché etómténé etógnén abé nêngáne échén ébe.”³² Héé ane meléede a mbéndé álângéé Yesue aá, “A-meléed etângéné. Ekalé mbále weé Dyöb ádfi ahág, Dyöb démpéé déesaá-’e etómeé mwëmpen.³³ Mod âdæj-’e mó ne mímē nlém ísyääl, ne mímē mewémten mésyääl, ne eche ngíne esyäál, âdæj-’e mwânyoŋ ngáne ádáé eche yäl, atómténé etógnén abe tómaa ábë Dyöb mendé míme béhyâjtéé ne mendé mémpéé.”³⁴ Áde Yesue ányíné aá ane meléede a mbéndé ahóbné debyéé, anláá mó aá, “Nkamlen í Dyöb méechabnedéé we yäl.” Ámbid enê modmod enkêncbú’é Yesue dyamdyam asedé ámpéé.

Nsædtéd tângene Ane-awé-Bewógté
(Mat 22.41-46; Luk 20.41-44)

³⁵ Yesue ayágté’áá á Ndáb-e-Dyöb. Áhed dôo áhóbeé aáken, “Chán bemeléede bé mbéndé bélhele bélhbé bán Ane-awé-Bewógté abídé á mbyaa míme kâj Dabide?³⁶ Dabide mwén anhób áde Edædæj éche Ésáá émbëë mó áte aá,

‘Sáj Dyöbe anláá awêm Sángwéé aá,
Dyeé áwêm ekáá émbáá
kááj ne á póndé eché mëbenlé boj
ékøgtéd ábøj bad békøyí ámín ne mekuu.’

³⁷ Néé Dabide mwén ásébpé mó achég aá Sángwéé, chán-nô Ane-awé-Bewógté áheléé abé awe mwán?’

Elébé tângene bemeléede béké mbéndé
(Mat 23.1-36; Luk 20.45-47)

Ndun e mod ewoglánnáá Yesue áhed ne menyinge bwâmbwam.³⁸ Áde áyágtéé bó anhób aá, “Nyétéd póndé ne bemeléede béké mbéndé, bédæ’ mengombe míme íchábé ahyómén áte. Bédæ’-’e bán bad bélente bó ne edubé ésyääl á mebwog néé á dyon-tê né.³⁹ Bédæ’-’e metii mé edubé adyee á ndáb é mekáne, bédæj-’e e’tál béké edubé á hõm á ngande.⁴⁰ Béduumé’ mbwog é bekúd, bédogné-’e bad ntój-ntój mé mekáne. Békúd nkógsen míme íchábé ámín.”

Mendé mé nkúd a mmwaád
(Luk 21.1-4)

⁴¹ Yesue andyéé benben ne ntyág míme bélhágé’áá mòné mé mendé áte á Ndáb-e-Dyöb, ánóné’ ngáne bad bélhágké mòné áwëd-te. Ekud é behón béké bad bélhágé’áá ekud é mòné.

⁴² Dôo ntogétoke a nkúd a mmwaád ápédé, boj áhág mòné mé ekii míme ndé ké bedálléé béké. ⁴³ Héé Yesue áchágé ábë bembapéé benben boj álângé bó aá, “Ne mbále, nlângé nyé meé, mímén ntogétoke mé mmwaád ínhédé mòné tómaa ábén behón béké bad bésyääl.

⁴⁴ Mòné míme ábë bad bélhédé, ndíi mòné míme íchábé bó ásé, boj anén mmwaád ne atóg áde ádíí, ahédé mòné ísyääl míme áwóó, ísyääl míme ámbëë atognan yäl.”

13

**Yesue ahóbé aá
bépāntēd Ndáb-e-Dyōb**

(Mat 24.1-2; Luk 21.5-6)

E'bébtéd é' mekan ábe bébenléd

(Mat 24.3-14; Luk 21.7-19)

Dyam dé ébébtéd

(Mat 24.15-28; Luk 21.20-24)

¹⁴ “Nyéēnyín néé ekúkú é akan éche épεεne e’sôn á’sō é’ Dyöb édíí wéé énkéntáŋgénne abé.” (Nyé ábe nyéláa’ mímén mekan nyésôjten mó bwâm.) “Nzé nyenyíné nê, bad ábē bédé á Judeya bétôm mehélé, béke bésôom á e’kone mîn. ¹⁵ Mod awé adé á nnorj í ndáb mîn eétogné aké á ndáb-te âtéd chömkööm. ¹⁶ Mod awé mó-’e adé á nzag-tê, eétimé ámbid âtéd eche sôte. ¹⁷ Ébē ebébtéd ne bebaád ábe béké nkog ne ábe bémwâjté mímê mesú. ¹⁸ Nyékânné nén bán, nén déebenláp ne nyé á pónré e nkógo áde ahéb ádíí ngíne bwâmbwam, ¹⁹ áyâle ndørge eché ébë ábë e’pun, ébë ndín eché eebédé mbêd bootya Dyöb áhage nköjsé ape epun é’chii. Dyamdyam néé ádê déebenléd-taá ámpé mbêd. ²⁰ Boj Sângwéé amaá ábë e’pun é’ metake asél áte. Nzé énkembé nê, né modmod éechongé. Boj á etútú é bad ábe ápwédé, asélé ábë e’pun áte. ²¹ Ene pónré nzé mod alángé nyé aá, ‘Nyénøne’, Ane-awé-Bewógté mònén’ káa, ‘Nøné’ mòníníí,’ nyéedúbpé’. ²² Bad híin békibid, bó mod té ákalé metóm aá móo módë Ane-awé-Bewógté. Bekal bë’dáädæj bë metóm ámpé békibid. Békbel menyáké, bélumtë-’e’ chemléd híin. Békbel nén ábel boj bëdog bad ábe Dyöb ápwédé, nzé nzii edé ádog bó. ²³ Nyétêd pónré. Nlánjé nyé mímén mam mésyääl á’sö é’ pónré.

Epe é Mwǎn-a-Moonyoŋ
ne asog dé nkōŋsé
(Mat 24.29-31; Luk 21.25-28)

²⁴ “Ábê e’pun-ne, áde póndé e ndəŋge ne étómmé tómén ‘etondēe ăkwé ehíntén, ngon-ne esog apen,

²⁵ betintine békid ámín békid ásē, ngíne-’e éche édē ámín énəŋnéd á e’dii.”

²⁶ Ene póndé dōo bényinné née Mwǎn-a-Moonyoŋ áhúe’é á mbag-tê ne ngum ne ehúmé é ngíne. ²⁷ Ălōm éche ángel á metónge mé nkōjsé mésyāel méniin, âlad bad ábe Dyōb ápwédé áte, bootya atónge dé nkōjsé ahog âpe ádíní.

Yesue aá bad bétêd elájsén ne alín á ngel

²⁸ “Nyétêd elájsén ne alín á ngel. Nzé ngen ébóótédé byaá békōlē abíded, nyêbèle nyébíi bán nchon índé benben. ²⁹ Melemlem nzé nyênyíné mímén mekan mésyāel mébenlad, nyébíi nén bán, Mwǎn-a-Moonyoŋ akwogé ape, adé-’e benben. ³⁰ Ne mbále, nlânge nyé nén meé, enén nyongel e bad édii ebé ámín boj mímén mekan mésyāel mébenlad. ³¹ Nkon mí míne ne nkōjsé bémáa boj ábêm e’yle béké abé ne abé.

*Modmod eebíi’é epun
éche Mwǎn-a-Moonyoŋ ápae*

(Mat 24.36-44)

³² “Modmod eebíi’é epun pen k’e póndé eché mímén mam mébenlédté. Ké ángel éche édē ámín eebíi’é, ké Mwǎn ámpē eebíi’é. Titéé mwěmpen mó abíi póndé eche mímén mekan mébenlédté. ³³ Nyétêd póndé, nyébojse, áyæle nyéebíi’é áde ene póndé épae.

³⁴ Ébē nêngáne mod awé anlédé eke ake, boj alyagnéd ábē bembælede ndáb, ábe nhogtéé ímme nsón, aláá-’e mod awé anøne’ mmwe mé e’ké aá ábele nsón bwâm. ³⁵ Né-óó, nyétêd póndé áyæle nyéebíi’é pondé eché Sângwéé a ndáb ápae. Ahæle ápæ ngukél, ké’e melúde, ké’e epog é mbwembwe, ké’e mbwembwe. ³⁶ Nzé apedé täléd eetângeneé née átáné née nyékúnéé. ³⁷ Né-óó, saké nyé bënpen nlângéé ádén dyam boj nlângé moosyāel meé, ‘Nyétêd póndé.’ ”

14

Béhagke Yesue

(Mat 26.1-5; Luk 22.1-2; Jón 11.45-53)

¹ Ènlyág e’pun é’be, Ngande e Nnyíme-ámín ne e Ewélé-é-Ngén âpe áte. Beprise bémáá ne bemeléede békid békid áwâm ákob Yesue á mesoam-tê, âwúu mó.

² Boj bénhôb bán, “Deébélê nê á mbwe ní ngande áyæle né bad bëpeén epuutéd.”

Bewógté Yesue á Betani

(Mat 26.6-13; Jón 12.1-8)

³ Yesue ambé á ndáb wée Simøne awé ankwe nkole mé meløj. Áde ádyágké ndyéed nê, dōo mmwaád nhog ápédé ne apom á dyög dé elod é bwâm áde dënłel nkun bwâmbwam. Ádê dyög békénlé dô nâd. Hé dôo ákógté nló mé epom boj ásyøgé Yesue ádê dyög á nló. ⁴ Boj dojge á bad ábe békénlé áhed békénlé bwâmbwam, bésedté nhog ne anínií bânken, “Cheé ékáé boj anén mmwaád ábéké” enén ndín e dyög? ⁵ Béhélé’áá-sé bésom ádén dyög nkun ímme ríchábé ámín, békénlé mímé mòná béké betóotoké béké bad.” Né-óó, bénhôb ane mmwaád bwâmbwam. ⁶ Boj Yesue anláá bó aá, “Nyéchene mó. Cheé nyétagtéé mó? Abékénlé me kæse e dyam eché eboó bwâmbwam. ⁷ Betóotoké béké bad béké ne nyé póndé ésyāel, póndé kéké ehéé eché nyédaá-’e bó awôngéen nyéhæle nyéwóngéen bó, me pen méebaá ne nyé póndé ésyāel. ⁸ Abelé wée mekáá mépédé mó. Asyøgé me dyög á nló ábojse nlíme mímâm á’só é’ póndé. ⁹ Ne mbále, nlângé nyé nén meé, kékéé áde nkalañ mí bwâm mékanlédté nkōjsé áte nísyāel, békénlé dyam áde anén mmwaád ábéké ákamtén mó.”

Judase akwénténé Yesue asóm

(Mat 26.14-16; Luk 22.3-6)

Yesuε ne ábē bembapεε bédyédé
Ndyééd e Nnyíme-ámīn

(Mat 26.17-25; Luk 22.7-14, 21-23; Jon 13.21-30)

¹² Bəob-poó póndé e ngande e Ewélé-é-Ngén empé. Mbwe mé'sō áde békúé'áá bán bé ndyoyj m̄ mbód âbojsen ndyéed e Nnyíme-ámīn, bembapēs ábe Yesue béntān Yesue, bésedté mó bánken, "Héé wédəngé weé sébojsen we ndyéed e Nnyíme-ámīn?" ¹³ Dóo Yesue álómee bembapēs béké ne nlyágte nén aá, "Nyékag á dyad-tê, mod ábomén nyé awé apémé apom dé mendib, nyéhíde mó. ¹⁴ Nzé nyépedé, nyéláa nwóó-ndáb bán, 'Meléede ahóbé aáken, Héé toj e beken édíí eché módyéé ndyéed e Nnyíme-ámīn áte ne ábē bembapēs?' ¹⁵ Álumēd nyé toj eché ekolé áte eché bémáá abojsen, bénábpé'-e áte. Ene toj edé ámīn á ndáb-te. Nyébojsen syáā ndyéed áhed." ¹⁶ Héé ábē bembapēs békíté boj békag á dyad-tê. Béntān mekan mésyāāl ngáne Yesue ánlāā'é bó, bémbojsén-ne ndyéed e ngande e Nnyíme-ámīn. ¹⁷ Néé ngukél épédé Yesue ne ábē bembapēs dyôm ne béké bémpe áhed. ¹⁸ Bédyágé'áá ndyéed á tébelé. Póndé eché bedyáké ndyéed nê, dóo Yesue álhobéé aá, "Nlânge nyé nén meé, nyé mod nhógo ábë me ámekáá mé bad békoyí, nyé nhógo awé adyág ndyéed ne me." ¹⁹ Nén démbél bembapēs bênsudén bwâmbwam. Bémbootéd mó asedé nhógo ámbid e aníníí bán, "Ndúbpé meé saké me." ²⁰ Dóo átintanné bó aá, "Mod nhógo átinté nyé bad dyôm-ne-béké, mod awé súmō séetodé ewele á dïse-tê atode ahog. ²¹ Mwän-a-Moonyoŋ áwē ngáne éténléde boj medim ne ane mod awé ásōm mó. Ébagáá bwâm ne ane mod nzé bénkentjogen mó achyáá."

Ndyééd echě Sáŋgwéé

(Mat 26.26-30; Luk 22.14-20; 1 Kor 11.23-25)

*Yesuε ahóbé ngáne
Petro ábāŋgē mó á yĕl*

(Mat 26.31-35; Luk 22.31-34; Jon 13.36-38)

²⁸ Dóo Yesue áhóbéé aá, “Boj áde ápuúdté me, měké á’sō á Galilia áwed-taá nyétanné me.” ²⁹ Dóo Petro áhóbéé aá, “Ké moosyáél annyágéd átēdē we, me pen méetedéé we.” ³⁰ Dóo Yesue álângéé Petro aá, “Ne mbále, nlângé we meé, nkoo nén děn, nchóm-a-kúb adéhób aá móttóó’ ngen ébe wébāñ me á yél ngen éláán.” ³¹ Héé Petro ábádtéé mó áte aá, “Ké nkáy móó béseléé me, méebángé we áyál mbêd.” Bembapéé ábíníí bésyáél bómpé bénhób melemlem.

Yesuε akánné á Getsəmani
(Mat 26.36-46; Luk 22.39-46)

Petro, Jemse ne Jone akáne. Ndənge ne metake hín bēmpií mó á nlém-tê. ³⁴ Dóo álāngeé bó aá, “Ndənge eché edé me á nlém, ehèle-se ewúú me. Nyélyag hén, nyédyeeen me epin.” ³⁵ Ansídé ásō, abwém yäl ásē, boj ákánne’ aá nzé nzii edé eché ene póndé e metake ehèleé se ébāmē mó, ébame. ³⁶ Anhób aá, “A-Tê, Titéε, ehèle ébel kéchéé. Kobén me mímén metuné. Boj ké nê, bél ngáne ébójnédé we, saké ngáne ébójnédé me.” ³⁷ Áde ámáá akáne, antím ámbid wée ábê bembapées béláán. Antán née békúnéé. Dóo álāngeé Petro aá, “A-Simón, ekúne’-ε? Cheé ékáá boj weéhèle awesen âdyeeen me epin ké háwa póg? ³⁸ Nyédyee epin, nyékánne’-ε ábel nén Dyöb déemwág-se mekägsen mépiinéd nyé. Nlém rídáá abel boj ekob é yäl edé mbwág.” ³⁹ Antím ámbid ámpē, áke akáné melemlem ngáne ánsébēé akáne. ⁴⁰ Áde átímé ámbid ámpē, antán née békúnéé áyāle e’chó bembé bó á díd bwāmbwam. Né-ó bénkémbíí’-é chom éche bélāngeé mó. ⁴¹ Áde átímé ámbid ngen éche élonténé eláán dóo álāngeé bó aá, “Nyélyagé nyékúne’ nyékámme’-ε nyé áteye? Né ákwogé! Póndé epedé eché békéé Mwǎn-a-Moonyon á mekáá mé bad bé mbéb. ⁴² Nyépáde ásē dékag. Nyénøne’, mod awé akií me ntúré mó ahúe’ nén.”

Békóbé Yesue (Mat 26.47-56; Luk 22.47-53; Jón 18.3-12)

⁴³ Ehób éepedéé Yesue amaa á nsəl boj Judase ápag. Judase abédéé mbapées nhóg átinté e bembapées dyôm-ne-bébe ábe Yesue. Ampé ne ndun e mod. Ábê bad bénwälé nkawáté ne mbid. Beprise bembáá, bemeléede bé mbéndé ne bad bembáá bé Israel bőo bénlóm bó. ⁴⁴ Baoob-poó, ntúré awe Yesue ammäd bó e’chemléd abe aá, “Kénezéé awé méhēé tâl, né mod awé nyéhedeé mâne. Nyékôb mó, nyécháa-’ε mó bwâm boj nyékeene mó.” ⁴⁵ Judase apedé-’áa pœén, átómé-’ε wéeé Yesue. Anhób aá, “A-meléed.” Ahé-’ε mó tâl. ⁴⁶ Héé ábê bad békóbé Yesue, békéé te mó acháa. ⁴⁷ Dóo mod nhóg átinté e bad ábe bembé ne Yesue ádólé nkawáté á abám, néé átóméé mó, asél-le ntâj awé prise ambáámbáa etúu. ⁴⁸ Héé Yesue ásedteé bó aá, “Nchîb móo nídíi awé nyépéené nkawáté ne mbid ahyé dé akób-ε? ⁴⁹ Epun téé mbédé á Ndáb-e-Dyöb ne nyé, n'yāgté bad, nyéekóbe me. Boj e’yale é’ kálag e Dyöb é’téngéné alón.” ⁵⁰ Hé dóo bembapées bésyāél bétédté mó, boj bétómé mehélé. ⁵¹ Kódemod póg ebédé áhed, éhídé Yesue ámbid. Anwáá dásō esój é abad chëmpen. Ábê bad bénkág bán békôb mó, ⁵² boj antóm mehélé ne nsôb, áchennéd-te bó échê esój é abad.

Békáádté Yesue (Mat 26.57-68; Luk 22.54-55, 63-71; Jón 18.13-14, 19-24)

⁵³ Bad ábe bénkôb Yesue bénkeén mó wéeé Prise Ambáámbáa. Beprise bembáá, bad bembáá bé Israel ne bemeléede bé mbéndé bêmpé bélâdén áhed. ⁵⁴ Áde békéenéé Yesue nê, Petro ahídé’áá mó ámbid mwă etûn káajy asól á eyáde éche prise ambáámbáa. Andyéé áhed ne benon bé Ndáb-e-Dyöb, áwâlē muú. ⁵⁵ Baoob-poó, beprise bembáá ne bad bé káánsel bésyāél békéé’-áá bad ábe békid mbóy é metóm á nló wéeé Yesue ábel nén békéé mó, boj bénkénkudté ké nhóg. ⁵⁶ Ekud é bad émbid mó mbóy é metóm á yäl, boj békéé’-nsel nhóg. ⁵⁷ Héé donje á bad békéé’-áá, boj békid mó mbóy é metóm bán, ⁵⁸ “Sénwog néé áhóbé aá, ‘Mëbootéd enén Ndáb-e-Dyöb eché baányoŋ bélóó, nlónj empée, átinté e e’pun é’láán eché békéé’-nsel nhóg.’” ⁵⁹ Boj ké nê, échab mbóy é metóm énkémbáá nsel nhóg. ⁶⁰ Dóo prise ambáámbáa átyéé’-áá átinté e bad bé káánsel, boj ásedteé Yesue aáken, “Weewoo’-é dyamdyam ahób tângene dyam ádë ábén bad békéé’-nsel nhóg.” ⁶¹ Boj Yesue andyéé mó ngén, enkénkobéé dyamdyam. Dóo ene prise ambáámbáa ásedteé mó ámpé aá, “We-éé edé Ane-awé-Béwógté, Mwǎn awé Dyöb áde bad békéé’-nsel nhóg.” ⁶² Héé Yesue ákwentanné aá, “Mee ndé, nyéenýin-né ngáne Mwǎn-a-Moonyon ádyéé’-á ekáá émbáá é Dyöb a Ngum. Nyéenýin-né néé áhúe’-é á mbag-té ámin.” ⁶³ Héé prise ambáámbáa ányábé mbóté álúmed nén aá mólií, boj áhóbé aá, “Mbón éhéé émpée déhedeé?” ⁶⁴ Nyéwogé néé ásyáa’-é Dyöb. Cheé nyéhóbé á yäl eché?” Héé bő moosyáél békéé’-nsel nhóg.” ⁶⁵ Donje á bad békéé’-nsel nhóg.”

á yǎl, békūtān mó mǐd, bébomé mó, bélāngē-'e mó bán, “Láá-'e sé mod awě abomé we.” Dóo bembalede bétédé mó, boŋ bébootéd-te mó abomted.

Petro abáá Yesue á yǎl

(Mat 26.69-75; Luk 22.56-62; Jon 18.15-18, 25-27)

⁶⁶ Wéé Petro adyéé ásē nê á eyáde-tê, dóo mbalede nhóg a mmwaad awě prisé ambáámbáá ápédé. ⁶⁷ Annyín Petro awále muú. Dóo ásímné mó boŋ álāngē mó aá, “Wémpé wembé ne Yesue awě abídé á Nazaret.” ⁶⁸ Boŋ Petro ambáj échē ehób á yǎl, aá, “Meebíi'é, meesónjtán-naá chōm éche éhóbeé.” Amaá-aá ahób nê abíd-te á mmwe. Ene póndé chén nchóm-a-kúb antój. * ⁶⁹ Dóo ane mbalede ányiné mó ámpé boŋ ábootéd bad ábe békédé benben aláa aá, “Anén mod adé nhóg awě mómpé ahídé áá Yesue.” ⁷⁰ Boŋ Petro ambáj á yǎl ámpé. Éebemeé áte ámpé dóo bad ábe béntyéem áhed bélāngéé Petro bán, “Mbále chó edé. Edé nhóg awě ahídé áá Yesue, áyāle ebídé á Galilia.” ⁷¹ Boŋ Petro ambootéd yǎl ebómán abe ámwág-ke melé aá, “Meebíi'é anén mod awě nyétúbeé dín nê.” ⁷² Melemlem mé póndé nchóm-a-kúb antój ngen échē élonténé ébe. Héé Petro ákámténé chōm éche Yesue ánlāá'é mó aá, “Nchóm-a-kúb adéhób aá mótoó’ ngen ébe wébāj me á yǎl ngen éláán.” Héé Petro ábánlé awé, ábooted-te achii.

15

Payledé akáádté Yesue

(Mat 27.1-2, 11-14; Luk 23.1-5; Jon 18.28-38)

¹ Bín é'sáŋgé-'aá sáŋgén, beprise bémbaráá, bad bémbaráá bé Israel, bemeléede bé mbéndé ne bad bé káánsel embáá e bad bé Israel békób mbom. Bénhäj Yesue, békág-ke mó á mekáá wéé Payledé. ² Héé Payledé ásedteé mó aáken, “We-éé edé kâj e bad bé Israel-é?” Yesue ankwentén mó aá, “Ngáne éhóbe.” ³ Beprise bémbaráá bémbaráá mó ekud é mekan á yǎl. ⁴ Héé Payledé ásedteé mó ámpé aá, “Weewoo'é dyamdyam áhób-é? Mmón wóge' ekud é mekan échē békóbeé we á yǎl.” ⁵ Boŋ Yesue enkéhóbpé dyamdyam. Nê dénkōmēd Payledé yǎl áte.

Bán Yesue atéŋgéné awé

(Mat 27.15-26; Luk 23.13-25; Jon 18.39-19.16)

⁶ Béob-poó, émbé nén bán á Ngande e Nnyíme-ámín, Payledé ammentén mod a mbwog nhóg abídé á mbwog. Ane mod abágé'áá mod ké ahéé awě bad bénhedénné mó. ⁷ Ene póndé mod nhóg ambé á mbwog awě békágé'áá bán Barabase. Abédé ne bad ábe béntyéemén nkamlen í Roma. ⁸ Dóo ndun e mod épédé wéé Payledé, boŋ bélāngē mó bán ábel ngáne áménténé bó abele. ⁹ Héé ásedteé bó aáken, “Nyéhede' bán, móbídted nyé kâj e bad bé Israel-é?” ¹⁰ Abíi áde ámbíi'é aá kónjí edé beprise bémbaráá áte á yǎl wéé Yesue, dóo dénkâj boŋ áséded bó nê. ¹¹ Boŋ beprise bémbaráá békóné'áá ábê bad bán béláa Payledé bán ábídted bó dásō Barabase. ¹² Payledé anséded bó ámpé aá, “Chán-nō nyéhedeé bán móbíl ne mod awě nyéchageé bán kâj e bad bé Israel-é?” ¹³ Dóo bélébpeé e'saad bán, “Bomé mó á awög.” ¹⁴ Héé Payledé ásedteé bó aáken, “Áyāle chán? Ebébtéd éhéé ábélé?” Boŋ bennabé abón bán, “Bomé mó á awög.” ¹⁵ Né-oó, ngáne Payledé áhédé'áá aá mókóded ábê bad mewémten, ambídted bó Barabase. Ambé kunze aá, sénze ébom Yesue, boŋ béké békome- 'e mó á awög.

Sénze éwélé Yesue

(Mat 27.27-31; Jon 19.2-3)

¹⁶ Sénze énted Yesue, békéen mó á eyáde é nkamlené, bélád-te baáb ábíníí áte áhed. ¹⁷ Bénwāad mó mengombe míme méyage' míme méwagné mengombe mé kâj, bélónj-'e ekóté é mechō, béké mó á nló. ¹⁸ Dóo békóotédé mó awel, bélenté mó bán, “A-kâj e bad bé Israel, edúbé ébê ne we!” ¹⁹ Békóbmé'áá mó ntónj á nló, bésobtad mó meléed á yǎl, békóbmé'é mó mebóbónj áwé mó. ²⁰ Áde bémáá mó awel, bénhüd mó mímmé mengombe

* 14:68 Dongé á kálag dé'só déewoo'é Ene póndé chén nchóm-a-kúb antój.

á yǎl, bétimēd mó éche mbóté chén á yǎl. Néé bémádé nê, bénkeén mó âké dêbome mó á awəg.

Bébommé Yesue á awəg

(Mat 27.32-44; Luk 23.26-43; Jón 19.17-27)

²¹ Áde békagké nê, dōo békommé mod awé ambíd á dyad á Sirine. Dín démbē mó bán Simōne. Simōne abédée sáá awé Alesandaa bó Refuse. Simōne atómé'áá âsól á dyad-tê. Dōo békobé mó boj bényägtē mó bán ápêm awəg áde Yesue. ²² Dōo běpédé hōm áde běchágé'áá bán, Golgota, awé adé néen bán, "Hōm dé Ebónjél é Nló." ²³ Áhed běmbē Yesue mím míme béládténé ne bwel ábe běchágée bán mía* bán ámwé, boj enkénkwenténné amwé. ²⁴ Běmbomé Yesue á awəg. Běnsid mbambú âkab éche mbóté. ²⁵ Mbwembwe á ngéj abog dōo békommé mó á awəg. ²⁶ Chōm éche běntenlé á awəg áwe nló mîn âlumed nzɔm eché békommédé mó á awəg émbē néen bán, "Kéj e bad bě Israel." ²⁷ Běmbomé-'e bechib běbe bómpē á awəg, nhog á ped e ekáá émbáá eche Yesue, anínií-'e á ped e ekáá é emwed.†

²⁸ Bad ábe bétomé'áá nzii běnben ne áhed békommé'áá nló, běbwemmé-'e mó nzyéj bán, "Ah! Wenhób weé móðbōotéd Ndáb-e-Dyōb, weé móloj- 'e chō ámpē átinté e e'pun é'láán. ²⁹ Sory-ō echoj yǎl bɔəb, ésud ásē á awəg." ³⁰ Melemlem nê dōo beprise běmbáá ne bemeléede bě mbéndé běwélé'áá mó. Běn ne běn běhóbé'áá bán, "Achōjte'áá bad, bɔəb ehéheléé eche yǎl awōñgen. ³¹ Mó awé ahóbé aá móo módē Ane-awé-Bewógté, aá móo módē-'e kēj e bad bě Israel ásud-tóó ásē á awəg hē bɔəb, dényin ábel dédúbe." Ábē bechib ábe běmboméé á awəg nchoo ne Yesue bómpē bésyáá'áá mó.

Kwéed eche Yesue

(Mat 27.45-56; Luk 23.44-49; Jón 19.28-30)

³² Áde kēd épédé, ehíntén ênkwě hōm ásyāel, kéáj ne á ngáj éláán. ³³ Áde ngéj éláán épédé, Yesue anlélé esaád aá, "Elí, Elí, lámá sábátani." Nén adé néen bán, "A-Dyōb ádêm, a-Dyōb ádêm, cheé ékáá boj étedté me?" ³⁴ Néé donge á bad ábe běmbē běnben běwogé nê, běnhób bán, "Nyéwóge", achénle Elaijaa aá áhye áwōñgen mó." ³⁵ Héé mod nhog ányägté boj átédé kuchá, átɔdte' á ebéntéed é mím-tê, ásɔmē' á ntónj boj áhág mó á nsel aá ámwé. Anhób aá, "Nyémwe dényin nzé Elaijaa áhye mó asuded á awəg." ³⁶ Héé Yesue álébpé esaád boj ámīē-'e nlém.

³⁷ Ene póndé chén abad áde děnkăb Ndáb é Dyōb áte, děnsalé áte e'ped é'be bootya ámīn kéáj ápē-'e ásē. ³⁸ Ádě mod ambáá a sánze awé antyéém Yesue á'sō-te ânōn mó ányíné ngáne Yesue áwéde,‡ anhób aá, "Ne mbále, anén mod abédée Mwän a Dyōb."

³⁹ Bebaád behog bómpē běmbē nchabnede běnōne' mekan mésyāel míme mébenlad. Átinté e ábē bebaád, Maria Magdalene, Salome ne Maria awé achyáá Jemse asad bó Joseb, běmbē áhed. ⁴⁰ Ábén bebaád běhídé'áá Yesue áde ámbēē á Galilia, běwōñgān-ne mó. Ekud é bebaád émpēe éche bóbō běmpē á Jerusalém chómpē êmpē áhed.

Nlíme míme Yesue

(Mat 27.57-61; Luk 23.50-56; Jón 19.38-42)

⁴¹ Mod nhog abédé awé běchágé'áá bán Josebe. Ambíd á dyad á Arimatia. Anén mod abédée mod e edubé a káánsel embáá e bad bě Israel. Mómpē asiné'áá póndé eché nkamlen í Dyōb mépeé. Ngáne émbēē mbwe mé mbojnsén (nédé áde mbwe-mé-nkóme-áte nlyágé néé chǎn), héé ákáá nlém, boj ápag wéé Payledé běnben ne ngukél, álāngé mó aá ábe mó ndim míme Yesue. ⁴² Áde Payledé áwogé bán Yesue amaá awé, yǎl enkóm mó áte. Héé álómé ane mod a mbáá a sánze achág boj ásédté mó ké Yesue amaá awé. ⁴³ Áde ene sánze álāngé mó aá Yesue awéde, dōo ákwénténé aá Josebe átēd míme ndím.

* 15:23 Míá: měbédéé bwel ábě bad běbnládtáá ásuded mewε. † 15:27 Donge ákálag dě'só ábádē nchoo 28: Ádě néen ábénlédé, e'yale ábě é'ténlédé á kálag é Dyōb běnlōn. Éténlédé néen bán, 'Běntónj mómpē á nchoo mé bebel bě mbéb.' ‡ 15:39 Áwéde: Donge á kálag dě'só áwóó álébpé esaád, awé-'e.

⁴⁶ Josebe anchán mbóm. Antéd Yesue ndim, ákāān mó ene mbóm, alímé-'e mó á sojté eché bépwogé aláá áte. Ámbid ene, antínéd aláá á mbáá ákólen nsəl ní soj. ⁴⁷ Maria Magdalene ne Maria awé anchyáá Josee bénóné'áá wéé bélímméé Yesue.

16

Yesue apuúdē

(Mat 28.1-8; Luk 24.1-12; Jón 20.1-10)

¹ Ámbid e mbwe-mé-nkóme-áte Maria Magdalene, Maria awé achyáá Jemse ne Salome, bêncħan dyg dé elod é bwâm áke dé awogéndim ríme Yesue. ² Mbwembwe mé epun é'so é Sôndé áde enyen étubéé dôo bekíí á soj. ³ Áde békagké, dôo bésedteé nhógo ne aninií bânen, "Nzéé áhûd syâne aláá á nsəl ní soj?" ⁴ Dôo bésadé dîd, boj bényné bân bémáá ádē aláá ahúd. Aláá áded dînkâl bwâmbwam. ⁵ Héé bésolé á soj-tê, boj bényné kódemod edyeé á nkag á ped e ekáá émbáá. Anhé megombe ríme mépûbe'. Nén dînkobé bô mbwog bwâmbwam. ⁶ Héé ene kódemod élângéé bô aá, "Nyéebáá", mbíí mée nyéhede' Yesue, mod a Nazaret awé bêmboméé á awog. Apuúdē, eesaá hén. Nyéñone wéé bennnaádté mó. ⁷ Nyékag-kóo bôb nyélâa ábê bembap  , tainge Petro, bân Yesue apuúdē, 'Akag-ke á'so á Galilia. Áwed-taá nyényinné mó ngâne ánlâa'é nyé.' ⁸ Héé bêbótédé anəj ne menyáké ríme bényné. Bémbid á soj-tê bêbootéd-te anyaged. Béelângé-áa modmod dyamdyam áy  le mbwog ménkob bô.

Nyaa p  g ech  

Kâlag e Makjse ésogé*

16.9-20

Yesue alúmté Maria Magdalene y  l

(Mat 28.9-10; Jón 20.11-18)

⁹ Áde Yesue ámáá apuu, ep  g é mbwembwe é epun é'so é Sôndé, Maria Magdalene móo ánséb  y  l alúmed. Anén mmwa  d móo Yesue ámbidédté e'd  ad  d  yé b  mb   saámbé áte. ¹⁰ Héé ane mmwa  d ákíí boj álâng   bad ábe b  ob   Yesue b  b  g  'áá. Antán néé b  chye'   kw  ed eche Yesue. ¹¹ Boj áde b  w  g   bân Yesue adé á alongé, bân ane mmwa  d anyin  -  e mó, b  nk  nd  b  é.

Yesue alúmté áb   bad b  be y  l

(Luk 24.13-35)

¹² Ámbid e p  ndé Yesue anl  m  d y  l w  e áb   bad b  mp  e b  be áde b  b  d  e á dyad-t  . Boj en  n ngen anl  m  d y  l nyaa émp  e. ¹³ Héé áb   bad b  t  m   ámbid, b  ke b  láá ba  b   áb  n  i  . Boj k   n  , ba  b   b  b  nk  nd  b  é.

*Yesue alúmté áb   bembap  e
dy  m ne nh  go n  l*

(Mat 28.16-20; Luk 24.36-49; Jón 20.19-23; Mb  l 1.6-8)

¹⁴ Ámbid e p  ndé Yesue anl  m  d y  l w  e áb   bembap  e dy  m-ne-nh  go áde b  dy  gk   ndy  ed. B  nk  nd  b  é bad ábe b  nh  b bân b  nyn  né mó áde ámáá apuu. N  -  o, ank  n   b   áte a   b  ew  o'   ad  be, a   b  l  l  -  e nl  m á ab  m. ¹⁵ Anl  á b   a  , "Ny  kag nk  ys  é áte n  sy    l, ny  kanle bad b  sy    l nk  la  j m   bwâm. ¹⁶ K  nz  é aw   ad  ub  p   boj b  dus  n-ne mó ák  d e'cho  chon, boj k  nz  é aw   eed  ub  p   ák  d nk  gsen. ¹⁷ Bad ábe b  d  ub  p   b  w  n  g ng  ne ábel mam m   meny  k  : b  b  dt   bad e'd  ad  d  yé b   mb  b   áte á d  n ad  m; b  h  b  -  e meh  b   m  k    l  . ¹⁸ B  k  b  n ny   mek  á, e  ben  l   b   dyamdyam. K   b  mmw  -  e k   e'w  , áb   e'w   b  e  ben  l   b   dyamdyam. B  b  n bad b   nk  le mek  á á y  l, bad b   nk  le b   b  dy  -  e bwâm."

Yesue ap  mm  

(Luk 24.50-53; Mb  l 1.9-11)

* 16:8 D  nge á kâlag dé'só déew  o'   nchoo 9-20.

¹⁹ Áde Sáŋgú Yesue ámáá bó mímén mekan aláa, dōo Dyōb ábélé boŋ ápūmē ámīn. Andyee Dyōb á ekáá émbáá. ²⁰ Hée bembapee békídé, boŋ béké békale Eyale é Dyōb hōm téé. Sáŋgwéé ambé ne bó, ábē-’e bó ngíne ábel mekan mé menyáké, álúmed nén aá chōm éche békáléé edé mbále.

Nyaa empée eché kálag e Makəse ésogé†

^{16.9-10}

[(9) Hée ábê bebaád békíí, boŋ bélāŋgē Petro ne bad ábe békídé ne mó mekan mésyāāl míme bénlyāgténné bó, bésēlē mó esóŋ-esóŋ. (10) Née nê átómé, Yesue mwěn anlóm bad nkōŋsé áte rísyāāl ákal nkalaŋ mí bwâm. Mmē nkalaŋ mí bwâm míme rísaá, méehəylánné. Mmē nkalaŋ ndíi nkalaŋ tâŋgēne alongé áde débē á ngíndé ne á ngíndé.]

† ^{16:20} Donge á kálag dé’só ábádé ádén asog á kálag ámbid e nchoo 8.

Nkalaŋ mí bwâm míme Yesue ngáne

Lukasε
átélé

Ndibned ní kálag

Nkalaŋ mí bwâm míme Yesue ngáne Lukasε átélé nílûmte Yesue ngáne Nsoodε awé Dyōb dénhōbpē aá móšlômē bad bé Israel. Lukasε ahóbé aá Edəádəj é Dyōb chôw épwédé Yesue ápreeen nkalaŋ mí bwâm wéé betóótöké bé bad. Mmén nkalaŋ míbude ahób tângene e'boj bé nlém ábe Yesue álûmteé bad. Á mbooted menyinje ményinnédé áde ehájgé ébídé tângene epe éche Yesue, ményinnéd-te á asog áde Yesue ápúmmé ádyōb. Mekan míme Lukasε ákoo awéd áte médií: mekáne, Edəádəj éche Ésáá, mekan míme bebaád bélél átinté e nsón míme Yesue ne alagsen áde Dyōb álagsanné bad mbéb.

Lukasε abádé mekan áte wén míme médé áyel e mímén nkalaŋ mí bwâm děmpen (Njón e'ped é'be ne ntóób á nkabté).

Nkabté ní kálag

Ndibned 1-4

Echyáá éche Jøne, Ndusené ne éche Yesue 1.5-2.52

Nsón míme Jøne, Ndusené 3.1-20

Edusen ne mekägsen míme Yesue 3.21-4.13

Nsón míme Yesue á Galilia 4.14-9.50

Nsón míme Yesue áde áhídté á Galilia ápe á Jerusalém 9.51-19.27

E'pun bé asog ábe Yesue á Jerusalém ne benben ne á Jerusalém 19.28-21.38

Akáad áde békáádté Yesue ne eche kwéed 22-23

Mpuu míme Sáñgwéé, alúmed áde ánlumédté bad yäl ne míme mpume 24.1-53

¹ Á-Tiofilos, mod a edúbé, ekud é bad ékétéd póndé átel mekan ásē, míme mébénléde átinté e' syánē. ² Bétélé melemlem ngáne dénwōgké wéé bad ábe bennýinén mó díd se á mbooted, békálé-'e Eyale é Dyōb. ³ Né-ó, ntóó mímén mekan ahed áte se á mbooted, nnyiné-'e nén meé ébóó mémpé ítéd póndé, ítele wé mekan ásē ahog-ahogé. ⁴ Nén débél wééchem mbále tângene mekan míme émáá abíi.

Ángel epiídé Sakaria

⁵ Á póndé eche Herode ábédé kâj e Judeya, mod nhóg ambé bán Sakaria. Sakaria abédéeprise á nchoo míme Abiyaa. Mwaád ambé dín bán Elisabete. Mó ámpé abédée ngon e túmbé eche Arone. ⁶ Alojgé áde bó mwaád dëmbé bwâm á'sô é' Dyōb. Béhídé'áá mbéndé éche Sáñgwéé ésyáé. ⁷ Boj bénkénwáléé mwän ké nhóg áyale Elisabete abédé ekám. Bó bad bélén bémmdé-te achun.

⁸ Bóob-pjó, áde póndé e nsón e nchoo míme beprise míme Sakaria bó épédé áte, anké nsón míme prise abel á Ndáb-e-Dyōb epun ehog. ⁹ Mó-'áá bêmpwédté ásôl á Ndáb-e-Dyōb ábele Sáñgwéé, áhyáad e'twé, ngáne nsón míme prise nihédnádtáá. ¹⁰ Áde áhyâjtéé e'twé, ndun e mod embé ámbid e ewog, békânné'.

¹¹ Hê dôo ángel e Sáñgú épíidé mó, etyéém mó á ped e ekáá émbáá benben ne menyán mé e'twé. ¹² Anyín áde Sakaria ányiné ángel, yäl enkóm mó áte, mbwág ménkob-pe mó bwâmbwam. ¹³ Dôo ángel élângéé mó áá, "Á-Sakaria, weebáá". Dyōb áwogé wé mekáne. Né-ó, awðj mwaád Elisabete, áchyáá mwän. Échuu ane mwän dín weé Jøne.

¹⁴ Anén mwän áwogé wé menyinje. Ndun e mod ámpé éwog menyinje é echyáá échē.

¹⁵ Ébē né áyale ane mwän ábē ndale a mod á'sô é' Sáñgú. Eetângeneé néé ámwágké mím míme méwag, káa chom ké échë éwúú áte. Edəádəj éche Ésáá élôn mó áte se á ncháátén. ¹⁶ Átiméd bad bé Israel nlém ámbid wéé Sáñgwéé awé adé ádab Dyōb. ¹⁷ Ábē á'sô boj Sáñgwéé ápag. Áwöy-'e edəádəj ne ngíne melemlem ngáne nkal é'dəádəj Elaijaa a'bóod ánwöngé. Áchéd bad nlém á abum, ábel bad bóobé bän bétim ásē. Ábel

bad ábe bewúéné Dyöb nló áte, böhøjlen, bewój debyéé néé bad ábe bétyéeme á'sō é' Dyöb. Né'aá ábojsénné epé éche Sáñgwéé." ¹⁸ Sakaria ansedéd ángel aá, "Cheé élümte me nén bán ádén akan áde éhóbé débenléd? Mmén mmaá achun. Awém mwaád-te ámpé amaá kôd atóm." ¹⁹ Dóo ángel étimtanné mó aá, "Ndíi Gabriele, mésénze míme mébenle Dyöb nsón. Dyöb álomé me áwöñ, áláa we mímmen nlébtéd mí bwâam." ²⁰ Bøob-pøó, ngáne wéedübpé dyam áde nhóbé, wékwé ebóbé káéj ne póndé eché mam mésyääl míme nlángé we mélönné. Mekan mésyääl mébenléd-te á póndé eché métángéné abenled."

²¹ Ene póndé esyääl bad bésiné áá Sakaria ámbid ebwág, bényágé' chöm éche ekáé boj ápē abem á Ndáb-e-Dyöb-te nê. ²² Áde ábídé áwed, eéhele'aá dyamdyam ahób áwâb. Dóo böhémé nén bán, anyíné ndög á Ndáb-e-Dyöb. Mekáá móo álúmtánnáá bô, ésebán ahele dyam ahób.

²³ Póndé e nsón eché Sakaria emaá-'áte, asú á ndáb. ²⁴ Ámbid e póndé mwaád ambé nkog. Ankoó yál á ndáb-te á etún é ngon étáan. ²⁵ Anhób aá "Kéáj ne á asog Sáñgwéé abënlé me ádén. Awogé me ngol, ahúdé-'e me e'sôn áyäl átinté e ábêm bad."

Ángel epiídé Maria

²⁶⁻²⁷ Ádë dyém áde Elisabeté adíí ngon ntóób, Dyöb dénlóm ángel Gabriele á dyad á Nazaret, á aloj á Galilia, wéé ngondére póg bán Maria. Maria enkembíí'é mwenchóm. Mod ankií mó awe böhágé'áá bán Josebe. Josebe ambid á túmbé eché Kéj Dabide. ²⁸ Áde ángel étané Maria enhób aá, "Á-Maria, nsan ímbé ne we! Edíi mmwaád awé akudé mendé ne Dyöb. Titéé Dyöbce adé ne we." ²⁹ Nén dëntagéd Maria á mewémten-tê bwâmbwam. Akðgláádtáá á nlém-tê ábfi chöm éche ene nyaa e melenten éhèle élümte'. ³⁰ Dóo ene ángel élângéé mó aá, "Á-Maria! Weebáá", nsimé ní Dyöb ídë ne we. ³¹ Ébíi weé, móðbë nkog. Wéchyáá mwän a mwenchóm. Échuu mó dñn weé Yesue. ³² Ane mwän ábë ndæle a mod. Béchág mó bán, Mwän a Dyöb á Ngum. Titéé Dyöbce mwën ábë mó atii dé nkamlen áde saá ambáá Dabide. ³³ Mó ákamlén abum á ndáb áde Jakobé á ngindé ne á ngindé. Nkamlen míme méewóngé asog." ³⁴ Héé Maria ásedteé ángel ne aáken, "Chán íhèle nchyáá mwän áde méebíí'é mwenchóm?" ³⁵ Ene ángel enkwentén mó aá, "Edædæj éche Ésáá épií we. Ngum e Dyöb éküdtén we. Né-ó, mwän awé asáá, awé wéchyáá'é, áchagnéd bán Mwän a Dyöb. ³⁶ Bíi weé, Elisabeté, mwányoñ a túmbé póg, mómpé adé nkog á e'chun-tê. Mó awé bénhóbépé bán adé ekom, adé dyém bøob ngon ntóób. ³⁷ Édé nê áyäle dyamdyam déesaá áde átómé Dyöb áte." ³⁸ Héé Maria áhóbéé aá, "Ndíi mbølede awe Sáñgwéé. Ébë ne me ngáne éhóbé." Dóo ene ángel étédté mó boj ekag.

Maria akií wéé Elisabeté

³⁹ Mmê mesú mën, Maria anlăd yál ne mehél mésyääl, ákë á dyad á Juda ahób áde ádë á e'kone-tê. ⁴⁰ Áde ápédé áwed, ansol á ndáb eché Sakaria, áléléd Elisabeté. ⁴¹ Awog áde Elisabeté áwogé Maria míme melenten, mwän anhóbnéd Elisabeté á abum-tê. Edædæj éche Ésáá émpií mó. ⁴² Dó-'áá álângéé Maria ne esaád é ngíne nén aá, "Nnam ímbé ne we átinté bebaád bésyääl. Nnam ímbé ne mwän awe wéchyáá'é. ⁴³ Chán ébénléde éche mémé íkúdé échén edubé? Chán nyaá awe Sáñgwéé áhèle áhyé áwém-é? ⁴⁴ Awog áde íwogé mímónj melenten, mwän ahóbté me yál á abum-tê ne menyinje. ⁴⁵ Dyöb ánámté we áyäle edúbpé nén weé, dyam áde Sáñgwéé álângé we débenléd."

Ngøse eché Maria

⁴⁶ Héé Maria áhóbéé aá, "Nkémte Sáñgwéé ne nlém mímmen ísyääl,
⁴⁷ edædæj échém ámpé éwógné Dyöb menyinje. Mó adé awém mod a e'soosoj.
⁴⁸ Áyäle achemé me awé ndé awe mwän mbølede ngén. Bootya bøob, ákë á'sō, nyongel e bad téé éhób bán, ídë mmwaád awé Dyöb ánámté.
⁴⁹ Dyöb á Ngum abënlé me ndæle a akan. Mó adé ane awé asáá.
⁵⁰ Ngol eché ébë nyongel ne nyongel e bad téé, ámin e kenzéé awé abage mó edubé.
⁵¹ Abelé ndæle a akan ne éche ekáá chén. Apuúdtédé bad ábe bédé kúmbe mewémten áte.

- ⁵² Ahúdé benkamlené áwāb metii mé nkamlen, boj achágté bad ábe bésúdté yĕl.
⁵³ Akódté bad ábe bétagne nzaa ne kəse é bwĕm, boj anané bad ábe békudé awój aá bésūe' ne mekáá mé ngén.
⁵⁴⁻⁵⁵ Akámténé áloned akag áde ámbeé ábēd betaa, bootya Abrahame ne rímē mbyaa ísyāel káej ne á ngíndé. Né-óó, awónjéné ábē bembalede, bad bé Israel.”
⁵⁶ Ámbid e nê, Maria andyéén Elisabete ngon éláán, boj ásūe' ámbid.

Echyáá éche Jøne Ndusene

- ⁵⁷ Ámbid e pónde, e'we é' mwān bénkōb Elisabete. Anchyáá mwān a mwenchóm.
⁵⁸ Túmbé echē ne bad ábe bóbōo bédyéé' áa abwōg ahóg, bénsojtén nén bán Sángwéé ábagé mó sáŋkalaa a nsimé, bómpē bewōg menyinge. ⁵⁹ Mbwe mé asóy-á-yĕl (ámbid e e'pun waam) áde běhyédé mwān ayag, běhdé' áa mó dñi áde sáá achuu bán Sakaria.
⁶⁰ Dóo nyaá áhóbeé aá, “Aáy! Dñi débēe mó bán Jøne.” ⁶¹ Héé bětintanné mó bán, “Modmod eesaá áwoj túmbé-te awé awóó adé dñi.” ⁶² Né-óó běnhægtén Sakaria á mekáá mîn áhed áte ngáne ádáá mwān dñi achuu. ⁶³ Héé áhægténé ne mekáá aá běpiined mó abámbé. Antél áhed aá, “Dñi ádīi mó bán Jøne.” Anyín áde bad bényiné nê, menyáké mékōb bó. ⁶⁴ Ábwōg-ábwōg, ehób énsalé mó á nsəl, ábootéd-te dyam ahób ámpē, ákemtē-'e Dyōb. ⁶⁵ Nén dénkōbēd bad bésyāel ábe békédé áhed mbwōg, békæené nkalaj hōm ásyāel á myad mé e'kone á aloj á Judeya. ⁶⁶ Mod téé awé anwōg adén akan, ankoó dó á nlém-tê. Bésedtē bánken, “Ebál é mod éhéé anén mwān ábēe-yeé?” Bésedtē' áa nê áyæle bembii nén bán Dyōb adé ne ane mwān.

Ngæse echē Sakaria

- ⁶⁷ Baoob-poó, Edéadəj éche Ésáá émpíí séé mwān, Sakaria. Héé ábóótédé mam ahóbted, ahóbbé aá,
⁶⁸ “Mekenag mébē ne Sángwéé, Dyōb á bad bé Israel.
Béken Dyōb áyæle ahyedé ábē bad anyen ásē, akōdté-'e bó.
⁶⁹ Akwōgté ngum a mod á abum á ndáb áde awé mbalede Dabide, móchoód syánē.
⁷⁰ Se' boód ansón bekal bědádəj, alóm bó aá běhób bán,
⁷¹ Móōson syánē á mekáá mé bad bě ekoyí ábe syánē, ne bad ábe békóó syánē.
⁷² Né dóo Dyōb álumteé ngol eche ánhii' é ábēd betaa akag. Né-'aá ákámténé rímē melš,
⁷³ nédē melš rímē ámmwēé ne awēd sáá ambáá Abrahame.
⁷⁴ Anhób aá móōmadté syánē asorj á mekáá mé bad bě ekoyí ábe syánē,
boj déhel mó abele ésebán debáa'.
⁷⁵ Deébenlé mó pónde eched ne nlém rímē nsaá ne mbeltéd rímē ndé ngáne Dyōb áhedeé,
á alongé adēd ásyāel.
⁷⁶ We-óó, a-mwān, běchág we bán nkal é'dádəj awé Dyōb á Ngum.
We-'aá wěsēbē Sángwéé á'sō, ábojsen mó nzii echē ábwéé áte.
⁷⁷ Wěbél ábē bad běbíí nén bán, Dyōb áchójté bó áyæle álágséné bó rímab mbéb.
⁷⁸ Nén débenléd áyæle ngol e Dyōb ne ábē e'boj bě nlém.
Ene ngol chó-'aá ékəj e'nyinén bě ekide ábē é'bídé ámīn é'piinéd syánē e'soosoj.
⁷⁹ Né-óó bad ábe bédé á ehíntén-tê, ne á nsəl í sonj, békūd e'nyinén bě e'kide.
Syánē-'e deékūd debyéé áde álumte syánē nzii echē epēeñe alongé dé nsaj.”
⁸⁰ Jøne ankwōg, edéadəj é Dyōb ébē-'e mó ngíne. Andyé é ehyángé káej ne á pónde
eche ábóótdédé eyale é Dyōb akal á ntálé wée bad bě Israel.

Yesue achyáádté á Betelhem

(Mat 1.18-25)

- ¹ Mmē mesú-óó Agostuse, Kaisεe a Roma antóméd mbéndé aá, moosyāel awé adé ásē e rímē nkamlen, áke átelen dñi. ² Nén démbē tóngé e bad e'só. Á pónde eched Kirinuse mó ambé nló mé aloj á Siria. ³ Mod téé anké áwē dyad ábel boj bétel mó dñi ásē.

⁴ Né-óó Josebē mómpē anhidé á dyad á Nazaret á Galilia, achágé á Betelhēm, dyad áde Kāj Dabidē á Judeya, áyāle ambíd á mbyaa míme Dabidē. ⁵ Ankē nê âbel bétônj bō Maria, ngondéré eche ânkií'é. Maria mó-'e ambé nkog. ⁶ Á Betelhēm wê dó-'aá achád ákóbé Maria. ⁷ Anchýáá mwān a mwenchóm awé átúbné abum. Ankaán mó e'ped bé mebad, ánāād-te mó á ebwōg éche bédítseé e'lém áte, ngáne etál éebédeé á ndáb e beken.

Ángel épíídé benon bé mbód

⁸ Áped echēd, benon bé mbód bénóné'áá échāb echoj é' mbód á hōm dé medyé nkuu. ⁹ Ángel e Sángú empií bō téléd, ehúmé é Sángú élərjnéd bō. Mbwōg ménkōb bō. ¹⁰ Héé ángel élāñgeé bō aá, "Nyéebáá", mpiínédé nyé kāse e nkalaŋ echē eworkēd bad bésyāéł menyinje bwāmbwam. ¹¹ Nyébíi bán, epun é'chii, Nsodee awēn achyáádté á dyad áde Kāj Dabidē. Mó adé Ane awé Dyōb Áwógté. Mó adé Sángwéé. ¹² E'chemléd ábe míbagéé nyé é'díi bán, nyéetān mwān awe békájné e'ped bé mebad ngáne ánáñgé á ebwōg éche bédítseé e'lém áte."

¹³ Melemlem mé póndé echoj é ángel émbid enínií ángel á nkəg téléd, ékené Dyōb bán, ¹⁴ "Ehúmé ébē ne Dyōb áde ádē se ámīn, nsan-'e írbē ne baányon ábe ábágé nsimé á nkōjnsé!"

¹⁵ Ámbid e nê, échē ángel énsū ámīn. Héé benon bé mbód bélāñgeé nhóg ne anínií bán, "Syáá dékag á Betelhēm, déke dényin ádē akan áde Dyōb á Ngum álúmté syánē áte aá ábénléde."

¹⁶ Dó-'aá békíí á mehélé-te, boj bédibté Maria bō Joseb ne nkéál mí mwān née ínáñgé á ebwōg éche bédítseé e'lém áte. ¹⁷ Bémáá-'aá anyín nê, dóo bēbóótédé nkalaŋ akal ngáne ángel énlāá'é bō tāñgene ane mwān. ¹⁸ Bad bésyāéł ábe bénwōg nê, menyáké ménkōb bō. ¹⁹ Maria ankoó mímén mam mésyāéł á nlém-tê, ádolé mó áte. ²⁰ Héé benon bé mbód bétímé ámbid, békemtē Dyōb, békéné-'e mó áyāle mam mésyāéł míme bēwōgé, boj bényinén-ne dīd nēngáne bénlāá'é bō.

²¹ Ámbid e e'pun waam, mbwe míme býageé mwān, bēnchuú mó dīn bán Yesue. Ádē dīo ángel êmmadté mó achag boj nyaá ábē dyém.

Bépééné Yesue á Ndáb-e-Dyōb

²² Bōob-poá, mbéndé e Mosee ehedáá bán, ámbid e echyáá bēbē mendé áwobe nyé mwān bō sée mwān. Áde bémádē nê, Maria bō Joseb bēnkéén mwān á Jerusalēm âlúmed mó á'sō é' Sángú. ²³ Bēnkē nê nchoo ne ngáne éténléde á mbéndé e Sángú bán, Mwān a mwenchóm téé awé bétúbné abum, bēbē mó á mekáá mé Dyōb. ²⁴ Bēnkē nê káájne ábē mendé ne âloned mbéndé e Sángú echē ehóbé bán mod ábe bē élāá bēbē káa mbəñgé ésad ébē.

²⁵ Á Jerusalēm wê, mod ambé bán Simione. Ane mod anwōj abé áde atéñgéné á'sō é' Dyōb, ákonjé-'e mbéndé é Dyōb. Edéadəj éche Ésáá émbē ne mó. Asiné'áá póndé echē Dyōb désongé alongé á bad bē Israel. ²⁶ Edéadəj éche Ésáá êmmäd-te mó alúmed néen aá, éewáá ésebán ányíné Ane awé Sángwéé Áwógté. ²⁷ Edéadəj éche Ésáá êmbel Simione ankē á Ndáb-e-Dyōb. Dóo Maria ne Joseb békééné awab mwān Yesue áhed, ngáne mbéndé éhédé'áá. ²⁸ Simione ankoobén bō mwān, abwáá mó, boj ákēmtē Dyōb nén aá,

²⁹ "A-Sángú, ngáne élonté ádōj akag, téd-tō me, nkag ne nsan."

³⁰⁻³¹ Áyāle mīd mímēn nýyíné awōj mod a e'soósor awe ébónjsné weé moosyāéł ányín.

³² Ábē e'nyínén bē ekide ábe bēbēl bad ábe béesé bad bē Israel ábíi we, ápseén-ne edúubé weé ábōj bad bē Israel."

³³ Josebē ne Maria bémbe menyáké áwōg mam míme bēhóbé tāñgene awab mwān.

³⁴ Héé Simione ánámté bō, boj álāñgē Maria aá, "Nōnē", anén mwān awé nyéyíné nén, Dyōb dóo álómé mó. Ábēl bad behög békud ebébtéd, ábíníí-'e békud e'soósor á aloj á Israel. Ábē nēngáne e'chemléd é' Dyōb, boj ekud é bad étii mó ámīn, bétāñgān mó. ³⁵ Á póndé echēd mod téé míme mbeltéd mēn mēbīdēd míme mewēmtēn áwed. Héé ndutul ésonjé we á nlém née nkawaté."

³⁶⁻³⁷ Nkal é'déádəŋ a mmwaád nhóg abédé, dín démbē mó bán Anaa, mwān awe Panuelə awé abíde á túmbé e Asəe. Anaa anchǔn bwâmbwam. Bó nchóm bêndyéé mwé saámbé á e'wóŋgé, boj ályé̄gē mó akúd kéáŋ ne á móom mé mwé waam ne mwé nniin. Eésyəŋge' áá á Ndáb-e-Dyōb. Akánné' áá nkuu ne mûte, ádidé'-e yǎl nzaa á mekáne-tê. ³⁸ Áde Maria bó Joseb bépééné Yesue á Ndáb-e-Dyōb p̄eənén, Anaa ambé áhed. Héé ábóótédé Dyōb akən, ákanlé'-e bad nkalaŋ tâŋgēne ane mwān. Ábē bad bébédéé bad ábe bésiné' áá póndé eche Dyōb déwəbéé dyad á Jerusalem. Anláá bó nyaa e mod eché ane mwān ábē̄.

Josebe bó Maria bétimnē
mwān ámbid á Nazaret

³⁹ Áde Maria bó Joseb bémádné mam mésyā̄l ngáne mbéndé e Sáŋgú éhédé' áá, bêntím áwāb dyad á Nazaret á aloj á Galilia. ⁴⁰ Ene póndé mwān mó'-e ákwogé', áwū̄e' áte, debyéé ákwogé mó, nsimé n̄ Dyōb mó'-e n̄hīdē mó.

Yesue akií á Ndáb-e-Dyōb

⁴¹ Boōb-poō, émbē bán, mwé téé Yesue sáá bó nyaŋ békágé' áá á Jerusalem áyāle Ngande e Nnyíme-ámīn. ⁴² Áde Yesue ápédé dyōm á mwé ne ímbē, bōbō̄ bēnké á ngande ngáne êmménténné abé. ⁴³ Ngande emaá'-á boj nyaá bó sáŋ bésū̄e' á dyad. Yesue anlyā̄g ámbid á Jerusalem ésebán bēbíí. ⁴⁴ Mewémtēn mémbē bó nén bán, adé á echoj éche ésú̄e' áá. Boj áde békékeé bootya mbwembwe kéáŋ ne ngukél, dōo bēbóótédé mó ahed, bésédtē mó wéé bad bē túmbé ne bad ábe bōbō̄ bēbyééné. ⁴⁵ Anyín áde béenýíneé mó, bêntím ámbid á Jerusalem áhēd mó áwed.

⁴⁶ Âlôntēn e'pun é'láán dōo bétimé mó adibed á Ndáb-e-Dyōb. Andyéé átîntē e bemeléede, áwōglān bó, ásédté'-e bó mam. ⁴⁷ Mod téé awé anwó̄g mam míme Yesue áhóbé' áá, ambé menyáké áyāle nsôñtēn míme ánwō̄ngé ne nyaa eché ákwéntánnáá bó. ⁴⁸ Áde nyaá bó sáŋ bényíne mó, yǎl enkóm bó áte. Dōo nyaá ásédtē mó aá, "A-mwān, chán-nō̄ ébélé sé nén? Sé són̄ sêkómé we ahed, sétagé'-e áte." ⁴⁹ Boj Yesue ankwéntēn bó aá, "Cheé ékáá boj nyéhédé me? Nyéñkémbíí' é bán, ntáŋgéné abé á ndáb eché echem Sáŋ-ε?" ⁵⁰ Bénkênhenlē dyam áde áhóbé asôñtēn.

⁵¹ Ámbid e nē, dōo Yesue áhídé nyaá bó sáŋ, boj bōbō̄ bésū̄e' á Nazaret. Enkênwúénné bó nló áte. Nyaá'-e ankoó rímmén mekan mésyā̄l á nlém-tê. ⁵² Ngáne Yesue ákwogé' áá, debyéé dómpē ákwogé' áá mó. Nsimé n̄ Dyōb ne m̄ baányoŋ n̄hīdē mó.

3

Jōne, Ndusene aboŋsan nzii
(Mat 3:1-12; Mak 1:1-8; Jōn 1:19-28)

¹⁻² Á póndé eché nkamlene Tiberiosé, ákēbē̄ Kaisēe a Roma áyāle dyōm á mwé ne nítáan, Dyōb dénlōm Jōne mwān awe Sakaria ne nlébtéd á ehyángē wéé ábédé. Ene póndé'-e dōo Pontus Payledē mó'-e ábédé Nkamlene á Judeya, Hérōde ákamlán aloj á Galilia, mwānyan Filibe'-e ákamlán aloj á Ituria ne aloj á Trakoniti. Boj Lisania mó'-e akamlánnáá aloj á Abilene. Mmē mesú měn-naá Anase bó Kaifase bēbédé beprisē běmbáámbáa. ³ Jōne abwágé' áá mebwó̄g mésyā̄l míme méláŋnédé edib é Jodan. Ákag ákalé eyale é Dyōb nén aá, "Nyétede abel dé mbéb, nyékud edusen ábel boj Dyōb álagsen nyé mbéb." ⁴ Nén dénlōnēd chōm-éé éténlédé á kálag eché nkal é'déádəŋ Yesaya bán, "Eháŋgē ébídé á ehyángē bán, nyéboŋsen epē éche Sáŋgwéé.

Nyétíi eché nzii.

⁵ Nyélóned nhog té.

Nyésuded mbəəd ne ekone té.

Nyétíi mebwó̄g míme méhyómé.

Nyétaled mebwó̄g míme médé pwɔ̄gléd pwɔ̄gled.

⁶ Ábel boj moonyoŋ asyəál ányiŋ ngáne Dyōb ássoo' é alongé á bad."

⁷ Ndun e mod empē wéé Jøne békédé bán, ádusen bó. Mó-'e ásédté bó aáken, “Píí é nyé chén! Nzéé mímó alángé nyé aá nkáásé n̄ Dyōb n̄húé’ boj aléb-pe nyé aá nyékume abájgé? ⁸ Nyéchyáá e' pum ábe é'lümte bán nyétedté abel dé mbéb, tómaa áhób áwen nlém-tê bán, ‘nyéédé bän ábe Abrahame, nyéekudté nkógsen n̄ Dyōb.’ Boj n̄lää nyé néen meé, Dyōb áhèle ábənléd mímén meláá átímēd mó bän ábe Abrahame. ⁹ Bøob-poó, ehón émáá anaa á nkaj mí mel. Né-oo, bwel ké é'héé ábe békhyāá’ e' pum é' bwám, békwel bó, békewé-mé bó á muú-te.” ¹⁰ Hé dōo, bad bésedtéé mó bánken, “Chán-nō sébenlé bøob?” ¹¹ Jøne antimtén bó aá, “Mod awé awóó mbóté ébe, ábe póg wéé ane awé eewóó chömkhöm. Ane awé mó-'e awóó ndyééd, ákabe bad ábe békewóó.” ¹² Belad bé tááse ábe bómpe békhyé edusen akud békédé mó bán, “A-meléed, cheé sébenlé?” ¹³ Antimtén bó aá, “Nyéesajté tááse tómaa ngáne bétíidé.” ¹⁴ Nguse é sánze chó-'e énsedéd mó bánken, “Chán-náá sé, sébel chán?” Jøne ankwentén aá, “Nyéekobné bad mōné. Nyéebáné-'e bad mekan áyēl ngēn, boj nyébē menyinje ne chóm-éé nyékudeé néé nsábe.”

¹⁵ Bøob-poó, bad ábe békédé áhed, mímab mewémten mémbootéd acháge ne e'lyág bé nlém, békøglád á nlém-tê nzé édé bán Jøne mó adé Ane-awé-Béwógté. ¹⁶ Héé Jøne átimitanné bó moosyaál aá, “Ndusan nyé bøob ne mendib, boj mod ahús’ awé atómé me. Meékwognedéé áhune ké mímē nkaođ mé metámbé. Ádusén nyé ne Edəádəj éche Ésáá, ádusén-ne nyé ne muú. ¹⁷ Awánlé échē epeben á ekáá, ábel néen, ápeb míme menyán ámīn. Nzé amadé, álăd mbum é bwám áte, ákoo chó. Boj álăd e'pæá, ahyáád bó á ebonde é muú éche éedimé.”

¹⁸ Né-oo Jøne alébé’áá bad ne ekud é pólé émpēe, ákanlé-'e bó nkalaј mí bwám. ¹⁹ Jøne anhób káéjne wéé nkamlene Hérođe aá, abelé mbéb ngáne áwóó Hérodyasε, mwaád awé mwányaŋ, nchoo ne e'bébtéd bé mekan békewé ábe ámbenlé. ²⁰ Ábád-te áyēle mímē mbéb n̄syääl Hérođe anhē Jøne á mbwøg.

Bédúséné Yesue (Mat 3.13-17; Mak 1.9-11)

²¹ Bøob-poó, áde Jøne ámáá ekud é bad adusen, Yesue mó ámpē ampē aá ádusen mó. Áde ámáá mó adusen, ábwøg-ábwøg ankáné. Áde ákánnéé n̄ dōo ngob e dyōb énédnédé.

²² Hé-'áá Edəádəj éche Ésáá ébídé ngáne éləā, boj ésudé mó á nló mīn. Ehób chómpē émbid ádyōb néen, “Edíi awem mwān a nlém awé n̄dáá bwâmbwam. Ndé menyinje ne we.”

Abum á ndáb áde Yesue (Mat 1.1-17)

²³ Yesue ambé dyam móom mé mwé méláán boj ábootád míme nsón. Bad bényíné’áá mó néé mwān awé Josebe. Josebe ambé mwān awe Eliε. Eliε ambé ²⁴ mwān awe Matate. Matate ambé mwān awe Leviε. Leviε abédé mwān awe Meleye. Meleye ambé mwān awe Janne. Janne ambé mwān awe Josebe. ²⁵ Josebe abédé mwān awe Matatya. Matatya ambé mwān awe Amōse. Amōse abédé mwān awe Nahumε. Nahumε ambé mwān awe Esilye. Esilye ambé mwān awe Nagaya. ²⁶ Nagaya abédé mwān awe Maate. Maate ambé mwān awe Matatya. Matatya ambé mwān awe Simene. Simene ambé mwān awe Joseke. Joseke ambé mwān awe Jodaa. ²⁷ Jodaa abédé mwān awe Joanane. Joanane ambé mwān awe Resa. Resa ambé mwān awe Serubabelε. Serubabelε ambé mwān awe Salatyε. Salatyε ambé mwān awe Nerie. ²⁸ Nerie ambé mwān awe Mélki. Mélki ambé mwān awe Adie. Adie ambé mwān awe Kosame. Kosame ambé mwān awe Elamadame. Elamadame ambé mwān awe Ere. ²⁹ Ere ambé mwān awe Josua. Josua ambé mwān awe Elesaa. Elesaa ambé mwān awe Jorime. Jorime ambé mwān awe Matate. Matate ambé mwān awe Leviε. ³⁰ Leviε ambé mwān awe Simione. Simione ambé mwān awe Judaa. Judaa ambé mwān awe Josebe. Josebe ambé mwān awe Joname. Joname ambé mwān awe Elyakime. ³¹ Elyakime ambé mwān awe Meleya. Meleya ambé mwān awe Mena. Mena ambé mwān awe Matate. Matate ambé mwān awe Natane. Natane ambé mwān awe Dabide. Dabide ³² mwān awe Jesε. Jesε mwān awe Obede. Obede ambé mwān awe Boase. Boase ambé mwān awe Salmone. Salmone ambé mwān awe Nasone. Nasone ³³ ambé mwān awe Aminadabe. Aminadabe ambé mwān awe Ademinε. Ademinε ambé mwān awe Arenie. Arenie ambé

mwān awe Heserōne. Heserōne ambé mwān awe Peresε. Peresε ambé mwān awe Judaa. ³⁴ Judaa ambé mwān awe Jakobε. Jakobε ambé mwān awe Aisigε. Aisigε ambé mwān awe Abrahame. Abrahame ambé mwān awe Tera. Tera ambé mwān awe Naho. Naho ³⁵ ambé mwān awe Seruge. Seruge ambé mwān awe Rewε. Rewε ambé mwān awe Pelege. Pelege ambé mwān awe Ebε. Ebε ambé mwān awe Sela. Sela ³⁶ ambé mwān awe Kanane. Kanane ambé mwān awe Apasade. Apasade ambé mwān awe Semε. Semε ambé mwān awe Noa. Noa ambé mwān awe Lamekε. ³⁷ Lamekε ambé mwān awe Metusela. Metusela ambé mwān awe Henoke. Henoke ambé mwān awe Jarεde. Jarεde ambé mwān awe Mehalele. Mehalele ambé mwān awe Kenane. Kenane ³⁸ ambé mwān awe Enose. Enose ambé mwān awe Seta. Seta abédé mwān awe Adamε. Adamε-’e abédé mwān a Dyōb.

4

Satanε akəgē Yesue

(Mat 4.1-11; Mak 1.12-13)

¹ Bɔɔb-pɔɔ, áde Yesue abídé á edíb é Jodan, anlón ne Edəédəŋ éche Ésáá. Éntimén mó á ehyāŋge. ² Andyεé áwed móom mé e’pun ménii, Devəlε ákəgē mó. Mm̄e mesú mésyā̄l enkēndyáá chōmchōm. Ámbid e né-ɔó nzaa ewagáá mó. ³ Dóo Devəlε álāŋgeé mó aá, “Nzé wε-εé edé Mwān a Dyōb, kamlén ádén aláá wεé, átim ewele.” ⁴ Yesue antimtén mó aá, “Éténlédé á kálag e Dyōb nén bán, ‘Saké ndyéed chēmpen edide moonyoŋ á alongé.’”

⁵ Héé Devəlε ákééné mó á ekone mîn, álūmtē mó meloŋ mé nkōŋsé mésyā̄l áyāle mwā esón é póndé. ⁶ Dóo álāŋgeé mó aá, “Nənε”, bēbágé me nkamlen ámīn e ábén bwěm é’syā̄l. Nwóó-’e kunze ábe mod kē ahéé awe índáá abe. Mēbě wε mó. ⁷ Né-ɔó nzé ebagé me edúbē, né wée ewóó ábén bwěm é’syā̄l.” ⁸ Yesue antimtén mó aá “Éténlédé nén bán, ‘Ébwó̄gke’ Sáŋgwéé ádoŋ Dyōb mebóbóŋ, ébage-’e mó edúbē. Mwēnpren-naá étáŋgéné abele.’”

⁹ Héé Satane ákééné Yesue á Jerusaləm. Átyēēmān mó á nzoŋge e Ndáb-e-Dyōb mîn, boŋ álāŋgē mó aá, “Nzé wε-εé edé mwān a Dyōb, éheb á bwele-mîn hén, éhūn á ndəɔb.

¹⁰ Éténlédé á kálag e Dyōb nén bán,

‘Dyōb dékamlén éche ángel ásáb wε,’

¹¹ ‘épēm-me wε ámīn, ábel nén weébōmē ekuu á aláá.’”

¹² Yesue-’e antimtén mó aá, “Kálag e Dyōb ehōbe nén aá,

‘Weékāgē Sáŋgwéé, ádoŋ Dyōb áte.’”

¹³ Devəlε amaá-’aá mó akəg áte menzii mésyā̄l, boŋ áhidte’, áhāg mó mwā etál.

Yesue aboótédé nsón á Galilia

(Mat 4.12-17; Mak 1.14-15)

¹⁴ Yesue antím ámbid á Galilia. Edəédəŋ éche Ésáá émbē ne mó, dřn dō-’e ákanlád mó mbwó̄g áte ésyā̄l. ¹⁵ Ayágté’áá bad áwab ndáb é mekáne, moosyā̄l ákēmtē mó.

Bad bέ Nazaret békobεé Yesue

(Mat 13.53-58; Mak 6.1-6)

¹⁶ Áde ápédé á Nazaret wée ákwogé, ansól á ndáb e mekáne á Mbwe-mé-nkóme-áte, ngáne ámmēnténné abel. Dóo átyéémé ámīn, álāj̄ eped. ¹⁷ Bémbě mó nhíbe ní kálag é metelag m̄me nkal é’dəédəŋ Yesaya. Anhuné chó áte, ákūnē eped éche éhōbe nén bán,

¹⁸ “Edəédəŋ éche Sáŋgwéé édé ne me,

áyāle Dyōb ápwéédé me aá, m̄bel eháŋgē é nkalaŋ mí bwām wée betóótōkē bέ bad.

Alómné me eháŋgē aá, bad ábe bédé á mehangé, bēhíde á mehangé,

aá, bad ábe békwdé ndím, bénýinēn

aá, bad ábē békude metuné á mekáá mé baáb, nhúd bó á metuné-te

¹⁹ áá m̄bel-le eháŋgē nén meé póndé epedé echě Dyōb álūmtéé bad ngøl.”

²⁰ Amaá-aá aláŋ, ádib kálag áte, ábag chó ámbíd wéé mod awě anone ndáb e mekáne. Anké ádyēē ásē, mǐd mésyāél ménoné mó. ²¹ Dóo álāŋgeé bó aá, “Échén eped éche nyewogé, élóné epun é’chi.”

²² Moosyāél ankéméd mó, menyáké mékób bó áyāle kəse e pôle echē ebídáá mó á nsəl, bésedtē bánken, “Kíné saá mwǎn awě Josebe mó nén-e?” ²³ Yesue ambád bó aláa aá, “Mbíí mēé, nyéekalé me ngan bán, ‘Á mod a bwel, choód yēl.’ Nyéelaā-’e me bán, mekan míme nyewogé bán mbelé á dyad á Kapenahum bán, mbel-láa mó áwēm dyad-tē hén.” ²⁴ “Nláa nyé nén mēé, nkal é’déadəŋ eewoo’é edúbē áwē dyad. ²⁵ Nyébíi-oo nén bán, á póndé eche Elajaa, mbúú eechódéé áyāle mwě níláán ne eped. Nê dēmbél sáŋkalaa a nzaa ambé aloj áte ásyāél. Bekúd híin bémbē á mbwág e Israel hén ene póndé. ²⁶ Boŋ Dyōb dénkēnlómmé Elajaa áwāb. Anlóm mó dásō á aloj á Sidən á dyad á Sarefa wéé nkúd a mmwaád ampée. ²⁷ Á póndé echē nkal é’déadəŋ Elisha ámpē ndun e mod e meləŋ embé á Israel. Boŋ Elisha enkēnsáádté mod a meləŋ ké nhóg awě ambid á aloj á Israel. Namané, mod awě ambid á aloj á Siria móo ánsāádté.”

²⁸ Áde bad ábe bémbē á ndáb e mekáne běwogé-’e nē, ekané énkōb bó áte. ²⁹ Héé běpádté ásē, běhé mó abum ámīn, békēen mó á asog á dyad. Ngáne běnlōngē á ekone mīn, běntimén mó á mbám mé ekone ábel bětined mó á ekone sé. ³⁰ Boŋ ansam bó átīntē, ákē-’e mó.

*Mod awě edéadəŋ é mbéb émbēē áte
(Mak 1.21-28)*

³¹ Yesue ansyogé á dyad á Kapenahum á mbwág e Galilia, ábootéd ayéged á mbwe-mé-nkóme-áte. ³² Nyaa eche áyégté’áá enkóméd bad yēl áte bwâmbwam áyāle ábē e’yle běmbē ngíne. ³³ Á ndáb e mekáne wéé áyégté’áá, mod ambé awě edéadəŋ é mbéb ékámlannáá. Héé ábóótédé abón aá, ³⁴ “Bób! A-Yesu, mod a Nazaret, cheé syánē déwójnē? Ehyedé sé awúu-ye? Mbíí we bwâm. Edí mod awě Dyōb álomé, awě asáá.” ³⁵ Dóo Yesue ákánné échē edéadəŋ é mbéb áte aá, “Lám, bíd ane mod áte!” Héé ébómé ane mod ásē átīntē bad, boŋ ébídē mó á yēl, ésebán élógné mó.

³⁶ Menyáké ménkōb moosyāél, bésedtē nhóg ne anínií bánken, “Nyaa e nhóbtéd ehéé nén-e? Chán mod ákamlanné e’déadəŋ bě mbéb ne kúmbe esyāél, é’wōgnē-’e mó?” ³⁷ Dín děnké mó mbwág áte esyāél áyāle mekan míme ábélé’áá.

*Yesue achöjté ekud é bad
(Mat 8.14-17; Mak 1.29-34)*

³⁸ Áde Yesue áhídté á ndáb e mekáne, anké á ndáb wéé Simōne. Antán néé Simōne mwaád nyaá ákonléé, ahéb ámbáá děnsog mó. Béñchāŋ Yesue bán, ádid mó bwâm. ³⁹ Dóo Yesue ásídté mó á nkəg, awúlén ásē, aláá ahéb áded aá, átede mó. Ábwōg-ábwōg ahéb děmmaá mó á yēl, ásyāé ásē, ákōb-pe bó nken.

⁴⁰ Bōob-pōó, áde enyen ébóótédé asud, bad běsyāél ábe běnwōŋ bad bě nkole ábe běkónlé’áá nkole nyaá ne nyaá běmpéen bó áwē. Ambán nhóg téé ekáá ámīn, ádidé bó bwâm. ⁴¹ E’déadəŋ bě mbéb bōmpē é’bídē ekud é bad á yēl, é’bōnē’ bán, “Edí mwǎn a Dyōb!” Ankáné bó áte, eémwage’áá-’e aá běhōb akan, áyāle běmbíi bán, adíi Ane awě Dyōb Áwógté.

*Yesue akalé nkalaŋ mí bwâm
á ndáb é mekáne é bad bě Israel
(Mak 1.35-39)*

⁴² Mbwembwé pírib, Yesue ansyāá á dyad-tē, ákē á ahéngé á hōm. Bad běmbootéd mó ahed. Áde bědíté mó, běnkēnháá mó etál áke hōm. ⁴³ Dóo álāŋgeé bó aá, “Ntāŋgéné ake á myad mémpēe, ábel nén níláa bōmpē nkalaŋ mí bwâm tāŋgēne nkamlen ní Dyōb. Mmén nkalaŋ móo níkáé boŋ Dyōb álomē me.” ⁴⁴ Né-oo akalé’áá nkalaŋ mí bwâm á ndáb é mekáne é mbwág é Judeya.

*Yesue apwedé bembapεε
(Mat 4.18-22; Mak 1.16-20)*

¹ Mbwe nhóγ Yesue antyéém á nkin mé edib é Genesaret. Bad bēnləjnéd mó âwóg eyale é Dyōb. ² Héé ányíné bétáŋgé myōle mébe á nkin. Bekób-bé-súu bénkembáá áwēdte. Béwópé’áá échab mbínzé. ³ Dóo ásólé á bōle ábe Simōne, aláá mó aá, ásyəjnéd mó á nkin. Adyeé-’áá á bōle-tê, boj ábootéd bad ayáged.

⁴ Áde ámádé nê, anláá Simōne aá, “Keeén bōle wéé ndib édíí, boj nyébwém mbínzé.” ⁵ Simōne antimtén mó aá, “A-Sáŋ, sékébwém mbínzé nkuu n̄syəäl, séékōbëë chömcchöm! Boj mēbél ngáne éhóbé.”

⁶ Dóo bébwémé mbínzé. Bénkōb ndun e súu káéŋ mbínzé éhape’. ⁷ Bénlēbē baáb ábe bēbédé á bōle ábíníí bán béhye bēwōŋgen bō. Áde baáb bēpédé, myōle mésyəäl mébe ménlon ne súu káéŋ mébootéd asú ásé. ⁸ Áde Simōne Petro ányíné nê, ankwe Yesue á mekuu, áhōbē aá, “A Sáŋgú, sôn! Syəé wéé índíí áyāle ndíí mbelé-mbéb.”

⁹ Simōne anhób nê áyāle émbē bōbē baáb menyáké bwâmbwam ânyín ndun e súu eche békóbé. ¹⁰ Menyáké ménkōb káéŋne Jemse bō Jən, bǎn ábe Zəbedie, ábe bémbe á echoj é akób á súu. Héé Yesue álâŋgeé Simōne aá, “Weebáá”. Bootya chii nyéetēdē bad nlém á abum áhid me.” ¹¹ Áde bēpēené mímab myōle á nkin, bēntedé chōm ésyəäl áhed, bēbootéd-te Yesue ahíd.

*Yesue achōjté mod awé meləŋ mékóbé
(Mat 8.1-4; Mak 1.40-45)*

¹² Mbwe nhóγ Yesue abédé dyad ahóγ. Mod awé meləŋ mékóbé yěl esyəäl ampě áwē. Anyín áde ányíné Yesue, ankwe mó á mekuu, áchāā mó aá, “A-Sáŋ, nzé edəé ehēle ébēl mē nsáŋ.” ¹³ Dóo Yesue ábídté ekáá, ábānē mó á yěl boj álāŋgē mó aá, “Ndəá, sáŋ!” Ábwōg-ábwōg mímē meləŋ mēmmaá ane mod á yěl. ¹⁴ Yesue anláá mó aá, eeláŋgé modmod, aláá-’e mó aá, “Käg élúmed yěl wéé prise, ásimen wé. Ébag-ké mendé ngáne mbéndé e Mosee éhēdeé álúmed bad wéé mósāā.”

¹⁵ Ké nēŋgáne Yesue ánkēŋgē mó aá eeláŋgé mod, dín démbē ákag mó mbwōg áte esyəäl áyāle mímē mbeltéd. Né démbél ndun e mod eladné mó á nkəg, âwōg chōm éche áhōbeé, ne ábel ádid bō bwām. ¹⁶ Boj nzé póndé empě mó, ayšgké’áá atim á aháŋgé, ákáne.

*Yesue achōjté mod awé awédé eped
(Mat 9.1-8; Mak 2.1-12)*

¹⁷ Mbwe nhóγ ámpē Yesue ayágté’áá bad. Befarisia ne bemeléede bē mbéndé bémbe áhed. Bémbid dyad ne dyad téé á mbwōg é Galilia ne Judeya, káéŋne á Jerusalem. Ngum e Dyōb empií mó, ádid bad bē nkole bwām. ¹⁸ Dó-’áá bad behōg bēpēené mod á mekále mīn awé awédé eped. Béhédé’áá nzii eché bésōnleé mó á ndáb-te, ânaad mó á’sō-te wéé Yesue. ¹⁹ Bénkēnkudté etál áyāle ndun e mod enlón áhed. Dóo bēchágké á ndáb mīn. Dóo bénédté nnɔŋ, bésudé ane mod bōbē mekále á etále-té á’sō-te wéé Yesue. ²⁰ Áde Yesue ányíné adúbe ádē ábe bad bēwōo áte anláá ane mod awé awédé eped aá, “Amúé, nlagséné wé mbéb.”

²¹ Dóo bemeléede bē mbéndé ne Befarisia bēbóótédé anyoo áte bánen, “Ebél é mod éhéé ésyáə Dyōb nén? Nzéé ahele se álagsén mbéb ésebán Dyōb dēmpen?” ²² Yesue anchem bō mewémtné áte. Héé ásedteé bō aáken, “Cheé ékáá boj nyéwōō’ enén ndíñ e mewémtné? ²³ Ahéé adé dyam ásad, áhōb wéé, ‘Nlagséné wé mbéb,’ káa áhōb wéé, ‘Syəé ásé, ébooted ake?’ ²⁴ Boj mēlūmēd nyé mēé, Mwǎn-a-Moonyoŋ awóó kunze álagsen mbéb á nkōnsé.” Héé álāŋgeé ane mod awé awédé eped aá, “Nlāŋge wé nén mēé, syəé ásé, étēd íímōŋ mekále, ésúé’ á ndáb.”

²⁵ Ábwōg-ábwōg ane mod anhidé ásé átinté e bad, atéd mímē mekále, ásūé-’e mó á ndáb, ákag ákēmté Dyōb. ²⁶ Menyáké ménkōb moosyəäl awé ambé áhed. Héé bēbóótédé Dyōb akēn ne mbwōg áte bán, “Sēnyíné akan dé menyáké chii nén.”

*Yesue achénlé Leviε
(Mat 9.9-13; Mak 2.13-17)*

²⁷ Ámbid e nê Yesue ansyəá áhed. Áde ákagké nê, annyín nsaad-a-táásə nhóg bán Leviε. Leviε andyεé ásē á ndáb eché ákóbáá táásə áte. Héε Yesue álângεé mó nén aá, “Hídé me.”

²⁸ Dóo Leviε átyéémé ámīn, áchēnē chōm ésyəāl áhīdē-’e mó.

²⁹ Bəɔb-pɔó, Leviε anchág sáŋkalaa a ngande áwe ndáb á dñi áde Yesue. Besaad bé táásə híin ne bad bémpée bémbē áhed. ³⁰ Héε Befarisia ne ábāb bemeléede bé mbéndé bényonjεé áte wéé Yesue ábē bembapεε, bésedtē bó bánken, “Cheé ékéá boj nyáabe besaad bé táásə ne bebel bé mbéb bémpée nyédyāg ndyééd, nyé mwāg-ke mím hōm ahóg?” ³¹ Yesue antimtén bó ne ngan aá, “Bad ábe bédyeé bwām bétogneneé mod-a-bwel. Bad ábe békōnle’ bó bétognéné mod a bwel. ³² Nyébíi nén bán, meépedeé áchéle bad ábe békōbnédé á’sō’ Dyōb, boj mpedé áchéle bebel bé mbéb meé bésôg mbéb abel.”

*Nsédtéd tângene
adid á yđl nzaa á mekáne-tê
(Mat 9.14-17; Mak 2.18-22)*

³³ Befarisia bém̄bād ahób bán, “Bembapεε ábe Jōne béménténé yđl nzaa adid á mekáne-tê. Melemlem né-’aá Befarisia ábāb bembapεε bóm̄pē bélēlē. Cheé ékéá boj ábōn bédyeāg ndyééd, bémwāg-ke mím?” ³⁴ Yesue ankwentén bó ne ngan aá, “Chán bad ábe bélébpé á ngande e e’wóngé bélēlē bédidé yđl nzaa á mekáne-tê áde mod awé akude sómbé ádīi adé ne bó? ³⁵ Boj epun ép̄é éche békobénné bó mod awé akude sómbé. Échē epun dóo bédidté yđl nzaa á mekáne-tê.”

³⁶ Yesue anláá bó ngan aá, nzé mod ahóbe aá, mó̄nabpe’ mbóté, eesélée eped é abad áyāle mbóté ekóólé boj ánabnáád mbóté e nchun. Nzé abelé nê, né asalé mbóté ekóólé. Ké eped ékōólē-’e éetângánné ne mbóté e nchun. ³⁷ Melemlem nêngáne mod éetēdē mím mékōólē se ahé mó á nchun mé ntyág, se ápen. Áyāle nzé abelé nê, né mím méhōd kááj ntyág nýééd, mím mémād asyəge, ntyág-ke ámpē mibéb. ³⁸ Bétângéne bélē mím mékōólē á apom dékōólē. ³⁹ Bad ábe bó-’e bémwāg mím, bélēmaá’ é mím mé nchun amwé se bélēdē mékōólē. Bélēle bélēb bán, “Saá mé nchun móo mēbóó-ye?”

6

*Nsédtéd tângene abel dé nsón
á mbwε-mé-nkóme-áte
(Mat 12.1-8; Mak 2.23-28)*

¹ Mbwe nhóg Yesue ne ábē bembapεε bétomé’áá á nzag e ngun-tê. Nén démbē á mbwε-mé-nkóme-áte. Ábē bembapεε bémbootéd e’sog é’ ngun apád, bérpágke’, bédyeāg.

² Nguse é Befarisia bényné-’aá nê, boj bésedtē bó bánken, “Cheé ékéá boj nyébelé akan áde mbéndé éebageé kunze ábel á mbwε-mé-nkóme-áte?” ³ Héε Yesue mó-’e ásedtēé bó aáken, “Nédē nyééláá’ é’ kálag e Dyōb dyam áde kâj Dabide ám̄benlé áde nzaa ékóbé mó ne ábē bad-ε? ⁴ Ansól á Ndáb-e-Dyōb mó ne bad ábe bénwoón mó, atéd e’wélé ábe é’bédé ndé e Dyōb, adyé. Boj echēd mbéndé éebageé mod ké nhóg kunze ádyē ábē e’wélé étoméé prisε. Mwěn andyé, ábē-’e káájne bad ábe bénwoón mó donge.” ⁵ Yesue ambádē bó áte aá, “Mwǎn-a-Moonyon awóó nkamlēn káájne ámīn e mbwε-mé-nkóme-áte.”

*Yesue achöjté mod awé ekáá éwédé
(Mat 12.9-14; Mak 3.1-6)*

⁶ Epun émpée Yesue anké á ndáb e mekáne. Ambootéd bad ayáged. Nén ámpē démbē á mbwε-mé-nkóme-áte. Mod nhóg-ke ambé áhed awé ekáá émbáá éwédé. ⁷ Bemeléede bé mbéndé ne Befarisia bényné-’áá mó chodchod, ânyín nzé ádīd ane mod bwām á mbwε-mé-nkóme-áte, ábel nén békoben mó awusé. ⁸ Yesue mó-’e anchém bó mewémten áte. Héε Yesue álângεé ane mod aá, “Hyé étyéem átinté hén.” Ane mod anwogén mó. ⁹ Dóo Yesue ásedtēé bad aá, “Nyéláa me ké édé mbéndé ábel mboj á mbwε-mé-nkóme-áte, káá ábel mbéb. Édē mbéndé ásonj alongé á mod, káá âwúu mó?” ¹⁰ Ahóbe nê, anone-’e bad á

mesó. Dóo álāŋgeé ane mod aá, “Sálé ekáá áte.” Asále áde ane mod ásánlé ekáá áte, ekáá éndyéé mó bwâm ámpē. ¹¹ Nén dénkōbēd Befarisia ne bemeléede bé mbéndé ekaŋ áte, běhágké mó ápid mó mekáá.

*Yesue apwedé bembapεe bé
nlómag dyôm ne bēbe
(Mat 10.1-4; Mak 3.13-19)*

¹² Ámbid e póndé Yesue anké á ekone mîn ákáne. Ankáné nkuu n̄syə̄l káéj ne mbwəmbwε. ¹³ Boŋ áde bín é'kénlé, anchélé ábē bembapεe, apwedé dyôm ne bēbe áwab tînté, áchágé bó aá, bembapεe bé nlómag. Ábē bembapεe bé nlómag běbédéé, ¹⁴ Simōne awe ámbagké dñn aá, Petro, bó mwânyar̄ Andreyea, Simōne, Jakob̄e, Jōne, Filibe, Batolomyo, ¹⁵ Matyo, T̄omas̄e, Jemse mwâň awé Alfōse, Simōne mod a kén, ¹⁶ Judase, mwâň awé Jemse ne Judas Iskariode awé antím Yesue asóm.

*Yesue ayágté, achörjté-'e ndun e mod
(Mat 4.23-25)*

¹⁷ Dóo bōb̄e bembapεe bésyókgé á ekone sé, bēpag á hōm áde átânlé. Béntân bembapεe běmpēe híin ne ndun e mod áhed. Ene ndun e mod embíd á mbwōg e Judeyat̄e esyə̄l, á Jerusalem, kájne á myad mé Tire ne Sidon á nkin mé edib̄ é nkw̄. ¹⁸ Běmp̄e nê áwōg Yesue eche pôle, ne ábel nén ádid bad ábe běkonle bwâm. Adidé'áá bad ábe edədədəj bē mbéb̄ é'tágté'áá bōmp̄e bwâm. ¹⁹ Mod téé ahedáá aá mó nsidtén mó ngáne émbēē bán, ngíne ebídé'áá mó á yǎl eché edidé'áá bad bwâm.

*Mekan mé nnam ne mé medim
(Mat 5.1-12)*

²⁰ Héé ábóótédé ábē bembapεe akalen aá,
“Nnam m̄b̄e ne nyé betóótōk̄e bē bad áȳele nyédé ásē e nkamlen n̄ Dyōb.
²¹ Nnam m̄b̄e ne nyé ábe nyédé nzaa bōb̄, áȳele Dyōb dékōdēd nyé.
Nnam m̄b̄e ne nyé ábe nyélebe bōb̄ áȳele nyéēwōo.
²² Nnam m̄b̄e ne nyé nzé édé bán ngáne nyéhídeé Mwâň-a-Moonyon̄, bad békóó nyé, běbáa nyé á yǎl, bésyáa nyé, běchäge-'e nyé m̄in mé mbéb̄. ²³ Nyéwóge bwâm, nyébwεen ámīn r̄m̄m̄ mbwε, áȳele nsábe r̄m̄me nyékudt̄e ádyōb̄ n̄chábé ámīn. Melemlem nê dōo besáá bē' bōd̄ bōmp̄e bésyáé'áá bekal bē'dādədəj.
²⁴ Boŋ édé nḡol ne nyé ábe nyédé nhōn, áȳele nyémaá echēn nde akud.
²⁵ Édé nḡol ne nyé ábe nyékódé bōb̄, áȳele pónđe ép̄e eché nyétaké nzaa.
Édé nḡol ne nyé ábe nyéwōo bōb̄, áȳele nyéēlēb̄, nyéchīl̄-'e.
²⁶ Édé nḡol ne nyé nzé moosyə̄l ákémte nyé. Nê dōo ábāb besáá békémtáá bekal bē'dādədəj bē metóm.

*Nyédaŋ bad ábe békóó nyé
(Mat 5.38-48, 7.12a)*

²⁷ “Boŋ nlâŋge nyé ábe nyéwóglan m̄e hén bōb̄ m̄eé, nyédaŋ bad ábe běhede nyé kák̄o, nyébenle-'e bad ábe békóó nyé mboŋ. ²⁸ Nyénamed bad ábe bésyáŋtad nyé, nyékânnad-te bad ábe běb̄ele nyé n̄hel mé mekan. ²⁹ Nzé mod abəm̄e we abén á akəg, ékunnéd mó ádíníí ámpē. Nzé mod akōbn̄e we r̄m̄m̄n̄ nkobe, weebâŋn̄e mó k̄e echoŋ sóte. ³⁰ Kéñzéé awé achóm̄e we chōm̄, bēé mó. Mod k̄e ahéé-'e awé adum̄n̄e we bw̄m̄, weéhédn̄e mó bó ámbid̄. ³¹ Kéchéeé éche édáé wéé bad běbel áwōj̄, ébel ch̄o áwāb̄.

³² “Nzé nyédaŋ bad ábe bědāé nyé běnp̄en̄, né mekenag méhéé nyékudt̄e ne n̄? Káéjn̄e bebel bē mbéb̄ bōmp̄e bědāe bad ábe bědāé bō. ³³ Nzé nyéb̄ele mboŋ dásō wéé bad ábe běbenle nyé mboŋ běnp̄en̄, né nsyáŋ n̄héé nyékudt̄e ne n̄? Káéjn̄e bebel bē mbéb̄ bōmp̄e běb̄ele n̄. Nzé édé nén bán bad ábe nyélyágé nlém bán bōmp̄e běb̄al nyé bw̄m̄ běnp̄en̄ bōo nyébáleé bw̄m̄, né nsyáŋ n̄héé nyékudt̄e ne n̄. Ké bebel bē mbéb̄ běbále baáb̄ ngáne běbíí bán bōmp̄e běb̄al bō melemlem. ³⁵ Boŋ nyédaŋ bad ábe běhede nyé kák̄o, nyébenle-'e bō mboŋ. Nyébále-'e bad bw̄m̄ ésebán nyésine dyamdyam ámbid̄ e n̄. Nê

débél Dyōb ábe nyé nsábe míme íchábé á mîn, nyéchagnéd-te bán, băń bé Dyōb á Ngum. Nyébíi-'e bán, Dyōb ádē ngol ne bad ábe béesāgnān Dyōb, ne ábe békébé nlém. ³⁶ Nyéwôŋ nlém n̄ ngol melemlem ngáne awê̄ Titée áwóó nlém n̄ ngol.

Nyaa echē bad békédtéé mbakú

(Mat 7.1-5)

³⁷ “Nyéekáádté bad, boj Dyōb dómpe déekāádté nyé. Nyéehóbé bad, boj Dyōb dómpe déehobé nyé. Nyélagsan bad boj Dyōb dómpe álagsan nyé. ³⁸ Nyébage bad, boj Dyōb dómpe ábage nyé. Akab áde nyékudté, békín dó, běpuméd-te dó ámīn, káéj ásyögke, boj běpemtéd nyé. Melemlem mé nhagted míme ébénlédé móo Dyōb dómpe débenlédté.”

³⁹ Yesue ankalé bó ngan aáken, “Mod awé akwedé ndím ahéle alyágéd waáb mod a ndím-e? Bó bad béké béehúnné ebíi-yε? ⁴⁰ Mwǎn-a-ayáge eetóméé mod awé ayágte mó, boj kénzéé awé amadé ayáge áte, abelé abé ndágke eche awe meléede.

⁴¹ “Cheé ékéá boj éwâmsān mwă púuted anyín á díd á wén, ésebán ehele nkog míme ndé emōj á díd anyín? ⁴² Chán éhele-se eláá mwânyoŋ weé, ‘Amúē, mwé, nhûd we mwâ púuted á díd’, áde wéenýinéé nkog míme ndé mmón á díd? Á-bedog-bad! Sébé éhûd nkog míme ndé mmón á díd, dóo wétöŋ’é púuted eché edé mwânyoŋ á díd anyín, boj ehúd-te chó.

Á epum dóo békheméé bwel

(Mat 7.16-20, 12.33-35)

⁴³ “Alín á bwel á bwâm déebeléé-se áchyáá e’pum bé mbéb. Alín á bwel dé mbéb-pe déechyāá’é e’pum é’ bwâm. ⁴⁴ Á epum é bwel dóo békheméé alín á bwel. Ébyééné bwâm bán, béképâdëé ngun á yél e mbísaj káá besabé á yél e mewán. ⁴⁵ Mod a bwâm abele bwâm áyâle é’bide mó á nlém-tê wéé bwâm ékójnédé. Mod a mbéb-pe abele mbéb áyâle mbídé mó á nlém-tê wéé mbéb nkójnédé. Édé né áyâle, mam míme líloné mod á nlém-tê, mó’-aá mébíde mó á nsəl.

Belój bé ndáb béké

(Mat 7.24-27)

⁴⁶ “Chán nyéchagéé me póndé téé bán, ‘A-Sáj, A-Sáj,’ boj nyéebél dyam áde nílângeé nyé? ⁴⁷ Mod téé awé apedé áwem, awé awogé ábêm e’yle, boj ábelé-’e ngáne nhóbeé, měhagtéen nyé nyaa e mod eché ákoo abé. ⁴⁸ Adé néé nlónj-a-ndáb, awé anlímé mekon mé ndáb se ásé, ásúmē ene ndáb eláá mîn. Edib énlóné, éból mó á ndáb-te ne ngíne, boj énkéhnenlé chó apáj, áyâle ambíi chó alój. ⁴⁹ Boj kénzéé awé awóge ábêm e’yle boj eébele ngáne é’hobéé adíi nêngáne mod awé anlój ndáb ésebán asumme chó. Áde edib éból mó á ndáb-te, ene ndáb enkwé melemlem mé póndé, epáá-’e nyaa eche ekamé ahagten.”

Yesue achörjté mbalede awé mod ambáá a sánze

(Mat 8.5-13)

¹ Bad bésyääl bénwög mímén mekan míme Yesue áhóbé’áá. Áde ámáá mó ahób, anké á dyad á Kapenahum. ² Á dyad-tê wé, mod ambáá a sánze é Roma ambé awé akamlan mbwókel e sánze. Awé mbalede nhog awé ándəngé ákónlé’áá káéj áhédé awé. ³ Néé ane mod ambáá a sánze áwogé Yesue díu, anlóm belyágéd bé dyad aá békhenled mó Yesue, áhyé áchood awé mbalede. ⁴ Bépédé-’áá wéé Yesue, boj békéhää mó ne nlém nhog bán, “Hyé éhébe ane mod. Adíi mod awé atángéné mímon nhébe akud. ⁵ Adé ádéd aloj á bad, alóngé-’e syáné ndáb e mékáne.”

⁶ Yesue anwoón bó. Boj áde ákwogé ape á ndáb wéé ane mod ambáá a sánze, dóo mod ambáá a sánze ne áloméé baáb wéé Yesue ámpé aá, béláa mó bán, “A-Sáj, weétagté wé yél, mmén meékwognedéé ákob wé nken áwêm ndáb. ⁷ Nén ábélé menkéhnenlé ké ape áwoj e’só. Boj ké eyale chó wéhobpē, awêm mbalede ádyéé bwâm. ⁸ Mmén ndíi mod

awē adé ásē e nkamlen, mmēn-ne nwóó sánze éche nkamlanné. Nlârge pág mēé, ‘Kăg’, ékăg-ke nê dën. Nlârge empée mēé ‘Hyăg’, éhyăg-ke nê dën. Nzé nlârge awêm mbəledε mēé, ‘Bél échén’, ábelé-’e nê dën.”

⁹ Áde Yesue áwógré nê, yăl enkóm mó áte. Héé ákúnné e’só wéé echoj é bad éche éhídé áá mó, álârge bó aá, “Ne mbále, nlârge nyé mēé, meényinéé mod á aloj á Israel kék nhógr awē awóó nyaa e adúbe eché anén nken-e-mod áwóó.” ¹⁰ Atim áde bad ábe bénlōmmé bétímé ámbid á ndáb, béntan nêngáne ane mbəledε ámáá bwâm adyee.

Yesue apuúdté nkúd a mmwaád mwǎn

¹¹ Éebemee áte* Yesue anké á dyad áde békagéé bán Nain. Ábē bembapεe bémbé ne mó ne echoj é bad. ¹² Áde ápédé bənbən ne mmwe n̄ dyad, bad bémbidēn ndim m̄ mod m̄me mémbé mpom mó mwǎn m̄me nyaá. Nyaá abédé nkúd a mmwaád. Ndun e mod eché embid á dyad-té, embé ne mó. ¹³ Áde Sângú Yesue ányíné ane mmwaád, ankóbtén mó etyag. Dóo álârgeé mó aá, “Lénéd awé!” ¹⁴ Ansídé á’sō, ásitén mekále m̄me bémpeemmē ndim m̄ mod ámin. Bepém bénityéem. Héé áhóbéé aá, “A-kódemod, nlârge we nén mēé, syéá ásē.” ¹⁵ Dóo ane kódemod eché anwé ésyéngé ásē, boj ébootáad dyam ahób. Héé Yesue ábágé mó wéé nyaá.

¹⁶ Mbwág ménkōb moosyéál, békemtē Dyōb bán, “Nkal é’dədəj ambáá abídé áwed tînté,” békobé-’e bán “Dyōb ápíidé ábē bad!”

¹⁷ Mmén nkalaŋ târgeene Yesue ménwōgnēd mbwág e Judeya áte esyéál ne melor m̄me médé bənbən.

Jōne, Ndusené alómé ábē bembapεe wéé Yesue

(Mat 11.2-19)

¹⁸ Bembapεe ábe Jōne bómpe bénwōg m̄mén mam. Héé békíí mó aláa. ¹⁹ Dóo átéde béké, alómé bó wéé Yesue, aá bésedé mó nén bán, “We-ee edé ane awé Dyōb áhóbé aá móolom-ε, ngé sébē sésine’ mod ampée?”

²⁰ Ábē bad békédé-’aá wéé Yesue, békagé mó bán, “Jōne, Ndusené alómé sé áwōj aáken, ‘We-ee edé ane awé Dyōb áhóbé aá móolom-ε, ngé sébē sésine’ mod ampée?’”

²¹ Póndé eche békédé áhed nê, adidé-’aá ekud é bad bwâm ábe bétagnáá nkole nyaá ne nyaá, ábe bénkúd medim ne bad ábe e’dədəj békagé ébédé áte. Ambél bad hín ábe bénkwé ndim bénýinne’. ²² Héé átimtanné Jōne ábē bembapεe aá, “Nyétime’ ámbid, nyéke nyéláa Jōne mekan m̄me nyényinné díid ne m̄me nyéwogé. Nyéláa mó bán, bad ábe bénkwé ndim bénýinne’, ábe bésyágté-’aá békag bwâm, ábe melor ménkōbpé bésáá.† Ábe bénkwé ndógr békagé, ábe bénwē, békagé, nkalaŋ mó bwâm-me ámpé nkalte’ wéé betóótoké békagé.” ²³ Nnam mó-’e ne kénzéé awé eéhəyłne nlém á abum târgeene me.”

Yesue alárgé bad nyaá e mod eché Jōne ádíí

²⁴ Áde mésénzé m̄me Jōne m̄máá atim ámbid, Yesue ambootéd ndun e mod eché embé áhed akale târgeene Jōne. Ansédéd bó aáken “Póndé eche nyémbidé áké dé atán Jōne á ehyagé, cheé nyéwemtēnné bán nyéényin? Apab á chyaá áde epub ésgatéé-yε? ²⁵ Cheé nyéenkéé anón? Mod awé ahédé kəse é mesaj-ε? Nyébíí nén bán, bad ábe békagé kəse é mesaj, boj békagé-’e yĕl, békagé dásō á ndáb é kĕj. ²⁶ Cheé-ō nyéenkéé anyín? Nkal é’dədəj mó-’e nyéenkéé anyín-ε? Né dën! Ne mbále, nlârge nyé mēé, nyényiné mod awé atómé nkal é’dədəj. ²⁷ Jōne mó adé ane awé békagé áá áde békagé e’yle ábe Dyōb áhóbé aá, ‘Nóné’, nlóme m̄mém mésénzé m̄me mésébē we á’sō, ábojseñ we nzii.’

²⁸ Á mbále mod kék nhógr awé abídé á abum dé mmwaád eetóméé Jōne. Boj kék nê, mod awé adé ndimten átinté e bad ábe békagé á nkamlen mó Dyōb, adé etógnén tómaa Jōne.”

* ^{7:11} Éebemee áte: Donge á kálag dé’só éwóó: Né bín é’sárgé. † ^{7:22} Âsáad á yĕl: Nzé melor ménkōb mod békagé-’aá mó néé mod awé eesáa. Békagé-’aá mó bán eesíté wéé bad békagé.

²⁹ (Bad bésyāēl ábe bénwōg chōm éche Yesue áhóbé, kájne besaad bé táásə bénkwentén bán ntíi n̄ Dyōb n̄tāngéné, áyāle bénkūd edusen éche Jōne. ³⁰ Boj Befarisia ne bemeléede bé mbéndé bénchīm yāl kájne ntíi n̄ Dyōb áyāle bémbarj edusen éche Jōne akob.)

³¹ Yesue ambád ahób aáken, “Cheé méhægténné nyongel é bad e’chii? Chán běn békóo abé? ³² Bédíi n̄ngáne běndem ábe bedyéé á dyad-té, boj bélēbpē nhóg ne aníñí bán, ‘Sétóngé nyé e’lonj, boj nyéeságéé.

Sékonné nyé nkájngé n̄ kwééd, boj ké n̄ nyéechyéé awé.”

³³ Áde Jōne, Ndusene ápédé, eéyøke’aa ndyééd adyé, eemwáge’aa-’e mǐm. Nyébootéd ahób bán, ‘Edéadəj é mbéb édé mó áte!’ ³⁴ Mwǎn-a-Moonyoŋ apedé, ádyāg ndyééd, á mwāg-ke mǐm, nyéhōbē bán, ‘Nyénóne mó, adéá ndyééd bwâmbwam. Mmwé mǐmē ngēn, awojne belad bě táásə ne bebel bě mbéb.’ ³⁵ Boj kájne ne á asog, mod téé awé abíi dyam abelé ahób aá, nzii e Dyōb etángéné.”

Mmwaád awé bélágééné mbéb

³⁶ Farisia nhóg anlébé Yesue aá ahyé ádyé ndyééd áwe ndáb. Áde ápédé áwed, andyéé ásē, ádyé ndyééd. ³⁷ Mmwaád nhóg mó-’e abédé á dyad-té wē, awé abédé mbelé-mbéb. Awog áde áwogé bán Yesue adyāg ndyééd á ndáb e Farisia, ampeén apom á dyōg dé elod é bwâm áhed. ³⁸ Anyogén ásē benben ne mekuu mǐmē Yesue, ábootéd achii, ásobté’ mó mekuu ne mésod. Ampíné mó mekuu ne échē esid é nló, ámwāā mó mekuu âlumed edúbé, anyɔnlé-’e mó mekuu ne ádē dyōg dé elod é bwâm.

³⁹ Anyín áde ane Farisia ányiné n̄, anhób áwe nlém-té aá, “Nzé nkal é’déadəj mó anén mod ânkongé abé, né abágé’áá abíe’ nyaa e mmwaád eche anén mmwaád awé akidtan mó ádíi ne abé áde áwóó, né abíi-’e nén aá anén mmwaád adíi mbelé-mbéb.” ⁴⁰ Héé Yesue álāngéé mó nén aá, “A-Simōn ndéá we mwā pôle aláa.” Farisia ne ankwentén aá, “Ameléed, cheé édé? Käg á’sō, éláa me.” ⁴¹ Dóo Yesue áhóbéé aá, “Mod nhóg abédé awé abálé’áá bad ngáb. Ane mod akálé’áá bad béké melúm. Akálé’áá nhóg móom mé e’kélé métáan, aníñí-’e e’kélé étáan. ⁴² Bó modmod bénkênhénlé atue. Né-óó anlagsén bó mod téé áde alúm. Böb-pöb, áyāle bó bad béké, nzé-módé édúbpé weé átōmtén mó adəj?”

⁴³ Simōne antimtéén mó aá, “Ndúbpé meé, ane awé alúm déntōmténné achab ámīn.” Dóo Yesue áhóbéé aá, “Etángéné.”

⁴⁴ Dóo ákunneé wéé ane mmwaád, boj álāngé Simōne aá, “Enyíne anén mmwaád-e? Áde n̄sólé áwōj n̄dáb, wenkêmbaá me mendib wéé n̄wobned mekuu. Boj anén mmwaád asánté me mekuu ne mímē mésod, apíné-’e mó ne échē esid.‡ ⁴⁵ Wenkênháá me tâl, boj taa mensól hén, eésogéé me mekuu anyøle. ⁴⁶ Wenkênwōgédéte me dyōg á nló ákob me nken, boj awógté me dyōg dé elod é bwâm á mekuu. ⁴⁷ Edənge é ngíne éche anén mmwaád álúmté, édé nhægtén ne alagsen áde ákudé áyāle ekud é mekan mé mbéb éche ábélé. Mod-te awé béebudeé mbéb alagsen, eébūdēē edənge alúmed.” ⁴⁸ Héé Yesue álāngéé mmwaád ne aá, “Ekudé alagsen dé mbéb áyāle mbéb mímōj n̄syāēl.” ⁴⁹ Bad ábe bóbō bedyágé’áá ndyééd bénseidé yāl bánken, “Ebál é mod éhéé chén éche éwóó kájne kunze âlagsen mbéb?” ⁵⁰ Yesue anláá mmwaád ne aá, “Adúbe áde éwóó áchónté wε, kág ne nsan.”

8

Nguse é bebaád éhíde Yesue

¹ Ámbid e n̄ Yesue ambootéd ake myad ne myad, mémbáá ne mésad. Akagé’áá, ákalé’ nkalaŋ m̄ bwâm mé nkamen n̄ Dyōb. Akeéné’áá ábē bembapē dyōm-ne-bébe.

² Bebaád ábe e’déadəj bě mbéb bémbarj áte ne ábe békónlé’áá nkole mémpē, boj áchóod bó, bómpe bémbarj á echoŋ. Ábē bebaád békédé, Maria mmwaád a dyad á Matala awé ánhüdté e’déadəj bě mbéb saámbé á yāl, ³ Joanaa, mmwaád awe Kusa, mod awé

‡ ^{7:44} Á mbwōg e bad bě Israel, nzé mod akobé’áá mod nken, antángén mó mendib abe áwobe mekuu, ahé mó tâl, awóged-te mó dyōg á nló.

abédé nló áyāle bembəlede ábe Herōde, Susanaa ne ekud é bebaád bēmpēe. Ábê bebaád bēbēnládtáá ábab bwěm běn, bétognán Yesue ne ábē bembapēe.

*Ngan e mbál-e-bǔ
(Mat 13.1-9; Mak 4.1-9)*

⁴ Ekud é bad émbid dyad ne dyad téé áhye dé anyín Yesue. Áde béládné áte nê bōob, ankalé bō ngan nén aá, ⁵ “Nkwel-é-nzag nhóg anké mbál asob á nzag-tê. Áde ásobeé mó nê, doŋge dénhūn á nzii-tê, betóm bé nzii bémad mó akogted ámīn, menon mómpē mémad mó asômted. ⁶ Doŋge dé mbál dénhūn á eláá mīn. Mmē ménkōb, boŋ ménhyēlē áde méepedeé akwog, ngáne édií bán ndoob e eláá mīn eékoŋgée mendib. ⁷ Doŋge ámpē dénhūn wéé mekôd médií. Néé bōdbō békwōgē, mekôd ménkāj ábê bwěm. ⁸ Mbál mémpēe méntān ndoob e bwâm. Ménkwōg, níchyáá-’e bwâmbwam. Doŋge dé e’sog dénwâlē mbwōkel é mbum.” Áde Yesue ámádé nê, ambád áte aá, “Kéñzéé awě awóó metúu áwóge’.”

*Chōm éche ékáé boŋ Yesue ákalé’ ngan
(Mat 13.10-17; Mak 4.10-12)*

⁹ Ámbid e póndé, Yesue ábē bembapēe bénlāā mó bán, átogned bō ene ngan. ¹⁰ Héé álâŋgeé bō nén aá, “Dyōb ábágé nyé kunze ábíi kun é nkamlen í Dyōb. Boŋ bad ábe belyágé ásē, bewōg chó née ngan ábel nén, bénýíne’, boŋ béecheméé, bewóge’, boŋ béesoŋtanné.

*Yesue atógrké ngan e nwén-é-mbál
(Mat 13.18-23; Mak 4.13-20)*

¹¹ “Bōob-pōá, ítogned nyé ene ngan. Mbál ndíi Eyale é Dyōb. ¹² Mbál ríme ménhūn á nzii-tê nílumte bad ábe bewóge eyale é Dyōb, boŋ ámbid e póndé Devəlē áhye ahúd bō chó á nlém-tê, ábel nén beedubpē Dyōb se békūd e’soosoŋ. ¹³ Mbál ríme níhúné á meláátē nílumte bad ábe, nzé bewóngé Eyale é Dyōb, békobe chó ne menyinge, boŋ échē eyale éewénnādtē bō á nlém-tê. Bédubpe Dyōb á esónj é póndé boŋ á póndé e mekagsen bédol yěl ámbid. ¹⁴ Mbál ríme níhúné á mekôd-te, nílumte bad ábe bewóge Eyale é Dyōb, boŋ kááj ne á asog, mpúlé mé nkōjsé, abud á bwěm awój, ne menyinge mé nkōjsé níkaj bō nlém áte. Né ákə’, bēheleé kase é e’pum achyáa. ¹⁵ Mbál ríme mó-’e méntān kase e ndoob, nílumte bad ábe bewóge Eyale é Dyōb ne nlém nísyāel, békōo-’e chó á nlém-tê. Né ábəle’ bewesan kááj béchyáá e’pum.

*Nzé běchódé etrúkáj, békongjéé chó
(Mat 4.21-25)*

¹⁶ “Modmod eémāá’et etrúkáj achod se ákōō chó á ebwōg-sé, káá atibéd chó á anoj sé. Abelé ákəlē chó dásō ámīn, ábel boŋ kéñzéé awě asóle á ndáb, ányíne ekide. ¹⁷ Dyam téé áde adé á e’koŋnéd-te débíd á nhéné. Kéchéé-’e éche ênsōóm á e’koŋnéd ébyēen, ébíd-te á enyen. ¹⁸ Né-oo, nyétéd póndé ngáne nyéwoglanné. Kéñzéé awě awóó nsôŋten í kun é nkamlen mí mīn, Dyōb débād mó mmē nsôŋten abe. Ane awě mó-’e eewóo, ábōd kē éche áwémténé aá mówōo.”

*Tumbé eche Yesue
(Mat 12.46-50; Mak 3.31-35)*

¹⁹ Bōob-pōá, áde Yesue nyaá ne baányan běhyédé mó anyín, bénkēnhēnlé mó apē bēnben, áyāle etál eēbēdeé ngáne ndun e mod ênləŋnédte mó. ²⁰ Dóo bad bélâŋgeé mó bán, “Pón nyoó bōobé baányan bětyéémé á ebwōg, běhede-’e we anyín.” ²¹ Héé Yesue átintanné bō nén aá, “Bad ábe bewóge eyale é Dyōb, běbelé-’e ngáne échē eyale éhōbeé, bō bédé awem nyaá ne ábēm baányan.”

*Yesue ahóódté ekudkud
(Mat 8.23-27; Mak 4.35-41)*

²² Mbwe nhógs Yesue ansól á bɔlε-tê ne ábē bembapεε, aláá bó aá, "Syáā déchabe ped e edib eníníí." Dóo bébwóbgké eke. ²³ Á eke-tê wê, e'chó bénkōb Yesue. Hê dóo ekukud étané bó átintê e edib. Mendib ménsôl bó á bɔlε-tê káéŋ, mam mébéén bó ebébtéd. ²⁴ Héé békíí Yesue anyem ásē boj bélāŋgē mó bán, "A-Sáj, a-Sáj, pón syánē dewág-oo!" Dóo ányémmé ásē, ákānné ekukud éched áte, éhóó-'e. Edib éche éhódé'áá áte chómpē énsôg ahod. ²⁵ Dóo ásedteé bó aáken, "Nédē nyeedúbpéé me-ye?" Nén dénkōbéd bó mbwóg, yǎl-le enkóm bó áte bwâmbwam bésedté nhógs ne aníníí bánken, "Ebál é mod éhéé chén, éche ékamlan káéŋne ekukud ne mendib, káéŋ béwógné-'e mó?"

**Yesuε achöjnté mod a Gerasin
awě e'daédaŋ bé mbéb bémbeē áte**

(Mat 8.28-34; Mak 5.1-20)

²⁶ Yesue ne ábē bembap  e b  enchab   edib, bootya ´ Galilia, b  p  e ´ m  ude r  m  n  i  , ´ mbw  g e Gerasin.^{*} ²⁷ Ade ´b  d  d  e ´ nkin ambom  n mod a dyad nh  g aw   e ´d  d  d  e ´ b   mb  b b  mb  e ´ at  . ´b  d  d  e et  n ´ p  nd  e ´ ade ane mod ´e  h  g  e ´ a   mb  t  . Eedy  e ´ a   k   ´ nd  b-te, nz  se ´ so  bade. ²⁸ Any  n ´ ade ´any  n Yesue, ank  w   m   ´ mekuu ne esa  d ´ ns  l, ´b  n  n   a  , ´A-Yesu, Mw  n a Dy  b ´ Ngum, che   s  o ´ d  w  y  n  ? S  n, week  gs  n m  . ²⁹ N   d  m  b  e ´ ade Yesue ´am  a ´ d  d  d  e ´ b   mb  b akam  n a  , ´b  id m   ´ at  . Ngen ne ngen, nz  e ´ d  d  d  e ´ b   mb  b b  ns  l m   ´ at  , k   ´ mehan  g  e d  o ´ am  b  e ´, ap  dt  d  t  a ´ beng  b  ng  b   ´ ab   b  h  d  e m   ´ mekuu ne mek  a, boj ´ed  d  d  e ´ mb  b ´ek  e  n  e m   ´ ehy  nge. ³⁰ Yesue ´ans  d  d ´ m   ´ a  ken, ´Ch  n d  n ´ ad  i   w  ? Ank  w  nt  n a  , ´Amut  e. Anh  b n  nj  g  ane ´d  d  d  e ´ b   mb  b h  in b  ns  nl   m   ´ at  . ³¹ E ´d  d  d  e ´ b   mb  b ´bed ´ch  a   ´ a   Yesue b  n, eeh  nt  e b   ´ ech  g ´ech   ´ eew  o   as  g, [†] ³² Es  g ´ nguu ´eb  d  e ´ ahed ´edy  g ´ medy   ´ mb  m ´ ekone. D  o ´ab  e ´d  d  d  e ´ch  a   ´ Yesue b  n ´t  de b  s  l ´ k   ´ es  g ´ nguu-t  . D  o ´ Yesue ´b  g  e b   kunze. ³³ Ab  d ´ ade ´d  d  d  e ´ b   mb  b b   ´b  d  e ´ ane mod ´at  , b  ns  l ´ech   nguu ´at  . D  o ´ nguu ´ew  bp   ´as  , ´eny  gt   ´ a ´l  a ´ b   nkin ´edib, ´h  n ´edib-t  , ´h  o ´e. ³⁴ Ade ben  n ´ b   nguu ´b  ny  n   n  , b  nt  m ´meh  l  , b  kag ´b  kanl   ´bad nkal  n ´dyad-t   ne ´mebw  g ´m  me ´med   b  enben. ³⁵ Aw  g ´ ade ´bad b  w  g  - ´a   n  , b  bw  g  - ´e ´as   ´ak   ´d  ny  n ´dyam ´ ade ´b  enl  d  . B  p  d  - ´a   w  e ´ Yesue ´amb  e ´, b  ny  n ´ ane mod ´aw   ´anh  dt   ´d  d  d  e ´ b   mb  b ´at   ng  ne ´ady  e ´ m   ´ak  b, ah  d   ´mb  t   ´ y  l, ´ady  e ´e ´ bw  m. D  o ´mbw  g ´nk  b   ´b  . ³⁶ Bad ´abe b  nn  n ´d  d ´b  nk  l   ´b   ´ng  ne ´ Yesue ´ach  r  jt   ´ ane mod. ³⁷ H  e ´bad b   mbw  g e Gerasin ´b  l  ng   ´ Yesue b  n ´asy   ´aw  b ´nd  b, ´ay  le ´mbw  g ´n ´ng  ne ´m  nk  b ´b  . D  o ´as  l   ´m   ´b  l  -t  , boj ´as  e. ³⁸ Mod ´aw   ´b  nh  dt   ´d  d  d  e ´ b   mb  b ´at   anch  n ´m   ´a   b  m   ´b  kag, boj ´ Yesue ´antim  d ´m   ´amb  d ´a  , ³⁹ ´Tim   ´ ´aw  n ´dyad, ´ek   ´ekanle ´bad ´nd  l   a ´dyam ´ech   ´Dy  b ´b  enl   w  . Ane mod ´ans   ´dyad, ´ak  , ´akanle ´mod ´t  e ´dyam ´ade ´ Yesue ´b  enl   ´m  .

*Yesue apuúdté ngəndéré póg
áchōōd-te mmwaád ampée*

(Mat 1.18-25)

⁴⁰ Áde Yesue áhúú, ndun e mod enhyé mó asagnen ne menyiŋge ngáne émbéē bán bésiné’áá mó. ⁴¹ Héé mod nhóg awé békágé’áá bán Jairuse ápédé awé. Jairuse abédé nhóg átinté benkamlene á ndáb e mekáne. Ankwe Yesue á mekuu, ácháā mó aá, áhye áwe ndáb. Aá ⁴² rímé mpom mí mwán a mmwaád nhede awé.

Áde Yesue ákagké áwed, bad bênləjnéd mó. ⁴³ Mmwaád nhóг ambé áhed awě akönlé'áá nkole ríme mekií mébídé'áá mó á yĕl póndé ésyāel. Mmē nkole ímbédé mó á yĕl á etûn é dyôm-a-mwé ne ríbe ésebán modmod ahele mó bwâm adid.‡ ⁴⁴ Héé ábídé Yesue ámbid, bon ásitén Yesue mesó mé nkobe ríme áhwâaā'É. Ábwōg-ábwōg mekií

* 8:26 Gerasin: Donge á kálag dé'só áwóó Gadara, émpēe-'e éwóó Gegesa. † 8:31 Ebíí:
Mewém̄t̄en mémbē bad bán e'déadəŋ bé mbéb békéb á mbwōg á ndib e ebíí kájón né echab
póndé e nkógsen edepdé. ‡ 8:43 Donge á kálag dé'só ébádáe bán: Ammăd chōm ésyāel éche
ánwōngé abébed wéé bad bé mel.

ménsōg mó abíd á yĕl. ⁴⁵ Dóo Yesue ásedteé aáken, “Nzé-módé asidténé me?” Modmod enkēnkwenténné. Dóo Petro áhóbéé aá, “A-Sáŋ, ngómē ndun e mod elĕjnédé we, káéj békájnéné-’e we.” ⁴⁶ Boj ké nê Yesue anhób aá, “Mod akidténe me, áyāle nwóge ngáne ngíne ebídé me á yĕl.” ⁴⁷ Áde ane mmwaád ányíné nê bɔob aá móðheléé yĕl akoo, ambíd Yesue á’sō. Anáé’áá ne mbwóg. Ankwe mó á mekuu. Héé áhóbéé á’sō wéé bad bésyāel chōm éche ékéá boj ásitén mó, ne ngáne módyéé bwâm melemlem mé pónré. ⁴⁸ Dóo Yesue áhóbéé aá, “A-mwān-a-mmwaád, adúbe ádōŋ ádídé we bwâm. Kăg ne nsaj.”

⁴⁹ Á pónré eche Yesue áhóbéé nê, dóo mod awé bélomé wéé Jairuse ápédé boj áhóbé néen aá, “Weétagné we Meléede ataged. Awoj mwān amaá mó awé.” ⁵⁰ Yesue awogé-’áá nê, boj álāngé Jairuse aá, “Weewogé mbwóg! Dúbé dúbpén, né mwān ádyéé we bwâm.”

⁵¹ Áde Yesue ápédé wéé Jairuse áwe ndáb, enkênháá etál aá, mod ampée áhîd mó á ndábte éetómee Petro, Jōne ne Jemse, nchoo ne ane mwān sáá bó nyaj. ⁵² Bad béchyé’áá, bélébé-’e. Yesue anláá bó nén aá, “Nyéechyéé”. Ane mwān eewédeé, akúne kúnén.” ⁵³ Bad bémbootéd mó awo, ngáne bémbii’é bán amaá awé. ⁵⁴ Héé Yesue áchángé mó ekáá, boj áchágé mó aá, “A-mwān, pádé ásé.” ⁵⁵ Dóo edádəŋ etímé mó á yĕl, apádé-’e ásē ábwōg-ábwōg. Yesue anláá bó aá, bébe mó ndyéed, ádyé. ⁵⁶ Yĕl enkóm nyaá bó sáj áte bwâmbwam, boj Yesue anláá bó aá, béekanlé modmod dyam áde ábénlé.

9

Yesue alómé bembapé dyôm-ne-bébe
(Mat 10.5-15; Mak 6.7-13)

¹ Yesue anchélé ábē bembapé dyôm ne bébe abwōg ahóg. Ambag bó ngíne ne kunze áhúd bad e’dádəŋ bé mbéb áte, ne ámad nkole nyaa ne nyaa. ² Anlóm bó aá, béké békale nkalaŋ mé nkamlén n̄ Dyōb, béchonjté-’e bad. ³ Dóo álāngéé bó nén aá, “Nyéewánlé chōmchōm á eke, ké ntón, ké ekwe, ké ndyéed káá ngáb, modmod eewánlé-’e mbóté ébe. ⁴ Ndáb ké ehéé eché nyésólé áte, nyédyé áwēd-te káéj ne mbwé míme nyésyəngéé. ⁵ Dyad ké áhéé-’e áde béekobéé nyé nken, nyétédē dó, nyékūd-te ebumbú á mekuu álúmed nén bán échab ebébtéd énōne bĕn.” ⁶ Héé bembapé bébwōgké ásē, békág dyad ne dyad téé, békale nkalaŋ mí bwâm, bédidé-’e bad bwâm hōm ne hōm téé.

Hérōde atage áte
(Mat 14.1-12; Mak 6.14-29)

⁷ Bɔob-poó Hérōde awé akamlánnáá aloj á Galilia anwōg mam mésyāel míme mêmbeñléd. Mewémten métágé’áá mó áte áyāle bad behóg bélóbé’áá bán, Jōne apuúdé, ⁸ ábíníí bán, Elaijaa atimé ámbid á nkōjsé, bémpée-’e bán, nkal é dádəŋ nhóg a’bōd mó atimé ámbid á alongé. ⁹ Hérōde anhób aá, “Mêmbel bésel Jōne nló. Nzéé ampée n̄wógeé bán abele mímén mekan?” Né dêmbél ádāŋ aá mónyin ane Yesue.

Yesue adídté ndun e mod
(Mat 14.13-21; Mak 6.30-44; Jōn 6.1-14)

¹⁰ Áde bembapé bé nlómag bélúú ámbid, bénlāá Yesue mam míme bélélé. Héé átéde bó boj átimné bó á ahángé á hōm á dyad á Betsaida. ¹¹ Áde amute á bad áwogé nê, dénhid mó áwed, káéj bétán mó. Ankob bó bwâm, ákanlé bó pôle e nkamlén n̄ Dyōb, áchonjté-’e bad ábe bélédé’áá bwâm adyé. ¹² Áde ngukél épédé dóo bembapé bélângé Yesue bán, “Chené ábén bad, bétimé’ á myad-té míme médé bénben, ábel béléd ndyéed ne hōm áde bénáá’é. Ndyéed eésáá hén, e’noj-’e bésaá wéé dédií nén.” ¹³ Héé Yesue álāngéé bembapé aá, “Nyé bó nyébé bó chōm éche bedyéé.” Dóo bélóbéé bán, “Sêwóó e’wéle é’taan ne súu ébe. Ene ndyéed eéhéléé bad bésyāel akwog.” ¹⁴ Mesongé mé bad ábe bélédé áhed mémbe e’kálé é’taan. Boj Yesue anláá ábē bembapé aá, “Nyélad bad áte, nyékab bó boj akab téé ábē móom mé bad métáan.” ¹⁵ Bénkăb bad áte ngáne ánhōbpe. ¹⁶ Héé Yesue átéde ábē e’wéle é’taan ne échê súu ébe, ákabé áte, ásagnán Dyōb boj ábagé bembapé aá békabpe bad. ¹⁷ Bad bésyāel bénkyé, békód-te káéj ene ndyéed élyāg ásē, éche béladé áte e’lój dyôm ne é’be.

Nzé-módé Yesue mwěn ákoo abé?
(Mat 16.13-28; Mak 8.27-9.1)

¹⁸ Mbwe nhóg Yesue anchib yael aké dé akáne. Bembapēs běnpen bōo bémbe áhed. Ansedéd bō aáken, “Nzé-módé bad bō béhóbeé bán ndé?” ¹⁹ Béntimtén mó bán, “Donge á bad béhóbe bán, edíi Jone Ndusene. Donge áhōbē bán, Elaijaa, běmpēe bán, nkal édādəj a'bōd atimé ámbid á alongé.” ²⁰ Dōo Yesue áhóbeé aá, “Boj nyéběn-ne, nzé-módé nyéhóbeé bán ndé?” Dōo Petro áhóbeé aá, “Edíi Ane Awé Dyōb Áwōgté.”

²¹ Héé ásimeé bō etúu áte, álāngé-’e bō aá běepanlé áte. ²² Ambád aá, “Mwān-a-Moonyonj atángéné ákūd metake híin, bad bémbeáá bōob beprise bémbeáá ne bemeléede bē mbéndé bēbāj-’e mó á yael. Béwūu mó, boj e'pun ábe é'lonténé é'láán, ápuú.” ²³ Anláá moosyáél áhed aá, “Kenzéé awé adéa me ahíd ásob yael mendib, ápēm ádē awōg mbwe téé, boj áhíde me. ²⁴ Áyāle kenzéé awé ahede ádē alongé asoj, ábōd dō. Kenzéé-’e awé abódé ádē alongé áyāle echēm, ákūd alongé áde déemaá”. ²⁵ Nsyáéjníhée mod ákudté nzé akudé nkōjsé nisyáél boj abóo, kē’e abódé échē edādəj. ²⁶ Kenzéé awé ákwāgēn me ne ábēm e'yale, Mwān-a-Moonyonj mómpē ákwāgēn mó á póndé echē ápeé ne ehúmé échē, nédē ehúmé é Sán ne ángel éche ésáá. ²⁷ Boj ámbale, baahóg bédé nló ámīn bōob, běenyínenné kwéed dīd, áde běesébpēe nkamlen n̄ Dyōb anyín.”

Yael ehāngléne Yesue
(Mat 17.1-8; Mak 9.2-8)

²⁸ Néé émádē ké e'pun waam, áde Yesue ámáá ahób nē, ankeén Petro bō Jón ne Jemse á ekone mīn ákáne. ²⁹ Áde ákānnéé nē, e'só bēnhāngléen mó á nló, nkobe mímē mó-’e mípúbé féréd, mímwaá-’e áte. ³⁰⁻³¹ Ábwōg-ábwōg bad bēbe, Mosse ne Elaijaa, bémbeidēn ehúmé é ngum, běbootéd mó akalēn. Békálé’áá ngáne álonēdtē ntíi n̄ Dyōb tāngene kwéed eche áwēé á Jerusalēm. ³² E'chó bénlōn Petro ne baáb á dīd. Áde békábnédé bénýin ehúmé échē ne bad bēbe áhed. ³³ Áde ábē bad bēbe bétedteé Yesue, dōo Petro álāngéé mó aá, “A-Sán, ébóó ngáne syáá dédií hén. Délōj e'bam é'láán, échōj, éche Mosse ne éche Elaijaa.” Anhób nē ésebán abií chōm éche áhóbeé. ³⁴ Eépedéé ké amad á nsəl, boj mbag ébíd, ékúdtén bō. Nén dénkōbēd bō mbwōg. ³⁵ Héé běwōgē ehób ébíde á mbag-tē nén, “Mwān awēm mó nén. Mōo mípwédé. Nyéwōgne mó.” ³⁶ Émáá-’áá ahób nē dōo bénýiné Yesue mwěnpen. Bénkoó ádén akan ésebán běkanle modmod dō.

Yesue achōjté kódemod
echē edādəj é mbéb émbēé áte
(Mat 17.14-18; Mak 9.14-27)

³⁷ Áde bīn é sárgé, Yesue bōobé bembapēs bēnsüd á ekone-sé. Ndun e mod ehye mó abomen. ³⁸ Héé mod nhóg á echoj é bad-tē wē álēbpeé mó aá, “A-meléed, sôn, ncháa’ wē mēé, énon awem mwān á dīd. Adíi me mpom mó mwān. ³⁹ Edādəj é mbéb étage mó. Nzé échāngé-’e mó, abelé abón esaád, ahún ásē, ánuadé kééj mehod mébīdē mó á nsəl. Élédte mó achene, né émáá mó yael ached áte. ⁴⁰ Mempeén mó wēé ábōj bembapēs, ncháj bō mēé, běbídéd mó edādəj é mbéb chē áte, boj běeheléé.” ⁴¹ Dōo Yesue átintanné aá, “Wáā, nyé bad bē’ chii, mbeltéd mímēn méetyéeméé, nyéewoo-’áá adúbe. Chán mápeé nyé adyeen boj nyéédubé me? Hyéené awoj mwān hén.” ⁴² Áde ane mwān áhúé’é nē, edādəj é mbéb éched émpíí ane mwān, ébōm mó ásē, ánuadé. Dōo Yesue ákānné échē edādəj é mbéb áte, ádīd ane mwān bwām, ábāg-ke mó wēé sáá. ⁴³ Menyáké ménkōb moosyáél, ânyín ndale a akan awé Dyōb ábélē.

Yesue akānlé eche kwéed ngan ámpē
(Mat 17.22-23; Mak 9.30-32)

Áde bad bělyágé bénýágéé nē, áyāle chōm éche ébénlédé, Yesue anláá bembapēs néen aá, ⁴⁴ “Nyésôngten dyam áde n̄hēdēé nyé aláa bwām. Běbě Mwān-a-Moonyonj á mekáá mé baányoij.” ⁴⁵ Boj ábē bembapēs běenkēnsonténné chōm éche ánhōbpē. Émbē néé ngan echē elelé bō atóge, běbáá’áá-’e mó asedēd.

Nzéé atómténé mod
ambáá abé á'sō é' Dyōb?

(Mat 18.1-5; Mak 9.33-37)

⁴⁶ Bembapéé bémbootéd aswanjtén tângene mod awé atómténe mod ambáá abé áwab tîntê. ⁴⁷ Yesue anchém bó mewémten áte. Antéd mwămpin ím mwëndem, ápëen mó áwe akéb. ⁴⁸ Dóo álângéé bó nén aá, “Kéñzéé awé akobé anén mwän á dlin ádêm, né akobé me. Kéñzéé-’e awé akobé me, né akobé ane awé alómé me. Né-oó, ane awé adé mwămpin áwen tîntê, né mó atómé mod ambáá abé.”

Mod awě adé awōŋ

(Mak 9.38-40)

⁴⁹ Jōne anhbó aá, “A-Sáj, sênnýín mod abídte bad e’déadəŋ bé mbéb áte á dín ádōŋ, sênláá-’e mó bán ásôg abel nê, áyéle eésaá ne syánē.” ⁵⁰ Dóo Yesue álângéé bó aá, “Nyéelángé mó bán ásôg abel nê. Kéñzéé awé eetángán syánē né adé ne syánē.”

Bébáá Yesuε nken akob

51 Bœob-pœá, póndé eche Yesue ántəŋgēnnē akē ádyōb embootéd aρε. Né-ɔ́, ammäd atíi aá, mótaŋgēnē akē á Jerusalem. **52** Hé-'aá álómé mésénzé á'sō. Ménké á mwă dyad a Samaria nhóg, ábele mó mbojsén. **53** Boŋ ade ápéédé áwed bad bé dyad bénkénkobpé mó nken áyəle á Jerusalem dőo ákágé'áá.* **54** Áde bembapεε, Jemse bó Jən bényíné nê, dőo bésédté Yesue bánken, "A-Sáŋ, edəá wéé séchéle muú ádyōb, nhye íhyáad bó-yε?"† **55** Boŋ Yesue ankuné áwāb, ákannē bó áte.‡ **56** Héé bóbə́ békíí á dyad démpēe.

Bad ábe bémpon Yesue ahíd

(Mat 8,19-22)

⁵⁷ Áde békagké nê, mod nhóг anláá Yesue aá, "Měhíd we kékéhéé áde ékagké." ⁵⁸ Dóo Yesue áitimtanné mó aá, "E'bubwóg é'wóó ábab e'lóm wéé bésóléé, menon-né ámpē méwóó mímab müm, boŋ Mwǎn-a-Moonyoŋ eewóó'é hōm áde ábannéé nló." ⁵⁹ Yesue anláá mod ampée aá, "Hyág, éhíde me." Boŋ ane mod antimtén mó aá, "A-Sáŋ, mwé, ínsébe nké nílímme echem sáŋ." ⁶⁰ Yesue anláá mó aá, "Mwé ndim nílímme mímāb ndim mí bad. Boŋ we, éhedne bán, éke ékanle bad nkalaj mé nkamlen í Dyöb." ⁶¹ Mod ampée anláá Yesue aá, "A Sáŋgú, měhíd we, boŋ mwé, ínsébe nké ílyágtén echem ndáb." ⁶² Boŋ Yesue anláá mó aá, "Kéñzéé awé aboótédé hōm alfi, boŋ ánóné' ámbid, eékwognedéé ábel nsón ásé e nkamlen í Dyöb."

10

Yesue alómé bembapéé móom saámbé ne bébe

* 9:53 *Aloj á Samaria démbé* átíntê melonj mé Galilia ne Judeya. Boj bad bé Israël bénkênkobpé bad bé Samaria néé baányaŋ. Né-óó bad bé Samaria békwentannaá bad bé Israël ábe békídé’áá á Galilia nken akob nzé békágé’áá ngande achog á Jerusalem. † 9:54 *Donje á kálag é* só ébáde bán: nêngáne Elaijaá ámbenlé. ‡ 9:55 *Donje á kálag dé* só ébáde bán: anhób-pe áá, “Nyéebíí’é edaédəŋ éche ékamlan nyé. Mwán-a-Moonyon eépedeé âwúu bad, apedé dásó áson bó.” * 10:1 *Móom saámbé ne béké*: Donje á kálag dé’só áwóó: móom saámbé.

nyé.⁹ Nyédide bad bé nkole bwâm, nyéláa-'e bô néen bán, 'Nkamlen í Dyöb ímpédé nyé bënben.'¹⁰ Boj dyad ké ahéé áde békobéé nyé nken, nyéke á ntém nzii, nyéhâb néen bán,¹¹ 'Ké échén ebumbú éche embé sé á mekuu, sêkudté nyé chó, boj ké né nyébíi bán nkamlen í Dyöb índé bënben.'¹² Nlânge nyé meé, á epun é nkáásé, nkógsen ríme dyad á Sodom dényinné mебé mwămpîn tómaa ríme bad ábe bédé ádê dyad áte békudté.

Édé nqol ne bad ábe békunne mbíd

(Mat 11.20-24)

¹³ “Á-bad bé Korazin, ébēen nyé ebébtéd! Ébēen nyémpē ebébtéd á-bad bé Betsaida! Áyāle nzé émbē bán, ndèle é mekan éche Dyōb ábélé áwēn myad, êmbenléd nê á dyad á Tire ne dyad á Sidōn, né bénwāā melebe se etûn, bémwagtéd-te mbúmbú áyāl âlúmed nén bán, békájléneá ádab abé dé mbéb. ¹⁴ Boj mbwe mé nkáásé, nkáá mímme bad bé Tire ne bé Sidōn mébē mwămpīn tómaa mímēn. ¹⁵ Nyé bad bé Kapenahum ámpē, nyéwêmtan bán, nyémaá ape ádyōb,

¹⁶ Héé álāñgeé bembapéé néen aá, “Kénzéé awě awógné nyé, né awógné me, boj kénzéé awě abáá nyé á yĕl, né abáá kéjne me. Kénzéé-’e awě abáá me á yĕl, né abáá kéjne ane awě alómé me á yĕl.”

Bembapεε Móom saámbé ne bébe béhúú ámbid

Yesuε awóge menyinge
(Mat 11.25-27, 13.16-17)

²¹ Ábwōg-ábwōg Edəédaŋ éche Ésáá† énwōgēd mó menyinje bwâmbwam, ahób aá, “A-Tê, Sáŋgwéé a nkoy ní sé ne mí míñ, nságneñ ímbê ne we áyale elúmté mpín mí bëndem mam míme ébájné bad bé debyéé ne bad bé nsôjten. Εε, a-Tê, nê dën dóo édáá weéé, ébenled. ²² Nláa nyé méeé, Echem Sáj ebagé mekan mésyäel áwêmmekáá. Mod ké nhógo eekonjtéé mwän abíi ésebé Dyöb Titéé. Mod ké nhógo ke ámpé eebíi’é ngáne Titéé ákójte abé ésebé mwän, ne kénzéé awé mwän adéá aá mólúmed mó.”

²³ Héé ákúnné wéé bembapéé, boj álāngé bó á kun-tê nén aá, “Nsimé ne bad ábe bénýíne’ mekan míme nyényíneé néen! ²⁴ Á mbále nlângé nyé néen mée, bekal-bé-e’dáédañ híin ne kâj é bad híin bénwanén ânyín mekan míme nyényíné ne âwóg mekan míme nyéwogé boj bénkénýinné, bénkénwog-kaá.”

Ngan e mod a Samaria awě aboó nlém

²⁵ Bəɔb-pɔ́ó meléede a mbéndé anhyě Yesue akəg áte aá, “A-meléed, cheé mébenlé boj nkūd alongé áde déemaá?” ²⁶ Yesue antimtén mó aá, “Chán éténlédé á kálag e mbéndé. Cheé éláá áwēd-te?” ²⁷ Meléede a mbéndé ankwentén aá, “‘Étāŋgéné bán édəŋ Sáŋgwéé ádōŋ Dyōb ne nlém nísyāəl, ne edədəŋ ésyāəl, ne ngíne esyāəl, ne mewêmten mésyāəl.’ ‘Édəŋ-’e mwányon nêŋgáne echoŋ yěl.’” ²⁸ Yesue anláá mó aá, “Ebíí akwenten. Nzé ebélé áned, né wékud alongé áde déemaá” ²⁹ Ngáne ane mod áhédé’áá aá mósuud yěl nzom, ansédéd aáken, “Nzé békchägeé wěn nē?” ³⁰ Átimten mó, Yesue ankǎl ngan aá, “Mod a Israel nhóg akagé’áá eke, ambíd á Jerusalem, átimé á Jeriko. Áde ápédé á etûn-tê, bechib

[†] 10:21 Donge á kálag dé'só áwóó Edəádən éche Ésáá; émpēe bán, échē edəádən.

bénkōb mó, békōbēn mó chōm ésyāēl éche ánwālēē. Bêmbomtéd mó káejj áhédé awé. Dóo béchénné mó á nkag n̄ nzii. ³¹ Prise póg chômpē esyōgké áá melemlem mé nzii. Dóo átáné ane mod. Ambamé nkag n̄ nzii mímínií. ³² Mod a túmbé e Levi awé abelé áá nsón á Ndáb-e-Dyōb[‡] awé mómpē ampē áhed, boj anyín mó, ambamé melemlem. ³³ Boj mod a Samaria nhóga awe atómé'áá ene nzii, ampē áhed. (Bad bé Samaria bōbē bad bé Israel béechemtannaá.) Áde ányíné mó, anwóga mó ngol, ³⁴ ákē áhed, ahé mó mel á sii-tê, ákaj chó, boj ápemē mó á ésel mîn. Apeéné-'áá mó á dyad-tê, boj ásōnlé mó á ndáb e beken, ábōngē mó. ³⁵ Néé bín é'sángé ahúd e'kálé é'taan, ábag nwóó ndáb aá, 'Téd nén, étognan anén mod, kéchéé émpēe éche wébēbēdtē, mětimtéd we ámbid á ehíu.' " ³⁶ Héé Yesue ásedteé ane meléede a mbéndé aáken, "Átinté e ábē bad béláán ábe bértan ane mod awé bechib bénlōgēnné, ahéé anlúmed aá módē waáb?" ³⁷ Meléede a mbéndé ankwentén aá, "Ane awé anwóga mó ngol." Héé Yesue álāngeé mó aá, "Kág-kō, wémpē ébèle' melemlem."

Mataa bó Maria békóbé Yesue nken

³⁸ Yesue ne ábē bembapēs bémpe mwā dyad nhóga. Mmwaád nhóga awe békágé'áá bán Mataa ankob bó nken. ³⁹ Ane mmwaád mwányan abédé dín bán Maria. Maria anhyé Yesue adyee á nkag, áwóga mekan ímme áyágté'áá. ⁴⁰ Boj Mataa anhágén áte ne nsón n̄ ndáb-te. Dóo áhyédé Yesue aláa aá, "A-Sángú, weenyinéé nén weé, awem mwányan atědnédé mměmpen nsón n̄syāēl-ε? Láá mó weé, áhyé áwōngéen me." ⁴¹ Boj Yesue antimtén mó aá "Á-Mata, nlém nítage we áte áyále ekud é mekan. ⁴² Boj dyam ádé ahog áde ákoo etógnén abé. Maria apwedé dó, ádē-'ε bwám. Meéhēlēē-'áá se míbel se békóbēn mó dó."

11

Ayáged dé mekáne (Mat 6.9-13, 7.7-11)

¹ Mbwe nhóga Yesue ambé hōm, ákânné'. Áde ámáá akáne awé mbapēs nhóga anláá mó aá, "A-Sáj, yágéd sé ngáne békânnéé ngáne Jone án'yágédtē ábē bembapēs." ² Yesue anláá bó aá, "Nzé nyéhede akáne, nyéhōb bán, 'A-Té, edúbé ébē ne ádoj dín.

Mmoj nkamlen nhyé nítéd etál.

³ Bág sé eched ndyééd e epun é bín* mbwe téé.

⁴ Lagsén sé mímed mbéb,
áyále sémpē sélagsan mod téé awé apánné sé,
weémwág se sélhún á mekagsen-tê."

⁵ Dóo áhóbéé aá, "Nzé ewóó wén, boj ekií áwē melúde weé, 'Amúē, bál me e'wéle é'láán hē, ⁶ són, nkudé nken awé achabé abíd, awem nsón-a-echoj apedé áwêm. Meewoo-'áá chōm-éé níchágtanné mó." ⁷ Boj ane wén mó-'é atímténé we á ndáb-te aá, 'Weétagté me. Mmaá me ekob adib, syáabe ábém bán sêmaá anaa ásē. Méehenlé apáde ásē ábē we chōmchōm.' ⁸ Nláa nyé á mbále meé, saké ké echoj éche nyédií, chóo épád mó ásē. Boj abádnén áde wébádnenné wén, dóo dékéj boj apáde ásē, ábē we kéchéé éche éhdedé.

⁹ Nlānge nyé nén meé, hedén Dyōb, ábē we. Héd, Dyōb débél enyín, kum ekob, Dyōb dédibnéd we. ¹⁰ Áyále kénzéé awé ahédné Dyōb, ákud, awé ahedé-'ε, anyín. Kénzéé-'ε awé akumé ekob, Dyōb dédibnéd mó. ¹¹ Nyé besáá bá bán, nyé ahéé mwán áhédénné súu, boj mó-'é átimé ébagé mó nyé? ¹² Káa nzé ahédné we akii á kúb, boj we-'é étimé ébagé mó ngabobe a mpwen? ¹³ Nzé e'bébtéd é' bad néé nyé nyébage áben bán káse é bwém, tógtén-naá echén Sáj awé adé ámín? Chán-nō éebaá bad Edéadəj éche Ésáá ábe bhédné mó chó."

[‡] 10:32 Mod a túmbé e Levi: Dyōb dēmpwéed enén túmbé ábel nsón á Ndáb-e-Dyōb. Béwóngánnáá prise ánabe Ndáb-e-Dyōb áte ne ábojsen ntíi m̄ mendé. * 11:3 Ndyééd e epun é bín; káa ndyééd e epun éche éhúε'.

*Yesue eésaá nlatén ne kâj e' d'aédañ bé mbéb
(Mat 12.22-30; Mak 3.20-27)*

¹⁴ Epun ehóg, Yesue abídté' áá mod edaédañ é mbéb áte éche ênkwíd ane mod ebóbé. Áde émáá mó abíd áte, ane mod ambootéd dyam ahób. Nén, dénkōbēd ndun e mod eché ebédé áhed menyáké bwâmbwam. ¹⁵ Boj nguse é bad énhôb bán "Bélzebule, kâj e' d'aédañ bé mbéb mó abage mó ngíne ábíded bad e' d'aédañ bé mbéb áte." ¹⁶ Bémpēe ábe bélédé' áá mó akəg áte bénhôb bán, álumed bó e' chemléd ábe é'húú ádyôb. ¹⁷ Mô-'e ambíí mímab mewêmten, né-ó, anláá bó aá, "Aloj ké ahéé áde ákábné áte, boj nchemtén mées, débēb. Abum á ndáb áde nchemtén-ne mées, dómpē dépānted áte. ¹⁸ Nzé édé bán, nkamlen ímme Satane íkábné áte, chán-nô méhenlé atyéem? Nhóbe nê áyâle nyêhôbé bán, mbidte' bad e' d'aédañ bé mbéb áte ne ngíne eché Bélzebule. ¹⁹ Nzé ngíne eché Bélzebule chôa míbenladté ábíded bad e' d'aédañ bé mbéb áte, né ngíne eché nzéé-'ô ábën bad ábe bélidte e' d'aédañ bé mbéb bélénladté? Bén bôa békwid nyé nkáá. ²⁰ Boj ngáne édií nén bán ngíne e Dyöb chôa míbenladté ábíded bad e' d'aédañ bé mbéb áte, nê álûmte nén bán nkamlen í Dyöb ímpédé átînté echén. ²¹ Nzé ngíne e mod ebörséné yâl, enone ádë dyad, échê chôm ké ehóg éekagké hõm. ²² Boj nzé mod awé atómé mó ngíne, abûlé mó áte, abwögké-'e mó, abelé ákobën bwém ábe áwanneé nzum, ákabtéd-te bwém ábe ákobné mó. ²³ Né-ó, kénzéé awé eésé ne me, né atângan me. Ane awé eewóngán me âlad, apáa páán.

*Nzé edaédañ é mbéb étímé mod á yâl ámpé
(Mat 12.43-45)*

²⁴ "Nzé edaédañ é mbéb ébídé mod áte, ébelé ébwâgē á ehyânge áhed abwög áde ákâmmesé áte. Nzé éekude, ébelé éhôb aá, 'Mëtîm ámbid á ndáb eché mémbidte áte.' ²⁵ Ape áde épaké-'e, ébelé étán néé ndáb ésáá áte, bénâbpé-'e chô áte. ²⁶ Héé ékagké bôob, éke épéen e' d'aédañ bé mbéb běmpēe saámbé ábe é'dé ebébtéd tómaa mwën, boj é'hye é'sól ane mod áte, é'bwög-ke e' dii áhed. Ákên eched, ane mod abâg ebébtéd tómaa ngáne ánsébëë abé."

Menyinje mé mbále

²⁷ Bôob-pôó áde Yesue áhôbé nê, mmwaád nhóg átînté e bad, ankánéd ehôb ámîn aá, "Nnam míbë ne abum áde áchyáá we, ne abûi áde ámwâjté we." ²⁸ Yesue anhôb aá, "Nnam mébë dásô né bad ábe bêwóge' Eyale é Dyöb, bêbelé-'e ngáne éhôbeé."

*Bad bë' chii bêehiidëë e' chemléd dïd
(Mat 12.38-42)*

²⁹ Amute á bad dêmbootéd akəl. Héé Yesue áhôbeé nén aá, "Nyongel e' chii edí nyongel e e'bébtéd é' bad. Béhede e' chemléd bé menyáké anyín, boj békudté, nzese e' chemléd bé menyáké ábë Jona. ³⁰ Nyaa eché Jonaa ámbëë néé e' chemléd wéé bad bë Ninivé, chôa Mwân-a-Moonyon ábëë wéé enén nyongel e bad. ³¹ Á Mbwe mé Nkáásé, mmwaád awé akamlannáá aloj á Seba, anyemé á soj-tê, nchoo ne nyongel e bad bë e' chii. Ábïd mbón eché ékwid bô nkáá. Békwid nkáá áyâle ambid se nchabnede wéé nköjsé ñsogé, áhye déwógleñ mam mé debyéé ímme Solomone áyágté'áá. Boj chii nén mod adé hén awé atómé Solomone. ³² Á Mbwe mé Nkáásé bad bë Ninivé bénymemé á soj-tê nchoo ne enén nyongel e bad. Bébïd mbón eché ékwid enén nyongel e bad nkáá, áyâle bad bë Ninivé bêntedé mímab mbéb áde Jonaa ânkäléé bô Eyale é Dyöb. Boj chii nén mod adé hén awé atómé Jona.

*E'nyinén bé ekide é' yâl e mod
(Mat 5.15, 6.22-23)*

³³ "Modmod eémää' éetrükáj achod se ákoo chô káa akúdtén chô † áebwög-sé. Boj abelé ákélë chô dásô ámîn, abel boj kénzéé awé asôle á ndáb, ányínne ekide. ³⁴ Dïd dôo áde ngáne etrükáj é yâl e mod. Nzé dïd ákénlé we áte, echon yâl esyâél chómpé ebelé

† 11:33 Donge á kálag dé'só éewóo' é káa akúdtén chô.

ekélé. Boj nzé déékênle, yäl chómpē ebélé elón we ne ehíntén. ³⁵ Né-óó, nyêtóo, ábel chöm éche ényînte nyé ekíde, éetimé abé chöm éche étimte' nyé á ehíntén-tê. ³⁶ Nzé édé bán echoj yäl esyäál elóné ne e'nyínén bé ekíde, ésebán ehíntén édé abwóg ké ahóg, né yäl émwaá áte, melemlem ngáne etrukáj épéntéé ekíde."

*Yesue aselé Befarisia ne bemeléede bé mbéndé
(Mat 23.1-36; Mak 12.38-40)*

³⁷ Á póndé eche Yesue áhóbeé nê, Farisia nhóg, anchélé mó aá, áhye búnō bedyé ndyéed áwe ndáb. ³⁸ Né-óó anké, asól á ndáb-te, búnō bedyé á tébelé. Ane Farisia ambé menyáké ânyín bán Yesue eewopré mekáá ngáne éhédnádtáá, boj ábootéd ndyéed adyé. ³⁹ Dóó Sájgwéé álângéé mó aá, "Nóné", nyé Befarisia, nyéwobpe mbwendé ne díse ámbid e ebwóg, boj adum á bwém ne ebébtéd bôó béléné áwen nlém-tê. ⁴⁰ E'dimdim é' bad ngén! Mod awé ahágé ámbid e ebwóg, saá mó ahágé káéjne áte-ye? ⁴¹ Boj nyétéd bwém ábe é'dé áwéed-te, nyébage' betóótöké bé bad. Né chöm esyäál áyäál echén ésáj.

⁴² "Medim ne nyé, Befarisia! Nyétéde ké meseb ne nduu ne byaá ábíníí é'syäál bempée, nyébage Dyöb donge nhóg átinté e monge dyom. Boj nyéhédéé e'boj bé nlém ne edänge é Dyöb alúmed. Nyéntängéne rímén mésyäál abel, ésebán nyéchobte' rímíníí.

⁴³ "Medim ne nyé Befarisia! Nyédæ metii mémbáá adyee á ndáb é mekáne, nyédæ-'e melenten mé edúbé akud á dyon-tê. ⁴⁴ Medim ne nyé! Nyédíi née soj éche éssómé, éche bad bétoméé ámín, ésebán békíi."

⁴⁵ Dóó meléede a mbéndé nhóg álângéé mó aá, "A-meléed, nzé ehóbe nê nedé né esyäé' sémpé." ⁴⁶ Yesue ankwentén mó aá, "Medim ne nyémpē bemeléede bé mbéndé! Nyépémítad bad nted ríme rílélé apém, boj nyébén nyéebanéé ké ekáá ápemed bô mó.

⁴⁷ Medim ne nyé! Áyäle nén, bekal bë'dædæj ábe besóó bénwū'ë, nyélóngé bô soj.

⁴⁸ Né-óó nyébide' mbónj, nyélümte-'e bán, besóó bëmbel bwám ngáne bénwū'ë bekal bë'dædæj. Nyé'aá nyélóngé bô soj. ⁴⁹ Áyäle nê, Dyöb ne ádë debyéé anhób nén aá, 'Mëlômë bô ábêm bekal bë'dædæj ne bembapéé bë nlómag, bëwū' behóg, bëhæké-'e ábíníí.' ⁵⁰ Né-óó, enén nyongel e bad chôó ékùd nkógsen áyäle bekal bë'dædæj bësyäál ábe rímab mekií mésyóglé se á mbooted mé nköjsé, ⁵¹ mbooted ne mekií rímé Abelé átimé' wéé Sakaria, awé bénwū'ë átinté e menyán mé mende ne hõm áde ásáá. Á mbále, enén nyongel e bad ékùd nkógsen áyäle rímé mekan mésyäál.

⁵² "Medim ne nyé bemeléede bé mbéndé! Nyékáá e'kii bë ekob é debyéé. Nyébén nyéesaá asól, nyékæ-'e bad bempée ábe békede asól."

⁵³ Áde Yesue ásyängéé áhed áké, bemeléede bé mbéndé ne Befarisia bëmbootéd mó ahób bwâmbwam, bësedté-'e ekud e mekan. ⁵⁴ Békéle'áá rímén mésyäál áhíined mó melám ábel békoben mó awusé.

12

*Elebé tângene bad bë elangé
(Mat 10.26-27)*

¹ Ámbid e póndé ndun e mod enladén áte, káéj etál éebédeé. Dóó Yesue ábóótédé bô akalén, mbooted ne bembapéé álângé bô nén aá, "Nyétéd póndé ne elangé éche Befarisia, édé nêngáne esulten. ² Dyamdyam déesaá á e'kojnéd-te áde déebíd áwed. Ké ahóg-ke déesaá, áde ásóómé boj bán déebyéenné. ³ Dyam ké áhéé-'e áde nyéhóbé á ehíntén-tê, déwógnéd á e'nyínén bë ekíde. Dyam áde nyékálé-'áá á kun-tê ámbid e ekob, dékanléd á nhéné.

*Ane awé bétängéne abáj
(Mat 10.28-31)*

⁴ "Amúé, á mbále, nyéewogé mbwóg ne moonyor awé ahèle awúu ekob é yäl ésebán ahèle dyam démpée abel. Awäb eetoméé nê. ⁵ Nláa nyé meé, mod awe nyétängéne abáj, adfí ane awé née ámáá we pemé e alongé akoben, awónj-'e ngíne eché ábwéméé we á dû-á-muú. Ne mbále ane móo nyétängéne abáj. ⁶ Éesaá mbále nén bán, káppe ébe ngén,

chóo béchannéé ndun étáan-ne? Boj ké nê Dyöb déechatánné ké póg.⁷ Dyöb ábíí káéñne mesongé mé e'sid ábe é'dé nyé á nló. Né-oo, nyéewogé mbwog, nyéedé etógnén tómaa ndun, ké êmbuú ké áte.

Âkob Yesue káa âbaj mó á yél

(Mat 10.32-33, 12.32, 10.19-20)

⁸ “Á mbále, kénzéé awé ábíd me mbój á'so é' baányoŋ, Mwán-a-Moonyoŋ mómpē ábíd mó mbój á'so é' ángel é Dyöb. ⁹ Boj mod awé abáá me áyél á'so é' baányoŋ, me-'e měbāŋ mó áyél á'so é' ángel é Dyöb. ¹⁰ Kénzéé-'e awé ahóbé eyale é mbéb tâŋgène Mwán-a-Moonyoŋ, ákūd alagsen, boj kénzéé awé ahóbé e'bébtéd é' mekan tâŋgène Edéadéj éche Ésáá eekudté alagsen. ¹¹ Nzé édé bán bésómné nyé wéé belyáged bé dyad ne benkamlene, nyéetágé áte, ngáne nyékáa'é káa dyam áde nyéhōbpé, ¹² áyèle nzé póndé epedé, Edéadéj éche Ésáá éyágéd nyé chóm éche nyétáŋgéné ahób.”

Ngan e eyókél é nhon m̄ mod

¹³ Átînté e ene ndun e mod, nhog anláá Yesue aá, “A-meléed, láá mwánned wéé ákabe súmō mbwog áte.” ¹⁴ Boj Yesue antímten mó nén aá, “Nzé-módé abánné me née mod awé akáadte’ bad, ákabe nyé mbwog áte?” ¹⁵ Dóo álâŋgée bó moosyéál aá, “Nyétóo, nyéebanné nlém áyéle awój á bwém, áyèle saké nhon móo nídice moonyoŋ á alongé.”

¹⁶ Ankale-’e bó ngan aá, “Nhon m̄ mod nhog mémbé. Anwóoj nzag. Áde ene nzag échyáá, embídéd medyé nkute ne nkute. ¹⁷ Nhon m̄ mod mē ménhob áwe nlém tē aá, ‘Chán mébenlé boob áde etál éelyágeé wéé níkonjéé medyé?’ ¹⁸ Dóo ádólé áte chóón boj áhōbē aá, ‘Nén dóo mébenlé. Měpāŋ échem ndáb é e'konnéd, nlóŋ émpēé éche ekálé áte, boj nkum medyé áwēd-te, ne nhon m̄mēm nísyéál. ¹⁹ Á póndé echet-taá mélāa’é échém edéadéj meé, nlädté yél nhon m̄me medyéé mwé ne mwé. Boob-poó měched yél, nídyâg, mímwâg, níchogé-’e alongé.’ ²⁰ Boj Dyöb dénláá mó nén, aá ‘Edimdim é chóm chén. Nkuu nén děn měkobén we pemé e alongé. Ábê bwém é'syéál ábe émáá-’aá alad áte, nzé-módé wélyágnedté bó?’ ²¹ Né dóo édií ne kē nzé-módé awé akúmmé yél nhon, boj eésé nhon á'so é’ Dyöb.”

Weétágé áte á alongé

(Mat 6.25-34)

²² Dóo Yesue álâŋgée ábē bembapéé nén aá, “Né-oo nyéetágé áte á alongé se nyéhōbē nén bán cheé nyédyéé, kē'e cheé nyéwaa'é á yél. ²³ Alongé átómé ndyéed, échen yél-le ámpē edé etógnén tómaa mbóté. ²⁴ Nyénone’, nkónékon. Méewénëé bwém, méepádëé, méewoo-’aa hōm áde békongéé medyé. Kéné, Dyöb adídte mó! Nyéebíi’é bán nyéedé etógnén bwâmbwam tómaa menon-e? ²⁵ Nzé-módé áwen tînté ahèle átág áte káéñ, abád ké epun ehóg áwē alongé áyèle átageé áte?* ²⁶ Néé nyé modmod nyéeheléé mpín mé akan néé m̄mē abél, cheé ekáá boj nyétagé áte áyèle mam m̄me mélyáge ásé?

²⁷ “Nyénone’ mbonja ngáne ékwogéé. Éebeléé ntü, éebangéé mesan. Nlâŋge nyé nén meé, kē kâŋ Solomone ne m̄mē nhon nísyéál eewáa'aá mbóté éche épédé échén mbonja kē póg e'boj. ²⁸ Nzé Dyöb áhelsee áwāadté e'sum ábē é'bâg chii boj chán bélhé bó á dű, né éetómmé nyé awáad né-yé? Chán adúbe ádií nyé mwâmpin nén?

²⁹ “Nyéebanné nlém bán, cheé nyédyéé káa cheé nyémwëé. Né déetagté nyé. ³⁰ Échê nyaa é bwém chóo bad bé nköjsé béchyee’é akud. Awén Titée mwén abíí aá nyéetognéné ábén bwém. ³¹ Né-oo, nyésébe nyéhéd mam m̄e nkamlén í Dyöb, dóo Dyöb débeé nyé ábíníí bwém.

Nhon m̄me níde ádyob

(Mat 6.19-21)

³² “A-bänbän, nyéewogé mbwog. Echen Sáŋ awóó mewémten m̄me mésáá ábe nyéngíne e nkamlén. ³³ Nyésom áben bwém, nyébag betóótöké bé bad mòná. Nyéhéd

* ^{12:25} Abád kē epun ehóg áwē alongé káa áchab tómaa ngáne ádií.

ekwé é ngáb éche éehelé amaa ásē. Nyéhē nhon mímēn á e'kojnéd ábe é'dé ádyōb, wéé dyamdyam déebenlé mó, wéé bechib béehenlé mó achib, sii'-e éehenlé mó adyé. ³⁴ Nyébíí bán wéé nhon mbágkē mod, áhed dóo nlém-me mbágkē mó.

Mod-téé ábê mbojsén

³⁵ “Nyépûd abad, nyéchod-te etrúkáj, ³⁶ nêngáne bad ábe bésine’ echab sáj awé akií á ngande e e’wóngé ábel boj nzé ahúú húén, boj akumé ekob, bénednéd mó ábwôg-ábwôg. ³⁷ E’boj é’ yél áte ne bembalede ábe echab sáj épéé, boj atán ngáne bedyéé epin, bésineé mó. Á mbále ábojsén, ádíd bó ásē, atómtéd-te bó ndyéed. ³⁸ Ké melúde dóo ámpreé, káa epog é mbwembwé, boj atán bó melemlem, e’boj é’ yél áte belyág é’tán bó. ³⁹ Nyébíí-’e bán, nzé nwóó-ndáb abyéé’áá póndé eche nchib ápéeé, né ádyéé epin, ésebán atedte aá, bésal mó ndáb. ⁴⁰ Nyémpé nyétángéné mbojsén abé, áyále Mwán-a-Moonyoŋ ăpĕ á póndé eche nyéewémtenéé bán ăpĕ.”

*Mbalede awé abele mímē nsón
ne nlém nhóó ne awé eébélē’*

(Mat 24.45-51)

⁴¹ Petro ansédéd aáken, “A-Sáj, sé běn pén-eé ékanléé enén ngan-e, káa bad bésyāél?” ⁴² Sájgwéé ankwentén aá, “Né-óó, nyé mod té ábê néé mbalede awé awóó debyéé, awé abele-’e mam míme eche sáj álájgé mó aá ábel. Mó adé mbalede awé eche sáj ábánné aá ákamlén bembalede ábíníí, ányin-ne nén aá békudé ádāb akab á ndyéed póndé eché etángéné. ⁴³ Nnam mébē ne ane mbalede awé eche sáj áhūú’é, boj atán nêngáne ábeléé mam míme ánlýägténné mó. ⁴⁴ Ne mbále, nlânge nyé nén méeé, ane mbalede eche sáj ábané bwém ésyáél ábe áwóó áwe mekáá aá ákamlan.

⁴⁵ “Boj nzé ane mbalede adé mbalede a mbéb, boj ahóbé áwe nlém-té aá, ‘Éběm áte boj echem sáj áhūú á eke-té.’ Né-óó aboótédé ábíníí bembalede bé bebaád ne bé baachóm ábe bédé ásē eché awanen, ádyág bwém, ámwág-ke mím mékóbe mó, ⁴⁶ ane mbalede eche sáj áhūú epun éche éewémtenéé ne á póndé eché énkembíí’é aá áhūu. Né bébwém mó á ebwôg,† békógsén-ne mó ne nhel melemlem ne bad ábe békudé nló áte. ⁴⁷ Ane mbalede awé abíí ntíí míme sáá-a-ndáb, boj eébojsene, káa eehíde mímí ntíí ámbid, ákud mbéte e ngíne. ⁴⁸ Boj ane awé enkembíí ntíí, boj ábelé epandé, békudé mó kúdtén. Mod ké ahéé awé békudé abe, né-’áá békudé mó aheden. Ane-’e awe bétomténe abud dé abe, né-’áá bétomenné mó abud dé aheden.

Yesue aá mópeéné nkabén

(Mat 10.34-36)

⁴⁹ “Muú móó nhyédé akwéd á nkönsé. Menděj-’e méeé, né mémmod akóben. ⁵⁰ Boj ntángéné nsébé nkud edusen é metuné, mémad-te chó akud boj nlém mépwitéd me.

⁵¹ Nyéwémtan bán, nsaj móó nhyédé apeen á nkönsé-yé? Aáy, saké nsaj, nkabén móó mppééné. ⁵² Bootya boob áke ásō, ndáb eché ewóó bad bétáan ékabén áte, béláán bétángén béké, béké-’e bétángén béláán.

⁵³ Kokoo ēbē.

Sáá átāngén mwán a mwenchóm,
mwán a mwenchóm átāngén sáá.
Nyaá átāngén mwán a mmwaád,
mwán a mmwaád átāngén nyaá.
Nyájkélé átāngén mwán a mmwaád,
mod mwán a mmwaád átāngén nyájkélé.”

E’chemléd é’ bín

(Mat 16.2-3, 5.25-26)

⁵⁴ Yesue anláá amute aá, “Nzé nyenyíné mbag ébíde á mbøj, nyébelé nyéhób bán, ‘Mbúú échib boob’, ébenléd-te áned. ⁵⁵ Nyenyíné-’áá epub éhúé’ á ped e mbøj, nyéhóbé’

† ^{12:46} Bébwém mó á ebwôg káa bésel mó áte e’sónj é’be.

bán, ‘Enyen ébēnēd mod bɔob,’ ébé-’ε áned. ⁵⁶ Á-bad bé elangé. Néé nyépédé abíi ngáne béláa’é bín nén, cheé ékáá boj nyééhēlē mam írme mébenlad nyé á’sō-te chii nén achem?

⁵⁷ “Cheé ékáá boj nyébén nyééhēlē adul áte nén bán, kəse e akan nén eché ehednad abel? ⁵⁸ Nzé mod ahóbé aá, mókεene we á kóte, hěd nzii káéj nyúmō bétim ásē á nzii. Ésebé nê, nzé ahédé we á kóte, kóte chó-’ε ēbeé we á mekáá mé plûse, plûse chó-’ε éhē we á mbwɔg. ⁵⁹ Á mbále, nlângé we mée, weéhēlē-sé ebíd á ndáb e mbwɔg-tê wê káéj né etwedé ádōj alúm ásyāel.”

13

Nyétede abel dé mbéb, nyétimén Dyōb

¹ Áde Yesue ádíi áhobéé nê, dóo nguse é bad éche émbē áhed élângéé mó ngáne Payledé ánwūú’é bad bé Galilia áde békágé’áá Dyōb mende mé e'lém. ² Yesue antímten bó aá, “Nédē mewémten médé nyé bán, ábē bad bé Galilia ábe bénkùd échê ebén, bétomé ábíníí bésyāel ebébtéd abé áyāle bénwēē ene ndín e kwééd-ε? ³ Aáy! Á mbále, nzé nyééetédte mímen mbéb se nyétimén Dyōb, né nyé moosyāel nyééwé, nyébóó-’ε. ⁴ Chán-náa ábíníí dyôm á mod ne waam ábe ntój-ntój n̄ ndáb ménkūmtédté ámīn á dyad é Silom, boj béké? Nédē mewémten médé nyé bán, bénkùmtédté abé tómaa bad bésyāel ábe bénlōj á Jerusalem-ε? ⁵ Aáy! Á mbále, nzé nyééetédte mímen mbéb se nyétimén Dyōb, né nyé moosyāel nyééwé, nyébóó-’ε.”

Ngan e bwel ábe békagyāā

⁶ Héé Yesue ákálé ngan aá, “Mod anwórj alín á bwel á nzag-tê. Anké epum é bwel ahed áwedé-mîn ngen ne ngen, boj enkênnýínné ké ehógo. ⁷ Héé álângéé nnōn-a-nzag aá, ‘Édé bɔob mwé n̄láán áde mpagké á bwel-sé hén mwé téé, boj meenyínéé epum ké ehógo. Kwel bó. Chán é’hele é’madé ahój á ndoab-tê ngén?’ ⁸ Héé nnōn-a-nzag átímtné mó aá ‘Asanj, tédé bó ké mwé nhógo ámpē. Ménabé bó ásē, nhíí-’ε bó nkúmbág. ⁹ Nzé é’chyáá e’pum mwé míme n̄húe’, né édé bwám. Nzé-’ε békagyáá, né békwyel bó.’”

Yesue adidé mmwaád nhógo bwám á Mbwe-mé-nkóme-áte

¹⁰ Mbwe-mé-nkóme-áte nhógo, Yesue ayágté’áá bad á ndáb e mekáne póng. ¹¹ Mmwaád ambé áhed awé edéadéj é mbéb émbēē áte á etún é dyôm á mwé ne waam. Êmbél mbíd enwúmén mó nyaa eché eehelaá yél asále áte bwám. ¹² Áde Yesue ányíné mó, anchélé mó, aláá mó aá, “Á-nyaŋ, nkole míme ékonleé mímaá.” ¹³ Áde ábáné mó mekáá á nló, ane mmwaád ansálé yél áte ábwōg-ábwōg, ábootéd-te Dyōb akēn.

¹⁴ Héé mod awé abédé nló á ndáb e mekáne, álíí áyāle adid áde Yesue ádídé ane mmwaád bwám á mbwe-mé-nkóme-áte. Álângé bad aá, “E’pun é’dé ntóób ábe mod átângéné nsón abel. Nzé nyédaá bwám adyeé nyépē ábē e’pun, saké á mbwe-mé-nkóme-áte.” ¹⁵ Héé Sájgwéé ákwéntanné aá, “Nyédoge bad. Nyé ahéé eéhunné nyag káa ésel á ebem-tê se ákéen chó á edib á mbwe-mé-nkóme-áte? ¹⁶ Anén mmwaád adíi mwán awe Abrahame. Satane anhaj mó ne nkole á etún é dyôm á mwé ne waam. Nyéláa mē ké mbéb móo n̄dé, áhúd mó á mehangé á mbwe-mé-nkóme-áte?” ¹⁷ Chōm éche ánhōbpé énwōgēd bad ábe bétângánnáá mó e’sôn. Moosyāel anwóng menyinje áyāle mam mé ménýáké míme Yesue ámbenlé.

Ngan ébe é nkamlén n̄ Dyōb:

Ngan e mbál míme n̄chíné

(Mat 13.31-32; Mak 4.30-32)

¹⁸ Yesue anhób aá, “Chán nkamlén n̄ Dyōb n̄koo abé? Cheé n̄hèle n̄hægtén mó-yéé? ¹⁹ Ndíi n̄nýgáne mbwé e mbál-e-bú eché mod átéadé boj ásob á nzag-tê. Áde ékwogé, étim bwel bén, menon méhyé mélōj á ngén-tê.”

Ngan e esulten

(Mat 13.33)

²⁰ Yesue ansedéd aáken, “Cheé n̄helle n̄həgtén nkamlen n̄ Dyōb-é? ²¹ N̄dii n̄ēngáne esulten éche mmwaád ámúúnédé asii á pân é mbumé n̄ ngun éláán káéj ésule.”

Âsól á ekob éche échíné áte
(Mat 7.13-14, 21-23)

²² Yesue andí ambé á eke-tê éche ákágé’áá á Jerusalem. Dyad téé áde átómé’áá, ámbáá ne ásad, ayágté’áá bad. ²³ Mod nhógr ansedéd mó aáken, “A-Sángú, mesongé mé bad ríme Dyōb désonjé alongé, mébuú áte káa méebuú’é?” Yesue anláá bad áhed aá, ²⁴ “Nyéwanen káéj nyésol á ekob éche échíné áte, áyāle, á mbále, ekud á bad éwanén asól, boj béehenlé. ²⁵ Póndé ép̄ eché nwóó-ndáb áhidéé ásē, boj ápēn ekob. Ene póndé dōo nyébootédté atyéem á ebwág, boj nyékumé’ ekob nyéhōbē bán, ‘A-Sáj, dibnéd sé ekob.’ Mó-’e átimtén nyé aá, ‘Meebíi’é wéé nyébídé.’ ²⁶ Nyé-’e nyéhōb bán, ‘Syánē dendyé ndyéed, demmwé-’e mím hōm ahóg, eyágté’áá-’e áwēd myad.’ ²⁷ Átimtén nyé aá, ‘Syánē deewōñneé dyamdyam. Nyésyə me á díd-te. E’bébtéd é’ bad ngēn!’ ²⁸ Áde nyényinné Abrahame, Aisige ne Jakəbe bōóbe bekal bē’déadən bédé á nkamlen n̄ Dyōb-te, boj nyé pēn nyéchág á ebwág, achii dé awé ne adyé dé meson á nsəl, dōo détēd etál póndé eched. ²⁹ Bad bēbīd á akuu ne á mbəj, ámekonekone ne á mehléhulé, bétéd medii á ngande e nkamlen n̄ Dyōb. ³⁰ Á póndé eched, bad ábe bēnlyag mbid bōo bétim á’sō, bē’sō-’e belyag mbid.”

Yesue alebe áyāle bad bé Jerusalem
(Mat 23.37-39)

³¹ Melemlem mé póndé nguse é Befarisia êmp̄ wéé Yesue, bélāngé mó bán, “Syéé hén, ékag hōm démpēe, áyāle kāj Hērōde ahēde we awúú.” ³² Yesue ankwentén bō aá, “Nyéke nyéláa échē esob bán, ‘Chii ne chān mēhūd bad e’déadən bē mbéb áte, n̄chōod-te bad, boj súú ébe mēmād rímmēm nsón.’ ³³ Boj kē chān ébē, ntángéné abé á nzii chii, chān, ne sú ébe, áyāle éeboo’é bán, nkal e’déadən áwē hōm démpēe ésebán á Jerusalem. ³⁴ Wóowó! Á-bad bé Jerusalem, nyéwúe bekal-bé-e’déadən nyéwúenné-’e bad meláá ábe Dyōb álómé! Nkénwān áte ngen ne ngen álad nyé áte n̄ēngáne nyaá-kub ákútanné bān, boj nyéehédeé etál! ³⁵ Nyénōne’, Dyōb détēdē echen ndáb. Á mbále, nlāngé nyé né nén mēé, nyéenyinénné me díd ámpē káéj ne á póndé eche nyéhōbpē bán, ‘Nnam ne ane awé apedé á dín á Sángú.’ ”

14

Yesue achōjté mod awé melóg mékóbé

¹ Mbwe nhógr Yesue anké ndyéed adyé wéé ndele a Farisia pág. Nén démbē a mbwe-mé-nkóme-áte. Áde ápédé áwed, bénóné’áá mó chodchod. ² Mod mó-’e ambé áhed awé melóg mémbidtē á yēl. ³ Héé Yesue ásedtēe bemeléede bé mbéndé ne Befarisia aáken, “Edé kunze ádid mod bwām á mbwe-mé-nkóme-áte, ngé éesaá?” ⁴ Boj bénkēnhōbpē dyamdyam. Dōo ákóbé ane mod awe melóg mébídé á yēl á ekáá, ádidé mó bwām, asúúdtē mó á ndáb. ⁵ Ámbid e nē dōo ásedtēe bō aáken, “Nyé ahéé adé awé mwān káa nyag éhūnné echog, boj eékag chō abídé ábwōg-ábwōg, kē émbē bán á mbwe-mé-nkóme-áte?” ⁶ Boj bénkēnwóngé dyamdyam áhób.

Akē dé e’ken ne akob dé nken

⁷ Áde Yesue ányíné bad ábe bénlēbē ádyé ndyéed bésyāél ábe bérpédé bérboótédé medii mémbáá apwed, ankalé bō enén ngan aá, ⁸ “Nzé mod alébpé we ngande, weépāg-sé éhēdē e’dii é’mbáá, áyāle éhelle ébē né bélēbpé mod ampée awé adelé áte tómaa we. ⁹ Nzé ene nyaá e mod epedé-’e, mod awé alébpé nyé moosyāél álāā we aá, ‘Béé anén mod atii.’ Á póndé eched dōo étimēe atii asad atéd ne akwáké. ¹⁰ Boj nzé epedé ene ndín e hōm, etédeé e’dii ábe é’dé á ahángé, ábel nén nzé nwóó-ngande anyíné we, móō álāā we aá, ‘Amúé, kē édyee á atii ámbáá híníí.’ Á póndé eched dōo ékudeé edúbē átintē e bad ábe

nyáābō nyêtédé tébele. ¹¹ Né-ó, nyébíi bán, kénzéé awé achágté yěl, Dyōb désudéd mó. Kénzéé-'e awé asüdté yěl Dyōb déchágēd mó.”

¹² Hé-'aá álângéé mod awé anlélbé mó nén aá, “Nzé ehóbé weé, móchage’ ngande, weehóbé weé mólébpé áboj běn, káa áboj baányaŋ, káa echoŋ túmbé, káa bewój bé ngáb ábe nyáābō nyébyéené. Nzé ehídé nê, né bómpe bélēbē we. Né ábele átim ehéen ne metuuten. ¹³ Boj nzé echagé ngande, elébé dásō betóótöké bé bad, ne bad ábe békuné eped, bóobé bad ábe békwdé ndim. ¹⁴ Nzé ebelé nê, né wéküd nsimé áyāle béehenlé we asábe ámbid. Dyōb désabé we áde bad bé bwám bépuú’.”

Ngan e sáŋkalaa a ngande

(Mat 22.1-10)

¹⁵ Áde mod nhóg awé bóobé Yesue bénéd tébele áwogé nê, dōo álângéé Yesue aá, “Nsimé ne bad ábe bedyé ndyéed ángande e nkamlen í Dyōb!” ¹⁶ Dōo Yesue álângéé bó aá, “Mod nhóg anchág sáŋkalaa a ngande, ábūd-te bad alébe. ¹⁷ Áde póndé e ngande épédé, anlóm awe mbalede wée beken ábe ánlélbē aá, ‘Nyéhyag, mbojsén ísyāel ímmáá abé.’ ¹⁸ Boj bó moosyaél, bémbootéd mechángé abe nhögé-nhögé. Nhög anhób aá, ‘Nchané etúú, ntáŋgéné chó ake dé anyín. Ncháa we, méehenlé ahye.’ ¹⁹ Ampée anhób aá, ‘Bóob nén děn, dōo ncháné nlád í nyag ítáan éche élíe’ nzag. Chó ñkagké ahagten nén. Sôn, méehenlé ape!’ ²⁰ Ampée-’e anhób aá, ‘Nkudé sómbé ekóólé-ekóólé. Né-ó, méehenlé ape!’ ²¹ Ane mbalede antím ámbid, áke áláá eche sáŋ mam mésyāel. Dōo ekaŋ ékóbé eche sáŋ áte, boj álomé ane mbalede. Anhób aá, ‘Kág mehélé, ékag á ntém í nzii, kááŋne á mête mé nzii mé dyad-té, éhúen betóótöké bé bad, ne ábe békuné eped, ne ábe békwdé ndim, ne ábe béehelé ake.’ ²² Éebeméé áte ane mbalede anhúú ámbid, aláá sáá-a-ndáb aá, ‘A-sáŋ, mbelé ngáne wénhōbpé, boj ké nê, etál élyágé édé.’ ²³ Dōo Sáá-a-ndáb áhōbeé aá, ‘Kág á nzii émbáá ne nzii é mehín, échéle kénzéé weé áhyag ábel boj ndáb élôn. ²⁴ Á mbále, mod ké nhóg awé ménsebē alébe, éewókgé chōm ké ehög á nsel á ngande-té hén!’”

Âbé mbapēs

(Mat 10.37-38)

²⁵ Mbwe nhög ndun e mod éhídé’áá Yesue ámbid. Héé ábóótédé bó aláa nén aá, ²⁶ “Nzé mod ahóbé aá, móhíde me, ésebán achádténé nyaá, sáá, mwaad, bǎn, baányaŋ, kéáŋne ádē alongé děn, ene ndín e mod eékwognedéé ábē awém mbapēs. ²⁷ Kénzéé awé eepéme ádē awög, boj áhīdné me, eékwognedéé ábē awém mbapēs.

²⁸ “Nzé-módé ábē awé áwōŋ mewémten álón sáŋkalaa a ndáb, boj eesébpé adyee ásē, áhagten nkun ríme ene ndáb étédé mó, ábíi ké mójhél chó amad, káa mójhénlé? ²⁹ Nzé amaá-’e ndáb asume, boj eéhelle chó amad, moosyaél awé anyíné abelé ábootéd mó awel, běhōbē ³⁰ bán, ‘Mod nhóg ansáá ndáb, boj eéhelleé chó amad.’

³¹ “Nzé kâj pág ewémténé waáb kâj bel akum, abelé asébé yěl ahag á ekáá ké mesongé mé sánze ríme áwóó dyam dyom dé ekálé, běhél ábe waáb awé awóó sánze dyam móom mé ekálé mébe. ³² Nzé anyíné aá móókwognedéé, abelé alóm belyágédyad á’sō wéé waáb, waáb adépe mó benben, ábel nén békdm nsaj. ³³ Melemlem nê dōo édií né ké nzéé awé eehúde chōm ásyāel nlém. Ene ndín e mod eékwognedéé awém mbapēs ábē.

Nkwé míme míbódé e’nyin

(Mat 5.13; Mak 9.50)

³⁴ “Nyébíi bán nkwé índé chōm é bwám. Boj nzé míbódé alaŋ, chán běhelle-se bényinéed mó ámpé? ³⁵ Méesaá dyam dé abelen ámpé. Apim dōo běpimeé mó. Bad ábe běwóó metúu, bésôjtēn bwám.”

¹ Mbwe nhóg belad bé táásé ne bebel bé mbéb bémpēe, bémpē wéé Yesue. ² Dóo Befarisia ne bemeléede bé mbéndé bényonjéé áte bán, “Nédé anén mod awojne bebel bé mbéb, bábōo bédýag-ke ndyéed hóm ahó.” ³ Héé Yesue ákánlé bó ngan nén aá,

⁴ “Nzé-módé adé awé áwōj mbwókel é ndyōj mí mbód, boj nhóg míbōo, boj eétedté mímíníí móom mé ndyōj mí mbód abog ne abog á etún-tê, áke dé ahed mímê nhóg míme míbōo káéj né adibté mó? ⁵ Adibed adé ádibte-’aa mó, áhág mó á abel ne menyinje mésyāél. ⁶ Boj néé ápédé á dyad-tê álad besón bé echoj ne baánya áte, aláá bó aá, ‘Syáné déwôg menyinje áyale ndibté mímméndyōj mí mbód míme mémbōo?’ ” ⁷ Yesue ambád ámpē aá, “melemlem-’aa nílāngéé nyé meé, menyinje métom abé né ádyob amín e mbelé-mbéb nhóg awé atédé abel dé mbéb boj atimné Dyob tímaa amín e móom mé bad abog ne abog ábe bésáá, ábe béehednád ahəylén.

Ngan e kábpe eché embóo

⁸ “Káa, mmwaád ahéé adé awé áwōj kápbe dyóm, boj néé póg ébóó, eéchódé’ ekag, boj áhedé ndáb áte, atój ahed káéj né adibté chó? ⁹ Adibed adé ádibte-’aa chó, alade baáb ne baánya áte, aláá bó aá, ‘Nyewógen me menyinje áyale ndibté ene kápbe eché embóo me.’ ¹⁰ Melemlem-’aa nílāngéé nyé néen meé, menyinje métom abé né ádyob amín e mbelé-mbéb nhóg awé atédé abel dé mbéb boj atimén Dyob.”

Ngan e mwān awé ambóo

¹¹ Yesue ambád ahób aá, “Mod nhóg ambé, anchyáá bán bé baachóm béké. ¹² Dóo epun ehág, mwān asad álāngé sáá néen aá, ‘A-sáj, bée me ádém akab á mbwógi áde nítángéné akud.’ Héé saá átéde chóm ésyāél éche ánwōngé, boj ákabpé bó áte. ¹³ Nguse é e’pun étomé-’aa, boj mwān asad áladé mímē nted nísyāél, ákág á aloj démpēe adé áchábnédé. Áwed-taá ápédé boj ábootéd alongé á mbaambaa achog, ábēbté ngáb esyáél eché ánwōngé. ¹⁴ Áde chóm ésyāél émáá mó áyál né bōob, sájkalaa a nzaa anhún á along-tê wé. Atog dó-’e ábóótédé mó asól áyál ngíne-ngíne. ¹⁵ Héé ákíí kunze e mod póg atan á dyad-tê wé, áchóm mwā nsón. Ane mod mó-’e alóm mó aá, áke ádítad mó esog é nguu. ¹⁶ Anwój á mewémten aá, móolonté abum ké ne medyé mé nguu, boj modmod enkémbaá mó chömköchom éche áhelésé adyé. ¹⁷ Dóo ádyéé chói, boj ákwaniád, áhōb aá, ‘Nóné’ ngáne bembalede bélóné echem sáj á ndáb-te, boj ké né bédýág medyé méchöbe ásé, boj me-’e íwág nzaa hén! ¹⁸ Mésyáé, níké ntán echem sáj, nláá mó meé, A-sáj, mbelé mbéb ásó é’ Dyob ne ásó é’bōj. ¹⁹ Mmén meékwognedéé áchägned néé awoj mwān ámpē. Téd me ké nénjáne awój mbalede nhóg.’

²⁰ “Hé dóo ápádté ásé, boj ásúé’ á dyad wéé saá. Boj adé ákwogé ape á ndáb né, sáá annyín mó mwā etún. Ankóbtén sáá ngol. Sáá annyagéed, alúm mwān amín, ahé mó tél. ²¹ Dóo mwān álāngé mó néen aá, ‘A-sáj, mbelé mbéb ásó é’ Dyob ne ásó é’bōj. Meékwognedéé áchägned néé mwān awój ámpē.’ ²² Héé saá mó-’e áchénlé ábē bembalede, álāngé bó néen aá, ‘Nyéhyiinad me nsob míme nítómténé adøy né, á mehélé-te. Nyewáad mó mó á yél. Nyéh-’e mó ebój á ekáá, nyéh-’e mó metámbé a ékuu. ²³ Nyétéd nchóm-é-nyag awé dékálté né, nyékwel mó, ábel néen, syáné moosyáél dédyé débel-le apaté. ²⁴ Nyébií bán, awem mwān néen ammád awé, boj atimé ámbid á alongé. Ambóo, boj abídé áwed.’ Hé-’aá békóótédé ngande achog.

²⁵ “Mmén mésyāél mémbenléd adé mwānyan ambáá adíí á nzag-tê. Áde áhúú, dóo áwógeé bad békóne, bésage-’e bwém á ndáb-te. ²⁶ Dóo áchénlé mbalede nhóg, boj ásedté mó dyam adé ábenlaad. ²⁷ Dóo mbalede né álumteé mó áte néen aá, ‘Pón mwānyon ahúú ámbid-óó. Sóó akwénlé mó nchóm-é-nyag ne, áyale anyínén adé ányinné mó díid ámpē, ésebán dyamdyam ábélé mó.’

²⁸⁻²⁹ “Awógi áde áwógi né, anlij, eékwentene asól á ndáb-te. Héé saá ábídé á ebwógi, boj áhye acháj mó. Dóo mó-’e átimtanné sáá néen aá, ‘Nóné’, meé nkéndyéen we hén mwé ne mwé adé míbenleé we ntú mé nsón, ésebán nwúne we nló áte. Boj ké echeté é mbód weébágéé me weé, míbel apaté ne ábém béd. ³⁰ Boj ngáne awoj mwān a nlém ápédé ámbid, mó awé amaá echoj ngáb esyáél abébed ne békwalé, ewúúdé mó nyag eché

etómténé akəl.’ ³¹ Héε sáá álāŋgeé mó nén, ‘A-mwǎn, wε-εé edé ne mε hén póndé ésyāēl. Kéchéé éche níwóó-’e édii échōŋ. ³² Émbē bwâm syánē âchog ngande, âwóg menyinje. Nén, mwânyoŋ ammăd awé, boŋ atimé ámbid á alongé. Ambôo, boŋ abídé áwed.’ ”

16

Ngan e mbəledə awě abédé mwane

¹ Yesue anláá ábē bembapəs ámpē aá, “Nhən mí mod nhóg mémbē. Bad bénhye mó aláa bán awě mbəledə ambáá abébte mó ngáb. ² Héε mímē nhən mí mod nílómé mbəledə awed achəg, boŋ ásədté mó aá, ‘Ebál é pôle éhéé níwógeé áyāl echōŋ nén? Lúméd mε áte ngáne mesongé mé bwěm míme mémbanéé ásē echōŋ médií, áyāle échē etál é nsón émááné wε áte.’ ³ Dóo mbəledə ádólé áte chóony boŋ áhōb aá, ‘Chán-nō mēbenlé bɔob áde echem sáŋ áhədēé me ahúd á nsón? Ngíne eesaá mε echē níkwenléé nzag. Nzé ntimé-’e á nchómbé, né nê dépiinéd mε akwágké á ngíne. ⁴ Ahâ, nkudé debyéé áde mēhágké, ábel boŋ kē á nsón dóo bénhūdté mε, bad belyäg békob mε nken áwab mendáb.’

⁵ “Héε áchénlé mod téé awě anwálé sáá alúm, áchəgé bō nhógē-nhógē. Áde mod e’só ápédé, ansedéd mó aáken, ‘Mesongé métəŋ echem sáŋ ékáléé wε?’ ⁶ Ane mod aá, ‘Mbwókel é e’kwém é’ mōl waam.’ Ane mbəledə anláá mó aá, ‘Nənē’, echoŋ kálag e melúm chó nén. Dyee ásē, étel á mehélé-te wεé, mbwókel é e’kwém é’niin.’ ⁷ Ansedéd mod awě alónténé bēbē aá, ‘Alúm ádē wε mesongé métəŋ?’ Ane anhōb aá, ‘Mbwókel é nkute n̄ ngun éláán.’ Ane mbəledə anláá mó aá, ‘Kōb echoŋ kálag, étel wεé, mbwókel é nkute ébe.’ ⁸ Áde mímē nhən mí mod níwóge n̄, ménkēmēd échē ekükú é mbəledə aá, ‘Abēnlédé debyéé á bwâm.’ ” Yesue ambád áte nén aá, “N̄ dōo bad ábe bēhíde mekan mé nkōŋsé bédíi. Bédé mehél áhəgen échāb nyaa é bad debyéé, tómaa bad ábe bēhíde e’nyínēn bē ekide é’ Dyōb.” ⁹ Yesue ambád aá, “Nláa-’e nyé mεé, nyébənled nhən mé nkōŋsé, ákób e’chor, áyāle á póndé eche mémaá’é áte, békob nyé nken wεé bad bēdyee’é á ngíndé ne á ngíndé. ¹⁰ Ké nzé-módé awě awánlé mpín mé akan bwâm, né áwâlē ámbáá bwâm. Kénzéé-’e awě eéhəle mpín mé akan awále, né eéhenlé kē ámbáá awále. ¹¹ Nzé édē-’e bán, weewánléé ngáb e nkōŋsé ngáne étāŋgéné awále, nzé-módé ábē wε nhən mí mbále. ¹² Néε wéewánléé nhən míme méesé rímōŋ bwâm, nzé-módé ábē wε nhən mímoŋ mwěn?

¹³ “Modmod eéhēlē-’se abé mbəledə a bewoŋ bēbē. Álūmēd nhóg edəŋge tómaa anínií, kē’e átímēn nhóg, abángé anínií áyāl. Weéhēlē-’se ebé mbəledə a bad bēbē abé ahág. Weéhēlē-’se ebé mbəledə a Dyōb se ebé-’e mbəledə a mōnē.”

Nguse é ngan éche Yesue

(Mat 11.12-13, 5.31-32; Mak 10.11-12)

¹⁴ Befarisia bénwōg rímén mésyāēl, boŋ ngáne bémbeé bedəŋ bē ngáb, bénswēdē mó swédtén. ¹⁵ Yesue anláá bó aá, “Nyēdii bad ábe bélümte bán bésáá á’sō é’ bad, boŋ Dyōb ábíi nyé nlém áte. Kéchéé éche baányoŋ békēmtéé, édii abúú ngēn á’sō é’ Dyōb.” ¹⁶ Yesue ambád bó aláa aá, “Mam míme mēnenléd á kálag é mbéndé é Dyōb, bekal bē’dədəŋ bōmpē bénhōb mó káøyne á póndé eche Jōne. Taase n̄, nkalaŋ mí bwâm mé nkamlēn n̄ Dyōb ríkanlad, mod téé-’e abune rímē nkamlēn abé áte.

¹⁷ “Ké nēŋgáne nkoy n̄sé ne mí míín bēhəle bémāa, atəte kē ahág á mbéndé e Dyōb déekwaá.

¹⁸ “Kénzéé awě anané mwaád, boŋ awón mmwaád ampée, né akábé asón. Ké nzé-módé-’e awě awóó mmwaád awě bénáné á ndáb e’wóngé, né akábé asón.

Ngan e nhən mí mod ne Lazarōse

¹⁹ “Nhən mí mod nhóg mémbē, kəse é mebad chōo áwáá’áá á yəl. Mwənze ne mwənze móo ádyágáá mbwε téé. ²⁰ Ntögétōke mí mod nhóg mó-’e nínaŋgé’áá áwē mmwε mé e’ké bán Lazarōse. E’kwəsə bénlōn mó á yəl. ²¹ Mewēmtēn mémbē mó aá, bēbē mó púuted é medyé éche éhúné’áá á tébelə a nhən mí mod. Mbwé chōo épágé’áá áhed, boŋ ényāŋgē mó e’kwəsə áte.

²² “Áde ntogétoke mí mod mē níwédé, ángel énted mó, ékēen mó á akéb áde Abraham. Mmē nhon mí mod mómpē ménwē, bélime-’e mó. ²³ Á mbwógr e kwéed wê, nhon mí mod ímbédé á metuné-te. Héé ányéné nló ámin boj anyín Abraham se wínií, ne Lazarose áwe akéb. ²⁴ Dóo álébpree néen aá, ‘A-Tê Abraham, sôn, wóg me ngol, élom Lazarose átode dúu dé e’mii á mendib-te, áhye áhóded me echém, áyale meewógee bu á dű-á-muú hén.’ ²⁵ Abraham anláá mó aá, ‘A-mwán, ewémtan á pónéd eche wémbéé á nkörjsé ngáne wéenkudté bwém é’ bwám, boj Lazarose mó-’e ákúd bwém bé mbéb-e? Bóob-poó awóge mímē menyiinge hén, wémpē edé á metuné-te. ²⁶ Néé éhúdé né áte, wéé sédií ne wéé édií, sáñkalaa a mbáj akabé syáné áte, ábel néen mod eéhélē asyae wén se ápe wê. Modmod eéhélē-’aá ásyae wê, se ápe áwéed.’ ²⁷ Nhon mí mod ménhōb aá, ‘Ncháa-oó, a-Tê meé, élom Lazarose á ndáb eché echem sáj. ²⁸ Nlyágé bánned bétáan. Áke álél bó ábel néen, bómpē béepág á hóm dé metuné hén.’ ²⁹ Abraham anhób aá, ‘Béwóó metelag míme Mosee ne míme bekal bé’déadəj. Béwógen chom-éé bétélé ásé.’ ³⁰ Nhon mí mod ménhōb aá, ‘Aáy, a-Tê Abraham. Nzé mod akií bó atán awé abídé á mbwógr e kwéed, né bétedé abel dé mbéb bétimén Dyöb.’ ³¹ Héé Abraham áhóbeé aá, ‘Nzé béekwentene Mosee ne bekal bé’déadəj awógen, né béewóggenné ké mod awé apuúdé á mbwógr e kwéed boj aláá bó.’ ”

17

Abel mod mbéb (Mat 18.6-7, 21-22; Mak 9.42)

¹ Yesue anláá ábē bembapé aá, “Nyébíi bán mekägsen míme mébelte bad mbéb métángéné nyé apii. Boj édé ngol ne kenzéé awé ápeén mó! ² Émbé mboj né bentaé ene ndín e mod sáñkalaa a aláá á nkaj, bébwém mó á edib-te, tómaa mó ábel led ábén bëndem mbéb. ³ Nyétédéen yél pónéd.

“Nzé mwánoj abelé we dyam dé mbéb, échu mó aláá wéé né déeboo’é. Nzé achemé-’e ádē awusé boj ahäjléné, élagsén mó. ⁴ Nzé apánné we ngen saámbé áyale epun é bín, boj apedé-’e áwój ngen saámbé áchóm alagsen aá, ‘Nhäjléné’, etángéné mó alagsen.”

Adúbe déechíneé

⁵ Bembapé bánláá Sáñgwéé bán, “Wéé sé adúbe áte.” ⁶ Sáñgwéé anhób aá, “Nzé nyénwój adúbe áde ádē mwämpin nêngáne mbél-e-bü, né nyéékamlén ádén alín dé e’sáá bán, ‘Á-bwel, wubé ásé, éke ésumen á edib é nkwe-’te’, éwógen-ne nyé.”

Abel dé nsón

⁷ “Détéd bán, nyé mod nhógr nyéwóó mbalede awé akií nzag alíi, káa akií ânón nídyoñ mí mbód. Nzé ahuú á nsón, chán wéláá’é mó? Wéláá mó wéé, ‘Hyé édyee ásé hén, édyé ndyéed,’ ⁸ káa wéé, ‘Belé me ndyéed étômted me, étyéem-me á nkag, káéj mímad adyé, boj ámbid é pónéd, we-’e édyág?’ ⁹ Nyéláá me ké wésgnén ane mbalede áyale ábelé míme nsón? ¹⁰ Né-oó nyémpé, nzé nyémaá chom ésyáél éche bétinédé nyé abel, nyéhób bán, ‘Sédií bembalede ngén, mímed nsón-naá sébélé sé ngáne.’ ”

Yesue asájté bad bá melæj dyóm

¹¹ Áde Yesue ákagké á Jerusalem, atómé’áá á nchii ní nzii mé aloj á Samaria ne aloj á Galilia. ¹² Asól áde ásólé mwä dyad nhógr, antán bad dyóm ábe melæj mékóbé. Béntyéem nchabnedé, ¹³ bélébpé mó ne esaád bán, “A-Yesu, a-Sáj, sôn, wóg sé ngol!” ¹⁴ Áde ányiné bá, anláá bá aá, “Nyékag wéé beprise, nyélumé bá yél.” Áde békagké né, yél é nsán bá.* ¹⁵ Bó mod nhógr, annyin néen aá módyéé bwám. Héé átímé ámbid, ákené Dyöb ne ehjéb éche échágké. ¹⁶ Ankwe Yesue á mekuu, ásagnán mó. Anén mod abédéé mod a Samaria. ¹⁷ Yesue ansédéd mó aáken, “Éesaá mbále bán nsájté nyé bad dyóm-e? Héé ábíníí abog bédíi? ¹⁸ Nédé mod ké nhógr ampée eetiméé ámbid áhye dé abe Dyöb mekenag, eetoméé

* ^{17:14} Åsáad á yél: Nzé melæj ménkób mod bétédé’áá mó néé mod awé eesáa. Bébéné’áá mó bán, eesíté wéé bad bédíi. Prise choo énwój kunze ásimen mod melæj boj ébíded mbakú néen bán asáá, boj ábootéd ape wéé bad bédíi.

anén mod a nken-ε?"† 19 Héε álāŋgeé mó aá, "Tyéém ámīn, ékag. Ádōŋ adúbe ádídé wε bwām."

Epe é nkamlen n̄ Dyōb

(Mat 24.23-28, 37-41)

20 Befarisia bēnsedéd Yesue bánken, "Póndé ehéé nkamlen n̄ Dyōb mépεé?" Yesue anláá bó aá, "Nkamlen n̄ Dyōb méesaá dyam áde mod ányinnéé dǐd, 21 káa dyam áde mod áhōbpē aá, 'Nōn', mōmén,' káa 'mōmíníí.' Aáy, nkamlen n̄ Dyōb rímáá abé átñntē echēn." 22 Héε álāŋgeé bembapεe nén aá, "E'pun é' bín é'húe á'sō ábe nyédəŋgé bán né nyényín kē mbwε nhógo Mwān-a-Moonyon álūmēdtē nyé yěl, boj nyéenyínné. 23 Bélaā nyé á póndé eched bán, 'Mōnén,' káa 'Mōníníí,' boj nyéehájtán bó. 24 Áyāle, ngáne emwēdmwēd étómeé, boj épenté ngob e Dyōb ped pág ne enínií, nē dōo epun éche Mwān-a-Moonyon ápεé ébēē. 25 Boj édēbē nē, atáŋgéné metuné híin akud. Káyne enén nyongel e bad eebāŋ mó áyāl. 26 Ngáne émbēē á póndé eche Noa, nē dōo ébēē á póndé echē Mwān-a-Moonyon. 27 Bad bédyágé'áá medyé, bémwāg mǐm, baachóm béwóó'áá bebaád, bebaád-te békāg á mewóngé káéj ne mbwε míme Noa ásólé á bōlē é'mbáá-te boj mbúú echó, mesén mélóne, méhōod ábē bad bésyāl. 28 Melemlem nē dōo émbēē á póndé eche Lōte. Bad bédyágé'áá medyé, bémwāg mǐm, békābē dyōn, běwēnē bwěm, bélōō-'ε mendáb. 29 Boj mbwε míme Lōte ásyáŋgé á dyad á Sodom, mímē mbwε děn muú ne meláá míme méhyāntan, mémbid ádyōb née mbúú, íwúú ábē bad bésyāl. 30 Melemlem nē dōo ébēē mímē mbwε míme Mwān-a-Moonyon ányínnédtē.

31 "Échē epun, mod awě adé á nnoj n̄ ndáb mīn áde nhōn ídīí mó á ndáb-te, eétogné asud ásē áhye dé atéd mó. Melemlem'-áá mod awě adé á nzag-tē, eétogné atim ámbid á ndáb. 32 Nyéwēmtēn dyam áde dēmbenléd ne Lōte mwaád. 33 Kéñzéé awě awóó mewēmtēn ásoj ádē alongé, ábōd dō. Kéñzéé-'ε awě abódé ádē alongé, né asoo dō. 34 Á mbále, bad bēbe bēnaá anoj ahógo nkui, bétéd nhógo, bétēdē anínií. 35 Bebaád bēbe békāgé medyé, bétéd nhógo, bétēdē anínií."‡ 36 Dōo bembapεe bésedtēé mó bán "A-Sáŋ, héé nē débenlédté?" Yesue antimtén bó aá, "Wéε ndim ímbāgkē, áhed dōo benhōgnōné béladneé."

18

Ngan e ngwεe e mod bō nkúd é mmwaád

1 Yesue ankálé ábē bembapεe ngan álūmed bó áte nén aá, bétáŋgéné békānnē póndé téé ésebán běhūnte nlém á abum. 2 Anhōb aá, "Mod abédé dyad ahógo, awě akáadte'bad. Ane mod eebá'aá Dyōb, eébage'aá-'ε modmod edúbē. 3 Nkúd é mmwaád-te abédé melemlem mé dyad, eémaa'aá wéé ane mod. Póndé téé álāŋgē mó aá, 'Sé mod sēwójnē mehōb. Káád sé ésuud me nzōm.' 4 Á mbooted ane mod enkēnháá mó díu. Boj ámbid é póndé anláá yěl aá, 'Ké nēŋgáne méebagéé Dyōb edúbē, méebāā-'áá modmod, 5 ngáne édīí bán anén nkúd a mmwaád ahédé me nló, měkāá míme nkáá ábel ísud mó nzōm. Ésebé nē, né káéj ne á asog éemwaá aá nkún ne epε éche ápagké nén póndé ésyāl.' " 6 Héε Sáŋgwéé áhōbēé aá, "Nyéwogé chōm-éé ekúkú é mod awě akáadte'bad awě eebíi Dyōb éhōbē-yε? 7 Nédē Dyōb déekunné ábē bad ábe ápwédé-yε? Béchyεεne' mó nwōŋgen nkui ne műte, nédē ákđlēn bó metúu póndé té-yε? 8 Nláa nyé mēé ákun bó mehélé mehélé. Boj nyédu bpé bán Mwān-a-Moonyon átān adúbe á nkōŋsé-te á póndé echē ápεé-yε?"

Ngan e bad bēbē ábe bēnkě akáne

9 Yesue ankál ngan empée tāŋgene bad ábe bénýiné'áá yěl née bad ábe bésáá, bénýiné-'ε bad běmpēe nkóntéd. 10 Anláá bó aá, "Bad bēbē bēnkě á Ndáb-e-Dyōb ákáne. Nhógo abédé Farisia, anínií-'ε abé nlad-é-táásε.

† 17:18 Bad bē Israél běntēd bad bē Samaria née benzínéé. Bóbóo běekagé'aá kē mwāmpin áyāle nyaa e mekan mé mbwōg ne mekan mé aloj. Ké nyaa e abele á Dyōb ne hōm dé mekáne běmbē bó nhəŋlén. ‡ 17:35 Doŋge á kálag dé'só ábádé nchoo 36: Bad bēbē bēbē á nzag-tē. Bétéd nhógo, bétēdē anínií.

11 “Ane Farisia antyéém á ámīn, ákānnē’, áhōbē á nlém-tê* aá ‘A-Dyōb, nságnéné we. Áyāle nén, meésaa nēngáne bad bēmpēe, ábe bédume bwém é’ bad, ábe bēbēbē nlém ábum, ábe békábe mesón á ndáb e e’wóngé. Nságnéné we áyāle meésaa nēngáne anén nlad-é-táásé hén. **12** Ndé nén, ndide’ yěl nzaa á mekáne-tê ngen ébe sôndé téé. Chōm téé éche nkudeé-’e nkabe chō áte mojge dyōm, m̄bagé we akab nhóg.”

13 “Nlad-é-táásé pen antyéém nchabnede, eéhlele ké m̄d anyen ádyōb. Ambán ekáá á nlém, ákānnē aá, ‘A Dyōb, wógl me ngol. Ndíi mbelé-mbéb.’ ” **14** Héé Yesue ábádé aá, “Nláa nyé nén meé, anén mod awé n̄dímtné nyé aláa, ansú áwe ndáb néé mod awé asáá á’sō é’ Dyōb. Áyāle mod ké ahéé awé achágté yěl, bésudéd mó. Boj ane awé asúdté eche yěl, béchāgēd mó.”

*Yesue ne bānbān
(Mat 19.13-15; Mak 10.13-16)*

15 Bōob-poó bad bēpééné’áá bēndem wéé Yesue nén bán ábâñ bō ekáá á yěl ânamed bō. Áde bembapēe bényíné nê, bénkānē ábē bad áte. **16** Boj Yesue anchélé ábē bān, áhōbē aá “Nyétede bānbān bēhyag áwêm. Nyékáá bō áyāle nén, nyaa e bad néé bō chōá éwóó nkamlen í Dyōb. **17** Ne mbále, nlângé nyé nén meé, kénzéé awé eékobe nkamlen í Dyōb nēngáne mwéndem, éesónlé áwēd-te.”

*Mod a nkamlen
(Mat 19.16-30; Mak 10.17-31)*

18 Nkamlene nhóg ansedéd Yesue aá, “A-meléed a bwâm, cheé mébenlé ábel nén nkud alongé áde déemaá?” **19** Dóo Yesue ásedteé mó aáken, “Cheé ékáá boj échágé me meléede a bwâm? Mod ké nhóg eesaá mod a bwâm étoméé Dyōb dëmpen. **20** Ebíí mbéndé éche éhóbe bán, weekábé asón á ndáb e e’wóngé, weewúé mod, weechibé’, weebídé mbój e metóm, beé sóó ne nyoj edúbé.” **21** Ane mod a nkamlen antimtén aá, “A meléed, nhídé échén mbéndé ésyāél bootyá se á mwéndemé.” **22** Yesue awogé-’áá nê, boj álāngé mó aá, “Dyam ahóg éhedne we. Sóm bwém é’syāél ábe éwóó, étéd n̄mêm mənē, ékabe betóótökē bé bad. Nzé ebéle nê, wéküd nhon ádyōb. Ene póndé éhye éhíde me.” **23** Awog áde ane mod a nkamlen áwogé nê, anwog ndutul bwâmbwam, áyāle ambé nhon bwâmbwam. **24** Yesue anyiné-’áá ngáne ásúdné boj áhōbē aá, “Elél áte bwâmbwam behon bē bad ásól á nkamlen í Dyōb. **25** Édé mwän e akan sáŋkalaa a nyam néé kamél ápoj á epən é ndonde, tómaa nhon m̄ mod ásól á nkamlen í Dyōb. **26** Bad ábe bénwōg chōm eché Yesue ánhōbpē, bénhōb bán nzé néé édíí, né nzéé-’ó ahéle ákud e’soosoj?” **27** Dóo Yesue áhóbeé aá, “Dyam áde baányoj bényínéé bán álélá áte, déelenledéé Dyōb áte.” **28** Héé Petro áhóbá aá, “Nənē”, sétédté ábed bwém é’syāél áhíd we.” **29** Dóo Yesue álāngéé bō aá, “Á mbále, nlângé nyé meé, kénzéé awé atédté eche ndáb káa mwaád, káa baányoj, káa sáá ne nyaj káa bán, áyāle nkamlen í Dyōb, **30** ákud nsyáoj ámbid mbád ne mbád enén póndé. Ákud-te alongé áde déemaá’ á póndé éché ehúe’.”

*Yesue akānlé eche
kwééd ne mpuu
ngan ámpē*

(Mat 20.17-19; Mak 10.32-34)

31 Héé Yesue átímné ábē bembapēe dyōm ne bēbe kun boj, álāngé bō aá, “Pón nyébíi bán dekag á Jerusalem. Mam mésyāél-le míme bekal bē’dáédañ bétélé ásē tângene Mwâna-Moonyoj mébenléd áned. **32** Éténlédé nén bán bēbě mó á mekáá mé bad ábe béesé bad bē Israel. Bō-’e bēwelé mó, bésyāé mó, bésobé-’e mó meléed á yěl. Bébōmtéd mó, bēwúú-’e mó. **33** Boj ámbid e e’pun é’láán äpuú.”

34 Boj bembapēe bō-’e bénkénsójténné dyamdyam áyāle ímén mam mésyāél. Enén ngan entóm bō debyéé áte. Bénkénchemmé chōm éche Yesue áhóbá aá.

* 18:11 Antyéém ámīn, ákānnē, áhōbē á nlém-tê: donge á kálag áwóó atyéém á nkag, ákānnād yěl.

*Yesue achōjte mod a ndím
(Mat 20.20-34; Mak 10.46-52)*

³⁵ Bəob-poó áde Yesue ákwogé ape á dyad á Jeriko, mod a ndím nhóg andyéé á nkəg nzi, áchəmē bwém. ³⁶ Awogé-’aá ndun e mod etóme, boj ásedtē bad dyam áde ádē. ³⁷ Dōo bélāngē mó bán, “Yesue, mod a Nazaret mó atóme nê.” ³⁸ Héé ábóné aá, “A-Yesu, Mwǎn a mbyaa ímme Dabide, wóg me ngøl!” ³⁹ Bad ábe bémbe á’sō bénkānē mó áte, bélāa mó bán ádib nsəl. Boj mó-’e ambé ábónē aá, “A-Mwǎn a Dabid, wóg me ngøl!” ⁴⁰ Dōo Yesue átyéémé, boj áhōbē aá béhyeeane ane mod. Ane mod apedé-’aá mó benben, Yesue ásedtē mó aá, ⁴¹ “Cheé éhedéé weé, mbele we?” Mó-’e anhōb aá, “A-Sáj, běl nnyínén ámpē.” ⁴² Dōo Yesue-’e álāngē mó aá, “Nyínén-nō! Adúbe ádōj ádídé we bwám.” ⁴³ Ábwōg-ábwōg ambootéd anyínén, áhidē-’e mó, ábagé Dyōb mekenag. Áde ene ndun e mod ényíné nê, bómpē bémbootéd Dyōb akemed.

19

*Yesue atáné nlad a
táásé bán Sakio*

¹ Yesue ampōj á dyad á Jeriko, boj atómé’áá tómén. ² Mod nhóg-ke abédé áwed bán Sakio, abédé-ee nlad-é-táásé ambáá, abé-’e nhon m̄ mod. ³ Ahedé’áá aá mónyin ane mod awe běchageé Yesue, boj nzii enkēmbagnédté mó, ngáne amute démbēē áhed, mó-’e ambé esoj. ⁴ Héé ányágté á’sō boj áchəgkē bwel é sikamo ábel boj ányin Yesue. Yesue ahúé’áá ene ped. ⁵ Apedé-’aá áhed, boj aá móasad dīd ámīn, ányiné Sakiose. Dōo álāngéé mó aá, “Á-Sakios, sūd ásē á mehélé-te. Ntāngéné nken abé áwōj ndáb chii.” ⁶ Hé dōo Sakiose ásúdé ásé ésebán abébte póndé, boj ákobé Yesue nken ne menyinje mésyāēl. ⁷ Bad bésyāēl ábe bényin nê, bényóngé’áá áte bán, “Akií nken abe á ndáb wéé mod awe adé mbelé-mbéb.”

⁸ Sakiose antyéém ámīn, álāngē Sáñgwéé aá, “Nōné”, a-Sáj, mětēd nhon rímēm, nkab mó áte e’ped é’be, m̄bē eped ehōg wéé betóótökē bé bad. Nzé édé-’e bán nköbné mod kékéhé á edoké-te, mětimtéd mó chó ámbid ngen éniin.” ⁹ Boj Yesue mó-’e anláá mó néen aá “Á epun é bīn é’ chii, e’soosoj é’bagnédé ne enén ndáb. Anén mod mómpē adíi mwǎn a Abraham. ¹⁰ Mwǎn-a-Moonyoŋ apedé ábel boj áhēd bad ábe běbóó, áchood-te bō.”

*Ngan eche bénlyōgnédtē bembalede ngáb
(Mat 25.14-30)*

¹¹ Bad běwoglannáá chōm-éé Yesue áhōbé’áá. Yesue ammăd ape benben ne dyad á Jerusalem. Né-ōo běwemtān bán nkamlēn í Dyōb mēpē ábwōg-ábwōg. ¹² Hé-’aá áhōbeé aá, “Kunze e mod póg eladé’áá yēl áke eke á aloj áde áchábnédé ábel néen běwōged mó kāj, boj ásūe”. ¹³ Áde ákagké, anchélé ábē bembalede dyōm, ábagé nhóg téé ekálé é kábpe dyōm aá, ‘Nyétēd néen, nyékábe nyongé káéj ne á póndé echē mēhūū’é.’ ¹⁴ Boj ádē aloj á bad děnkēndəngé mó. Běnlōm mésenze áhíd mó áláa ngómenaa bán, ‘Séekobéé bán anén mod ábē echēd kāj.’

¹⁵ “Ké nē běmbel mó kāj, átīm-me ámbid áwē dyad. Áde áhúú, ábwōg-ábwōg anlóm ábē bembalede ábe ámbagké ngáb achēg ábel boj ábīi nsyéj ríme békudé á nyongéte. ¹⁶ A’só ampē ahōb aá, ‘A-Sáj, échoj ekálé dyōm échyáá nsyéj ríme ndé ngen dyōm.’ ¹⁷ Ane mod anláá mó aá, ‘Né ábōó, edīi mbalede a bwám! Ngáne éhélē mekan mésad alyágéed ngáne éhednadté, mbage we ngíne ákamlēn myad dyōm.’ ¹⁸ Mbalede awé alonténé běbē mómpē ampē ahōb aá, ‘A-Sáj, échoj ekálé dyōm échyáá nsyéj ríme ndé ngen é’taan.’ ¹⁹ Ane mod anláá ane ámpē aá, ‘Wěkamlén myad métáan.’

²⁰ “Dōo mbalede ampée ápédé boj áhōbē aá, ‘A-Sáj, áboj e’kálé dyōm we bén. Menkan bō á wángeseté, nkoo. ²¹ Mbáá’áá me ngé, ngáne mbíi bwám meé, échoj chōm éhūnēē á ndəob. Weébēlēē boj edyág, ehúde-’e wéé wéewēneé.’ ²² Héé ane mod átimtanné ane mbalede aá, ‘Mmōj nsəl měn móō mēwūū wé. Ebébtéd é mbalede néé wé. Néé emōj émáá abíi wéé, échém chōm ééhūnēē á ndəob, ebíi-’e wéé, meébēlēē boj ndyág. Néé ébíi

wéé nhúde-'e wéé méewénéé, ²³ cheé-ó ênkéj boj weehéde echem ngáb á ndáb eché bad békongéé ngáb, ábel boj nzé nhúú nkob chó ne nsyéj ámín?"

²⁴ "Héé álângéé bad ábe béntyéem á nkag áhed aá, 'Nyékoben mó ábê e'kálé dyôm, nyébag bó wéé mod awé awóó mbwókel e ekálé.' ²⁵ Ábê bad bó-'e bénlää mó bán, 'A-Sáñ, ane mod amaá mbwókel e ekálé awón!' ²⁶ Héé ane mod átimtanné bó aá 'Nlá nyé meé, kénzéé awé awóó, Dyób débád mó ábê. Boj ane awé mó-'e eewóo, Dyób dékobén mó káájne mwämpin awé awóó. ²⁷ Boj bad ábe békóó me, ábe béehede'aá bán mibé echab kâj, nyéhyeeene bó hén. Béwúu bó áwem e'só hén.' "

*Yesue asólé á Jerusalem néé kâj
(Mat 21.1-11; Mak 11.1-11; Jón 12.12-19)*

²⁸ Yesue amaá-'aá enén pôle akal, abwágé ásē ámpé, áke á Jerusalem. ²⁹ Áde ákwogé ape á myad mé Bétpag ne Bétpani á Ekone é Menzab, anlóm bembapéé béké aá, ³⁰ "Nyéke á dyad áde ádé á müde mímínií. Nzé nyépedé á nló í dyad nyéenýin ngáne bétájgé mwán a ésel awé mod éedüidéé mbéd. Nyéhune mó, nyéhyeeene hén. ³¹ Nzé mod asédté nyé aáken, cheé ékáá boj nyéhunné chó, nyéláa mó néen bán, 'Sáñgwéé* atógnéné chó.' "

³² Bad ábe ánlömmé békíí-'aá, bétan-ne chó melemlem ngáne ánlää'é bó. ³³ Áde békunneé ésel, bewój bénzedé bó bánken, "Cheé ékáá boj nyéhunné échê ésel?" ³⁴ Bó-'e bénhjib bán, "Sáñgwéé atógnéné chó." ³⁵ Héé békééné chó wéé Yesue. Béntál échab mbóté áwedé-mín, boj békégté Yesue áwedé-mín. ³⁶ Áde ábóótédé ake, bad bétánlé'áá mó échab mbóté á nzii-té.

³⁷ Áde ábóótédé Ekone é Menzab asyage ásól á Jerusalem, ndun e bembapéé embootéed abwéen ámín ne menyiinge, békéné Dyób ne esaád áyále ndale é mekan ésyáel éche bényiné, ³⁸ Béhjib bán,

"Nnam ne kâj eché epag á dín áde Sáñgwéé!

Nsaj mibé ádyób,

Ehúmé ébê-'e ne Dyób áde ádé se ámín!"

³⁹ Nguse é Befarisia éche énsöblén amute á bad áte bénlää Yesue bán, "A-meléed, láá ábój bembapéé bélám!" ⁴⁰ Mó-'e antitmén bó aá, "Ne mbále, nzé ábén bad bédibé nsäl, né meláá mómó mébootéed abón."

Yesue alebe dyad á Jerusalem

⁴¹ Áde Yesue apédé á nkag ní dyad á Jerusalem, annyín dyad á'só. Dóó mésod mébóótédé mó abíd á mjd, áchyéé' Jerusalem ⁴² aá, "Embój bán nyébíí mekan ríme mépeene nsaj. Boj baoob, nyéehjeléé mó anyín. ⁴³ E'pun é' bín é'húé nyé á'só á póndé eché bad ábe békóó nyé bélæjnédétyé nkumbág néé e'ké, békentén-ne nyé ped ésyáel, ⁴⁴ boj bémad nyé, nyáábe áben bän moosyáel. Aláá ké ahog déelyagké ásé áyále nyéenkéchemmé póndé eché Dyób apédé ásoj ádén alongé."

Yesue apedé á Ndáb-e-Dyób

(Mat 21.12-17; Mak 11.15-19; Jón 2.13-22)

⁴⁵ Yesue ansól á Ndáb-e-Dyób, ábootéed bad ábe bésomé'áá bwém áwéed-te ananted, ⁴⁶ álängé bó aá, "Eténlédé á kálag e Dyób néen bán Dyób áhóbé aá 'Echem ndáb ébë ndáb e mekáne.' Boj nyétimté chó mbwog mé bechib."

⁴⁷ Bootya nê, Yesue ayágté'áá bad á Ndáb-e-Dyób. Beprise bémáá ne bemeléede bé mbéndé baoobe belyáged béké dyad, bó-'e békéedé nzii eche békééné mó. ⁴⁸ Nzii-'e eebédeé bó ábel dyam ádii dyam, áyále moosyáel andáj e'yale ábe Yesue awog ne kén esyáel.

* 19:31 Sáñgwéé káa nwónj.

¹ Mbwe nhóg Yesue ambé á Ndáb-e-Dyōb áyāgtē bad, ákanlé-’e bó nkalaŋ mí bwām. Héé beprise bém̄áá, bemeléede bé mbéndé ne bad bém̄áá bé dyad, bérpédé áwē, ² boj bésedté mó bánken, “Láá sé, kunze ehéé éwóó ábel mímén mekan? Nzé-módé abagé-’e wé enén kunze?” ³ Dóo Yesue átimtanné bó aá, “Mémpē méesedé nyé dyam ahág; nyéláa me ⁴ wéé kunze eché Jōne ádúsánnáá bad émbidtē, wéé Dyōb, káa wéé moonyoŋ?” ⁵ Běn ne běn bémbootéd atânten bán, “Nzé dehóbé bán, ‘Jōne eché kunze enhúú ne Dyōb,’ né ásedé syánē aáken, ‘Cheé-ō enkăŋ boj nyénkendúbé mó?’” ⁶ Boj nzé dehóbé bán, ‘Eché kunze ehúú ne baányoŋ,’ né ábén bad bésyāäl bélum syánē meláá, áyāle béndūbē bán, Jōne abédée nkal é’dádən.” ⁷ Hé dóo bétímténé mó bán, “Séebíi’é wéé ene kunze émbidtē.” ⁸ Dóo Yesue álāŋgeé bó aá, “Né ké me-’e ámpē méeláá’é nyé kunze eché n̄wóó ábel mímén mekan.”

Ngan e bebel bé nzag ntéed

(Mat 21.33-46; Mak 12.1-12)

⁹ Héé Yesue ákanléé bad ngan nén aá, “Mod nhóg ambé, ankwél nzag e e’pum é mel ábe bébenléé mím. Ambé ene nzag wéé bad ábe bóbōo békab mbote áte, ákē eke á aloj démpēe, ábēm-me áwed. ¹⁰ Póndé epedé-’áá eche bérpádée e’pum, boj álōmē mbalede wéé bebel-bé-nsón, ákobe mó ádē asii dé e’pum. Héé ábē bebel-bé-nsón běwānné ane mbalede, bésúud-te mó ámbid ne mekáá mé ngēn. ¹¹ Anlóm mbalede ampée, boj bém̄b̄m ane mómpē, běwōgēd mó e’sôn bwāmbwam, bésúud-te mómpē ámbid ne mekáá mé ngēn. ¹² Ambé alóm awé alónténé béláán. Awed bénlōgēn, běbwém-me mó ámbid e e’ké. ¹³ Héé nwóó-nzag áadolé áte chóóŋ, boj áhōbé aá, ‘Chán-nō mēbenlé bōob? Mělōm awem mwān awé n̄dáé bwāmbwam. Kapóng běbē mó edúbé.’ ¹⁴ Boj áde bebel-bé-nsón bényíné mó, bēnnōnén á mesó, běhób bán, ‘Ndyé-a-mbwōg mwěn nén. Déwúu mó, ábel eche mbwōg ésuuned syánē?’ ¹⁵ Dóo běbídne mó á nzag-tê, boj běwū-’e mó.” Héé Yesue ásedteé aáken, “Bōob-pōó, cheé nwóó-nzag ábenlé bó? ¹⁶ Ápě awúú bó, ábē-’e ene nzag wéé bebel-bé-nsón běmpée.” Awóó áde bad běwogé n̄e, běnhōb bán, “Ene ndín e dyam eébenlád mbéb!”

¹⁷ Yesue annōn bó á mesó, ásedté bó aáken, “Chán nyésónténé eyale é Dyōb éche éténlédé bán,

‘Aláá ádē belóŋ-bé-ndáb běnchenéé
dóo átímé aláá dé etógnén abé.’

¹⁸ Mod ké ahéé awé álum ádē aláá ámīn ábōgtēd áte. Boj mod awé déhūntēdtē ámīn, ányogtēd áte átīm mbúmbú.” ¹⁹ Bemeléede bé mbéndé ne beprise bém̄áá běnhěd nzii eche békóbeé Yesue ábwōg-ábwōg, ngáne běnchemmé bán áyāle echâb dóo ákálé enén ngan. Boj bém̄bāŋ bad ábe běbédé áhed.

Nsédtéd tāŋgēne asaa á táásé

(Mat 22.15-22; Mak 12.13-17)

²⁰ Né-ōó, bemeléede bé mbéndé ne beprise bém̄áá běhédé’áá kəse e etál, ákób mó. Běmpwěd bad, bésábé bó, bélom bó áhíd mó. Ábē bad běntāŋgēn ábânten nén bán, běhíde mó ne nlém nhág, ábel boj békob mó awusé á nsəl, boj ene póndé běbē mó á mekáá mé ngómenaa a Roma awé adé á nkamlen. ²¹ Héé bad ábe běnlōmmē n̄e bělāŋgeé Yesue bán, “A-meléed, sēbíi bán ehóbe’, eyágte-’e mam míme métáŋgéné. Weékwognádté modmod. Eyágte-’e bad mekan mé Dyōb á nyaa eché etáŋgéné bwām. ²² Mbéndé eche syánē ehóbe nén bán désange’ táásé wéé Kaisee, kāj e Roma-yé?” ²³ Boj Yesue anchem bó akwâb. Héé álāŋgeé bó aá, ²⁴ “Nyélúmed me mōnē mé ekii. Ediídinge éche nzéé chén, dín áde nzéé-’e dén?” Běntimtén mó bán, “Dín ne e’só ábe Kaisee.” ²⁵ Dóo Yesue áhōbeé aá, “Nyébag-kō Kaisee éche édé éche Kaisee, nyébag-ke Dyōb éche édé é Dyōb.” ²⁶ Bōob-pōó, nzii ké pōg enkembáá eche békobenné mó pôle e awusé á nsəl. Né-ōó, běndib mímāb nsəl ngáne dyam dénkembongé bó ahób. Nyaa eche Yesue ántimténne bó enkóméd bó yǎl áte.

Nsédtéd tāŋgēne mpuu

(Mat 22.23-33; Mak 12.18-27)

²⁷ Donege á Besadusia bēmpē wéε Yesue. Besadusia bénđubē bán mpuu méesaá ámbid e kwéed. ²⁸ Dóo bélhōbeé bán, “A-meléed, mbéndé e Mosee ehóbe néen bán, ‘Nzé mod awóó mmwaád, boj awédé áde bó ane mmwaád béepedéé mwān awále, mwānyar a abum ahóg atáengéné ane nkúd awón, ábel boj dín áde mwānyaŋ déebōō.’” ²⁹ Bəob-pəo, bad békédé mod saámbé ábe bémbe abum ahóg. Mod a’só anwón mmwaád boj awé áde bó mmwaád ne béepedéé bán awále. ³⁰ Mod awé anlóntén bélé anwón ane mmwaád. Mómpē awé ésebán achyáá mwān. ³¹ Ámbid é póndé awé anlóntén béláán mómpē anwón mó, káéj bó mod saámbé békombom mó awón, nhóg ámbid a anínií. Boj bó mod ké nhóg bénkēnchyáá mwān ne ane mmwaád, káéj bó moosyəál béké. ³² Káéjne á asog ane mmwaád mómpē anwé. ³³ Bəob-pəo á póndé e mpuu, mmwaád awé nzéé ane mmwaád áchəgnédté áyāle bó moosyəál saámbé bénwōn mó?” ³⁴ Dóo Yesue átintanné bó aá “Á póndé eche dédií áte néen chii, bebaád ne baachóm béké.” ³⁵ Boj bad ábe békwdognédé ábē á mpuu á kwéed boj bésón-le á alongé dékōlē békewōnēē. ³⁶ Békē née ángel, békawág-kaá ámpē. Apuu áde békpuú’é, bán bék Dyōb bó békē. ³⁷ Mosee mwēn ámpē alúmté áte aá, bad békpuude’. Wéε Mosee átélé á Kálag e Dyōb aá, mwā bwel akóbé muú, achəg Sájgwéé áhed aá, Dyōb áde Abraham, Dyōb áde Aisigé ne Dyōb áde Jakəbe. ³⁸ Dyōb ádií Dyōb á bad ábe bédé á alongé, saké Dyōb á bad ábe béké. Né děn álumte bán ne Dyōb, bó moosyəál bédé á alongé.” ³⁹ Donege dé bemeléede béké mbéndé bénhōb bán, “A-meléed, chōm éche éhōbété átengéné.” ⁴⁰ Né-óó modmod enkēnchu’é mó dyamdyam asedded ámpē.

Nsədtéd tāngene Ane-awé-Béké

(Mat 22.41-46; Mak 12.35-37)

⁴¹ Héε Yesue ásédtéé bó aáken, “Cheé ekáá boj bad béké bán Ane-awé-Béké abídé á mbyaa míme káj Dabide?” ⁴² Ngómē Dabide mwēn ahóbé á Kálag e Ngəse aá, “Sáj Dyōb anláá awém Sájgwéé aá, ‘Dyeé áwém ekáá émbáá, ⁴³ káéj ne á póndé eché mēbenlé boj ékəgtéd ábōn bad béké ekoyí ámīn ne mekuu.’” ⁴⁴ Né Dabide mwēn ásébpé mó achəg aá Sájgwéé, chán-nō Ane-awé-Béké áhəlēé abé awe mwān?”

Yesue abage elébé aá,
bétéden bemeléede béké mbéndé póndé

(Mat 23.1-36; Mak 12.38-40)

⁴⁵ Bad bésyəál béké áá chōm éche Yesue áhōbē. Héε álāngéé bembapē, aá, ⁴⁶ “Nyétédéen bemeléede béké mbéndé póndé. Bédəə mengombe ahyómen áte, bédəə-’é bán bad békente bó á dyōn-tê ne edúbē. Bédəə metii mé edúbē adyé á ndáb e mekáne ne á hōm á ngande. ⁴⁷ Boj bó békume’ mbwōg é bekúd, bédogé-’é bad ne ntóy-ntóy mé mékáne. Échē nyaa é bad ékūd nkógsen míme nchábé ámīn.”

21

Mendé míme nkúd a mmwaád

(Mak 12.41-44)

¹ Áde Yesue ásádē díd, anyín née behōn béké bad békagkē mōné á ntyág mé mende. ² Annyín-ne ntógétōke a nkúd a mmwaád nhóg ahág bedálēe béké. ³ Héε áhōbē aá, “Á mbále, nlānge nyé meé, mímén ntógétōke mé mmwaád nchédé mende á ntyág-te tómaa bó moosyəál. ⁴ Mōné míme ábē bad béké, ndíi mōné míme nchábé bó ásē, boj anén mmwaád ne atóg áde ádīí ahédé mōné nsyəál míme áwóó, nsyəál míme ámbē atəgnan yǎl.”

E’chemléed béké asog dé nkójsé

(Mat 24.1-2; Mak 13.1-2)

⁵ Bembapē behōg békálé’áá ngáne Ndáb-e-Dyōb ébóó, ngáne béké nchédé chō kəse é meláá, boj béké béké-’é chō áte ne mende míme bad béké. Héε Yesue áhōbē aá, ⁶ “Ábén

bwém ábe nyényíneé nén, póndé épē eché aláá ké ahóg déelyəgké ámīn e waáb. Bépājtēd mó áte mésyāēl.”

⁷ Bénsedéd mó bán, “A-meléed, súútáj nén débenlédté? E’chemléd é’héé bélumēd bán nén áhede abenled?” ⁸ Yesue antimtén bó aá, “Nyétēd póndé nén mod eépuutad nyé. Ekud é bad épē, á dín adêm, bédogé nyé, mod téé aá móo móde Ane-awé-Béwógté, béhōbē bán e’pun bé asogé épē áte. Bonj nyéehídé bó. ⁹ Nzé nyéwóge-’e bán bel é’wants’, káa bán ekide épángé áte, modmod eebáá’. Mmén mekan mésyāēl métájgéné abenled, bonj saké mó mélumēd bán, asog ámáá aape.” ¹⁰ Héé álângéé bó aá, “Aloj ahóg détyéemēn ádíníí nzum. Nkamlen nhóg-ke nyéetáj nén mímínií. ¹¹ Ndoo b eénajnéd ásē ngíne-ngíne. Nzaa ne nkole béké hōm ásyāēl. Mekan míme mébâjte bad mēbē. E’chemléd é’mbáámbää bómpē békid adýōb. ¹² Mmén mésyāēl médêbenléd, béké nyé abum ámīn, bétagté nyé. Békeén nyé á ndab é mekáne, békáad nyé áwed, béké-’e nyé á mbwōg. Nyébíi-’e bán, békéen nyé á’sō é’ káj é bad ne benkamlené áyāl e dín adêm. ¹³ Né débē nyé etál póndé echēd, áláá bó mekan mésyāēl míme nyésójténé á yäl echém. ¹⁴ Né-oó, nyémad á nlém tē ngen pág bán nyéetájgéné atag áte ngáne nyékaā’-é. ¹⁵ Mmén mēbē nyé dyam áde nyéhōbpē ne debyéé áde nyéhōbenné dō, nyaa eché ábēn bad béké nyé dyam áde nyéhōbeé déetájgéné. ¹⁶ Kájne besóó ne benyoó, bóobē ábēn baányaŋ ne bén, bén békpalé nyé áte, békewú-’e nyé nguse é bad. ¹⁷ Bad bésyāēl békóó nyé áyāle dín adêm. ¹⁸ Ké nē, dyamdyam déebenlé nyé, kéké mbum e esid pág éebóó’-é nyé á nló. ¹⁹ Nyékaŋ nlém ábel nyékud e’soosoŋ.”

*Yesue ahóbé ngáne
dyad á Jerusalém dépāa’-é*

(Mat 24.15-21; Mak 13.14-19)

²⁰ Yesue anláá bembapées aá, “Á póndé eche nyényinné sánze élájnédé dyad á Jerusalém, dōo nyébíi’-é bán ekide áhede apâjtēd áte. ²¹ Nzé nyényiné nē, bad ábē bédé á Judeya bétôm mehélé béké béssoom á e’kone mîn. Ane awé adé á dyad-tê wê, ábôl. Awé mó-’e adé ámbid e ewogé eétogné mó asól á dyad á Jerusalém. ²² Áyâle nén, rímé mesú míme nhóbeé nē, médií e’pun béké nkógsen. Póndé echēd dōo mekan míme méténlédé ásē mélonné. ²³ Ébéké ebébtéd ne bebaád ábe béké nkog ne ábe bémwâjté rímé mesú. Áyâle nén, metake híin mēbē á nköjsé-te, enén nyongel e bad ékük-te metuné bwâmbwam. ²⁴ Ádén alorj á bad déwē á bel-tê. Békóó nguse é bad néé betâj, békéen bó á melonj mémpée. Bad ábe béesé bad béké Israël békégtéd dyad á Jerusalém áte, kéké né póndé echē Dyób átiínédé bó émaá áte.

*Epe é Mwán-a-Moonyoŋ
(Mat 24.29-31; Mak 13.24-27)*

²⁵ “Etondée bóobē ngon ne betintine bélumēd e’chemléd. Edib é nkweé édüm áte, étog néé ahóbpe dé edib. Nén dékobēd bad béké melonj mé nköjsé mbwōg kéké békébyé’ néé békéleé. ²⁶ Bad békimén ne mbwōg ní ngíne áyâle ebébtéd éche éhúe á nköjsé, ngíne-’e éche édé ámīn énajnédé á e’dii. ²⁷ Ene póndé dōo bénnyinné néé Mwán-a-Moonyoŋ áhúe’-é á mbag-tê ne ngum ne ehúmé é ngíne. ²⁸ Á póndé eche nyényinné néé rímén mekan mébóótédé abenled, nyétyéem ámīn, nyésad díd, áyâle nén póndé e e’soosoŋ emaá nyé aape áte.”

*Mel méyágte syánē debyéé
(Mat 24.32-35; Mak 13.28-31)*

²⁹ Héé Yesue álângéé bó ene ngan, aá, “Nyénon alín á ngel bwâm, káa bwel kéké é’héé béképée. ³⁰ Abíd áde byaá é’bootadté bó abíd, nyébén nyébèle nyébíi bán nchonj rímáá abé bénben. ³¹ Melemlem nzé nyényiné rímén mekan mésyāēl mébenlad, nyébíi néé bán, nkamlen ní Dyób nkowgé aape. ³² Ne mbále, nlângé nyé nén meé, enén nyongel e bad éemaá’-é kékéne rímén mekan mésyāēl mémáá abenled. ³³ Nkoj mím ne nköj nísé békémaá bonj ábém e’yale béké abé ne abé.

Nyétéd pónde

³⁴ “Nyétóo nén nyéetómte echēn pónde esyāél âdyé ndyéed ne âmwé mǐm bwâmbwam. Nyéebudé-’e atag áte áyāle mekan mé alongé. Nzé nyébele nê, né échē epun étān nyé täléd née melám. ³⁵ Epun éched épií moonyoŋ asyāél awé adé á nkōjsé. ³⁶ Nyétéd pónde, pónde esyāél. Nyékânnne bán nyewôj ngíne âtóm mímén mekan mímé mēbenléd áte, âbel nén nyéhél atyéem á’sō wéé Mwân-a-Moonyon.”

³⁷ Mmê mesú mésyāél Yesue ayágté’áá bad á Ndáb-e-Dyöb. Nzé ngukél empě, áke ánāā á ekone é Menzab. ³⁸ Nzé bín bénssā sângén, ekud é bad éhyágáá mó atán á Ndáb-e-Dyöb âwóglén mó.

22

Békíí kun âwúu Yesue

(Mat 26.1-5; Mak 14.1-2; Jón 11.45-53)

¹ Baōb-paō, Ngande e Ewele-é-Ngêñ emmad abé benben. Enén ngande ebédéé dín bán Nnyíme-ámīn. ² Beprise bémbáá ne bemeléede bé mbéndé bhéhdé’áá nzii eché bewúe’é Yesue á mesɔɔm-tê. Bébáá’áá pen bán bad bésɔ̄jtēn.

Judase akwénténé âsóm Yesue

(Mat 26.14-16; Mak 14.10-11)

³ Satane ansól mbapēe awe Yesue nhógr áte, awé bêchageé bán Judase. Dín démpée démbé mó bán Iskariöde. Ambé nhógr átinté bembapēe dyom ne bêbe. ⁴ Héé ásyáŋgē boj, áke atán beprise bémbáá bôobé bekamlen bá Ndáb-e-Dyöb, âbel ntíi âsóm Yesue áwâb.

⁵ Nén dénwögéed bô menyinje bwâmbwam. Bôbô bempé á nchemten. Bénláā mó bán bésabé mó mòná. ⁶ Mó-’e ankwendé. Dóo ábóótédé nzii ahed âsóm Yesue áwâb ésebán bad bêbíí.

Yesue abōsan Ngande e Nnyíme-ámīn

(Mat 26.17-25; Mak 14.12-21; Jón 13.21-30)

⁷ Baōb-paō, epun é ngande e Ewele-é-Ngêñ áde bewúe’é ndyoy mímé mbód mé Nnyíme-ámīn êmpé áte. ⁸ Dóo Yesue álóméé Petro bô Jón aá, “Nyéke nyébojsen syánē ndyéed e Ngande e Nnyíme-ámīn.” ⁹ Bénsedéed mó bánken, “Héé wédəŋgé wéé séke sébojsen âdyé chó?” ¹⁰ Dóo ákwentanné aá, “Nyénōne”. Nzé nyépédé á dyad-tê, mod ábomén nyé awé apémé apom dé mendib. Nyéhîd mó á ndáb ké ehéé eche ásōnlé. ¹¹ Nyéláa nwóó-ndáb bán, ‘Awed meléede aáken, héé toj e beken édíí eché módyé ndyéed e Nnyíme-ámīn áte ne ábē bembapēe?’ ¹² Bélüméed nyé toj eché ekälé áte eche bénâbpé áte. Ene toj edé ámīn á ndáb-te. Nyébele syánē mbojsén ní ndyéed áhed.” ¹³ Dóo békíí, bétán-ne mekan melemlem ngáne ánlébēé bô, bêmbojsén-ne ndyéed e Ngande e Nnyíme-ámīn.

Ndyéed e Sângú

(Mat 26.26-30; Mak 14.22-26; 1 Kör 11.23-25)

¹⁴ Áde pónde e ndyéed épédé áte, Yesue andyéé á tébele ne bembapēe bê nlómag. ¹⁵ Héé álângéé bô aá, “Mendəŋ bwâmbwam meé ndyé enén ndyéed e Nnyíme-ámīn ne nyé boj nkude metuné. ¹⁶ Á mbále nlângé nyé meé méedyáá chó ámpé káéj ne á pónde eché Dyöb délönédté chó mbon á pónde eché mímé nkamlen mépéé áte.”

¹⁷ Dóo átéde mbwendé, boj ábagé Dyöb mekenag, álângé-’e bô aá, “Nyékob nén, nyémwé, nyétomted nhógr ne aníníí. ¹⁸ Á mbále, nlângé nyé meé bootyá bôob áke á’sō, méemwáá mímén mímé ámpé káéj né nkamlen ní Dyöb ímpéde áte.”

¹⁹ Antéd kájne ewele, ábe Dyöb mekenag, ákabtéd chó áte, ábē-’e bô chó aá, “Echem yél nén, ebagnédé áyāl echén. Nyébele nén ákamten me.” ²⁰ Áde bémáá ndyéed adyé ambél melemlem ne mbwendé mímé. Anhób aá, “Mímén mbwendé ndíi melé mékōslé míme nsogténé ne mekií mímém, míme mésyágé áyāl echén.* ²¹ Boj nyénōne’, mod awé akií me ntûré, adyág ndyéed ne me hén.” ²² Mwân-a-Moonyoŋ áwé ngáne éténléde, boj

* 22:20 Donge á kálag dé’só éewóo’é e’yle ábe Yesue ámbid e Echem yél nén; á nchoo 19 ne nchoo 20 nísyāél.

medim ne ane mod awě ăsōm mó. ²³ Héz bembapεε běn ne běn běbóótédé nhóg ne aníñí aséded, âbíi bó mod awě ăběl enén ndín e dyam.

*Bembapεε béswarztan tângene
mod awe adé ambáá*

²⁴ Bembapεε běn ne běn běmbootéd aselēn, běhedé âbíi bó mod awě adé mod ambáá áwab tîntê. ²⁵ Dóo Yesue álângée bó aá, “Kâj é meloj élûmte nganjlen ámīn e bad ábe békamlanné. Benkamlene běchage yěl bán, ‘Eboj-nléme.’ ²⁶ Boj eetângeneé abé nê átîntê echēn. Êmboj bán ane awě adé mod ambáá átîntê echēn, átim née ane awě atómténé mpín abé. Ane awě mó-’e alyágte’, átim née mbaledz. ²⁷ Nzé bad bédé běbe, nhóg adyéé á tébelé, aníñí-’e abenle mó, ahéé atóme waáb e’del áte? Saá ane awě adyéé á tébelé-ye? Boj me, ndé áwen tîntê née ane awě abenle nyé. ²⁸ Nyé nyébad abé běwéséné me á póndé eche nkúdé metuné. ²⁹ Ngáne Titée ábágé me kunze âkamlen, né-’áá mémpé mébeé nyé. ³⁰ Nén déběl nyédyé ndyéed, nyémwé-’e mǐm hóm ahóg ne me áwem nkamlen-tê. Nyé mod té ádyéé-’e á atii dé nkamlen, nyékaadté metúmbé mé Israel dyom ne mébe.

*Yesue ahóbé á’sō é’ póndé aá,
Petro ăbāj mó áyəl*

(Mat 26.31-35; Mak 14.27-31; Jón 13.36-38)

³¹ “A-Simən, Nóné! Satané akudé kunze âkag nyé moosyəál, âkab-pe nyé áte. Âbane bě bwâm ne bé mbéb nêngáne mod apebe kón éche bésálté. ³² Boj nkánnédé we meé adúbe áde éwóó déesudé. Á póndé eché wétiménné me ámpé, éwêd baányoŋ áte.” ³³ Petro anhób aá, “A-Sáj, ké á mbwøg dóo bétimnéé we káa á kwééd, mböjséné we ahíd.” ³⁴ Dóo Yesue álângée mó aá, “Nláa we, a-Petro, nchóm-a-kúb adéhób aá mótoó’ nkuu néen, wěbāj me áyəl ngen éláan.”

Póndé e metake ekwogé apε

³⁵ Dóo Yesue ásedteé ábē bembapεee aá, “Á póndé eche ménlōmmē nyé ésebán nyéewánlé ekwe é ngáb, káa ekwe, káa metámbé, nzé-chómé nyéntōgkē?” Bembapεee běnkwentén bán, “Chömkhöm.” ³⁶ Dóo Yesue álângée bó aá, “Bɔob-pɔɔ, mod awě awóó ekwe é ngáb ké-’e ekwe, áwále áyəl. Ane awě mó-’e eewóó nkwáté, ásōm rímē nkobe, áchan nkwáté. ³⁷ Nlângé nyé meé kálag e Dyōb ehóbé aá, ‘Bébánné mó nchoo nhóg ne bechib.’ Né-’áá ébenlédé áyəl echém. Étângéné ébenléd áned.” ³⁸ Bembapεee běnlāā mó bán, “A-Sáj, nóné”, sêwánlé nkwáté ímbé hén.” Mó-’e antimtén bó aá, “Désob nê bɔob.”†

*Yesue akií akáne á ekone é Menzab
(Mat 26.36-46; Mak 14.32-42)*

³⁹ Hé dóo ábídé á ewbó, áhídé á dyad-tê, ákē á ekone é Menzab ngáne ámmmenténné abel. Bembapεee bó-’e bénhíd mó ámbid. ⁴⁰ Áde běpédé áwed anláá bó aá, “Nyékânné’ bán mekägsen méepiidé nyé.”

⁴¹ Ansyəá bó á nkag, asídé mwă nchabnede, akog mebóbój, ákanné néen aá, ⁴² “A-Tê, nzé ébójnédé we, ékobén me rímén metuné. Boj ké nê, saké ngáne ébójnédé me, boj běl ngáne ébójnédé we.” ⁴³ Áde Yesue ákânnéé nê, ángel embíd ádyōb, éhye ewéd mó áte. ⁴⁴ Anwéd mekáne áte ngáne ámbēé á ndutul-tê. Ebábé éche ébídé mó á yěl émbē ngáne metáté mé mekií, étēn-’á ndoob taáb, taáb.‡ ⁴⁵ Áde ámáá akáne, antyéém ámīn, ákē wéé bembapεee běbédé. Antán née békûneé áyəle ndutul e ngíne. ⁴⁶ Dóo ásedteé bó aáken, “Cheé nyékûneé? Nyépáde ásē, nyékânné néen mekägsen méepiidé nyé.”

*Békobé Yesue
(Mat 26.47-56; Mak 14.43-50; Jón 18.3-11)*

⁴⁷ Yesue eépedeé ké amad á nsəl dóo amute á bad ápédé. Mod awě antómén bó abédéé Judasə, mbapεee nhóg átîntê e bembapεee dyom ne běbe ábe Yesue. Apedé-’áá Yesue á nkag

† 22:38 Désob nê bɔob; káa Nê ákwogé. ‡ 22:44 Donje á kálag dé’só déewóó’é nchoo 43 ne nchoo 44.

ahé mó tâl. ⁴⁸ Boj Yesue ansedéd mó aá, “A-Judas, nédē ahé áde éhédé Mwǎn-a-Moonyoŋ tâl ádíi âsóm mó-yε?” ⁴⁹ Áde bembapεε ábe bóɔbe Yesue békédé áhed bényíné dyam áde áhede abenled, bénseidé mó bánken, “A-Sáŋgú, sêhèle séwān ne mímed nkwáté-yε?” ⁵⁰ Hée mbapεε nhóg átómte nkwáté, ásēlē ntâj awé prisε ambáá etúu é ekáá émbáá. ⁵¹ Boj Yesue anláá bó aá, “Nyésob nê bɔɔb!” Ansidté mó ene ped e etúu, ádid mó bwâm. ⁵² Hée álângcée beprisε bembáá bóɔbe benkamlene bé mésénze mé Ndáb-e-Dyōb ne belyágéd bé dyad, bad ábe bênhye mó akób aá, “Nchîb móo nyéhyédé akób, boj nyewálé nkawáté ne mbid-e?” ⁵³ Mbwe téé syánē debágáá á Ndáb-e-Dyōb, nyenkembánné me ké ekáá á yǎl. Boj echēn póndé edé bɔɔb. Ehíntén chɔɔ édé á nkamlēn bɔɔb.”

Petro abáá Yesue á yǎl

(Mat 26.57-58, 69-75; Mak 14.53-54, 66-72; J̄on 18.12-18, 25-27)

⁵⁴ Hée békóbé Yesue, boj békεené mó, bétimēn mó á ndáb wéé Prise Ambáámbáa. Petro mó-’e ahídé’áá bó ámbid mwâ etûn. ⁵⁵ Béñkonéd muú átinté e dyad, bad bélâdēn áhed. Petro mómpē anhyé adyεε áhed. ⁵⁶ Mbalede a mmwaád nhóg annyín née Petro ádyéé á nkag í dû. Dóo ánóné mó chóón, boj áhōbē’ aá, “Anén mod mómpē ambé ne Yesue.” ⁵⁷ Boj Petro antâj aá, “A-mwǎn-a-mmwaád, meeblí’é me mó.”

⁵⁸ Éebeméé áte, mod ampée anchem mó. Anhób aá, “Wémpē edé nhóg áwâb echoj.” Boj Petro anhób aá, “Amúé, weéhyâg me ngáne áyâl.”

⁵⁹ Ámbid e háwa póg mod ampée ambádnén aá, “Ntâjten kέ nhóg méesaá. Anén mod abédé ne Yesue, áyâle adíi mod a Galilia.” ⁶⁰ Boj Petro anhób aá, “Á-mod-e-ngé, meeblí’é chôm éche mmøy ékoo’é ahób.”

Ábwōg-ábwōg áde áhóbé nê, nchóm a kúb antój. ⁶¹ Hée Sáŋgwéé ákúnné boj mǐd mébomé bó Petro. Dóo Petro áwémténé e’yle ábe Sáŋgwéé ánlâa’ mó aá, “Nchóm-a-kúb adêhób aá mótoó’ chii nén, wěbâj me á yǎl ngen élâán.” ⁶² Hée ábídé á ebwôg, abélé-’e awé. Anchíi bwâmbwam.

Bébómtédé Yesue, béwelé-’e mó

(Mat 26.67-68; Mak 14.65)

⁶³ Bɔɔb-pɔó, bad ábe bénóné’áá Yesue bémbootéd mó awel, bébómtád mó, ⁶⁴ békaj mó mǐd, bésedtē mó bán, “Láá sé, nzé-módé abomé wε?” ⁶⁵ Bésyáé’áá mó nzyáéj nyaa ne nyaa.

Bépééné Yesue wéé belyágéd bé dyad

(Mat 26.59-66; Mak 14.55-64; J̄on 18.19-24)

⁶⁶ Néé bín é-sáŋgé, bad bembáá bé Israél, beprisε bembáá ne bemeléede bé mbéndé bénkōb mbom, bérpēn Yesue áwab káánsel. ⁶⁷ Hée bésedtē mó bán, “Láá sé nzé wε-εé edé Ane-awé-Béwōgté?” Dóo Yesue áhóbé aá, “Ké menláá nyé, nyéedubéé me. ⁶⁸ Ké menséded-te nyé akan, nyéekwénténné me. ⁶⁹ Boj bootyā bɔɔb, Mwǎn-a-Moonyoŋ ádyéé á ekáá émbáá é Dyōb á Ngum.” ⁷⁰ Bó moosyáél bénseidé bánken, “Nédē wε-εé edé Mwǎn a Dyōb-e?” Ankwentén aá, “Nyé bén-εé nyéhōbé bán néé édíí.” ⁷¹ Dóo bélhōbēé bán, “Nzom ehéé empée déhédéé? Syánē bén dewogé áwē nsəl.”

23

Payledε akáádté Yesue

(Mat 27.1-2, 11-14; Mak 15.1-5; J̄on 18.28-38)

¹ Hée belyágéd bé dyad bésyáéł bétymé ámīn, boj békεené mó wéé Payledε. ² Áwed-taá békóbtédé mó mekan abán áyâl bán, “Sékóbé anén mod ngáne ápuutadté sé aloj áte. Áhóbé nén aá, séesajnád Kaisεe táásε, áhōbē-’e nén aá, mó mwěn móó módē Ane-awé-Béwōgté, nédē ahōbē’ aá módē kâj.” ³ Dóo Payledε ásédtéé Yesue aáken, “Wε-εé edé kâj e bad bé Israél-le?” Yesue ankwentén mó aá, “Ngáne éhóbé.” ⁴ Boj Payledε álângcée beprisε bembáá ne amute á bad nén aá, “Meenyínéé atote kέ ahög áde anén mod ákwééné.” ⁵ Boj bémbe békag ásō, bélhōbē bán, “Anén mod akóne bad ne mam míme áyágteé á mbwôg e Judeya esyáél. Ambootéd á Galilia, apedé-’e hén bɔɔb.”

Hérōde akáádté Yesue

⁶ Néé Paylede áwógré nê, ansédéd ké Yesue adíí mod a Galilia. ⁷ Bénlüméd mó áte bán, nê dën dóo édíí. Ngáne alorj á Galilia abédé ásé e nkamlen ríme Hérōde, Paylede anlóm Yesue áwé. Hérōde mwén ámpé ambé á Jerusalém ene póndé. ⁸ Ayógrké mewémten awónj ânyín Yesue áyéle awógré áá mó dúu. Ahedé'áá aá mónyín menyáké ríme ábeléé. Né-oó anwág menyinje áde bépééné Yesue áwé. ⁹ Ansédéd Yesue ekud é mekan, boj Yesue enkéntimténne mó dyamdyam. ¹⁰ Beprise bémbáá ne bemeléede bé mbéndé béntyééem ámín, bébántad Yesue mekan áyé. ¹¹ Héé Hérōde, bóobé éche sánze bébótédé mó awo, bélwé-'e mó. Dóo bélwáádté mó káse é bwém, boj álomé mó ámbid wéé Paylede. ¹² Nén dénkéj Hérōde bó Paylede bénítim ásé échê epun; édé apé nê, búmō bénsebé ekoyí awo.

Bébídté mbakú bán bélwúu Yesue

(Mat 27.15-26; Mak 15.6-15; Jón 18.39-19.16)

¹³ Hé dóo Paylede áládá beprise bémbáá áte nchoo ne belyáged, ne bad bémpéé, ¹⁴ boj álängé bó áá, “Nyénsébé anén mod apeen áwém. Nyé bán apuutad bad nló áte. Bóob-poá nhedé áte áyé áchê wéé nyébén nyédíí, boj meekóbnéé mó dyam dé mbéb ké ahog áde nyéhóbé bán abelé. ¹⁵ Ké Hérōde ámpé eekóbnéé mó awusé ké ahog, né-'áá ákáá boj álomé mó ámbid. Bóob-poá dyam dé mbéb ké ahog déesaá áde ábelé áde álumte bán atáengéné kwéed. ¹⁶ Né-oó měhób békúdá mó, nítédé mó, ákag.”* ¹⁷ Dóo amute ásyéél ábónéé bán, “Téd anén mod, éwúu mó! Bíldéd sé Barabase.” ¹⁸ (Barabase abédéé mod awé bénhée á mbwág áyéle bel ábe ámbootédté á dyad-té ne awúu áde áwúé'áá bad.) ¹⁹ Ngáne Paylede ánwóngé mewémten átede Yesue, ambé aláá bó nê ámpé. ²⁰ Boj bémbe bélwóné' bán, “Bomé mó á awág! Bomé mó á awág!” ²¹ Anláá bómpe ngen éche élonténé éláán áá, “Áyéle chán? Ebébtéd éhéé ábelé? Meekóbnéé mó awusé ké ahog áde átáengéné kwéed. Né-oó, měkúdá mó, nítédé-'e mó, ákag.” ²² Ké nê bémbe bélwóné' bán ábome mó á awág. Kéáj ne á asog, échab ehób ênkobnéd. ²³ Paylede ambídéd mbakú áá, móbél nénjáne bélhóbé. ²⁴ Antédé mod awé bénhóbé, awé ambé á mbwág áyéle bel ne awúu áde áwúé'áá bad, boj ábagé bó Yesue áá, bétiméd mó ngáne bédáá.

Bébómmé Yesue á awág

(Mat 27.32-44; Mak 15.21-32; Jón 19.17-27)

²⁵ Áde sánze ékeenéé Yesue á hóm dé mpanag, êmbomén Simóné, mod a dyad á Sirine. Anén mod ambid á mwá dyad awé adé á ahángé. Héé békóbé mó, bérpémtdé mó awág áde Yesue bán áhídne mó dó ámbid.

²⁶ Átinté e ndun e mod eché enanáá Yesue ámbid, bebaád bémbe áwed, béchyé'áá, bélébe-'e mó. ²⁷ Dóo Yesue ánoné ámbid, álängé bó nén áá, “A-bán bér bebaád bér Jerusalém, nyéechyé' me, nyéechyé' échen yél ne áben bán. ²⁸ Nhóbe nê áyéle nén e'pun é'bín é'húe, áde bad bélhóbé bán, ‘Nnam ne ábê ábe bédé ekom, ne ábê ábe béechyáá’, ne ábê ábe bélwánjté mbéid!”

²⁹ Á póndé eché dóo bad bélängéé mbawod bán,
‘kúmtéd sé ámín,’
káa e'kone bán,
‘kútén sé.’

³⁰ Nzé bélbélé’ mímén mésyéél bao, áde bwel élyágé é'díí mendib áte, chán-náá bélbenlé áde bwel békinné-yé?”

³¹ ³² Bóob-poá bénkéén e'bébtéd é' bad é'be, ápan bó nchoo ne Yesue. ³³ Áde bérpédé hóm áde bélhögéé bán Ebónjél é Nló, bémboomé Yesue á awág, ne ábê e'bébtéd é' bad é'be. Bémboomé nhógr áekáá é emwed, anínií-'e áekáá émbáá. ³⁴ Héé Yesue ákânnéé nén áá, “A-Sáj, lagsén bó áyéle bélbíí'é chóm éche bélbeléé.”† Sánze ênsid mbambú, ákab mbóté éche Yesue. ³⁵ Ndun e mod entyééem á nkag, bénjné' chóm éche ébenlad. Boj

* 23:16 Donge á kálag dé'só ábádá nchoo 17: Bóob-poá, mwé téé, nzé Ngande e Nnyíme-ámín embé, Paylede antángén bad bér dyad mod a mbwág nhógr achenned. † 23:34 Donge á kálag dé'só déewoo'é: Héé Yesue ákânnéé nén áá, “A-sáj, lagsén bó áyéle bélbíí'é chóm éche bélbeléé.”

benkamlené bé Israël békéláá mó, békébéké bán, "Achönté'áá bad béképée, áchood-taó eche yéł, nzé ne mbále mó adé Ane awé Dyob Ápwédé, boŋ Áwogéd-te."

³⁶ Sánze chómpē éwéláá mó. Émpuinéd mó ebéntéd é mǐm, ³⁷ élāngē mó bán, “Nzé wéé edé kāj e bad bé Israël, ésōŋ echon yěl!”

³⁸ Béntél áwe nló ámīn nén bán, “Kēŋ e bad bé Israël chóo nén.”

³⁹ Átîntê e ábê e'bébtéd é' bad é'be ábe bêmboméé bôobé Yesue á awəg, nhóg ansyáej mó aá, “Saá wé edé Ane awé Dyöb Áwógté-yé? Söñ-đ échoy yël, ésonj-’e sémpé!”

⁴⁰ Boŋ anínií mod ankáné waáb áte aáken, “Weebáá’é Dyöb-ε? Sóo bad béké dekuudé melemlem mé nkógsen míme mómpē ákúdé. ⁴¹ Boŋ pən, nkógsen míme dékúdé, nítáŋgéné ne míme sóo mbéb. Boŋ anén mod eébeléé dyam dé mbéb ké ahóg.” ⁴² Héé ane mod ábádée ahób aá, “A-Yesu, sôn, weéchatán me á póndé eche wésõnlé á nkamlen.” ⁴³ Dóo Yesue álângéé mó aá, “Á mbále, nlângé we meé, chii nén děn wébē ne me á Paradis.”

Yesue awédé

(Mat 27.45-56; Mak 15.33-41; Jon 19.28-30)

44-45 Baəb-poá bín bémbē dyam kəd. Etondēe andím, ehíntén ékwē-'e ekíde áte ésyəəl káej ne á ngáej éláán. Abad áde dēnkäb Ndáb-e-Dyōb áte dēnsalé áte e'ped é'bë. **46** Hé dão Yesue álébpé esaád aá, "A-Tê, áwôj mekáá dôo nlyágé échem edəádən!" Amaá-'aá ahób nê, ámii-'e nlém, awé-'e. **47** Áde mod ambáá a sánze ányíné nê, ankéméd Dyōb néñ aá, "Á mbále, anén mod abédé-'e mod a bwâm." **48** Néé ndun e mod echë enhyë anõn, ényíné mekan mé ményáké míme mébénlédé, mod téé ambán ekáá á nlém, ásūe' á ndáb. **49** Yesue ábe besón bésyəəl ne bebaád ábe bémbootéd mó anan ámbid se á Galilia, bényéem etún, bénõné mímén mekan mésyəəl.

Bélimmé Yesue

(Mat 27.57-61; Mak 15.42-47; Jon 19.38-42)

⁵⁰⁻⁵¹ Bəɔb-poó mod ambé awé abédé dín bán Josebə. Anén mod ambíd á dyad á bad bé Israël áde békħagħeé bán Arimatia. Abédé mod a edúbé. Abédée mod a bwām, asáj-’e. Kénée ábédé mod a káánsel enkēnkwenténné mbakú eché ábíníí belyáged bé dyad békħibdētē āwúu Yesue. Abédé mod nhóġ awé anlyág nlém nén aa epun ép̄e éche Dyōb dékobpé nkamlēn. ⁵² Ankě Payledə acháj aá, ábe mó ndim míme Yesue. ⁵³ Néé ákúdē kunze, anhúd mó á awəg, ákāān mó kəse e mbóm, áke alímé mó á soj eché békħwóġé á elá-tē, éche békħesbpeé mod alíme áte. ⁵⁴ Nén démbē á Mbwe mé mbojsén, áde mbwe-mé-nkóme-áte ínhédé’áá abooted. ⁵⁵ Bebaád ábe békħibdētē Yesue anan ámbid se á Galilia, bénħid Josebə, bényín soj, bényín-ne ngáne bénánté mó ndim á soj-tē. ⁵⁶ Dóó bétimé ámbid á dyad-tē, békħibdētē mó ne mekún míme bénabnadté ndim. Á mbwe-mé-nkóme-áte bénkħmē áte ngáne mbéndé e bad bé Israël étíídé.

24

Yesue apuúdé

(Mat 28.1-10; Mak 16.1-8; Jon 20.1-10)

bembapee bé nlómag bénwēmtēn bán ene pôle edíi ngwel. Bénkêndubéé chó. ¹² Hê dáo Petro ápádté ásē, boj ányəgté á soj. Áde ápédé áwed anwúlén ásē, ánōn soj áte. Anyín dásō mbóm chëmpen. Dóo ásúú á ndáb. Mewémten mékógládtáá mó áte tângene dyam áde ábénlédé.*

*Yesue apiídé bad bébe á nzii e Emos
(Mak 16.12-13)*

Hê dôô bétyéémé ne ngôl esyâél. ¹⁸ Dôô bô mod nhôg awe bêchâgeé bán Klopase, átimtanné mó aáken, “Emôjñ pën-éé edé nken a mod á Jerusalém, áde wéébí mekan ríme nkébenléed rímmén mesú-ye?” ¹⁹ Dôô Yesue ásedteé bô aáken, “Mekan méhéé mêt?” Boj bélângé mó bán, “Mekan ríme mébénléed tângene Yesue, mod a Nazaret. Ambé nkal é dêádæj awé ahóbé’áá, ábelé-’e ndale é mekan á’sô é” Dyöb ne á’sô é baányon. ²⁰ Ábed beprise bémbaráá ne belyáged bé dyad bêmbé mó á mekáá mé nkamlene, âbíded mbakú bán bewúú mó. Dôô bêbómmé mó á awög. ²¹ Boj sênlyág nlém bán, mó adé ane awé áwobé bad bé Israël. Néé éhûdé nê áte, chii dôô álôntan e’pun é’láán taa nê ábenlede. ²² Ámin e nê ámpê, nguse é bebaád átîntê echêd bêpéénédé sé menyáké mé pôle. Bênkë á soñ epög é mbwembwe, ²³ boj bêétâneé ndim ríme Yesue. Bénhüü ámbid, bêhôbê bán, ángel épíidé bô á ndog-te, élângé bô nén bán, Yesue adé á alongé. ²⁴ Nguse é bad átîntê echêd énké á soñ, bétán chô melemlem nêngáne bebaád bênhôbpê, boj bêényinéé mwën.”

²⁵ Dóo Yesue áláŋgeé bó aá, "E'yókél é' bad bóo nyédíí. Nyéewámsánné mam mésyāél míme bekal bé'dádən̄ béhóbé adúbe! ²⁶ Ngómē éhédnádtáá bán, Ane-awé-Béwógté ákud mímén metake mésyāél, boŋ ákud éche ehúmé." ²⁷ Yesue antógnéd bó mam mésyāél tâŋgēne eche yǎl, ngáne méténlédé á Kálag e Dyōb-te, mbooted ne kálag éche Moses ne kálag éche bekal bé'dádən̄ bésyāél.

²⁸ Áde bépédé bénben ne dyad áde békágé'áá, Yesue anlúméd byánán eke elyágé édémó á'sō. ²⁹ Boj bénkəŋ mó bán, "Hyɛ édyεε áwēd ngáne bín é'máá ahín, póndé-'e emaá atóm." Dóo áhídé bó âdyεε áwāb. ³⁰ Áde bóbəo bédyéé ásé á tébele âdyé ndyééd, antéed ewele, ánāmēd chó, ásäl chó áte, boj ábagé bó. ³¹ Hê dóo mǐd métánlé dédé bó, boj béchemé mó. Dóo ányóó bó á díd-te. ³² Bénlāā nhóg ne anínií bán, "Ngómē nlém nhógráá syánē á abum áde ákánlé'áá syánē á nzii, boj átənlād syánē Kálag e Dyōb?"

³³ Ábwōg-ábwōg dóo bésyéngé ásē, bon bétim-me ámbid á Jerusalem. Dóo bétané bembapee dyōm ne nhóg ngáne béládné áte hōm ahóg bōobe bembapee bémpée. ³⁴ Héé bembapee ábe bétané á ndáb-te bélángé bó bán, “Sángwéé apuúdé ne mbáá, apiídé-’é Siméne!”

³⁵ Dóó bó bad béké bóm pé béké dyam áde ábénlédé bó á nzii, béké béké-'e ngáne béké hémé mó áde ásáleé ewele áte.

Yesuε apiídé ábē bembapεε

(Mat 28.16-20; Mak 16.14-18; Jøn 20.19-23; Mbel 1.6-8)

³⁶ Á póndé eche békaleé nê, dôo Yesue mwën ábídé bó átîntê, boj álenté bó aá, “Nsanjimbê ne nyé!”†

³⁷ Mbwóg ménkōb bó bwâmbwam, béwêmtân bán, bényiné nwú. ³⁸ Dôô álângeé bó áá, “Cheé nyétagéé áte? Cheé nyényágéé á nlém-tê. ³⁹ Nyénon me mekáá nyénon-ne me mekuu, bon nyébíi bán mmën-ee ndé. Nyékiten me yâl, nyényin nzé nwú ñwóó nson ne e’hid ngâne nyényinéé nwóó nén.”

* 24:12 Donge á kálag dé'só déewóo'é nchoo 12. † 24:36 Donge á kálag dé'só déewóo'é: álenté bó aá. “Nsan míté ne nyé!”

⁴⁰ Áde ámáá ahób nê, anlúméd bó míme mekáá ne mekuu.[‡] ⁴¹ Áde belyágé bényágéé nê ne menyinje mésyāēl, békoglad-táa á nlém-tê, dóo ásédtéé bó aáken, “Nyéwóó chöm éche bédyágkē hén-ε?” ⁴² Dóo bébágé mó esónj é súu eché bétumé. ⁴³ Boj ákobé’, ádyág-ke chó áwab e’só-te.

⁴⁴ Héé álānggéé bó aá, “Mmén mam móo ílāngé’áá nyé áde nílyágé ndé ne nyé mæé, dyam téé átāngéné alón ngáne éténlédé áyāl echém á kálag é mbéndé éche Mosee ne á kálag é bekal bē’déadəŋ, ne á Kálag e Ngæse-tê.”

⁴⁵ Dóo ánédté bó debyéé áte, ábel néen bésöñtēn Kálag e Dyōb, ⁴⁶ boj álānggē-’e bó aá, “Bétélé á Kálag e Dyōb néen bán, Ane-awé-Bewógté atāngéné metake akud, awé, boj e’pun ábe é'lonténé é'láán, apuu. ⁴⁷ Bétélé bán, bad békálé meloŋ mé bad mésyāēl néen bán, bad bétéde abel dé mbéb á dín á Yesu, ábel boj Dyōb álagsen bó mbéb. Bébootéd bad rímé nkalaŋ akale á Jerusalem. ⁴⁸ Nyé-’áá, nyéédé bad ábe bényínné mímmen mekan díd. ⁴⁹ Mmén mělōmē nyé chöm éche Titée ánhōbpē aá móðlōmē nyé. Boj nyélyag nyédyee á dyad-tê kááŋ né nyékudé ene ngíne eché ebíde ámīn.”

Yesue apummé

(*Mak 16.19-20; Mbēl 1.9-11*)

⁵⁰ Dóo Yesue ásyáŋnédé bó á dyad-tê, ápeené bó benben ne dyad á Bétni. Héé ányéné mekáá ámīn, boj ánámté bó. ⁵¹ Áde ánamteé bó nê, dóo áchenné bó, boj ápummé ádyōb.[§]

⁵² Ábē bembapéé bém̄bwōgē mó mebóbón. Béntim ámbid á Jerusalem ne menyinje mésyāēl. ⁵³ Békág-ke á Ndáb-e-Dyōb póndé ésyāēl, ákemed Dyōb.

[‡] 24:40 Donge á kálag dé’só déewóó’é nchoo 40. [§] 24:51 Donge á kálag dé’só déewóó’é boj ápummé ádyōb.

Nkalarj mí bwâm míme Yesue ngáne

Jøne
átélé
Ndibned ní kálag

Nkalarj mí bwâm ngáne Jøne átélé ílûmte aá Yesue adíi Eyale é Dyöb éche édé á ngíndé ne á ngíndé. Échê Eyale êntím moonyoŋ édyēē-'e átîntê e bad. Mmén nkalarj, Jøne atelé mó âbel bad abé béláa mó bédúbe nén bán Yesue, Mw  n a Dyöb mó adé Nsoode aw   Dyöb dénh  bp   aá móðl  m. Anl  m  d-te aá nz   bad b  d  bp   mó b  k  d e'soo  soy.

A kálag t   w  n á mbooted, Jøne alûmte ngáne baah  g b  nd  b  e   Yesue b  kwent  n-ne âh  d mó, âl  mt  -'e ngáne b  mp  e-'e b  t  ng  nn  á mó, b  ekwentene-'e mó ad  ube. E'ped 13-17 é'h  be t  ng  ne ab   ade Yesue ne ab   bembapee b  mb  e   p  nd   esy    l k  r  j ne epun éche b  k  b   mó ne mam míme ánl  a  'e b   ene p  nd   esy    l. Jøne ah  b   ámp   aá nz   mod ad  bp   Kr  st  a     k  d along   ade d  ema  '.

Nkabtid ní kálag

Ndibned 1.1-18

Jøne, Ndus  ne ne bembapee b  's   ab   Yesue 1.19-51

Ns  n míme Yesue 2.1-12.50

E'pun b   as  g ab   Yesue á Jerusal  em ne b  enben ne Jerusal  em 13.1-19.42

Mpuu míme S  njgw     ne al  med ade âl  mt  á bad y  l 20.1-31

Ns  gten: Yesue al  mt   y  l ámp   á Galilia 21.1-25

Eyale ênt  m moonyo  

¹ Á mbooted, by  n  n Dy  b d  h  g nk  js   Eyale êmmad ab  . Eyale émb   ne Dy  b. Éch   Eyale éb  d  e Dy  b. ² K  r  jse á mbooted Eyale émb   h  m ah  g ne Dy  b. ³ Dy  b d  mb  enl  d éch   Eyale âh  g bw  m é'sy    l. Ch  m k   eh  g éesa   éche Dy  b d  nh  gk   éseb   ne Eyale.

⁴ Along   asy    l d  nh  u   ne Eyale, ad   along   d  -'a   ap  n  d  e ba  nyo   e'ny  n  n b   ek  de.

⁵ Ab   e'ny  n  n b   ek  de e'p  ne' á eh  nt  n-t  , eh  nt  n é  h  l  e   b   ab  ded.*

⁶ Mod nh  g amp   aw   Dy  b d  nl  mm  . D  n d  mb   mó bán Jøne. ⁷ Jøne amp   âl  aa bad t  ng  ne ab   e'ny  n  n b   ek  de, âbel n  n bad b  sy    l b  w  g, b  d  ube-'e. ⁸ Sak   mw  n ab  d  e ab   e'ny  n  n b   ek  de. Amp   ab  d mb  n t  ng  ne ab   e'ny  n  n b   ek  de. ⁹ Eyale ch  o   éb  d  e e'ny  n  n b   ek  de é' mb  le ab   e'ny  n  ' moonyo   asy    l ek  de. M  -'a   apag  'áá á nk  js  -te. ¹⁰ Ab  d  e á nk  js  -te, bo   k  n  e Dy  b d  nh  gk   nk  js   ne mó, nk  js   m  nk  nchemm   mó. ¹¹ Amp   aw   dyad bo   ab   bad b  nk  nkop  p   mó. ¹² K   n  , amb   do  ge á bad kunze ab   b  n b   Dy  b. Ab   bad b  b  d  e bad ab   b  nk  b mó ne ad  ube ade b  nd  b  e   mó. ¹³ B  esa   b  n b   Dy  b ny  a ech   moonyo   áchy    a  'e mw  n. B  nk  mb  á b  n b   Dy  b by  n  n moonyo   mó achy    a   b  . Dy  b d  n d  o   ade aw  b Tit  e.

¹⁴ Eyale ênt  m moonyo  , édy    t   át  nt   ech  d. Anl  n ne nsim  , anl  m  d-te sy  n  ngáne mb  le e Dy  b ek  o   ab  . Denny  n éch   eh  m  , eh  m   éche s  á áb  g   mó né   mm   mp  om mó mw  n. ¹⁵ Jøne anh  b mam ay    l ech  , anh    d a  , "An  n mod mó   r  l  ng  'áá ny   me  , 'Mod ah  u  ' ámb  d ech  m aw   at  m   me, ay    l b  d  echy    l me, né ad   am  n.' " ¹⁶ Al  n ade al  n  ne nsim   ab  l  e sy    a   moosy    l dekud   nnam ámb  d e nnam. ¹⁷ W  e   Mose   d  o   Dy  b d  empo  dt   mb  nd  . Bo   nsim   ne mb  le b  h  u   ne Yesu Kr  st  a  . ¹⁸ Modmod e  ny  n  e   Dy  b mb  d  , e  t  m  e   m  m   mp  om mó mw  n aw   ad   Dy  b ab  -'e mó á ak  b. Mw  mp  n mó akid  ny  n mó. M   ab  l  e bo   Tit  e Dy  b  e aby    en.

Jøne, Ndus  ne ah  b   a  
mó  sa   Ane-aw  -B  w  gt  

(Mat 3.1-12; Mak 1.1-8; Luk 3.1-18)

* ^{1:5} Eh  nt  n-ne é  h  l  e   b   ab  ded k  a eh  nt  n énk  nchemm   b  .

¹⁹ Baámbáá bé Israél bé dyad á Jerusalem bénlōm beprise ne bad bémpēe bé túmbé e Levi wée Jōne, bán béké bésedēd mó bánken nzé-módé adíí. ²⁰ Enkēmbangé ahób, boj ampanléd bó áte aá, “Saké me ndé Ane-awé-Bewógté.” ²¹ Héé bésedteé mó bánken, “Nzé-Ṅ edíí? Wé-eé edé Elaijaa?” Ankwéntén aá, “Aáy, meésáa mó.” Bénsedéd mó ámpē bánken, “Wé-eé edé nkal é-déadəj awe bésineé-yé?” Antimtén bó aá, “Aáy.” ²² Kéájne á asog džó bésedteé mó bánken, “Nzé-Ṅ edíí? Láá sé ábel sétim ámbid álāa bad ábe bélomé sé. Nzé-módé weewe ehóbé wéé módé?” ²³ Héé Jōne átimtanné bó ne e'yale ábe nkal é-déadəj Yesayaa ánhōbpē aá,

“Méé ndé ehób éche mod awé ahéjte’ á ehyángé aá,
‘Nyétíi nzii eche Sáŋgwéé.’”

²⁴ Boob-poá Befarisia bóo bénlōm ábē bad ábe bémpě wée Jōne. ²⁵ Bénsedéd mó ámpē bánken, “Nzé weésé Ane-awé-Bewógté, weésé-’e Elaijaa káa Nkal é-déadəj awe bésineé, cheé-Ṅ édusanné bad?” ²⁶ Héé Jōne átimtanné bó aá, “Ndusan ne mendib, boj mod adé átinté echén awé nyéebíí’-é. ²⁷ Mó adé ane awé ăpě ámbid echém. Meékwognedéé áhune kékí mímé nkɔ́od mé metámbé.”

²⁸ Mmén mésyā̄l mêmbeñléd á dyad á Betani á múde mé edib é Jodan rímíníí wée Jōne ádúsánnáa bad.

Yesue, Mwǎn-a-Ñdyoŋ mí mbód a Dyōb

²⁹ Néé bín é'sáŋgé, Jōne anyín néé Yesue áhúe' é níníí. Héé áhóbéé aá, “Nyéñone”, Mwǎn-a-Ñdyoŋ mí mbód a Dyōb mōne. Mó ahúde’ mbéb mí bad bér nkɔ́nsé. ³⁰ Anén mod móo ñláŋgé’áá nyé áde ménhōbpē meé ‘Mod ăpě ámbid echém awé atómé me, áyále bédéchýáá me, né adé ámīn.’ ³¹ Ké mmén menkembíí’ é mó, boj mempě índusán bad ne mendib ábel bad bér Israél békíí mó.’ ³² Héé Jōne ábídeé mbón nén aá, “Menyín nêngáne Edéadəj é Dyōb ébídé ádyōb néé élāā, ésud mó á nló mén, ébé-’e ne mó. ³³ Ké nê, menkénsónténné meé mó ne. Boj Dyōb áde dénlōm me aá índusán bad ne mendib dêmmád me aláa aá, ‘Mod awé wényinné néé edéadəj é Dyōb ésúdé á nló mén, boj étyééém áhed, móðusén bad ne Edéadəj éche Ésáá.’ ³⁴ Nyíné mmén mekan mésyā̄l, mbíde-’e mbón nén meé mó adé Mwǎn a Dyōb.”

Bembapéé bér sō ábe Yesue

³⁵ Néé bín é'sáŋgé ámpē, Jōne ambé áhed ne ábē bembapéé bér. ³⁶ Annyín néé Yesue átóméé. Ádě anyíné mó, anhób aá, “Nyéñone”, Mwǎn-a-Ñdyoŋ mí mbód a Dyōb mó ne.”

³⁷ Ádě ábē bembapéé bér bér wóglé nê, bémbootéd Yesue ahíd. ³⁸ Áde Yesue áñóné ámbid boj anyín nêngáne bérhídeé mó ansedéd bó aáken, “Cheé nyéhedeé?” Béntimtén mó bán, “Rabai” (awé adé bán meléede) “Héé édye’-é?” ³⁹ Anláá bó aá, “Nyéhyag, nyényín wée ídyee’-é.” Né-óó, bérnké anyín wée ádyee’-é. Áde bérpédé áhed ébédé dyam ngáj éniin é ngukél. Béndyeé-’e áhed káej bín é'híntén bó. ⁴⁰ Átinté e ábē bembapéé bér bér ábe bérwōg dyam áde Jōne ánhōbpē boj bérhíde Yesue, nhógr abédé dín bán Andreya. Andreya abédé Simón Petro mwányaŋ. ⁴¹ Né-óó dyam dé’sō, anké mwányaŋ Simóné ahéd. Anyíné-’áá mó boj álāŋgē mó aá, “Sényíné Ane-awé-Bewógté” (néde Krístə). ⁴² Dóo Andreya ápééné Simóné wée Yesue. Yesue anóné-’áá Simóné chóój, boj áhōbē aá, “Edíi Simóné, mwǎn awé Jōne. Béchágé we boob bán Sepase.” (Ádén dín ádii melemlem néé Petro, nê adé ndim e aláá.)

Yesue achéñlé Filibe bér Nataniel

⁴³ Néé bín é'sáŋgé, Yesue ammád aá mókag á mbwógl e Galilia. Dóo ákíí Filibe atán boj álāŋgē mó aá, “Hídé me.” ⁴⁴ Filibe abédéé mod a dyad á Betsaida, melemlem mé dyad ádě Andreya bér Petro bérmbidté. ⁴⁵ Filibe anyín Natanielé. Héé álāŋgeé mó nén aá, “Sényíné ane mod awé Mosee ántenlémam áyáel eché áwe mbéndé-te. Móó káéjne bekal-bé-’déadəj bértenlémam á yél. Adíi Yesue mod a dyad á Nazaret, mwǎn awé Josebē.”

⁴⁶ Héé Natanielé ásédtéé mó aáken, “Dyam á bwám áhéé áhéle ábíd á Nazaret?” Dóo Filibe álāŋgeé mó aá, “Hyé ényín.” ⁴⁷ Áde Yesue anyíné Natanielé ahúe’, džó áhóbéé áyáel eché aá, “Nyéñone, mwǎn a Israél nén sóm-sóm, awé mbeltéd nítééémé!” ⁴⁸ Héé Natanielé

ásedteé mó aáken, “Chán émwédé me abíi?” Héé Yesue ákwéntanné aá, “Filibe adêhób aá móchäge we, nnyíné we á alín á ngəl sé.” ⁴⁹ Héé Nataniele áhóbéé aá, “A meléed, edíi Mwǎn a Dyöb. We-eeé edé kâj e bad bé Israel.” ⁵⁰ Yesue antimtén mó aá, “Edúbpé áyäle íllángé we meé nnyíné we á alín á ngəl sé. Weényín mam írmé métómé nén.” ⁵¹ Héé ábádeé aá, “Ne mbále, nlângé nyé nén meé, nyéenýin néé dyöb ánédnédé nyényín-ne néé ángel é Dyöb échágkéé ésudé-’e Mwǎn-a-Moonyoŋ ámín.”

2

E'wóngé á dyad á Kana

¹ Ámbid e e'pun é'be, e'wóngé bémbé á dyad á Kana á mbwóg e Galilia. Yesue nyaá ambé áhed. ² Bénlēbē Yesue ne ábē bembapēe bómpe á e'wóngé wê. ³ Mím mémmaá áte. Hê dôo Yesue nyaá ápédé áwē boj álāngé mó aá, "Mím mémáá bó." ⁴ Héé Yesue álāngéé mó aá, "Á-nyan̄, weetângeneé me dyam áde nítângéné abel aláa. Echem póndé eépéddéé." ⁵ Héé nyaá ákíí bembalede bé ngande bê aláa aá, "Nyébel kéchéé éche álāngé nyé aá nyébel." ⁶ Baob-poó, mbeé é meláá ebédé benben ne áhed. Échê ndín é mbeé châo bad bê Israél bélénládtáá áhê mendib áte á nwobe n̄ yâl á póndé e mekâne echâb. Ké ehéé etedé'áá dyam mbwókel e líta e mendib. ⁷ Héé Yesue álāngéé bembalede bé ngande bê aá, "Nyélóned mbeé chê ne mendib." Né-oó, bénlönéd échê mbeé hoođ ne mendib. ⁸ Dôo álāngéé bó aá, "Nyékabe-oó mendib baob, nyékseen wéé mod awé alyágte' mekan mé ncháged." Né-oó, bembel áned. ⁹ Áde ane mod áwógléné mímê mendib míme mémáá mím atim, enkembíí'é wéé mébídé, (boj bembalede ábe bénké mímê mendib akabe bembíí). Dôo áchágé mod awé akude sómbé, ¹⁰ boj álāngé mó aá, "Mod téé abelé asébe achágtén bad mím mímě mébóó. Bad bémmaa-'áa mó amwé bwâmbwam, boj ábagé bó mímě mééboo. Boj wé, etimé eköngé míme mébóó kááj ne baob." ¹¹ Mmén menyáké mímě Yesue ábélé á Kana á mbwóg e Galilia móó mébédé ábē e'chemléed é'sô. Hê dô-'áá álúmté échê ehúmé, ábe bembapēe bênsüm-me míbab nlém áwé.

¹² Néé nén ámáá atóm, Yesue ansyogé á dyad á Kapanahum nchoo ne nyaá, baányaan ne ábē bembapee. Bêndyéé-’é áwed nguse é e’pun.

Yesue anané bekáb bé nyongé á Ndáb-e-Dyōb

(Mat 21.12-13; Mak 11.15-17; Luk 19.45-46)

¹³ Ádě póndé e Ngande e Nnyíme-ámīn ékwógé bad bé Israël ape, Yesue anké á dyad á Jerusalém. ¹⁴ Ádě ápédé áwed, anké á Ndáb-e-Dyōb. Antán née bad békábeé dyon. Bésomé'-áá nyag, mbód ne mbəngé, bepele-bé-mənē'-e bépénlé mənē. ¹⁵ Héé átédé nkəod, ámané etangú ánanné bó nchoo ne échab mbód ne nyag á Ndáb-e-Dyōb wê. Ampántéd mənē rímě bad békábeé áá áte, ákūnē'-e betébele ábe békábeé áá rímē mənē ámīn mekuu ámīn. ¹⁶ Anláá bad ábe bésomé'-áá mbəngé aá, “Nyébíden beləə bén á ebwög. Nyéetimté ndáb eché echem Sáj ndáb e dyon.” ¹⁷ Ádě ábē bembapée bén yíné nê, dǎo békamténé eped é kálag e Dyōb éche éhóbe nén bán “A-Sáj, kán eché ínwóó áyāle echon ndáb éwūū me.”

¹⁸ Héé benkamlene bé bad bé Israël bétímé ámbid, bésedté mó bánken, “E’chemléd é’héé éhele elúméd sé ábel sébíi bán ewóó kunze ábel enén ndín e dyam?” ¹⁹ Yesue antimtén bó aá, “Nyépâñ enén Ndáb-e-Dyöb, mělōñ chó ámpē áyále e’pun é’láán.” ²⁰ Dóo ábê bad békamtéé bánken, “Enén ndáb eché bétédé móom mé mwé méniin ne mwé ntóób chóó éhóbeé wéé móólōñ áyále e’pun é’láán-ε?” ²¹ Boj ndáb eché Yesue áhóbé’áá ebédéé dásō eche yäl. ²² Né-óó ámbid eche Yesue áwédé boj Dyöb ápüüd mó, dóo ábê bembapee békamté né dyam ádë ánläá’ é bó. Béndübé mam mímě méténlédé á kálag e Dyöb, bédúbé-’é e’yale ábe Yesue ánhöbpé.

Yesue abíí mod asyəál nlém áte

²³ Á póndé e Ngande e Nnyíme-ámīn, áde Yesue ámbēē á dyad á Jerusalém, bad hín bénđubé mó ngáne bényínné menyáké ímmé ábeléé. ²⁴ Bonj ké nê, Yesue enkênummémenté.

nlém áwāb, áyāle ambií moosyāél áte. ²⁵ Modmod enkēntáŋgénné mó dyam aláa tâŋgene mod ampée áyāle mwěn ammād moonyor asyāél nlém abíí áte.

3

Yesue bō Nikodemuse

¹ Mod nhóg abédé bán Nikodemuse. Abédéé nhóg awé alyágté’áá bad bé Israel abé’-e epépé é bad bé Farisia. ² Mbwe nhóg ampé wéé Yesue nkuu, álāŋgē mó aá, “A-meléed, sêchemé néen bán, edíi meléede awé Dyōb álómé. Áyāle nzé Dyōb déesé ne mod, eéhēlē-ssé ábelé mekan mé menyáké mímmé ébeleré.” ³ Yesue ankwentén mó aá, “Ne mbále, modmod eéhēlē-ssé asól á nkamlén í Dyōb ésebán achyáádté ámpé.” ⁴ Nikodemuse-’e ansédéd mó aáken, “Chán mod awé amaá akwog áhèle se achyáád ekóólé-ekóólé? Éesaá mbále néen bán eéhēlē-ssé asól á abum ádē nyaá ngen échě élonténé ébe ábel béchyáa mó ámpé-ye?” ⁵ Dóo Yesue átimitanné mó aá, “Ne mbále, nlângé we meé, nzé béechyáa mod ne mendib ne Edəádəj eéhēlē-ssé asól á nkamlén í Dyōb. ⁶ Ane awé achyáádté ne moonyor a ekob, adíí moonyor. Awé mó-’e achyáádté ne Edəádəj é Dyōb adíí Edəádəj. ⁷ Weebág menyáké ngáne ínhóbé meé ‘Mod atáŋgéné achyáád ekóólé.’ ⁸ Nzé epub éhóbé bán chó étóme’, ped eché édáá ake chóá ékagké. Ewóge’ ntøgag míme ébeleré boj weebié’ é wéé ébídeé ké’-e wéé ékagké. Melemlem nê dóo édíí ne mod ké ahéé awé achyáádté ne Edəádəj é Dyōb.” ⁹ Héé Nikodemuse ásédtéé mó aáken, “Chán néen áhèlesé ábënled?” ¹⁰ Yesue ankwentén mó aá, “Néé édíí meléede ambáá a bad bé Israel weéhēl’ mímmén mekan asôjten-ne? ¹¹ Ne mbále, nlângé we meé, dyam áde sébíí dóo séhóbeé. Sébide-’e mbón ne dyam ádē sényiné. Boj nyé modmod nyéekwentenéé choméche séhóbeé adúbe. ¹² Néé nlângé nyé mekan míme médé mekan mé nkönsé, nyéedúbpe, chán-nō nyémwéé adúbe nzé nlângé nyé mekan mímmé médé mekan me nkoy mí mîn? ¹³ Modmod eékii’ é á nkoy mí mîn étoméé Mwǎn-a-Moonyor awé abídé áwed boj ápe á nkönsé.” ¹⁴ Ngáne Mosee ámboméé nyá á akon* boj atíí dó ámín á ehyángé, melemlem nê dóo bétii’ é Mwǎn-a-Moonyor. ¹⁵ Nén débenléd ábel boj kénzéé awé adúbpé mó ákud alongé áde déemaá’.

¹⁶ Dyōb átómténé bad bé nkönsé adəj. Né-oo anlóm ímmé mpøm mí Mwǎn ábel kénzéé awé adúbpé mó eewág boj ákud alongé áde déemaá’. ¹⁷ Dyōb dénkênlommé awe Mwǎn á nkönsé ákáad bad. Alongé á bad dóo ánlömmé mó ásoj. ¹⁸ Kénzéé awé adúbpé mó eékwaá nkáásé, boj kénzéé awé eedúbpe mó, amaá nkáásé akwe áyāle eedúbpeé mpøm mí Mwǎn í Dyōb. ¹⁹ Nén dóo mbakú e Dyōb édíí: E’nyínén bé ekíde é’péde á nkönsé, boj baányor bédáé ehíntén tómaa e’nyínén bé ekíde áymab mbeltéd índé mbéb. ²⁰ Kénzéé awé abele mbéb, akow ábê e’nyínén bé ekíde, éepaá-’áá á e’nyínén bé ekideté ábáj néen mímmé mbeltéd mé mbéb méébídé áwed. ²¹ Boj kénzéé awé abele mam mé mbále, abíde’ á e’nyínén bé ekíde ábel néen bad bénýin bán kéchéé échě ábeléé awógne Dyōb.

Mbón eché Jōne tâŋgene Yesue

²² Ámbid e nê, Yesue ne ábē bembapéé bénké á mbwógi Judeya. Bóbøa bêndyeé áwed nguse é e’pun, ádusán-ne bad. ²³ Jōne mómpé adusánáá bad á dyad á Anon benben ne á dyad á Salim áyāle mendib mémbé áhed bwâmbwam. Bad békágé’áá áwé, ádusán-ne bō. ²⁴ Nén ábédé byánán béké Jōne á mbwógi. ²⁵ Bøjb-pøó, donje dé bembapéé ábe Jōne bëpéntánnáá ne mod a Israel tâŋgene nwobe í yäl. ²⁶ Dóo bëpédé wéé Jōne boj bélângé mó bán, “A-meléed, ekamtan mod awé nyúmō nyébédé á ped e edib é Jodan eníni? Mod awé éhóbé’áá mam á yäl eché. Nóné! Móo adusan bad níni! Bad híin békagke áwé.” ²⁷ Jōne ankwentén aá, “Modmod eéhēlē-ssé ákud chomé, ésebán Dyōb ábágé mó chó. ²⁸ Nyébén nyéédé me mbón néen bán menhób meé saké me ndé Ane-awé-Béwógté. Dyōb dénlóm me á’só ábojsen bad áyāle epé éche Ane-awé-Béwógté. ²⁹ Mod awé akude sómbé móo awóó sómbé. Boj nsón-a-echoj a mod awé akude sómbé, awé atyéeme mó á

* ^{3:14} Nyá eche Mosee ámboméé ebédéé nyá eché ámbenlé. Né dóo Dyōb démbenlé áchood bad ábe nyá énlédté á ehyángé. Nzé bad bennón ene nyá, bedyéé bwám. Nóm 21.9.

nkəg áwōglān mó, abâg menyinje nzé awóge mó ehób. Né-óó, nén dóo ákáé boj nlón ne menyinje. ³⁰ Edúbé échē étángéné née échágkeé, échêm-me ésude'.”

Ane awě abídé ádyōb atómé moosyəál

³¹ Ane awě abídé ádyōb atómé moosyəál. Ane awě mó-'e achyáádté á nkörjsé adíi mod a nkörjsé, áhōbē-'e mam mé nkörjsé, boj ane awě abídé ádyōb adé ámīn e moosyəál. ³² Chōm éche ányíné ne éche áwóge chōo áhōbeé boj kē nē, modmod eedúbpéé mó. ³³ Boj kénzéé awě akobé chōm échē áhōbé, né akwenténé ne nlém nísyəál aá Dyōb adé mbále. ³⁴ Póle e Dyōb chōo mod awě Dyōb álómé áhōbeé áyāle Dyōb déenonéé ámbid nzé abage' mod échē Edéadəy. ³⁵ Titée adáe awe Mwān, abagé-'e mekan mésyəál áwē mekáá. ³⁶ Kénzéé awě asumé nlém wéé ane Mwān, akudé alongé adé déemaá'. Boj kénzéé awě eébélē' ngáne áhōbé éekudté alongé adé déemaá', ábē akud nkógsen ní Dyōb.

4

Yesue ne mmwaád a Samaria

¹ Yesue ambíí aá Befarisia bégwogé nén bán mókude ekud é bembapēs tómaa ne Jōne, módušan-ne bó. ² (Kénéé Yesue mwén éedusannaá bad, ábē bembapēs bōo bédúsannáá bad). ³ Awóge áde Befarisia bénwōgkē nê démbél Yesue anhidé á mbwōg e Judeya átim ámbid á mbwōg e Galilia. ⁴ Byánán ápe á Galilia antángén née ápoo a mbwōg e Samaria. ⁵ Á mbwōg e Samaria wé ampé á dyad áde békagéé bán Sika. Ádén dyad démbē benben ne ndəob echē Jakōbe ámbeé mwān Josebē se e'bōód. ⁶ Áyāle ene ndəob echogé éche bélímé éche békagéé áá mendib áte émbē áhed. Échén echogé é mendib ébédéé éche Jakōbe. Ngáne eke énkōmēdtē Yesue andyéé á nkəg mé échē echogé é mendib. Nén ábédé dyam-éé adé kəd.

⁷ Héé mmwaád a Samaria nhógo áhyédé mendib abwel. Yesue anláá mó aá, “Hé me mwā mendib mé amwé.” ⁸ Enén póndé Yesue ábē bembapēs bénkē á dyad-tê áchan ndyéed. ⁹ Héé ane mmwaád átintanné mó aá “Ebé mod a Israél, me-'e mbé mmwaád a Samaria, échōmē me mendib-e?” (áyāle bad bé Israél ne bad bé Samaria békagéé.) ¹⁰ Héé Yesue ákwentanné mó aá, “Nzé wembíí mende mé Dyōb, ebíi-'e mod awě ahedne wé mendib, né ehédné me mendib. Né mbagé-'e wé mendib ríme mébage alongé.” ¹¹ Ane mmwaád ankwentén mó aá, “A-Sáj, kē chōm éche békagéé mendib weewoo'é, echogé é mendib-pe échabé ásē, héé wétédé mímē mendib mímē mébage alongé.” ¹² Eched sáá ambáá Jakōbe mōnlyágnéd sé échén echogé é mendib. Mwén, ábē bān ne ábē e'lém é'syāál, hén-éé bémwagé' áá mendib. Nédē ehóbe bōob wéé mótoomé Jakōbe-yé.” ¹³ Yesue ankwentén aá, “Kénzéé awě amwédé rímmén mendib, píd eebé ekob mó. ¹⁴ Boj kénzéé awě ámwé mendib mímē mébeé mó píd eekóbpé mó mbéed. Mendib ríme mébeé mó, mébē mó áte née n'yéle ríme méeléné”. Mímē mendib mébē mó alongé adé déemaá’.” ¹⁵ Héé ane mmwaád álāngéé mó aá, “A-Sáj, bēé me rímmén mendib ábel nén píd eekobé mémpé, meépág-ke hén ábwel mendib ámpé.”

¹⁶ Dóo Yesue álāngéé mó aá, “Kág, éke échag awoŋ nchóm, boj étim ámbid hén.” ¹⁷ Ane mmwaád antimtén Yesue aá, “Mewoo'é nchóm.” ¹⁸ Dóo Yesue áhōbeé aá, “Ekalé mbále wéé móowoo'é nchóm. Áyāle ekewōŋ bechom bétáan, kē ane mod-te awě nyúmō nyéde bōob eesaá awoŋ nchóm. Dyam áde éhōbe adé mbále.” ¹⁹ Awóge áde ane mmwaád áwóge nê dóo álāngéé Yesue aá, “A-Sáj, nnyíne nén meé edíi nkál é'déadəy.” ²⁰ Á mbəod-mín hén dóo ábēd besáá békagé' áá Dyōb edúbē, boj nyé bad bé Israél nyéhōbe bán á Jerusalem dóo bétángéné Dyōb edúbē abe.” ²¹ Héé Yesue álāngéé mó aá, “Á-mmwaád nén, sójtén chōm éche ínlāngéé wé. Póndé ehúe' echē nyéebaá Titée edúbē á mbəod-mín hén kē'e á Jerusalem. ²² Nyé bad bé Samaria nyébage chōm éche nyéebii' é edúbē. Boj sé bad bé Israél sēbage mó edúbē ngáne sébíí mó áyāle nén e'soosoŋ é'húu dásō ne bad bé Israél. ²³ Boj póndé ehúe', emaá-'e ne ape, echē bad ábe békagé Titée edúbē ne nlém nhógo békagé mó échē edúbē á Edéadəy ne á mbále-tê. Échē ndín é bad chōo Titée áhedeé aá békagé mó edúbē. ²⁴ Dyōb adíi Edéadəy, bad-te ábe békagé mó edúbē bétángéné mó chó abe

á Edəádəj ne á mbále-tê.” ²⁵ Héé ane mmwaád álāngéé Yesue aá, “Mbíí mée Ane-awé-Bewógté ăp̄. Póndé eché áp̄éé, ătənlēd sé mekan mésyāél áte.” ²⁶ Héé Yesue álāngéé mó aá, “Mé awé sóo dekale’ mē-éé ndé mó.”

²⁷ Ene póndé chén dōo ábē bembap̄e bépédé. Ȳl enkóm b̄o áte ânyín néé ákanleé mmwaád. Boj b̄o modmod eésedteé mó aáken, “Cheé éhedéé?” Ké-’é “Cheé nyé ane mmwaád nyékaleé?” ²⁸ Ane mmwaád antedé apom dé mendíb, átim ámbid á dyad-tê, áke aláá bad aá, ²⁹ “Nyéhyag, nyényin mod awé álāngé me mam mésyāél míme nkémbenlé. Nyé bán, saké Ane-awé-Bewógté awé bésineé nén-e?” ³⁰ Dōo ábē bad běhídté á dyad-tê áke dé atán Yesue.

³¹ Ene póndé, bembap̄e ábe Yesue běcháá’ aá mó bán, “A-meléed dyé ndyééed.” ³² Boj Yesue ankwentén b̄o aá, “Nwóó ndyééed e adyé eché nyéebí’é.” ³³ Héé ábē bembap̄e bésedteé nhog ne anínií bánen, “mod mūmó apiínédé mó ndyééed-e?” ³⁴ Dōo Yesue álāngéé b̄o aá, “Echem ndyééed edíi ábel nsón ríme mod awé alómé me, áhóbé aá ríbel, ámad-te mó. ³⁵ Ngómé nyéyōgké ahób bán ámbid e ngon éniin, né póndé e mbote edepé? Nyénōne’, nlānge nyé nén méé nyékéled dīd áte, nyényin ngáne mbote émáá mbojsén abé, ápád á nzag-tê. ³⁶ Ké b̄oob mod awé apáde adé ríme nsábe akud, alade mbote é alongé áde déemaá’, ábel nén mod awé awéne b̄o mod awé apáde b̄o moosyāél běbē menyinge. ³⁷ Né-óó ngan eché békaleé nén bán, ‘mod nhog awéneé, anínií-’é ahúd edé mbále.’ ³⁸ Mé-éé nlómé nyé mbote áke dé apád éche nyéewéneé. Bad běmpée běbélé nsón, nyé-’é nyéetombwan b̄o nsón.”

Bad b̄e Samaria híin bědúbpé

³⁹ Bad b̄e Samaria híin ábe běmbid ádē dyad běndub̄e Yesue áyāle mam mímmē ane mmwaád ánlāá’é b̄o. Ane mmwaád anláá b̄o aá, “Alāngé me mekan mésyāél míme nkémbenlé.” ⁴⁰ Né-óó, áde bad b̄e Samaria běpédé áwē, běnchān mó bán ádyee áwāb dyad. Né-óó, andyee áwed e’ pun é’be. ⁴¹ Bad híin běmpée běndub̄e mó áyāle áde ayáge. ⁴² Běnlāā ane mmwaád bán, “Saké dyam áde élāngé sé děmpen dōo ákáé boj sědub̄e Yesue, boj sěběn sěwógné etúu, sěbií-’é bán mwěn-eé aköjté Nsoode a nkönsé abé.”

Yesue achöjté mwǎn
a mod ambáá a ngómenaa

⁴³ Ámbid e’ pun é’be Yesue anhidé á mbwōg e Samaria, áke á mbwōg e Galilia. ⁴⁴ Yesue mwěn anhób aá, nkal é’déádəj eewóó’é edubé áwē dyad. ⁴⁵ Áde ápédé á mbwōg e Galilia, bad běnkob mó. Běnkob mó áyāle běmbē á Ngande e Nnyime ámīn á Jerusalém, bényin-ne mam mésyāél míme ámbenlé.

⁴⁶ Héé Yesue átímé ámbid á Kana, wéé ántimédté mendíb míim. Áhed-te dōo mod ambáá a ngómenaa ábédé awé mwǎn ákónlé’áá á dyad á Kapenahum. ⁴⁷ Áde ane mod áwōgē bán Yesue ábídé á mbwōg e Judeya apedé á mbwōg e Galilia, amp̄ áwē, acháj mó aá áchood mwǎn, awé ambé běnben ne kwéed. ⁴⁸ Yesue anláá mó aá, “Nyé modmod nyéedub̄pée kááj né nyényiné e’chemléd ne menyáké.” ⁴⁹ Ane mod ambáá a ngómenaa anláá mó aá, “A-Sán, hyág, dékag kwéed edé ehób bán chó ekóbe awem mwǎn.” ⁵⁰ Yesue antimtén mó aá, “Kág, awoj mwǎn ábē á alongé.” Ane mod andubé e’ yale ábe Yesue, ákē-’é. ⁵¹ Áde ane mod ádíi adé á nzii e esú dōo ábē bembalede běbómne mó, boj bělāngé mó bán, “awoj mwǎn ábē á alongé.” ⁵² Dōo ásédté b̄o póndé eché ane mwǎn ámbootédté bwām abé. Běnlāā mó bán, “Ahéb děntedé mó chān á ngén póg.” ⁵³ Dōo ane mod ákámténé aá mímmē melemlem mé póndé mó Yesue ánlāá’é mó aá, “Awoj mwǎn ábē á alongé.” Né-óó, bōobé eché ndáb běndub̄e Yesue.

⁵⁴ Ábén e’chemléd bōo běmbē e’chemléd ábe é’lónténé é’be ábe Yesue ámbenlé áde ábídé á mbwōg e Judeya boj áp̄é á mbwōg e Galilia.

¹ Ámbid e mímmén mésyāēl, Yesue anké á Jerusalém á ngande e bad bé Israel. ² Á Jerusalém wê, bënben ne Nsäl mé E'ké mé Ñdyoj í mbód, etoŋ ébédé áhed. Échén etoŋ béchágé'áá chó á ehób é bad bé Israel bán Betzata. Énwōŋ mebepé métáan. ³ Á mebepé-te wê, bad bé nkole bénkumén áhed, ábe békwdé ndím, ábe bédé e'ped é' bad ne ábe békwdé eped.* ⁵ Mod nhóg abédé áhed awé akékolé á etún é móom mé mwë méláán ne mwë waam. ⁶ Áde Yesue ápédé áhed annyín ngáne ane mod ánángé ásē, abíi'-e aá nkole ímbémé mó á yäl. Dóo ásédté mó aáken, "Edéé bwâm adyee-yee?" ⁷ Ane mod antimtén mó aá, "A-sáj, meewoo'é mod awe ásôléd me á etoŋ-tê nzé mendib mépúútédé áte. Nléchte ahób meé ísôl, né mod ampée amaá asôl." ⁸ Dóo Yesue álângéé mó aá, "Syaá ásē, étêd échoŋ ebúm, ékag." ⁹ Ábwág-ábwág ane mod andyé bwâm, ányág échē ebúm áte, ábootéd-te ake.

Epun éche nén démbenlédté ábédé á mbwe-mé-nkóme-áte. ¹⁰ Né-óó, anyín áde bad bémbará bé Israel bénýiné ane mod awé Yesue ándidté bwâm, bënsedé mó bánken, "Chii ádé mbwe-mé-nkóme-áte, nzé dehídé'-e mbéndé echéd, weetângeneé ebúm apém se ébwágne." ¹¹ Boŋ ankwentén aá, "Mod awé adidé me bwâm anláá me aá, 'Téd échoŋ ebúm, ékag?'" ¹² Héé bésedtéé mó bán, "Nzé adé ane mod awé álângé we aá, étêd échoŋ ebúm ékag?" ¹³ Boŋ ane mod mwén enkénkongé Yesue abíi, ngáne Yesue ámmadé asôl á amute-tê áde démbé áhed. ¹⁴ Ámbid ené Yesue annyín ane mod á Ndáb-e-Dyöb. Áde ányiné mó, anláá mó aá, "Nõnõ", emaá bwâm adyee. Weébél mbéb ámpé ésebé nê, né wëtóm atag ngáne étágé'áá nê." ¹⁵ Hé dóo ane mod áhídté, boŋ áké álângé bad bémbará bé Israel aá Yesue mó adidé mó bwâm. ¹⁶ Né-óó, bad bémbará bé Israel bémbootéd Yesue mekuu ahíd áyäle achöjté mod á mbwe-mé-nkóme-áte. ¹⁷ Yesue antimtén bó aá, "Echem Sáj ayägké nsón abel, me'-e ámpé ntângéné nsón abel." ¹⁸ Enén pôle eché Yesue ánhöbpé, embél yäi ennabé bad bé Israel atod áte áwúu mó, áyäle saké mbéndé e mbwe-mé-nkóme-áte, chëmpen ábóó boŋ achägé Dyöb aá Sáá, nédé alûmte' aá bó Dyöb bétáá.

Ngíne e Mwän a Dyöb ehúú ne Dyöb

¹⁹ Né-óó, Yesue antimtén ábê bad bémbará bé Israel aá, "Á mbále, nlângé nyé nén meé, Mwän a Dyöb eébélëe dyam ké ahög ne mó mwén. Mekan míme ányinéé Sáá abele' móó mómpé ábeléé. Kéchéé éche Sáá ábeléé chó mómpé ábeléé. ²⁰ Ngáne édií nén bán Sáá adéé Mwän, alûmte mó chöm téé éche ábeléé. Áluméd-te mó ndèle é mekan éche étómé ímmén, ábel ékomed nyé yäl áte. ²¹ Ngáne Sáá ápuudtéé bad boŋ ábagé'-e bó alongé, melemlem nê dóo Mwän mómpé ábagéé alongé wéé kénzéé awé ádáá alongé abe. ²² Melemlem-aá Sáá éekâadtéé modmod. Abagé Mwän ngíne esyáel ákáad bad. ²³ Abelé nê ábel boŋ békage Mwän edúbé melemlem ngáne békageé Sáá. Kénzéé awé eébagé Mwän edúbé, né eébagéé ké Sáá awé alómé Mwän edúbé. ²⁴ Ne mbále, nlângé nyé nén meé, kénzéé awé awogé ábêm e'yale boŋ adúbé mod awé alómé me, akudé alongé áde déemaá', békáad-taá mó. Amaá atóm á kwééd, asólé á alongé. ²⁵ Ne mbále, nlângé nyé meé, póndé ehúé', emaá'-e ape, eché bad ábe békwdé békagé ehób e Mwän a Dyöb, bad ábe békagé-ke chó béké á alongé. ²⁶ Ngáne alongé áhúú ne Sáá, melemlem nê dóo ábelé aá alongé áhúú ne Mwän ámpé. ²⁷ Abagé'-e Mwän ngíne ákáad bad áyäle Mwän adíi ane awé békagéé bán Mwän-a-Moonyoŋ. ²⁸ Nén déekõmté nyé yäl áte; póndé ehúé' eché bad bésyäel ábe békwdé békagé ehób, ²⁹ békid-te á son-tê: Bad ábe békéle mboŋ, békpuú ábé á alongé, ábe bó'-e békéle mbéb békpuú békud nkógsen.

Mbóny áyäel wéé Yesue

³⁰ "Dyamdyam déesaá áde íhèle míbél ne mmén. Ngáne echem Sáj álângé me aá íkáad nê dóo nkáadtéé, né-óó mbakú echém etyéémé. Etyéémé áyäle meekáadtéé ngáne mmén ídáá, boŋ nkáadte' ngáne mod awé alómé me áhedeé."

* ^{5:3} Doŋge á kálag ábádé nchoo 3b-4: Ábê bad bé nkole bémbará áhed ásin bán mendib mépuuted áte.
4 Ébédé nén bán, póndé-té ángel eche Sájngwéé ehyagáá asud á etoŋ-tê wê épüutéd chó áte. Nzé êmbenlédté nê, mod a nkole ké ahéé awé ansébé asôl áwéd-te nkole ímmáá'áá mó.

³¹ “Nzé mbídé echem yäl mbój né ene mbój eché mbídéé eékobnedéé. ³² Boj mod ampée adé awé abíde me mbój, mbíí-’e nén meé, mbój eché ábídéé me eköbnédé. ³³ Nyênlóm bad wéé Jōne, mó-aá abídé mbój tângene mbále. ³⁴ Éesaá nén bán, moonyoŋ atáŋgéné me mbój abíd. Boj nlángé nyé tângene mbój eche Jōne, ábel nyédúbe me, nyékud e’soosoŋ. ³⁵ Jōne abédéé née etrúkáj éche échodoné’, épenté-’e ekide. Nyêmbé menyinje áhíd ábê e’nyínén bé ekide áyäle esórj é póndé. ³⁶ Boj nwóó mbój eché etómé ké mbój eché Jōne ámbídté. Nsón mme echem Sáj ábágé me aá mbel mmad, mmén mbídé mbój nén bán echem Sáj móo alómé me. ³⁷ Echem Sáj awé alómé me mwén ámpé abíde me mbój. Nyéewogéé mó ehób, nyéenyiné-’áa mó mbéed. ³⁸ Nyeedúbpéé ane awé álómé, né-óó nyéemwagké bán éché eyale édyee nyé á nlém-té. ³⁹ Nyékídté’ Eyale é Dyöb ahed áte áyäle nyéwémítan bán nyéekúd alongé áde déemaá’ áwéed-te. Échén Eyale chén-éé éhóbe áyäl echém. ⁴⁰ Ké nê, nyéehéddéé ape áwém ábel boj nyékud alongé áde déemaá’.

⁴¹ “Saké edúbé é baányoŋ nhedéé. ⁴² Boj mbíí nyaa é bad éche nyédií, mbíí-’e meé nyéewôjnëé Dyöb edønge á nlém-té. ⁴³ Mpedé á dñi áde echem Sáj, nyéekobéé me, boj nzé mod ampée apedé á dñi ádē dën, nyéekob mó. ⁴⁴ Nzé nyékene’ nhög ne anínií, nyéwogé bwám, boj nyéebélëé ngáne Dyöb dën dékenné nyé. Chán-nô nyédubëë me? ⁴⁵ Ké née nyéekobéé me, nyéewémítan bán, me-eé méláa echem Sáj meé nyéekobéé me. Mosëe awé nyélyágé nlém áwé mwén-neé akönté ane abé awé áhöb aá, nyébelé mbéb. ⁴⁶ Nzé nyéenkönj Mosëe adúbe né nyedúbpé me, áyäle nén, áyäl echém dôo ántenlé mam mme átélé. ⁴⁷ Boj née nyedúbpéé mekan mme átélé, chán nyédubëë ábêm e’yle?”

6

*Yesue adídté ndun e mod
(Mat 14.13-21; Mak 6.30-44; Luk 9.10-17)*

¹ Ámbid e mímén mésyääl, Yesue ne ábë bembapëe bênchabé edib é Galilia éche bêchægeé bán edib é Tiberia. ² Ndun e mod ehídé’áá mó áyäle bénýiné’áá menyáké mme ábélé’áá ngáne áchóónté’áá bad bë nkole. ³ Héé Yesue ne ábë bembapëe békíí á ekone-mîn boj bedyëë ásë. ⁴ Póndé e Ngande e Nnyíme-ámîn e bad bë Israel embé bënenben. ⁵ Asad áde Yesue ásádë dïd annyín ngáne ndun e mod éhúé’é mó bënenben. Dôo ásedtëé Filibe aáken, “Héé déchanné ndyéed eché débeé ábén bad ádyé?” ⁶ Ansadéed mó nê ákëg mó áyäle mwén ammad abíi chom éche ábënlé. ⁷ Filibe ankwendéen aá, “Etëd tómaa ne mbwókel é kápë ébe áchan ndyéed éche ékwognéd ábén bad bësyääl adyé ábel boj mod téé ádyé mwátiíd.” ⁸ Dôo Yesue awé mbapëe ampée, Andreya, Simón Petro mwányan áhöbeé aá, ⁹ “Mwá kódëmod adé hén awé awánlé e’wële é’táan ábe bëbénlé ngun é báli, awánlé-’e súu ébe, boj chán enén ndyéed éhëleé-se ékwög enén ndun e mod?” ¹⁰ Dôo Yesue álângeé ábe bembapëe aá, “Nyéláa ábë bad, bedyëë ásë.” Nkækëambud abé á ped e ádë abwöga hòm. Né-óó, ábë bad bësyääl bëndyëë ásë. Á amute-té wë, baachóm bëbédé dyam e’kálé é’táan. ¹¹ Héé Yesue átédé ábë e’wële, ásagnan Dyöb, boj ábë bembapëe békabpé bad. Ambél melemlem ne échë súu. Mod-téé andyé ngáne áhédé’áá. ¹² Áde bò moosyääl bémáá akód, Yesue anláá ábë bembapëe aá, “Nyélad ndyéed eché elyägé ásë. Ndyéed ké póg eebébé.” ¹³ Né-óó, áde bémáá adyé bënläd ndyéed eché enlyäg ásë, enlon e’lój dyöm ne é’be. ¹⁴ Anyín áde ábë bad bénýiné mímén menyáké mme Yesue ábélé bénhöb bán “Ne mbále, nkal e’déadøj awé bénhöbpé bán ápë á nkörjsé mó nén.” ¹⁵ Yesue ambíí aá bëhede mó akób ányaged mó ábë këj. Né-óó, antím ámbid á ekone-mîn.

*Yesue akií á mendib mîn
(Mat 14.22-33; Mak 6.45-52)*

¹⁶ Ngukél, bembapëe ábe Yesue bënkë á edib. ¹⁷ Bënsól á bõle-té, bêchabpë edib, bétimnád á Kapenahum. Ehíntén êmmäd ape áde Yesue éépédéé wéé bëdíí. ¹⁸ Enén póndé epub é ngíne étómé’áá, épuutad-te mendib áte. ¹⁹ Bëob-poó bembapëe bëmmäd ake ké máyl méláán ké’e méniin, dôo bénýiné Yesue akag á mendib mîn, átimnád bënenben ne

ábab bōle. Mbwōg n̄ ngíne ménkōb bō. ²⁰ Boj anláá bō aá, “Mε-εé ndé, nyéebáá.” ²¹ Héé bétédé mó á bōle-tê ne menyinjge, ábwōg-ábwōg bépēn-ne bōle á nkin wéé békágé’áá.

Yesue mó adé ewele éche ébage’ alongé

²² Née bín é’sángé, ndun e mod eché enlyág á múde mé edib mímíníí wéé Yesue ne ábē bembapēe bémbidtē, bēnchem bán, ngukél eché entóm, bōle e’hög běnpen bōo bémbe áhed. Bémbii’-e bán Yesue enkénsónlé áwēd-te ne ábē bembapēe. Bémbii bán ábē bembapēe běnpen bōo bēnk̄. ²³ Myōle mémpēe míme mémbid á dyad á Tiberia mēmpē á nkin mé edib bēnben ne hōm áde ene ndun e mod éndyēē e’wélé ámbid eché Sángwéé ámáá Dyōb aságnen. ²⁴ Áde ene ndun e mod ényiné nén bán, Yesue ne ábē bembapēe béesaa áhed, bénsoł á myōle-tê wéé, békē á Kapenahum, áke dé ahed Yesue.

²⁵ Áde ábē bad běpédé á ped e edib enínií, bénýin Yesue. Bēnsedéd mó bán, “A-meléed, póndé ehéé épédé hén?” ²⁶ Yesue ankwentén bō aá, “Ne mbále, nlângé nyé nén meé, saké menyáké mímě mibélé nkáá boj nyéhédé me. Nyéhede me áyāle e’wélé ábe nyédyédé boj nyékód-te. ²⁷ Nyéewág ntú áyāle ndyéed eché ebōade’, boj nyéwág ntú áyāle ndyéed eché ebág abé ne abé á alongé áde déemaá’, chó-’áá ebage alongé áde déemaá’. Ene ndyéed chóo Mwǎn-a-Moonyoŋ ábeé. Mōo Dyōb Titéé áhédé e’chem aá ábel n̄e.” ²⁸ Dōo ábē bad bēnsedéd Yesue bánken, “Cheé sétáñgéné abel, ábel boj sébel mekan míme Dyōb áhédé aá, sébel?” ²⁹ Yesue ankwentén aá, “Dyam áde Dyōb áhédé aá nyébel ádíí ádúbe me awé álómé.” ³⁰ Béntimtén Yesue bán, “Menyáké méhéé wébenlé míme sényinné boj sédubé wé. Cheé mmōn wékongé abel? ³¹ Ábēd betaabéndyē mána á ehyángé ngáne éténlédé á kálag e Dyōb nén bán, ‘Ambag bō e’wélé ábe é’bídé ádyōb aá bedyé.’” ³² Yesue anhób aá, “Ne mbále, nlângé nyé nén meé, saké Mosee móombé nyé ewele éche ehúú ádyōb, boj echem Sáj móombé nyé ewele éche ehúú ádyōb. ³³ Áyāle me-εé ndé échē ewele éche Dyōb ábágé, échē éhúú ádyōb, eché ábageé baányoŋ bé nkōjsé alongé áde déemaá’.”

³⁴ Dōo bélângéé Yesue bán, “A-Sáj, bagé sé échén ewele póndé ésyāəl.” ³⁵ Yesue anláá bō aá, “Mε-εé ndé ewele éche ébage alongé áde déemaá’. Kénzéé awé apedé áwêm, nzaa éekóbpé mó ámpē. Kénzéé awé adúbpé me, píd éekóbpé mó ámpē. ³⁶ Nlângé nyé nén meé nyényiné me boj nyeedúbpé me. ³⁷ Bad bésyāəl ábe echem Sáj ábágé me, běpē áwêm. Kénzéé awé apedé áwêm, méebángé mó akob. ³⁸ Áyāle meebleé ádyōb ábel ngáne ébónjnédé me. Mpedé ábel ngáne ébónjnédé echem Sáj awé alómé me. ³⁹ Boj nén ádíí mewémten míme ane awé alómé me, aá átinté bad bésyāəl ábe ábágé me, meeblodé ké nhög, boj aá ímpuud bō moosyāəl á epun é asog. ⁴⁰ Echem Sáj ahede aá moosyāəl awé anyiné mwǎn, adubé-’e mó, ákud alongé áde déemaá’. Měpuúd-te bō aá epun é asog.”

⁴¹ Ábē bad bē Israel bēmbootéd anyoo áte tângene Yesue, ahób áde áhóbé aá, “Mεé ndé ewele éche ébídé ádyōb.” ⁴² Hé dōo běhóbéé bánken, “Saá Yesue, mwǎn awé Josebe nén-e? Ngómē debíí saá ne nyaj? Chán-nō áhelésé áhóbé aá móbidé ádyōb?” ⁴³ Yesue anláá bō aá, “Nyésôg anyoo áte. ⁴⁴ Modmod ééhélē-’se ápē áwêm, ésebán Titéé awé alómé me apeéné mó áwêm. Měpuúd-te mó aá epun é asog. ⁴⁵ Éténlédé ngáne bekal bēdēdən běhóbé nén bán ‘Dyōb déyāgēd bō moosyāəl.’ Kénzéé awé awóge’, áyāgkē-’e wéé Titéé, apag áwêm. ⁴⁶ Eesaá nén bán, mod ké nhög akényin Titéé. Ane awé abídé wéé Dyōb mwěmpen móo akényin Titéé. ⁴⁷ Ne mbále, nlângé nyé nén meé, kénzéé awé adúbpé me ákūd alongé áde déemaá’. ⁴⁸ Mε-εé ndé ewele éche ébage alongé. ⁴⁹ Ábēn betaabéndyē mána á ehyángé, boj ké n̄e, bénwé. ⁵⁰ Boj ewele éche ébídé ádyōb édē nyaa eché kénzéé awé adyédé chó éewáá. ⁵¹ Mε-εé ndé ewele éche ébage alongé éche ébídé ádyōb. Kénzéé awé adyédé échē ewele, ábē á alongé á ngindé ne á ngindé. Échén ewele éche mébeé nyé édíí echem yāl eché mēbē ábel boj nkōje alongé dé nkōjsé.”

⁵² Áde ábē bad běwōgé n̄e, bēnl̄j, běn ne běn běbootéd-te mpenten n̄ ngíne, běsédté bánken, “Chán anén mod áhèle atéd eche yāl, ábē syánē aá dédyâg?” ⁵³ Yesue anláá bō aá, “Ne mbále, nlângé nyé nén meé, nzé nyéedyéde yāl e Mwǎn-a-Moonyoŋ nyémwé-’e rímē mekií, nyéekudté alongé áde déemaá’. ⁵⁴ Kénzéé awé adyédé echem yāl, amwé-’e

mímmēm mekií, ákūd alongé áde déemaá', měpuúd-te mó á epun é asog. ⁵⁵ Áyāle echem yěl chô ekörté ndyéed abé, mímmēm mekií'-e mékoj mmíítéd abé. ⁵⁶ Kénzéé awé adyédé echem yěl, amwé'-e mímmēm mekií, alyagé adé ne me, me'-e nlyagé ndé ne mó. ⁵⁷ Titéé awé akəə boj bad béké á alongé, mó alómé me, mó akəá'-e boj mbé á alongé. Melemlem néé kénzéé awé adyédé echem yěl, mébenlé abé á alongé. ⁵⁸ Né-oó, me-eé ndé ewele eche ébídé ádyöb. Meésaá nêngáne ewele éche ábén betaa bénýéé, boj ké nê bewé. Boj kénzéé awé ádyé echem yěl ábén á alongé á ngíndé ne ngíndé."

⁵⁹ Yesue anhób mímmén mésyāél áde áyágté'áá á ndáb e mekáne e bad bé Israel á Kapenahum.

E'yale ábe Yesue é'peene' alongé áde déemaá'

⁶⁰ Áde bad híin ábe béké'áá Yesue bewogé mímmén mekan bénhōb bán, "Ádén ayáge álélé ahíd. Nzéé ahele ákob ene ndín e dyam?" ⁶¹ Yesue ambíí aá, bényonje áte áyāl eché, né-oó anláá bó aá, "Né áwag nyé á yěl-e?" ⁶² Chán-nō nyéhōbpé áde nyényinné Mwǎn-a-Moonyon apumme' ámbid ámin wéé ámbidtē! ⁶³ Edéadəj é Dyöb chōá ébage' alongé. Ekob é yěl éesaá dyamdyam. E'yale ábe nílángé nyé é'díi edéadəj ne alongé. ⁶⁴ Boj ké nê, nyé dojge á bad nyéedúbpée." (Bootya á póndé éche Yesue ábóótédé ayáged, ambíí bad ábe beedúbé, abíí'-e mod awé ásóm mó.) ⁶⁵ Ambád ahób aá, "Nén dōo ákəá boj nláá nyé meé modmod ehéhéléé-se ápē awém káéj né echem Sáj abelé boj ápē áwém."

⁶⁶ Bootya ene póndé nê děnkęj bad ábe béké'áá Yesue bésog mó ahíd, bétim-mé ámbid. ⁶⁷ Héé Yesue ásedteé ábē bembapé dyom ne béké aá, "Nyémpé nyéhede atim ámbid-e?" ⁶⁸ Simón Petro ankwentén mó aá, "A-Sáj, wéé nzéé sékeé? Wé-eé ewoo e'yale ábe é'kəé' boj mod ákūd alongé áde déemaá'. ⁶⁹ Sédúbpé sēbíí'-e bán, wé-eé edé Ane-awé-Asáá awé abídé wéé Dyöb." ⁷⁰ Héé Yesue ákwentanné bó aá, "Eesaá mbále bán mpwedé nyé bad dyom ne béké-yé? Boj ké nê, nyé mod nhógo adíi mod a Satan." ⁷¹ Judase, mwǎn a Simón Iskariotde móó Yesue áhóbé'áá. Kénéé ámbéé mbapé nhógo átinté e bembapé dyom ne béké, mó anké Yesue ntúré.

7

Yesue ne baányaŋ

¹ Ámbid e mímmén mésyāél, Yesue akagé'áá mebwog ne mebwog á mbwog e Galilia. Enkendəngé ake á mbwog e Judeya áyāle bad bé Israel béké'áá mó awúu. ² Baoob-poó, Ngande e E'bem * e bad bé Israel embé benben. ³ Héé Yesue baányaŋ bélângéé mó bán, "Etángéné ádén abwog á hōm ahide, éke á mbwog e Judeya ábel bad ábe békéde wé bényn menyáké míme ébelleé. ⁴ Mod eebéhéléé nsón á e'kojnéd-te, nzé ahede aá móbyéen. Ngáne ébelleé mímmén mekan mésyāél ébel nkōjsé nsyāél mbíí wé." ⁵ (Ké Yesue baányaŋ bénkendubéé mó.) ⁶ Héé Yesue álângéé bó aá, "Echem póndé eépédéé. Boj ne nyé, eché póndé edé póndé ésyāél. ⁷ Nkōjsé méehéléé-se nkōo nyé. Boj nkōo me áyāle mpanlad bó mímāb mewusé áte. ⁸ Nyébó nyékag á ngande. Méekaá áwed áyāle echem póndé eépédéé." ⁹ Yesue amaá-'áá ahób nê, abé abé á Galilia.

Yesue akií Ngande e E'bem á Jerusalém

¹⁰ Ámbid e póndé áde Yesue baányaŋ bémáá ake á Ngande e E'bem, mómpé anké áwed. Boj enkénlumédté yěl. Anké nyaa eché bad bénkembíí' ndín e mod eché adíi. ¹¹ Benkamlené bé Israel béké'áá mó á ngande-té, bésedté bánken, "Héé mímó adíi?" ¹² Átinté e ndun e mod eché embé á ngande-té wé, dojge á bad béké'áá bán, "Adíi mod a bwám," ábinií'-e bán, "Aáy, adoge bad dogén." ¹³ Boj bó modmod bénkembidédté yěl áwed áyāle béké'áá bad béké'áá bé Israel.

¹⁴ Áde ngande ékwogé apé átinté, Yesue anké asól á Ndáb-e-Dyöb, ábootéd ayáged. ¹⁵ Yěl enkóm benkamlené áte bwambwam tângene ádē ayáge. Né-oó, bensédéd bánken,

* ^{7:2} Ngande e E'bem: ebédéé ngande eché bad bé Israel béké'áá ákamtén póndé eché ábab betaa bedyéé'áá á e'bem-té áde béké'áá ehyárge, áde béké'áá Egipto.

“Chán anén mod ámwédé mímén mam mésyāél abíi áde éekii’é á esukélé é mbéndé?”
16 Héé Yesue ákwentanné bó aá, “Ayáged áde ní'yégtéé déesaá ádêm. Ádíi áde mod awé alómé me. 17 Kénezéé awé awémténé abel ngáne Dyöb áhedeé, ábíi ké ádêm ayáge ahúú ne Dyöb ké’é áhúú ne mmén. 18 Kénezéé awé ahóbne eché kunze, abele nê áhede eche yáł edúbé. Boj mod awé ahedte’ mod awé alómé mó edúbé, asáá nlém á abum, eésaá mod a metóm. 19 Éesaá mbále nén bán, Mosee abagé nyé mbéndé-ye? Ké nê, nyé modmod eehídéé mbéndé éched. Cheé ékáá boj nyéhédé me awúú?” 20 Dóo ene ndun e mod ékwentanné mó bán, “Edáédañ é mbéb édé wé áte. Benzébádé béhede wé awúú?” 21 Yesue ankwentén bó aá, “Nsón nhóg míme rímbélé, ríkómté nyé moosyáél yáł áte. 22 Mosee ambě nyé mbéndé aá, nyéyage ábēn bān (kénéé édíí bán, saké Mosee móombotéé. Ábēn betaa bōo bémbootéé). Né-óó, nyéyage bad á Mbwe-mé-nkóme-áte. 23 Nzé býágé mod á mbwe-mé-nkóme-áte, ábel béebōo’ mbéndé e Mosee, cheé ékáá boj nyélijné me áyále nídídé mod bwám á mbwe-mé-nkóme-áte. 24 Nyéekáádté dyam áde míbélé ngáne nyényiné, nyékáad ngáne éhedenadté.”

Bán Yesue m̄dé Ane awě bésineé-yę?

²⁵ Héé dőá donge á bad bé Jerusalém békébénké bánken, “Saá mod awě békédeé awíú mô nén-e? ²⁶ Nyénónéé”, akanle bad á tâl e ékwéé, bad békébánké béesaá-’áá mó dyamdyam aláa. Kapág békébánké ne mbálé, módé Ane-awě-Békégté-yoo! ²⁷ Bonj éeheléé-se ébé nê, áyäle debíí bánké póndé eché Ane-awě-Békégté ápééé, modmod éebíí’é wéé ábídé. Debíí wéé anén mod ábídé.” ²⁸ Yesue ambé áyägté á Ndáb-e-Dyöb. Áde áyägté dőá áchágté ehób ámín aá, “Ee, nyébíí me bwám, nyébíí-’é wéé mbídé. Meépedéé hén ne mmén. Ane awě alómé me adé mbálé. Nyéebíí’é mó, ²⁹ boj me pen mbíí mó áyäle áwě dőá mbídé, mó-’áá alómé me.” ³⁰ Áde áhóbé nê, békédeé áá mó akób, bonj modmod enkémbánné mó ké ekáá á yđl, áyäle eche póndé enkémpaá. ³¹ Ké nê bad hiin átînté ene ndun e mod békédeé mó. Békébánké áá bánken, “Áde Ane-awě-Békégté ápééé, ábél e’ chemléd béké menyáké, míme nítomé míme anén mod ábél-ye?”

Befarisia bélómé bad âkób Yesue

³² Befarisia bénwōg néé bad bényonjéé áte, béhóbeé mímén mekan tângene Yesue. Né-
áó bóobé beprise bémbáá bénlôm bembalede âkób mó. ³³ Héé Yesue áhóbeé aá, “Ndíi
ndé ne nyé, boj mwămpin mí póndé mësú ámbid wéé ane awé alómé me. ³⁴ Ámbid
enê, nyéehéd me, boj nyéenyínné, wéé mébëé-’e nyéehenlé ape áhed.” ³⁵ Né démbél
benkamléné bésedté nhág ne aníníí bánken, “Héé anén mod mûmó áhededé ake, wéé syáné
déehenlé mó anyín? Ahede ake á aloj á Grikia wéé ábëd bad bédíí á ebwóg âyáged bad
bé Grikia-yé? ³⁶ Ahóbe’ aá dééhéd mó boj déenyínné mó. Aá déehenlé-’e ape wéé móbëé.
Cheé né álumteé?”

E'dib bé mendib mé alongé áde déemaá'

³⁷ Epun é asog é ngande éche éntōmtēn etógnén abé áyāle ene ngande émpě. Yesue antyéém ámīn, dōo áchágté ehób ámīn, áhōbē aá, “kénzéé awě píd ékóbé áhyag áwêm áhye ámwê mendib. ³⁸ Kénzéé awě adúbpé me, Kálag e Dyōb ehóbe aá, ‘e’dib bé mendib mé alongé bébídē mó áte é’sobpe.’” ³⁹ Edəédəŋ éche Ésáá chóo Yesue áhóbe’áá. Chóo bad ábe bénđubē mó béntəŋgennē akud. Ene póndé né Edəédəŋ éche Ésáá éepēdēē wéé ábē bad áyāle ene póndé ne Dyōb déélumtēē ehúmé éche Yesue.

Bad békábné áte á atón áde Yesue

Baámbáá bé Israél béekwəntenéé Yesue adúbe
⁴⁵ Kéájne ásōg bembəlede bé Ndáb-e-Dyōb bənt̄im wéé beprise bém̄áá ne Befarisia. Héé beprise bém̄áá ne Befarisia bésedteé bó bánken, “Cheé ékáá boj nyéep̄eene mó hén?” ⁴⁶ Héé ábē bembəlede bél̄obéé bán, “Modmod eéhóbeé ndín é mam éche anén mod áhóbeé.” ⁴⁷ Dóo Befarisia bésedteé bó bánken, “Nédē ane mod adogé káájne nyémp̄e-ye? ⁴⁸ Nyékényin néé mod ambáá kéé Farisia nhóóg ádúbpé mó? Ké nhóóg eédúbpé mó. ⁴⁹ Enén ndun e mod eebíi’é mbéndé e Mose. Né-óó ebómán édé ne bó.” ⁵⁰ Farisia nhóóg awé béchágé’áá bán Nikodemuse awé ansébé Yesue ake dé anyín, anláá bó aá, ⁵¹ “Eche syánē mbéndé eébagéé kunze néen dékógsen mod áde déekáadteé mó, âwógl̄en dyam áde ábélé.” ⁵² Áde áhóbe nê, bənt̄imtén mó bánken, “We ámp̄e ebídé á Galilia-ye? Héé áte á Kálag e Dyōb, wényin néen wé nkál édádaj eebídéé á Galilia.”

Mmwaád awé akábé asón

⁵³ Ámbid ené moosyáél ansú áwe ndáb.

8

¹ Yesue pen anké á Ekone é Menzab. ² Néé bín é’sángé mbwəmbwé, ant̄im ámbid á Ndáb-e-Dyōb. Ndun e mod emp̄e áwé. Andyéé ásē ábootéd bó ayáged. ³ Bemeléede bé mbéndé ne Befarisia bém̄peén mmwaád nhóóg áwé, awé békóbé néé ákábéé asón á ndáb e e’wóngé. Bént̄i ane mmwaád át̄int̄e echâb, ⁴ boj bél̄angé Yesue bán, “A-meléed, békóbé anén mmwaád néé ákábéé asón á ndáb e e’wóngé. ⁵ Á mbéndé eche syánē, Mosee anhób aá, enén ndín e mmwaád bélum chó meláá kááj áwé, chán-nō wé-’é éhóbeé?” ⁶ Bénsedéd mó nê áhíi mó melám, ábel nén békóbéen mó awusé. Boj Yesue anwúlén ásē, ábootéd bwém atel á ndoob-té ne ábē e’mii. ⁷ Áde békábádnéé mó asedéed, antií yél ámīn, aláá bó aá, “Nyé ké ahéé awé eébélé mbéb ábē mod a’só álúm mó meláá.” ⁸ Anwúlén mó ásē ámp̄e átelé’ ábē bwém á ndoob-té. ⁹ Áde ábē bad békábé né bémbootéd ahide nhóge-nhóge. Bad bém̄áá bóó bénsebé ake, boj bésad bél̄idé’. Kéáj ne á asog Yesue mwémp̄en anlyág, ane mmwaád-te abé atyééém áhed. ¹⁰ Áde Yesue átiídé yél ámīn, dóo ásedteé ane mmwaád aá, “Á-mmwaád néen, héé bad ábe bérééne we hén bédíi? Modmod eélyagéé hén awé ahóbe aá békábé né wé-ye?” ¹¹ Ane mmwaád ankwentén aá, “A Sáj modmod.” Héé Yesue álāngéé mó aá, “Né měmp̄e méehóbpé meé békábé né. Kág wé, boj weébélē mbéb ámp̄e.”*

Yesue módé e’nyínén bé ekíde bé nköjsé

¹² Yesue anláá ábē bad ámp̄e aá, “Méé ndé e’nyínén bé ekíde é’ bad bé nköjsé. Kénzéé awé ahíde me, éekaá á ehíntén-té, boj ákúd e’nyínén bé ekíde ábe é’bage’ alongé.” ¹³ Dóo Befarisia bél̄angéé mó bán, “Ebíde echoj yél mbój, né-óó mbój echój eékbnedéé.”

¹⁴ Yesue ankwentén aá, “Kénezéé mmén mibidéé echem yél mbój, echem mbój edé mbále, áyāle mbíi wéé mibidé, mbíi’-é wéé íkagké, boj nyé, nyéebíi’é wéé mibidé, nyéebíi’-áá wéé íkagké. ¹⁵ Nyékáadte bad á nyaa e moonyorj. Meekáadtéé modmod. ¹⁶ Ké menkáad-te ké káádtén, echém mbakú edé mbále, áyāle meekáadtéé ne mmén, boj nkáadte, ne ane awé alómé me. ¹⁷ Néé békábé né áte, á mbéndé echén, éténléde néen bán nzé bad békábé né békábé dyam mbój, boj békábé melemlem mé dyam, né ene mbój edé mbój e mbále.

¹⁸ Nyéebíi-óó néen bán nwóó mbój ébē, mmén ne mod awé alómé me, awé adé echem Sáj.”

¹⁹ Héé dóo Befarisia bésedteé mó bán, “Héé sóó ádíi?” Ankwentén bó aá, “Nyéebíi’é me, nyéebíi’-áá né nyéebíi’ káájne echem Sáj.”

²⁰ Yesue anhób ábén e’yle áde áyágteé á Ndáb-e-Dyōb-te, benben ne wéé békabéé mōná. Boj modmod enkénkóbpé mó, áyāle eche póndé eché békábéé mó enkémpaa.

²¹ Yesue anláá ábē bad ámp̄e aá, “Méké, nzé mmaá-’é ake, nyéehéd me, boj nyéenyinné, né-óó nyéewé áwen mbéb-te. Wéé mibéé, nyéehénlé ape áhed.” ²² Héé bad bém̄áá bé Israél bésedteé bán, “Ahóbe’ aá, wéé mókeé aá syánē déehénlé ape áhed, mímó ahede yél awúu-ye?” ²³ Anláá bó aá, “Nyédií bad ábe békábé ásē wén, boj me pen, mbidé ámīn.

* 8:11 Ekud e kálag é’só éewóó’é échén eped (7.53-8.11).

Nyêbídé á nköjsé wén, me pən, meebledeé á nköjsé wén.” ²⁴ Nê dôo ákáá boj nílāngé nyé meé, “Nyéewé áwen mbéb-te. Nzé nyéedúbpe bán, ‘Ndíi Mod Awé Ñdíi,’ né nyéewé-’é áwen mbéb-te.” ²⁵ Héé bésedteé mó bánken, “Nzé-módé édí?” Dôo ákwentanné bó aá, “Nyaa e mod eché nílāngé nyé se á mbooted meé ndé chóo ñdíi. ²⁶ Nwóó mam hín ahób tângene nyé, ne ákáad nyé. Boj mod awé alómé me adíi mod a mbále, mekan rímmé nílāngé-’áa nyé hén á nköjsé médií mekan rímmé níwogé awé.” ²⁷ Áde Yesue áhóbé nê, bénkénsonténné bán Sáá awé adé ámín móo áhóbé. ²⁸ Héé Yesue álāngéé bó aá, “Póndé eché nyémadté Mwǎn-a-Moonyon abane ámín, dôo nyéebíi’é bán, ‘Ndé mod awé níhóbé meé ndé.’ Nyéebíi-’é bán, meébélëe dyamdyam ne kunze echém, boj dyam áde níhóbé adíi dyam áde echem Sáj áyágté me. ²⁹ Ane awé alómé me, adé-’é ne me, eétedteé mmémpen, áyäle mbele’ mekan rímmé mébónnédé mó.” ³⁰ Bad hín ábe bénwög néé Yesue áhóbé rímmén mekan, béndubé mó.

Nzéé adé sáá awé bad bé Israél?

³¹ Héé Yesue álāngéé bad bé Israél ábe béndubé mó aá, “Nzé nyédií nyéhíde’ ádêm ayáge, né nyékörté ábêm bembapéé abé. ³² Né nyéebíi mbále, né ene mbále ēhūd-te nyé á mehanj-té.” ³³ Bénkwentén bán, “Sêdíi nchyáátén ríme Abrahame. Séebédéé-’áa ntâj a mod mbêd. Chán-nô éhele éhjbé wéé séebabá á mehanj-té?” ³⁴ Yesue ankwentén bó aá, “Ne mbále, nlângé nyé meé, kenzéé awé abele mbéb adíi ntâj a mbéb. ³⁵ Ntâj eebágké á túmbé-te abé ne abé, boj mwän a túmbé, adíi mwän a túmbé póndé ésyäel. ³⁶ Né-óó, nzé Mwän ahúdé nyé á mehanj-té, né dyamdyam déetédté nyé ntâj ámpé. ³⁷ Mbíi meé nyédií nchyáátén ríme Abrahame, boj ké nê, nyéhede me awúu, áyäle nyéehédéé ádêm ayáge ahíd. ³⁸ Nlângé nyé mekan ríme echem Sáj álúmté me. Nyé-’é nyébele mekan ríme echén sáj álāngé nyé.”

³⁹ Bénkwentén mó bán, “Abrahame adíi echéd sáj.” Yesue anláá bó aá, “Nzé nyéenköjj bän ábe Abrahame abé, né nyébele’ mekan ríme Abrahame ábélé’áá. ⁴⁰ Mekan mésyäel ríme nkémbenlé ñdíi áláa nyé mbále eché níwogé wéé Dyób. Kénê, nyéhede me awúu. Abrahame eébele’áá, enén ndín e dyam. ⁴¹ Nyébele mekan ríme echén sáj ábeléé.” Bénkwentén mó bán, “Dyób dëmpen-éé séwóó néé echéd Sáj, béechyáá-’áá sé á asón.” ⁴² Dôo Yesue álāngéé bó aá, “Nzé Dyób dënköjj echén Sáj abé, né nyédaá me, áyäle rímbidé wéé Dyób ndé-’é hén bøob. Meépedéé ne mmén, boj mó alómé me. ⁴³ Nzom eché ekáé boj nyéehédé’ me ehób awóg, edíi nyéehédéé ábêm e’yle awóg. ⁴⁴ Nyédií bän ábe echén sáj, Satane, ríme mewémten mó-’áá nyédaá ahíd. Se á mbooted, adíi ane awé awúe’ bad, eékwógnédéé mbále mbêd, áyäle mbále eesaá mó áte. Nzé akale metóm, né abele ríme nsón áyäle adíi nkal a metóm, abé-’é sáá a metóm. ⁴⁵ Nyéedúbpéé me, áyäle nkanle nyé mbále. ⁴⁶ Nyé ahéé ahéle alúmád aá, mbelé mbéb? Nzé nkanle nyé mbále, cheé-ó ékáé boj nyéedúbpé me? ⁴⁷ Kénzéé awé ahúu ne Dyób, awóge eyale é Dyób. Nzom eché ekáé boj nyéewóglán edíi, nyéesaá bän bé Dyób.”

Bad bé Israél békobéé ayáge áde Yesue

⁴⁸ Héé ábê bad bé Israél bétimtanné Yesue bánken, “Éesaá mbále bán, sénkál mbále áde séhóbé bán, edíi mod a Samaria, edéadæj é mbéb édé-’é we áte-ye?” ⁴⁹ Ankwentén bó aá, “Edéadæj é mbéb eesaá me áte. Mbage echem Sáj edúbé, boj nyépén nyéebagéé me edúbé. ⁵⁰ Mmén meéhédéé yäl edúbé, boj mod adé awé ahede’ aá nkud edúbé, mó-’áá, abage mbakú eché etángéné. ⁵¹ Ne mbále, nlângé nyé meé, kenzéé awé abele’ chom-éé n'yágtéé, éewáá mbêd.” ⁵² Dôo ábê bad bélângéé mó bán, “Bøob dôo sébíi bán, edéadæj é mbéb édé we áte. Abrahame anwé, bekal bérédéadæj bómpe bénwé. Boj bøob éhjbé wéé mod awé adúbpé we, éewáá mbêd. ⁵³ Eched sáj Abrahame anwé. Ewémténé wéé mótoomé mó-ye? Bekal-bé-e’déadæj bómpe bénwé. Nzé-módé we wéé éwémtanné wéé módé?” ⁵⁴ Héé Yesue ákwentanné bó aá, “Nzé nhedte echem yäl edúbé, né échê edúbé eesaá dyamdyam. Echem Sáj awé nyéhóbéé bán mó adé nyé sáá, mó abage me edúbé. ⁵⁵ Nyéebíi’é mó mbêd, boj mbíi mó. Nzé nhóbé meé meeblí’é mó, né ndé nkal a metóm néé nyé. Boj mbíi mó, mbele-’é mam ríme áhóbéé. ⁵⁶ Echen sáj Abrahame ambé menyinge

aá, mó̄nyin̄ epun éche mépeé, annyín-ne chó, abé-'e menyin̄ge bwâmbwam.” ⁵⁷ Dóo bésedteé mó bán, “Áde wéepédéé móom mé mwé métáan, weé mónyin̄e Abraham-e-yé?” ⁵⁸ Yesue ankwentén bó aá, “Ne mbále, nlânge nyé néen meé, byánán béchyâā Abraham-e, ‘Ndé.’ ” ⁵⁹ Áde ábê bad béwogé nê, dóo bébóótédé meláá ahed, âlum mó. Boj Yesue ansoóm, abíd-te á Ndáb-e-Dyöb.

9

Yesue achöjté mod awé béchyááné ndím

¹ Áde Yesue átóméé, dóo ányiné mod awé béchyááné ndím. ² Dóo ábê bembapéé bésedteé mó bán, “A-meléed, mbéb míme nzéé nkáé boj béchyáá anén mod ne ndím? Mbéb rímmé mwén-e, káa ríme sáá bó nyaj?” ³ Yesue ankwentén bó aá, “Saké ríme mbéb nkáé, saá-kaá míme sáá bó nyaj. Boj néen ábénléde ábel ngíne e Dyöb ébíd áwed áwé yáll.” ⁴ Ngáne bín é'díi ényînnéé ámin, detángéné débel nsón ríme ane awé álómé me. Ehíntén ékwogé ape áde mod éehenlé nsón abel. ⁵ Boob áde ídíi á nköjsé, me-eé ndé e'nyinen bé ekide bá nköjsé.” ⁶ Áde Yesue ámáá ahób nê, ansob aléed á ndoob, atóob dó boj áwogté ane mod a ndím á míd, ⁷ lângé mó aá, “Kág, éwobe e'só á etoj é Silom” (ádê dín ádé néen bán, “Bélomé”). Né-oó, ane mod anké, áwobé-'e míd. Antím ámbid, ányînne’.

⁸ Héé bad ábe bembii mó ne bad ábe bénýináá ngáne áchómeé bwém, bésedteé bán, “Saá anén mod ayðgké adyeé ásé, áchómē bwém-e?” ⁹ Donje dénhöb bán, “Mâdé,” ábínií-'e bán, “Aáy! Awágne mó wágnén.” Boj ane mod mwén anhób aá, “Mmén-eé ndé.” ¹⁰ Dóo bésedteé mó bán, “Chán-nô émwédé abooted dé anyínen?” ¹¹ Ankwentén bó aá, “Mod awé béchagéé bán, Yesue, antóob eloob, awogéd me chó á míd, aláá-'e me aá nké á etoj é Silom, nké íwobe míd. Né-oó, menké. Awobe áde íwóbpé míd, mbootéd-te anyínen.” ¹² Bénsedé mó bán, “Héé ane mod adíi?” Ankwentén bó aá, “Meebíi'ë.”

*Befarisia böhédé áte ngáne**Yesue áchöjté mod a ndím*

¹³ Bénsedé ane mod awé ankweé ndím wéé Befarisia. ¹⁴ Epun éche Yesue ántóbpé eloob ánédé-'e ane mod míd áte, ébédéé Mbwe-mé-nkóme-áte. ¹⁵ Befarisia bênsedé ane mod awé ankweé ndím ámpé bánken, “Chán émwédé abooted dé anyínen.” Héé álângéé bó aá, “Antóob eloob awogéd me á míd. Áde íwóbpé e'só, mbootéd-te anyínen.” ¹⁶ Hé dóo donje á Befarisia böhobéé néen bán, “Anén mod awé abelé ádén dyam, eéhélëé-se abé mod awé Dyöb álómé, áyäle eékonjéé mbéndé e Mbwe-mé-nkóme-áte.” Boj ábínií-'e böhobé'áá bánken, “Chán mod a mbéb áhèlesé ábelé’ échén ndín e menyáké?” Né dêmpéén nkabén átinté echâb. ¹⁷ Né-oó, Befarisia bênsedé ane mod ámpé bánken, “Ngáne éhobé wéé möhbelé boj ényînne’, cheé éwóó ahób á yöl echê?” Héé ane mod ákwentanné bó aá, “Adíi nkál é'daádæj.”

¹⁸ Ké nê, bad bá Israél bénkendubéé bán, ane mod ansébé ndím akwé. Né dêmbé bénchélé sáá bó nyaj. ¹⁹ Bénsedé bó bánken, “Nyéé nyéchyáá anén mod awé nyéhóbé bán, béchyáá ne ndím-e? Chán-nô ébénléde boj ányînné boob?” ²⁰ Dóo sáá bó nyaj békwentanné bán, “Sébíi bán awed mwán módé, sébíi-'e bán bénchyâā mó ne ndím. ²¹ Boj séekoo'é abíi ngáne ámwédé anyínen, séebíi-'aa mod awé abelé boj ányînne’. Nyésedte mó, eesaá mwéndem, mwén áhób.” ²² Bénhöb né áyäle böhobé'áá bad bá Israél. Bad bá Israél bénhöb bán, kénzéé awé adúbpé aá Yesue módé Ane-awé-Béwogté, bénan mó á ndáb e mekáne. ²³ Né dóo dênkäj boj sáá bó nyaj böhobé bán, “Nyésedte mó, eesaá mwéndem, mwén áhób.”

²⁴ Héé ábê bad bá Israél böhénléé ane mod awé Yesue ándidté bwâm ngen échë élonténé ébe, boj bélângé mó bán, “Kál echoj mbále á dín á Dyöb. Sébíi bán anén mod awé achöjté wé adíi mod a mbéb.” ²⁵ Dóo ane mod átimtanné bó aá, “Meebíi'ë me ké adé mod a mbéb ké'e eesaá. Dyam ahog áde mibíi, áde néen, menkwé ndím boj boob nnyînné.”

²⁶ Héé bésedteé mó bánken, “Cheé ámbeñlé boj ébootéd anyínen?” ²⁷ Ankwentén bó aá, “Mmaá nyé aláa boj kéné, nyéedúbpéé me. Cheé nyéhedeé bán níláa nyé ámpé? Nyémpé nyéhede' ábê bembapé abé-yé?” ²⁸ Héé bésyáa'ë mó, böhobé bán, “Wé-eé edé mbapé

Ndím e edəádəŋ

³⁵ Áde Yesue áwógé bán békídté ane mod awé ânchoódté á ndáb e mekáne, anhéd mó. Áde ányíné mó, ansédéd mó aáken, “Edúbpé Mwǎn-a-Moonyoŋ-ε?” ³⁶ Ane mod antimtént mó aá, “A-Sáŋ nzéé adé Mwǎn-a-Moonyoŋ, láá mé âbel nén ndúbe mó?” ³⁷ Yesue anláá mó aá, “Emaá mó anyín, nyúmō-’áá nyékale’ nén.” ³⁸ Héé ane mod áhóbéé aá, “A-sáŋ, ndúbpé!” Abwóg-ke mebóbón âbe mó edúbé. ³⁹ Yesue anhób aá, “Mpedé á nköjsé wén, âkáad bad âbel nén bad ábe békwdé ndím bényínén, ábe bó-’é bényinne’, békwe ndím.”

10

Ngan e Nnɔn a ñdyɔŋ m̄ mbód ne éche mbód

Yesue áá móé módē
Nnōn a ndyɔŋ mí mbód a bwâm

⁷ Né-óó, Yesue ambád ámpē aá, “Ne mbále, nlângé nyé nén mε-εé, mέé ndé mmwε mé ekob wéé mbód époo’ é. ⁸ Byánán měpě, bad bésyāél ábe bésébpé ape békédée bechib ne bad bé ewúen, boj mbód eekéñwogénné bó. ⁹ Mε-εé ndé ekob. Kénezéé awé apoó áwém, ákúd e’soosoŋ. Ásól, abíd-te ésebán mod atagte mó. Ákud-te kchéhé éche áhedéé. ¹⁰ Nchib apag dásó áchib, áwúu ne ábébed. Mpedé ábel boj békud alongé áde áloné mbon. ¹¹ Mε-εé ndé nnɔn-a-mbód a bwám. Nnɔn-a-mbód a bwám adé mbɔnsén áwé á nló míme éche mbód. ¹² Mod awé bétédé á nsón tédén, ânɔn mbód, áde mwén eesaá nnɔn-a-mbód, áde eesaá-aá nwóó-mbód, ányinéé nyínén néé ngə ehúé’ é, áchéné mbód, atóm mehélé. Ene póndé dóo ngə ésogéé mbód, échínií-’ é épántéd áte. ¹³ Ane mod atóme mehélé áyäle adíi mod awé bétédé á nsón tédén, eewôjnæé échê mbód póndé. ¹⁴ Més ndé nnɔn-a-mbód a bwám. Mbíí échem mbód, échem mbód-te ébíí me. ¹⁵ Melemlem nê dóo Titéé ábií me, mε-’ é mbíí mó. Mbɔnséné-’ é áwé á nló míme échem mbód. ¹⁶ Nwóó-’ é mbód éppee éche eesé á abem-té wén, ntángéné chómpé apeen, chómpé éwōg échem ehób, né-óó, abem débē ahóg, nnɔn-a-mbód-te nhóg. ¹⁷ Titéé adæá me, áyäle mbɔnséné áwé ábel nkud ádêm alongé ámbid ámpē. ¹⁸ Modmod eékobnæé me ádêm alongé, boj mbage dó ne mmén. Nwóó ngíne ábe ádêm alongé, nwóó-’ é ngíne átéd dó ámpē. Nén dóo Titéé álángé me aá m̄bel.”

¹⁹ Ábén e'yale ábe Yesue bêmpéén nkabén átîntê e bad bé Israel ámpē. ²⁰ Bó bad hín bêhóbé'áá nén bán, "Edéédən é mbéb édé mó áte, apedé mǐn. Chán nyéhèle nyéwōglân

mó?” ²¹ Boj bēmpē béhóbé’áá bán, “Mod awé edəádəŋ é mbéb édíí áte eehóbéé échén ndín e mekan. Edəádəŋ é mbéb éhèle ébəl mod awé akwedé ndím anyínen-ε?”

Bad bé Israel békáá Yesue á yĕl

²² Ngande e Nnamed n̄ Ndáb-e-Dyōb ékóbté’áá á Jerusalém. Nén ábédé á pondé éche ahéb ábágkē bwâmbwam. ²³ Yesue ahyómmé’áá á abepé á Ndáb-e-Dyōb áde béchágé’áá bán Abepé áde Solomone. ²⁴ Bad bé Israel bénləjnéd mó, bésedtē mó bán, “Pónđé ehéé wewé wésōgkē sé abane á edibelónéé-te? Nzé wé-εé edé Ane-awé-Béwógté, épanléd sé áte.” ²⁵ Yesue ankwentén aá, “Mmaá nyé aláa, boj nyéedúbpéé. Nsón m̄me m̄bélēé á dín áde awém Titéé, mén m̄bíde me mbój. ²⁶ Boj nyéedúbpéé áyāle nyéesaá échém mbód. ²⁷ Échem mbód éwóge échém ehjb. Mbíi chó, chó-’áá éhíde me. ²⁸ Mbage bó alongé áde déemaá’, béewáá-’áá mbêd. Modmod eéhélēé-se ásog bó áwém mekáá. ²⁹ Chóm eché awém Titéé ábágé me étomé chóm ésyāel, * modmod eéhélēé-se ásog bó á mekáá m̄me Titéé. ³⁰ Sé Tité sédíí mod nhóg.”

³¹ Bad bé Israel béntēd meláá ámpē álúm Yesue. ³² Boj anláá bó aá, “Nlúmté nyé ekud é nsón m̄ bwâm éche ébídé ne echem Sáj. Nyéhede me meláá alúm, áwúu me. Mmē nsón nhéé nyéhedeé me meláá alúmen.” ³³ Dóo békwentanné bán, “Séehéddéé we meláá alúm áyāle nsón m̄ bwâm m̄me ébélé. Boj sélúme we meláá áyāle esyáé Dyōb.” ³⁴ Yesue anláá bó aá, “Ngómē éténléde áwen Kálag e Mbéndé nén bán, Dyōb áhóbé aá, ‘Nyédfi myōb.’ ³⁵ Debií nén bán, eyale é Dyōb éekwagké. Dyōb dêñchág bad ábe ánlomenné échē eyale aá bédíi myōb. ³⁶ Mε-εé Dyōb ánámté boj alóm-me á nkōjsé, chán-nō nyéhèle nyéhobé bán, nsyáá Dyōb áyāle íntumé ahób meé ndíi Mwǎn a Dyōb? ³⁷ Nzé meébélē nsón m̄me Titéé, nyéedúbpé me. ³⁸ Boj nzé édé nén bán mbele mó, nyéedúbé m̄mē nsón ké nyéedúbpé mmén, ábel nén nyébíi nyésôjten-ne ngen póng ne ésyāel nén bán, Titéé adé me áte, mε-’e mbé mó áte ngen póng ne ngen ésyāel.”

³⁹ Mmén mam m̄me ánhobpē mēmbél bénwanén mó akób ámpē, boj ambíd bó á mekáá.

⁴⁰ Ámbid ené, Yesue antím ámbid á p̄ed e edib é Jodan enínií, á abwág á hōm wéé Jōne, Ndusene ádúsánnáá bad, ádyéé áhed. ⁴¹ Ndun e mod epagé’áá áwē. Ábē bad béhóbé’áá bán, “Jōne, Ndusene eébèle’áá menyáké boj kéchéé éche áhóbé tângene anén mod édé mbále.” ⁴² Né-ɔó, ndun e mod eché embé áhed, endúbé Yesue.

11

Kwééd eche Lazarōse

¹ Mod nhóg ambé awé béchágé’áá bán Lazarōse, akönlé’áá. Lazarōse ne baányaŋ bé bebaád, Maria ne Mataa bédyeé’áá á dyad á Bétni. ² Anén Maria awé mwânyaj Lazarōse ákönlé’áá, mō anwágéd Yesue dyōg dé elod é bwâm á mekuu, boj apínnéd échē esid. ³ Né-ɔó, Maria bó Mataa bó bénlōm nsal wéé Yesue bán, “A-Sáj, awoj nsón a nlém akonle.”

⁴ Áde Yesue áwágé ílmén nlébtéd anhób aá, “Mmén nkole méesógré ne kwééd. Nén ábénléde ábe Dyōb ehúmé, ábel boj Mwǎn a Dyōb ákud edúbé.” ⁵ Yesue andăj Mataa, Maria ne Lazarōse. ⁶ Ké nê, áde áwágé bán, Lazarōse akonle andíi ambé wéé ámbēē e’pun é’be. ⁷ Héé álângéé ábē bembapé aá, “Détim ámbid á Judeya.” ⁸ Dóo ábe bembapé bélângéé mó bán “A-meléed, kíné saá áwed dóo bad békéde’áá we meláá awúen súútáj-’e?”

⁹ Yesue ankwentén bó aá, “Éesaá mbále bán mûte íwóó dyōm á háwa ne ébe-yε? Bad ábe békag mûte békawagké áyāle bédé ne ane awé adé e’nyínen bé ekide bé nkōjsé.

¹⁰ Boj nzé békag nkuu, dóo békawagké áyāle e’nyínen bé ekide béesaá.” ¹¹ Áde Yesue ámáá ahób nén ambád ámpē aá, “Awé nsón Lazarōse akúne, boj nkag mó anyem ásē.” ¹² Ábē bembapé bénlāā mó bán, “A-Sáj, nzé akúne né ádyéé bwâm.” ¹³ Yesue ahóbé’áá nén áyāle ambíí aá, Lazarōse awédé, boj ábē bembapé bénwémtēn bán, ahóbe aá, akúne kúnén. ¹⁴ Né-ɔó, Yesue ampanléd bó áte aá, “Lazarōse awédé, ¹⁵ boj á yĕl echén, ndé

* ^{10:29} Chóm eché awém Titéé ábágé me étomé chóm ésyāel: dōrge á kálag dé’só áwóó Titéé awé abagé me bó, atómé chóm ésyāel.

menyinge nén mée meebedéé áhed ábel boj nyédúbe. Syánē dékag-kóó áwed baoó." ¹⁶ Hé dőo Tōmase (awé bēnchuú'é bán, Nhéd) álāngéé baáb bembapee aá, "Syánē ámpē dékag áwed ábel boj nzé kwéed chó edé déwé ne Meléede."

Yesue mó adé mpuu ne alongé

¹⁷ Baoó-poo, áde Yesue ápédé á Bētani, antán née bémáá Lazarōse alíme. Ene póndé né mímé ndim nkébē á soj-té e'pun é'niin. ¹⁸ Bootya á Bētani ápe á Jerusalem ábédé dyam máyl mébe. ¹⁹ Ekud é bad bé Israel ênhyé wée Mataa bó Maria áwenned bó áyèle kwéed eche awab mwānyan. ²⁰ Áde Mataa áwogé bán, Yesue ahúé, anké mó abomen á nzii, boj Maria anlyäg á ndáb. ²¹ Dóo Mataa álāngéé Yesue aá, "A-Sáj, nzé wembé hén né mwānned eewédeé. ²² Boj ké nê, mbíi mée ké baoó kékéhéé éche ésédté Dyób, Dyób débě wé." ²³ Yesue anláá mó aá, "Mwānyon ábē á alongé ámpē." ²⁴ Mataa antimtéen mó aá, "Mbíi mée ápuú á póndé e mpuu mbwe mé asog." ²⁵ Dóo Yesue alángé mó aá, "Me-eé ndé mpuu né alongé. Nzé mod adúbpé me, ké anwé, ábē abé á alongé. ²⁶ Kénzéé awé adé á alongé boj adúbé-'e me, éewáá mbéed. Edúbpé né-yé?" ²⁷ Héé Mataa ákwéntanné aá, "Ee, A-Sáj, ndúbpé mée wé-eé edé Ane-awé-Bewógté, Mwān a Dyób awé Dyób áhóbé aá, ápē á nkönsé."

Yesue achií

²⁸ Áde Mataa áhóbé nê, antím ámbid, áké áchæg mwānyan Maria kun, aláá mó aá, "Meléede adé hén, asedte-'e wé." ²⁹ Áde Maria áwogé nê, anhidé ásē mehélé, áke atán Yesue. ³⁰ Baoó-poo, Yesue enkämpaa asól á dyad-té, andíi ambé wée Mataa ántānné mó. ³¹ Áde bad bé Israel ábe bēbédé á ndáb-te ne Maria áwenned mó, bénwémtén bán, akag achii. Né-oó, bénhíd mó.

³² Áde Maria ápédé wée Yesue ámbéé boj anyín mó, ankweé mó á mekuu, ahób aá, "A-Sáj, nzé wembé hén, né mwānned eewédeé." ³³ Anyín áde Yesue ányíné née Maria áchyee'é, anyín-né née bad ábe bénhíd mó béchyee'é, ngol enkonnéd mó, átág-ke áte á nlém-té bwāmbwam. ³⁴ Ansédéd aáken, "Héé nyélímmé mó?" Bénkwentén bán, "A-Sáj, hyé ényin." ³⁵ Yesue anchií. ³⁶ Héé bad bé Israel bēhóbéé bán, "Nédé anköj mó adəy-óó!" ³⁷ Boj bó donge á bad bénhób bán, "Ngómé ambél mod awé ankwe ndim ányinne. Ehéele'aá-se ábel Lazarōse eewág-e?"

Yesue apuúdté Lazarōse

³⁸ Ngol enkonnéd Yesue á nlém ámpē. Né-oó, anké á soj. Ene soj ebédéé soj eché bēpwogé aláá áte, boj békútén chó nsel ne aláá. ³⁹ Héé Yesue álāngéé ábē bad aá, "Nyéhûd ádē aláá." Dóo Mataa, mod awé awédé mwānyan áhóbéé aá, "A-Sáj, ndim mémád abooted dé achum baoó áyèle nkídémbé á soj-té baoó e'pun é'niin." ⁴⁰ Dóo Yesue álāngéé mó aá "Meelāngéé wé mée nzé edúbpé né wényin Ngum e Dyób-e?" ⁴¹ Né-oó, ábē bad bénhûd ádē aláá á nsel n̄ soj. Dóo Yesue ánóné ámīn boj áhóbé aá, "A-Tê, nságnéné wé áyèle éwogé me mekáne. ⁴² Mbíi mée eyögké me mekáne awog, boj nhóbe nén ábel boj ábén bad ábe bédé hén bédúbe bán, wé-eé elómé me." ⁴³ Áde ámáá ahób nê dóo áchágté ehób ámīn boj áchénlē Lazarōse aá, "A-Lazarōs, bíd áwed!" ⁴⁴ Ane mod awé ammád awé abíd-te áwed. Mbóm éche bénkaánné mó mekuu ne mekáá ne tumbe eché bénkaánné mó e'só, émbé ébē mó á yél. Yesue anláá bó aá, "Nyéhune mó ábē bwém á yél, ákag."

Béhagke Yesue

(Mat 26.1-5; Mak 14.1-2; Luk 22.1-2)

⁴⁵ Bad bé Israel ábe bénké Maria á mewenned bényin mekan míme Yesue ámbenlé, bénđubé-'e Yesue. ⁴⁶ Boj bó donge á bad bénké Befarisia atán, béláá bó mam míme Yesue ábélé. ⁴⁷ Héé beprise bémáá ne Befarisia békhenlé mbom n̄ káansel. Bénhób bán, "Cheé débenlé baoó? Detángéné dyam abel áyèle anén mod abele menyáké bwāmbwam! ⁴⁸ Nzé detédté bán, ákeene ímmén mekan á'só né moosyéál adúbpé-'e mó, né bad bé Roma békobén-ne syánē eché Ndáb-e-Dyób, békobén-ne syánē ádēd alon." ⁴⁹ Dóo mod nhóg átinté echâb awé békagé'áá bán Kaifase, awé abédé prisē

ambáámbáá mímē mwě, áhóbeé aá, “Nyéebí’é dyamdyam. ⁵⁰ Nyéenyínéé nén bán ébóó bán, mod nhóg áwê á nló mí moosyáél tómaa aloj ásyáél ábóó?” ⁵¹ Kénéé áhóbeé áá nê, saké mímē mewémten mén móo áhóbné’áá nê. Ngáne ábédé prisé ambáámbáá mímē mwě, ahóbeé áá dyam áde débenléd, á’só é’ póndé, aá Yesue áwé á nló mí bad bé Israél. ⁵² Saá-kaá á nló mí bad bé Israél bénpen, boj kájne álad bad bad bé Dyöb bésyáél ábe bémáá ahented áte hőm ahóg, ábel béké mod nhóg.

⁵³ Bootya échê epun bad bémbootéd Yesue ahäge, áwúu mó. ⁵⁴ Nén dêmbeél Yesue eebíde’áá á nhéné ámpé átinté e bad bé Israél. Bóobé ábē bembapé bênhidé béké á dyad áde békégeé bán Efrem, bedyéé-’é áwed. Ádê dyad ábédé bénben ne ehyángé. ⁵⁵ Póndé e ngande e Nnyíme-ámín embé bénben. Né-óó, bad híin bémbid myad ne myad, béké á akuu á Jerusalem áwobe échab yél ngáne mbéndé e Mosee éhédeé áá, ábojseñ ngande e Nnyíme-ámín. ⁵⁶ Ábê bad bé Israél bémbeé békédeé Yesue. Áde béládné á Ndáb-e-Dyöb bésedté’áá, nhóg ne anínií bánken, “Chán nyéwémténé, nyédu bpé bán, áhye ngande-yé?” ⁵⁷ Beprise bémbeáá ne Befarisia béntoméed ehájngé bán, kenzéé awé anyíné Yesue áhye áláa bó, ábel boj békob mó.

12

Béwógté Yesue á Bétani (Mat 26.6-13; Mak 14.3-9)

¹ Áde ngande e Nnyíme-ámín élyágé e’pun ntóób, Yesue anké á Bétani wéé Lazarosé awé ámpuúdté ádyéé’áá. ² Bémbelé Yesue ndyéed áhed. Mataa mó antóméed ene ndyéed. Lazarosé ambé nhóg átinté e bad ábe bóobé Yesue békédeé á tébelé ádyé ndyéed. ³ Héé Maria átédeé epom é dyög dé elod á bwám áde álélé nkun bwâmbwam. Ádê dyög békénlé dó nâd.* Anwágéd Yesue á mekuu, apíne-’é mó mekuu ne échē esid é nló. Elod é bwám énlög ndáb áte esyáél. ⁴ Dóó Judas Iskarióde, mbapé nhóg awé émbéé bán mó ásóm Yesue áhóbeé aá, ⁵ “Cheé bénkénsommé ádén dyög, bétéd mímén máné béké béké betóótöké bé bad? Béhélé’áá-se bésom ádê dyög dyam-éé áde nsábe mí mwě nhóg.” ⁶ Judase anhób nê, saké áyále abédé betóótöké bé bad ngol, boj áyále abédéé nchib. Ngáne ábédé mod awé awánládtáá bóbóó ekwe é máné, ayögké’áá máné atéd ámbid. ⁷ Boj Yesue anhób aá, “Tédé mó, ákoo áde ályágé ásé ábel boj ábenled dó mbwé míme bélíméé me. ⁸ Betóótöké bé bad bédé ne nyé póndé téé boj me pen méebáá ne nyé póndé esyáél.”

Béhágke Lazarosé

⁹ Ene póndé-óó, bad bé Israél híin bénwög bán, Yesue adé á Bétani. Né-óó, bénké áwed. Saké Yesue mwémpen mó ankéj boj béké áwed, boj bénké Lazarosé anyín awé Yesue ámpuúdté. ¹⁰ Né-óó, Beprise bémbeáá békégeé’áá kájne Lazarosé áwúu mó, ¹¹ áyále bad bé Israél bétédé áá bó, bédubpé Yesue. Béndubé Yesue áyále dyam áde dêmbenléd ne Lazarosé.

Yesue asólé á Jerusalem néé kâj (Mat 21.1-11; Mak 11.1-11; Luk 19.28-40)

¹² Néé bín é’sángé, ndun e mod eché enhyé á Ngande e Nnyíme-ámín bénwög bán Yesue apag á Jerusalem. ¹³ Hé dóó bésélé e’kikag é’ mií boj békag mó abomen á nzii. Béhágé’áá e’saad bán, “Hosána! Nnam míbé ne ane awé apedé á dín áde Sángwéé. Nnam míbé ne kâj e bad bé Israél!”

¹⁴ Yesue ankúd etum é ésel, ádī-’é chó. Nén dêmbenléd ngáne éténlédeé á kálag e Dyöb nén bán,

¹⁵ “Á-bad bé Zayon, nyéebáá’,
nyénøne’ echén kâj ehúé’,
ediídé-’é etum é ésel.”

* 12:3 Nâd: Nâd edíi mbonja eché ewóó elod é bwám eche békénléé mđg mé elod é bwám.

¹⁶ Á póndé echē mímén mekan mébénlédé, bembapee ábe Yesue bénkênsójténné. Boj áde Yesue âmpuu'é ne ehúmé é Dyöb, dôa bênchemmé bán mam míme mébénlédé tângene Yesue móa mîntenléd, á y  l ech  .

¹⁷ Ndun e mod eché embé ne Yesue áde áchénlé Lazarosse á soj-tê boj ápuudté mó, embé ékalé' írmê nkalanj. ¹⁸ Né-óó ndun e mod enké Yesue abomen áyèle ábén e'chemléd bé menyáké ábe âmbenlé. ¹⁹ Héé Befarisia bélângéé nhóg ne anínií bán, "Nyénône! Kájne baoj deehéhléé dyamdyam abel. Nkönjsé ñsyääl ñhide mó."

Bad bé Grikia békéde Yesue

²⁰ Donge á bad bé Grikia bémbe átîntê e bad ábe bénkë ngande e Nnyíme-ámín á Jerusalem, âke dé abe Dyöb edúbé. ²¹ Bêmpë wée Filibe. Filibe awé ambíd á dyad á Betsaida á mbwóg e Galilia. Bénlää mó bán, “A-Sán, sêdæé Yesue anyín.” ²² Filibe ankë Andreya aláa. Dóo bó bad békíí Yesue aláa. ²³ Yesue ankwentén bô aá, “Póndé edepé eché ehúmé e Mwän-a-Moonyoŋ énnynéndtē. ²⁴ Ne mbále, nlângé nyé néen mëé, mbum e ngun póg edíi mbum e ngun póg, kááj né békéwé chó á ndooob-tê boj ewé. Ewâg-káá, boj echyáá mbum é ngun émpée éche ébúú áte. ²⁵ Mod awé adaoá ádë alongé, äbð dó. Mod awé mó-’e akooá ádë alongé, á nkörjsé-te wén, äkøá dó á alongé áde déemaá’. ²⁶ Kéndzéé awé abenle me, atángéné awêm mbølede abé. Ké héé-’e wée nídií, awêm mbølede atángéné abé áhed. Echem Sán äbë-’e kéndzéé awé abenle me edúbé.

Yesue ahóbé têngene eche kwééd

²⁷ “Bɔəb-pɔ́, nlém ítage me áte. Cheé-ō méhōbpē? N̄hōb meé, ‘A-T̄e, weémwāg-se metake míme méhúe’ métán me-yε?’ Aáy, méeħōbpé n̄e, áyāle enén póndé e metake chō ekəá boŋ m̄pag wén. ²⁸ A-T̄e, lúmed echōŋ ngum.” Héé ehób ébídeé á Dyōb néñ báñ, “Nlúmté echēm ngum, mélūmēd-te chó ámpē.” ²⁹ Ene ndun e mod echē embé áhed enwóğ échē ehób. Bénhōb báñ dyōb dóo ákúmé áte. Bad bémpēé bénhōb báñ, ángel chó ehóbé áwē. ³⁰ Yesue anláá bó aá, “Áyāle echēn dóo échén ehób ébídé, saké áyāl echēm. ³¹ Póndé epedé echē Dyōb dékāadté mímén nkɔ̄jsé. Nkamlen míme nkamlené á nkɔ̄jsé mékwě bɔəb. ³² Boŋ áde bémadté me anyen ámin, m̄döl bad bésyāl áwēm.” ³³ (Yesue anhōb n̄e âlúmed ndín e kwééd echē áwēē.) ³⁴ Ndun e mod echē embé áhed enkwéntén mó báñ, “Séwógé á mbéndé-te báñ Ane-awē-Béwógté ábē á ngíndé ne á ngíndé. Chán-nō éhōbeé weé ‘Bétáŋgéné bényēn Mwǎn-a-Moonyoŋ ámin.’ Nzéé adé anén ‘Mwǎn-a-Moonyoŋ?’ ” ³⁵ Dóo Yesue álâŋgeé bó aá, “E’nyínén bé ekíde békē ne nyé á esój e póndé ngén. Nyékag bɔəb áde e’nyínén bé ekíde é’díi é’díi, ábel boŋ ehíntén éékōbē nyé. Mod awē akag á ehíntén-té eebýéé’é wéé ákagké. ³⁶ Nyédúbe e’nyínén bé ekíde bɔəb áde é’díi ne nyé, ábel nén nyébē bāñ bé e’nyínén bé ekíde.”

Bad bé Israël béedíi báedúbpeé Yesue

Áde Yesue ámáá írmén mekan mésyāēl ahób, antedé bó, áke ásōōm wée béenyínné mó.³⁷ Kénéé ene ndun e mod énnyínné ábén e'chemléed bé menyáké é'syāēl ábe Yesue ámbenlé, bénkendúbéké mó.³⁸ Nén dêmbenléd âloned e'yale ábe nkal é'déadəŋ Yesayaa ánhōbpé aá.

“A-Sáŋ, nzéé adúbpé eyale éche sékálé,
nzé-módé akjdénvñ̄ ngum echôn áchém-me chó?”

³⁹ Né-oo, béhele'aá-sé bédúbe. Yesayaa ahóbé hóm démpēe aá.

40 "Dyōb ákwídé bó ndím, ábē-'e bó nlém mé aláá,
âbel nén m̄mab m̄d méényinnē',
héénsontánne

Nzé héhélé-’ɛ n̄é né hétimén m̄e né m̄échoód-ts̄ há ”

41 Yesayaananhób nén áyāle annyín ehúmé éche Yesue, anhób-pe áyāl echê. **42** Ké nê, bad híin bêndübē Yesue, káéjne donge á bad bém Báá. Boj ngáne békáá'áá Befarisia, bénkénlúmáedté yäl, âbáy nén bán békibíté bó á ndáb é mekáne. **43** Békibíté áá nê áyāle bêndën mekenag mé baányon tómaa mé Dyöb.

E'yale ábe Yesue békāād bad

⁴⁴ Héé Yesue áchágté ehób ámīn áhōbē aá, “Kénzéé awé adúbpé me, eedúbpree mmémpen, adúbpé káéjne ane awé alómé me. ⁴⁵ Kénzéé-’e awé anyíné me, anyíné ane awé alómé me. ⁴⁶ Mpedé á nkōjsé néé e'nyínén bé ekíde, ábel boj kénzéé awé adúbpé me, eélyāgē á ehíntén-tê. ⁴⁷ Kénzéé awé awogé ábêm e'yale, boj eékojge bó, saké me nkáadte mó. Meekáadtéé mó áyāle meépedee ákaad nkōjsé boj mpedé ássoj bad bé nkōjsé. ⁴⁸ Kénzéé awé abáá me á yál boj eékobe-’e ábêm e'yale, awóó mod awé ákāād mó. Ábêm e'yale běn bóo békāād mó á mbwé mé asog. ⁴⁹ Ébē nê, áyāle meeħobee ímmén mésyāāl ne echém kunze. Boj Titéé awé alómé me, áláñgé me chōm éche nítáñgéné ahób. ⁵⁰ Mbíí meé kékheé éché áláñgé me aá níhōb épseene alongé áde déemaá’. Né-óó, kékheé éche níhōbeé, nhóbe’ chó ngáne Titéé áláñgé me.”

13

Yesue awōbpé ábē bembapēe mekuu

¹ Epun é ngande e Nnyíme-ámīn ênlyág néé chǎn. Yesue ambíí aá eche póndé emaá apē eché mótnégné nkōjsé atede, áke wéé eche Sáj. Andăj bad bé nkōjsé ábe béndubé mó, alúméd-te échē edənge káéjne á asog.

² Yesue ne ábē bembapēe bédýágé’áá ndyéed ngukél, Satane-’e ammād Judas Iskarioté mwān awé Simōn mewémten mé mbéb ásóled áte ásóm Yesue. ³ Yesue ambíí aá eche Sáj abagé mekan mésyāāl áwemekáá. Ambíí-’e aá móhūn wéé Dyōb mótime-’e ámbid wéé Dyōb. ⁴ Áde bédýágkē ndyéed nê, Yesue anhidé ásē, ahúd nkob á yál, atád tábēlē á nkog. ⁵ Héé áhédé mendib á kúmbe-tê, boj ábootéd ábē bembapēe mekuu awobe, ápinnād tábēlē awé ánwāā’é á nkog. ⁶ Áde ápédé wéé Simōn Petro dōo Simōn ásédtéé mó aá, “A-Sáj, ehede me mekuu awobe-ye?” ⁷ Yesue ankwentén mó aá, “Weéhēlēē-sé esóntén dyam áde ímbeléé bōob, boj ámbid e ímmén mésyāāl dōo wésóntenné.” ⁸ Héé Petro áhōbeé aá, “Aáy, weéwóbpéé me mekuu mbēd.” Yesue antimtén mó aá, “Nzé meéwobepé we mekuu né wéewónjé dyamdyam abelen ne me.” ⁹ Simōn Petro anláá mó aá, “A-Sáj, né saké mekuu mémpeen-éé wéwobéé me. Wéwobé me káéjne mekáá ne nló!” ¹⁰ Yesue ankwentén aá, “Mod awé amaá mendib awog, yál esyāāl emaá mó asáj, eetāñgēnēé mendib awog ámpē, étoméé áwobe mekuu.* Nyémaá asáj, boj saké nyé moosyāāl nyéssáá.” ¹¹ Yesue ammād abíí mod awé ásōm mó. Néé dēnkēj boj ahób aá saké moosyāāl asáá.

¹² Áde ámáá bó mekuu awobe, anhé mímē nkob á yál, átím ámbid áwé e'dii. Héé ásédtéé bó aáken, “Nyéssóntédyam áde ímbénlé nyé-ye? ¹³ Nyéchāge me Meléede, nyéchāge-’e me Sárgwéé. Nyéttáñgéné, áyāle né děn dōo nídfí. ¹⁴ Né-óó, nzé me awé ndé nyé Sárgwéé mbé-’e nyé Meléede nwōbpé nyé mekuu, né nyémpē nyéttáñgéné nhóó ne anínií mekuu awobe. ¹⁵ Nlúmté nyé elájnsén éche nyéttáñgéné ahíd ábel nén nyémpē nyébel ngáne ímbénlé nyé. ¹⁶ Ne mbále nlângé nyé nén meé, mbalede eetóméé eche sáj, mod awé bélómé-’e eetóméé mod awé alómé mó. ¹⁷ Bōob áde nyébíí ímmén mam, nnam mébē ne nyé nzé nyébèle mó.

¹⁸ “Meeħobéé nyé moosyāāl. Mbíí bad ábe mípwéddé. Boj e'yale ábe é'ténlédé á Kálag e Dyōb é'táñgéné alón. Éténlédé nén bán, ‘Mod awé súmō sêdyâg ndyéed akünnéné me yál.’ ¹⁹ Nlângé nyé nén bōob, áde éebénlédé ábel nén nzé ébénlédé, nyédube nén bán, ‘Ndíí mó Awé Ndíí.’ ²⁰ Ne mbále, nlângé nyé nén meé, kénzéé awé akobé mod awé nílómé, akobé me. Kénzéé-’e awé akobé me né akobé ane awé alómé me.”

Yesue ahóbé á'sō é' póndé aá bésōm mó

(Mat 26.20-25; Mak 14.17-21; Luk 22.21-23)

²¹ Áde Yesue ámáá mímmén mekan ahób ndutul enlóg mó á nlém-tê, ápanléd-te ábē bembapēe áte aá, “Ne mbále, nlângé nyé nén meé, nyé mod nhóó ábē me á mekáá mé bad bé ekoyí.” ²² Héé ábē bembapēe bénónné á mesó, áyāle bénkembíí’é mod awé áhōbeé.

* 13:10 Dojje á kálag dé'só déewoo'é éétóméé áwobe mekuu.

²³ Mbapēe nhōg, awē Yesue ândəŋgé, andyē mó á akéb. ²⁴ Dōo Simōn Petro ápebtanné ane mbapēe mīd, áhōbē aá, “Sedéd mó mod awē áhōbē.” ²⁵ Dōo ane mbapēe ásíté Yesue á yāl-tē, ásstedté mó aáken, “A-Sáj, nzéé éhōbē?” ²⁶ Yesue ankwentén mó aá, “Mod awē métodéé ewele á dīse-tē boj mībe mó, mó adé ane mod.” Héé átédé ewele, átədté á dīse-tē, ábagé Judase, mwān awē Simōn Iskariōde. ²⁷ Akob áde Judase ákóbé échē ewele, Satane ansól mó áte. Dōo Yesue álānggē mó aá, “Dyam áde éhedeé abel bēl dō á mehélēte.” ²⁸ Boj mod ké nhōg awē bōbōo bedyágé’áá ndyéed enkēnsójténné chōm-éé ekéá boj Yesue aláá Judase nē. ²⁹ Ngáne édfí bán Judase mó akōnggé’áá ekwe é mōnē, donge á bembapēe bénwēmtén bán Yesue alāngé mó aá áke áchan bwēm ábe bēbenlédté á ngande, ké’é chōm éche bēbeé betóotōkē bé bad. ³⁰ Áde Judase ákóbé ewele éche Yesue ábágé mó kobén, ambíd ebwōg. Ehíntén ênkwě.

Yesue abagé mbéndé e ekóólé

³¹ Áde Judase ámáá abíd dōo Yesue áhōbē aá, “Bōob-pōo ehúmé e Mwān-a-Moonyoŋ ényinnédé. Ehúmé é Dyōb-pe ámpē ényinnéd mbwiined ne mwān. ³² Nzé Dyōb ákúdé ehúmé ámbid e Mwān, né Dyōb dēn ámpē débēl ehúmé é Mwān ényinnéd. Ábēl-le nē ábwōg-ábwōg. ³³ A-baányaŋ, echem póndé ábē ne nyé, edé esój. Nyéshéd me, boj ngáne ménláá’é bad bē Israél, melemlem nē dōo nílānggēé nyé bōob, mēé, ‘Wéé níkagké, nyéehenlē apē áhed.’ ³⁴ Mbage nyé mbéndé ekóólé bōob, nén nyédəj nhōg ne aníníí. Ngáne ídáá nyé, nyémpē nyédəj nhōg ne aníníí. ³⁵ Nzé nyédəé nhōg ne aníníí, né mod téé ábīi aá nyédii ábēm bembapēe.”

Yesue ahóbé ngáne Petro ábānggē mó á yāl

(Mat 26.31-35; Mak 14.27-31; Luk 22.31-34)

³⁶ Simōn Petro ansedéd Yesue aáken, “A-Sáj, héé éhedeé ake?” Yesue antimtén mó aá, “Weéhēlē-se ehíd me bōob wéé níkagké, boj ámbid e póndé wéhíd me.” ³⁷ Petro ansedéd mó aá, “A-Sáj, cheé ekéá boj meéhēlē se nhíd we bōob? Mbōjséné âwé á nló mímōj.” ³⁸ Héé Yesue ákwentanné mó aá, “Ekoó abojsen dé awé á nló mímēm-e? Ne mbále, nlāngé we mēé, nchóm-a-kúb adéhób aá mótoō’, wébān me á yāl ngen éláán.”

14

*Yesue mó adé Nzii e mbále
eché epeene alongé*

¹ Dōo Yesue ábádeé ábē bembapēe aláa aá, “Nyéetagté nlém á abum. Nyésum nlém wéé Dyōb, nyésum-me káájne áwêm. ² Toj ébúú áte á ndáb eché echem Sáj. Nkag-ke áwed ábojsen nyé hōm. Nzé énkēmbé nē, né menkēnláá’é nyé mēé nkag nyé hōm abojsen. ³ Nzé nkií’-e nyé hōm abojsen, mētím ámbid, níhye ntéd nyé ábē ne me, ábel nyémpē nyébē hōm áde ídii. ⁴ Nyébíí nzii eché etime’ wéé níkagké.” ⁵ Héé Tōmasé álānggēé mó aá, “A-Sáj, séebíí’-e wéé ékagké. Chán-nō sébwéé nzii abíi eché etime áwed?” ⁶ Yesue ankwentén mó aá, “Méé ndé nzii eché ekag wéé echem Sáj, mbále ehúé’ ne me, mē’-aá mbage alongé. Modmod eéhēlē-se ápe wéé echem Sáj, ésebán abwedé áwêm.” ⁷ Héé Yesue álānggēé ábē bembapēe aá, “Bōob áde nyébíí me, nyéebíí káájne echem Sáj.* Bootya bōob nyényiné mó, nyébíí’-e mó.”

⁸ Filibe anláá mó aá, “A-Sáj, lúméd-te sé Titéé. Chōm ésyāel éche séhedeé éetóméé nē.” ⁹ Yesue ankwentén aá, “A-Filib, nkémbé ne nyé á etún é póndé, chán-nō éhēlē-se ehób wéé mābíí’-e me? Kénezé awé anyíné me né anyíné Titéé. Chán-nō éhēlē-se ehób wéé ‘Lúméd sé Titéé?’ ¹⁰ Weedúbpéé wéé echem Sáj adíi me áte, mē’-e mbé mó áte-yé?” Héé Yesue álānggēé ábē bembapēe aá, “Mam mímē nílānggēé nyé mēebídéé áwêm dēn. Boj echem Sáj awé adé me áte mō abele mímē nsón. ¹¹ Nyéedúbe me ngáne ríhōbé mēé echem Sáj adíi me áte, mē’-e mbé mó áte. Nzé nyéedúbe nē, nyéedúbe ké áyāle

* ^{14:7} Bōob áde nyébíí me, nyéebíí káájne echem Sáj; donge á kálag dé’só áwóó nzé nyéenkōj me abíi, né nyéebíí káájne echem Sáj.

mam mé menyáké míme míbeléé. ¹² Ne mbále, nlâjge nyé nén meé, kénzéé awé adúbpé me, ábél mam rímmé míbeléé. Ábél-le káéjne mekan míme métómé rímmén áyāle nkag wéé Titéé. ¹³ Měbél-le káchéé éche nyésédté á dín ádém ábel nén ngum eché Titéé ényînned ámbid e Mwán. ¹⁴ Nzé nyésédté me káchéé á dín ádém, měbel chó.”

Yesue aá móðlom Edádæj éche Ésáá

¹⁵ Yesue ambád ahób aá, “Nzé nyéndéé me, né nyéshid échem mbéndé. ¹⁶ Mělää Titéé, ábél-’e nyé Nwôngene ampée, awé ábél ne nyé á ngíndé ne á ngíndé. ¹⁷ Ane Nwôngene mô adé Edádæj éché ebídte’ mbále áwed tângene Dyöb. Bad bé nköjsé béeheléé-se bekob mó, áyāle béenýinéé mó, béebíi-’aá mó. Boj nyébíi mó áyāle adé ne nyé, ábél-’e nyé áte.† ¹⁸ Nzé nkií, méetedéé nyé menyuu. Mětím ámbid áwén. ¹⁹ Mwâmpin mí póndé, nköjsé méenyínné me ámpé. Boj nyépen nyéenýin me. Ngáne měbëé á alongé, nyempé nyéebé. ²⁰ Nzé éché epun épédé, nyéebíi bán ndé echem Sáj áte, nyé-’e nyébé me áte, melemlem ngáne me-’e índíí nyé áte. ²¹ Kénzéé awé akobé échem mbéndé, áhidé-’e chó, mô adé mod awé adéé me. Kénzéé awé adé-’e me, echem Sáj mó-’e ádæj mó. Mémpé mědæj mó nlúméd-te mó yđl.” ²² Dóo Judasé (saké Judas Iskariöde) áhóbeé aá, “Boj A-Sáj, chán wélumédté sé yđl boj weelúmté nköjsé pen?” ²³ Yesue ankwentén aá, “Nzé mod adéé me, áhíd ábém e’yle. Echem Sáj ádæj mó, sé echem Sáj-’e séepé áwé, sédyéé-’e ne mó. ²⁴ Nzé mod eédæe me, eehídéé ádém ayáge. Ádén ayáge áde nyewogé déesaá ádém. Ádíí áde Titéé awé alómé me.

²⁵ “Nlângé nyé rímmén mésyääl áde índíí ndé ne nyé. ²⁶ Nwôngene, Edádæj éche Ésáá awé Titéé álommé á dín ádém, áyägéd nyé mekan mésyääl ábél-le nyékamtán mekan mésyääl míme rílângé nyé. ²⁷ Nsaj mó rílyagnédé nyé. Mmêm nsaj mó mbaageé nyé. Meébagéé nyé mó ngáne nköjsé mbaageé. Nyéetagté nlém á abum, nyéewogé mbwog. ²⁸ Nyénwog néé ríhóbé meé ‘Mětedé nyé boj mětím ámbid áwén.’ Nzé nyéndæj me né nyéewog menyinge bán nkag wéé Titéé áyāle Titéé atómé me. ²⁹ Nlângé nyé nén bøob áde eébénlédé, ábel nén nzé ebénlédé, nyédube. ³⁰ Syáné déebudté póndé awónj ákal ámpé, áyāle nkamlene a nköjsé ahúé’. Eewoo’é ngíne ké póg ámin echém. ³¹ Boj kénê měchennéd mó yđl mibél ngáne echem Sáj áhóbé aá mibél, ábel boj nköjsé mibíi nén bán, ndéé echem Sáj. Né-’aá ákáá boj mibél káchéé éche áhóbé aá mibél.

“Nyéhyag syáné déhíde hén.

15

Yesue mô akoó alín dé epum á bwel abé

¹ “Mé-ee ndé alín dé epum é bwel, alín dé epum é bwel dën dën. Echem Sáj-’e abé mbelé-nzag. ² Ahúde’ ngéen ké ehéé eché edé me á yđl, eché eechyáá’ e’pum, ápagké-’e ké ehéé eché echyáá’ e’pum, ábel boj éboj yđl ébude-’e achyáá. ³ Ayáge áde n'yégté nyé ábélé nyémaá asáj. ⁴ Nyélyag nyébé ne me, mémpé melyag mbé ne nyé. Ngéen chén eéhélëé-sé echyáá’ e’pum áde éesaá á alín á bwel. Melemlem néé nyempé nyéeheléé-sé nyéchyáá’ e’pum ésebán nyéndé ne me.

⁵ “Mé-ee ndé alín dé epum é bwel, nyé-’e nyébé ngéen. Nzé mod adíí adé ne me boj me-’e ndé ne mó áchyáá’ e’pum bwâmbwam. Nyéehélëé-sé nyébél dyamdyam ésebé ne me.

⁶ Nzé mod eésé ne me, bélhud mó néé ngéen. Ene ngéen ebéle ekínted. Béladeé éché ndín é ngéen áte, bélwém chó á muú-te, éhyáj-’e. ⁷ Nzé nyéndíí nyéndé ne me, boj ádém ayáge-’e ádíí ádé nyé áte, káchéé éche nyésédté, nyéeküd. ⁸ Edubé éche echem Sáj ényînnad nzé nyébudé e’pum achyáá, nê-’aá débél nyébé ábém bembapé. ⁹ Ngáne echem Sáj ádáé me, melemlem néé mémpé índéá nyé. Né-oó nyéndíí nyébé ne me ábel boj mibé índæj nyé.

¹⁰ Nzé nyéhídé échém mbéndé, né mibé índæj nyé. Melemlem né dôo nhídeé mbéndé éché echem Sáj, adíí adé-’e me. ¹¹ Nlângé nyé rímmén mésyääl ábel nén nyempé nyewog nyaa e menyinge eché íwogéé, rímmén menyinge mélôn-ne mbon. ¹² Echem mbéndé edfi nén, nyédæj nhog ne anínií melemlem nêngáne índéá nyé. ¹³ Nzé mod awédé á

† ^{14:17} Ábél-’e nyé áte; dojge á kálag dé’só áwóó adé-’e nyé áte.

nló mí baáb, né alúmté edəŋge éche étomténe achab ámīn. ¹⁴ Nzé nyēbele' mekan míme nlângé nyé meé nyébel né nyédfi ábêm besón. ¹⁵ Meéchāgēe nyé bembalede ámpē, áyāle bembalede béebyē' é mam míme echab sáy ábeléé. Boj níchagé nyé meé ábêm besón áyāle nlângé nyé mam mésyāel míme echem Sáy álângé me. ¹⁶ Nyéepwedeé me, boj meé mpwedé nyé, nlóm-me nyé ábel mekan míme méchyáa e'pum é' bwâm. Nyaa é mekan éché ebé abé ne abé. Nzé nyébelé' nê, echem Sáy ábé nyé kchéé éche nyésédté á dín ádêm. ¹⁷ Mmén mam mésyāel míme nlângé nyé-oo, médii nén meé, nyédəŋ nhog ne anínií."

Bad bé nkōjsé békáj nyé

¹⁸ Yesue ambád ábē bembapee aláa aá, "Nzé nkōjsé nkój nyé, nyébíi nén bán meé bésébpé akóo. ¹⁹ Nzé nyémbé nêngáne bad békój, né nkōjsé météd nyé nêngáne ábē bad. Boj mpwedé nyé átinté e bad békój. Nyéesaá bad békój. Né-aá ákáá boj nkōjsé nkój nyé. ²⁰ Nyéwémten ehób éche ménláá' nyé meé 'Mbalede eetóméé eche sáy.' Nzé bémbané me á metake-té né bébané nyémpé á metake-té. Nzé bénhid ádêm ayáge né bélid-te ádén ámpé. ²¹ Bébel nyé mímén mekan mésyāel á yéł á dín ádêm, áyāle béebíi' é ane awé alómé me. ²² Nzé menkémpé boj nláá bó mímén mam, né mímab mbéb méenyinnedé. Boj baoob, béewoo' é nzom ké póg áyāle mímab mbéb. ²³ Kénezéé awé akóo me, akóo kájne echem Sáy. ²⁴ Nzé menkémbel ndín é mam átinté echâb éche mod ampée éebeléé mbéb, né mímab mbéb méenyinnedé. Boj baoob bénýiné mekan mésyāel míme mbélá, ké nê bédii békóo me, békój-é echem Sáy. ²⁵ Nén ádé áloned e'yale ábe é'ténlédé á mbéndé echâb bán, 'Nzom ké póg enkembáá eche békójné me.' ²⁶ Nwôngene ábid wéé Titéé. Adí Edéadəŋ éche ébele' boj bad bésontén mbále. Ádě mébēē ne Titéé mélomé nyé mó, mó-aá álää nyé mam tângene me. ²⁷ Nyémpé nyéehôb mam tângene me áyāle nyéde ne me se á mbooted.

16

¹ "Nlângé nyé mímén mésyāel ábel boj nyéetimné mbíd. ² Bébídéd nyé á ndáb é mekáne. A mbále póndé ehúe' eche kénezéé awé áwūu nyé áwemtēnné aá móbenle Dyob. ³ Bébel mímén mam áyāle béebíi' é echem Sáy béebíi-áá me. ⁴ Nlângé nyé mímén mam mésyāel ábel boj nzé póndé epedé eché mímén mekan mébenladté, nyéekamtén bán menláá' nyé.

Nsón míme Edéadəŋ ébenlé

"Menkénláá' nyé mímén mekan á mbooted, áyāle membé ne nyé. ⁵ Boj baoob, nkag wéé mod awé alómé me. Ké nê, nyé modmod nyéesedteé me bánken 'Héé ékagké?' ⁶ Aláa ádé nlângé nyé mímén mekan ábélá ndutul elogé nyé á nlém-té. ⁷ Ne mbále, nlângé nyé nén meé, édé mboj nén bán nkí. Áyāle nzé meekii, né Nwôngene éepaá áwén. Boj nzé nkií, mélomé nyé mó. ⁸ Áde ápeé, áluméd bad békój nsôjten míme bérwánlé tângene abel dé mbéb ne ábel mekan írime mésáá méetângeneé. Béessôjtené-é nyaa eché Dyob ákáadteé. ⁹ Mímab nsôjten méetângeneé tângene mbéb, áyāle beedúbpree me. ¹⁰ Méetângeneé tângene abel dé mekan míme mésáá, áyāle nkag wéé Titéé, nyéenyínnaá me ámpé. ¹¹ Méetângeneé tângene nyaa eché Dyob ákáadteé, áyāle amaá nkamléne a nkōjsé akáad.

¹² "Ndíi nwóó ekud é mekan áláa nyé boj mímê mekan métom nyé áte. ¹³ Boj áde Edéadəŋ é mbále épée, ábél nyébíi mbále esyáel. Éehôbenné eché kunze chén. Dyam áde béláa' é mó dóo áhôbpé, álää-é nyé mam míme mébenléd póndé eché ehúe' á'soo. ¹⁴ Áchâgéd échém edubé ámīn áyāle kchéé éche áwogé áwêm chóo mó-é álää' nyé. ¹⁵ Kchéé éche echem Sáy áwóó édii échém. Nê dóo ákáá boj níhôb meé Edéadəŋ étéd kchéé éche níhôb, éláa nyé."

Ndutul étím menyinge

¹⁶ Héé Yesue ábádée aá, "Mwâmpin mí póndé nyéenyinné me ámpé, mwâmpin mí póndé-é ámbid ené nyéenyin me." ¹⁷ Dóo donge dé bembapee bésedteé nhog ne anínií

bánken, “Cheé áwémténé ahób, âláa syánē aá, ‘Mwămpin mí póndé nyényínné me ámpē, mwămpin mí póndé-’e ámbid e nê nyéeniyin me?’ Ahób-pe ámpē aá, ‘Áyâle nkag wéé Titéé.’” ¹⁸ Bémbé bésedté bánken, “Cheé áwémténé ahób, âhób aá, ‘Mwămpin mí póndé?’ Séesöjteneé dyam áde áhóbéé.”

¹⁹ Yesue ammăd abíi aá, béhede mó dyam asèded. Né-oó, anláá bó aá, “Dyam áde ínhóbé meé, ‘Mwămpin mí póndé nyényínné me ámpē, mwămpin mí póndé-’e ámbid e nê, nyéeniyin me,’ dôo nyésedteé nhög ne aninií-yę? ²⁰ Ne mbále, nlângé nyé meé, nyéechíi, nyélëb-pe, boj nköjsé méwōg menyinje. Nyéesudén, boj rímē nsuden métim menyinje. ²¹ Mmwaád awé ahede achyáá abelé ásuden áyâle eche póndé e metake epedé. Boj nzé amaá achyáá abelé awog menyinje, áyâle moonyor achyáádté á nköjsé. ²² Né dôo édíi ne nyé. Nyéesudné baoob, boj mënyin nyempé. Ene póndé rímē nlém mélön ne menyinje, modmod éehenl-’áá nyé rímē menyinje akoben. ²³ Áde échê epun épéé, nyéesedédté me dyamdyam. Ne mbále, nlângé nyé néen meé Titéé ábë nyé kékchéé échë nyésedté á dñn ádêm.” ²⁴ Káéjne baoob nyéehednëe mó chomchöm á dñn ádêm. Nyéheden mó, nyéeküd ábel néen rímē menyinje mélög mbon.”

Yesue atómé nköjsé áte

²⁵ Yesue ambád ábë bembap   al  a a  , “Mb  nl  d   ngan âláa ny   ekud é mekan. P  nd   eh  e   ech   m  ebenl  d  t   ngan. M  l  a  -’e ny   mekan t  hg  ne Tit  e  , nyaa ech   ny  s  jt  enn  . ²⁶ Éch   epun, ny  eh  d  n   mó k  ch  é á d  n ád  m. M  et  g  n-na   mó al  a me   áw  ng  n ny  , ²⁷ áyâle Tit  e   mw  n ad  a ny  . Ad  a ny   áyâle ny  d  a me  , ny  d  ub  p  -’e b  n mb  d   áw  . ²⁸ Memb  d   w  e   Tit  e  , r  p   á nk  js  -te, baoob-pe nt  dte nk  js  , nt  ime ámbid w  e   Tit  e  .”

²⁹ H  e   áb   bembap   b  h  b  e   b  n, “Eh  be baoob ng  ne s  s  jt  enn  , we  benl  d  t   ngan. ³⁰ S  b  í baoob b  n eb  i mekan m  sy    l, éeh  dn  d-t  a   b  n modmod ás  ded w   dyamdyam. N  n ábelé s  d  ub  p   b  n eb  d   w  e   Dy  b  .” ³¹ D  o Yesue ákw  ntann   bó a  , “Ny  d  ub  p   baoob-e? ³² Ny  n  ne! P  nd   eh  e  , ema  -’e ape, áde ny  p  jt  edt   áte. Mod té   at  m meh  l  é w  e   áb  d  , ny  t  d   mm  emp  n. Boj k   n  , me  sa   mm  mp  n, Tit  e   ad   ne me. ³³ Nl  ng   ny   r  m  n mekan ábel néen ny  b   nsan ab   ad   ny  d  i ne me. Ny  ek  d metake á nk  js  -te boj ny  w  d nl  m á abum. Nt  m  e   nk  js   áte.”

17

Yesue ak  nn  d   eche y  l

¹ Áde Yesue ám  á r  m  n mekan m  sy    l ah  b  , d  o án  n   ám  n boj áh  b   a  , “A-T  , p  nd   ema   ape. L  m  d bad eh  um   éch   awo   Mw  n, ábel néen awo   Mw  n m  omp   ál  med eh  um   éch  on. ² Eb  g  é mó kunze âkaml   moosy    l, ábel néen ábe bad b  sy    l ábe eb  g  é mó along   áde déema  . ³ Along   áde déema  ’ ad  i néen b  b  í w  , mm  n aw   ed   Dy  b   á mb  l  , ne âb  i Yesu Kr  st  a  , aw   él  m  . ⁴ Mb  d  t   écho   eh  um   áwed á nk  js   amad áde r  m  d   ns  n r  m  e eb  g  é me. ⁵ Baoob-po   a-S  n  , b  d  d   éch  m eh  um   áwed, w  e   mm  n ed  i. Melemlem mé ed  ub   r  m  e m  n  w  ng   ne w  , nk  js   nd   ah  b   b  n m  bootad.

Yesue ak  nn  d   áb   bembap  

⁶ “Mbel   bad b   nk  js   ábe eb  g  é me b  b  í w  . B  b  d  e   áb  , w  mb   me b  , b  b  l  -’e ng  ne eh  b   w  e   b  bel. ⁷ B  b  í baoob b  n k  ch  é éche eb  g  é me, eb  d   áw  n. ⁸ Nl  ng   b   mam m  sy    l r  m  e l  l  ng   me w  e   n  l  a   b  , b  d  ub  p  -’e r  m  m   mam. B  b  í ne mb  l   b  n áw  n d  o m  b  d  , b  d  ub  p  -’e b  n w  -e   el  m   me. ⁹ Nk  nnad b  . Meek  nn  d  t   bad b   nk  js  . Boj nk  nnad bad ábe eb  g  é me, áyâle b  d  i áb  . ¹⁰ Bad b  sy    l ábe b  d   áb  m b  d  i áb  , áb  -’e b  sy    l b  d  i áb  m, b  b  d  t  -’e éch  m eh  um   áwed. ¹¹ Baoob-po  , mw  mpin mí p  nd   m  eb  á á nk  js  -te ámp  . Boj b  d  i b  d   á nk  js  -te. Nhyag áw  n. Tit  e aw   As  á, k  á b   á ng  ne e d  n ád  , d  n áde eb  g  é me. Ng  ne ech   eb  g  é me

* ^{16:23} Tit  e áb   ny   k  ch  é éch   ny  s  d  t   á d  n ád  m: do  ng   á k  lag áw  o   Nz   ny  s  d  t   Tit  e k  ch  é, áb   ny   ch   á d  n ád  m.

âbel nén béké mod nhóg, melemlem ngáne sóo-'e ámpē dédíí mod nhóg. ¹² Áde míbédé ne bó, menkéá bó á ngíne e dín ádōj, dín áde wêmbeé me.* Nkängé bó, bó mod ké nhóg-ke eebój' é étoméé mod awé êmmadté abé bán ăbőj âbel boj ébenled ngáne éténlédé á kálag e Dyób. ¹³ Bøob-poó, nhag áwój. Nhóbe-'e mímén mekan ngáne ndíí ndé á nköjsé âbel boj rímāb menyinje mélôn mbon, melemlem ngáne rímém-me mélóné mbon. ¹⁴ Nlángé bó mam mésyäel míme élángé me weé íláa bó. Bøob-poó bad bé nköjsé békóó bó áyäle béesaá bad bé nköjsé ámpē, melemlem ngáne me ámpē méesaá mod a nköjsé. ¹⁵ Meehóbéé meé éhûd bó á nköjsé-te, boj nhóbe' meé ékæ' bó âbel boj Mod e Ebébtéd eébél' bó mbéb. ¹⁶ Béesaá bad bé nköjsé melemlem nêngáne méesaá mod a nköjsé. ¹⁷ Benléd echoj mbále âbel boj böhél we abele. Échôn eyale édé mbále. ¹⁸ Nlómé bó á nköjsé-te melemlem nêngáne wémpē wénlômmé me á nköjsé-te. ¹⁹ Á etútú échâb membé echem yäl âbel boj bómpe béké échab yäl âbel boj békoy we abele.

Yesue akánnédé bad ábê beedúbé mó bésyäel

²⁰ "Meekánnádté ábêm bembapee bënpen boj nkânnad káéjne bad ábe bédúbpé me áyäle mam míme bégwogé áwâb. ²¹ Nkânné' meé bó moosyäel béké mod nhóg. A-Tê, bó moosyäel béké mod nhóg ne sóo, melemlem nêngáne édíí ne me, me-'e mbé ne we. Béké mod nhóg âbel nén nköjsé índúbe bán we-eé elómé me. ²² Ehúmé éche ébagé me, me-'e mbagé bó. Mbagé bó âbel boj béké mod nhóg melemlem nêngáne sóo dédíí mod nhóg. ²³ Ndé mod nhóg ne bó, we-'e edé mod nhóg ne me. Nén débél békoy mod nhóg abé. Békoy mod nhóg abé âbel boj nköjsé rimbíi bán we-eé elómé me, békí-'e bán edéá bó melemlem nêngáne édáá me. ²⁴ A-Tê, ebágé me bó, béké wéé ídíí, âbel boj bénýin echém ehúmé. Wembé me ehúmé áyäle wendäj me se á mbooted mé nköjsé. ²⁵ A-Tê, we-eé ebélé mam rímé mésáá. Nköjsé méebíj' we, boj mbií we, ábén-ne ámpé békí bán we-eé elómé me. ²⁶ Mbélé békíí we, mëbél-le ámpé âbel nén edənge échë édáá me ébë bó áte, me-'e ámpé míbë ne bó."

18

Békóbé Yesue

(Mat 26.47-56; Mak 14.43-50; Luk 22.47-53)

¹ Áde Yesue amáá akáne, bôobé ábë bembapee bênhidé, békhabé mwä edib a Kidron ámîn. Nzag embé áhed, bénsoj áwëd-te. ² Judase, ntûré awé Yesue ambíí ádë abwog á hõm, áyäle Yesue ne ábë bembapee bêmméntén aladen áhed. ³ Né-ó, Judase antómén echoj é sánze ne bembalede bé Ndáb-e-Dyób ábe beprise bémbará ne Befarisia bénlômmé, béké wéé Yesue ábédé. Ábë bad bênhchöd e'kag, bégwálé e'trúkaj ne bwém é' nzum. ⁴ Yesue ammäd mam mésyäel míme mëbenléd ne mó abíi, ké nê, ambídéd yäl áwed, ásëdëd bó aáken, "Nzé nyéhedeé?" ⁵ Bénkwéntén mó bán, "séhede Yesue, mod a dyad á Nazaret." Yesue ankwéntén bó aá, "Më-eé ndé mó." Judase ntûré awé Yesue ambé áhed ne ábë bad. ⁶ Áde Yesue áhóbé aá, "Më-eé ndé mó," bêntimén mbíd, békwa ásé. ⁷ Hé dôo Yesue ásëdteé bó ámpé aáken, "Nzé nyéhedeé?" Bénkwéntén bán, "Yesue a dyad á Nazaret." ⁸ Héé Yesue ákwéntanné bó aá, "Nlángé nyé meé, me-eé ndé mó. Né-ó, nzé nyéhede me, nyétëdë ábén bad ábe bédé ne me, békag." ⁹ Nén démbenléd áloned e'yale ábe ánhöbpé aá, "A-Sáj, átinté e bad ábe wêmbeé me, mëbódeé ké nhóg." ¹⁰ Simón Petro anwálé nkwáté. Héé ádólé rímé nkwáté boj átömté', ásëlë etúu é ekáá é mbáá é mbalede awé prise ambáámbáa. Ane mbalede abédé dín bán, Malkuse. ¹¹ Yesue anláá Petro aá, "Timéd nkwáté á abám. Nédë, meeténgeneé metuné míme echem Sáj átíinédé me akud-e?"

Békéené Yesue wéé Anasë

¹² Héé échë echoj é sánze ne awâb mod ambáá nchoo ne bembalede bë bad bë Israel békóbé Yesue böhaj mó. ¹³ Bénsebë mó akëen wéé Anasë. Anasë abédéé sáj-kélé awé

* 17:12 Menkëá bó á ngíne e dín áde wêmbeé me: dojge a kálag awóó á ngíne e dín ádon ménkáá bad ábë ébagé me.

Kaifase awě abédé prise ambáámbáa mímē mwě. ¹⁴ Kaifase ne, mó ambě bad bém̄báá bé Israél elébé aá ébóó bán mod nhóg áwē á nló mí bad bésyāāl.

Petro abáá Yesue á yěl

(Mat 26.69-70; Mak 14.66-68; Luk 22.55-57)

¹⁵ Simón Petro ne mbapēe ampée běhídé'áá Yesue. Prise ambáámbáa ambíí ane mbapēe, né-óó ane mbapēe ansól eyáde éche prise ambáámbáa wéé bénslénné Yesue. ¹⁶ Petro pen anlyäg á mmwé mé e'ké. Dóo ane mbapēe awě prise ambáámbáa ámbíí'é átímé ámbid á mmwé, ákálén ngondéré eché enoné'áá mmwé boj ásöltē Petro á eyadetē. ¹⁷ Ene ngondéré ansedéd Petro aáken "Kíné wémpē weésaá mbapēe nhóg awě ane mod-ε?" Petro ankwentén mó aá, "Aáy, meésaá." ¹⁸ Bəob-poó, ahéb démbē. Né-óó, bembalede ábe prise ambáámbáa ne bembalede bé Ndáb-e-Dyōb bēnkonéd muú bétymé áhed běwāle'. Petro mómpē ambé áhed, atyéém áwälé muú.

Prise ambáámbáa akáadte Yesue

(Mat 26.59-66; Mak 14.55-64; Luk 22.66-71)

¹⁹ Prise ambáámbáa esédté'áá Yesue tāngene ábē bembapēe ne ádē ayáge. ²⁰ Yesue ankwentén mó aá, "Mam mésyāāl míme nílánge'áá bad nhóbé'áá mó á nhéné. Ayáged ádêm ásyāāl-'ε, ábédé á Ndáb é mekáne ne á Ndáb-e-Dyōb wéé bad bé Israél bésyāāl běladneé. Meéhóbéé-'ε dyamdyam á kun-té. ²¹ Cheé-đ ésedteé me ámpē. Sédéd bad ábe bénwōg mam míme nílánge bó. Bébíí mam míme nhóbé." ²² Áde Yesue áhóbé nê, mbalede nhóg ambōm mó abén ahób aá, "Chán éhèle éhóbé' nê wéé prise ambáámbáa?" ²³ Yesue antimtén mó aá, "Nzé nhóbé dyam áde déetāngene, ehób dō moosyáél áwōg. Boj nzé édé bán nhóbé dyam áde átāngéné, cheé ékéá boj ébōmē me?" ²⁴ Dóo Anasé áhóbé aá, békéen Yesue wéé Kaifase, prise ambáámbáa. Yesue ambé abé á mehanj.

Petro abáá Yesue á yěl ámpē

(Mat 26.71-75; Mak 14.69-72; Luk 22.58-62)

²⁵ Bəob-poó, Simón Petro ambé atyéém áhed áwälé muú. Héé bad ábe bém̄bē áhed bésedteé mó bán, "Kíné wémpē weésaá mbapēe nhóg awě ane mod-ε?" Petro antáj aá, "Aáy, meésaá." ²⁶ Mbalede awě prise ambáámbáa nhóg, mwānyaj mó Petro ánsenlē etúu, anchágéd ehób ámīn, aláá Petro aá, "Kíné meenyíneé nyúmō á nzag-té-yé?" ²⁷ Petro antáj ámpē. Ábwōg-ábwōg, nchóm a kúb antój.

Payledé akáadte Yesue

(Mat 27.1-2, 11-14; Mak 15.1-5; Luk 23.1-5)

²⁸ Bad bé Israél běnidinéd Yesue á ndáb wéé Kaifase békéen mó á eyáde e nkamlené ambáá. Nén ábédé epog é mbwembwe. Běn bénkénsónlé á ndáb-te ábáj nén běenyínnád mbinde á'sō é' Dyōb * ábel bedyé Ngande e Nnyíme-ámīn. ²⁹ Né-óó, Payledé nkamlené ambáá a bad bé Roma, ambid e ebwōg áké atán bó, ásedté bó aáken, "Awusé áhéé nyéhóbé bán anén mod abelé?" ³⁰ Běnkwentén mó bán, "Nzé anén mod enkembé ebébtéd é mod, né séebageé mó áwōg mekáá." ³¹ Payledé anláá bó aá, "Nyé běn nyétéd mó, nyébenled mbéndé echén nyékáad mó." Héé bad bé Israél bělāngéé mó bán, "Séewoo'é kunze áwúu mod." ³² Nén děmbenléd álóned e'yale ábe Yesue ánhōbpē álúmed nyaa e kwééd eche áwēē. ³³ Payledé ansól á ndáb-te ámpē, áchāg Yesue, ásēdēd mó aá, "Wε-εé edé kāj e bad bé Israél-le?" ³⁴ Yesue ankwentén aá, "Mmōn-εé ehóbe nē ngé bad běmpēe bōo bělāngé we mam á yěl echém?" ³⁵ Payledé ankwentén aá, "Ndé mod a Israél-le? Ábōj bad ne beprise bém̄báá bōo běbágé we áwēm mekáá. Cheé ébélé?" ³⁶ Yesue ankwentén aá, "Mmēm nkamlen méesaá á nkōjsé wén. Nzé mímēm nkamlen mémbē á nkōjsé wén, né ábēm bembalede běwān, ábel nén bad běebagé me á mekáá mé bad bé Israél. Boj mímēm nkamlen méesaá mé nkōjsé." ³⁷ Dóo Payledé ásēdteé mó aá, "Nédē edé kāj-ε?"

* ^{18:28} Bad bé Israél běndūbē nén bán nzé mod asólé á ndáb e mod awě eésé mod a Israél, né awógté yěl mbinde. Ne bó, enén ndín e mod ebágáá mbinde á'sō é' Dyōb epun saámbé. Enén póndé esyáél eéhèle'aá-sé adyé Ngande e Nnyíme-ámīn.

Yesue ankwentén aá, “Wε-εé ehóbé wεé ndé kâj. Nzom eché ekéá boj béchyáá mε, m̄pε á nkōjsé wén, edii âbíd mbón e mbále. Mod kē ahéé awé adé mod a mbále awóglan mε.”

³⁸ Payledē ansedéd mó aá, “Cheé édē mbále?”

Bán Yesue atângéné awé

(Mat 27.15-31; Mak 15.6-20; Luk 23.13-25)

Áde Payledē amáá mó asedé nén, ambíd á ewwóng ámpē ake atán bad bé Israél, anláá bó aá, “Meekóbnée anén mod awusé ké ahóg áde mēhōbpē mée bewúu mó.” ³⁹ Boj nyêwóó elem nén bán, ntângéné nyé mod a mbwóng nhög abítded á póndé e Ngande e Nnyíme-ámīn. Nyédaé bán m̄bítded nyé kâj e bad bé Israél-le?” ⁴⁰ Bénkwentén mó ne e’ saád bán, “Aáy! Séehēdē mó. Bítdé sé Barabase.” (Barabase abédé-’e nchîb ambáá.)

19

¹ Dóo Payledē áhóbé aá béké békəm Yesue. ² Sánze énted ngen é mechă bélój ekóté éche émbē néé ekóté é kâj, béké mó chô á nló, béké-’e mó mengombe m̄me méyage’ á yĕl, mímé méwagné mengombe mé kâj. ³ Bésíté’áá mó benben, békébéké bán, “A kâj e bad bé Israél, edubé ebé ne wε.” Békómé’áá mó kâjne mebén. ⁴ Payledē ambíd á ewwóng ámpē, aláá ábéké bad aá, “Nyénōne”, mbítdaad nyé mó á ewwóng, ábel nén nyébíi bán, meekóbnée mó awusé ké ahóg.” ⁵ Né-oo, Yesue ambíd á ewwóng ne ekóté e mechă á nló, megombe mímé méyage’ mó-’e mēbéké mó á yĕl. Héé Payledē álângeé bó aá, “Nyénōne’ awedé modé nén!” ⁶ Áde beprise bémbará ne bembaledé bé Ndáb-e-Dyob bényíné mó, bémbooté abón bán, “Bomé mó á awəg! Bomé mó á awəg!” Payledē anláá bó aá, “Nyé bén nyétéd mó, nyébome mó á awəg, áyâle meekóbnée mó awusé ké ahóg.” ⁷ Ábéké bad bénimtén Payledē bán, “Sêwóó mbéndé eché ehóbé nén bán atângéné awé áyâle ahóbé aá módií Mwān a Dyob.”

⁸ Áde Payledē áwogé nén, mbwóng mēnnabé mó akób. ⁹ Antím ámbid á eyáde-tê ámpē, ásédéd Yesue aá, “Héé ebídé?” Boj Yesue enkénkadénné mó. ¹⁰ Né-oo, Payledē anláá mó aá, “Weéhēdē m̄e akwénten-ε? Weebíi’é nén wεé nwóó kunze áhóbé mée békene wε, nwónj-’e kunze áhóbé mée békome wε á awəg-ε?” ¹¹ Yesue ankwentén mó aá, “Weewóó’é kunze ké póg ámīn echém ésebán Dyob ábágé wε ene kunze. Né-oo, mod awé abagé m̄e áwōj mekáá abelé mbéb m̄me ítómtené achab ámīn.” ¹² Áde Payledē áwogé n̄e anhéd nzii áteede Yesue, boj ábéké bad békébéké e’saad bán, “Nzé etédté anén mod né weésaá nsón awé Kaisse. Kénzéé awé ahóbé aá, módií kâj né atângan Kaisse.”

¹³ Áde Payledē áwogé nén, ambidén Yesue á ewwóng, ádyéé atii dé nkamlēn. Ádék hōm wεé ândyeé’é békagé’áá dō bán, Eyáde éche bénabnédé Meláá. Á ehóbé Hibru békagé bán, Gabata. ¹⁴ Boob-poó, nén ábédé á epun é mbojsén é Ngande e Nnyíme-ámīn, dyam kēd. Payledē anláá ábéké bad bé Israél aá, “Echen kâj chô nén!” ¹⁵ Ábéké bad békébéké e’saad bán, “Wúú mó! Wúú mó! Bomé mó á awəg!” Héé Payledē ásédteé bó aá, “Mbome echēn kâj á awəg-ε?” Beprise bémbará bénkwentén mó bán, “Séewóó’é kâj empée étoméé Kaisse.” ¹⁶ Dóo Payledē ábágé Yesue áwab mekáá békome mó á awəg.

Békommé Yesue á awəg

(Mat 27.32-44; Mak 15.21-32; Luk 23.26-43)

Né-oo, bénhidnéd Yesue. ¹⁷ Yesue mwén ampém ádék awəg bootya á dyad-tê ákēén dō hōm áde békagé’é bán, “Hōm dé Ebónjél é Nló,” áde békagé’é á ehóbé Hibru bán Golgota. ¹⁸ Áhed-taá bémbará mó á awəg. Bémbará bad békébéké á awəg áhed, nhög ped póg, aniníí-’e ped eniníí, Yesue abé átinté.

¹⁹ Payledē antél á abámbe aá, “Yesue, mod a dyad á Nazaret, kâj e bad bé Israél,” abádék á awəg á nló-m̄n wεé Yesue. ²⁰ Wεé bémbará mó á awəg démbéké benben ne Jerusalem. Né-oo, bad hín bénlāj chōm éche bénitenlé. Chōm éche ántenlé, antel chō á ehóbé Hibru, átél é ehóbé Latin, ne é ehóbé Grikia. ²¹ Beprise bémbará bénlāā Payledē bán, “Wεé tél wεé ‘Kâj e bad bé Israél,’ tél wεé, ‘Anén mod ahóbé aá, m̄e-εé ndé kâj e bad bé Israél.’” ²² Payledē anláá bó aá, “Chōm éche átinté mmaá atel.”

²³ Áde sánze émáá Yesue abome á awəg, béntēd éche mbóté, békabté chó áte monge méniiin, bó mod té atéd akab ahóg. Béntēd káójne mbóté eche béhágkē áte. Ene mbóté bénkēmbaá'é chó hōmhōm. Embé bootyá ámīn âpe ásē enkēnwóngé mbom. ²⁴ Héé bélângéé nhóg ne anínií bán, “Syánē deésälē chó. Désid mbambú ânyín mod awě átēd chó.” Nén dêmbenléd âloned e'yale ábe é'ténlédé á Kálag e Dyōb nén bán,
“Bén ne bén bénkāb échém mbóté.
Bénsid-te mbambú ákab rímêm nsob.”

Né-óó, nê dóo échê sánze êmbenléd. ²⁵ Yesue nyaá, nyaá mwănyarj, Maria awě abédé Klopase mwaád ne Maria Magdalene béntyéem bénben ne á awəg áde Yesue. ²⁶ Áde Yesue ányiné nyaá ne mbapēe awě ádáé bétyéémé áhed, anláá nyaá aá, “Á-nyaá, mwǎn we ne.” ²⁷ Héé álângéé ane mbapēe mómpē aá, “Nyoó ne.” Bootya ene póndé ane mbapēe antéd Yesue nyaá, átimēn mó áwē ndáb.

Yesue awédé (Mat 27.45-56; Mak 15.33-41; Luk 23.44-49)

²⁸ Ámbid e nê, Yesue annyín aá mekan mésyāel mémáá. Âloned-te ngáne éténlédé á Kálag e Dyōb anhób aá “Píd ekóbé me.” ²⁹ Kúmbe embé áhed, ebéntéd é mím énlđg áwēd-te. Né-óó bénntodé kuchá á ebéntéd é mím-tê wē, bésom á ntónj n̄ ngen e hísob, béhē mó á nsəl. ³⁰ Áde Yesue ámwédé ebéntéd é mím ché, anhób aá, “Émáá.” Héé ámogé nló, awé-'e.

Bésóó Yesue akoj á aheb

³¹ Bōob-poó, échê epun ébédé Mbwe mé mbojsén mé mbwe-mé-nkóme-áte. Bad bé Israél-le béehede'aá bán ndim mbé mbé á awəg á mbwe-mé-nkóme-áte, tanje ngáne échê epun é nkóme áte étōmténné edubé abé. Né-óó bénntan Payledē bán, ábe bó kunze ábog bad ábe bébommé á awəg mekuu ne áhúd bó á awəg. ³² Né-óó, échê sánze ênké ébog mekuu ríme bad ábe bémbooméé bōobé Yesue á awəg. Bénsébē ríme nhóg abog, bébog-ke míme anínií. ³³ Boj áde bérpédé wéé Yesue bénntan née amáá awé. Né-óó, bénkéntogénné mó mekuu abog. ³⁴ Ké nê, sánze pög ensoj mó akoj á aheb. Ábwōg-ábwōg mekií ne mendib bémbo. ³⁵ Mod awě annyín née mmén mekan mēbénlédé, abídé mbój, eche mbój edé-'e mbále. Abíí nén aá, mókale' mbále, ahóbe-'e mmén mam ábel nén nyémpē nyédúbe. ³⁶ Mmén mam mēbénlédé âloned e'yale ábe é'ténlédé á Kálag e Dyōb nén bán, “Béebókgé ehid échê ké ehog.” ³⁷ Éténlédé á kálag e Dyōb ámpē nén bán, “Bénōn ane awě bésóó akoj.”

Bélímmé Yesue (Mat 27.57-61; Mak 15.42-47; Luk 23.50-56)

³⁸ Ámbid ené, Josebē awě ambíd á dyad á Arimatia, anláá Payledē aá, ábe mó kunze áted ndim ríme Yesue. Josebē abédéé mbapēe awě Yesue, boj énkembídédté yäl áwed áyále abáá' aá bad bé Israél. Payledē ambé mó kunze áted ndim ríme Yesue. Né-óó, anké Yesue ndim atéd. ³⁹ Nikodemuse awě ansébé Yesue ake dé anyín nkuu, bó Joseb bénké. Bédéké anwálé mekúle ríme bénabnadté ndim ríme bémbo. Mía ne Álos.* Ádē dyōg ábédé dyam móom mé kílo meláán ne kílo étáan. ⁴⁰ Béntēd ndim ríme Yesue, békāán mó mbóm ne ríme mekúle. Nén dóo elem é bad bé Israél ábojsen ndim émbē. ⁴¹ Bōob-poó, nzag embé wéé bénwūú' Yesue. Soj e ekóolé ebédé á nzag-tê wē, eché bénkempaa ndim ké nhög abane áte. ⁴² Né-óó, ngáne échê epun ebédé mbwe mé mbojsén mé mbwe-mé-nkóme áte, ene soj-'e ebé bénben, bémbaré Yesue ndim áwēd-te.

Yesue apuúdē (Mat 28.1-8; Mak 16.1-8; Luk 24.1-12)

¹ Á Sôndé, epog é mbwembwe, áde ehíntén émbē ábédé, Maria Magdalene anké á soj wéé bénliméé Yesue. Áde ápédé áhed, antán née bémbo aláá áde bénkōlenné nsəl n̄ soj.

* 19:39 Álos: Abédéé mekúle ríme bémbo. Anabned ndim.

² Héε átómé mehélé, boj ákε atán Simōn Petro ne mbapεe ampée awě búmer bérédé. Ane mbapεe abédéé mbapεe awě Yesue ándəngé. Dóo Maria álāngéé bó aá, “Béhúdē Sáŋgwéé ndim á soj-tê, séeblí-’áa wéé béránné mó.” ³ Dóo Petro bó ane mbapεe bérídté boj békág á soj. ⁴ Bó moosyəál bénýagté’áá, boj mbapεe anínií anyagté’áá tómaa Petro. Né-óó, ansébé ape á soj. ⁵ Anwúlén ásē ásad díd á soj-tê, anyín mbóm éche bénkaánné Yesue, boj enkénsónlé á soj-tê. ⁶ Simōne ahúé’áá mó ámbid, apedé’áá peén asól-lé á soj-tê. Antán mbóm éche bénkaánné Yesue áhed. ⁷ Antán-ne abad áde bénkaánné Yesue nló. Ádē abad déebédeé hórm ahóg ne mbóm, déndəen áte ped póg. ⁸ Héε anínií mbapεe awě ansébé ape á soj mómpē ásólé áwēd-te. Annyín ábē bwém, adúbé-’ε. ⁹ Ké nê, bénkénsójténné chóm éche éténlédé á Kálag e Dyōb nén bán Yesue atángéné apuu. ¹⁰ Ámbid é nê, ábē bembapεe bérntím ámbid á ndáb.

Yesue alúmté Maria Magdalene yél

(Mat 28.9-10; Mak 16.9-11)

¹¹ Bəob-pəo María anlyág á nsəl í soj, áchyeé’. Áde áchyeé’ nê dóo áwúnlé ásē, boj ásadé díd á soj-tê. ¹² Asad áde ásádē díd, annyín ángel ébe. Échē ángel énhē e’púpe é’ mbóté, édyéé wéé bénnaádté ndim ríme Yesue. Nhóg andyéé á ped e nló, anínií-’ε á ped e mekuu. ¹³ Échē ángel ênsedéd María bán, “Á-mmwaád, cheé échyeé?” Anláá bó aá, “Nchye’ áyäle bétédé ndim ríme awem Sáŋgwéé, meeblí-’áá wéé béránné mó.” ¹⁴ Áde ámáá ahób nê, ankunnéd, anyín néé mod átyéémé áhed. Ane mod abédéé Yesue boj enkémbíí’é áá Yesue mó adé. ¹⁵ Yesue asedéd mó aá, “Á-mmwaád, cheé échyeé? Nzéé éhedeé?” María anwémtén aá mod awě abele nsón á nzag-tê wéé mó adé. Né-óó, anláá mó aá, “A-sáj, nzé wé-éé etédé mó ndim, eláá me wéé ébánné, ábel boj nké ntéd mó.” ¹⁶ Héε Yesue áchägeé mó aá, “Á-Maria!” Dóo María ákúnné yél áwē boj áhóbé á ehób é Hibru aá, “Rabónil!” (awě adé nén bán, “Meléede”). ¹⁷ Yesue anláá mó aá, “Weésitán me, áyäle meétíméé ámbid wéé Titéé. Boj kág wéé ábém bembapεe, ábém baányaŋ, éláá bó wéé, ntíme’ ámbid wéé echem Sáj, awě adé káájne echēn Sáj. Mó adé Dyōb ádém, abé-’ε ádēn.” ¹⁸ Né-óó, María Magdalene anké, aláá bembapεe aá, mónyiné Sáŋgwéé. Anláá-’ε bó mam mésyäál ríme álángé mó.

Yesue alúmté ábē bembapεe yél

(Mat 28.16-20; Mak 16.14-18; Luk 24.36-49)

¹⁹ Échē epun é Sôndé chén, ngukél, bembapεe ábe Yesue bénladén áte á ndáb-te bérén-né ekob áyäle béráá’áá bad bé Israél. Yesue ampé, atyéém átíté echâb, aláá bó aá, “Nsaj mbé ne nyé.” ²⁰ Áde ámáá ahób nê, anlúmed bó rímmekáá, alúmed-te bó aheb. Bembapεe bérédé menyinge bwâmbwam ányín Sáŋgwéé. ²¹ Dóo Yesue álāngéé bó ámpé aá, “Nsaj mbé ne nyé. Ngáne Titéé álómé me, melemlem nê dóo mémpé rílómeé nyé.” ²² Áde ámáá ahób nê, anhébé bó perme, aláá-’ε bó aá, “Nyékob Edəádən éche Ésáá. ²³ Kénzéé awě nyélagséné mbéb, né ríme mbéb nkúdé alagsen. Kénzéé-’ε awě nyélagsénéé rímmé mbéb, né méekudeé alagsen.”

Yesue alúmté Təmase yél

²⁴ Təmase mbapεe nhógr átíté e bembapεe dyōm ne bébe ábe Yesue, awě bérchágé’áá bán Nhéd, enkémbáá ne baáb áde Yesue ápédé. ²⁵ Né-óó, áde ahúú baáb bénlāá mó bán, “Sényiné Sáŋgwéé.” Boj anláá bó aá, “Ésebán rínyiné mebaŋ ríme bérbboméé mó tōne á mekáá boj nísōm-mé e’mii á mebaŋ-tê áwed, rímbid-te ekáá áwē aheb, méedúbéé mbéb.”

²⁶ Ámbid e e’pun waam, bembapεe bénladén áte á ndáb-te ámpé. Təmase mómpē ambé áhed. Bémpén e’kob, boj Yesue ampé, atyéém átíté echâb. Anláá bó aá, “Nsaj mbé ne nyé.” ²⁷ Héε álāngéé Təmase aá, “Sōm e’mii á mebaŋ hén. Nənē’ me mekáá, éhyene-’ε ekáá, ébid me chó á aheb. Sog mod abé awě eedúbpé’, dúbé!” ²⁸ Təmase ankwentén mó aá, “A-Sáá awém, a-Dyōb ádém.” ²⁹ Yesue anláá mó aá, “Saá áyäle ényiné me dóo édúbpé-ye? Nnam ne bad ábe bérnyíne boj kéné, bérdube.”

Nzōm echē ekāé boj bétélé' enén kálag

³⁰ Yesue ambēl ekud é menyáké émpēe éche ábē bembapēe bémbeē ásē éche bételéé á kálag-tê wén. ³¹ Boj mímén mésyāél méténlédé ábel nén nyédúbe* bán, Yesue mó adé Ane-awé-Bewógté, Mwān a Dyōb. Nzé nyédúbpé-'e mó, né nyékudé alongé áde déemaá' á dín ádē.

21

Yesue alúmté ábē bembapēe yěl ámpē

¹ Ámbid e mímén mésyāél, anlúméd ábē bembapēe yěl ámpē á nkin mé edib é Tiberia. Nyaa echē ánlūmēdtē bó yěl ebédéé nén, ² epun ehóg Simōn Petro, Təmasē (awé béchágé'áá Nhéd), Nataniele (awé ambid á dyad á Kana á mbwógo e Galilia), bān ábe Zebedie, ne bembapēe ábe Yesue bémpeē bēbe, bēnladén hōm ahógo. ³ Héé Simōn Petro álānggeé bó aá, "Nkag súu akób." Béntimtén mó bán, "Sémpē séehid we." Né-óó, bēnhidé béké bésol á bōle-tê. Boj mímē nkuu n̄syāél bénkēnkóbpé chōmchōm.

⁴ Áde bīn é'bōótédé akéle, Yesue antyéém á nkin mé edib. Boj ábē bembapēe bénkēmbíi'é bán mó adé. ⁵ Dóo Yesue ásédtéé bó aá, "A-bēd, nyéekōbēē chōmchōm-e?" Bēnkwentén mó bán, "Aáy, séekōbēē." ⁶ Anláá bó aá, "Nyébwēm mbinzé á ped e ekáá é mbáá é bōle, nyéekōb." Né-óó, bēmbwēm mbinzé ene ped. Bénkēhenlé ene mbinzéadol áyāle súu émbē áwēd-te bwāmbwam. ⁷ Dóo mbapēe awé Yesue ándəngé áhōbeé aá, "Sángwéé mó adé!" Awog áde Simōn Petro áwogé bán, Sángwéé mó adé, anhé megombe á yěl (áyāle anhūd bwēm á yěl). Dóo áhēbē á edib-te. ⁸ Boj ábinií bembapēe bēmpē á nkin á bōle-tê, bēdolé mbinzé. Ene mbinzé enlón ne súu. Wéé bémbeennē bōle ápē á nkin dénkēnchapé, ábédé dyam mbwókel e méta póng. ⁹ Áde bēpédé á nkin bēntān muú mé mekāngled. Súu ébédé áwed ámin ne ewele. ¹⁰ Yesue anláá bó aá, "Nyéhyεene' donge á súu áde nyékobé bōob." ¹¹ Né-óó, Simōn Petro ansol á bōle-tê, ádol ene mbinzé á nkin. Súu émbáá énlón ene mbinzé áte. Ébédé mbwókel móom métáan ne éláán. Kénéeé échē súu êmbuú'é áte, ene mbinzé enkēnsaléé. ¹² Yesue anláá bó aá, "Nyéhyε nyédyé ndyéed." Ábē bembapēe bó modmod enkēnchu'é mó asedad aáken, "Nzé-módé édii?" Bémbii bán, Sángwéé mó adé. ¹³ Dóo Yesue átédé ewele boj ábagé bó. Ambēl melemlem ne súu. ¹⁴ Néen ábédé ngen echē élonténé éláán, echē Yesue álúmté ábē bembapēe yěl á pónré echē ámáá apuu.

Yesue asédté Petro ké adéá mó

¹⁵ Áde bémáá ndyéed adyé, Yesue asedad Simōn Petro aá, "A-Simōn, mwān a Jōn, edéá me tómaa ábén bembapēe-yé?" Simōne ankwentén aá, "Εε, a-Sáy, ebíi wéé ndéé wé." Yesue anláá mó aá, "Təgén ábēm bān bē ídyōj mí mbód." ¹⁶ Yesue anssadéed mó ngen éche élonténé ébe aá, "A-Simōn, mwān a Jōn, edéá me-yé?" Petro antimtén mó aá, "Εε, a-Sáy, ebíi wé ndéé wé." Yesue anláá mó aá, "Təgén mímēm ídyōj mí mbód." ¹⁷ Yesue asedad mó ngen échē élonténé éláán aá, "A-Simōn, Mwān é Jōn edéá me-yé?" Yěl enháo Petro áte áde Yesue ásédté mó ngen échē élonténé éláán aáken, "Edéá me-yé?" Né-óó, anláá Yesue aá, "A-Sáy, ebíi mam mésyāél. Ebíi wéé ndéé wé." Yesue anláá mó aá "Təgén mímēm ídyōj mí mbód. ¹⁸ Ne mbále, nlāngje we nén meé, áde ébédé etum, mmōn epúdér'áá abad, ékāg-ke kékéé wéé édáé. Boj áde wéchunné wēsād mekáá, mod ampée awáád we abad, ákēen-ne we wéé wéedəé'ake." ¹⁹ (Yesue anhōb nê álúmed nyaa e kwééd echē Petro áwēé, álúmed ehúmé é Dyōb.) Ámbid e nê dóo Yesue álānggeé mó aá, "Hídé me."

Yesue ne mbapēe awé ádáé

²⁰ Dóo Petro ánóné ámbid boj ányiné' néé mbapēe ampée áhídeé bó. Ane mbapēe abédéé mbapēe awé Yesue ándəngé. Móó andyéé Yesue á akéb á pónré éche bedyágé'áá ndyéed ngukél, boj ásēdēd Yesue aá ken, nzé-módé ásōm mó. ²¹ Anyín áde Petro ányiné'-áá mó, anhōb aá, "A-Sáy, chán-náa anén mod?" ²² Yesue ankwentén mó aá, "Nzé nhede meé ábē á alongé káájne pónré echē mépēé, chán nê ánóné we? Hídé me." ²³ Né-óó,

* 20:31 Nyédúbe; donge á Kálag dé e'só awóó nyéb̄e nyédúbe.

²⁴ Ane mbapēe mó abíde mbónj áyēl e mímén mekan, mó-'aá atelé mó ásē. Debíí-'e bán, kchéhéé echě áhóbé édé mbále.

Aság á kálag echě Jønæ

²⁵ Ekud é mam émpēe édé éche Yesue ábélé. Nzé bénhōb bán bétele' mésyāəl ásē, ahög ámbid e ádíníí, nwém̄tan mēé né nkōnsé mēekwogké échē kálag ahé áte.

Kálag e
Mbéltéd
írmme bembapæs bé nlómag
Ndibned í kálag

Mod awe atelé kálag e Lukasé mó atelé-'e kálag e Mbeltéd. Mekan míme enén kálag mékoo'é alúmed áte médíi âlása bad ngáne Edéadəj éche Ésáá énwōngēnnē bad ábe békido'áá Yesue ákal nkalaj mí bwám tēngene Yesue á Jerusalem, á mbwóg é Judeya ne Samaria ne á mesog mé nköjsé. Elúmte ngáne adúbe á bad bé Krísto ábédé áloned chōm éche bad bé Israél béndübëe. Enén kálag elúmte ngáne adúbe á bad bé Krísto ábóótédé á Jerusalem ámbid e mpume míme Krístəe ne ngáne ákíí mebwóg mémpée. Atón áde ádé etógnén áde enén kálag élúmteé ámpé ádii nsón míme Edéadəj éche Ésáá ébeléé. Émpé ne ngíne ámín e bad ábe bédúbpé á mbwe mí Pentekəs.

Nkabtéd í kálag

Âbonṣen bad ábe békale nkalanj mí bwâm 1.1-26

- a. Póle e asóg eche Yesue ne ábē Bembapēs 1.1-14
 b. Mod awě atédé Judasē échē etál nêngáne mbapēs 1.15-26

Nkalan míme Yesue nkálté á Jerusalem 2.1-8.3

Nkalan mme Yesue nkálté á Judeya ne á Samaria 8.4-12.25

Nsón míme Paale 13.1-28.31

Titéε Dyጀbe aá móጀlōm

Edə́dəŋ éche Ésáá

Yesuε apůmmé

(Mak 16,19-20; Luk 24,50-53)

⁶ Póndé póg bembapee bé nlómag bőöbe Yesue bénladén hőm ahóg. Héé bésedteé mó bánken, “A-Sáj, láá sé. Mmén mesú dőo wébenlé boj bad bé Israél bewój ngíne ámpē ákamlen echab yäl-e?” ⁷ Héé Yesue áitimtanné bó áá, “Titée mó abenlad eche ngíne áttíi póndé ne mekag ríme kékheé ébenlédté. Nyéewóó’ é kunze ábíi póndé eche rímmén mekan mébenlédté. ⁸ Boj áde Edéadəj éche Ésáá épí’ é nyé nyéeküd ngíne, hé-’ áá nyékanléé bad mekan ríme nyényíné tângene me á dyad á Jerusalem, á mbwág é Judeya, ne e Samaria ésyäel kááj nyépē á metóngé mé nköjsé mésyäel.” ⁹ Yesue amaá-’ áá bó aláa nê, dőo Dyöb ábelé boj ápumé ámín. Áde bédíi bénøneé mó nê, mbag énkütén mó, bénkennnyín-naá mó ámpē. ¹⁰ Bembapee bembé bétané míd áte bénøné’ ngáne Yesue ákagké ámín,

dő bad béké ábe békédé mbóté éche épúbe' békídé täléd, bétymé bó á nkag. ¹¹ Héé ábê bad béké bésedteé bó bánken "Á-bad bék Galilia, cheé nyétyémé hén, nyénøneé ámín? Anén Yesue awé Dyöb ábélé boj áhidé átinté echén, ápumé ámín, átím ámbid melemlem ngáne nyényiné akag ámín."

Matiase atédé etál éche Judase

¹² Héé bembapéé bé nlómag békíté á Ekone é Menzab, bétim ámbid á Jerusalem. Échê eke ébédé dyam eped é Máyl ehög. ¹³ Ade bésolé á dyad-té, bénké bésol á toj eche bédéyéé'áá áte. Ene toj ebédé á esón é ndáb éche édé ámín. Ábê bembapéé bé nlómag békédéé Petro, Jøne, Jemse ne Andreyo, Filibe ne Tømase, Batolomyo ne Matyo, Jemse, mwán awe Alføse ne Simøne awé anwón kán e aloj, ne Judase mwán awé Jemse. ¹⁴ Ábén bembapéé békogké'áá aladen áte hök ahog ákáne nchoo ne bebaád, Maria, Yesue nyaa, ne Yesue baányaj.

¹⁵ Mmê mesú mën, bad ábe béké döpawéé Yesue bénladén áte. Békédé dyam mbwókel ne móom mé bad mébe. Héé Petro átyémé ámín átinté echâb boj áhög aá, ¹⁶ "A-baányaj, mekan mme méténlédé á kálag e Dyöb météngéné alón. Edéadéj éche Ésáá énhög á'so é póndé á nsol mme Dabide tångene Judase awé antómén bad ábe bénké Yesue akób. ¹⁷ Judase abédé nhog átinté e syáné. Yesue ampwéé mó ábel mímén nsón melemlem nengáne ámpwédté syáné. ¹⁸ (Mñé mme ánkudté áyale ebébté áche ámbeenlé, anchanén mó etúú. Á etúú-te wé dën-naá ánsongé díú, awé'-e, abum ákán mó, mmii mbid-te mó áwed. ¹⁹ Bad bésyääl á Jerusalem bénwög ádén akan, né-óó bêncħag ádē hök áwab ehob-te bán Akeldama, nedé, 'Ndøab e mekií') " ²⁰ Petro ambád ahob aá, "Nén ábénlédé ngáne éténlédé a kálag e ngæse é Dyöb nén bán,

'Ade hök átim e'bwögén

modmod eeloo' áhed.'

Eténlédé'-e nén bán,

'Mod ampée átéd eche etál é nsón.'

²¹ "Né-óó, éhedne' nén bán dépwéé mod nhog. Ane mod atángéné abé mod awé abágáá ne syáné póndé esyäál eche eché Sáj Yesue ne syáné dékágé'áá mebwög ne mebwög, ²² bootyaa á póndé eché Jøne ádúsánnáá bad ápe á póndé eché Dyöb démbeenlé boj Yesue ápumé. Mómpé atángéné abé mod awé ambé mbój áde Yesue ámpuu'é."

²³ Hé dő bad béké, Josebe awé békántánnáá bán Basabase (békágé'áá mómpé bán Justuse) bó Matiase. ²⁴ Dő békánnéé bán, "A-Sáj ebíí mod asyäál nlém áte. Lúmed sé mod awé épwédté átinté e ábén bad béké, ²⁵ átéd etál née mod a nlómag, éche Judase átédte boj mwén átimé' éche eped éche ébonnéde mó." ²⁶ Né-óó, bënsid mbambú álumed bó mod awé békawédté. Dő mbambú élumté bó ápwéé Matiase. Né-óó, bëmbád Matiase á mesongé mé bembapéé bé nlómag ábíníí dyom ne nhog.

2

Epe éche Edéadéj éche Ésáá

¹ Áde ngande e Pentekos épédé, bad ábe béké döpawéé Krístæ bésyääl bénladén áte hök ahog. * ² Ábwög-ábwög esaád émbid ámín. Ébédé née ekukud é ngine éche étome'. Échê esaád énlön ene ndáb esyäál áte eché ábê bad ábe béké döpawéé békágé'áá áte. ³ Hé dő békánnéé bwém nengáne muú mímé nwagné née e'chém ntyémé mod-téé á nló-mín.

⁴ Edéadéj éche Ésáá êmpíí bó moosyäál, mod-téé ábootéd mehob mé bad béké döpawéé ahob mímé béké döpawéé ayage. Edéadéj chóo élyégté'áá bó áhob kékéé éche békágé'áá.

⁵ Enén póndé bad béké Israel ábe békánnáá Dyöb béké döpawéé á Jerusalem. Ábén bad béké döpawéé ne mebwög á nkörjsé. ⁶ Awog áde béké döpawéé échén esaád, ndun e mod erladén áte wéé ábê bad ábe béké döpawéé béké döpawéé. Yél enkám bó áte bwambwam áyale ngáne bad

* ^{2:1} Nzé móom mé e'pun métáan métom ámbid e ngande e Nnyime-ámín dő enén ngande ébágáá. Échê epun chóo bad béké Israel békágé'áá ngande e mpad mí bwém.

ábe bédúbpé békibé'áá ábínií bad bó mod-téé ácheme' échē ehób. ⁷ Ne nkômten í yael áte, bênsedéd bán, "Kíné saá á mbwóg e Galilia ábén bad bésyāél békibé'-ye? ⁸ Chán-nō ébénlédé boj syáá mod-té áwōgē" ngáne békibéé éche ehób. ⁹ Átinté e syánē, baahóg békibéé á meloŋ mé Patia, Média ne Elam; meloŋ mé Mesopotemia, Judeya ne Kapadosia; meloŋ mé Ponto ne mé Esia, ¹⁰ meloŋ mé Frigia ne Pamfilia, aloŋ á Egipto ne mebwóg mé aloŋ á Libia, berben ne Sirine syánē bad behóg debídé á dyad á Roma. ¹¹ Átinté e ábén bad bésyāél donge achyáádté ne bad bé Israel, ábínií-'e bad ábe béesé bad bé Israel ábe békibé' adúbe á bad bé Israel. Syánē bad behóg debídé á aloŋ á Kret ne á aloŋ dé Arebia boj kéné, syánē mod téé awóge ngáne békibéé áwe ehób-te ndèle é mekan éche Dyöb ábelé." ¹² Yael enkóm bó áte bényág-ke bwâmbwam, bésedté nhóg ne anínií bánken, "Chán néen ádií-yé?" ¹³ Kéné, donge á bad békibé'áá bad ábe bédúbpé, békibé bán bémáá mím amwé.

Póle eche Petro

¹⁴ Héé Petro átyéémé ámín átinté e ábínií bembapee bé nlómag dyôm ne nhóg, áchógté ehób, áláñgē ndun e mod eché embé áhed aá, "A-baányaŋ bé Israel ne nyé baásyāél ábe nyédyee á Jerusalém, nyélâm metúu nílaa nyé ngáne néen ádií. ¹⁵ Ábén bad bémwédeé mím ngáne nyéwémtanné. Bín é'díi baoŋ ngəŋ abog é mbwembwé ngén. ¹⁶ Boj néen ábénlédé ntíined ne e'yale ábe nkál é edéádəŋ Joel ánhóbpé aá,

¹⁷ Dyöb áhópé néen aá,

'Á e'pun bé asog,
mélom échém Edéádəŋ éche Ésáá épī moosyāél.

Ábén bän bë bebaád ne bë baachóm békibé mam mímé mélomléd á'sō é póndé.

Échén kódébad ényiné ndóg éche éhúú ne me,
ábén bechun bë bad-te bénangé nlo.

¹⁸ Nê dén-eé mélomléd.

Mélom échém Edéádəŋ mímé mesú, épií ké ábém bembalede, bebaád ne baachóm, boj békibé mam mímé níhúú ne me, mímé mélomléd á'sō é' póndé.

¹⁹ Méluméd menyáké ádyob

nlúmed-te e'chemlé á nkörjsé.

Mekií mésyøgé, muú níchoden, mwéntud-te mibide'.

²⁰ Etondeé ákwé ehíntén,
ngən-ne éyəg néé mekií.

Mmén mekan mélomléd epun embáá é ehúmé é Sáŋgú édêhób bán épag.

²¹ Ene póndé kenzéé awé akwénténé aá Yesue adé mó Sáŋgwéé ákünd e'soóson.' "

²² Petro ambád ámpé aá, "Á-bad bë Israel, nyélâm metúu nyéwôglén chóm éche níhedeé ahób. Dyöb dêmbeł Yesue mod a Nazaret ábel ndèle é mekan mé menyáké ne e'chemlé álúmed nyé néen aá mó mwéñ-neé móloñmē mó. Nyébén nyébíí nê bwâm áyæle néen átinté echén dôo nê dêmomlédé. ²³ Dyöb dêmmad abíi, ámád-te atíi néen aá nyéñwūñ Yesue abe áde nyémbe mó á mekáá mé bad bë ekøyí, boj békibé- 'e mó á awəg. ²⁴ Boj kéné, Dyöb dêmpuúd mó, ahúd mó á metuné mé kwéed, áyæle kwéed eéhæle'aá-se éhæj mó. ²⁵ Dabidé anhób tângene mó aá,

'Nnyíné'áá Sáŋgwéé áwém á'sō-te póndé ésyāél.

Adé mé á ekáá émbáá, né-oó, meétágéé áte.

²⁶ Nê ábélé nlóné ne menyinge

nkale-'e pólé ne menyinge mésyāél.

Echem yael-le ámpé éwälé e'lyág bë nlém abé áde nídií á alongé.

²⁷ Áyæle wéemwaá-se edéádəŋ échém émañanéd á mbwóg e kwéed, wéemwaá-'e wë ndim mímé awöŋ mbalede mibao á soŋ-té.

²⁸ Elúmté me menzii mímé mpeene' alongé, abé áde wébëé-'e me á akéb mëbë menyinge.'

²⁹ Petro ambád ámpē aá, “A-baányaŋ, nlâŋge nyé ne aláa děn nén mēé Dabide awesyánē sáá ambáá, anwé. Bénlímē mó, eché soŋ edé-’e hén kéáŋne chii. ³⁰ Dabide abédéé nkal é’děadəŋ, ambíi-’e chōm éche Dyōb dénhōbpē aá móōbe mó. Dyōb démmwē melé nén aá móōtēd mwān á mbyaa ímme Dabide móbel mó kēŋ melellem nêŋgáne Dabide ámbēē kâŋ. ³¹ Dabide ammăd anyín á’sō é’ pónđé, dyam áde Dyōb débenlé, né-oo, anhōb mam tâŋgēne mpuu ímme Ane-awé-Bewógté. Anhōb aá, ‘Dyōb dénkêmmwaá aá ámaaned á mbwóg e kwéed, ndim ménkêmbōo-aá mó á soŋ-té.’

³² Ane Yesue mó-’aá Dyōb ápúúdté, sé moosyáél sédé-’e mbón bán apuúdé. ³³ Dyōb ábágé mó atíi dé edúbé áwe ekaá embáá. Abagé-’e mó Eděadəŋ éche Ésáá éche ánhōbpē aá móōbē mó. Yesue mó-’e ábagé sé échē Eděadəŋ, chó-’aá ékéá boŋ nyényiné’, nyéwōgē-’e kékéé échē ébenlad chii. ³⁴ Debíi nén bán Dabide enkêmpuméé, boŋ kéné anhōb aá, ‘Sáŋ Dyōbē anláá awem Sáŋgwéé aá, Dyéé áwém ekaá embáá,

³⁵ kááŋne á pónđé echē mébenlé boŋ ékogtéd ábōŋ bad bé ekoyí ámīn ne mekuu.’ ”

³⁶ Petro ambád ahōb aá, “Né-oo, nyé bad bé Israél bésyáél nyékoŋ abíi nén bán anén Yesue awé nyébómmé á awōg mwěn-naá Dyōb démbenlé ábē Sáŋgwéé mó-’aá adé Ane-awé-Bewógté.”

³⁷ Awōg áde ábē bad bewógé pôle eche Petro, entagéd bó á mewémítēn-tê bwâmbwam. Héé bésedteé Petro ne abínií bembapēs bé nlómag bánken, “A-baányaŋ, cheé-oo sétáŋgéné abel?”

³⁸ Petro antimén bó aá, “Nyémod-téé nyétimen Dyōb, nyéteede alongé dé mbéb boŋ nyékud edusen á dín áde Yesu Krístəø, ábel nén Dyōb álagsen nyé mbéb Dyōb débě-’e nyé echē nde, Eděadəŋ éche Ésáá. ³⁹ Nyébíi nén bán chōm eche Dyōb áhōbē aá móōbē nyé édīi áyāl echēn ne áben bān ébě-’e ké áyāl e bad ábe bédé nchabnede. Édé ne moosyáél awé Sáŋgwéé áded Dyōb, áchénlé ábē ne mó.”

⁴⁰ Petro anléb bó, aláá-’e bó mekan mémpēe híin. Ansím bó etúu áte ahōb aá, “Mod-téé ásoŋ ádē alongé, ésebé nē, né Dyōb dékōgsen nyé melellem ngáne ákōgsennē enén nyongel e ebébted.” ⁴¹ Bad híin bénđubē dyam áde Petro ánhōbpē bédusén-ne bó. Mmē mbwe mesongé mé bad ímme mémbād ámīn e bad ábe bénđubē, mébédé dyam e’kálé é’láán. ⁴² Bémbané nlém áyáge mekan ímme bembapēs bé nlómag býágté’áá bó, béké-’e nlatén ne bad ábe bédúbpé Krístəø. Bóobóo békanné’, bedyág-ké ndyéed hōm ahóg.

Nlatén mí bad ábe bédúbpé

⁴³ Bembapēs bé nlómag békágé’áá menyáké, bélūmté-’e e’chemléd híin. Kéñzéé awé annyín antágé nsəl áte. ⁴⁴ Bad bésyáél ábe bénđubē Yesue bémbe békene’ nlatén á’sō. Chōm-té-’e éche mod ánwōŋgē ébédé é moosyáél. ⁴⁵ Bésomáá-’áá bwěm, békāb ne mod-té ngáne ántōgnennē. ⁴⁶ Béyágé’áá aladen hōm ahóg epun-té á Ndáb-e-Dyōb ákáne. Bédyágé’áá ndyéed hōm ahóg áwāb mendáb ne nlém nhóg ne menyinje mésyáél. ⁴⁷ Békéné’áá Dyōb, bad bésyáél bewóón-ne bó nlém mí bwám. Epun-té-’e Dyōb ábádáá bad ábe békúdé e’soosoŋ ámīn e mesongé mé bad ábe bédúbpé.

3

Petro achöjté mod awé awéde eped

¹ Mbwe nhóg Petro bó Jøn békágé’áá á Ndáb-e-Dyōb. Nén ábédé á ngéŋ éláán é müte, pónđé echē bad békágé’áá aké á mekáne. ² Mod nhóg mó-’e ambé á mmwe mé eyáde é Ndáb-e-Dyōb. Béchágé’áá mmē mmwe bán, Mmwé mímme Mbóó. Ane mod anwé eped se áde békágé’áá mó. Epun-té békágé’áá mó, békáné mó á mmwe hē, áchōmē mōné wéé bad ábe békágé’áá á Ndáb-e-Dyōb. ³ Anyín áde ányíné Petro bó Jøn bésóle’ á Ndáb-e-Dyōb-te, anchóm bó nde. ⁴ Dóo bénōneé mó chōoŋ, boŋ Petro áhōbē aá, “Nōnē’ sé!” ⁵ Héé ane mod ánóné bó ne mewémítēn nén aá móōkúd chōm áwāb. ⁶ Dóo Petro áhōbeé aá, “Meewoo’é mōné ké nhóg boŋ chōm éche níwóó chóo mébeé we. Á dín áde Yesu Krístəø a Nazaret,

hidé ásē, ékag!” ⁷ Dóo Petro ácháŋgé ane mod ekáá émbáá, boj áwōŋgān mó âtyéem ámīn. Ábwōg-ábwōg mekuu ne mekóge mímē ane mod ménwēned. ⁸ Anhēb, atyéém ámīn, ábootéd-te ake. Ansól á Ndáb-e-Dyōb ne Petro bō Jōn, ákag, áhebé’ ámīn, ábagé-’e Dyōb mekenag. ⁹ Bad bésyāel ábe békédé áhed bényīn néé ákagké ákēmtē-’e Dyōb. ¹⁰ Bênchem mó bán mó abédé mod awě adyee’áá á Mmwē míme Mbóó n̄ Ndáb-e-Dyōb áchōmē bwēm. Yél enkóm bō áte, béké-’e menyáké ne dyam áde ábénlédé ne mó.

*Póle eche Petro áhóbé
á Ndáb-e-Dyōb*

¹¹ Yél enkóm bad bésyāel áte ábe békédé á Ndáb-e-Dyōb. Né-óó bênnýagéd béké bétán Petro bō Jōn á abebpé á Ndáb-e-Dyōb áde békágé’áá bán Abepé áde Solomone. Ene póndé ane mod awě Petro bō Jōn bênchoódté, ambé áhídé bō. ¹² Áde Petro ányíné ábē bad, anláá bō aá, “A-bánned bē Israel, cheé ékáá boj néen ákēmtē’ nyé yél áte? Chán-nō nyénōneé sé nē? Nyéwémtan néen bán éched ngíne chén, ké’e asáá ádě sésáá á’sō é’ Dyōb dóo ákéá boj sébel anén mod ábootéd ake-yé? ¹³ Dyōb áde Abraham, Aisige ne Jakobé békénlēé, nédē Dyōb ádě ábēd betaa, álúmté ehúmé éche awe mbalede Yesue. Nyémbé mó á mekáá mé benkamlene, nyébáj-’e mó áyāl á’sō wéé Payledé. Ké áde Payledé ánwémtenné mó atede, nyémbé nyébáj mó áyāl. ¹⁴ Abédé mod awě asáá, abé-’e ane awě abele mekan míme métáŋgéné, boj nyémbáj mó áyāl. Nyéntim nyéchāā’ Payledé bán áchenned nyé mod awě awúe’ bad. ¹⁵ Né-óó nyéenkən bewúú mod awě apiinad bad alongé á mbále, boj Dyōb dēmpuúd mó. Sébén sényínné mímē mekan díd. ¹⁶ Anén mod awě nyényíneé néen, awě nyébíí-’e bwām, ngíne eché dín áde Yesue áwóó ne adúbe áde áwóó ne adúbe áde áwánlé áyāle ádē dín, dóo ábágé anén mod awě anwé eped ngíne, ádíd-te mó bwām. Nyé běn nyényíne-’e.

¹⁷ “Baoob-pao, a-baányar mbíí néen meé, kékéhéé éche nyáábe áben belyáged nyémbenlé Yesue, nyémbé chó áyāle nyéenkémbíí’ chōm éche nyébeléé. ¹⁸ Kénéé ébénlédé-’áá nē, Dyōb děn dóo álonté ábē e’yle se’ boód áde anláa’é bekal bē’dádər̄ bésyāel aá békhab bán Ane-awě-Bewógté ákūd metake. ¹⁹ Né-óó, nyétede áden abé dé mbéb, nyétimen Dyōb ábel boj ábóded nyé mbéb. ²⁰ Nzé nyébelé nē, né póndé épé eché Sáŋgwéé áhóódté nyé nlém. Ene póndé-’áá álomēē nyé Ane-awě-Bewógté, nédē Yesue, awě ápwédté nyé. ²¹ Yesue atáŋgéné asébe dé adyee adyōb kááj póndé épé eché Dyōb déhəŋlénne mekan mésyāel boj métim ekáólé. Nén dóo Dyōb dékénlē se’ boód aá bekal bē’dádər̄ ábe bésáá békáa bad. ²² Mosee mwén anhób aá, ‘Sáŋgwéé awě adé áden Dyōb ápwédté nyé nkal é’dádər̄ átinté e ábēn bad melemlem néé me. Nyébel chōm ésyāel éche áláŋgé nyé aá nyébel. ²³ Kénezéé awě eewógne ane nkal é’dádər̄, Dyōb déhūd mó átinté e bad béké Dyōb abódéd-te mó.’ ²⁴ Bekal béké dákédər̄ ábíníí ámpē bootya Samwélé ne ábe béképé ámbid eché, bó moosyáel bénwälē nlébtéd, békhab-pe mekan míme mébenléd mímén mesú. ²⁵ Dyam áde Dyōb déhōbpé mbwiined ne bekal béké dákédər̄ ábédéé áyāl echén, nyémpé nyéwóó-’e akab áyāle melé míme Dyōb démmwéé ne ábēn betaa. Dyōb dénlāā Abraham aá, ‘Ménaméd moonyoŋ asyáel á nkönsé mbwiined ne mímón nchyáátén.’ ²⁶ Né-óó, Dyōb dēmpwéd awě mbalede. Áde ápwédté mó, áwēn dóo ánsébēé mó alóm ánamed nyé abel áde ábenlé boj nyétedé mímén mbeltéd mé mbéb.”

4

Kóte ekáádté Petro bō Jōn

¹ Petro bō Jōn békánlé’áá bad mekan, dóo nguse é beprise ne mod ambáá a plûse a Ndáb-e-Dyōb, ne nguse e Besadusia békédé wéé békabéé. ² Bénljy áyāle ábē bembapee béké nlómag béké békágé’áá bad bán Yesue apuúdē, éche élumte néen bán bad ábe békédé béké á alongé ámpē. ³ Bénkob Petro bō Jōne béké bó á mbwōg. Ngáne bín békémadté ahín, békabé áhed kááj ne mbwémbwe. ⁴ Kénéé bénkobpé Petro bō Jōne, ndun e mod eche enwógnam míme békánlé’áá bó, endúbe. Mesongé mé bad ábe béképé ménchágē mépē dyam e’kélé é’ bad é’taan.

⁵ Née bín é'sájgé, benkamlene bé Israël, bad bémبáá bé dyad ne bemeléede bé mbéndé bénladén áte á Jerusalem. ⁶ Anase awě abédé prise ambáámbáa ambé áhed, ne Kaifase, Jóne, Alesandaa ne bad bémpeé ábe bédé á túmbé echě Prise Ambáámbáa. ⁷ Béntii Petro bó Jóne áwab e'só-te, boj bésedté gó bánken "Chán nyémwédé anén mod awě anwé eped bwám adid? Ngíne ne dín áde nzéé nyébénlédé?" ⁸ Héé Edéadəj éche Ésáá épíídé Petro, élón-ne mó áte. Dóo áhóbéé aá, "Á-benkamlene ne bad bémبáá bé dyad, ⁹ nyéchagé sé hén chii ákáad sé áyāle mboj míme sébénlé anén mod awě anwé eped ne ngáne ámwédé bwám adyee. ¹⁰ Nyé bad bé Israël nyébíi-óó nén bán anén mod awě atyéémé nyé á'só-te adyee bwám á ngíne e dín áde Yesu Krístəø, mod a Nazaret. Nyémbomé mó á awəg boj Dyōb démpuúd mó. ¹¹ Mó adé ane awě éténlédé á kálag e Dyōb áyəl echē nén bán, 'Aláá áde belónj bé ndáb bénchenéé dōo átímé aláá dé etógnén.'

¹² “E’soósoŋ béesaá ne mod ampée éetóméé Yesue, áyāle dín démpēe déesaá á nkōŋsé-te wén áde Dyöb ábágé moonyon áde átāngéné syánē asoŋ.”

¹³ Bôobj-pôó, yael enkóm bad bé kóte áte ânyín nén bán Petro bô Jone bêhóbé ésebán mbwág ké nhóg ndé bô áte. Bénsöntén-ne nén bán bédíi bad bé ngén ábe bœyágké kálag embáá. Dôo bêchémé nén bán bôó bêbágé'áá póndé ésyääl ne Yesue. ¹⁴ Boj ngáne bénnyinné née mod awé Petro bô Jone bêncchoódté átyéémé áhed ne bô, dyam dénkembongé bô ahób. ¹⁵ Né-ôó, bénlää bô bán bêbîd á ndáb e kóte. Bébídé-'áá bô, bën ne bën bêbootéd akal, ¹⁶ bésedté bánken, "Chán débenlé ábén bad? Moosyääl á Jerusalem abií aá bôó bêbélé enén ndale e menyáké. Deéhélëë-se dehób bán bêebelé. ¹⁷ Boj detângéné ábén bad etúu asim áte nén bán bésôg bad akale tângene Yesue, ábel boj ímmén nkalaj mEEKANLÁD se nkag á'sô." ¹⁸ Dôo bêchénlé bô ámbid ámpê boj bésimé bô etúu áte bán bêehedéé awóó ámpê mbêd née bêhóbseé k'e bœyágteé á dñi áde Yesue. ¹⁹ Boj Petro bô Jón bêntimtén bô bán, "Nyé bën nyéhôb chôm-éé étângéné á'sô é' Dyob. Âwógen nyé káa âwógen Dyob? ²⁰ Áyâle sé pen seéhélëë-se sédib nsäl bán sEEkanlé mam íme sé bën sényinné dïd sêwogén-ne etúu." ²¹ Bad bê kóte bênlýäg bésim bô etúu áte ngíne ngíne. Ámbid enê bêchené bô, áyâle bénkênyinné nzii eché bêhèle békógsén bô áyâle bad bésyääl békemté'áá Dyob tângene dyam áde ábénléde. ²² Mod awé menyáké mêmbeñnlédté áyâl boj ádyéë bwâm antóm móom mé mwë méniin.

*Bad ábe bédúbpé békânné bán
Dyöb ábe bó e'wéd bé nlém*

²³ Áde bad bé kóte bétédté Petro bó Jønæ, bénkě echoŋ é bad bé Kr̄sto atán, béláá bó mam m̄mme beprise bém̄báá ne bad bém̄báá bé kóte béláŋgé bó. ²⁴ Áde ábē bad bé Kr̄sto bém̄wogé n̄e, bénlād nsəl âkáne. Bénlāā Dyōb bán, “Titéε, we awé ehágé nkøj mí míñ ne n̄ sé, edíb é nkwé ne bwém é’syääl ábe é’dé bó áte, ²⁵ wenlóm Edəádəŋ éche Ésáá wéε echēd sáj ambáá Dabide, awôŋ mbølede wéé ébel áhôb ábén e’yle néñ aá, ‘Cheé ékáá bon bad ábe bées̄ bad bé Israel bélie’ bwâmbwam? Cheé ékáá-’ e bon bad bëbelé e’haké ngën?

26 Kêj é nkörjsé élade yěl,
benkamlene-’e ámpē békóbe mbom
âtángén Sán Dyōbę ne Ane-awě-Áwágté.’

²⁷ Ébénlédé nê dën. Hérôde bó Pontus Paylede bénkōb mbom á dyad-tê hén ne bad ábe béesé bad bé Israel ne belyáged bé bad bé Israel. Bêmbel nê âhäge Yesue awôn mbælede awě Asáá awě Éwógté. ²⁸ Bénkōb mbom âbel mam ímme mmön wêmmadté atíi ne echoj ngíne á'so é' póndé mébenléd. ²⁹ A-Sáñ, baob-pao, mmön énon akím áde békimeé, ébe sé ábôn bembælede nlém ákal échôn eyale ésebán sêwóge mbwóg. ³⁰ Lúmed echoj ngíne édide bad bwâm. Ébel-le séhel e'chemléd ne menyáké abel á dín áde Yesue, awôn mbælede awě asáá." ³¹ Bémáá-'áá akáne, hõm áde bênladénné áte ánaejned. Bó moosyáél bénlön ne Edéádən éche Ésáá bébootéd-te eyale é Dyöb akal ésebán mbwóg índé bó áte.

Bad ábe bédúbpé békéle mekan néé mod nhóg

³² Bad bésyāēl ábe bédúbpé bénwōŋ nlém nhóg ne mewémten mehóg. Modmod eehóbe'aá aá móā mówōō échén ké'e échínií boŋ bwěm é'syāēl bémbē bó ntéd. ³³ Bembapēs bé nlómag bémbē békalé' ne ngíne esyāēl nén bán bédé mbój nén bán Dyöb ápúúdté Sáŋgú Yesue. Dyöb-pe démbād bó nsimé abe ámin e nsimé. ³⁴ Modmod eetóge'aá chōm átintē echâb. Póndé ne póndé té bad ábě bénwōŋ e'túú ké'e ndáb bésomé' áá chó, běpēen ímmē mɔnē, ³⁵ běbē bembapēs bé nlómag, bó'-e bétédé' áá békāb ne mod-téé ngáne ántōgnēnnē. ³⁶ Nê dōo Josebē, mod a túmbé e Levi awě běchyáá á alon á Sayprus âmbenlé. Bembapēs bé nlómag běchágé' áá mó bán Banabase, (nédē mod awě awéde bad nlém á abum.) ³⁷ Ansóm etúú, atéd ímmē mɔnē, ábe wée bembapēs bé nlómag.

5

Ananiasε ne Safiraa

¹ Mod nhógb abédé bán Ananiase, mwaád-te bán Safiraa. Bómpē bénsōm doŋge á bwěm ádāb. ² Boŋ ankoó doŋge á mɔnɛ ámbid, mwaád-te ámpē ambíi. Ananiase ampeéén mɔnɛ mímme ménlyág ásē wéé bembapee bé nlómag. ³ Héé Petro álāŋgeé mó nén aá, “Á-Ananias, cheé ékáá boŋ ehé Satane etál wéé ásøl we á nlém-tê. Bøob-poó, abelé we ekānlé Edəédaŋj éche Ésáá metóm akoo áde ékóngé eped é mɔnɛ mímme ésómné bwěm. ⁴ Edêhób wé mósōme’ etúú ébédéé échoŋ, áde émáá-’e chó asóm ámpē, mɔnɛ mímmed mibédéé mímøy. Cheé ékáá boŋ etíi áwôŋ nlém-tê wéé móbel enén ndín e akan? Saké moonyoŋ ékánlé metóm boŋ Dyöb dão ékánlé metóm!” ⁵ Awóǵ áde Ananiase áwóǵé nén, anhún ásē, awé-’e. Mbwóǵ n̄ ngíne ménkōb bad bésyə́él ábe bénwōg ádén dyam. ⁶ Kódébad êmpé áhed, bétéd mó ndim, békaj mó béké bélime.

⁷ Dyam háwa éláán ámbid enê, Ananiase mwaád ampé, enkembíí’é pen dyam áde ábénlédé. ⁸ Petro ansedéd mó aá, “Láá me, məné nsyāél mén mme nyékúdá áyāl e etúú éche nyé awoŋ nchóm nyénsommé-yé?” Safiraa ankwentén mó aá, “Ee, nsyāél mē.” ⁹ Dóo Petro álāŋgeé mó aá, “Cheé ékáá boŋ nyékagé” Edədəŋj éche Sáŋgwéé? Nənē’, bad ábe bélímmé awoŋ nchóm bōb bédé á mmwe níníí, bétéd-te wémpé ndim hē bōb.” ¹⁰ Ábwōg-ábwōg ane mmwaád anhún ásē á’sō-te wéé Petro, awé-’e. Échê kódébad énsōl á ndáb-te bényín bán amaaá awé. Dóo bélidné mó ndim á ebwōg béke bélímé á nkəg n̄ soŋ wéé nchóm. ¹¹ Mbwōg n̄ ngíne ménkōb mwembé nsyāél ne bad bésyāél ábe bénwōg ádén dyam.

Bad bé nlómaq béké menyáké hín

Béhédé bembapεε bé nlómag á mbwɔg

Ene póndé-’áá prisē ambáámbáa ne échē echoj é bad, bénchēlē mbom mí mbwógi mme ménläd belyáged bé Israél bésyāāl. Á mbom hē dōo bólómé nlébtéd á mbwog nén bán békéen bembapee bé nlómag áwāb. ²² Boj áde sánze épédé á ndáb e mbwog, bénkéntánné bembapee bé nlómag áwēd-te. Né-oó bêntím ámbid, béké béláá ábē bad á mbom bán, ²³ “Sépedé á ndáb e mbwog, sétáné ngáne békéen chó hōm ásyāāl. Bad ábe bénone’ mbwog-ke bó moosyāál bédé wéé mod-té ánoneé mmwe mé e’ké. Boj ádě sédibpé ekob, sétáné mod kék nhág áwēd-te.” ²⁴ Áde mod ambáá a plüse é ndáb e Dyöb ne beprisē bémbabáa bewogé nê, bényāg, bánken “Chán nén ádíí?” ²⁵ Hé dōo mod nhág ápédé áhed boj áláñgē bó aá, “Nyébíí nén bán bad ábe nyénhéé á mbwog, bédé á Ndáb-e-Dyöb béké-’bad.” ²⁶ Dóo mod ambáá a plüse é Ndáb-e-Dyöb ábídé ne ábē bad, boj béké békobé’ bembapee bé nlómag, békéené’ bó. Boj pen bénkéntánné bó ewange áyāle békobé’ béké-’bad.

²⁷ Bénsəlēn bó á ndáb-te, bétíi bó á'sō é' mbwóg. Hê dôo prise ambáámbáa ábóótédé bó akáad, áláñgé bó nén aá, ²⁸ "Sênsím nyé etúu áte nén bán nyéékeené" ayége áde anén mod á'sō ámpē. Boob-poó, Nyénøne' chööm-éé nyébélé. Nyébélé moosyøél á Jerusaleem awogé ádén ayége. Nyéhede'-e kwéed eché abán áwed nló." ²⁹ Héé Petro ne ábíníi bembapee bé nlómag bétimtanné bó bán "Dyöb dôo sétáñgéné awógen, saké baányon. ³⁰ Áde nyémáá Yesue abome á awøg, nyéwúú-'e mó, Dyöb áde ábëd betaa, dëmpuúd mó. ³¹ Dyöb dénchäged mó, ábäné-'e mó á ekáá é mbáá néé Nlyágéd ne Nsoode. Ambél nê ábel boøj álúmed bad bé Israël nzii eche bëchenéé ádab abé dé mbéb boøj Dyöb álagsén bó. ³² Sébën sényínné mímén mekan dïd. Edéadøj éche Ésáá chómpé ébíde' mbón. Chó'-aá édé nde eché Dyöb ábageé bad ábe bëwógne mó."

Elébé eche Gamalielε

³³ Ade mbwóág eche endyéé ásē éwógé nê, bénliŋ bwâmbwam káéŋ béhedé-'e bán bewúu bembapee bé nlómag. ³⁴ Boŋ mod a mbwóág nhóǵ áttinté echâb, awé békchágé'áá bán Gamaliel antyééém ámin. Anén mod abédéé Farisia, abé-'e meléede a mbéndé awé bad bésyääl békbagé'áá edúbé bwâmbwam. Anhób aá bésébe békbidén ábê bembapee bé nlómag á ebwóg. ³⁵ Dóo álângeé bad bé mbwóág aá, "A-baányaŋ bé Israél, nyétéd póndé ne chom-éé nyéhedeé ábén bad abel. ³⁶ Éechâbëé áte áde mod awé békchágé'áá bán Tiodasë ábídáá dúu, ákumé' ekáá á tâl aá módë mod. Bad ábe bénhíd mó ámbid békbedé dyam mbwókel éniin. Boŋ kááj ne á asog bénwüū mó, ábê bad-te békpaŋtéd áte, échê epepé chô-'e ébóo. ³⁷ Ámbid e póndé, mod awe békchágé'áá bán Judase mod a Galilia mómpé ámbid á póndé e tóngé. Ambéł ndun e mod enhíd mómpé boŋ káájne á asog bénwüū mó, ábê bad-te békpaŋtéd áte. ³⁸ Boob-póo, áyäle ádén dyam, nlânge nyé nén meé nyétede ábén bad békag, nyéebéł bó dyam. Áyäle nzé édé nén bán mímén ntíi ké'ε ádén dyam áhúú ne moonyoŋ, né dën dékwé. ³⁹ Boŋ nzé édé bán áhúú ne Dyöb, né nyéehenlé bó dyam abel, né káájne á asog nyéenýin bán Dyöb dóo nyétaŋganné."

Bad bé mbwóg bénkōb elébé éche Gamaliel⁴⁰ Héé béchénlé bembapéé bé nlómag bán bésôl á ndáb. Bénkūdē bó, bésím-me bó etúu áte bán béehedeé awóg ámpē néé bétúbeé dín áde Yesue. Dóo bétédté bó bán békag.⁴¹ Bembapéé bé nlómag bénysaá á'so é' mbwóg. Bémbé menyinge ânyín nén Dyöb ânyíné aá békwoñnéde ákud akwáké á dín áde Yesue.⁴² Epun ne epun-té békágé'áá á ndáb e Dyöb ne á ndáb é bad, býägté bad, békale-'é nkalaŋ ímē Yesue, Ane-awé-Béwógté.

Mwembé mépwédé bad saámbé âwóngén

¹ Baob-poó, ngáne mesongé mé bad ábe bédúbpé méchágké'áá acháge ne acháge, nswanjten mémbid átinté e bad bé Israel ábe békápbé'áá ehób é Grikia ne ábe békápbé'áá ehób é dyad. Bad ábe békápbé'áá ehób é Grikia békápbé'áá bán ábab bekúd békudéé akab á məné áde békápbáá bekúd epun-téé. ² Héé bembapee bé nlómag dyôm ne béké béladéé bad ábe bédúbpé bésyāél áte boŋ bélāngé bó bán, “Eeboo’é néń bán sétede akal

dé eyale é Dyöb âbel boj séhíde nkabté dím mənē ámbid. ³ Né-ó, a-baányaŋ nyépwed bad saámbé átítê echén, ábe béwóó edúbé, ábe Edəádəŋ éche Ésáá élyágtéé, békíi-'e akan, âbel nén sébane rítmén ntíi áwab mekáá. ⁴ Ene póndé séebé echéd yéł esyəál âkáne ne âkal nkalaŋ m̄ bwâm.” ⁵ Moosyəál anwóó menyinje ne dyam áde bembapéé bé nlómag bénhōbpé. Né-ó, bêmpwéđ Stefanuse. Abédéé mod awé andúbé bwâmbwam. Edəádəŋ éche Ésáá-'e élyágté mó. Bêmpwéđ káéjne Filibe, Prokorose, Nikanɔɔ, Timɔne, Pamensasé ne Nikolause. Nikolause abédéé mod awé ambíd á dyad á Antyɔg, eebédeé mod a Israel boj antimén adúbe á bad bé Israel. ⁶ Bêmpwéđ ábén bad á'sō wée bembapéé bé nlómag. Bembapéé bé nlómag bénkānnéd bó békán-ne bó mekáá á nló. ⁷ Né-ó, eyale e Dyöb émbé ékanlád mbwóó áte esyəál ékág á'sō. Mesongé mé bad ábe béndubé á Jerusalem méchágké'áá acháge ne acháge. Ekud é beprise chómpé êmbooté díkalaŋ m̄ bwâm ahíd.

Békóbé Stefanuse

⁸ Bœb-pɔ́ó Stefanuse abédé-eé mod awé ádē alongé álúmté'áá nsimé n̄ Dyöb bwâmbwam. Awóó ngíne âbel ndale é mekan é menyáké átítê e bad. ⁹ Boj baahóó bêmpwéđ mó apeniten. Ábē bad békédé bad ábe bémibid á echoj é bad éche êmméntén ake á ndáb e mekáne eche békágé'áá bán ndáb e mekáne e betâj ábe bénkembé betâj ámpé. Ábē bad békédé bad bé Israel ábe bémibid á myad mé Sirine ne Alessandria. Bóobé bad bé Israel bêmpwéđ ábe bémibid á mbwóó e Silisia ne e Esia, bêmpwéđ aswanjté ne Stefanuse. ¹⁰ Boj Edəádəŋ éche Ésáá émbé mó nyaa e debyéé eche nzé anhób dyam, béehéle'aá dó apele. ¹¹ Né-ó bénsoł baahóó áte bán békágé'áá nén bán “Sêwogé néé Stefanuse ásyə́é Mosee, ásyə́é-'e Dyöb.” ¹² Né-áá bêmpwéđ boj békón bad bé dyad, békón bad bémibáá bé dyad ne bemeléede bé mbéndé. Héé békóbé Stefanuse boj békéené mó á'sō é' bad bé mbwóó. ¹³ Hé-'áá békéené bad ábíd mó mbój é metóm. Ábē bad bénhōb nén bán, “Anén mod ahóbe' mekan mé mbéb póndé ésyə́é tângene Ndáb-e-Dyöb eché esáá ne tângene mbéndé eche Dyöb ábágé syáné. ¹⁴ Sêwogé néé áhóbeé aá ane Yesue, mod a Nazaret, ápâj Ndáb-e-Dyöb áhəjlén-ne e'lem ábe Mosee ályágnédé syáné.” ¹⁵ Bad bésyə́é ábē békédé á ndáb e mbom bénsum m̄d wée Stefanuse. Bénnyin néé e'só é' peneé mó née e'só é' ángel.

7

Stefanuse aběnlédé myangó m̄ bad bé Israel âkáá

¹ Prise ambáámbáa ansedé Stefanuse aáken, “Mmén mekan mésyə́é m̄me ábén bad békágé'áá wé ayə́l, médé mbále-yé?” ² Doo Stefanuse ábótéđé bad bé káánsel pôle akale. Anhób aá, “A-baányaŋ ne besáá ábém, nyélám metúu. Dyöb dé ehúmé démpíi echéd sáj Abrahame áde ábédé á mbwóó e Mesopotemia, adéhób aá m̄kag adyee á dyad á Haran. ³ Dyöb dénláá mó aá ‘Tédé echoj túmbé, éteđe-'e ádōj aloj ékág á ndoob eche mélumédté wé.’ ⁴ Né-ó, Abrahame antedé ndoob e Kaldeya áhye ádyé á dyad á Haran. Ámbid e kwééd eche Abrahame sáá, Dyöb démbél Abrahame áke ádyé á ndoob eche nyédií áhed nén bōob. ⁵ Ene póndé Dyöb dénkembaá Abrahame ké abén á ndoob eche ándáásenné mó. Boj pen Dyöb dênhób nén aá ene ndoob esuunéd bó m̄me mbyaa. Póndé eche Dyöb dénláá-'e Abrahame n̄, eenkénwáléé mwán kí nhóó. ⁶ Dyöb dénláá mó nén aá, ‘Mmôj mbyaa mēbē beken á aloj á bad bêmpwéđ. Áwed-taá békéené betâj, béküd-te metuné etûn é póndé éche édē dyam mbwókel é mwé éniin. ⁷ Boj m̄kōgsen ádē aloj á bad áde békéenléé née betâj. Ámbid en̄, m̄môj mbyaa mēbē á aloj-tê wé, bétim áyə́l e ádén abwóó á hōm, békānné á dñ ádém áhed.’ ⁸ Héé Dyöb ábélé boj Abrahame ápē á nchemten ne mó tângene ngáne békágé'áá bad, n̄engáne e'chemléđ békéené békéené wé. ⁹ Né-ó, Abrahame an'yág awe mwán Aisige ámbid e e'pun saámbé áde békéené mó. Aisige mó-'e an'yág awe mwán Jakobé, Jakobé mó-'e áyág ábe bän dyom ne békéené békéené békéené betaa.

⁹ “Ábē betaa bénwōon mwányan nhóó, Josebé kónjí á nlém-tê. Né-ó, bénsoł mó n̄engáne ntâj. Bad ábe bénsołm̄ mó áwāb, békéené mó á aloj á Egipto. Boj Dyöb

démbē mó ámbid, ¹⁰ ábēl-le atóm metake mésyāél áte. Dyōb démbél Farao kēj e Egipto anwógen Josebē menyinje ábē-'e Josebē debyéé, áde ápédé áwe á'sō. Nén démbél Farao ambē Josebē atii á ngómenaa ámīn e alorj ne ámīn e ábē bwěm é'syāél. ¹¹ Ámbid enē, nzaa e ngíne empě á alorj á Egipto ne á alorj á Kanahan. Ene nzaa empesén metake mé ngíne, ábēd betaa bénkēnwón'-áa ndyéed eche bedyágkē. ¹² Né-óó, áde Jakobē áwogé bán ndyéed edé á Egipto, anlóm ábe bān áwed. Nédē ábēd betaa. Né dōo ábédé bó ngen e'só ákē áwed. ¹³ Áde bān ábe Jakobē békíí á Egipto ngen éche élonténé ébe, Josebē ampalé yěl áte wéé baányaŋ. Hē dōo Farao ásónténé tāŋgene túmbé echē Josebē. ¹⁴ Né-óó, Josebē anlyógtén baányaŋ aá béláa sáá Jakobē, áhyag ne eche túmbé esyāél á Egipto. Bó moosyāél békédé móom mé mod saámbé ne bétáan. ¹⁵ Dōo Jakobē bó moosyāél békíí á Egipto. Áwed-taá mó ne ábe bān, betaa ábe syánē bēndyeé' e kááj běwé-'e. ¹⁶ Ámbid e nē, bēntēd bó ndim bésüen ámbid á dyad á Shekem, bélímé mó áwed á ndoob echē Abrahamē áchanénné mōné wéé bān bé túmbé e Hamo.

¹⁷ “Áde póndé ékwogé ape echē Dyōb délonédé dyam áde ánlāá' e Abrahamē aá móbbel, mesongé níme ábēd bad ábe békédé á Egipto mémmañ acháge bwâmbwam. ¹⁸ Káájne á asog, kēj empée echē enkembíí myangó níme Josebē, empě á nkamlen. ¹⁹ Anwónj akwâb tāŋgene ábēd betaa átagté-'e bó. Ankāj bétédé ábab bān áebwog, ábel boj běwé. ²⁰ Mmē mesú dōo běchyáá Mosee. Abédées mwān awé ambōj bwâmbwam. Béntogén mó á ndáb wéé sáá á etún é ngon éláán. ²¹ Ámbid enē dōo bétédé mó áebwog-te. Héé mwān a mmwaád awé Farao ádibté mó, átēdē mó ngáne awé mwān, átogné-'e mó kááj ákwogé'. ²² Bén'yāgēd Mosee debyéé á bad bē Egipto ásyāél kááj abé ndale e mod á nhóbtéd ne á mbeltéd.

²³ “Áde Mosee ápédé móom mé mwě méniin, mewémten mēmpií mó ákē dényin baányaŋ bē Israel. ²⁴ Antán ngáne mod a Egipto átagtéé mwānyaŋ nhóg. Dōo ákíí áhed átimten. Anwóngén mó áwúé-'e ane mod a Egipto. ²⁵ Mosee anwémítén aá ábē bad békhem nén bán Dyōb áhede mó abenled áhúd bó á mekáá mé bad bē Egipto, boj bénkennýnné nē. ²⁶ Epun éche ébádténé, antán ábē bad bē Israel béké běn ne běn běwane'. Anhēd nzii eche áyálēé bó ákóm nsanj. Dōo álāngéé bó aá, ‘Eesaá mbále bān baányaŋ bó nyédií-yę? Chán-nō nyé mod-té áhedeé waáb alógen?’ ²⁷ Boj ane mod awé ahedé'áá waáb alógen nē, antínéd Mosee á nkag ásédté mó aáken, ‘Nzé-módé abagé kunze aá ekamlan ne ákáad sé?’ ²⁸ Ehede mémpē awúú ngáne éwúú mod a Egipto chán-ę?’ ²⁹ Awog áde Mosee áwogé nē, ansōb ákē á mbwog e bad bē Midian. Áwed-taá ádyéé kááj boj áchyāá ábe bān béké běachóm béké.

³⁰ “Ámbid e móom mé mwě méniin dōo ángel épíidé Mosee á ehyáng. Empií mó a muú-te, mímé ménkōbēn mwā bwel. Nén ábédé bēnben ne mbōod e Sinai. ³¹ Áde Mosee ányiné ádén akan, menyáké ménkōb mó. Ansídé bēnben aá mótoŋ anon bwám, dōo áwogé ehōb éche Sāŋgwéé nén aá, ³² ‘Méé ndé Dyōb áde ábōj betaa, Dyōb áde Abrahamē, Aisige ne Jakobē békénlé'áá.’ Ne mbwog ní ngíne Mosee enkēnchu' e anon áhed. ³³ Héé Sāŋgwéé álāngéé mó aá ‘Húd metámbé á mekuu áyale abwog á hōm áde étyéémé nén ádíí hōm áde ásáá. ³⁴ Nnyiné ngáne ábēm bad ábe béké á alorj á Egipto békudeé metake bwâmbwam. Nwogé ngáne běwennadté dōo nhýédé bó awōngén. Bōob-pōo hyág, mělōm we á Egipto.’ ³⁵ Anén Mosee móo bad bē Israel békéngé á yěl boj bésédté mó bánen, ‘Nzé-módé abagé we kunze ákamlan ne ákáad sé?’ Mó-'aá Dyōb dénlōmmé ákamlan ne áson ábē bad. Nén démbenléd áde ángel empií' e mó áde bwel bénkōbpē muú. ³⁶ Mosee awed móo ambídén bad bē Israel á Egipto. Ambél ne e'chemléd áwed ne á Eyáke é edib é nkwé. Ambél-le menyáké ne e'chemléd áde békédé á ehyáng á etún é móom mé mwě méniin. ³⁷ Anén Mosee móo anláá bad bē Israel aá, ‘Dyōb délōmē nyé nkal é'déadən awé ábēd átinté echēn melemlem nēngáne álómé me.’ ³⁸ Melemlem mé Mosee móobédé nlatén ne ábēd bad á ehyáng. Abédé áwed ne ábēd betaa áde ángel eche Dyōb dénlōmenné nlébtéd á Mbōod e Sinai énhōbpē áwāb. Mmén nlébtéd níme Mosee ánkudté wéé ángel móo syánē dédíí déhídeé.

³⁹ “Ábēd betaa bénkēnwogénné Mosee, boj bémbarj mó á yel, bétimé bewemtān átim ámbid á Egipto. ⁴⁰ Áde Mosee ályágé adé á mbəod e Sinai dōo bad bé Israél bélāngéé mwānyan Arōne bán, ‘Bélé sé bwém ábe bēbē nēngáne myōb ábe belyōgēd sé áyāle séebí’é dyam áde ábénlédé ne Mosee awé ambídé sé á Egipto.’ ⁴¹ Héé bēbélé chōm éche éwagné mwān a nyag boj bēbootéd e’lém awúu ábe chō mende. Bēmbel káájne ngande, áwog menyinge ne chōm éche bēbēnlé mmab mekáá. ⁴² Dōo Dyōb ákunnédé bō mbid boj áchenné bō ákannéd ngumé éche édé ámīn. Ébénlédé ngáne éténlédé á kálag e bekal bē dəadəj nén bán,

‘Á-bad bé Israél, áde nyémbēé á ehyángé á etún é móom mé mwé ménin saké meé nyékwénlé’áá káa nyétúmmé’áá e’lém ábe mende. ⁴³ Ténde eché dyōb áde bēchagéé bán Molek móo nyémpēmmé.

Ediídinge-’é éche tintine a dyōb áde bēchagéé bán Refan chōō nyéhyómnáá.

Mmén myōb móo nyébēnlé mekáá boj nyébwōgkē mebóbón.

Né-oo, mēbēn nyé, nlóm nyé hōm áde áchábnédé tómaa aloj á Babilon.’ ”

⁴⁴ Stefanuse ambé abád ámpē áá, “Áde ábēd betaa bēbédé á ehyángé bénwōj Ebem é Dyōb éché élümte nén bán Dyōb áde ne bō. Bénlōj chō nyaa eché Dyōb dénlāá’é Mosee aá álōj chō. Nsáaned míme Dyōb délümēdtē Mosee móo ánhidtē. ⁴⁵ Ámbid e pónédé ábēd betaa bēnkōb ene ténde á mekáá míme ábab besáá. Bénwälé chō áyāl áde bōobé Josua békóbné meloj ndəob eché Dyōb dénnanéé bō bad áte. Ene ténde embé ebé áhed káájne á pónédé eché Dabide. ⁴⁶ Nsimé ní Dyōb íhídé’áá Dabide. Né-oo, anchán Dyōb aá ábe mó kunze móloō Dyōb áde Jakobé ábénlé’áá ndáb. ⁴⁷ Boj Solomone, Dabide mwān, móo antím Dyōb ene ndáb aloo. ⁴⁸ Boj kéné Dyōb á Ngum eédyéé’é á ndáb eché baányon bélōjné mekáá. Édé nén ngáne nkal é’dəadəj nhog ahóbé áá Dyōb áhóbé aá,

⁴⁹ ‘Nkoj mímin móo ndé ádém atii dé nkamlēn, nkörjsé-’é rimbé wéé ríbannéé mekuu.

Nyaa e ndáb ehéé nyéhelle-sé nyéllóo me?

Ké’ héé mēkōmméé áte?

⁵⁰ Mmén meémaa’é ábén bwém abel-’é?’ ”

⁵¹ Stefanuse ambád ahób aá, “Nyéddí bad ábe bēwúu nló áte. Nyéelé nlém á abum. Nyékólé metúu áyāl e eyale é Dyōb. Nyéddí melemlem nēngáne ábēn betaa, nyétāngan Edəadəj éche Ésáá. ⁵² Nkal é’dəadəj ké nhog alyágé áse awé enkēnkūd metake á mekáá míme ábēn betaa-ye? Bénwūu mésénzé mé Dyōb mésyəáel míme se’ bōod mēmbēl ehángé áyāl e epé éche Ane awé abele mekan míme métāngéné. Nyé-’é bōob nyésmé mó, nyéwúu-’é mó. ⁵³ Nyé bēn-naá nyékudé mbéndé éche Dyōb álómé mbwiined ne éche ángel borj kéné nyéehídeé chō.”

Bélumé Stefanuse meláá

⁵⁴ Áde bad bē mbwogé bēwogé mekan míme Stefanuse áhóbé, bēnljig bwāmbwam kááj yel ésogé bō áte. ⁵⁵ Stefanuse-’é Edəadəj éche Ésáá énlōn mó áte. Néé ánóné ámīn ányiné’ ehúmé é Dyōb, ányiné’ Yesue ngáne átyéémé Dyōb á ekáá émbáá. ⁵⁶ Dōo áhóbéé aá, “Nyénōne’, nnyíne’ néé dyōb ánédnédé, Mwān-a-Moonyoŋ átyéémé Dyōb é ekáá émbáá.” ⁵⁷ Héé bad bē mbwogé bēhédé esaád é ngíne békutén-ne metúu ne mekáá boj bō moosyəáel bēbōnlād mó. ⁵⁸ Bēndol mó bésyəjnéd mó á dyad-té, bēbootéd mó meláá alúm. Bad ábe bēntyéém mbój ákōgsen Stefanuse bénhūd mmab nkob áyāl béké bēbānē á’sō-te wéé kódmod póg bán Sōjolé ánōne bō. * ⁵⁹ Áde bélumé Stefanuse meláá nê, ankáné aá, “A-Sáñgú Yesu, mmōj kōb échém edəadəj.” ⁶⁰ Dōo ábwogé mebóbón boj ákānté ehób ámīn aá, “A-Sáñ, lagsén bō mímén mbéb míme bēbeléé.” Amaá-aá ahób nê, awé-’é.

8

¹ Sōjolé abédé ásē ákwentén-ne aá bēwúu Stefanuse.

* ^{7:58} Átinté e bad bē Israél émbé nén bán ábe bēbídé mbój bán mod abelé awusé bōō bēbágé’áá bad bēsó álúm mó meláá.

Metuné mébélé Ebese épántédé áte

Filibé akalé nkalaŋ mí bwâm á Samaria

⁴ Bad ábe bédúbpé bémpájntéd áte, békag békálé nkalaŋ mí bwâm. ⁵ Filibe mó anké á dyad ambáá á mbwóg e Samaria ákanlé bad tâŋgène Ane-awé-Bewógté. ⁶ Áde ndun e mod éwogé mam míme Filibe áhóbeé bényín-ne e'chemléd bé menyáké ábe ábélé, bêntöŋ metíu atále áte áwóg dyam áde áhóbeé. ⁷ Filibe ambéł e'daádəŋ bé mbéb é'syéŋgé'áá ekud é bad áte ne e'saad é' ngíne, ekud é bad-te ábe yěl énwëë eped ne ábe bésyágté'áá bêndyeé bwâm. ⁸ Nén dêmbéł bad bésyáəl á dyad-tê wê bewóg menyinge bwâmbwam.

⁹ Baōb-paō, mod nhó̄g abédē ádē dyad áte bá̄n Simōne, akumé'áá ngaj eche ekómté'áá bad bé Samaria yael áte bwâmbwam. Akumé'áá ekáá á tâl áá modmod eépedē mó. ¹⁰ Bad bésyâ̄l á dyad, ndelē é bad ne bekwékwé bé bad bêmbané nlém áwé̄, bêhôbê-é bá̄n, "Anén mod adfi ngumé e Dyob eché bêchâgeé bá̄n, Ngum embáá." ¹¹ Bêmbané nlém áwé̄ áyâle á etûn é póndē ankȫj bad yael akómed áte ne eché ngaj eché ákumé'áá. ¹² Boj áde bédubpé nkalāj míme Filibe ânkáléé bó tângene nkalāj mí bwâm mé nkamlen hí Dyob ne tângene Yesu Krîstǣ, bênkûd edusen, bebaád ne baachóm. ¹³ Simône mwën ámpé andúbé, ákûd-te edusen. Ambooté̄d Filibe ahid kékéé áde ákágé'áá. Yael enkóm mó áte áde ányiné mbelté̄d mmé menyáké míme Filibe ábélé'áá.

²⁵ Áde Petro bó Jœn bémáá mam mésyəäl ahób tângene Yesue, bémād-te nkalanj míme Sângwéé akal, bêntím ámbid á Jerusalem. Á nzii á esú békálé’áá nkalanj mí bwâm míme Yesue á myad mé mbwóğ e Samaria híin.

Filibé bó mod ealonj dé Etoopia

²⁶ Mmíníí mbwe ángel e Sáŋgú enláá Filibe aá, “Ladé yäl, ékag á ped e mbəŋ wéé nzii eché ebíde á Jerusaleм âke á Gaza étómeé” Béebenládté enén nzii ámpē. ²⁷ Filibe aboňséné-’aá ákág-ke. Héé ábomné soŋ e mod á nzii ngáne ásúé’é awē alon. Anén mod abédéé ndəle e mod awé akamlánnáá, ánoné-’é ngáb eche Kandese, mmwaád awe akamlánnáá alon dé Etoopia. Ane mod anké á Jerusaleм. ²⁸ Á ehúu ámbid échê, andyéé á ebambam. Ngáne ákágé’áá, áláá’áá kálag eché nkal é’dəádəŋ Yesayaa. ²⁹ Héé Edəádəŋ éche Ésáá éláŋgeé Filibe aá, “Kág á ebambam hê, ébê chó bənben.” ³⁰ Filibe annyəgéd áhed, dōo áwóhé ngáne ane mod áláá’é kálag e nkal é’dəádəŋ Yesayaa. Dōo ásədteé

mó aáken “Esôntan chôm éche éláa’é-yε?” ³¹ Ane mod antimén mó aá “Chán mémweé asônten áde mod éetânledeé me áte?” Né-ɔ́o, anchélé Filibe aá ácháge á ebambam, bómō bédyyéé áhed. ³² Eped éche ane mod ákoo’áá aláy ébédée nén, “Abédée nêngáne ídyoŋ mí mbód míme békagké awúu, ambé-’e ngáne mwán a ídyoŋ mí mbód awě béseléé nyoŋ boŋ eéchyéé”, enkênhóbpé dyamdyam.

³³ “Bênsudéd mó edúbé, békobéen-ne mó kunze. Nzé-módé átūb míme nchyáátén dín áde édíi bán bénhūd mó ámín á nköŋsé.”

³⁴ Ane mod ansedéd Filibe aáken, “Nzé-módé ane nkál é’déadəŋ áhóbéé, eche yél chéne ké’ε mod ampée?” ³⁵ Héę Filibe álāŋgēé mó nkalaŋ mí bwám míme Yesue, átānlād mó mekan áte, mbooted ne échén eped. ³⁶ Áde békagké nê, bēmpé hōm áde mendib médií. Héę ane mod áhóbéé aá, “Mendib móð míen. Weédūsānné me ngen pág-ε?”* ³⁸ Ane mod anhób aá bétíi ebambam. Dóo bó Filibe bésúdé ásé bésol á mendib-te boŋ Filibe ádusán mó. ³⁹ Bébídé-’aá á mendib-te bídén, Edéadəŋ é Sáŋgú ékēen-ne Filibe. Ane mod eenyíne’áá mó ámpē boŋ ambé ákág, alón-ne ne menyinje. ⁴⁰ Filibe annyín yél á dyad á Azotus ábooted-te ake dyad ne dyad té, ákalé’ nkalaŋ mí bwám, káęŋ ápe á dyad á Kaisaria.

9

*Soołe atimé Yesue adúbe
(Mbél 22.6-16; 26.12-18)*

¹ Bóob-poó Soołe ambé ákímé’ áwúu bembapéé ábe Sáŋgwéé. Anké wéé prise ambáám-báa, ² aláá mó aá átel kálag éché ábée belyáged bé ndáb é mekáne é Damaskos, ábel néen áwōŋ kunze eché nzé anyíné bad ké békáne’ nzii e Yesue áwed, áhanj bó, ken bebaád-’e ké’ε baachóm, akób bó, ákēen bó á Jerusalém. ³ Dóo Soołe áhídté boŋ ákag. Á nzii e Damaskos wé, áde ádíi bénben ne dyad, emwédmwed émbid ádyob, épén mó yél esyáél. ⁴ Anhún á ndoob. Dóo áwógré ehób élāŋgē mó aá, “Á-Sooł, á-Sooł, cheé ékáá boŋ étatgé me?” ⁵ Soołe ansedéd aáken, “A-Sáŋ, nzé-módé ne?” Dóo éché ehób étintanné mó aá, “Me-εé ndé Yesue awě étatgéé. ⁶ Bóob-poó, hidé ásé, ékag á dyad-té, áhed dóo bélāā-’é we chôm éche étáŋgéné abel.” ⁷ Bad ábe bóobé Soołe bénwōŋ béntyéem, dyam déeboo bó ahób. Bénwōŋ ehób boŋ bénkennýínné mod awě ahóbe’. ⁸ Soołe anhidé ásé, ánédé míd áte, boŋ eenyíne’áá ekíde. Né-ɔ́o, bénchāä mó é ekáá, békēen mó á dyad-té á Damaskos. ⁹ Andyeé e’pun éláán ádé eenyínéé ekíde. Ene póndé esyáél-le eemwédeé, eedyéde-’áa chômchöm.

¹⁰ Á Damaskos mod abédé awě andúbé Yesue, békagké’áá mó bán, Ananiase. Annýín ndóg. Á ndóg-te wé, Sáŋgú Yesue anchág mó aá, “Á-Ananias.” Ananiase ankwentén aá “Me néen, a-Sáŋ.” ¹¹ Dóo Sáŋgwéé álāŋgēé mó aá, “Bojsén, éke á nkoy n̄ nzii míme békagkéé bán Ntyéémé. Wépě á ndáb wéé Judasé. Nzé epedé áhed, éssédéd mod awě abídé á dyad á Tasus, békagké mó bán Soołe. Adé áhed boob akânné’, ¹² anyíné-’e ndóg. Á ndóg-te wé, anyíné mod awě békagkéé bán Ananiase, abáné mó mekáá á nló ábel boŋ ányínén ámpē.”

¹³ Ananiase antimtéen mó aá “A-Sáŋ, nkénwōŋ ane mod díu bwâmbwam ne nhel mí mekan míme ákébenlé ábōŋ bad áyél á Jerusalém. ¹⁴ Apedé-’e á Damaskos hén ne ngíne eché beprise bémáá békagké mó ákób bad bésyáél ábe békânné’ á dín ádōŋ.” ¹⁵ Boŋ Sáŋgwéé anláá Ananiase aá, “Kág, áyále néen mpwéde anén mod ábèle me. Mó ábél bad ábe béesé bad bé Israel, échab kâŋ é bad, ne bad bé Israel békíi me. ¹⁶ Mmén mélüméd-te mó metake míme ákudté áyél echém.” ¹⁷ Né-ɔ́o, Ananiase anké, asól a ndáb eché Soołe ámbéé áte, abán mó mekáá á nló, álāŋgē mó aá, “A-mwánned Sooł, Sáŋgwéé mó alómé me, nédē, Yesue mwén awě ampií we á póndé eche éhyagké wén. Alómé me áwōŋ ábel néen ényínén ámpē élôn-ne ne Edéadəŋ éche Ésáá.” ¹⁸ Ábwōg-ábwōg bwém bémáá Soołe á míd ábe bédé

* ^{8:36} Donge á kálag dé’só ábádé nchoo 37: Filibe anláá mó aá, “Nhèle ídūsēn wé, nzé se edúbpé Yesue ne nlém nhóg.” Ane mod ankwentén aá, “Ndúbpé néen meé Yesu Krístæ adfi Mwán a Dyob.”

nêngáne e'kíd é' súu, ábooted-te anyínen. Héé ápádté ásē boj bédusán-ne mó. ¹⁹ Andyé ndyéed, amaá-'aá ndyéed adyé boj yél étimé mó áte.

Soołe akalé eyale é Dyöb á Damaskos

Soołe andyéé á Damaskos nguse é e'pun ne bad ábe bénđubé Yesue. ²⁰ Ankě á ndáb é mekáne ésebán abébte póndé ákanle bad tângene Yesue, aá mó adé Mwän a Dyöb. ²¹ Yél enkóm mod téé áte awé anwógr mó pôle á nsəl. Bésedté bánken, "Saá anén mod mó awúé'áá bad ábe bétubé'áá dín áde Yesue á Jerusalém-e? Éesaá mbále nén nzom eché ápééné hén edfi ákób bó átimen-ne bó ámbid wéé beprise bembáá-yé?" ²² Boj Soołe ambé ákalé' mímé nkalań ákág á'sō ngíne ngíne. Metote míme ámbeé álumed nén bán Yesue mó adé Ane-awé-Bewógté, méntängen nyaa eché bad bé Israel ábe békédé á Damaskos bénkénwóngé dyamdyam ahób.

²³ Ámbid e e'pun híin bad bé Israel bénladén áte áháge Soołe ngáne békúú-'é mó. ²⁴ Boj Soołe anwógr ntíi míme békélé. Bénóné'áá mmwe mé e'ké n dyad nkuu ne mûte ábel békúú mó. ²⁵ Boj nkuu nhógr Soołe ábē bembapé békéed mó, béké mó á elón-té, békéed mó á epón é eséed bé e'ké ábe békéed dyad, boj békéed mó ámbid e ebwógr.

Soołe atimé ámbid á Jerusalém

²⁶ Soołe ankě á Jerusalém. Áde ápédé áwed, anwanén aá móbē ne bad ábe bédúbpé Yesue boj ábē bad békáá'áá mó áyèle bénkendubéé bán mómpé adúbpé Yesue. ²⁷ Héé Banabasé áchängé mó á ekáá boj ákéené mó wéé bembapé béké nlómag. Anchementd bó áte ngáne Soołe ányíné Sáñgwéé á ndög-te á nzii ne chörn éche Sáñgwéé álángé mó. Anláá-'é bó ngáne Soołe álángé'áá bad mam tângene Yesue á Damaskos ésebán abáá' dyamdyam. ²⁸ Né-óó, Soołe ambé ne bó, ákag mebwógr mísyáéł á Jerusalém ákalé' nkalań mít bwám á dín áde Sáñgwéé ásebán abáá' dyamdyam. ²⁹ Akánlé'áá kékéne bad bé Israel ábe békébáé'áá ehób é Grikia áswantán-ne ne bó. Dóo békéotédé nzii ahéd áwúú mó. ³⁰ Áde bad ábe bédúbpé Yesue békéoténé bán békéde Soołe awúú, békéed mó békéogné mó á dyad á Kaisaria boj békéom mó á dyad á Tasus.

³¹ Né-óó, ene póndé esyáéł bad ábe bénđubé Yesue á mbwógr e Judeya esyáéł, á Galilia ne á Samaria békébáé ne nsaj, békéwógr'-é mbwógr n Dyöb áte nē ábel békúú áte, Edéádérne éche Ésáá éwóngan-ne bó.

Petro akií a myad mé Lida ne Jopa

³² Petro akagé'áá mbwógr áte esyáéł. Ébédé póndé pág eche ákíí bad bé Dyöb ábe békéde á dyad á Lida aleled. ³³ Áde ápédé áwed, antán mod awé békégeé bán Aniesé. Esój é mekuu énwé mó, átímén ndáb mwé waam. ³⁴ Petro anláá mó aá, "A-Anies, Yesu Krístáe ádíd we bwám hén békébáé. Pádá ásē énabe ádoj anon." Ábwógr-ábwógr Aniesé ampádá ásē. ³⁵ Áde bad békéáé ábe békéé'áá á Lida ne Sharón békéyíné néé ane mod ádyéé bwám, békébootéd Sáñgú Yesue adúbe.

³⁶ Mwaád nhógr abéde á dyad á Jopa awé békége'áá bán Tabitaa, andúbé Yesue. (Dín á Tabitaa á ehób é Grikia ádii bán Dökase nédē e'sél.) Á alongé ádē ásyáéł mboj mó ne móó ábeláá áwóngan-ne betóotoké béké bad. ³⁷ Mmē mesú-'óó, ankwé nkole awé-'é. Békéwobé mó ndim békéed mó békébáé á toj e ndáb eché békéde ámín. ³⁸ Békéb-póó dyad á Jopa dénkéñchabnédté dyad á Lida áyáéł. Né-óó, áde bad ábe bédúbpé Yesue békéogé bán Petro adé á Lida, békéom bad békébáé áwé, ne mechángé nén bán, "Són hyág á mehélé-te."

³⁹ Né-óó Petro amborsén, békébóó béké-'é. Áde ápédé áwed, békéhágnéed mó á toj e ndáb eché békéde ámín. Bekúd béké bebaád békéwobé mó, békéyé', békéumté-'é mó mbóté ne nkobe míme Dökase ámbarjnédté béké adé ábékéde á alongé. ⁴⁰ Petro ambéed béké moosyáéł á ebwógr, akág mebóbógr ábootéd-te akáne. Dóo ákúnné yél á ndim boj áhóbé aá, "Á-Tabita, pádá ásē!" Tabitaa andibé mít áte. Anyín áde anyíné Petro, ampádá ásē. ⁴¹ Petro ansád ekáá, awóngén ányen mó ásē. Dóo áchénlé bad ábe bénđubé Yesue, ne bekúd béké bebaád ábe békébáé áhed, boj álumté béké Tabitaa áde ádii á alongé. ⁴² Mmén nkalań ménkanléd á dyad á Jopa áte ásyáéł a etún é póndé, ekud é bad édúbé-'é Sáñgú Yesue. ⁴³ Petro andyéé

á Jopa nguse é e'pun. Andyee á ndáb e mod awé abelé'áá nsón mé e'kob é' nyam, awé báchágé'áá bán Simōne.

10

Petro akií wéé mod awé eésé mod a Israel

¹ Mod a Roma nhóg abédé á dyad a Kaisaria bán Kōneliōse. Akamlánnáá echoj é mbwókel e sénze échě báchágé'áá bán, "Echoj é mbwókel e sénze é Italia." ² Kōneliōse abédé mod awé ahídé'áá mekan mé Dyōb ámbid. Mwén ne eche ndáb esyəél békénlé'áá Dyōb. Ansálé ekáá áte, áwōngān betóótōkē bé bad bé Israel, ákānnē-'e póndé ésyəd.

³ Ebédé dyam ngón éláán mûte nhóg, anyín ndóng. Á ndóng-te wé ankōj ángel e Dyōb anyín. Enchag mó aá, "Á-Kōneliōs." ⁴ Annón ángel ne chóoj, ne mbwógl, boj ásédté néen aá, "A-Sáy, cheé édéd?" Ángel enkwentén mó aá "Dyōb áwóglé mímōn mekáne, anyíné-'e ábōj e'boj bé nlém. Adé-'e mbojsén ákwenten wé mekáne. ⁵ Boob-pjó, lóm bad á Jopa, béké báchéle mod nhóg awé dín ádíí mó bán Simōn awé báchágéé bán Petro. ⁶ Adé nken á ndáb e mod nhóg awé akínté' e'kob é' nyam awe báchágéé bán, Simōne. Simōne ne adyee' á nkag mé edib é nkwé." ⁷ Dóo ángel echéd éhídté, boj Kōneliōse áchēnlé ábē bembaledé bé ndáb béké, ne sánze pój echě chómpé ehídé'áá mekan mé Dyōb ámbid, ebé-'e sánze echě enjné'áá Kōneliōse. ⁸ Alángé'-áá bój dyam ádě ábénlédé, alóm-me bój á Jopa.

⁹ Áde békagké, néé bín é'sángé, áde békowgé ape á Jopa, Petro anchágé á ndáb mîn ákáne. Né ábédé dyam käd. ¹⁰ Nzaa enkób mó, ádāñ-'e ndyéed adyé. Áde bébojsanné ndyéed, anyín ndóng. ¹¹ Anyín ngáne ngob e dyōb énédnédé. Chōm émbid nêngáne sáñkalaa a abad, ébé néé báchágé dó mekéb méniiin, bésudté dó ásé. ¹² Á abad-té wé, ndín é nyam ésyədél émbé áwédt-te; éche ékeene' mekuu méniiin, éche édole abum ásé ne menjón mé ahín. ¹³ Héé áwóglé ehób élângé mó néen "A-Petro, syá ásé, éwúu échén nyam, édyág."

¹⁴ Boj Petro anhób aá, "A-Sáy, meéhélée se ímbél ene ndín e dyam. Meédyéedéé chōmchōm mbéé éche mbéndé éhóbé aá békdyág, ké'e éche éesáá á'só é' Dyōb." * ¹⁵ Échē ehób émbad mó aláa néen aá, "Weetédé chōm ké ehób éche Dyōb áhóbé aá éssáá, wéé éesáá'é."

¹⁶ Nén démbenléd ngen éláán. Dóo bétímné ádē abad ámbid adyōb. ¹⁷ Petro adolé áá áte ábíi chōm éche ene ndóng élûmtéé. Ene póndé dóo bad ábe Kōneliōse ánlōmmé bédíté wéé ndáb eche Simōne édíí. Béntyéem á mmwe mé e'ké. ¹⁸ Héé bélébpéé ehób bánken,

"Nken adé áte wé awé báchágéé Simōn Petro-yé?" ¹⁹ Áde Petro ádúi ádólé áte ásôñtén chōm éche ndóng élûmtéé dóo Edéádəj éche Ésáá elângéé mó aá, "Wóglén! Bad béláán béképédé, békéde wé. ²⁰ Né-óó lăd yél, ésud á ndáb mîn, weebáá bój ahíd áyále meé nlómé bój." ²¹ Né-óó, Petro ansúd ásé, áke atán ábē bad, álângé bój aá, "Méé ndé ane mod awé nyéhedeé. Cheé épídé nyé hén?" ²² Béntimtén mó bán, "Mod ambáá a sánze, Kōneliōse móó alómé sé. Adíí mod a bwám awé abenle Dyōb. Bad bé Israel bésyədél-le békage mó edúbé éche échábé ámín. Ángel e Dyōb elângé mó néen aá álébe wé áwé ndáb, ábel néen áwógl dyam ádě étângéne mó aláa." ²³ Petro awóglé'-áá nê, asóléd bój á ndáb, ábē-'e bój e'noj.† Boj Petro ansóléd ábē bad á ndáb kénée békébédéé bad bé Israel. Néé bín é'sángé, Petro anlăd yél, ahíd ábē bad. Nguse é bad ábe békébédéé Yesue á Jopa bómpe bénwoón bój. ²⁴ Epun ehób ámbid e nê, Petro béképé á Kaisaria. Kōneliōse mwén, ádē abum á ndáb, ne ábē besón béké echobé abe ánlébē, bésiné'áá Petro bój. ²⁵ Áde Petro áhedeé asól á ndáb, Kōneliōse anké mó atán, ákwe mó á mekuu, ábwāám-me ásé ábē mó edúbé. ²⁶ Boj Petro annyen mó ásé ahób aá, "Tyéém ámín. Mémpé ndíi moonyoñ ngén." ²⁷ Petro ambé ákanlé Kōneliōse ádē békébédéé á ndáb-te. Antán néé ndun e mod éládné á ndáb-te. ²⁸ Héé álângéé bój néen aá, "Nyé bén nyébíí bwám néen bán edé mod a Israel mbéndé áwoon mod awé eésé mod a Israel kéké ásál áwe ndáb. Boj Dyōb álúmté me néen aá meéchágé modmod meé adé mod awé eesáá kéké néé mod awé adé mbinde á'só é' Dyōb. ²⁹ Né-óó, áde élómé

* ^{10:14} Bad béké Israel bénwój mbéndé éche énkémbé bój kunze ádyé dojge á bwém. † ^{10:23} Bad béké Israel békébédéé á mod awé eésé mod a Israel áwab ndáb.

me achəg mempádē ásē ábwōg-ábwōg, menkênhóbpé meé méehyaá. Bəab-pəo, nsedte wə, cheé ékəá boj élomē me achəg?" ³⁰ Héé Kəneliosé ákwəntanné mó aá, "Sú eláán chii, néé bəob, nkánné'áá áwêm ndáb-te á ngən̄ eláán é' müté. Dóo mod awé awáá mesaj ímmé mémwaa' áte átyéémé me á'sō-te təlēd. ³¹ Boj áhōbē aá, 'Á-Kənelios, Dyōb áwogé wə mekáne, ányíné-'e ábōj e'boj bé nlém. ³² Lóm mod á Jopa, áke áchélé Siməne awé béchəgəé bán Petro. Adé nken á ndáb wéé mod nhōg awé akinté' e'kob é' nyam awé béchəgəé bán Siməne. Siməne ne adyee' á nkəg mé edib é nkwé." ³³ Né-oó menlóm wə atéd ábwōg-ábwōg. Ebəlé-'e bwām ngáne épédé. Bəab-pəo sé moosyəél sədē hén, Dyōb ádē-'e ne syánē. Sésine' áwog dyam ké ahéé áde Sáy Dyōbe álāngé wə aá eláa sé."

Petro akənlé Kəneliosé nkalaŋ mí bwām

³⁴ Dóo Petro áhédé pôle á nsəl aá, "Bəob dōo míbíí meé Dyōb átédé moosyəél nyaag p̄jg. ³⁵ Akobe kénzéé awé abage mó edubé awé abele-'e mekan ríme métərjéné, ké alon áhéé ane mod ábíté. ³⁶ Nyēbíí nkalaŋ ríme Dyōb dénlōmēē bad bé Israel. Mmē nkalaŋ ímbédéé tərjene ákal nkalaŋ mí bwām mé nsaj ríme rímpédé mbwiined ne Yesu Kr̄stəə. Mó adé Sájgwéé á moosyəél. ³⁷ Nyēbíí-'e dyam áde démbenléd mbwōg e Judeya áte esyəél mbooted ne á Galilia. Nén démbé áde Jəne ámáá bad aláa tərjene edusen. ³⁸ Nyēbíí nén bán Dyōb dénwōgēd Yesue, mod a Nazaret, ábe mó Edəadəj éche Ésáá ábē-'e mó ngíne. Yesue akagé'áá hōm téé ábelé mboj. Ngáne Dyōb démbēē-'áá ne mó, adidé'áá bad bésyəél ábe bémbe ásē e ngíne e Satan bwām. ³⁹ Sé běn sənyínné mekan mésyəél ríme ámbenlē á aloj á bad bé Israel ne á Jerusalem dīd. Bénwūú mó, abome áde bēmboméé mó á awōg. ⁴⁰ Boj Dyōb démpuúd mó ámbid e e'pun é'láán, ábel-le bad bényín mó. ⁴¹ Saké bad bésyəél bénnyín-ne mó. Bad ábe Dyōb démmadté apwed, bōō bénnyín mó. Nédē sé ábe səndyé ndyéed sémwé-'e mmíítéd ne mó. ⁴² Anlyágtén sé aá sékanle bad nkalaŋ mí bwām, sébide-'e mbón̄ nén bán móó módē Ane awé Dyōb ápwédé, ákaad bad ábe bédé á alongé ne ábe bēwédé. ⁴³ Bekal bēdəadəj bésyəél bénhōb tərjene mó bán, mod ké ahéé awé adúbpé mó, Dyōb délagsén mó mbéb. Nén débenléd á ngíne e ádē dīn."

⁴⁴ Áde Petro ádii áhōbēé nē, Edəadəj éche Ésáá ênsüd ásē, épī moosyəél awé áwóglannáá rímmé nkalaŋ. ⁴⁵ Bad bé Israel ábe bēndūbē Yesue, ábe bōobē Petro bémbe á Jopa bémbe menyáké bwāmbwam ányín nén bán Dyōb ábágé eché nde e Edəadəj éche Ésáá káéjne wéé bad ábe béesé bad bé Israel. ⁴⁶ Bénwōg ngáne bēhōbēé mehōb mémpēe, bēbagé-'e Dyōb ehúmé. Dóo Petro áhōbēé aá, ⁴⁷ "Ábén bad békudé Edəadəj éche Ésáá melemlem ngáne sémpē sənkudté. Né-oó, nzé-módé ahélé-se ahōb aá bēdusán bō ne mendib?" ⁴⁸ Hé-'áá áhōbē aá bēdusen bō aá dīn á Yesu Kr̄stəə. Dóo ábē bad bélāngé mó bán ádyee ne bō nguse é e'pun.

11

Petro ahóbé tərjene chōm éche ábelé

¹ Bembapēe bē nlómag ne bad bémpeé ábe bédubpé Yesue á mbwōg e Judeya-tē esyəél, bénwōg bán bad ábe béesé bad bé Israel bōmpē békobé eyale é Dyōb. ² Áde Petro átímé ámbid á Jerusalem, bad ábe bēhōb'áá bán bétərjéné bad ábe béesé bad bé Israel ayag, bēmbooted mó ahōb bán, ³ "Cheé ékəá boj ékág wéé bad ábe béesé bad bé Israel, bad ábe bēeyageé boj nyáâbōo nyedyāg-ke káéjne ndyéed hōm ahōg?" ⁴ Hé-'áá Petro áhédé nkalaŋ á nsəl, aláá bō mekan mésyəél ngáne mēmbenlédte se á mbooted. ⁵ "Mbédé ámekáne á dyad á Jopa boj nýiné ndóg. Chōm émbid á ádyōb nēngáne sáŋkalaa a abad, ébē néé bēchəngé dō mekéb méniiin, bēsudté dō ásē. Bēnsudé dō áwêm e'só-te. ⁶ Áde nýnóné áwēd-te menyín nyam éche édē á abad-tē, nyam é mehín, nyam éche édole abum, ne menjōn mé ahín. ⁷ Héé nýwogé ehōb élānge me nén aá, 'A-Petro, syəé ásē, éwús' échén nyam, édyág.' ⁸ Boj me-'e menhōb meé, 'A-Sáy meéhēlēē-sé móbel ene ndín e dyam. Chōmchōm éche mbéndé éhōb aá bēedyāg ké'e éche éesáa á'sō é' Dyōb éesəlēē me á nsəl mbēd.' ⁹ Ehōb émbid ádyōb ámpē nén 'Weetédé' chōm ké ehōg éche Dyōb áhōb aá éssáa, wéé éesāa'é.' ¹⁰ Nén démbenléd ngen eláán. Dóo bétimné chōm ésyəél ádyōb. ¹¹ Ene

póndé chěn dőo bad béláán ábe békídé á dyad á Kaisaria ábe bélómé áwêm, békídé á ndáb eché nídyéé’áá áte. ¹² Edéadəŋ éche Ésáá énlāā me aá syáābō sékag, aá mee Báá bó ahíd. Ábē bad ntóób ábe békídé Krístəe ábe békídé á Jopa bómpē bénhíd me á Kaisaria. Syáābō moosyəél sénkě sésól á ndáb wée Koneleiſe. ¹³ Koneleiſe anláá sé ngáne anyíné ángel etyéémé áwe ndáb boj ene ángel eláá mó aá, ‘Lóm mod á Jopa áke áchəg mod awě mǐn mésyāāl médií bán Simən Petro. ¹⁴ Nzé apedé álāā nyé pôle eche ēbəl boj Dyöb ásōj ádōj alongé, ásōj-’e ádōj abum á ndáb.’ ¹⁵ Ámbid enê, mboótédé-’áá dyam ahób, Edéadəŋ éche Ésáá épiidé bó melemlem nêngáne êmpíi’é sé á mbooted. ¹⁶ Dőo níkámtené dyam áde Sáŋgwéé ánhōbpē. Anhób aá, ‘Jøne adüsánnáá bad ne mendib boj bédusén nyé ne Edéadəŋ éche Ésáá.’ ¹⁷ Enyínnad néen bán Dyöb ábágé ábén bad ábe béesé bad bé Israel melemlem me nde míme ámbeé syáné áde dédúbpé Sáŋgú Yesu Krístəe. Nzéé-ð nídíí ákáj ntíi ní Dyöb?’ ¹⁸ Áde békídé nê, bénsoğ Petro mekan ahób áyāl, békídé Dyöb akən. Békídé áá bán, “Dyöb ábágé káóhne bad ábe béesé bad bé Israel etál átede mímab mbéb átimen Dyöb, ákud-te alongé áde déemaá.”

Mwembé m'bóótédé á dyad á Antyog

¹⁹ Bœb-pœð, áde bœwúú Stefanuse, bad ábe bœmpañtēd áte áyæle metake ríme békúdáá, bô donge á bad bœnkë káøjse á Fonisia, donge ákë á Saiprus, ábíníí-’e békë á Antyøg. Békágé’áá, békanylé dásô bad bé Israël bœnpen nkalanj ím bwâm. ²⁰ Boj bad bœmpée ábe bœndûbë Yesue ábe bœmbid á myad mé Saiprus ne Sirine, bœnkë á Antyøg, békanylé káøjne bad bô Grikia, bélângë-’e bô nkalanj ím bwâm tâygene Sângú Yesue. ²¹ Ngíne e Sângú embé ne bô. Ndun e mod endúbe, étimën-ne Sângwéé. ²² Mmê myaŋgó mêmpe á metúu mé bad bô mwembé n Jerusalëm. Né-óó, bénlõm Banabase á dyad á Antyøg ákë dényin bô áwed. ²³ Áde ápedé áwed boj anyín ngáne Dyöb ánámté bad, anwóg menyiŋge, ambë-’e bô elébé aá böhide’ Sângwéé ne nlém nhög. ²⁴ Banabase abédéé mod a bwâm, Edæádæj éche Ésáá embë ne mó, adúbe dénwüū-’e mó áte bwâmbwam, ekud é bad-te éndûbë. ²⁵ Dôo Banabase ákíí á dyad á Tasus âhed Sœole. ²⁶ Áde ányíné mó, ampeén mó á Antyøg. Né-óó á etûn é mwë nhög, bô bad bëbe bëbómé’áá ne bad bô mwembé. Bén'yägëd-te ndun e mod. Á Antyøg wê dôo bësébpé bad ábe bëdùbpé Yesue dïn achuu bân Bad bô Krïsto.

27 Mmê mesú děn, doŋge á bekal bē'dəádəŋ bēnhidé á Jerusalem béké á Antyog. **28** Bó mod nhóg awě békchágé'áá bán Agabuse antyéém ámīn. Á ngíne e Edádəŋ échě Ésáá, anhób aá, "Nzaa e ngíne ekwógé ape, ēbē'-e nkōysé-te nsyāāl." Nén dēmbenléd-te á póndé eche Kladios ábédé á nkamlen. **29** Bembapé békentii nén bán bó mod téé bélomē nwôŋgen wée bad ábe bédúbpé Yesue á mbwág e Judeya ngáne bó mod téé áhenlé akud. **30** Né děn-naá békbenléd. Bénlăd mōné, bélomén Banabase bó Sɔɔl ábe wée belyáged béké mwembé.

12

*H*erōde ádíi apiinad bad ábe bédúbpé metake

¹ Benben ne ene póndé chën, kâj Hérôde ambootéd dojge á bad bé mwembé ahé á meséb. ² Ambël bénkôb Jemse, Jone mwânyaŋ, béwúén mó nkawâté. ³ Áde ányiné nén aá nê áwógté bad bé Israel menyinge, anké á'sô, ábel békôb Petro. Nén démbenléd á póndé e Ngande e Ewele é Ngên. ⁴ Áde bémáá Petro akób, anlóm mó á mbwög. Bêmbané e'choŋ é' sánze é'niin ânɔn mó. Echoŋ téé énwōŋ sánze éniin. Hérôde anwój mewêmten âkáad mó á'sô é' mbwög nzé Ngande e Nnyíme ámîn etómé. ⁵ Né-óó bémbaro Petro á mbwög. Bonj bad békanné'áá Dyöb ngíne ngíne áyâl echê.

Ángel ebídté Petro á mbwög

⁶ Hērōdē ahēdē'áá Petro apeen á'sō é' bad mbwəmbwə. Mmē nkūu mēn m̄me Hērōdē ánwōngē mewém̄ten âpeen Petro á'sō é' bad chān ábíníí, Petro akúné'áá át̄intē e sánze ébe. Bénhē mó bengəbéngəbē ped ébe, sánze émpēe ébe énənē mmwə n̄ ndáb e mbwəg. ⁷ Dóo ángel e Sángú ébídé təléd, ndáb e mbwəg épēnē áte. Ángel ne enságéd

Petro á ekəgél, ényem mó ásē, élāngē mó aá, "Pádé ásē á mehélé-te." Ábwōg-ábwōg bengəbéngōbē bênhunnéd mó á mekáá. ⁸ Dóo ángel élânggee mó aá, "Wéd ngáá atád, étâd-te nkaođ mé metámbé." Petro ambél áned. Dóo ángel élânggee mó aá, "Hé mbóté á yěl, éhíde me." ⁹ Petro anhíd chó, bébíd á ndáb e mbwəg. Boŋ kénê enkêmbíi'é ké dyam áde ángel ébeleé děn ákoo abenled. Anwémtén aá mónyiné' ndóg. ¹⁰ Béntōm echoŋ e sánze é'só ámin, bétom-me éche élonténé é'be kááj ne á asóg bêmpé á mmwé mé e'ké bé e'kii rím̄e mbidé'áá á dyad-té. Nsəl mé e'ké ménđibnéd ne mó mwěn. Héę békídé boŋ békídé nzii. Áde békagké nē děn dóo ángel ne étédté Petro ábwōg-ábwōg. ¹¹ Héę debyéé ápédé Petro boŋ áhōbē aá, "Bəɔb dóo mbíi' méé dyam děn dóo ákoo' abenled. Sángwéé alómé eche ángel, asoo'-e me á mekáá míme Herôde, abelé'-e mbidé mekan mésyääl áte míme bad bé Israel bénwëmtënne me abel." ¹² Achemé'áá dyam áde ábenlad ne mó, dóo ákíí á ndáb wée Maria, awě achyáá Jøn Makøse. Ndun e mod enladén áhed békânné'. ¹³ Áde Petro ápédé anküm ekob éche édé á ewbóg-te boŋ mbalede a mmwaád nhógrán Rodaa, áhye áñoné mod awě akume ekob. ¹⁴ Anchém Petro ehób. Dó-'áá ne menyinge mésyääl áchâdtënne ekob adibe, atóm mehélé ámbid á ndáb-te boŋ áke aláá bad aá, "Petro atyéémé á ewbóg-te." ¹⁵ Bénlää mó bán, "Epag mǐn!" Boŋ ambé álāngē bó aá chõm éche móhóbeé édé mbále. Dóo békânné bán, "Né eche ángel chó edé." ¹⁶ Áde mímén mésyääl mébenladté Petro ambé ákumé' ekob. Káájne á asóg bêndibé ekob. Bényiné'-aá mó, yěl ekóm bó áte bwâmbwam. ¹⁷ Ampebtén bó ekáá aá bélâm ehób, boŋ álumtē bó áte ngáne Sángwéé ábídté mó á mbwəg. Anláá bó aá, "Nyéláá Jemse ne bad ábíníí ábe bómpé bédúbpé Yesue mímén mekan." Dóo átédté bó boŋ ákag hõm démpée.

¹⁸ Áde bín é'sáŋgé, sánze éche énóné'áá Petro êmpuutéd á mewêmtén bwâmbwam áyäle bénkêmbíí'é chöm éche ébénlédé Petro. ¹⁹ Heröde anlóm bad aá béhëd mó boj bénkênhënlé mó anyín. Héé ákáádté échê sánze boj ábagé mbakú aá bewúu bó. Áde ímmén mésyääl métómé Heröde ansyäé á Judeya áke ádyëëé á Kaisaria á esón é póndé.

Herodé awédé

²⁰ Ene póndé Herōde anwóón bad bé myad mé Tire ne Sidən melingá ríme méchábé ámín. Né-óó, bad bém̄bíd rímmē myad mébe âke dényīn mó. Mod awě bénsébēē ake détán âbel bówbé kâj bétim ásē abédéé Blastuse. Blastuse abédéé mbalede á ndáb e kâj. Bém̄bel nê áyāle á aloj wée Herōde dōo rímbab medyé mébídé' áá. ²¹ Epun éche Herōde ántī' é épédé-'áá áte, awáá megombe mé kâj, ádyéē atii dé nkamlen boj ábootéd bó mam aláá. ²² Áde ámaá ahób, ábē bad bémbootéd abón bán, "Dyōb děn dōo áhóbe' saké moonyor." ²³ Ábwōg-ábwōg ángel e Sájgú embél Herōde ankwě nkole áyāle enkémbaá Dyōb edúbé. E'ken bé abum bén̄dyē mó áte, awé-'e.

²⁴ Eyale é Dyōb chó-’e émbē ékanláád ékag á’sō.

²⁵ Banabase bó Sœl bêmmăd mímbab nsón béhídē-'é á Jerusalem. Áde béhidteé, bénwälé Jón Maköse áyēl.

13

*Edəádəŋ éche Ésáá épwédé,
bélómé-'e Banabase bó Paale*

¹ Á mwembé mé Antyōg, doŋge dé bekal bē'də́dəŋ ne bemeléede békédé áwed. Ábê bad békédéé Banabase, Simione (awe békágé'áá bán Ehíndee), Lusiøse (awe ambíd á Sirine), Manahene (awe bó Ngómenaa Hérôde békwogé hōm ahóg) ne Søøle. ² Á póndé echě békbenléé Sáŋgwéé bédidé-'e yǎl nzaa á mekáne-tê, dōo Edə́dəŋ éche Ésáá élângséé bó nén aá, "Nyébanned me Banabase bó Søøl âbel boŋ békéle me nsón ríme rípwédé bó meé békébél." ³ Ábê bekal bē'də́dəŋ ne bemeléede bénkānē, bédid-te yǎl nzaa á mekáne-tê, békán Banabase bó Søøl mekáá á nló boŋ békag.

Banabase bó Paal bétáné
nkum-é-ngaŋ, Elimasé

⁴ Né-óó, Edéádəj éche Ésáá énlōm Banabasə bó Paale. Dóo békíí á dyad á Selusia. Áhed-taá bésyáŋgé boŋ békäg á mbwóge Saiprus eche mendib méláŋnédé. ⁵ Áde běpédé á dyad á Salamis, békálé'áá eyale é Dyöb á ndáb é mekáne. Bénwálé Jøn Makøse áyäl áwóngen bó. ⁶ Bénké adé aloŋ áte áde mendib méláŋnédé káojé běpē á dyad á Paføs. Áde běpédé áhed, běntān mod a ngaj nhög awě běchágé'áá bán Báá Yesu. Abédée mod a Israél awě anchág yěl aá módií nkal é'déádəj a Dyöb. ⁷ Báá Yesue abédée nsón a echoŋ awě Sègyus Paoluse. Sègyus Paoluse mó abédé nkamlene a ene mbwóge echě mendib ménləŋnédé. Abédée mod awě anwóy debyéé bwâmbwam. Ane ngómenaa anchélé Banabase bó Søøl áyäle ahedé'áá eyale é Dyöb awóg. ⁸ Boŋ anén mod awě dín démbë́é á ehób é Grikia bán Elimase enkênháá bó etál. Ahedé'áá aá nkamlene a mbwóge eedúbpé nkalaŋ mí bwâm. ⁹ Dóo Søøle awě běchágé'áá ámpē bán Paale, ngáne ánlönné ne Edéádəj éche Ésáá, ánóné ane mod a ngaj á mǐd-te, ¹⁰ boŋ áhōbē aá, "A-mwǎn a Satan! Ekoó dyam ké ahéé áde ádé bwâm. Mwane mé mbéb mwěn ne mwěn-eeé níloné wé áte. Póndé ésyäøl ebélé éhedé wéé móhøylēn mbále eche Sáŋgwéé mótimed chó metóm. ¹¹ Sángú Dyöbe ákøgsën wé bøøb nén děn. Wěkwě ndím, wéenyínenné-'é á esójé é póndé." Ábwøg-ábwøg Elimase anwóg néngáne mbag ékwédé mó á mǐd-te, ábootéd-te ahyóm áhed mod awe áchhë́ mó á ekáá. ¹² Áde ngómenaa ányíné dyam áde ábénlé, andúbé Yesue. Yěl enkóm mó áte bwâmbwam áyäle ayáge áde Paale bó Banabase býyágté'áá tâŋgène Sáŋgú Yesue.

Paale bó Banabase běpédé á dyad á Antyøg

¹³ Paale bøøbe baáb bénsoł a Stíma a Paføs béké káøjé běpē á dyad á Pøga á mbwóge Pamfilia. Boŋ Jøn Makøse anlyéğ gó áwed asú mó ámbid á Jerusalém. ¹⁴ Běnsyøá á Pøga běpē á dyad á Antyøg á aloŋ á Pisidia. Á mbwe-mé-nkóme-áte, bénké á ndáb e mekáne bědyéé ásé. ¹⁵ Bénwøg néé béláá eped á kálag e mbéndé eche Mosøe ne á kálag e metelag mé bekal bě'déádəj. Áde bémáá aláj dóo belyáged bě ndáb e mekáne bélébpeé Paale bó Banabase nén bán, "A-baányaŋ, nzé nyéwóó pôle echě eewēd bad nlém á abum, nyéhób chó." ¹⁶ Dóo Paale átyéémé ámín, apebtán gó ekáá aá bélám ehób, boŋ abootéd dyam ahób.

Anhób aá, "A-baányaŋ bě Israél ne bad běmpēe ábe nyéédé hén bøøb ábe nyébenle Dyöb, nyéwógleñ me. ¹⁷ Dyöb á bad bě Israél děmpwěd ábēd betaa ábēl-le ábē bad běbūū áte á póndé eche běbédé néé beken á aloŋ á Egipto. Ámbid ené, ambenléd eche ngíne echě echabé ámín ábíded gó a Egipto. ¹⁸ Á etún é móom mé mwě méniin, anwesën gó á ehyáŋge. ¹⁹ Dyöb démbébēd meloy saámbé á ndøøb e Kanahan, ábē-'é echăb ndøøb wéé ábē bad. ²⁰ Mmén mésyäøl měmbenléd á etún é dyam mbwókel e mwě éniin ne móom mé mwě métáan. Ámbid enén, Dyöb děmbé bøøbad ábe békāádté káøjne á póndé echě nkal é'déádəj Samwøle. ²¹ Áde běhédé kāŋ, Dyöb děmbé bøø Søøle, mwǎn awe Kishë. Ambid á túmbé e Benjamin, abédé kāŋ á etún e móom mé mwě méniin. ²² Dóo Dyöb áhúdë Søøle á atii. Ahúdë-'áá mó, átímëd Dabide. Anhób tâŋgène Dabide aá, 'Nkudé nyaa e mod eche nídáé, Dabide, mwǎn awe Jesø. Adíi mod awě áběl mam mésyäøl míme níhedeé meé ábel.'

²³ Yesue mó-'é awě abídé á nchyáátén míme Dabide móø Dyöb děmbenlé Nsoode a bad bě Israél, ngáne ánhøbpé aá móøbøl. ²⁴ Byánán Yesue ábootéd míme nsón, Jøne álánge'áá bad bě Israél aá békunned mbid, bětede mímbøl mbéb, békud-te edusen. ²⁵ Áde Jøne ákwøgé míme nsón amad, ansédéd bad aáken, 'Nzé-módé nyéwémténé bán ndé. Saké me ndé ane awě nyésineé. Nyéñone', Ahúé' ámbid echém, mmén meékwognedéé áhune mó metámbé ámekuu.' "

²⁶ Paale ambád ahób aá, "A-baányaŋ bě myaá míme Abrahame ne bad ábe běbenle Dyöb hén bøøb, syáné-eeé bělómmé mímén nkalaŋ mé e'sooson. ²⁷ Bad ábe bědyéé'áá á Jerusalém ne ábab belyáged bénkembí'é bán Yesue móø adé Nsoode. Bénkensójtén-naá metelag mé bekal bě'déádəj míme béláá'áá á mbwe-mé-nkóme-áte téé. Kénê běmbé mekan míme bekal bě edéádəj bénhøbpé ménlōn, ahób áde bénhøbpé bán běwúu Yesue. ²⁸ Kénéé bénkenkudté nzøm echě bétomédté mbakú nén bán aténgéné awé, bénlää

Payledé bán ábel bewúu Yesue. ²⁹ Áde bémáá mekan mésyāāl abel ngáne méténlédé á kálag e Dyōb tāngene mó, bēnsudéd mó á awōg, bēbānē mó á soj-tê. ³⁰ Boj Dyōb dēmpuúd mó. Ámbid e nê, ³¹ anlúméd yěl ngen ne ngen wéé bad ábe bōbōbō bēnwōj bootya á Galilia ápe á Jerusalem. Bōb ábē bad bōb békantle' bad bé Israel dyam áde bénynnē. ³² Bōb-poó rímén nkalaj m̄ bwām mó sépínlédé nyé. Mmē nkalaj ndíi nén bán dyam áde Dyōb dénhōbpē áá móbōbē ábēd betaa alonté dō ne syánē. ³³ Alonté dyam áde ánhōbpē ne syánē awē dedé nchyáatén mímāb, apuud áde ápúúdté Yesue. Né-'áá éténlédé á kálag e Ngase e Dyōb eché elonténé ébe bán,

'Edíi awem mwān,
chii ndíi Sóó.'

³⁴ Dyōb dēmpuúd mó ésebán atime ámbid á ndōb se ábō. Dyōb dénhōb tāngene nē aá, 'Mēbē we nnam n̄ ngəngú, m̄me méehidté ásē, m̄me ménhōbpē meé mēbē kēj Dabide.'

³⁵ Né-'áá áhóbé ped empée wéé éténlédé bán,

'Wéekwenténné wéé awōj mbalede awē abenle we ne nlém nhog ábō á soj-tê.'

³⁶ Debíi nén bán áde kēj Dabide ábédé á alongé, abenlē'áá Dyōb ngáne Dyōb áhédé'áá. Ámbid e nê, anwé, bélímé mó wéé bénlímē ábē betaa, ábōbē'. ³⁷ Boj ane awē Dyōb dēmpuúdté, enkembōbē'. ³⁸ Bōb-poó, a-baánya, nyétāngéné abfí bwām nén bán, Yesue mó akéé boj békantle nyé bán Dyōb álagsan bad mbéb. ³⁹ Nyébíi'-é nén bán kénzéé awē adúbpé mó aköbnédé á'sō é' Dyōb néé mod awē atángéné. Mbéndé e Mose eéhēle'aá-sé ébel ákobnéd. ⁴⁰ Né-oó, nyétéd pónéd ábel boj dyam dé ebébtéd áde bekal bē'déadəj bénhōbpē déebenláád ne nyé. Bénhōb bán,

⁴¹ 'Nōnē', nyé bad ábe nyéwélé Dyōb! Yěl ēkōm nyé áte, nyéewē'-é,

áyāle nén, dyam áde mébenlé rímén mesú,

ádíi dyam ádé nyéedúbée ké mod anlúméd nyé áte.' "

⁴² Pónédé eché Paale bō Banabase bēbídéé á ndáb e mekáne, bad bénlāá bō bán bēpē ámpē á mbwē-mé-nkóme-áte m̄me rihúe' áhye déláá bō m̄mē mekan ámpē. ⁴³ Áde bad bémáá ahide á mekáne, bad bé Israel híin ne bad híin bēmpē ábe bénwōj adúbe á bad bé Israel bénhīd Paale bō Banabase. Paale bō Banabase bénikaléni ábē bad, bēwéd-te bō nlém á abum bán bēbē békude rímén nsimé m̄me Dyōb ábágé bō.

⁴⁴ Á mbwē-mé-nkóme-áte m̄me mémbādtēn, bēnben ne baásyāāl ábe bēbédé á dyadtē wē, bēmmaá ámbid, áhye déwōg eyale éche Sángwéé. ⁴⁵ Áde bad bé Israel bényné ene ndun e mod, kónjí embé bō áte bwāmbwam. Dyam téé áde Paale áhóbé'áá, bēhóbé'áá bán adíi metóm, bēhōbē'-é mó mekan mé mbéb á yěl. ⁴⁶ Paale bō Banabase bémē bēhōbē bōb ésebán bēbáá dyamdyam. Béhóbé'áá nén bán, "Nyé bad bé Israel nyéé séntāngénné eyale é Dyōb asébe dé akale. Boj ngáne nyébáá chó áyāl, nyéetéde'-áá yěl néé bad ábe békwoğnédé ákud alongé áde déemaá", né-oó, séetédé nyé, séke wéé bad ábe béesé bad bé Israel. ⁴⁷ Dyam áde Dyōb áhóbé'áá débel adíi, nén,

'Mbánné we néé e'nyínén bé ekide é' bad ábe béesé bad bé Israel

ábel boj bad bé nkōjsé bésyāāl békud e'soozoj áwoj mbíd.' "

⁴⁸ Áde bad ábe bēebéde bad bé Israel bēwōgé nê, bémē menyinge, békenné'-é nkalaj m̄me Sángwéé. Bad ábe bēpwédnédé nén bán békud alongé ádē déemaá' bēndūbē Sángú Yesue. ⁴⁹ Moosyāāl awē ambé ene ped e mbwōg anwōg nkalaj m̄me Sángwéé. ⁵⁰ Boj bad bé Israel bénkōn baámbáá bē dyad ne bebaád bémēbáá ábe bēbénlē'áá Dyōb. Béchódé'-áá Paale bō Banabase yěl áte, bénān-ne bō áwab mbwōg. ⁵¹ Áde bēhēdēé ake, bēnkūd ebumbú á mekuu álúmed ábē bad nén bán nkōgsen ne bō. Áde bémáá abel nē bēnké á dyad á Ekōniom. ⁵² Bad ábe bēndūbē Yesue á dyad á Antyōg bénlōn ne menyinge bélón-né ne Edéadəj éche Ésáá.

¹ Áde Paale bó Banabase bédépédé á Ekəniəm, bénkě á ndáb e mekáne. Bénkäl nkalaníme Yesue áwed, nyaa echě bad híin bé Israel ne ábe béebeéde bad bé Israel bénđubéé Yesue. ² Boj bad bé Israel ábe bénkénkobé adúbe, bénkōn bad ábe béesě bad bé Israel, békéhé bó mewémten mé mbéb áte tângene bad ábe bénđubé Yesue. ³ Paale bó Banabase bémbeám áhed, békálé nkalan tângene dyam á bwâm áde Dyöb ábénlé bad ésebán békáá' dyamdyam. Sájgú Yesue ambél bénlüméed e'chemléed, békél-le menyáké híin, âlúmed nén bán mam rímé ábê bembapee békálé áá tângene rímé nsimé médé mbále. ⁴ Nkabén mémbé átíté e bad bé dyad. Donje á bad bénitimén bad bé Israel ábíníí'-e bétimén bembapee bé nlómag. ⁵ Dóó bad ábe béesě bad bé Israel ne bad bé Israel nchoo ne ábab benkamlene bétíídé bán béttagéd Paale bó Banabase bán bélüm-me bó meláá. ⁶ Áde Paale bésójténé nê, bénsoh béké á mbwóg e Likonia bésól á myad mé Listra ne Debe ne abwág áde ábédé benben. ⁷ Békálé áá nkalaní m bwâm rímé mebwág mésyäésl.

Mam m̄me mébénlédé ne Paale bó Banabase

⁸ Mod abédé á dyad á Listra, mekuu ménwē mó. Nê dôo bénchyāā' é mó, eékii'-áa mbêd.
⁹ Áde Paale ákaleé nkalaj mí bwâm, ambé áhed áwōglân. Paale annyín aá awóo adúbe aá móhèle módyééé bwâm, dôo Paale ánóné mó chóón, ¹⁰ boj áchägtë ehób ámîn aá "Syé ásé, étyéem ámîn." Ane mod ahebé'-áa ámîn, ábootéd-te ake. ¹¹ Áde ndun e mod echë ebédé áhed ényíné dyam áde Paale ábélé, bénhë e'saad á ehób é Likonia bán, "Myöb mésúdë ásé métímé baányoŋ, áhye dé awôŋgen sé." ¹² Béñchäg Banabase bán mó adé dyöb áde békchägëé bán Zeuse békchäg-ke Paale bán mó adé dyöb áde békchägëé bán Hemesé áyâle mó ahóbpé' áá búmð. ¹³ Abón áde békbenl' áá dyöb áde békchägëé bán Zeuse áte ábédé ámbid e dyad. Né-óó, prisë awë Zeuse ampeén nyag ne mbonja á mmwe mé e'ké é' dyad. Ambel nê, áyâle bôøbe ene ndun e mod békchedé' áá Paale bó Banabase mende abe. ¹⁴ Áde Banabase bó Paale békchägë dyam áde ábê bad békchedé abel, bênsalted mbóté á yâl, bénýagëd bésol átintë e ene ndun e mod békbenl' békchedé abe, ¹⁵ "Cheé ékâá boj nyébelé nén? Sémpë sêdíí baányoŋ melemlem ngáne nyééé nyédíí. Sêpedé hén, ákale nyé nkalaj mí bwâm míme Yesue, ábel boj nyéchene ábén bwëm ábe béesë dyam dé abelen, nyéhíde Dyöb dé alongé áde áhágé nkoŋ mí mí, ní sé ne edib e nkwe ne bwëm é'syâl ábe é'dé áwëd-te. ¹⁶ Bôod Dyöb dêntedé bad bésyâl ábel kékchée éche bédâa. ¹⁷ Boj kénê, alûmte e'chemléd nén aá módë, abel áde ábeléé mekan mé bwâm. Alômme nyé mbûú echë ebídé ádyöb, ábagé'-é nyé mbote á póndé eche etângéné. Abage nyé medyé, áwôgtë'-é nyé menyinge." ¹⁸ Ké nêngáne Paale bó Banabase bénhôbpé mímén mekan mésyâl, éebédeé bô mwän e akan âkâen bad ábe mende míme békchedé' áá abe.

¹⁹ Donge á bad bé Israēl bém̄bíd á dyad á Antyōg á mbwóg e Pisidia, békibid-te á dyad á Ekəniom̄ běpē á Listra. Bénted ene ndun e mod nlém á abum, bóōbōō bélum Paale meláá, bédol mó ásē, békibidé mó á dyad-tê ne mewém̄ten nén bán awédé. ²⁰ Boj ádē bad ábe bédúbpé békédé boj béləjnéd mó, anhidé ásē átím ámbid á dyad-tê. Néé bǐn é'sáŋgé, dōo bó Banabase békíí á dyad á Debe.

Paalē bó Banabasē bétímé
ámbid á Antyög

²¹ Paale bó Banabase bénkäl nkalanj mí bwâm á dyad á Debe, bêmbél bad hín bétim béké bembapee ábe Yesue. Ámbid enê, bêntim ámbid á myad mé Listra, Ekoniom ne Antyog á mbwög e Pisidia. ²² Höm ké áhéé áde bëmpéé, býágté’áá bad ábe bédúbpé Yesue bëwéde-’é bó nlém á abum, ábel bétyéem á adúbe-tê. Béyágté’áá bó bán “Detángéné metake akud boj deésol á nkamlen í Dyöb.” ²³ Mwembé ké níhéé míme bëmpéé, bëpwédáá bad ábe belyágté’ míme mwembé. Nzé bénkâné, bédid-te yäl nzaa á mekáne-tê, béké belyáged á mekáá míme Sángwéé awé bésúmé nlém á yäl.

²⁴ Áde bémádé mbwóg e Pisidia áte, bêmpě á mbwóg e Pamfilia. ²⁵ Bénkäl eyale é Dyöb á dyad á Pega, boj bésyogké á dyad á Atalia. ²⁶ Áhed-taá bésyángé boj béchabpé edib, betimé ámbid á Antyög, wée bénkannédté bó bán nsimé ní Dyöb nílyaged bó áyèle nsón míme bémádé bojb. ²⁷ Áde bépédé á Antyög, bénlăd bad bé mwembé áte, béláá bó mekan

mésyāēl míme Dyōb ábélé mbwiined ne bó. Bénlāā-'e bó ngáne Dyōb ánédté nzii echě bad ábe béesě bad bé Israel bédúbpé Yesue. ²⁸ Béndoód-te mwă adyee áwed ne bad ábe bédúbpé Yesue.

15

Mbom nkóbté á Jerusalem

âmad ehób á mwembé-te

¹ Bad behög bémibid á mbwág e Judeya bépē á Antyōg. Bêmbootéd bad ayáged nén bán, “Nzé béyage mod ngáne mbéndé e Mose éhedeé, né éekudté e'soosoj.” ² Nén dêmbeł Paale bó Banabase bészántánnáá ngíne káej bášbáø bétíí bán Paale bó Banabase ne nguse é bad émpée béke á Jerusalem, béke bénýin bembapé bé nlómag ne belyáged bé mwembé tângene ádē atón. ³ Bad bé mwembé bénlyagénd bó á nzii. Bêmbwě á mbwág é Fonisia ne Samaria bélángé bad ngáne bad ábe béesě bad bé Israel bédúbpé Dyōb. Mmén nkalañ ménwögénd bad ábe bédúbpé Yesue menyirge. ⁴ Áde Paale bó Banabase békédé á Jerusalem, mwembé míme médé áwed, bembapé bé nlómag ne belyáged bé mwembé bénkob bó nken. Paale bó Banabase bénlāā bó mekan míme Dyōb ábélé mbwiined ne bó.

⁵ Boj donge á bad ábe bédúbpé Yesue ábe bémibid epepé éche Befarisia béntyéem ámín, böhob bán, “Bétángéné bad ábe béesě bad bé Israel ábe bédúbpé Yesue ayag, béláá-'e bó bán bétángéné mbéndé éche Mosee ahíd.”

⁶ Dóo bembapé bé nlómag ne belyáged bé mwembé békóbé mbom ânón ádē akan áte. ⁷ Áde bélébé aswanten dóo Petro átyéémé ámín boj áhōbē aá, “A-baányan, édé etún é póndé bōob áde Dyōb ápwédé me átinté echén, ákale bad ábe béesě bad bé Israel nkalañ mí bwám ábel nén bewôg mó bédúbe-'e. ⁸ Dyōb áde ábíi-'e moosyáél nlém áte, álúmté aá móbagé bad ábe béesě bad bé Israel kunze ádúbe, abe áde ábagé bó Edədəj éche Ésáá melemlem ngáne ábagé syánē ámpē. ⁹ Dyōb dénkéntédté bó aá bédé nhəŋlén ne syánē ké mwämpin. Anlagsén bó mbéb áyale adúbe áde bénwälē. ¹⁰ Bōob-pōo, cheé ékáá boj nyéhede' Dyōb akəg, ápemed bad ábe bédúbpé Yesue nted míme ábēd betaa bénkēnhēnlé apém míme ké syánē déehelé apém? ¹¹ Éeboo'é nê! Dedúbpé dekudé-'e e'soosoj mbwiined ne nsimé míme Sáŋgú Yesue, melemlem ngáne bómpe békúdé.”

¹² Moosyáél anlám ehób běwōglān Banabase bó Paal. Banabase bó Paal békánlé'áá bó e'chemléd ne menyáké míme Dyōb ábélé mbwiined ne bó átinté e bad ábe béesě bad bé Israel. ¹³ Áde bémádné, dóo Jemse áhóbeé aá, “A-baányan, nyéwóglén me! ¹⁴ Simōn alúmté syánē áte hén bōob ngáne Dyōb ábootédé ábē e'boj bé nlém alúmed wéé bad ábe béesě bad bé Israel, átéd áde átédé bad átinté echâb ábē ábē bad. ¹⁵ Nén děn ábélé e'yale ábē nkal é'dádəj é'lóné. Éténlédé nén bán,

¹⁶ ‘Mé Sáŋgwéé nhóbé meé, nzé nén ámáá atóm, měpē ámpē, mělōj ndáb echě Dabide ámpē echě empáa.

Mělōj chōm ésyāēl éche émpājtēd áte átímēd-te chō ngáne énsébē abé.

¹⁷ Né déběl bad bé nkōjsé bésyāēl běpē áwém, ípwedé bad ábe béesě bad bé Israel ábē ábēm bad. Mé Sáŋgwéé meé nhóbe.

¹⁸ Mée mbelé boj írmén mekan mébyéén se' bōód.’”

¹⁹ Dóo Jemse ákagké á'sō aá, “Ne me, mímēm mewémtēn médé nén meé deétagté bad ábe béesě bad bé Israel ábe bétimnē Dyōb. ²⁰ Chōm éche détángéné abel édīí átele bō kálag nén bán bědyāg medyé mímē běbágé myōb mémpée néé mende, áyale mímē medyé méesáa'é, běekabé mesón, bědyāg nyam echě běesélē nkáj, bědyāg-ke mekií. ²¹ Debíí nén bán se' bōód béláá'áá mbéndé éche Mosee á ndáb é mekáne á mbwe-mé-nkóme-áte. Békale-'e ábē e'yale dyad ne dyad téé.”

Béténlé bad ábe béesě bad bé Israel kálag

²² Dóo bembapé bé nlómag ne belyáged bé mwembé, ne bad bé mwembé bésyāēl bénýiné nén bán ébóó bán běpwēd bad átinté echâb, bělōm bó á Antyōg nchoo ne Paale bó Banabase. Běmpwēd Judase awě běchágé'áá bán Basabase bó Sailas, bó bad běbe

ábe belyágté'áá átítnté echâb. ²³ Kálag eche bénlômenné bó á Antyog, ebédé nén, "Sé bembapee bé nlómag, ne belyáged bé mwembé, áben baáyanj, sélommme nyé melenten. Nyé ábe nyédé bánned ábe nyéesé bad bé Israel. Nyé ábe nyédyee á dyad á Antyog ne á mbwóg é Siria ne Silisia. ²⁴ Sésónjténe nén bán bad behog ábe békídé áwénd, bêmpé áwéñ, bêpuutád nyé nló áte ne mam mme bélhbé'áá. Boj nyébíí nén bán sénkembagké bó kunze ábel nê. ²⁵ Né-óó, sêdyee ásé moosyael sétíidé nén bán ébóó sépwed donge á bad álóm bó áwéñ. Béwoón Paale bó Banabase ábe sédáá bwâmbwam. ²⁶ Bó bad bêbe bêbagé y  l ábele eched S  n Yesu Kr  st  a   e  eb  n b  b  aa' kw  ed. ²⁷ N  -  , s  lommme ny   Judase bó Sailas, b  l  a ny   melemlem m   mekan mme s  t  nl   ny  . ²⁸ Ed  d  d  n éche És  á ély  gt   sé ât  i n  n s  etagt   ny   ne mekan mémp  e t  t  m  n mekan mme m  d   etogn  n. ²⁹ Ny  edy  g medy   mme b  b  g   my  b   mémp  e n  e m  nde, ny  edy  g meki  , ny  edy  g nyam k   p  g ech   b  e  s  le   nk  y  , ny  ek  b  -   mes  n. Nz   ny  eb  l   m  m  n mekan n   éb  j  . D  ny  in  ne'  mp  e."

³⁰ Áde b  m  á ene k  lag atel, b  nly  g  d   ab   bad á nzii, b  ke-  e á Antyog. Áde b  p  d   áwed, b  nl  d bad ábe b  d  ub  p   Yesue b  sy  el áte boj b  be b  k  lag. ³¹ Áde ab   bad b  l  á ene k  lag, b  mb   menyinge bwâmbwam áy  le nk  laj m   e  w  d b   nl  m mme mb  d   áw  d-te. ³² Judase bó Sailas b  b  d  e bekal b  d  d  d  n, b  nk  l  n-ne bó áy  le e et  n é p  ond  , b  nh  d  d  d   b   mew  mt  n b  w  d-te bó nl  m á abum. ³³ Áde b  l  b   mw   ady  e áwed, bad ábe b  d  ub  p   Yesue b  nly  g  d   b   ne ns  j boj b  t  m ámb  d w  e bad ábe b  nl  m   b  . * ³⁵ Paale bó Banabase b  ndy  e á Antyog mw   et  n é p  ond  . B  y  gt  , b  kal  -   eyale éche S  ngw  é nlat  n ne ekud é bad émp  e.

Paale bó Banabase b  k  bn   áte

³⁶ Éebem  e áte ámb  d en  , d  o Paale ál  nge   Banabase a  , "D  tim ámb  d, dék   dénon ab  d ba  yanj b   Kr  sto dyad-t   áde dék  l   nk  laj m   mme S  ngw  é, boj déh  d-te áte ng  ne mekan m  k  ne  e b  ." ³⁷ Banabase anw  j mew  mt  n âw  le J  n Mak  se áy  el, ³⁸ boj Paale anny  n a   e  t  n  g  ne  , áy  le J  n Mak  se ans  b   b   achene á nzii áde b  ep  d  e ns  n á as  g. Ant  d  d   b   á dyad á Pamfilia át  m ámb  d. ³⁹ Mp  nt  n í ng  ne m  mp   át  nt   ech  b   k  e  y b  k  b  n áte. Banabase ant  d Mak  se b  ch  b   edib b  k   á aloj a Saiprus. ⁴⁰ Paale ámp  e ampw  d Sailase. Ba  yanj b   Kr  sto b  nk  nn  d b   b  n ns  m   mme S  ngw  é nly  gt   b  . ⁴¹ Paale amb  e  n Sailase á mbw  g e Siria ne Silisia b  k  ag b  w  d   mwemb   áte.

16

Timotie aw  jn  e Paale bó Sailas

¹ Paale b  nk   á myad m   Debe ne Listra. Mod nh  g ab  d   áwed aw   b  ch  g  'áá b  n Timotie. Nya   ab  d  e mmwa  d a Israel, m  mp   and  ub   Yesue, boj s  á ab  d  e mod a Grikia. ² Bad ábe b  d  ub  p   Kr  st  a   á myad m   Listra ne Ek  ni  m b  sy  el b  nh  b   mam m   bw  m t  nj  ne Timotie. ³ Ng  ne Paale áh  d  'áá Timotie aw  le áy  el, an'yag m  . Amb  l n   áy  le bad b   Israel ábe b  b  d   m  me mbw  g b  mb  i   b  n Timotie s  á ad  i mod a Grikia. ⁴ Paale bó Timoti b  k  g  'áá myad ne myad b  l  ng   bad ábe b  d  ub  p   Kr  st  a   mekan mme bembapee bé nl  mag ne belyáged b   mwemb   b   Jerusalem b  t  id  , b  l  ng  -   b  n b  h  ide m  m   mekan. ⁵ N  -  , mwemb   n  y  el m  mboot  d aw  u áte á ad  ube-t   mesong   m   bad-te m  ch  gk   epun-t  e  .

Paale any  n  e nd  g

⁶ Paale b  ob   ba  b b  mbw   á mbw  g e Frigia ne Galesia áy  le Ed  d  d  n éche És  á énk  nk  nt  nn   a   b  kal nk  laj m   bw  m á mbw  g e Esia. ⁷ Áde b  p  d   á nch  i m   mbw  g e Misia b  nwan  n as  l á mbw  g e Bitinia, boj Ed  d  d  n éche Yesue énk  mmwa   a   b  s  l. ⁸ N  -  , b  nt  m á Misia, b  sy  g   k  a  y b  p   á dyad á Troas. ⁹ M  m   nkuu Paale anny  n nd  g. Á nd  g-te w  , mod a mbw  g e Masedonia anty  ém ách  a   m   a  , "Hy  g,

* 15:33 Donge á k  lag d  's  o áb  d   nch  o 34: 'Boj Sailase pen ant  i a   móoly  g áhed.'

á Masedonia, éhye éwôŋgen sé.” ¹⁰ Paale amaá-’aá ndóg anyín, dőo séladé yěl âke á Masedonia áyāle sêndöl áte néen bán Dyōb áchénlé sé âkal nkalaŋ mí bwâm áwâb.

*Mmwaád nhóg awě béchágéé
bán Lidia adúbpé*

¹¹ Sênsól á Stíma á Troas, sékē á Samotras ésebán sêtyéeme á nzii. Néé bín é’sângé sétimé’ á Niopoli. ¹² Sêbídé-’aá áhed, séke a Filipi. Filipi adíi dyad ámbáá á mbwóg e Masedonia. Ábédé káéjne dyad áde mbéndé é Roma chémpen chóo békénládtáá. Sêdyéé áhed nguse é e’pun. ¹³ Á Mbwe-mé-nkóme-áte, sênsyáá á dyad-tê sékē á nkin mé edíb. Sênwémtén bán séetân abwág á hōm áhed wéé bad bé Israel békânnéé. Sêndyeé áhed ne bebaád ábe séntânné née béládné áhed, syáabðo sékale’. ¹⁴ Átinté e ábê bebaád mmwaád nhóg abédé áhed awě béchágé’ áá bán Lidia awě ambíd á dyad á Tiatira. Akábé’áá nyorjéé, ásómé’ mebad míme méyäge’ míme mélélé nkun. Ane mmwaád abenlé’ áá Dyōb. Sângwéé ankéléd-te mó nlém á abum âwóglén chöm éche Paale áhóbeé. ¹⁵ Bêndusén mwěn ne eche ndáb esyáel. Ámbid enê, anlóbé sé áwe ndáb. Anhób aá, “Nzé édé bán nyétédé me nêngáne mod awě akoó Yesue adúbe, nyéhye nyédyéé áwêm ndáb.” Ambádnén sé káéj sékē-’e.

Béhédé Paale bó Sailas á mbwög

¹⁶ Epun ehó-g-kóá, sênké á abwág dé mekáne, dőo ngondére e ntâj pág étané sé. Edéadéj é mbéb émbé mó áte, ébélé’áá álângé bad mam míme mélénéd á’só é pónde. Ene ngaj échë ákúmá’áá embél bad ábe bênchan mó ntâj békudé ndun e morné. ¹⁷ Héé ábóótédé syáabe Paale ahíd, ábôné aá, “Ábén bad bédíi bembalede ábe Dyōb á Ngum. Béhyédé nyé aláa ngáne nyémwéé e’soósorj akud.” ¹⁸ Ene ngondére elébé abel nê, epun ne epun-té. Káéjne á asog Paale anlój, dőo ákúnnédé boj álângé’ échë edéadéj éche émbé ene ngondére aá, “Á dín á Yesu Krístæ, nkamlan we néen meé, bíd enén ngondére áte!” Ábwög-ábwög échë edéadéj émbid mó áte. ¹⁹ Áde bad ábe bênchan ene ngondére ntâj, bényiné bán nzii e ngáb ekónléde bó, bêntöl Paale bó Sailas bédolé bó, békéen bó wéé benkamlené ábe bélédé átinté e dyad. ²⁰ Bêmpéen bó wéé benkamlené bé Roma, bélângé bó bán, “Ábén bad bédíi bad bé Israel, boj bérpédé áwéd hén, bérpédé mponjé. ²¹ Béyégte bad e’lem bé mbéb ábe mbéndé éche syáné éehedéé. Syáné bén dedíi bad bé Roma, né-óó, deéhéléé-se dékob nê, deéhéléé-’e-se dehíd nê.” ²² Amute dómpé dénsól áte ábónléd Paale bó Sailas. Dóo benkamlené bé Roma bésáltédé bó mbóté béléd-te bó chó á yěl. Dóo bélomé bad bán béswâdted bó e’tanjú. ²³ Bémáá-’aá bó awanen bwâm boj bélângé bó á mbwög, bélâá-’e nnoré mbwög bán eehúdé bó díd á yěl. ²⁴ Bélângé-’aá nnoré mbwög nê, ahé bó á toj e ndáb e meláá echë edé áte. Anhé bó e’pwög á mekuu.

²⁵ Dyam melúde mé nkui, Paale bó Sailas békânné’áá békânné-’e Dyōb ngæse. Bad bé mbwög ábíníí bésyáel békânné’áá bó. ²⁶ Ábwög-ábwög dőo ndoob énâjnédé ásé ngíne-ngíne. Ndáb e mbwög énâjnéd se á mekon. Melemlem mé pónde e’kob é’syáel bêndibnéd, bengobéngjibé ábe bémbe bad bésyáel áyâl bénhunnéd. ²⁷ Áde nnoré mbwög ápádté ásé boj anyín ngáne e’kob é’syáel é’nédnédé, anwémtén aá bad bé mbwög bésyáel bémáá asob. Héé átéde páá aá mósoo’ yěl. ²⁸ Dóo Paale áchágte ehób amín boj álêbpé aá, “Weewué yěl! Sé moosyáel sêdé hén!” ²⁹ Héé nnoré mbwög áhobé aá bérpined mó etrükáj, asól á ndáb-te, ákwé Paale bó Sailas á mekuu ánæ’ ne mbwög ní ngíne. ³⁰ Dóo ábídné bó á ebwög boj ásedté bó aáken, “A besán, cheé ítângéné abel ákud e’soósorj?” ³¹ Bénlâá mó bán “Dúbé Sângú Yesue, boj ékud e’soósorj, ádôj abum á ndáb dómpé dékûd.” ³² Béñkalé mó ne moosyáel awě ambé mó á ndáb nkalaŋ mí bwâm míme Sângwéé. ³³ Ene pónde chën, mímê nkui, ane nnoré mbwög antéd bó, áwôbé bó síi áte. Hé dën bêndusén mó ne eche ndáb esyáel. ³⁴ Dóo ásónlé Paale bó Banabase á ndáb-te boj ábagé bó ndyéed. Mwěn ne ádë abum á ndáb bémbe menyinge áyâle adúbe.

³⁵ Néé bín é’sângé, benkamlené bénlôm plûse ne nlébtéd néen bán, “Nyéchene ábê bad békag.” ³⁶ Héé nnoré mbwög álângéé Paale aá, “Benkamlené bélomé nlébted néen bán

béchene nyé Sailas. Né-oó, nyébíd nyékag ne nsaj.” ³⁷ Dóo Paale álângéé échê plüsé néen aá, “Bészádtédé sé e’tangu á nhéné áde séebeléé dyamdyam, áde sédíi-aá bad bé alonj á Roma, bélé-’e sé á mbwög. Boj baoób bélédé sé abíded á mesoóm-tê-yé? Éeheléé-sé ébé nê. Ábê benkamlené bé Roma bén bétângéné ape béhye bélidé sé.” ³⁸ Plüsé ênké benkamlené bé Roma aláa ngáne Paale áhóbé. Áde ábê benkamlené bewogé bán Paale bó Sailas bédíi bad bé Roma, mbwög menkób bó. ³⁹ Né-oó, bénké Paale bó Sailas acháy, bélidé bó á mbwög béláá-’e bó bán éboj bán bésyæ áwâb dyad. ⁴⁰ Paale bó Sailas bémibid á ndáb e mbwög, béké á ndáb wée Lidia. Áde bérpédé áhed, bénthán bad ábe bédúbpé Krístæ. Paale bó Sailas bénláá ábê bad e’yle ábe éwéde bó nlém á abum. Bémáá-aá bó aláa boj bésyøngé.

17

Paale bó Sailas békíi á Tesalonika

¹ Paale bó Sailas bémþöñ á myad mé Amfipolis ne Apolonia, bérpë á dyad á Tesalonika. Ndáb e mekáne e bad bé Israel embé áhed. ² Paale ammentén ake á ndáb e mekáne, né-oó anké áwed. Andyéé áwed sôndé éláán. Á Mbwe mé Nkóme áte téé, akánlé-aá bad nkalaj ngáne ímbídé á kálag e Dyöb. ³ Atógnádtáá bó mam ímme ákánlé-aá bó, álumtë-’e bó áte néen aá Ane-awé-Bewógté atángéné néen ákúdé metake ápuú-’e ámbid e kwéed. Alángé-aá bó aá “Anén Yesue awé ínlângéé nyé néen, mó adé Ane-awé-Bewógté.” ⁴ Donge á bad bénđubé bán chom éche Paale áhóbëé édé mbále, né-oó, bénthimén Paale bó Sailas. Bad bé Grikia híin ábe bénđubé Dyöb ne ndale é bebaád bér dyad híin bómpe bénthimén Paale bó Sailas. ⁵ Boj donge á bad bé Israel bésíidé-aá Paale bó Sailas. Né-oó, bénläd donge á bad bér mpongé áte, ábe bérpédé á dyad-té. Bémbuu áte bérpëen-ne etøgké é ngíne. Bémpéen epuutéd dyad áte ásyääl, bérból á ndáb wée Jasene ábel boj békob Paale bó Sailas bérbídén bó á tâl e ékwéé. ⁶ Boj áde bénoré Paale bó Sailas boj bérnyíne bó, bénđöl Jasene ne bad bémpeé ábe bédúbpé Yesue, bérpëen bó ásó é benkamlené bér dyad. Bébóné-aá bán, “Ábén bad bérpëené epuutéd hörn ásyääl. Baoób-poó, bérpédé káájne áwe syáné dyad. ⁷ Jasene ákoo-’e bó áwe ndáb. Bébóo’ mbéndé eche Kaisæ. Béhóbe néen bán kâj empée edé eché bérchagéé bán Yesue.” ⁸ Mmén mekan ímme bénhöbpé mémbe ene ndun e mod ne benkamlené bér dyad bérpuuted. ⁹ Benkamlené bér dyad bémbe Jasene ne bad ábe bédúbpé ábe bénkobpé, bôbôa bésabé morné ábel bérte bér, boj bérte bér.

Paale bôøbe baáb békúdé metake á Beria

¹⁰ Bín éhíné-aá hínén, bad ábe bédúbpé Yesue bélóm Paale bó Sailas á Beria. Áde bérpédé áwed bénké á ndáb e mekáne. ¹¹ Bad bér Beria bénwöñ nlém áwóglén eyale é Dyöb tómaa bad bér Tesalonika. Epun-té, béláá-aá kálag e Dyöb ásójten ányín ké mekan ímme Paale bó Sailas bérhóbé-aá médé mbále. ¹² Ekud é bad éndubé. Ndale é bebaád bér Grikia híin ne baachóm bér Grikia híin bómpe bénđubé. ¹³ Boj áde bad bér Israel bér Tesalonika bémogé bán Paale akalé eyale é Dyöb káájne á Beria, bémpe áwed, bérbôotéd ekud é bad asól áte ápœen epuutéd. ¹⁴ Ábwög-ábwög dôo bad ábe bédúbpé Yesue bélómé Paale á nkin mé edib é nkwé, boj Sailas bó Timoti pen bénlyág á Beria. ¹⁵ Bad ábe bénké Paale alyáged, bénkceen mó káájne bérpëen mó á dyad á Atens boj bétimé ámbid á Beria. Áde bétimé ámbid, Paale anlyágtén bó aá béláa Sailase bó Timoti néen bán bérhye bétan mó á Atens ésebán bérbíté pónde.

Paale akanlé bad bér Atens

¹⁶ Paale andyé á Atens ásiné’ Sailase bó Timoti. Ngáne ásíné-aá bó, nlém mémbeb mó á abum bwâmbwam áyâle annyín néen aá myöb mémpeé ímme bérbagéé edubé mélóné dyad áte ásyääl. ¹⁷ Né-oó anké á ndáb é mekáne ákanlé bad bér Israel ne bad ábe bérnes bad bér Israel ábe bérbagé Dyöb edubé. Akagé-aá káájne átinté e dyad epun téé ákanlé kenzéé awé ampé áhed. ¹⁸ Bôøbe bad ábe bérpédé á e’pepé ábe bérchagé-aá bán Epikurian ne Stoik bómpe bérpëntánnáá. Donge ásédté aá bán, “Cheé anén mod awé abíde dûu mûmô áhóbëé áde éebíi’é dyamdyam?” Bémpeé bérhóbé-aá bán “Édé kabyánán ahóbe tângene myöb

mémpēe.” Béhóbé’áá nê, áyāle álángé’áá bó tângene Yesue ne mpuu. ¹⁹ Dóo bétédé Paale békēen mó á káánsel e mbwóg eche béchágé’áá bán Ariopagus.* Bénhōb bán “Sêdæá ádén ayáge dékōslé áde élângéé bad asônten. ²⁰ Donge á mam áde éhóbéé ádé sé nken á etúu, sseñdæj-’e mó asônten.” ²¹ Bad bé Atens bésyääl ne beken ábe bébédé áwed, bébébté’áá echab póndé esyääl ákal ne âwóglən nkalaj tângene dyam dékōslé-té.

²² Dóo Paale átyéémé ámín ásō é káánsel é Ariopagus boj áhóbé néen aá, “Á-bad bé Atens nnyíne’ néen meé, nyébage myöb edúbé bwâmbwam. ²³ Nhóbe néen áyāle áde ñtómee nyé á dyad-tê, nnøné mebón mme nyébagéé myöb edúbé. Nnyíné abwóg ahög áde nyétélé áhed néen bán, ‘Höm áde dyöb áde déebyééne.’ Ádê dyöb áde nyébagéé edúbé kénée nyéebíi’é dó, dóo ñlângéé nyé bøob. ²⁴ Dyöb áde áhágé nkönsé ne chöm ésyääl éche édë áwëd-te, mó adé Sângwéé a nkøj mí min ne ínsé. Eédyéé’é á ndáb é myöb éche baányoñ bélójné mekáá, ²⁵ eehëdë-’áá chömchöm éche déhèle débe mó abele áde débenléé mó. Ngáne édii néen bán mwën-ee abage alongé, ábagé pemé ne kchéé éche déhedeé. ²⁶ Mod nhög móo ánsëbëe ahëg boj metúmbé mé nkönsé mésyääl mëbíd mbwiined ne ane mod nhög. Abelé bedyee-’e nkönsé áte ísyääl. Adéhób aá móhage bó ammad póndé atíi ne mebwóg wéé bedyee-’é. ²⁷ Ambel néen, ábel boj bëhed mó, nzé bëhëdë-’e mó bëhële-sé bényin mó awog áde bëwogé mó áyä. Kénê, Dyöb déechabnedé syáné modmod áyä.

²⁸ Édë nêngáne mod nhög áhóbé aá,
‘Abé áde dédií ne mó, dedé á alongé, dekag,
dedé-’e chöm éche dédií.’

Édë-’e ámpé ngáne bekal bé ngan bëhóbé bán,
‘Syáné ámpé dedíí ábe bän.’

²⁹ Ngáne dédií-’áá bän bé Dyöb, deetângene néen dékamtanné néen bán Dyöb ádii nêngáne chöm éche bëbénlé gôl, sîlva ké’e aláá áde baányoñ bëbénlé ádab debyéé boj bélóón mekáá. ³⁰ Á póndé eche bad bénkëmbíi’é Dyöb, Dyöb dénkéntédté mbéb mmbab nêngáne dyam. Boj bøob alângé’ moosyääl höm-té aá bëtëde rímab mbeltéd mé mbéb. ³¹ Amaá-’e epun é bïn atíi, éche ákåadté mod-téé nkönsé áte ísyääl nyaa echë etângéné. Apwëdë mod awë ákåad rímë nkáá. Alúmté-’e moosyääl aá ane mod akwëgnédé, apuud áde apúúdté mó á kwéed.”

³² Áde ábë bad bëwogé Paale ahóbé tângene mpuu, dojge á bad bëwéláá mó boj bô dojge á bad bénhōb bán, “Sêhede bán ékale sé rímë nkalaj ámpé.” ³³ Ámbid e nê, Paale anhidé átinté echâb. ³⁴ Káej ne á asog, nguse é bad êntimén Paale bëdúbé-’e Yesue. Átinté e ábë bad, mod abédé áhed awë bëchágé’áá bán Diñesiøse. Abédëe mod a káánsel e Ariopagus. Mmwaád ámpé abédé áhed awë bëchágé’áá bán Damarise ne bad bëmpé.

18

Paale akií á dyad á Körinto

¹ Ámbid enê, Paale anhidé á dyad á Atens ákë á dyad á Körinto. ² Áde ápédé áwed antán mod a Israël nhög awë bëchágé’áá bán Akwilaa. Bénciyáá mó á Pontus. Mmë mesú mën dôo bô mwaád, Prisilia bëmbidté á Italia. Bëmbid á Italia áyäle Kaisëe a Roma, Kladiosë antóméd ehângé aá bad bé Israël bésyääl bésyäe á dyad á Roma. Paale ankë Akwilaa bô mwaád anyín. ³ Andyéén bô bôðbôø bëbele nsón. Bómpé, bélóó’ áá ténde ákud mònë rímë bëtëgnanné yël melemlem nêngáne mómpé ábél’áá. ⁴ Mbwe mé Nkóme áte téé, Paale akagé’áá á ndáb e mekáne, ákanlé bad bé Israël ne bad bé Grikia ábel bëdûbe mam mme áhóbëe.

⁵ Áde Sailase bô Timoti bëbídé á Masedonia boj bétán Paale, ambë eche yël esyääl ákal nkalaj mí bwâm. Alúmté’áá bad bé Israël áte aá Yesue mó adé Ane-awë-Béwógté. ⁶ Boj bëpëntánná mó, bélhöb-’e mó mekan mé mbéb áyä. Nê dëmbël Paale ankëd ebumbú á yël álumed bô nén aá nkògsen í Dyöb ísine’ bô, aláá-’e bô aá, “Nzé nyébáó, né nyébën-ee nyébelé. Meésaá me áte. Bootya bøob, nkag nkalaj mí bwâm akal wéé bad ábe béesë bad

* 17:19 Ariopagus: Abééé káánsel e mbwóg á dyad á Atens.

bé Israél.” ⁷ Né-óó Paale antédé bó áke adyee’ wéé mod nhóóg awé békagé’áá bán Titus Justuse. Tituse abágé’áá Dyób edúbé, ndáb embé-’e mó bénben ne ndáb e mekáne e bad bé Israél. ⁸ Krispusé awé alyágté’áá ndáb e mekáne mómpē andúbé Sángwéé nchoo ne ádē abum á ndáb ásyāél. Bad híin-ne ábe békagé’áá dyad á Körinto, bénwōg mímmê nkalarj, bédubé, békud-te edusen.

⁹ Ébédé nkuu nhóóg Paale annyín ndój. Á ndój-te wéé, Sángwéé anláá mó aá “Weebáá”, kanlé bó ékag á’sō, weétimné mbíd. ¹⁰ Bíí néen weéndé ne wéé, modmod ééhēlēé wéé dyamdyam abel, áyále ábém bad híin bédé á dyad-té hén.” ¹¹ Né-óó, Paale andyee’ áwed mwé nhóóg ne eped, áyágté’áá bad eyale é Dyób.

¹² Áde Kaisée ábélé Galio nkamlené ambáá á mbwógi e Akaya, bad bé Israél ábe békagé’áá wéé bénladén, békob Paale, békéen mó á kóte. ¹³ Bénhōb néen bán “Anén mod atéde bad nlém á abum aá békagé’áá Dyób, nyaa eché eetángene ngáne mbéndé éhōbeé.” ¹⁴ Áde Paale áhóbé aá móhóbé dyam, dóó nkamlené Galio álángeé’áá bad bé Israél aá, “Nzé adén akan démbé néen awusé ké’é dyam dé ebébtéd áde mod ábélé, né nwóó nzom áwóglén nyé bad bé Israél. ¹⁵ Boj ngáne édíí bán adíí dyam dé mpenten tāngene e’yle, mǐn ne échen mbéndé, nyébén nyémad dó. Meekáadtéé’ échê ndín é mehōb.” ¹⁶ Néen démbé Galio anan bó á ndáb e kóte. ¹⁷ Héé bó moosyáél bétolé mod awé alyágté’áá ndáb e mekáne awé békagé’áá bán Sostene, boj békagé’áá mó aá’ kóte. Boj néen dénkémbenlé Galio dyamdyam.

Paale atimé ámbid á Antyog

¹⁸ Paale ankoód mwá adyee’ á Körinto ne bad ábe bédubpé Krístæ. Dóó átédté bó, boj asól á stíma, áchabpé edib é nkwé ákagé’áá mbwógi e Siria. Adéké, anké ne Prisilia bó Akwilaa. Adéhidé á dyad á Senkria, ankéán nló áyále melé míme ámmwéé. * ¹⁹ Bémpé á Efesus. Áde békagé’áá wéé, Paale antédé Prisilia bó Akwilaa, áké á ndáb e mekáne békagé’áá bad bé Israél békale’. ²⁰ Ábé bad bénlää mó bán békagé’áá békood mwá adyee’ ámpé, boj enkéñkwenténné. ²¹ Boj adé áhídté, anláá bó aá “Nzé ntíi n Dyób móó ndé, né mětím ámbid áwéen.” Né-óó, ansól á stíma áhídté-’e á Efesus. ²² Áde ápédé á dyad á Kaisaria, anké á Jerusalem, áké áléléd bad bé mwembé, boj ákagé’áá Antyog. ²³ Áde ákélélbpé mwá adyee’ áwed, anhidé, áké á mbwógi e Galesia ne Frigia ábagé’áá bad ábe bédubpé Yesue bésyáél elébé áwéed bó nlém á abum.

Apolose akalé eyale é Dyób á myad mé Efesus ne Körinto

²⁴ Ámbid ené, mod a Israél nhóóg awé békagé’áá bán Apolose awé bénchyāá’é á dyad dé Alesandria ampé á Efesus. Anén mod abyéé’áá dyam áhóbé bwâmbwam, ansónjtén-ne kálag e Dyób bwâmbwam. ²⁵ An'yágé’áá mekan mé nzii e Sángú. Akalé’áá, áyágté-’e bad mekan míme Yesue nyaa eché etángéné ne kán esyáél. Boj pen edusen éche Jóne chémpen chóó ámbií’é. ²⁶ Ambootéd pôle akal á ndáb e mekáne ésebán abáá’ dyamdyam. Áde Prisilia bó Akwilaa békagé’áá mekan míme áhóbé, békagé’áá mó wéé békagé’áá. Hé-’áá békagé’áá mekan mé nzii e Dyób áte nyaa eché etángéné. ²⁷ Apolose antíi aá mókag á aloj á Akaya. Né-óó, bad ábe békagé’áá békagé’áá békagé’áá békagé’áá. Béntelé bad ábe bédubpé Yesue a Akaya néen bán nzé apedé, békob mó nken. Áde ápédé áwed, anwóngéné bad bwâmbwam ábe békagé’áá békagé’áá békagé’áá békagé’áá. Ne mpenten ngíne, antóm bad bé Israél áte átinté e bad. Ábenlát metón míme mébídé á kálag e Dyób álúmed néen bán Yesue mó adé Ane-awé-Bewógté.

Paale akií á Efesus

* ^{18:18} Bad bé Israél bénwōgi elem néen bán, nzé mod amwédé melé boj alógté mímmê melé atángéné néen ákájné nló.

¹ Apolose ambé abé á Kɔrinto, dōo Paale ápoo ene ped e mbwógo áte bonj ápag á Efesus. Antán nguse é bad áwed ábe bédúbpé Yesue. ² Dōo ásedteé bó aá “Áde nyéndūbēē nyénkūd Edəádəŋ eche Ésáá-yę?” Béntimtén mó bán, “Aáy, séewōgēē ké wógén bán chōm édé éche béchageé bán Edəádəŋ éche Ésáá.” ³ Paale ansedéd bó aáken, “Nyaa e edusen ehéé-’ō nyénkudté?” Bénkwentén bán, “Nyaa e edusen eché Jøne áhóbé’áá.”

⁴ Paale anláá bó aá, "Nyaa edusen eché Jóne áhóbé'áá ebédéé áyēle bad ábe bétédte abel dé mbéb, Jóne álāngē-'e bad bé Israel aá bédúbe ane awé ápē ámbid eché, nédé Yesue."

⁵ Áde ábê bad béwogé chöm éche Paale áhbé, bêndusén bó á dín áde Sángú Yesue. ⁶ Paale ambán bó mekáá á nló, Edéadəŋ éche Ésáá épii-’e bó. Dóo békootédé mehób mémpée ahób ímme bad béesontánne, békale-’e nkalaŋ n̄ Dyob. ⁷ Ábê bad békédé dyam dyom ne bêbe.

*Băñ ábe Skeva békánné ábíded
bad e'déádəñ békéb áte*

Mponqé mپédé á dyad dé Efesus

²¹ Ade rímmén mekan mémáá abenled, Paale ammăd áwē nlém-tê áá móðpöj á mbwóg é Masedonia ne á Akaya boj ákag a Jerusalem. Dóo áhóbeé aá, “Nzé mbídé á Jerusalem ntájngéné ake á Roma.” ²² Né-oo, anlóm bad bébe ábe bewóngánnáá mó, Timotie bó Erastus á Masedonia, mwén-ne ályág á mbwóg e Esia, ádyéé ámpé mwā esón é póndé.

* 19:9 Dongé á kálag dé'só ábádé nchoo bootya dyôm á ngáj ne póg e' mbwembwe ápe ngáj éniin é' ngukél.

éche anén Paale ábeléé. Ahóbe nén aá myöb ímme békénlé mekáá méesaá myöb ne abé dën. Abelé-’e bad híin ábe bédé á Efesus ne á mbwóóg esyäál e Esia, bédúbpé bán mam ímme áhóbeé médé mbále. ²⁷ Né-joó mbáá’ nén meé, nyongé eche syánē ébëb dïn. Saákaá nê dëmpen, mbáá’ meé kéájne ndáb e ndæle e dyöb, Atemise chómpé éebáá dyam dé abelen ámpé. Bad béenyínné mó ámpé néé dyam, áde édíí-’aá bán adíí dyöb áde bad bé Esia bésyäál ne bad bé nköñsé bésyäál békénléé.”

²⁸ Ádē ene ndun e mod éwogé nê bénliŋ bwâmbwam, bébootéd-te abón bán, “Atemise, dyob dé Efesus adé ngum tómaa myób mésyāél.” ²⁹ Mmê mpuutéd ménkonnéd dyad áte ásyāél. Ene ndun e mod entđl Gayose bó Aristakuse ábe bembid á Masëdonia ábe bôobe Paale bénwörj. Béntomén bó mehélé, békéen bó á ndáb e mbom e bad bé dyad. ³⁰ Paale mwën ambojsén ábíd ene ndun e mod á'sō, boj bad ábe bédúbpé Yesue bénkénkwenténné. ³¹ Nguse é bad ábe böhóbpáá mbwog ábe bôobe Paale bêwóó'áá, bômpé bénlômé mó nlébtéd, ne mechángé nén bán eékâgé' áá môkag bad atyéem á'sô wée béládné.

³² Ene póndé, epuutéd êmpé á mbom-tê. Donge á bad békône' áyâle dyam ahgó, ábíníí-'e békône áyâle ádíníí, áyâle bó bad híin bénkembíí' é ké atón áde áládé bó áhed. ³³ Ngáne édií nén bán Alesandaa móó bad bé Israel bêntômëdté á'sô, bad behog bélângé' áá mó bán mó atângéne bad mekan alúmed áte. Héé Alesandaa álumté ekáá aá bad bélâm ehób. Ahedé' áá bad alúmed áte nén aá saké bôobé ábê bad békáá boj mpuuted míbé. ³⁴ Boj áde bad bêchémé nén bán Alesandaa adfi mod a Israel, bó moosyâl bêmbootéd abón bán, "Atemise, dyöb dé Efesus adé ngum tómaa myöb mésyâð." Bémbon nén áyâle háwa ébe. ³⁵ Kéaj ne á asog, mod a mbwôg nhog mó ambëd bad áte. Anhób aá, "A-baányan bé Efesus, moosyâl abií aá dyad dé Efesus dôó ánône ndáb e mekáne eche Atemise, eche syáné ndale e dyöb. Moosyâl abií-'e aá ádén dyad dô anóne káéjne aláá á ngængú áde ábídé ámîn. ³⁶ Ngáne nyé moosyâl nyébíí-'aá nén bán modmod eéhëlëë-se ahé ímmén mekan nswanj, éeboo' é bán nyépœen mpongé ké nhog. ³⁷ Ké nêngáne nyépœné ábén bad hén, bêechibéé chömcchöm á ndáb é myöb, bêehôbëé-'e ádëd dyöb mekan mé mbéb áyâl. ³⁸ Né-oo, nzé Demetruse ne ábê bad bé nsón bewójnë mod mehôb, békfi nén bán e'pun é' kóte é'dé, bad bé mbwôg-ke bédé ábe békâadte. Béhele-se bésomén ane mod áhed. ³⁹ Nzé-'e chöm éppee édë éche nyékoo' é ahed né mbom m̄ bad bé dyad, móó mëyâlë, ngáne mbéndé ékaleé. ⁴⁰ Nhôbe nén áyâle dyam áde ábénlédé chii, ngómenaa a Roma áhôb aá syáné depeéné mpongé. Nzom ké pôg eesaá echë débeléé ímmén mpuuted nisyâð. Nzom e bwâm ké pôg-ke eesaá echë dehele débe bó áyâle ímmén mpuuted." ⁴¹ Áde ámáá ahôb nê anláá bad aá mod téé asúé' áwe ndáb.

20

Paalē akií á Masedonia ne á Grikia

¹ Ade mpuutéd mímaá bon ekíde émad ahoo áte, Paale anlăd bad ábe bédúbpé Yesue áte, ályägtän bó ne e'yle abe é'wede bó nlém á abum. Áde ámaá bó alyägtén dôo áhídté, bon ákág á Masedonia. ² Akagé'áá échê mbwóg, álāngē bad nkalaj hiin íwéde bó nlém á abum. Dôo ápédé á Akaya. ³ Andyéé'-é áhed á etûn e ngon éláán. Aböjsánnáá áke á aloj á Siria, dôo ásónténé aá bad bé Israël böhágke mó âwúu mó. Héé átíidé aá mójtím ámbíd móbwë á Masedonia. ⁴ Bad híin bënwoón mó. Bébédéé Sopataa, mwän awe Piiruse awé ambíd á Beria, Aristakuse bó Sekundus ábe bembid á dyad a Tesalonika. Gayosé awé ambíd á dyad a Debe, Timotie, ne Tikikuse bó Trofimus ábe bembid á mbwóg e Esia. ⁵ Ábén bad bénkë á'so, bésiné' sé a dyad á Troas. ⁶ Áde Ngande e Ewele é Ngén étomé, sénsoj bøle á dyad á Filipi, bon ámbíd e e'pun étaan sëntán bó a Troas.

Paale adřmténé ake á Troas

⁷ Á Sátedé ngukél,* sénladén áte hőm ahgógyé ndyééd âlúmed edənge é Sángú. Paale akánlé'áá bó pôle. Akaláá akal ne akal, kéáne melúde mé nkúu, ngáne édií néñ bán

* 20:7 Donge á kálag áhédé nén bán: á epun é'só é sôndé.

antáŋgén ake néé bín é'sáŋgé. ⁸ Bêncbód e'trúkáŋ híin á toŋ amín wéé sênladénné. ⁹ Kódemod póg ébédé eché békáŋgé'áá bán Yutikuse andyéé á wínde, e'chá e'kééné'áá mó mwátiíd tiíd ngáne e'chá bémbeé mó á díd. Achabed áde Paale ânchabédté pôle áte, dênkéŋ ansól á e'chó-te bwâmbwam. Dóo ápódté á toŋ amín á ndágke eláán, ahún á ndoob. Békíi'-áá mó atéd, bétané amaá awé. ¹⁰ Paale ansúd á ndáb mîn wé, akúdén mó amín bon áseb mó. Dóo álângeé bad aá "Nyéetâgé áte, eewédeé, adíi adé á alongé." ¹¹ Dóo Paale átímé ámbid á ndáb mîn, ásâl ewele áte bonj bôobe bad ábe bédúbpé Krístæb bedyag. Bôobôo bêndoó adyee, békale' pôle káeŋ bín é'sáa, bonj ákag. ¹² Bénlyâgéd ene kódemod á ndáb áde mwén adíi alongé. Ábê bad bémbe menyinje bwâmbwam.

Paale bésyáŋgé á Troas, békíi á Miletus

¹³ Sêmbé á'sô sêssol á stíma-tê, sépöŋ á edib é nkwé, séké á dyad á Asos. Áwed dáo séntâŋgenné Paale apém. Anhôb aá sébê á'sô áyâle nzii e dyad-tê chôo ânkeénné. ¹⁴ Áde átáné sé á dyad á Asos, sêmpém mó á stíma-tê bonj syâabôo sékag á dyad á Mitilene. ¹⁵ Sêhïdté'-áá hê bonj néé bín é'sáŋgé sékag káeŋ sépäg á nkin n dyad á Kiôs. Bín bán bésâa ámpé é'sáŋnéd sé á nkin n dyad á Samos, epun éche émbâtén sépäg á nkin n dyad á Miletus. ¹⁶ Paale antíi nén aá sétom dyad dé Efesus amín âbel bonj seebébté póndé á mbwog e Esia. Ahedé'áá aá mówâmsen ape á Jerusalem epun é Pentekos édêhôb bán chô épag áte.

Paale alyágténné belyáged bé mwembé bé Efesus

¹⁷ Áde sépédé á dyad á Miletus, Paale anlóm nsel wéé belyáged bé mwembé bé Efesus, aá bétan mó á Miletus. ¹⁸ Bépédé'-áá bonj álânge bó nén aá "Nyébén nyébíi ngáne rimbédé ne nyé bootya epun é'sô áde ínsúm mekuu á mbwog e Esia. ¹⁹ Mbënlé'áá Sângwéé ne asuded á yâl ásyâal, nkudé ndutul ne mekâgsen áyâle ahäge áde bad bé Israel béké'áá me. ²⁰ Nyébén nyébíi bán áde nkânlé'áá nyé nkalaŋ mí bwâm, n'yâgté'-e nyé á nhénné, ne áwen mendâb, menkénkojnédé nyé dyamdyam áde déntâŋgén nyé awôngen. ²¹ Melemlem nêŋgáne ménsimmé bad bé Israel etúu áte nê dô'-áá ménsimmé bad ábe béesé bad bé Israel meé bétede ádâb abel dé mbéb, bétimén Dyôb, bédubé'-e awed Sângwéé, Yesue. ²² Bôob-poó, Edâdâŋgé éche Ésáá élûmte me áte aá ntâŋgéné ake á Jerusalem, meeblí'-áá chôm éche ébenléd ne me áwed. ²³ Mbíi pen nén meé dyad-té áde nkagké Edâdâŋgé éche Ésáá émáá me etúu asim áte nén aá mbwog ne ndutul bôo bésine me. ²⁴ Bonj meetédeé ádêm alongé néé dyam, nhede meé mpid mímêm nsón á asog, rímad-té nsón mme Sângú Yesue ábágé me áte. Mímêm nsón ndíi âkal nkalaŋ mí bwâm tâŋgène nsimé mme Dyôb álûmtéé baányoŋ.

²⁵ "Mbédé átînté echêŋ, nkânlé nyé nkalaŋ tâŋgène nkamlén n Dyôb. Bôob-poó mbíi nén meé nyé modmod nyéenyínné me ámpé. ²⁶ Né-oó, nkoo' nyé alâa chii nén meé, nzé nyé mod kâ ahéé abôdé ádê alongé, nyébíi nén bán meesaá me áte, ²⁷ áyâle nén dyamdyam déesaá áde mbâa nyé alâa tâŋgène mekan mésyâal mme Dyôb átîndé aá móob. ²⁸ Nyétédé yâl póndé, nyénone'-e abem á bad áde Edâdâŋgé éche Ésáá ébânné ásê echêŋ, bwâm. Nyébén néé benon bé mbód ânon bad bé Dyôb. Abelé mímêm mwembé ndé mímêm, mbwiined ne kwéed eché Mwán awédé á awog. ²⁹ Mbíi nén meé, nzé mmaá ake, bad bêpé átînté echêŋ melemlem nêŋgáne esob éssoléé á abem á mbód. Béehidé'-áá áde bêebébté nyé mwembé. ³⁰ Póndé épé áde bad bêbíté átînté echêŋ dën, bénabpé metóm, abel bad ábe bédubpé Yesue béké'áá. ³¹ Né-oó, nyétéd póndé nyékamtan-ne nén bán n'yâgté'áá nyé moosyâal nkuu ne mûte á etûn é mwé níláán á metake-tê. ³² Bôob-poó, nlyáge nyé á mekâá mé Dyôb meé mwén ánøne nyé. Nkalaŋ mme níláŋgé nyé tâŋgène nsimé n Dyôb mewôŋgén nyé. Nwóó ngíne âwéd nyé áte, mëbë'-e nyé nsimé mme Dyôb ákóŋnédé ábê bad. ³³ Menkénwóŋgé nlém áte áted mod sîlva, kâ'ë gôl kâ'ë mbóté. ³⁴ Nyébén nyébíi bán mímêm mekâá mën móo ríbénlé nsón bonj nkud ngâb eche syâabe ábêm bad ábe sêbelé'áá nsón séchânné ákéchéé éche séntôgnenné. ³⁵ Nlúmté nyé á menzii mésyâal nén meé nyéwêd yâl áte ábel nsón ngáne ríbél'áá, ábel

boj nyéwôngan bad bé nkole, nyékamtan-ne e'yale ábe Sángú Yesu ánhōbpē aá, ‘Édé nnam mod âbe tómaa âkob.’ ”

³⁶ Paale amaá-'aá ahób nê, bójbe ábê bad bébwóg mebóbój békáne. ³⁷ Bó baásyāél béchyé'áá áde bójbój béléené tâl bésomnē-'e âlyágtan mó. ³⁸ Chom éche êmbud bó ndutul awoged ebédé e ahób áde Paale ánhōbpē aá bényínné mó ámpē mbêd. Dóo békíi mó alyáged á stíma.

21

Paale akií á Jerusalem

¹ Sénlyágtén bó sékē-'e. Sênsól á stíma. Sênchabé edib ésebán sêtyéeme hõmhõm káéj sépē á dyad á Kos. Néé bín é'sángé, sêmpé á dyad á Rodes. Sêsyängé-'aá hê, sékag á dyad á Patara. ² Áwed dóo sétané stíma eché ekag á Fonisia. Sêssolé-'aá boj sébwōgké' eke. ³ Sêmpé á abwóg á hõm áde sényináá aloj á Saiprus áde ádé á mendibte. Sêmbamé dó sésyágké á mbøj sétimé á mbwóg e Siria. Sênsüd á dyad á Tire áyâle áhed dóo stíma éntângenné nted asuded. ⁴ Sêntán donje á bad áwed ábedúbpé Yesue, sêmbé-'e ne bó áyâle e'pun saámbé. Edáédæj éche Ésáá énlyägéd bó béláá Paale bán eekag á Jerusalem. ⁵ Boj áde eched póndé émáá áte sêntedé bó séké. Ábê bad bésyāél, ne ábab bebaád bójbe bän bênye sé alyáged káéj syáabój sêbíd á dyad-tê, sépē á nkin mé edib. Syáabój moosyáél sêmbwóg mebóbój, sékânné'. ⁶ Sêmaá-'aá akáne dóo syáabój selyágténé, sésolé á stíma boj bó-'e bétimé ámbid á ndáb.

⁷ Sênhidé á dyad á Tire, sékesséne échéd eke á'sô, sépē á dyad á Tolema. Áde sépédé áwed, sénleléd bad ábe bédúbpé Yesue, sédyéé-'e ne bó epun ehjog. ⁸ Néé bín é'sángé sênhidé á Tolema séké á dyad á Kaisaria. Áde sépédé áwed sénké á ndáb eché nkal-é nkalaj mí bwâm nhög awé bêchágé'áá bán Filibe, sédyéé áhed. Filibe abédé nhög átinté e bad saámbé ábe bêmpwedité néé benwôngene á mwembé ní Jerusalem. ⁹ Anchyáá bän bé bebaád béniiin ábe bénkembíi mwenchóm. Béhóbé'áá mam míme ríhúú ne Dyöb. ¹⁰ Áde sédií áwed, dóo nkal é edáédæj nhög awé bêchágé'áá bán Akabuse ábídé á mbwóg e Judeya boj ápe. ¹¹ Apedé-'aá wéé sémbéé boj átédé ngáá awé Paale, átâdné rímmé mekuu ne mekáá boj áhôb aá, “Edáédæj éche Ésáá éhôbé aá, nén dóo bad bé Israél bétâdté mod awe awóó anén ngáá á Jerusalem, bébé-'e mó á mekáá mé bad ábe béesé bad bé Israél.” ¹² Áde séwogé nén, syáabe bad bêmpée sêncħané Paale bán eekag á Jerusalem. ¹³ Dóo Paale áhôbæ aá, “Cheé nyébeléé nê, nyéebíi'é bán nzé nyéchye' nyéhûnte me nlém á abum-? Saké átâd me á Jerusalem dëmpen-éé ríbójnséné, mbójnséné ké awé, abele áde míbenléé Sángú Yesue.” ¹⁴ Sênkênhenlé mó nlém ahøjlen á abum, né-óo sêncħené sêhôb bán, “Ébenled ngáne Dyöb átîidé.”

¹⁵ Sêndyeé á Kaisaria nguse é e'pun, dóo séládé yäl boj sékag á Jerusalem. ¹⁶ Donje á bad ábe bédúbpé Yesue ábe bêbídé á Kaisaria bójpē bénwoón sé. Bénkeén sé á ndáb e mod nhög wéé sêntângenné adyee. Bêchágé'áá ane mod bán Naasine. Ambid á dyad á Saiprus, abédé-'e nhög awé anlyág Krîstæ adúbe.

Paale akií Jemse anyín

¹⁷ Áde sépédé á Jerusalem, bad bé Krîsto ábe bédé áwed bénkob sé nken ne menyinge. ¹⁸ Néé bín é'sángé syáabe Paale sénké Jemse anyín. Belyáged bé mwembé bêbédé áhed. ¹⁹ Paale anléléd bó. Áde ámáá bó aleled, anhídé bó chom esyāél éche Dyöb ábélé átinté e bad ábe béesé bad bé Israél mbwiined ne nsón míme mó Paale ábélé. ²⁰ Áde bémáá chom éche Paale áhôbæ awog, bénken Dyöb. Dóo bélângéé Paale bán, “Mmõj enyíne' néé mekan médií á Jerusalem hén. E'kálé ne e'kálé é' bad bé Israél bédúbpé Dyöb bøab. Béhide-'e mbéndé e Mosee ne kán esyāél. ²¹ Bélângé-'e bó nén bán eyágte bad bé Israél bésyāél ábe bédé meloj mémpée nén wé bêehidé mbéndé e Mosee. Bán elângé bó wéé bêeyagé ábab bän, wéé bêehidé-'e elem éche syáné. ²² Bétângéné-'e awog bán epedé. Chán-nô débenlé bøab? ²³ Né-óo, éhîd ngáne sélâa'é wé. Bad bédé hén béniiin ábe bémwédé melé mé Dyöb. ²⁴ Wéhîd bó nyáabój nyéke á nwobe, ésábned-te bó kchéé éche bêhédne bó.

Ene póndé dőo békəēn nló. Nén débél moosyə́l ăbīi aá dyam ké áhéé áde békəbé we á yəl déesaá mbále. Békīi-’e bán mmōj ámpē ebele mekan ngáne mbéndé eche Moſee éhedeé. ²⁵ Boj pen sélommé bad ábe béesé bad bé Israeł ábe bédúbpé Krístəø kálag néen bán békdyág ndyéed eché békagé myōb mémpée néen mende, békəwāg mekií, békdyág nyam eche béesínneé nkəj, békəbē-’e mesón.” ²⁶ Né-oo, néen bín é’sáŋgé Paale antéd ábē bad, békəbōj békē á nwobe. Dőo ásólé á Ndáb-e-Dyōb, ahób e’pun é’tárj nwobe métédté bó. Ámbid enē-’e dőo békəé mende á nló mme bó mod-té.

Békobé Paale

²⁷ Áde e’pun saámbé békəbé á nwobe é’kwogé ape á asóg, dőo nguse é bad békəbé bémibid a mbwōg e Esia bényíné Paale á Ndáb-e-Dyōb. Héé békəbé mpuutéd boj békəbé bad áte, békobé Paale. ²⁸ Békəbé abón bán, “Ábad békəbé Israeł nyéhyag sé hén-ee! Anén mod mó akag hōm-té áyəgté bad aá bad békəbé Israeł, mbéndé eche Moſee, békəbé Ndáb-e-Dyōb, béesaá chōmchōm. Ké békəbé dën apeéneé donge á bad ábe béesé bad békəbé Israeł á Ndáb-e-Dyōb-te, né ábélé-’e enén ndáb e Dyōb eesáá’é ámpē.” ²⁹ (Chōm eche ênkəj boj békəbé nê édíi áyəle bénnyín Trofimuse, mod a dyad dé Efesus bó Paal békəbé á dyad-té. Né-oo, bénwēmtén néen bán Paale asónlé mó á Ndáb-e-Dyōb.)

³⁰ Dyad ásyə́el dēmpuutéd áte, bad békəbé békəbé áwed békəbé Paale abum ámín, békəbé mó káej békəbé mó á Ndáb-e-Dyōb. Ábwōg-ábwōg békəbé-’e ekob é Ndáb-e-Dyōb. ³¹ Áde ábē bad békəbé Paale awúu nê, dőo bad behog békəbé mod ambáá a sánze a Roma aláa bán mpuutéd ndé dyad á Jerusaleł áte ásyə́el. ³² Ábwōg-ábwōg mod ambáá a sánze eebébtéé póndé. Ampwēd sánze émbáá ne esad ásyognéd bó á dyad tē wéé bad békəbé. Héé ásedtēé aáken, “Nzé-módé néen? Cheé ábélé?” ³⁴ Bad békəbé abón. Baahog békəbé échén, ábínií békəbé échén. Mpuutéd ríbédé nyaa eche mod ambáá a sánze énkənhenlé chōm eche ékóó abenled ahed áte. Né-oo, anláá ábē bad aá békəbé Paale á ndáb e meláá. ³⁵ Békəbé mó káej békəbé mó wéé mbwōg ébédé á mmwe í ndáb e meláá. Boj áde békəbé ásól, békəbé mó ámín pémén áyəle amute dēmmǎd ayəg. ³⁶ Ábē bad békəbé békəbé-’áá bó ámbid, békəbé bán, “Békəbé mó!”

Paale alúmté áte aá móók wedeé nkáá

³⁷ Áde békəbé bán békəbé Paale á ndáb e meláá, dőo álāŋgeé mod ambáá a sánze néen aá móówóó mwā dyam áláa mó. Dőo ane mod a mbáá a sánze áhōbē aá, “Néde ehóbe ehóbe é Griķia? ³⁸ Néde saké we edé ane mod a Egipto awě ampē hén póndé pōg boj ábootéd mpuutéd. Anlād e’kélé é sánze é’niin, bad békəbé-’e ehyánge.” ³⁹ Héé Paale álāŋgeé mó aá, “Ndíi mod a Israeł awě abídé á dyad á Tasus á mbwōg e Silisia. Mod awě abídé á dyad áde ádē etógnén. Són émwé ínláá ábén bad akan.” ⁴⁰ Mod ambáá a sánze ambe mó kunze aá áhōb akan. Né-oo, Paale antyééém á’sō é’ ndáb, alúmed ekáá, ekide énhōo baámm! Dőo ábóótédé bó akalēn á ehóbe é Hibrū.

22

¹ “A-besáj ne baányaj ábēm, nyéwóglēn me. Nhede nyé alúmed áte néen meé meekwedéé nkáá.” ² Awóg áde békəbé néen Paale áhōbné bó ehóbe é Hibrū, békəbé metúu atále áte. Héé Paale ákagké á’sō áhōbē aá, ³ “Ndíi mod a Israeł. Békəbé me á dyad á Tasus á mbwōg e Silisia, boj á dyad á Jerusaleł hén dőo íkwogé. Mbédé mwān a esukéle awě Gamalia. Áwe mekáá dőo ítōo mekan mé mbéndé ríme ábēd betaa békəbé-’áá ayəg. Mémpē mbenlāá Dyōb ne kán esyə́l melemlem ngáne nyémpē nyébenlēé mó. ⁴ Bad ábe békəbé-’áá Nzii é Krísto menhē bó á meséb, kááj donge áwāg. Nkóbé-’áá bebaád ne baachóm íhāg-ke bó á mbwōg. ⁵ Prise ambáambáa ne káánsel e bad békəbé esyə́l békəbé békəbé me mbónj bán mbále chōo íkaleé. Menkob kálag áwāb eché béténlé bannned békəbé Israeł ábe békəbé-’áá dyad á Damaskos. Né-oo, menkē áwed ákób ábē bad, áhaŋ bó, ápēen-né bó ámbid á Jerusaleł ábel békəbé-’áá bó.

*Paalε ahóbé ngáne ámwédé Yesue adúbe
(Mbél 9.1-19; 26.12-18)*

⁶ “Áde nkagké, néé mپédé bенben ne dyad á Damaskos, emwedmwed é ngíne émbid ámin tالéd, épén me yăl esyáél. Nén dêmbenléd dyam kəd e' műte. ⁷ Dóo nhúné á ndoob boj nวōgē ehób élânge me aá ‘Á-Sooł, á-Sooł, cheé ékáé boj étagté me?’ ⁸ Dóo nسedteé mó meé ken ‘Nzéé édíí A-Sáj?’ Boj áhōbē aá, ‘Mε-εé ndé Yesue á Nazaret awě étagteé, awě éhédé á meséb.’ ⁹ Bad ábe syáabōo sêbédé bénnyin échê emwedmwed boj bénkênwógké ehób éche mod awě ahóbé áá áwêm. ¹⁰ Dóo nسedteé meé, ‘A-Sáj cheé ntângéné abel?’ Dóo Sájgwéé álânggee me aá, ‘Hidé ásé ékag á dyad tê á Damaskos. Nzé epedé áwed bélâa we chom̄ esyáél éche Dyöb átíídé aá ébel.’ ¹¹ Échê emwedmwed é ngíne êmbel meéhèle’áá anyinéen. Né-ó, bad ábe syáabōo sêbédé bénchâa me á ekáá békëen me á dyad tê á Damaskos.

¹² “Mod abédé á Damaskos awě békhangé’áá bán Ananiase. Abédée mod awě abénlé’áá Dyöb, áhidé-’e mbéndé éche syánē bad bé Israël. Anwónj edúbé bwâmbwam átinté e bad bé Israël ábe bédé á Damaskos. ¹³ Ananiase ampé áwêm, atyéém me á nkèg, boj áhôbè aá, ‘A-mwânned Søøl, bootéd anyínén ámpé.’ Ábwôg-ábwôg membootéd anyínén ámpé, nñoné-’e mó. ¹⁴ Anhób aá, ‘Dyöb áde ábéd betaan ápwédé we ábíi mme ntíi, ânyín awě mbælede awě abele mekan mme métângéné, âwógs-ke ane mbælede ehób á nsæl. ¹⁵ We-éé wébíd mó mbónj âláa bad bésyâæl chôm éche ényíné ne éche éwôgé. ¹⁶ Bøøb-pøø, cheé-ð ésineé? Pádë ásé, ékwënten weé Yesue mó adé we Sângwéé bédusen we. Nén débél Dyöb déwobé rímôñ mbéb.’

Paalε aá Dyōb álómé mó wéε
bad ábe béesě bad bé Israel

¹⁷ “Mentím ámbid á Jerusalém. Áde nkânnéé á Ndáb-e-Dyöb mennyín ndóg. ¹⁸ Á ndógte wê mennyín Sáñgwéé. Anláá me aá, ‘Belé mehélé éwamsen ahide á Jerusalem áyæle bad ábe bédé á Jerusalem hén békobpé chöm éche wéhōbpé tâjgené me.’ ¹⁹ Dóo me-’e nkwentanné Sáñgwéé nén meé, ‘A-Sáj ábén bad békíi bwám nén bán nkagé’áá á ndáb é mekáne nkobé, nwanné-’e bad ábe bédúbpé we. ²⁰ Á póndé eche bewúé’é Stefanusé awé ahóbé’áá mam tâjgené we, mmén membé áhed, nkwentén meé bewúú mó, me-’aá menwálé nkobe rímé bad ábe bénwüü mó.’ ²¹ Dóo Sáñgwéé álângéé me aá, ‘Kág, áyæle mélöm we nchabnede, wéé bad ábe béesé bad bé Israel.’ ”

²² Ábē bad bémbē bewōglān Paale káéjne á póndé eche átubé dín aá mókag wéé bad ábe béesé bad bé Israel. Hê dôo ábê bad békóótédé abón bán “Nyémadén mó! Nyéwúu mó! Eékwoñnedéé ábê á alongé.” ²³ Békóné áá bépebté mbóté ámīn, békumté-’e ebumbú ámīn. ²⁴ Héé mod ambáá a sánze álângéé éche sánze aá békéen Paale békéen mó á ndáb e meláá. Anláá-’e bó aá béswâdted mó e’tangú ábel boj áhâb nzom eché ekéá boj bad bé Israel bétogké mó. ²⁵ Boj áde békáá mó ábel béswâdted mó e’tangú, dôo Paale ásedteé sánze eché embé mó benben aáken, “Mbéndé ebágé kunze néen bán béswâdted mod awé mbéndé e Roma ébélé mó mod a Roma e’tangú áde békáadteé mó-ye?” ²⁶ Áde ene sánze éwogé nê, anké wéé mod ambáá a sánze ásedté mó aáken, “Cheé wewe ébeléé? Ane mod adíi mod a Roma.” ²⁷ Dôo ane mod ambáá a sánze ákíí wéé Paale boj ásedté mó aáken, “Láá me, mod a Roma móo édíí-ye?” Dôo Paale ákwentanné aá, “Ee.” ²⁸ Héé mod ambáá a sánze áhóbeé aá, “Nsábpé nkúú m̄ m̄né boj ngómenaa a Roma ákwentén aá míbê mod a Roma.” Dôo Paale áhóbeé aá, “Me pén ndé mod a Roma se á nchyáátén.” ²⁹ Áde bad ábe békéedéé áá Paale awanen bewogé nê, ábwōg-ábwōg békéedé mó, békéedé ámbid. Mbwóg ménkob ane mod ambáá a sánze áde ádibté néen aá Paale adíi mod a Roma aá móhédé-’e mó á mehañ áde móñkéntângénné.

Paalε atyéémé á nkáásé á'sō é' káánsel

³⁰ Mod ambáá a sénze ahedé'áá akoj dé ahed áte âsónten chöm éche bad bé Israel békébéké béké Paale abélé. Né-óó, néé bín é'sángé, anhób aá békébéké Paale bengobéngobéké aá

mekáá, anlébé-'e beprise bémbáá ne káánsel esyáéál aa bóóbóó békôb mbom. Dóó átédé Paale bon átiidé mó á'só ábáb.

23

¹ Paale annōn ábē bad bé káánsel á mǐd mé mbōm, boj áhōbē aá “A-baányaŋ, kéáejne e'chii, nlém ísásá me á abum bwâmbwam nyaa echě ádêm alongé ádfí á'sō é Dyöb.” ² Héé prise ambáámbáa, Ananiase, álâŋgeé bad ábe békédé bënben ne Paale aá békōm mó abén á nsəl. ³ Dóo Paale áhóbeé aá, “Dyöb ámpē débōm wε. Ehóhó é chōm chén! Edyeé hê ebénlad mbéndé ákáad me, boj ké nê, mmὸn ebóo’ mbéndé ahób áde éhóbé wéé békōm me.” ⁴ Héé bad ábe békibē bënben ne Paale bélâŋgeé mó nén bán, “Esyá’ prise ambáámbáa a Dyöb.” ⁵ Paale ankwentén bó nén aá, “A-baányaŋ, menkémbíí’ é mēé mó adé prise ambáámbáa. Eyale e Dyöb éhóbé aá, ‘Mod eetâŋgeñéé mod awé akamlan bad mekan mé mbéb ahób áyəl.’ ”

⁶ Áde Paale anyíné aá átîntê e echoj é bad éche ébédé áhed, baahóg bédé bad bé epepé é Sadusia ábíníi'-e bédé bad bé epepé é Farisia, anchágéd ehób aláá bad bé káánsel aá, “A-baányan, ndíi mod a epepé é Farisia mbé-’e mwän a mod a epepé é Farisia. Ndé á nkáásé hén áyâle nén nsumé nlém nén meé bad ábe békewé dé békewé.” ⁷ Ahób áde áhóbé nê, bad bé epepé é Farisia ne bé epepé é Sadusia békewé aselen. Echoj é bad éche ébédé áhed ênkabén áte. ⁸ (Nén dêmbenléd áyâle bad bé epepé e Sadusia békewé nén bán nzé mod awédé eepuudéé ámpé, békewé bán ángel eesaá, békewé-’e nén bán e'déadæj béesaá. Boj Befarisia pen békewé bán ímén metón mésyääl méláán medé.) ⁹ Ehób émbé échágké ábê bad ngíne ngíne dóo donge dé bemeléede bé mbéndé ábe békewé á epepé é Befarisia békewé amín, békewé abón ngíne ngíne bán, “Séenyínneé anén mod awusé ké ahág. Kapog né edéadæj ké-’e ángel eko mó dyam aláá!” ¹⁰ Mmê mpenten ménchágé nyaa eché nlém ílhúné’áá ane mod ambáá a sánze aá békewé békewé Paale áte. Né-óó, anláá éche sánze aá békewé á amute-tê wê, békewé Paale á mekáá ímme ábê bad boj békewé mó á ndáb e meláá.

¹¹ Mmê nkuu dën, Sángwéé antyéém Paale á nkəg, aláá mó aá, “Weebáá”, ngáne ébídé me mbón á Jerusalém, wébíd me mbón ámpē á Roma.”

Béhágké Paale

¹² Néé bín é'sáŋgé mbwembwe, nguse é bad bé Israël bêmböm bébel ntíi, bémwë melë nén bán bœdyáá chömkööm, bëemwáá-'áá chömkööm káéj ne bewúú Paale. ¹³ Bó bad ábe bêmbel mímén ntíi bëntöm móom méniin. ¹⁴ Dóo bekíí wée beprise bëmbáá ne belyáged bë dyad boj bélängë bô nén bán, "Sêmwidé melë ne amwé dën nén bán sëeháá chömkööm á nsäl káéj né sêwúú Paale. ¹⁵ Né-óó, nyáâbe bad bë káánsel nyélo me mod ambáá a sánze a bad bë Roma nsäl nén bán ápiined nyé Paale. Nyébâmtan nén bán nyékoo' mam mémpée ahed áte áyâl echê. Boj sé pen sëebë mbojsén âwúú mó adéhób aá mópag hén." ¹⁶ Boj Paale mwânyaj a mmwaád mwân anwög ntíi mìme bëbélé âwúú Paale. Né-óó, anké á ndáb e meláá áké aláá mó. ¹⁷ Dóo Paale áchägeé sánze póg boj álängë chó aá, "Keeené" enén kódemod wée mod ambáá a sánze awóó dyam âláá mó." ¹⁸ Héé ene sánze étédé ene kódemod boj ákeené mó wée mod ambáá a sánze. Héé ene sánze élângëé mod a mbáá a sánze aá, "Paale awë adé á mbwög mó achägë me aá mpeen enén kódemod âwöñ áyâle enén kódemod ewóó dyam âláá we." ¹⁹ Dóo ane mod ambáá a sánze áchängë mó á ekáá boj ásïdnâd mó á nkëg ásëdté mó aá "Cheé éhëdeé me aláá?" ²⁰ Dóo ene kódemod élângëé mó aá, "Bad bëmbáá bë Israël bëtïidé nén bán bélâa we bán épëen Paale á'sô é' káánsel, ne mbâmten nén bán káánsel ehede mam mémpée atón dé ahed áte tângene Paale. ²¹ Boj weewöglán bô áyâle bad bëdë tómaa móom méniin ábe bësööm âsin mó. Bëmwidé melë nén bán bœdyáá chömkööm bëemwáá-'áá chömkööm káéj né bewúú mó. Bëmáá abojsen, bësine-'e chöm éche wéhöbpë." ²² Dóo ane mod ambáá a sánze álângëé mó aá, "Weelângë modmod wëé mólângë me ádén dyam." Amaá-'áá ahíb nê dóo álângë ene kódemod aá ákag.

Békééné Paale wée nkamlene, Feligse

²³ Dóo ane mod ambáá a sánze áchénlé éche sánze émbáá émpēe ébe boj álāngē bó néen aá, “Nyétéd mbwókel é sánze ébe, nyébojsen chó áke á Kaisaria nchoo ne sánze móom saámbé éche ékeené hóse ne mbwókel é sánze ébe éche éwanne mekoñ. Nyáābōo nyébojsen nyéhide dyam ngáej abog nkuu. ²⁴ Nyéhede-’e Paale hóse eche ékeen mó. Nyélyáged mó nyépēen mó wée nkamlene Feligse ésebán dyam dé mbéb ábenlédé mó.”

²⁵ Bédéké antel kálag eche bénwälēē eché ehóbe néen aá,

²⁶ “Me, Kladios Lisiase me-eé ntenle we, nkamlene a edúbé ambáá, Feligse. Nlěnté we.

²⁷ Bad bé Israel bénkōb anén mod békédé-’e mó awuu. Nsójténé-’áa meé adíi mod a Roma, dóo syáabe échém sánze sékií mó ahúd áwab mekáá. ²⁸ Nhédé’áá meé ímbíi chöm éche békobé bán abelé. Né-óo, menkeen mó á káánsel. ²⁹ Nhédé áte nnyíné néen meé eébeléé dyam áde álumte néen bán atángéné awé ké-’e atángéné ake á mbwōg. Mam mésyāél míme békobé bán abelé médíi mam míme ménöne échab mbéndé. ³⁰ Bélángé-’áá me bán bad bé Israel békagke mó áwuu mó, dóo nílomé mó áwōj ábwōg-ábwōg. Nlángé-’e bad ábe békide mó mekuu meé, békhe béláa we chöm éche békobé bán abelé.”

³¹ Éché sánze émbél ngáne bénláá’é bó bán békéen. Béntéd Paale békéen mó nkuu ne nkuu kááej békéen mó á dyad á Antipatris. ³² Né bín é-sángé, sánze éche ékéénáá mekuu éntím ámbid á ndáb e meláá, békéen sánze éche ékééné’áá hóse ákeen Paale. ³³ Békéen mó á dyad á Kaisaria. Áde békéen békéen ene kálag béké-’e Paale áwe mekáá. ³⁴ Áde ane nkamlene áláá ene kálag ansedéd Paale aáken mbwōg ehéé ábídé. Áde ásójténé aá Paale abídé á mbwōg e Silisia, ³⁵ anhób aá, “Méwōg kékéé éche éwóó ahób nzé bad ábe békide we mekuu békéen.” Héé álángé sánze aá békéen Paale á ndáb e káj eche káj Herodé ánlóngé, bénöne-’e mó áhed.

24

Paale atyéémé á nkáásé á’sō wée Feligse

¹ Ámbid e e’pun é’táan, prisë ambáámbáa Ananiase, anké á Kaisaria nchoo ne dojge á bad békobé békéen ne mod a mbéndé nhóg awé békagé’áá bán Tetuluse. Békéen á’sō wée nkamlene Feligse, békobé mekan míme békobé bán Paale abelé. ² Dóo békagé Tetuluse boj ábootéd Paale mekan ahób á yél, aá, “Á-nkamlen Feligse, we awé edúbé échábé ámín. Debyéé áde ébenladté ákamlen ápéénédé syáné nsaj á etún é póndé. Ebélé-’e nhəylén híin míme ímpééné mboj áwēd aloj-té. ³ Sékobé-’e nê hōm ásyāél ne póndé ésyāél. Séságnan-ne we bwâmbwam. ⁴ Meéhédéé néen meé ímbud we póndé abébed boj pen ndáá acháj néen meé ébenled áboj e’boj bé nlém, éhê sé mwā etál, éwóglén mwā dyam awé séwóó ahób. ⁵ Sénýíné néen bán anén mod adé ekun é mbéb átinté e bad. Apeéné epuutéd átinté e bad bé Israel nköjsé áte nísyāél, adé-’e nlyáged nhóg a epep e Naazarin. ⁶ Aponé edúbé é ndáb e Dyób asuded, dóo sékobé mó. * ⁸ Nzé esédté mó, mekan míme áláá’é we mmöj wényín néen weé chöm éche séhóbeé édé mbále.” ⁹ Bad bé Israel ábe békobé áhed, bómpe bénösl áte békobé bán mekan míme Tetuluse áhóbeé méde mbále.

Paale akáádé nkáá á’sō wée Feligse

¹⁰ Héé dóo nkamlene, Feligse ábágé Paale etál aá áhób akan, boj Paale ábootéd ahób aá, “A-saj, mbíi néen meé ekékaad nkáásé á aloj tê hén á etún é póndé, né-óo ndé menyinge ákáa mímêm nkáá áwoj e’só. ¹¹ Nzé ehédé áte, mmöj wényín néen weé éetoméé dyôm dé e’pun ne é’be áde níkíi á Jerusalem ábe Dyób edúbé. ¹² Ké epun bad bé Israel békéen néé sé mod sépentanné á Ndáb-e-Dyób, békéen-’áa néé ímpuutadté bad, ken á ndáb e mekáne ké-’e kékéé á dyad tê. ¹³ Béewoo’é chömchöm éche élumte néen bán mam míme békobé bán mbéle méde mbále. ¹⁴ Boj nkwentan pen néen meé, mbenle Dyób áde ábéd

* ^{24:6} Dojge á kálag dé’sō ébádé nchoo 6b-8a: Séntíi bán sékâdte mó ngáne echet mbéndé éhóbeé. 7 Boj mod ambáá a sánze, Lisiase, ampé ákobén sé mó ne epame. 8 Dóo Lisiase áhóbeé aá bad ábe békagé mó dyam békéen e’só.

betaa békénlé'áá, ahíd áde íhídeé Nzii eché etáŋgéné. Ndúbpé káájne mam mésyāāl míme méténlédé á mbéndé e Moses ne á kálag é bekal bé'dáedəŋ. ¹⁵ Mémpé nsumé nlém ne Dyōb melemlem née ábén bad bén ámpé, nén meé bad bésyāāl bépuú, bé bwám ne bé mbéb. ¹⁶ Nê dó-'áá ákáá boj íwané áte póndé ésyāāl ábel boj nlém nísâŋ me á abum á'sō é' Dyōb ne á'sō é baányoŋ. ¹⁷ Mensyāg aké á Jerusalem nguse é mwé, né-oó menké áwed áwánled ábém bad mwá mɔnē ne ábē Dyōb mendé. ¹⁸ Áde íhídeé mímén mekan ámbid, dóo ábén bad bétáné me á Ndáb-e-Dyōb, áde mímáá mekún mé nwobe amad. Ndun e mod eebédeé áhed, mpuutéd-te ménkembáá. ¹⁹ Boj bad bé Israel békédé áhed ábe békibid á mbwág e Esia. Ké bad békágé'áá bégap áwōŋ áláa we dyam áde mbélé né bōo béntāŋgēn apé, nzé émbé néen bán membé dyam. ²⁰ Ké'é ábén bad ábe bédé hén, bén béláa we dyam dé mbéb áde mémbenlé áde bénkāadté mímén nkáá á'sō é' káánsel, ²¹ éetómee dyam ahóg áde mémbenlé. Menchágéd ehób nén meé 'Békáadte me chii nén áyále ndúbpé nén meé bad ábe békénlé bépuú.'

²² Feligse abédéé mod awé ammád Nzii e mbále asôŋten. Dó-'áá áhúdé nkáásé ásé. Anláá bó aá, "Nzé nkamlene Lisiase apedé, dóo mēbídēdté mímén nkáá mbakú." ²³ Hé-'áá áláŋgē sónze e mbáá eché enoné'áá Paale aá átéd Paale, ábē ánōne mó. Aá, boj pen ábe mó mwá kunze áhé-'é etál nén besón ábe Paale békéenad mó kékéé éche átognéné.

Paale atyéémé á'sō wéé Feligse bó Drusilia

²⁴ Nguse é e'pun ámbid ené, Feligse ampeén mwaád Drusilia. Drusilia abédéé mwán a Israel. Feligse anlóm Paale achág, áwóglən nkalaŋ míme Paale áláŋgēe mó tâŋgēne adúbe á Yesu Krístəə. ²⁵ Paale aboótédé-'áá mó akale, áláŋgē mó ngáne mod átáŋgéné abé á bwám awále, ngáne mod átáŋgéné yěl acháə bwám, ne Epun é nkáá eche éhúe'. Dóo mbwág nkóbé Feligse. Héé áhóbeé aá "Sébé ekag bōob. Nzé nkudé etál ámpé měchēlē we."

²⁶ Mewémten mēbédé mó ámpé aá Paale ábe mó mwá mɔnē ámbid-ámbid, nén dēmbél alómé'áá mó achág póndé té ákanlé mó.

²⁷ Nén dēmbenléd áyále mwé mbé, dóo Pokus Festuse átédé etál éche Feligse néen nkamlene. Ngáne Feligse áhédé'áá aá bad bé Israel békéen mó bwám, antedé Paale á mbwág.

25

Paale aá Kaisee mímó ákáad mó

¹ Festuse ampé á mbwág e Kaisaria átéd atii dé nkamlen. E'pun é'láán ámbid ené, ambid á mbwág e Kaisaria ákē á Jerusalem. ² Á Jerusalem wé, beprise békibáá ne bad békibáá bé Israel bénlāā Festuse mekan írme békibé bán Paale abelé. Bénchāŋ Festuse ³ bán áwōŋgen bó ábel békéen Paale á Jerusalem. Bénlāā mó nê áyále békag áwúu mó á nzii. ⁴ Festuse antimtéen bó aá, "Paale adé á mbwág á Kaisaria, mmén-ne mětím ámbid áwed mwāmpin í póndé. ⁵ Né-oó, nzé édé nén bán Paale abelé dyam dé mbéb, ábēn bad békibáá békibé me á Kaisaria, békéen mó."

⁶ Festuse andyéé á Jerusalem ámpé dyam e'pun waam ké'é dyōm boj átimé' á Kaisaria. Néé bín é'sáŋgē, andyéé ásé ákáad nkáá. Anhób aá békéen Paale á kóte. ⁷ Áde békéené Paale, bad bé Israel ábe békibid á Jerusalem béktyéem mó benben békibid e'békibid e' mekan ahób, ábe békibé bán abelé, boj békéen mó alúmed nén bán akoó mímé mekan abel. ⁸ Paale anhób aá mekan míme békibé mó áyáel méesaá mbále. Anhób aá, "Meébélé dyamdyam áde álümte bán ntâŋgan mbéndé e bad bé Israel, ké'é Ndáb-e-Dyōb ké'é Kaisee a Roma." ⁹ Festuse ahédé'áá aá mókud dín á bwám á'sō é' bad bé Israel. Né-oó, ansédéed Paale aá, "Ebōŋséné aké á Jerusalem ábel nén nkáad we áwed tâŋgēne mímén mam míme békibé we á yěl-é?" ¹⁰ Paale anhób aá, "Á kóte eche Kaisee a Roma dóo nkáad we áyáel nén, áhed dó-'áá béktyéem me akáad. Meébélé bad bé Israel dyam dé mbéb ké ahóg, mmón ámpé ebíí nê bwám. ¹¹ Nzé édé nén bán mbóó mbéndé eché ekwōgnédé mbakú e kwéed, né nkwegnéne awé. Boj nzé édé nén bán mam míme békibé me áyáel méesaá mbále, né modmod eewoo'é kunze ábe me áwab mekáá. Né-oó, nhóbe nén meé Kaisee mímó ákáad

me.” ¹² Dóo Festuse áláñjténé nló ne ábē bad ábe bélóbé mó, boj ákwentán aá, “Ngáne émáá ahób wě Kaisee mōðkāād wε, etáñgéné ake wéε Kaisee.”

Festuse alúmté kēj Agripa nkáá míme Paale áte

¹³ Nguse é e'pun ámbid enê, kēj Agripa bó Benise, bempé á Kaisaria ákob Festuse nken. ¹⁴ Áde bémádé áwed nguse é e'pun, Festuse anlúméd kēj Agripa ehób éche Paale áte. Anláá mó aá, “Mod adé hén awé Feligse ânchenéé á mbwøg. ¹⁵ Áde mípédé-'e á Jerusalem, beprise bémbáá bé Israel ne bad bémbáá bé dyad bénhōb mam míme békóbé bán abelé, békáj-’e me bán nkwid mó nkáá. ¹⁶ Boj me-'e menláá bó meé bad bé Roma békóó elem néen, békéhléé-se békídéd mbakú néen bán mod akwedé nkáá, ésebán asébpé akáadé míme nkáá á'sō wéε bad ábe bésómné mó. Bétáñgéné mó etál abe ákáá míme nkáá. ¹⁷ Né-óó, áde békédé hén, menkembébdé póndé. Née bín é'sángé sáñgén, mendyé ásē á kóte nhób-pe meé békéen mó. ¹⁸ Bad ábe bésómné mó béktyéem ámín áhób mam míme ábélé, boj bénkénhóbpé bán abelé dyam dé mbéb ké ahág áde ménwémténné meé békóbé bán abelé. ¹⁹ Ehób ésyāel ébédéé nswaj míme bénwōngé ne Paale tângene adúbe ádāb ne dín á mod nhób awé békájéé bán Yesue awé amaá awé boj Paale ahóbe aá adé á alongé. ²⁰ Menkéngé abíi ngáne íhláá-se íhēd mímén mekan áte, né-óó, mensédéd Paale nzé ádāj ake á Jerusalem ábel boj békáad mó áwed tângene mekan míme békóbé bán abelé. ²¹ Boj Paale anhób aá béké békane mó á mbwøg káaj ne á póndé eche Kaisee ábídédté míme nkáá mbakú. Né-óó, menhób meé sánze ébē énōne mó káaj ne á póndé eche mélómmé mó wé Kaisee.” ²² Héé kēj Agripa álángeé Festuse aá, “Mmén mēdəj anén mod awóglén.” Festuse antimtén mó aá, “Wéwōglén mó chän.”

²³ Née bín é'sángé, Agripa bó mwánya Benise bempé ne edubé ésyāel ne esímo. Bénsöł á ndáb eche mbwøg éládné’áá nchoo ne sánze é mbáambáá ne bad bémbáá bé dyad. Festuse anhób aá béké bétéd Paale békéen mó. ²⁴ Dóo Festuse áhóbeé aá, “A-kēj Agripa ne bad bésyāel ábe syáabðo sédé hén. Anén mod awé nyényíneé hén néen, adíi mod awé bad bé Israel, ábe bédé wén ne ábe bédé á Jerusalem békéené ehób áwém bán abele mekan mé mbéb. Békáj e'saad néen bán eetângeneé abé á alongé. ²⁵ Boj mmén meenyíneé dyamdyam áde anén mod ábélé áde átângéné kwéed. Ngáne édii'-aa bán mwéñ-ee anhób aá Kaisee mwéñ-ee ákāad míme nkáá, né-óó, nhóbé meé mélóom mó áwed. ²⁶ Ké nē, meekoo' é dyam awón áde mételéé Kaisee áyāl eché. Né-óó, mpeéné mó hén á'sō é' bad, bwâmbwam á'sō ábōj, a-kēj Agripa, ábel boj nzé mmaá éche ehób ahed áte, íwôj chóm éche métenlé. ²⁷ Áyāle néen éebáá bwâm me álóm mod á mbwøg ésebán nlûmte áte bwâm dyam áde ákóó abel.”

26

Paale akáadé míme nkáá á'sō wéε kēj Agripa

¹ Dóo kēj Agripa álángeé Paale aá, “Ewóó kunze bøob áhób dyam.” Paale ansálé ekáá áte, boj ábootéd akáa. Anhób aá, ² “A-kēj Agripa, ntédé néen meé yél eboó me áte ânyín néen ntyéémé awon e'só chii ákáá áhúd mekan mésyāel áyāl míme ábén bad bé Israel békóbeé bán mbelé. ³ Nhóbe nē áyāle néen, mbíí néen meé edii mod awé asójténé e'lem é' bad bé Israel, ne wéε nswajten mbídeé bō. Né-óó ncháá we néen meé éched yél, éwóglén me. ⁴ Ábêm bad bé Israel békíí alongé ádêm se á mwéndemé áde míbédé á Jerusalem. ⁵ Bélyógé me abíi. Nzé bédáá-'e, né bén béké békíí mbój néen bán se á mbooted, mbédé mod a epepé éche éhíde' mímed mekan mé Dyób ámbid nyaa eché ewúú áte. Nhíde' ngáne mod a epepé é Befarisia átângéné abel. ⁶ Bøob-poó, nzé ntyéémé á nkásé hén chii, né édii áyāle e'lyág bé nlém abe íwóó néen meé Dyób débelé ábēd betaa chóm éche áhóbpé aá móðbclé bō. ⁷ Ádén dyam dó-'aá mímed metúmbé dyóm ne mébë mésúmé nlém áyāl bán béküd, abe áde békageé Dyób edubé nkoo ne mûte. Boj ábén e'lyág bé nlém bén-naá é'káá boj bad bé Israel békóbé' me mam mé mbéb á yél, a-kēj. ⁸ Cheé ékáá boj nyé bad bé Israel nyéhélé adúbe néen bán Dyób ápuudte bad ámbid e kwéed? ⁹ Mmén ámpé menwémtén meé ntângéné néé nhédé nzii ésyāel ábébed dín áde Yesue, mod a Nazaret.

¹⁰ Né-'áá mêmbeñlé á Jerusalem. Menkúd kunze wée beprise bémbáá, nhé-'e bad bé Dyöb hín á mbwög. Nzé bembidé-te mbakú nén bán bétájgéné awé, mémpē nkwentánnáá.

¹¹ Memmentén bó akógsen á ndáb é mekáne ésyääl, nhedé nén meé bélhöb Yesue mam mé mbéb áyäl. Ekañ énköb me áte áyäl echâb nyaa eché nkágé'áá á myad mé melorj mémpéé átaged bó.

Paale ahóbé ngáne ámwédé Yesue atimén

(Mbél 9.1-19; 22.6-16)

¹² “Enén nzom chóo ekáé boj nkág á Damaskos ne kunze ne ekag éche beprise bémbáá bembéé me. ¹³ A-kâj, á nzii wê, dyam kâd, dô-'áá ínyiné e nyinéen bé ekide ábe é'pene' tómaa enyen, é'bídé ámín é'læjnéd me ne bad ábe syáaböö sénwöö. ¹⁴ Sé moosyäel sénhún ásé. Héé ínwogé ehöb élânge me á ehöb é Hibru aá, ‘Á-Saöl, Á-Saöl, cheé ekáé boj ehé me á meséb. Nzum eché éwanneé me edíi nêngáne mwän ákwagleé abíi ányar. Eché yäl chén-eé ábèleé mbéb.’ ¹⁵ Dôo ísédté mó meé ‘A-Sáj, Nzé-módé édíí?’ Dôo Sájgwéé átamtanné me aá, ‘Mé-eé ndé Yesue awé éhágké á meséb. ¹⁶ Bøöb-pöö, hidé ásé étyéem ámín. Mpiídé we ápwed we nêngáne áwém mbølede. Wé-eé wélâá bad ábe belyágé ásé chóm éche ényiné chii ne éche mélümédté we á póndé eché ehúe' á'sö. ¹⁷ Mésööj ádööj alongé á mekáá mé bad bé Israel ne á mekáá mé bad ábe béesé bad bé Israel ábe mélöommé we áwab. ¹⁸ Wé-eé wenedé bó mïd ábel böhide á ehíntén-té, békud e'nyinéen bé ekide, böhídé-'e ásé e nkamlen í Satan bétim á nkamlen í Dyöb. Né débél béküd alagsen dé mbéb, béké-'e höm ahög ne bad ábe Dyöb ásánté ne adúbe áde bédubpé me.’

*Paale ahóbé chóm éche ekáé
boj bad bé Israel bósomén mó*

¹⁹ “Né-óó, a-kâj Agripa, ndög eché ménýinné eché ehúu ádyöb, menkembángé chó ahíd. ²⁰ Bootya hê, membootéd nkalañ mó bwâm akal, membootéd á dyad á Damaskos, nké á Jerusalem boj nítimé á mbwög e Israel esyääl, ne á mbwög e bad ábe béesé bad bé Israel. Nkänlé áá bó meé bétéde mímab mbéb bétimen Dyöb, békule-'e mekan míme mélümte' nén bán bétedté rímbab mbéb. ²¹ Akal áde nkálé'áá rímmén nkalañ dôo dënökj boj bad bé Israel békob me áde mibédé á Ndáb-e-Dyöb bëpön-ne me awúu. ²² Boj kéájne bøöb, Dyöb dën dôo ákewööngén me. Né-óó, ntyéémé hén ákale nyé moosyäel mbále. Ken bad ábe bédé etógnén ké'e ábe béesé etógnén. Mekan míme nhóbeé médíi melemlem mé mekan ríme bekal bë'daédañ ne Mosee bénhöbpé bán mëbenlé. ²³ Bénhöb bán Aneawé-Bewógté atájgéné ákud metake, abé-'e mod a'só ápuu. Ákalé bad aá e'nyinéen bé ekide é'pente' ábëd bad bé Israel ekide bøöb é'penté-'e bad ábe béesé bad bé Israel.”

²⁴ Nyaa eche Paale ánkää'é embél Festuse ankáné mó áte aá, “Á-Paal weesáa'é-yé? Ádööj ayáge ámbáá áhede we mën apid-e?” ²⁵ Paale ankwentén aá, “A-kâj e edúbé, meépagké mën. Chóm éche nhóbeé édé mbále nhóbne-'e debyéé. ²⁶ Mëpanléd kâj mímén mekan mésyääl áte áyäle mbíi meé asónjténé rímmén mekan. Ndúbpé nén meé mwén asónjténé akan téé áde ábénlédé, áyäle dyam áde ábénlédé déebenledéé á e'kojnéd-te. ²⁷ A-kâj Agripa, edúbpé mekan míme bekal bë'daédañ bétélé ásé-yé? Mbíi meé edúbpé mó.”

²⁸ Agripa antimtén Paale aá, “Áyäl e anén mwä esój á póndé dôo éwémténé weé móhele móbél nítimén adúbé á Krístæ?” ²⁹ Paale ankwentén aá, “Ébê ké á esój é póndé ké'e póndé eche echabé áte, nkânné' Dyöb nén meé, we ne moosyäel awé awóglan me, ábë ngáne ndíí. Boj pen meekánnéé meé böhé nyé bengöbengöbë ngáne böhédé me nén.”

³⁰ Dôo kâj, nkamlené Festuse, mwänyan a kâj, Benise ne bad bësyääl ábe böhédé áhed böhídté ásé áké. ³¹ Bémáá-'áá abíd, áde békagké né dôo bëbóótédé akal nén bán, “Anén mod eébeléé dyamdyam áde ákwógnédé áhöb bán bëwúu mó kë'e böhé mó á mbwög.”

³² Héé Agripa álârgeé Festuse aá, “Nheláá-se nítedé anén mod nzé enkênhöb aá Kaisse móomäd míme nkáá.”

¹ Áde bémáá atíi bán sésôl á stíma áké á alonj á Italia, bêmbé Paale ne bad bé mbwög bémpée á mekáá wéé mod a mbáá a sánze awé béchágé’áá bán Juliøse. Juliøse akamlánnáá echoj é sánze éche béchágé’áá bán “Echoj é sánze é Kaisere.” ² Sénsl stíma á dyad á Adramitium. Ene stíma emmäd abojsen áké á nkin mé edib é nkwé á mbwög e Esia. Dóo sébwógrké eke. Sêdé ake sénwálé Aristakuse. Aristakuse abédée mod a mbwög a Masedonia, awé ambíd á dyad á Tesalonika. ³ Néé bín é’sángé, sêmpé á dyad á Sidon. Juliøse amboón Paale nlém. Antedé aá áké ányin baáb, bébe mó kchéé éche átognéné. ⁴ Sênhidé hê, sébwogé eke. Boj ngáne édii bán epub é ngíne échómmé’áá sé á’sö-te, sêmbamé epub, sébwé benben ne mbwög e Saiprus ped eche epub énkembáá ngíne. Saiprus abédée mbwög eché mendib ménløjnédé. ⁵ Héé sétédé nkin á ped e mbwög e Silisia ne mbwög e Pamfilia boj sésél á edib é nkwé-te sépág á dyad á Mira á mbwög e Lisia. ⁶ Áwed mod ambáá a sánze annyin stíma eche ebídé á Alesandria etime’ á Italia dóo áhédé sé áwé-te. ⁷ Bootya hê, stíma ekeéné sé mwáløyløj e’pun híin bó-’é é’tome’ sêdöhob bán sépag á dyad á Sinidus. Ngáne édii bán epub échómmé’áá sé á’sö-te, sénkênhenlé ake á’sö ene ped. Né-óó sêmbamé sépój á ped e mbøj wéé epub éebude’áá atóm. Sêntóm á Kep Salmon sépē á mbwög e Krët eché mendib mélájnédé. ⁸ Sêmbamé nkag mé edib mën ne mën, sêdöhob bán sépag á hõm áde béchágéé bán Sef Habøs. Ádê hõm déechabnedeé dyad á Lasi áyæl.

⁹ Sêndyeé áwed bwâmbwam káéj ényínnéd nén bán nzé sêkií á’sö né dyam dé mbéb áhèle ábenléd sé, áyæle ene póndé mwé mêmmd apé á asog, Epun é ngande e abe dé mende mé Alagsen dé mbéb chó-’é emmad atóm. Né-óó, Paale ambe bó elébé aá, ¹⁰ “Amúé, nnyíne nén meé bootya hén bøøb éhèle ébëen syáné ebébtéd ákæen échén eke á’sö. Nted mëbëb bwâmbwam, stíma ebéb, nló m̄ bad-te nhèle nítóm.” ¹¹ Boj ane mod a mbáá a sánze andubé dásö chõm éche mod ambáá a stíma ne mod awé awóó stíma bénhöbpé, enkendubéé chõm eche Paale ánhöbpé. ¹² Ádê abwög á hõm áde stíma émbëë áhed, dénkembáá hõm áde mod áhèle ádyéé á póndé eché ekukud étoméé. Né-óó, bad ábe bëndøj nén bán békag á’sö bewanen bëpe á dyad á Fonis bôø bëmbuú áte. Fonis abédée hõm áde bëbanneé stíma á mbwög e Krët áde ánone’ á akuu ne á mbøj. Áhed-taá böhél’áá-se bëdyé á póndé e ahéb á ngíne.

Ekukud étané Paale bó á edib é nkwé-te

¹³ Mwă epub awé abídé á mbøj ambootéd atóm. Dóo ábê bad békámténé bán bëhele békéen rímab ntíi á’sö. Né-óó, bénhüd ekii éche bëbwogneé stíma, boj bëbammé’ nkin mé edib m̄ mbwög e Krët. ¹⁴ Boj bëpedeé ké ake boj epub é ngíne éche béchágéé bán “Epub é ped e akuu” ébídén ekukud á Krët ébootéd atóm ne ngíne. ¹⁵ Échê epub éntinéd stíma. Nzii enkembáá áké á’sö wéé epub ébideé. Né-óó, sênsog yæl awaned áte akeen stíma á’sö, sétédé nén bán epub châchá ékeene’ chó ped eche édáé chó akeen. ¹⁶ Áde sépój á ped e mbøj e mwă dyad awé adé á mendib-te awé béchágéé bán Kauda, sénkûd mwă etál wéé epub éebude’áá atóm. Áhed dóo séwánné káéj boj sénabpé bøle ábe sédolé’áá ámbid e’dii, ábel boj béesanlé áte. Sêdé amäd abel nê chõm émäa sé á yæl. ¹⁷ Bëndöl bøle, bësóléd bô á stíma-tê, bëbïd-te nkød á stíma sêwéd bô atád. Bébáá’áá nén bán bëhele bëtómén nló, böhün á nsíi-te á nkin mé edib á alonj á Libia, né-óó, bënsudéd abad* ásé áde ábèle boj stíma ékag mehélé, bëtédé bán epub chó ne chó ékeen stíma. ¹⁸ Ekukud émbë étomné’ ngíne. Bín é’sángé’áá boj bëbootéd dojge dé nted ahúd bëbwemé’ á mendib-te. ¹⁹ Néé bín é’sángé ámpé, bëbootéd dojge á bwém atéd ábe bëbénlé’áá ádol stíma, bëbwémé á edib-te. Bén bënköj abel nê. ²⁰ E’pun híin bëntöm ésebán sênyíne’ enyen ké’ë betintine, epub-pe émbë étome’ ne ngíne esyæl. Káéj ne á asog, sênhûd yæl nlém bán sêmädné.

²¹ Sêmadé é’ pun híin ésebán mod ahèle kë ndyéed adyé. Hê dóo Paale átyéémé ámín átinté e bad bësyæl boj áhöbë aá, “A-baányaj, nyembé nyewóglan me áde nhóbë meé deéhidté á Krët. Nzé nyénwogén me, né deékudeé mímén metake ne enén mbólón eché

* 27:17 Dojge á kálag dé’só áwóó, ekii éche ébwogke stíma á mendib-te.

dékúdé nén bɔɔb. ²² Bɔɔb-pɔá, ncháa nyé nén mɛé nyewêd nlém á abum, nló m̄ mod méetómmé, stíma chěmpen chóð ẽbēb. ²³ Nhóbe nê áyāle nén nkuu rímme rítomé nén ángel e Dyōb áde áwóó me áde rimbénle-'áa empií me, eláá me aá, ²⁴ 'Á-Paal, weewóngé' mbwóg, etángéné atyéem á'sō wée Kaisee. Nlém m̄ bwâm m̄me Dyōb áwójné-'áa we, m̄bélé asoó alongé á bad bésyāél ábe nyáabɔá nyéedé.' ²⁵ Né-ɔ́, a-baányaŋ, nyewêd nlém á abum, áyāle nén ndúbpé m̄eé mekan m̄esýāél m̄ebenléd ngáne bélängé me. ²⁶ Epub étángéné néé étínté syáné á nkin."

²⁷ Ámbid e e'pun dyōm ne é'niin nkuu, áde sédíi sédíi á edib é nkwé é Adria, dōo dyam melúde mé nkoo, bad ábe bédole stíma békamténé bán kapógy syáabðo sêkwogé abíd á nkin. ²⁸ Héé bétédé nkooj rímme bétadé chōm eche édélé áyāl boj bébwémé á edib-te ânyín ngáne edib épédé achab ásé. Dōo bédibté bán e'che bé edib ásé é'dé móom mé méta ménin. Mwâmpin m̄ póndé ámbid e nê, bémwém ámpé, bénýin bán e'che bé edib áse édé móom mé méta méláán. ²⁹ Béwóngé'áá mbwóg nén bán stíma ēke ebúl á meláaté, né-ɔ́, bëntéd e'kii ábe bémwognadté stíma é'niin, böhünéd bó ámbid boj bëbootéd akáne nén bán bín é'sáa mehélé. ³⁰ Héé bad ábe bédole' stíma, bëbóótédé nzii ahed ásob. Bënsudéd bɔlē á mendib-te, bëbámítan bán békag ekii eche bémwognadté stíma asuded á'sō é' stíma. ³¹ Dōo Paale álāñgeé mod ambáá á sónze ne sónze éche élyágé ásé aá, "Nzé ábén bad ábe bédole stíma béesé á stíma-tê hén, nyéelyágé nlém nén bán nyéébë á alongé." ³² Né-ɔ́, échê sónze énséi m̄mē nkooj m̄me ménchāá bɔlē bétédé bó é'hoo'.

³³ Áde bín é'kwóngé asáa, Paale ancháŋ bó moosyáél aá bedyé mwá ndyéed. Anláá bó aá, "Nyékedyé bɔɔb, dyōm dé e'pun ne é'niin, ene póndé esyáél-le nyéédyéedé chōmchōm. ³⁴ Ncháa-ɔ́ nyé nén m̄eé nyédyé ndyéed. Moonyoŋ atángéné ndyéed adyé ábé ámín. Ké mbum e esid pág éebóó'é." ³⁵ Áde Paale ámáá ahób nén, antéd ewele á'sō wée bó moosyáél, asagnén Dyōb, ásál áte boj ábootéd adyé. ³⁶ Nén dénwéd bó nlém á abum, bó mod-téé adyé- 'e mwá ndyéed. ³⁷ Mesongé mé bad bésyāél ábe sëbédé á stíma-tê, rimbédé mbwókel ébe móom saámbé ne ntóób.[†] ³⁸ Áde moosyáél ámáá akód, bënsyংg ngun éche ébédé á stíma-tê á edib-te ábel boj stíma éhéle áte.

Stíma epángé áte

³⁹ Áde bín é'kénlé, bad ábe bédole' stíma bénkêncemmé nkøg mé edib wée bëbédé. Boj bennýin nkin wée stíma éhéle etyéem. Dōo bétíidé nén bán nzé stíma ehéle ápē áhed, né bëböl áke áson yɔl áhed. ⁴⁰ Bënséi nkooj m̄me ménchāá e'kii ábe bémwogné stíma, böhünéd bó á mendib-te, bëbüné-'e besáŋkalaa bé e'ped bë mebámbé ábe é'hyómte stíma. Héé bëpódté abad áte á ped e'só e stíma ábel boj epub étínté stíma á'sō. Héé sëbóótédé aké á nkin. ⁴¹ Boj áde sékagké nê, dōo stíma ébómé yɔl á akúd dé nsíi á mendib sé. Atyág áde ped e'só e stíma étyágé-'áá nê, stíma enkênhénlé aké ámpé, boj ped e mbid embootéd apânted áte áyāle mendib méhuéné'áá ngíne mébomé yɔl áhed. ⁴² Sónze êmbel ntíi bán bëwüü bad bë mbwóg bésyāél, ábel nén bó modmod bënyalé' á nkin se bësob. ⁴³ Boj mod a mbáá a sónze ahédé'áá aá mósoŋ Paale alongé, né-ɔ́, anláá sónze aá éebelé nê. Antím aláá moosyáél aá bad ábe bëhèle anyal bóbá bésébe behéb á edib-te bënyal békag á nkin. ⁴⁴ Aá ábe bó-'e bëlyágé ásé, bëchâñned e'ped é' stíma bëhíde bó ámbid. Né-áá, sëbélé boj sé moosyáél sép á nkin ésebán dyamdyam ábele sé modmod.

Paale bedyéé á Malta

¹ Áde sémáá ape á nkin ésebán dyam dé mbéb ábélé sé modmod, dōo sésójténé nén bán ene mbwóg eché edé á edib-te wée sëbédé, bëchâñné chó bán Malta. ² Bad bë dyad ábe sétáné áhed bénwöñgén sé. Mbúú embootéd achó, ahéb-pe ábé, né-ɔ́, bënkonéd muú bán séwále', békob-pe sé nken. ³ Paale anläd ngen é lön áte á mbág. Áde áhágké chó á

[†] ^{27:37} Donge á kálag dé'só áwóó mbwókel ébe móom saámbé ne ntóób, donge-'e móom saámbé ne ntóób donge-'e áwóó mbwókel ébe móom saámbé ne ntáan.

dű, dőo píi e nyě ébídé á mbág n̄ lön-tê áde muú ínnáné chó, boj ekób mó á ekáá etyégg-ke áhed. ⁴ Áde ábē bad bé dyad bénýíné ene nyě ekénléné Paale á ekáá dőo bélângéé nhóg ne aníníí bán, “Anén mod adíi mod awé awúe’ bad. Aponé kwéed á edfb-te boj kéné nkáásé n̄ Dyöb n̄díi nkóbé mó.” ⁵ Boj Paale answág ekáá ahúnéd ene nyě á dű-te ésebán ene nyě ebélé mó dyamdyam. ⁶ Bésiné’áá bán ábooted achíd, ké’é áhûn ásē mpátepém áwé. Boj néé békésinné káéj ésebán dyamdyam ábenlad mó, dőo bélângéé mewémten boj bétimé áhób bán, “Anén mod adíi dyöb.”

⁷ Nzag ébédé bənben ne wée sémbēē nê. Mod awě anwón échê nzag béchágé'áá mó bán Publioſe. Mó abédé nkamlene ambáá a ene mbwóg eché ebédé á edfb-te. Ankob sé nken achágéd-te sé bwâm. ⁸ Publioſe sáá abédé á anoŋ dé nkole, ahéb dênsog mó, ekwaglène-’ɛ akób mó. Paale anké áwē ton-vê, akáne', abán mó mekáá á nló, ádíd-te mó bwâm. ⁹ Áde bad béwóge nê bad bé nkole bémpeé ábe békédé á dyad-vê wê, bêmpě wée Paale ádíd-te bó bwâm. ¹⁰ Bêmbe sé nde híin. Áde sébwógké eke, bénhii sé bwěm á stíma-vê ábe sébenlédté á nzii.

Paalé békéidé á Malta békéidé á Roma

¹¹ Sêmadé á mbwóg e Malta ngon éláán boj sésôlê stíma eché embíd á Alesandria. Béchágé'áá ene stíma bán, "Myób ríme médé Nhéd." Sêdé asyéá né ene stíma ekédyéé ádê hóm ene póndé e ahéb á ngíne esyáel. ¹² Sénké, sépē á dyad á Sirakus. Sêmmád áwed e'pun é'láán. ¹³ Bootya hê dôo sékíí boj sépág á dyad ámbáá a Regium. Néé bîn é'sângé epub êmbootéd abíd á ped e mbøøj. Ámbid e e'pun é'be sêmpé á dyad á Putioli. ¹⁴ Sêndibéd bad áwed ábe bédúbpé Krîstæø. Bénlää sé bán sébê ne bó sôndé póg. Néé sékíí boj sépag á Roma. ¹⁵ Banned ábe bédúbpé Krîstæø bénwôg bán sêhús', né-áj, bêmpé káéyse á hóm áde béchágé'áá bán Dyon á Apíos, donge-'e bésiné sé hóm áde béchágé'áá bán Ndáb é Beken Éláán. Áde Paale ányíné bó, ansagnén Dyöb, nlém nwdénd-te mó á abum.

Paalē apedé á Roma

¹⁶ Áde sépédé á dyad á Roma bêntedé Paale bán ábê ne mó mw  n boj b  mban   s  n  z  e bán   n  ne mó.

¹⁷ Ámbid e e'pun é'láán Paale anchélé bad bémbáá bé Israel ábe bédé á dyad-té wê á mbom. Áde bépédé anláá bó aá, "A-baányaq bé Israel, menkêmbenlé ábēd bad dyam dé mbéb ké ahóq, menkembél-laá dyam dé mbéb ké ahóq tângene e'lem ábe ábesyánē betaan bélyágké syánē. Boj kénê, ábēd bad bénkōb me á Jerusalem békē-'e me á mekáá me benkamlene bé Roma. Né-óó ndé hén née mod a mbwög. ¹⁸ Áde benkamlene bé Roma bémáá me akáad, bhéhdé'áá me achene, áyāle bénkénkudté nzom ké póg eché elûmte nén bán ntângéné kwéed. ¹⁹ Boj bad bé Israel bénkénkwenténné bán bétede me, né-óó, menhób meé Kaisee móomad mímêm nkáá. Kénê-'e ménkénwóngé dyamdyam dé mbéb áhób tângene ábêm bad. ²⁰ Nén dó-'áá ákáá boj níchénlē nyé ábel boj syánē dékal. Á mbále ndéá meé nyébíí nén bán nzé bengobéngôbē bédé mé á mekáá, né édií áyāle mod awé bad bé Israel bésúmé áyâl bán ăpé." ²¹ Héé ábê belyágged bélângéé Paale bán, "Séekûdëé kálag ké póg eché ebídé á Judeya áyâl echôn. Mod awe syánē ké nhóggke eebidëé áwed se ápëen nlébtéd ké nhógg ké'ehjéb é mbéb áyâl echôn. ²² Boj séedärí mímôj mewémten awog, áyâle sêbíí nén bán hóm-téé bad böhöbe mam mé mbéb tângene echén epepé éche édií áte."

²³ Né-oó, bóbé Paale bénťí akag áde béhyč mó awólgen. Échê epun épédé'-áá ndun e mod épē-'e wée Paale ádyéé'áá. Paale ambootéd bó mekan mé nkamlen n̄ Dyob akale bootya mbwembwé kéáñ ne ngukél. Anwanén ábel bédúbe Yesue. Abénládtáá e'ped ábe é'bídé á kálag e mbéndé e Mose ne á metelag mé bekal bédéadéj ábel bédúbe nén bán Yesue mó adé Krístəə. ²⁴ Bó doŋge á bad bénđübē mó, boŋ doŋge dénkéndúbéké bán chöröm éche áhóbeé édé mbále. ²⁵ Né-oó, bémbootéd apeten áde békagké. Bédéké, Paale anláá bó aá, "Edéadéj éche Ésáá éntəngēn áde éláŋgē nkal é'déadéj Yesaya mekan aá áláá ábēn betaá aá.

²⁶ ‘Kǎg, éláa ábê bad wεé,
nyéēwōg nyéwóg-ke ámpē boŋ nyéesójténné mbêd,
nyéenōn nyénōn-ne ámpē boŋ nyéenyínné mbêd.

²⁷ Ñhóbe nê áyâle ábén bad bélélé nlém á abum,
békólé mímbab metúu,
bédibé-’ε mímbab mǐd.
Nzé enkembé nê, né mímbab mǐd ményînne’
mímbab metúu méwógne’
mímbab nlém-me ínsôjten.

Né bétimén me
né měchoód-te bó.’ ”

²⁸ Héé Paale ásógtéé nén aá, “Nyébíi-óó nén bán nkalaŋ mé e’choóchoŋ míme Dyōb álómé,
alómé mó baoob wéé bad ábe béesé bad bé Israel. Béwōglēn-ne mó.” * ³⁰ Paale andyeé áwed
mwě móbe á ndáb echě mwěn ásápé’áá. Bad bésyāäl ábe běhyágé’áá áwē akobé’áá-’ε bó
nken.

³¹ Akalé’áá nkalaŋ mé nkamlen í Dyōb áyāgtē-’ε bad tâŋgene Sáŋgú Yesu Kr̄istəe
ésebán abáa’ dyamdyam, modmod enkenkáŋ-’áá mó âhób dyam.

* ^{28:28} Donge á kálag dé’só ábádé nchoo 29: Áde Paale áhóbé nén bad bé Israel ábe běbédé
áhed, běnhidé běn ne běn, běbootéd-te apenten bwâmbwam.

**Kálag echě Paale áténlé
Baá Roma
Ndibned n̄ kálag**

Kálag echě Paale áténlé bad bé Roma ebédéé ábojṣen bó áyāl e epē éche ántī'é ápe á mwembé míme índé áwed. Enén kálag elûmte chōm éche adúbe á Krísto ne ngáne alongé á bad bé Krísto átângéné abé. Paale akoó ahób áwédté aá, “Nkalaŋ mí bwâm n̄lûmte nyaa eche Dyöb ábeléé boj bad békobnéd áwe e'só. Adúbe dôð ákæ boj bad békobnéd á'só e' Dyöb” (1.17).

Paale alúmté áte aá éhednad bán bad bésyääl békobnad á'só e' Dyöb áyäle bó moosyääl bédé ásé e ngíne e mbéb. Aá mbwiined ne adúbe áde bédúbpé Yesu Krístæd dôð n̄ ábenladté.

Paale alúmté áte ámpē aá mod akude alongé dékôõlē abé áde ádíí mod nhóg ne Krístæd. Ene ndín e mod abelé abé nsaj ne Dyöb, Edædæj é Dyöb-pe ébelé éhúd mó ásé e ngíne e mbéb ne e kwéed. Asogté ne elébé éche ábágé bad ne mekenag míme ábágé Dyöb.

Nkabtéd n̄ kálag

Ndibned ne atón áde kálag ékoo'é ahób 1.1-17

E'soosoŋ é'hednad ne moosyääl 1.18-3.20

Nzii e Dyöb âkud e'soosoŋ 3.21-4.25

Alongé dékôõlē abé ne Krístæd 5.1-8.39

Bad bé **Israél** ne ntíi n̄ Dyöb 9.1-11.36

Abé á mod a Krísto 12.1-15.13

Nsógtən ne melenten 15.14-16.27

Paale alómé melenten

¹ Me, Paale, mbølede awé Yesu Krístæd, me-eé ntelé enén kálag. Dyöb ápwédté me abé awé mbapées a nlómag, ábē-'e me nsón akal míme nkalaŋ mí bwâm.

² Mmē nkalaŋ móð Dyöb dénhöbpé á'só e' póndé aá móðbë abé bad. Anláá bekal bë'dædæj mam tângene mímmé nkalaŋ ngáne bétélé mó ásé á Kálag e echë Esáá. ³ Mmén nkalaŋ índíi tângene awe Mwän. Á nyaa e moonyoŋ, ane Mwän anchyáad á mbyaa míme Dabide. ⁴ Á nyaa e Edædæj, Dyöb dénlüméd á ngíne e Edædæj éche Ésáá aá mó adé Mwän a Dyöb, apuud áde ámpuúdté mó. Ane Mwän adíi awed Sángwéé, Yesu Krístæd. ⁵ Á dín adé dôð Dyöb ábágé me nsimé ábél-le me mbapées a nlómag ábel boj bad ábe béesé bad bé Israel bédúbe, bewógne-'e Krístæd. Nén débél áde dín déwōŋ edúbé. ⁶ Nyémpé ábe nyéndé á aloj á Roma, nyéndé átînté e bad ábe Dyöb ápwédté aá bëbë bad ábe Yesu Krístæd.

⁷ Né-óó, ntenle nyé moosyääl awé adé á Roma. Nyéndíi bad ábe Dyöb ádæá, apwédté-'e nyé, ábel ábē bad.

Nsimé ne nsaj míme ínhúú ne Dyöb, Titéé awédt ne Sángú Yesu Krístæd míbë ne nyé.

Paale aságnan Dyöb

⁸ Dyam dé'só, nságnan ádêm Dyöb áyäle nyé moosyääl á dín áde Yesu Krístæd. Nságnan mó áyäle adúbe áde nyédu bpé Yesue ákanlaad nköjsé áte ísyääl. ⁹ Dyöb áde míbenleé ne nlém nhóg akal áde nkalaŋ mí bwâm tângene awe Mwän, ádé me mbój nén aá nkamtan nyé akamten ne akamten, ¹⁰ póndé téé nzé nkânné'. Nkânné' nén meé Dyöb ábel níhel nyé ahye dényín, nzé nê ábójnédé mó. ¹¹ Ndæá bwâmbwam meé ínyñi nyé ábel boj nzé mpedé, nŵed nyé áte ne nnam míme Edædæj é Dyöb ébágé me. ¹² Dyam áde níhöbëé ádíi nén meé, syáné mod-té áwédt nhóg ne aniníi nlém á abum. Adúbe ádën áwédt me nlém á abum, ádêm-me ámpé áwédt nyé.

¹³ A-baányaŋ, ndæá meé nyébíi bán nkénwöŋ mewémten ngen ne ngen ahye dényín nyé, boj kááj ne bøøb nzii eénédnédéé. Ndæá meé mpe wë ábel nsón átînté echén míme méchyâā e'pun melemlem ngáne míbélé átînté e bad ábe béesé bad bé Israel bëmpé.

¹⁴ Nsón míme íwóó ndíí ákale bad bésyāél nkalaŋ mí bwâm, ken bad bé dyad-ε, ké'ε bad bé ahín. Ntáŋgéné mó akal wéé bad ábe bêwóó debyéé ne ábe bêewóó. ¹⁵ Nê dó'-áá ákáé boj nwóó nlém bwâmbwam ákale nyémpē ábe nyéde á Roma nkalaŋ mí bwâm.

Nkalaŋ mí bwâm íwóó ngíne

¹⁶ Meekwágéé ákal nkalaŋ mí bwâm áyâle móð ndé ngíne e Dyöb eché epiínédé moosyāél awé adúbpé mó e'soosoŋ mbooted ne bad bé Israel átimé' wéé bad ábe béesé bad bé Israel. ¹⁷ Mmén nkalaŋ mí bwâm nílûmte' syánē nyaa eche Dyöb ábeléé boj bad békobnéd áwe e'só. Bad békobnad á'só é' Dyöb adúbe áde bédúbpé. Adúbe dóð ákæ' boj bad békobnéd á'só é' Dyöb. Nén áde ne ngáne éténlédé á kálag e Dyöb nén bán, "Mod awé aköbnédé á'só é' Dyöb adúbe áde adúbpé, ábē á alongé."

Moonyoŋ asyāél abelé mbéb á'só é' Dyöb

¹⁸ Dyöb álûmte' mímē melingá. Mébídé ádyöb tâŋgène mbeltéd mé mbéb míme bad bébeléé ne e'bébtéd é' mekan ábe bad bébeléé. Mmê mbeltéd mé mbéb níkæ' bad áhíd mbále. ¹⁹ Dyöb álûmte' bó mímē melingá áyâle nén bêbíí mam mésyāél míme bad bétáŋgéné abií tâŋgène Dyöb bwâm áyâle Dyöb dën álúmté bó. ²⁰ Se á mbooted áde Dyöb dênhágké nköjsé, bwém ábe áhágé é'lûmte bad bwâm nén bán mam mé Dyöb míme mod éenýinnéé díid médé ne mbále. Ényînnad-te nén bán eché ngum edé á ngíndé ne á ngíndé, adé-'é ámín e bwém ésyāél. Né-óó bêewóó'é mbâmtén ké nhóg ákud alagsen. ²¹ Kénéé bêbíí bán Dyöb ádé, bêebagéé mó edúbé néé Dyöb, bêesâgnân-naá mó. Boj pen mímab mewémten mêmbooted mam míme méesé dyamdyam akamten, ehíntén ekáá-'é bó mewémten. ²² Béhóbe bán bêwóó debyéé, boj bétímé e'yókél é' bad. ²³ Bésóbé Dyöb áde ádé á ngíndé ne á ngíndé edúbé abe, bétímé bêbage bwém ábe bad bêhagné mekáá á nwágén mí bwém ábe é'wâg, bwém néé moonyoŋ, menon, nyam ké'ε nyă.

²⁴ Né-óó, Dyöb átédté áa esíí é mekan mé ekob é yâl ekamlan bó ábel mbinde é mekan éche ésudte bó edúbé. ²⁵ Bétedté mbále éche edé tâŋgène Dyöb bêhíde' metóm. Bétedté ábe Dyöb áde áhágé bwém ésyāél edúbé, bétímé bêbage bwém ábe áhágé. Dyöb dó'-áá bétáŋgéné mekenag abe á ngíndé ne á ngíndé. Ébê nê. ²⁶ Né-óó, Dyöb áhúdé bó mïd áyâl, atëdté bó áá bêhíde échab esíí ábel mekan mé mbinde. Bebaád belyâge' bechóm anaŋned, bénajnad baachóm bêmpée, áde bêetâŋgèneé abel nê. ²⁷ Baachóm bômpé belyâge' bebaád anaŋned ngáne étâŋgéné abé, bêwôó' esíí é ngíne ânaŋned baáb baachóm. Baachóm bêbèle mekan mé e'sôn ne baachóm bêmpée. Nê ábelé' békudtad yâl nkógsen míme bétáŋgéné akud áyâle mímén mekan míme bêbeléé.

²⁸ Ngáne édií-'áá nén bán ábén bad bêewôŋneé Dyöb póndé á alongé ádâb, Dyöb áhúdé bó mïd áyâl aá békene mímab mewémten mé mbéb á'só, bêbèle mam míme bêetâŋgèneé abel. ²⁹ Mbeltéd mé mbéb nísyāél níkáá bó nlém áte. Bébébé nlém, bédé ngoód, bélûmte e'béb bé nlém, bédé kónjí, bêwúé bad, bédáá kôkô, bédáá edogké, bédé akwâb, bédáá bad ahób ámbid. ³⁰ Bédáá bad mam ahób á yâl ábébed bó dïn, békôó Dyöb, bésyâä bad, bédé epame, bédé kúmbe, bédâa' ebébtéd ahág, bêewôgnéé ábab besáá ne benyaá. ³¹ Bédé eyókél, bêelontéé akag, bêewóó' é edønge á nlém-tê, bêewóó'-áa nlém n̄ ngôl. ³² Bébíí nén bán Dyöb áhóbé nén aá bad ábe bêbèle' échê ndín é mekan bétáŋgéné awé, boj kénê bédíi bêbèle mímê mekan. Saá-kaá nê dëmpen, békemte bad ábe bêbèle échê ndín é mekan kâáŋne kémtén.

Bad bê Israel bêehidéé mbéndé

¹ Né-óó, nyé mod ké ahéé awé akáadte bad bêmpée, ábê kénzéé, eewóó'é mbâmtén ké nhóg ákud alagsen. Áyâle nén nzé ekáadte bad áde mmön ámpé ébeléé melemlem mé akan míme ékáadteé bó, né ekwide' kâáŋne echoŋ yâl nkáá. ² Debíí nén bán mbakú eché Dyöb ábítdeé tâŋgène bad ábe bêbèle' échê ndín é mekan etâŋgéné. ³ Bœb-pœ, nzé nyé mod ké ahéé abítde mbakú áyâl e mod ampée, boj mwén abele melemlem mé akan, awémténé aá móhèle móbid mbakú e Dyöb áte-yé? ⁴ Ké'ε aboŋ áde Dyöb ábóó nlém

bwâmbwam, áchábtédé nyé e'kæd áte, áwesén-ne nyé, nyéetédeé dó néé dyam. Nyébíi nén bán e'boj bé nlém ábe Dyöb áwánlé áyāl echén, é'díi ábe nyé etál átæde áden abé dé mbéb. ⁵ Nyélélé nlém á album, nyéehéðéé-áá Dyöb atimén, né-øó, nyéladte yäl nkógsen í Dyöb áte. Ákógsén-ne nyé á Epun é nkáásé. Échê Epun Dyöb délumé dímé melingá, alúméd-te áá mókáadte' nyaa eché etángéné. ⁶ Ásábë mod téé nchoo ne nsón míme ábelé. ⁷ Bad ábe bëpéné mekuu ábel mam míme métångéné ne áhæd ehúmé ne edúbë, bëbë á alongé á ngíndé ne á ngíndé. Échê ndín é bad Dyöb débë bó alongé áde déemaá'. ⁸ Bad bëmpée-'e bédé ábe bétôntan dásö échab yäl, bëebeléé mam míme métångéné, bétimé bëbele dásö e'bëbtédé' mekan. Échê ndín é bad, Dyöb délumé díbó míme melingá akógsén-ne bó. ⁹ Baásyääl ábe bëbele mbéb, Dyöb débël bëtág bwâmbwam, bewög-ke ndutul, mbooted ne bad bé Israel átimé' wéé bad ábe béesë bad bé Israel. ¹⁰ Boj ne bad ábe bëbele bwâm, Dyöb débë bó ehúmé, edúbë ne nsaj, mbooted ne bad bé Israel átimé' wéé bad ábe béesë bad bé Israel. ¹¹ Nyébíi nén bán Dyöb déekwognádté modmod.

¹² Bad ábe béewóo mbéndé é Mosee, bébèle mbéb. Dyöb dékāad-te bó ésebán abenlad mbéndé, bélbōš' é. Bad bé Israël-le, bó ábe bewóo mbéndé é Mose, bébèle mbéb, Dyöb débenléd mbéndé âkáad bó. ¹³ Saké awog áde mod áwogé mbéndé dōš ákəə' boj ákobnéd á'sō é Dyöb, ahíd áde mod áhídeé échê mbéndé dōš ákəə boj ákobnéd á'sō é Dyöb. ¹⁴ Bad ábe béesé bad bé Israël, béewóo' é mbéndé, boj póndé ké ehéé eché békamténdé mímab mewémítén boj bébel chōm éche mbéndé éhóbé, né bélumte nén bán kénéé béewóo' é mbéndé, áwab nlém-té bélbíi nhəŋlén áfinté e mboj ne mbéb. ¹⁵ Mmab mbeltéd nlümte nén bán chōm éche mbéndé éhedeé éténlédé bó á nlém-té, bélbíi'-é nén bán mímab nlém nílānge bó bán édé nê. Mmab nlém nílumte bó ké dyam áde békamténdé mbéb ké' é ábóó. ¹⁶ Né-ɔ́j, á Epun é nkáásé, Dyöb dékāad bad bésyə̄l nchoo ne chōm éche békamténdé ké' é che békamténdé mbéndé á kun-té. Ábe Yesue ene kunze âkáad bad. Ádén akan dōš nílāngeé bad nzé nkale' nkalan mí bwám.

Bad bé Israël ne échab mbéndé

¹⁷ Boob-poó, nyé ábe nyéchäge yael bán bad bé Israel, nyésumé nlém áyael e mbéndé éche Mosee, nyékumé-'e ekáá á tâl bán Dyöb ádii áden Dyöb. ¹⁸ Nyébíí chom éche Dyöb áhedeé aá nyébel, nyébíí-'e nén bán nyétángéné née nyéhídé chom éche étangéné, ngáne nyéyágké mbéndé. ¹⁹ Nyétédé yael nén bán nyéé nyélyágte bad ábe békwdé ndím abii áde béebíí'é Dyöb, nyéduépé bán nyéé nyéde née etrukáñ éche bad ábe bédé á ehintén-tê. ²⁰ Nyétédé yael née bad ábe bélébe' e'yókél é' bad. Bán nyé-'áá nyéyágte' bad ábe béebíí dyamdyam. Nyétédé yael nê áyale nyéwémitan bán ngáne nyébíí mbéndé é Dyöb bwám, nyébíí mekan mésyáäl, nyébíí-'e mbále. ²¹ Boob-poó, ngáne édii bán nyéé nyéyágte bad bëmpée, cheé ekáá boj nyéeyágté échen yael? Nyékanle bad bán bëechibé', nyé bën nyéechibéé-yé? ²² Nyé ábe nyélânge bad bán bëekabé mesón á ndáb e e'wóngé, nyébën nyéekabéé mesón-e? Nyékoó abele á myöb mémpée, boj nyéekagké á mebón mé myöb nyéchibé bwëm-e? * ²³ Nyékume ekáá á tâl bán nyéwoó mbéndé é Mose, boj nyésumé Dyöb edúbé aboo áde nyébóó'é éche mbéndé. ²⁴ Éténléde á kálag e Dyöb nén bán, "Bad ábe béesé bad bé Israel böhóbe' Dyöb mam mé mbéb á yael áyale mekan íime nyébeléé."

²⁵ Nzé nyéhíde' mbéndé, né ayag áde nyéyageé bad ákoo etógnén abé á'so é' Dyöb. Bon nzé nyéehídé mbéndé, né ayag áde býageé nyé, déesaá dyamdyam. ²⁶ Bøɔb-poó, nzé édé bán mod awé býeyageé abele ngáne mbéndé éhëdëé, né Dyöb dékob mó néé mod awé býágé. ²⁷ Né-oo, bad ábe béhíde mbéndé kénée býeyageé bø, bélûmte nyé bad bé Israel bán mekan mme nyébeléé méetârjeneé. Býágé nyé, nyêwóó-'e mbéndé éche éténlédé á kálag, boj nyéehídéé chó. ²⁸ Nyébíi-oo nén bán, saké bad ábe bétômte' mekún âlúmed nén bán bédé bad bé Dyöb bój békoo bad bé Israel abé. Saá-kaá ayag áde býágé mod á ekob é yël éche ényînnad dðo ákæ' boj mod ákön mod a Israel abé. ²⁹ Bonj mod awé akonté mod a Israel abé adíi mod awé adé mod a Israel á nlém-tê, nedé, mod awé býágé

* 2:22 Mebón ímē bad bé' bɔ́ód mēbédéé ndáb éche énwōñ bwěm áte ábe é'lélé nkun.

á nlém-tê. Edəédəŋ é Dyōb chó-'aá ébəle mímén nsón, saké ahíd áde mod áhídé mbéndé éche bétélé ásē. Dyōb dōo ákene' ene ndín e mod, saké baányonj.

3

Dyōb ábəle ngáne áhóbé

¹ Nsyérj ínhéé-ጀ níde ábē mod a Israel? Ké-'e nyaa e nsyérj ehéé edé áyag mod âlúmed bán adé mod a Dyōb? ² Nsyárj níde bwâmbwam. Dyam dé'só, áwab mekáá dōo Dyōb dêmbeé échē eyale. ³ Ngáne édíí bán bó bad behög béebele'aá ngáne Dyōb dénhôbpē áá bébel, nédē Dyōb dâmpē déebenlé chöm éche ánhôbpē áá móðbəl-e? ⁴ Éesaá nê. Kénéé moonyor asyəál ádíí nkal a metóm, Dyōb ádē mbále póndé ésyəél. Éténléde á kálag e Dyōb nén bán,

“Nzé ehóbé dyam, bad bétáŋgéné anyín nén bán dyam áde éhóbé ádē mbále.

Nzé békáadte wé, ekáa nyaa eché etáŋgéné.”

⁵ Boj nzé édé nén bán mam mé mbéb míme débeléé mélûmte bwâm bán Dyōb déekwognádté modmod, chán-nō déhôbpē? Nédē dehele dehób nén bán Dyōb ábélé awusé ákógsen syánē áyâle mbéb míme débelé-y? (Debyéé á moonyor dōo níhbneé nén.) ⁶ Éesaá nê. Nzé émbē nén bán nyaa eche Dyōb ákáadteé edé awusé, né chán-nō áhèle akáad nköjsé? ⁷ Boj nzé édé nén bán dyam dé metóm áde íkálé álûmte ngáne Dyōb ápédé mbále abé nyaa eché bad békage-'aá mó ehúmé, né cheé-ጀ ékéá boj Dyōb ábé ákáadté me néé mod áwé abelé mbéb? ⁸ Cheé-ጀ syánē déehôbëé nén bán, “Syánē débel mbéb ábel boj mbon ínyînned?” Donje á bad békáadte syánē mam mé mbéb áyəl bán dehóbé ádē akan. Dyōb dékôgsen ábê bad ábe békáadte nê nyaa eché etáŋgéné.

Modmod eébélëe ngáne Dyōb áhedeé áá débel

⁹ Chán-nō syánē déhôbpē? Nyéwémténé bán syánē bad bé Israel detómé bad ábe béesé bad bé Israel-le? Éesaá nê. Mmaá alúmed nén meé ngíne e mbéb ekamlan bad bé Israel ne bad ábe béesé bad bé Israel nyaa póg. ¹⁰ Éténléde á kálag e Dyōb nén bán, “Modmod eésaá áwe abele ngáne Dyōb áhedeé. Mod ké nhógr eésaá.

¹¹ Mod eésaá awé asójténé mbále tângene Dyōb, modmod eésaá-'aá awé awane áte ábíí Dyōb.

¹² Moosyəál abáá Dyōb á yđl.

Bó moosyəál bétímé békáadte nê nyaa eché.

Bó modmod eébélëe dyam áde átáŋgéné. Bó mod ké nhógr mwën eésaá.

¹³ E'yale ábe é'bíde bó á nsəl é'díí néé soj eché békáadte.

Békáadte échab echém é nsəl ádog bad. E'yale ábe é'bíde bó á nsəl é'díí néé kem e píí e nyă.

¹⁴ Mbon é mehób ne e'bébtéd bé mehób bén ne bén bôo é'bíde bó á nsəl.

¹⁵ Mekuu méhénle bó ásē ásyəg mekií.

¹⁶ Kéhéé áde bétóméé ebébtéd ne metake bôo békáadte.

¹⁷ Béebíí'é nsaj.

¹⁸ Béewóo-'áá mbwóo ní Dyōb ké nhógr áte.”

¹⁹ Bôob-pôó, debíí nén bán mekan míme bétélé á kálag e mbéndé, ménone bad bésyəél ábe bémbeé échē mbéndé. Né-oó modmod éehéleé-se ádibé nsəl áte áhób aá mósuú nzom. Ken mod a Israel, ké'e mod awé eésé mod a Israel. Moosyəál átyéem á'sô é' Dyōb. ²⁰ Nyébíí nén bán modmod éehéleé-se ákobnéd á'sô é' Dyōb áyəle áhídeé mam míme mbéndé éhóbéé. Mbéndé edíí dásô âlúmed bad bán békáadte.

Adúbe dōo ákəə boj bad békobnád á'sô é' Dyōb

²¹ Boj bôob dōo Dyōb álúmté syánē nzii eché bad békobnadté áwe e'só. Ene nzii eewóo'é dyamdyam ábel ne mbéndé é Mose. Échê mbéndé ne bekal békáadte békáadte. Mó akobnád á'sô é' Dyōb. Nhəylén ké nhógr méesaá ken mod adé mod a Israel-le, ken mod eésaá. ²³ Moosyəál abelé mbéb, modmod eékwognedéé ákud ehúmé é Dyōb. ²⁴ Nsimé ní

Dyōb míbélé Dyōb átéde bad née bad ábe békóbnédé áwe e'só. Abagé mímē nsimé ngén. Abelé nê akode áde Yesu Kr̄istəə ákódté bad ábe bédúbpé mó. ²⁵ Dyōb dēmbé mó née mende aá áwē áwen nló. Bad békūd-te alagsen dé mbéb áyāle bédúbpé mó. Dyōb ábelé nê, ákoŋ bad bésyāel alúmed nén aá móbele mekan nyaa eché etáŋgéné. Ngen e'só Dyōb awésánnáá bad, eekógsan-naá bad ábe békéle'áá mbéb. ²⁶ Bɔɔb-pɔó enén póndé, alúmte bad aá móbele' mekan nyaa eché etáŋgéné, alúmte -e bad aá móakōb kénzéé awé adúbpé Yesue.

²⁷ Ngáne édií'-aá nê, cheé-ō dékumneé ekáá á tâl? Nê déehednénéé. Mbéndé ehéé ehóbé nê? Dekume' ekáá á tâl áyāle déhídeé mbéndé-yε? Aáy. Deékūmēé ekáá á tâl áyāle nén, adúbe áde dédúbpé Yesue dōo ákəə boŋ dékūd e'soosoj. ²⁸ Syánē denyíne nén bán mod akobnad á'sō é' Dyōb adúbe áde ádúbpé Yesu Kr̄istəə saké áyāle ahíd áde áhídeé mbéndé. ²⁹ Ké-'e nyéwém̄tan nén bán Dyōb ádī Dyōb á bad bē Israel děmpen-e? Saá mó adé káéjne Dyōb á bad ábe béesé bad bē Israel-le? εε, mó adé kájne Dyōb á bad ábe béesé bad bē Israel. ³⁰ Dyōb ádī ahóg. Né-ɔó, átēd bad ábe býágé née bad ábe békóbnédé áwe e'só nzé bédúbpé Yesu Kr̄istəə. Melemlem née átēdté bad ábe býeyageé nzé bóm̄pē bédúbpé Yesu Kr̄istəə. ³¹ Chán-nō déhōbpē bɔɔb? Nédē dehóbe nén bán atéd áde Dyōb átēdē bad née bad ábe békóbnédé áwe e'só, adúbe áde bédúbpé Yesu Kr̄istəə álúmte nén bán bad béhīdē mbéndé ámpē-yε? Aáy, éesaá nê. Boŋ pen chōm éche mbéndé éhóbéé chóō syánē débáneé mekáá.

4

Adúbe dōo dēnkəj̄ boŋ Dyōb ákob Abrahamē

¹ Chán-nō déhōbpē tâŋgēne taa awēd, Abrahamē? Cheé êm̄benléd á póndé eché? ² Nzé ankobnéd á'sō é' Dyōb áyāle mekan míme ám̄benlé, né anwón dyam áde ákumneé ekáá á tâl. Boŋ eéhèle'aá-se awón dyam ké ahóg áde ákumneé ekáá á tâl á'sō é' Dyōb. ³ Eéhèle'aá abel nê. Kálag e Dyōb ehóbé nén aá "Abrahamē andúbē Dyōb, né-ɔó, Dyōb déntēd mó née mod awé aköbnédé áwe e'só." ⁴ Nzé mod abelé nsón, békéle bésábé mó áyāle nsón míme ábelé. Mmē nsábe míebágkē nde. Ñdī chōm éche átāŋgéné akud áyāle ebábé éche ásálté. ⁵ Boŋ nzé mod eébēl nsón boŋ asumé nlém nén aá adúbe áde módúbpé Dyōb dōo débēl boŋ mókobnéd á'sō é' Dyōb, né Dyōb áde ábelé boŋ bad ábe békéle mbéb békobnéd áwe e'só, détēd mó née mod awé aköbnédé áwē e'só adúbe áde ádúbpé mó. ⁶ Melemlem nê dōo Dabide ánhōbpē tâŋgēne nnam míme ñdē ne bad ábe Dyōb átēdē aá békóbnédé áwe e'só, kénée édií bán býebeléé nsón ké nhóg. ⁷ Dabide anhōb aá, "Nnam ne bad ábe Dyōb álágséné míbab mewusé boŋ abódéd míbab mbéb. ⁸ Nnam ne mod awé Sáŋ Dyōb eétúbpé mímē mbéb dīn ámpē."

⁹ Nédē bad ábe býágé bénpen bōō békūd mímē nnam míme Dabide áhóbé, ngé bad ábe býeyageé bóm̄pē békud mó? Demaá ahób néen bán kálag e Dyōb ehóbé aá, "Abrahamē andúbē Dyōb, né-ɔó, Dyōb déntēd mó née mod awé aköbnédé áwe e'só." ¹⁰ Póndé ehéé Dyōb dēnchágké mó aá adé mod awé aköbnédé áwe e'só? Áde býeyágéé mó, ngé áde bémáá mó ayag? Nê dēm̄benléd áde býeyágéé mó. ¹¹ Bén'yag mó áde Dyōb ámáá mó akob. Ayag áde bén'yagké mó démbé e'chemléd ábe e'sógtan nén bán aköbnédé á'sō é' Dyōb adúbe áde ádúbpé, kénée édií bán áde ánkobnédé á'sō é' Dyōb bénkén'yagké mó. Nê ábédé ábel boŋ Abrahamē ábē sáá a bad bésyāel ábe býeyageé, ábe békóbnédé á'sō e' Dyōb adúbe áde bédúbpé Dyōb. ¹² Nê ábédé ámpē ábel ábē'-e sáá a bad ábe býágé ábe bóm̄pē bédúbpé Dyōb melemlem ngáne Abrahamē eched sáŋ ándubéé á póndé eche býeyágéé mó.

Adúbe dōo ákəə' boŋ mod ákud chōm éche Dyōb áhóbé

¹³ Dyam démpēe áde débíí ádīí nén bán, se' boód Dyōb dénlāā Abrahamē ne míme nchyáátén aá móobé nkōjsé áwab mekáá. Dyōb dénkéhōbpé nén áyāle Abrahamē áhídé'áá éche mbéndé. Dyōb dénhōb nê áyāle Abrahamē andúbē mó, Dyōb átēd-te mó née mod awé aköbnédé áwe e'só. ¹⁴ Nzé émbé nén bán bad ábe býhíde mbéndé bōō békūd

chōm éche Dyōb áhóbé aá móðbě, né adúbe áde bad bédúbpé Dyōb áde ngén. Né chōm éche Dyōb áhóbé-'e aá móðbě éesaá dyamdyam. ¹⁵ Chōm éche mbéndé ébeléé édíi dásō ápíined bad melingá mé Dyōb. Boj nzé mbéndé eésē, aboo á mbéndé déebágkē. ¹⁶ Né dó-'aá ákáá boj Dyōb álāngé dásō bad ábe bédúbpé mó aá móðběl dyam áde móhóbé. Abelé nê ábel boj ényîned nén bán mímē nsimé móð níkáá boj álāngé nchyáátén mme Abrahame ngen pôg ne ngen ésyâäl aá móðbelé bô dyam áde móhóbé. Saké bad ábe békide mbéndé bénpen bôð âmbéé akag. Ambe káéjne bad bésyâäl ábe bédúbpé Dyōb ngáne Abrahame ándubéé. Abrahame adíi saá awé syánē moosyâäl. ¹⁷ Éténléde á kálag e Dyōb nén bán Dyōb dénlâa Abrahame aá, "Mbelé we saá a meloŋ híin." Né-óó, Abrahame mó adé syánē saá á'sô e' Dyōb. Dyōb áde Abrahame ádúbpé dôó adé Dyōb áde ábage bad ábe békide alongé, dô-'aá áhóbé' boj mekan mme méesé mébé. ¹⁸ Abrahame andubé Dyōb ásúmmé mme nlém áwé, kénée édíi bán á mïd mé moonyoŋ, nzom ké pôg enkembáá eché elûmté bán mam mme Dyōb dénhöbpé aá mëbenléd mëbenléd-te. Andubé aá móðbë "Sáá a meloŋ híin" ngáne Dyōb dénlâa' e' mó aá, "Mmôŋ nchyáátén mébuú áte née betintine." ¹⁹ Áde Dyōb álāngé Abrahame nê, ambé dyam mbwókel e mwé. Ambíí aá móðlyøgeé moonyoŋ ámpé, abíí-'e aá mwaad Seraa adé ekom. Boj ké nê, adúbe dénkênsudté mó. ²⁰ Nlém méehúne'aá mó tângene dyam áde Dyōb dénhöbpé aá móðbelé mó, boj adúbe dénwëd mó áte, ábagé Dyōb ehumé. ²¹ Ammâd áwe nlém-tê nén aá Dyōb débel chōm éche áhóbé aá móðbelé. ²² Né-óó, adúbe áde Abrahame dénkörj Dyōb dénted mó née mod awé abele mekan ngáne Dyōb áhedeé. ²³ Boob-pôó, e'yale ábe e'ténléde nén bán, "Dyōb dénted mó née mod awé abele mekan ngáne áhedeé" béesaá áyâle Abrahame mwëmpen. ²⁴ Ábê e'yale é'dé áyâl e syánē ámpé. Dyōb déted syánē ámpé ábe dedúbpé née ábe bad, mó apuúdté Yesu Krîstæ, Sângwéé awêd. ²⁵ Krîstæ móð Dyōb démbéé aá áwé áyâle mbéb mímëd. Dyōb ápúúdté mó ábel boj dékud nzii ákobned á'sô e' Dyōb.

5

Depedé á nchemten ne Dyōb

¹ Né-óó, ngáne édíi bán adúbe áde dédúbpé ábelé Dyōb átéde syánē née bad ábe békobnéde áwe e'só, syánē dedé nsaj ne Dyōb. Eched Sâj, Yesu Krîstæ mó akáá boj debé nsaj ne Dyōb. ² Mó-'aá adibnédé syánē nzii eché adúbe áde dédúbpé ábelé boj syánē debíí nsimé ní Dyōb. Né-óó, dedé menyinge bwâmbwam áyâle desumé nlém néen bán deékûd ehumé e' Dyōb. ³ Dedé menyinge ámpé áyâl e metake mme dékudeé, debíí néen bán metake mépæne' e'wéd bé nlém. ⁴ E'wéd bé nlém-me é'bele dewoŋ abé áde ákobnad ne Dyōb. Ádê akobned áde dékobnadté-'e á'sô e' Dyōb dô-'aá ábelé boj dewoŋ e'lyág bé nlém néen bán Dyōb débel chōm éche áhóbé aá móðbelé syánē. ⁵ Nzé delyáge-'e nlém, déebídté mekáá mé ngén áyâle néen, Dyōb álúmté syánē ngáne ápédé syánē adæj abel áde ábelé boj éché edænge ésol syánē á nlém-tê. Abelé néen abé áde ábagé syánē éché Edædæj éche Ésáá.

⁶ Áde dénkênwóngé ngíne ké pôg áwóngen éche syánē yâl, Krîstæ anwé á nló mímëd, bebel bé mbéb á pónde eche Dyōb déntii' e'. ⁷ Elélé áte mod áwé á nló m mod awé abele' mekan mme métângéné á'sô e' Dyōb. Kapog-ke mod ahéle ákwentén áwé á nló m mod a bwâm. ⁸ Boj Dyōb álúmté syánē aá móðæ syánē áyâle néen ambél aá Krîstæ áwé á nló mímëd áde dédíi débédé bebel bé mbéb. ⁹ Dekobnédé á'sô e' Dyōb áyâle mekií mme Yesue mme mésyókgé á nló mímëd. Nzé mekií mme Yesue mme mésyókgé á nló mímëd mébélé dekobnédé á'sô e' Dyōb, néen déelúmté syánē bán Krîstæ átôm syánē asoj nê ásé e melingá mé Dyōb-e? ¹⁰ Áde débédé bad bé ekoyí bé Dyōb, kwéed eché awe Mwân áwéde embél dépë á nchemten ne mó. Ngáne édíi-'aá bán depedé á nchemten ne Dyōb, abé áde awe Mwân ádíi á alongé, á asog, ásoj syánē. ¹¹ Saá-kaá nê dëmpen, boj dewóge menyinge áyâle Dyōb ábelé syánē dedé ábë bad, mbwiined ne eched Sâj Yesu Krîstæ, mó awé akáá boj debé á nchemten ne Dyōb.

Nhønjén mme índé átîntê e Adamé bô Krîstæ

¹² Mod nhógr mó ambél boj mbéb rímpé á nkörjsé-te, mbéb mó-'áá rímpééné kwééd. Né-
áó, moosyáél awág áyäle moonyor asyäél abelé mbéb. ¹³ Dyöb ádëhób aá móbage bad
mbéndé, né bad békerele mbéb á nkörjsé-te. Boj kérhéé wéé mbéndé éesaá, modmod
éehélléé-se ahób aá mod aboo mbéndé. ¹⁴ Boj kéné, bootya á póndé eche Adame ápë
á póndé eche Mosee, póndé eche Dyöb ábágé mbéndé, kwééd enwój ngíne ámín e
moonyor asyäál. Bad békeregáá kéné bénkembóó'é mbéndé e Dyöb melemlem ngáne
Adame ámbóó'é.

Adame abédé á nwágén mme ane awé antájngén ape, nédé Krístæ. ¹⁵ Ábë bad békere
béesaá nyaa pág, áyäle nénd echë Dyöb ábágé bad ngén, eche Yesu Krístæ ápëéné,
éesaá melemlem nêngáne dyam áde mbéb ríme Adame mémpeénné. Edé mbále bán
bad híin békeregáá mbéb ríme mod nhógr ábél. Boj nsimé ní Dyöb níchábé ámín
bwâmbwam tómaa mímé mbéb. Bad híin békeregáá nde e Dyöb ngén nyaa echë echabé ámín,
ámbid e mod nhógr, Yesu Krístæ. ¹⁶ Nde e Dyöb-pe ámpé eesaá melemlem née dyam áde
mbéb ríme Adame ámbernlé dêmpeénné. Mímé mbéb nhógr ríme Adame nkáá moosyáél
akwedé nkáá á'só é' Dyöb. Boj ene nde ekáé Dyöb átédé bad née bad ábe békobnédé awé
e'só, kénée edíí bán bad békerele mbéb abel ne abel. ¹⁷ Edé mbále bán mbéb ríme mod
nhógr Adame ámbernlé, mibél bad bésyáél bédé ásé e ngíne e kwééd. Boj akan áde anínií
mod nhógr, Yesu Krístæ ábél, átómtené ngíne abé. Nén débél bad bésyáél ábe békeregáá
nsimé ní Dyöb ríme níchábé ámín békobnéd-te áwe e'só békeregáá alongé áde déemaá', békere
ngíne ámín e chörm ésyáél. ¹⁸ Né-áó, rímmé mbéb nhógr ríme Adame ámbernlé, mémbernlé
Dyöb dënkwíd baásyáél nkáá. Melemlem nê dôo dyam á bwâm ahógr áde Krístæ ábél
dêmbernlé bad bésyáél békobnéd á'só é' Dyöb, békeregáá alongé. ¹⁹ Awógen áde mod nhógr,
Adame, énkénwogéenné Dyöb dêmbernlé moonyoj asyäál ambé mod a mbéb. Melemlem nê
dôo awógen áde mod nhógr, Krístæ awógné Dyöb, ábél bad híin békobnédé á'só é' Dyöb.
²⁰ Dyöb dêmpeén mbéndé ábel abel dé mbéb ákag á'só. Boj kérhéé wéé abel dé mbéb
ákagké á'só, nsimé ní Dyöb mbelé nkag á'só tómaa nê. ²¹ Né-áó, ngáne mbéb níwóó ngíne
ápeen kwééd, nê dôo nsimé ní Dyöb mómpé níwóó ngíne ábel boj bad békobnéd á'só é'
Dyöb, békeregáá alongé áde déemaá' mbwiined ne Yesu Krístæ, Sájgwéé awé.

6

Mbéb níwúú syánē boj Yesue apuúdté syánē

¹ Chán-nô döhöbpé baoob? Edé bán débë débële mbéb ábel boj nsimé ní Dyöb níchágke-
ë? ² Aáy éesaá né. Syáá dewédé, deewoo'é dyamdyam abel ne mbéb ámpé. Chán-nô
döhële debé débële' mbéb? ³ Nyéebíí'é nénd bán áde dékúdë edusen boj debé mod nhógr
ne Krístæ denwé ne mó-yé? ⁴ Edusen éche syánē dënkufté, élûmte' bán syánē dewédé,
bélímé-'é syánē ne mó. Nén dêmbernléd ábel boj déwöñ abé dékôolé. Nén áde melemlem
ne ngáne Titéé ápuúdté Krístæ ne éche ehúmé á alongé dékôolé. ⁵ Nzé syánē dedé nhógr
ne mó áyäle e che kwééd né syánē débë nhógr ámpé ne mó áde ápuú'ë. ⁶ Debíí bán áde
bëmboméé Krístæ á awög, bëmbomnéd mó abé áde dénwöñgë baoob. Ábel boj ngíne echë
ádë abé dé' baoob áde ábéltaá syánē mbéb ébóo ne abóo ásyáél. Nén débél mbéb méetédté
syánē ntâj ámpé. ⁷ Nzé mod awéedé, mbéb méekamlanné mó ámpé. ⁸ Baoob-paoó, ngáne
dewédé ne Krístæ, dedúbpé bán débë á alongé ne mó. ⁹ Syánē dedúbpé né áyäle debíí
bán Krístæ apuúdté, éewáá-'áá ámpé. Kwééd eewoo'-áá ngíne ké pág ámín echë ámpé.
¹⁰ Awé áde awéedé, mbéb méewoo'é dyam ké ahógr abel ne mó ámpé. Alongé áde ádií-'é
áte baoob ádií alongé áde ádií ne Dyöb. ¹¹ Melemlem nê dôo nyémpé nyétájngéné yél anyín
née bad ábe békeregáá, ábel boj mbéb méekamlán nyé ámpé. Nyényin-ne yél née bad ábe
bédé á alongé ne Dyöb mbwiined ne Yesu Krístæ.

¹² Né-áó, nyéemwág se mbéb nkamlán echë yél e moonyoj echë éwág. Né débël
nyéehidéé mekan mé esii mé ekob é yél ámpé. ¹³ Nyéetájngeneé-'é née nyétédté echë
ped e yél ké pág á mbéb-te se nyébenléd chó ábel mekan mé mbéb. Boj pen, nyébe yél
wéé Dyöb née bad ábe békeregáá alongé dékôolé. Nyébe echë yél
esyáél á mekáá mé Dyöb ábel boj ábenlad nyé ábel mekan ríme métájngéné á'só é' Dyöb.

¹⁴ Mbéb méetângeneé née nkámléné nyé. Nyéesaá ásē e mbéndé boj nyédé ásē e nsimé ní Dyōb.

Débê betâj âbel mekan ngáne Dyōb áhedeé

¹⁵ Chán-nō déhōbpē bōob? Ngáne dédií ásē e nsimé ní Dyōb, nédē débê débèle mbéb áyâle deésaá ásē e mbéndé ámpē-yε? Aáy, éesaá nê. ¹⁶ Nyéebíi'é bán nzé mod abagé yâl née ntâj ásē e mod ampée, âbel kékchée éche ane mod áhōbeé, né adíi ntâj awé ane mod-ε? Bad ábe békchée yâl âbel mekan mé mbéb, chōm éche békudeé édii kwéed. Boj mod awé abagé yâl âbel ngáne Dyōb áhedeé, abâg mod awé abele mekan ímme métângéné á'sō é' Dyōb. ¹⁷ Nságnen móbê ne Dyōb. Nyé abé nyembé betâj ásē e mbéb, nyêtimé nyêhíde mbále e mekan mésyâel ímme býágté nyé ne nlém nhóg. ¹⁸ Bōob-pe áde Dyōb áhúdé nyé ásē e ngíne e mbéb nyêtime betâj, âbel mekan ngáne Dyōb áhedeé. ¹⁹ Nhóbe ímén mésyâel á nyaa e moonyoŋ áyâle nén nyé nêngáne baányoŋ, nsôjten méechabéé nyé ámín. Ngen e'só, nyembé echén yâl esyâel née betâj, nyébelé mbinde é mekan ne e'bébtéd é mekan, nyébelé-'e ebébtéd chén ne chén, nyékag á'sō. Bōob-paó nyêtângéné echén yâl esyâel abe née betâj, âbel mekan ngáne Dyōb áhedeé, nén débél alongé ádén désan. ²⁰ Ngen e'só áde nyébédé betâj ásē e mbéb, nyenkénwóngé dyam abelen mekan ímme Dyōb áhedeé aá nyébel. ²¹ Nsyáj níhéé nyéñkudté áde nyébeláá mekan ímme mékwágte nyé bōob. Chōm éche ímmé mekan mépeenéé édii kwéed. ²² Boj bōob, Dyōb áhúdé nyé ásē e ngíne e mbéb, betâj bé Dyōb-paá nyédii. Nsyáj níme nyékudeé ndíi néen bán Dyōb ábélé nyéssáá ngáne ábē bad bétângéné asáj. Né débél nyéñkud alongé áde déemaá'. ²³ Nyébíi nén bán nsábe ímme mbéb ímpeenéé ndíi kwéed. Boj nde eché Dyōb ábagéé bad ngén edii alongé áde déemaá'. Dekude dó, abé áde dédií ne Yesu Krístəa, Sáñgwéé awêd.

7

Bad bé Krísto béesaá ásē e mbéndé ámpē

¹ A-baányoŋ, nyédíi bad ábe békíi mbéndé. Nyéebíi'é bán mbéndé ekamlan mod dásō á pónré eche ádii á alongé-yε? ² Détêd elánsén áyâl e ehób e e'wóngé. Nzé mmwaád awóó nchóm, mbéndé ehóbe néen bán atângéné abé ne nchóm pónré esyâel eche nchóm ádii á alongé. Boj nzé nchóm awédé, mbéndé e e'wóngé eekóbéé mó ámpē. ³ Né-óó, nzé adyeéné mod ampée áde nchóm ádii á alongé né békchag mó bán adíi nkáb-ameson. Boj nzé nchóm awédé né awóó kunze á'sō é' mbéndé, nzé awóó-'e nchóm ampée, ene pónré, né eekábéé asón. ⁴ A-baányoŋ, né dōo édii ne nyémpē. Mbéndé eékamlánné nyé ámpē áyâle awé áde Yesue áwéded, nyémpē nyéwéded. Bōob-paó, nyédíi bad ábe mod ampée, Yesue awé Dyōb ápúúdté, âbel boj nyébelé Dyōb bwâm. ⁵ Áyâle á pónré eche áded abé á moonyoŋ ákámlánnáá syánē, mbéndé epuúdté'áá syánē esíi é mekan mé ekob é yâl áte. Nén ábéláá débelé' mekan mé mbéb ímme mépeené' kwéed. ⁶ Boj bōob dehídté ásē e mbéndé, awé áde déwéded. Né-óó, mbéndé eché eékamlánnáá syánē née betâj eékamlánné ne syánē ámpē. Nén ábélé dehíde dásō nzii ekóólé bōob âbelé Dyōb. Debenle mó nyaa eché Edéadəj é Dyōb élângéé syánē, saké nhídtén ne mbéndé éche bétélé ásē.

Mbéndé e Dyōb chô elûmte' syánē ímmed mbéb

⁷ Chán-nō déhōbpē bōob? Néde déhōb bán mbéndé edé mbéb-ε? Aáy, deéhēlē-ssé dehób nê. Boj mbéndé chó ekâé boj mbíi chōm éche mbéb ndíi. Nzé mbéndé enkênhób aá mod eesíidé chōm é mod, né meebíi'é néen meé ásíi chōm é mod ádé mbéb. ⁸ Boj ene mbéndé ennyém me mewêmtén mé mbéb ásē, ébel ímbootéed bwém é' bad asfi nyaa ne nyaa. Nzé mbéndé eésé, né mbéb méesaá dyamdyam. ⁹ Pónré ebéde eché ménkembíi'é mbéndé. Boj á pónré eché mbíi mbéndé, esíi é abel dé mbéb êmpuu me áte, nwé-'e. ¹⁰ Mbéndé eche Dyōb ábágé aá chóo epesene alongé chóchó étim me awúu. ¹¹ Mbéb ménkud etál ámbid e mbéndé, ndog me, mbéb mbéb. Né-óó mbéb móo níwúú me.

¹² Né-óó, denyíne nén bán mbéndé chén esáá, chōm-éé mbéndé éhóbeé ésáá, étáŋgéné, édé-'e bwâm. ¹³ Nédē nê álumte nén bán chōm éche édé bwâm étímé me nê kwéed apiiined-ε? Aáy, éesaá nê. Saké mbéndé chó epiínédé me kwéed, mbéb móo m̄poo ámbid e mbéndé, chōm eché edé bwâm, ápiined me kwéed. Nén dêmbenléd âbel nén bad bénýin ngáne mbéb ndíí. Né-óó, mbéndé e Dyöb ebéle' mbéb nlûmte eche ngíne bwâmbwam.

Nzum eché ewante' moonyoy áte

¹⁴ Debíí nén bán mbéndé eche déhóbeé edíí chōm é edéadəj. Boj ndíí moonyoy a ekob. Ndíí née mod awé bésomé ásē e mbéb née ntâj. ¹⁵ Meesójtánné mbeltéd rímêm. Mam ríme nhedéé abel, meébélē m̄. Mam ríme nkóó móo ntimé abel. ¹⁶ Bööb-pöö, abel áde mbeléé chōm éche méehedéé abel, nén álumte bán nkwénténé meé mbéndé edé bwâm. ¹⁷ Boj á mbále saké mmén nkoo' abel, mbéb m̄me ndé me áte móo mbelte me nê. ¹⁸ Mbíí meé dyam á bwâm ké ahóg déesaá me áte, nédē, ne nlém m̄ moonyoy ríme íwóó, kénéé edíí bán nlém ndé me áte âbel dyam á bwâm, meéhélē dō abel. ¹⁹ Meébélē dyam á bwâm áde ndáá abel, boj dyam dé mbéb áde méehedéé abel, dōo ntimé abel. ²⁰ Bööb-pöö abel áde mbeléé dyam áde méehedéé abel, nén álumte nén bán saké mmén nkoo' rímêm mam abel ámpē. Boj mbéb m̄me ndé me áte móo mbelte me mó.

²¹ Né-óó, nnyíne nén meé mbéndé edé eché ekamlan me. Póndé téé áde nhedéé dyam á bwâm abel, mbéb móo íwâmsan me ekáá ape. ²² Áwêm nlém-tê, mbéndé e Dyöb châo ndáá ahíd ne nlém rísyâä. ²³ Boj nnyíne nén meé mbéndé empée edé eché ekamlan échêm ekob é yâl, eché ewane nzum ne mbéndé eché rímêm nlém ndáá. Ene mbéndé ehaá me, ebelé-'e ndé ntâj a mbéb. Mmê mbéb mó-'aá nkamlan échêm ekob é yâl. ²⁴ Ebâl é etyag éche étáné me! Nzé-módé ásöj me ámekáá mé échén ekob é yâl, éche épiinad me kwéed? ²⁵ Nságnen mbé ne Dyöb. Asoó ádêm alongé mbwiined ne Mwân, awed Sângwéé, Yesu Krîstæ. Né-óó, mmémpen ndé mbíí ébe, rímêm nlém nlânge me âhíd mbéndé é Dyöb boj échêm ekob é yâl éhíde mbéb ríme ndé me áte.

8

Alongé áde Edéadəj é Dyöb ébagéé

¹ Bööb-pöö, Dyöb déekwidéé modmod nkáá awé adé nhóg ne Yesu Krîstæ. ² Mbéndé e Edéadəj eché epiinad syáné alongé, abé áde dédií ne Yesu Krîstæ, ehúdé me á mehaj mé mbéndé e mbéb ne ámekáá mé kwéed. ³ Mbéndé enkênhenlé mbéb amad áyâle nén baányoy bénkênwóngé ngíne âhíd chó. Né-óó, Dyöb ábél dyam áde mbéndé énkênhenlé abel. Anlóm awe Mwân ne ekob é yâl e moonyoy éche ébèle mbéb, âbôded ngíne e mbéb. Abel áde Dyöb dêmbenlé nén démbôdêngíne e mbéb ámîn e moonyoy a ekob. ⁴ Dyöb dêmbele nê âbel boj bad ábe béhíde mam ne ngíne e moonyoy boj bétimé' böhíde mekan ne ngíne e Edéadəj é Dyöb, bébel mekan nyaa eché etângéné melemlem ngáne mbéndé ehóbeé áá bébel. ⁵ Bad ábe bébel mekan ngáne échâb ekob é yâl élângeé bó, bébel bësum rímab nlém áyâl e mekan mé ekob é yâl. Boj bad ábe bébel mekan ngáne Edéadəj é Dyöb élângeé bó, bébel bësum rímab nlém áyâl e Edéadəj é Dyöb. ⁶ Nzé mod asúmē nlém áyâl e mekan mé ekob é yâl, né áwé. Boj nzé mod asúmē nlém áyâl e mekan mé Edéadəj né Dyöb débe mó alongé áde déemaá' ne nsaj. ⁷ Nzé mekan mé ekob é yâl mékamlan mod, ane mod abelé ákôö Dyöb áyâle eehídeé mbéndé é Dyöb, eéhélê-'aá chó ahíd ne ahíd dën. ⁸ Nén álumte bán bad ábe böhíde échab esíí é mekan mé ekob é yâl, böheliéé Dyöb menyinge awóged.

⁹ Boj ne nyé, nyéebélē mekan ngáne ekob é yâl éhedeé áá nyébel. Nyébel' dásõ ngáne Edéadəj éhedeé áá nyébel, nzé édé bán ne mbále Edéadəj é Dyöb édé nyé áte. Kéñzéé awé Edéadəj éche Krîstæ éesaá áte, né eesaá ne Krîstæ. ¹⁰ Boj nzé Krîstæ adé nyé áte, nyéde á alongé áyâle Krîstæ abelé nyéköbnédé á'sô' é Dyöb kénéé edíí bán échén ekob é yâl éwé áyâle mbéb ríme nyébelé. ¹¹ Nzé Edéadəj éche Dyöb áde dêmpuúd Yesue édé nyé áte, né ké échén ekob é yâl éche éwâg êmmad awé, né Dyöb áde ápuúdté Krîstæ dépuúd chó. Ábel nén á ngíne e Edéadəj éche édé nyé áte.

¹² Né-ó, A-baányaŋ, dyam ádé áde détáŋgéné ahíd déesaá dyam dé ekob é yěl, saké âbé ngáne ekob é yěl éhedeé. ¹³ Áyäle nzé nyébele ngáne ekob é yěl éhedeé né nyéewē. Boŋ nzé á ngíne e Edäadəŋ é Dyöb nyéwúú mbeltéd mé mbéb míme nyébeléé, né nyéeküd alongé. ¹⁴ Dyam áde ádé ádfí nén, bad bésyääl ábe Edäadəŋ é Dyöb élyágteé, bédíi bän bé Dyöb. ¹⁵ Edäadəŋ éche Dyöb ábágé nyé éebeleé-se nyébelé née betâŋ, nyébelé á mbwóg-te. Boŋ pen Edäadəŋ é Dyöb ébélé nyékoó bän bé Dyöb abé. Ngíne eché échê Edäadəŋ chjó'-aá ekäé boŋ délëbpé Dyöb bán, “A-Tê! Echem Sáŋ!” ¹⁶ Edäadəŋ é Dyöb ébélé syánē debíi á nlém-tê nén bán dedíi bän bé Dyöb. ¹⁷ Bɔɔb-poo, ngáne dédíi ábe bän, deéküd nnam míme Dyöb ákójnédé ábé bän, syánē deéküd-te bwém ábe Dyöb ákójnédé mó, nzé ne mbále syánē dekwénténé âtag ne Kríštæə ábel syánē ámpé dékud ehúmé éche Dyöb débeé mó.

Ehúmé éche bad bé Dyöb békudté

¹⁸ Nyíne' nén mœé, metake míme dékudéé bɔɔb méesaá dyamdyam nzé bélumédté syánē á póndé eché ehúmé ásó. ¹⁹ Bwém ábe Dyöb áhágé á nkörjsé 'sine' ne e'lyág bé nlém, póndé eché Dyöb délumtenné ábe bän. Äbél nê ne ehúmé esyääl. ²⁰ Émbé nén bán bwém ábe bélumédté syánē á díi ehohó ngén. Saké ábé bwém bén bôo bëntíi bán ébé nê boŋ Dyöb dôo déntíi. Ambel nê ne e'lyág bé nlém aá epun épë éche ²¹ móhüdté ábé bwém bén á mehaŋ mé ngíne eché ebɔɔdte bwém, bómpe béküd-te kunze ákud melemlem mé ehúmé éche Dyöb ábagéé ábé bän. ²² Debíi nén bán káaj ne' bɔɔb, bwém é'syääl é'kane' ne e'we ábe bëwógeé ábe é'dé nêngáne e'we bé achád. ²³ Boŋ saké nhægtéd mwëmpen nkane'. Syánē bén awé dewoo Edäadəŋ éche Dyöb ábágé syánē nêngáne nde e'só, syánē ámpé dekane' á nlém-tê. Debanné nlém hsyääl ásin póndé eché Dyöb débenlé boŋ dékön ábe bän abé, ahúd syánē yěl esyääl á mehaŋ-tê, ábe syánē yěl ékðøl. ²⁴ Taase dekude e'soosoŋ delyágé nlém bán deéküd chõm éche Dyöb áhóbé aá móobøl. Boŋ pen nzé denyíne chõm éche délyágé nlém bán deéküd, né saké e'lyág bé nlém bôo é'koo abé nê. Nzé-módé ahèle alyág nlém áyäl e chõm éche ámáá akud? ²⁵ Boŋ, dechedé yěl ásin chõm éche déenýinéé, dekoo-'e chô asin.

²⁶ Melemlem nê dôo Edäadəŋ é Dyöb éwönganné syánē áyäle deewoo'é ngíne. Deebíi'é ngáne détáŋgéné akáne boŋ Edäadəŋ chén chjóo ékânnad syánē ne nheemed míme rítomé e'yale bé nsøl. ²⁷ Dyöb ánøne syánē nlém áte, abií-'e mewémten mé Edäadəŋ áyäle Edäadəŋ ékânnad bad bé Dyöb nyaa eche áhedeé. ²⁸ Debíi nén bán dyam-té áde ábënlad Dyöb ábèle dô á mboŋ mí bad ábe bédáá mó,* ábe áchénlé ábel ngáne áhedeé. ²⁹ Dyöb dêmmod atíi nén aá bad ábe mómmadté apwed ádab abé ábé nêngáne abé áde awe Mwän ábel boŋ ane Mwän ábé Mwän ásó átînté e baányaŋ. ³⁰ Nzé-ó, bad ábe Dyöb dêmmodté apwed, anchélé bô ábé ábé bad. Ábe áchénlé-'e ahóbé aá békóbnédé áwe e'só, ábe bô-'e békóbnédé áwe e'só, abagé bô éche ehúmé.

Dyöb ádáé syánē mbwiined ne Yesu Kríštæə

³¹ Nzé denøné mímén mekan mésyääl áte, cheé déhèle dehób? Nzé Dyöb ádé ne syánē, né nzé ahèle atáŋgén syánē? ³² Néé Dyöb déebâjnæé ké awe Mwän. Antéd mó, ábe mó aá áwé á nló míme syánē moosyääl, né eebaá syánē kéchéé émpée éche déhédné mó-ye? ³³ Nzé-módé áhðb aá bad ábe Dyöb ápwéde békwdé nkáá? Dyöb dën dôo áhðb nén aá dedíi bad ábe békóbnédé áwé e'só. ³⁴ Nzé-módé-ó áhðb aá dekwéde nkáá? Yesu Kríštæə awédé, ápuu, adyeeé-'e á ekáá émbáá é Dyöb, áhed-taá ákânnadté syánē. ³⁵ Nzé-ó ahèle ábél boŋ Kríštæə asog syánē adəŋ? Mekan míme mélénldé syánē áte, ké'e ndutul, káa ahé áde bad bélumé syánē aá meséb? Nzaa, káa awóŋ áde déwoo'é mbóté? Nzé-'e akíme áde bad békímmé syánē? Ké'e awúú áde bad bélumé syánē awúú? ³⁶ Kálag e Dyöb ehóbe aá,

“Póndé téé bad bëwúe sé áyäl echôŋ.

Bényíne sé nêngáne ídyoŋ mí mbód míme békagké awúú.”

* ^{8:28} Dyam-té áde ábënlad Dyöb ábèle dô á mboŋ mí bad ábe bédáá mó; donge á kálag áwóó mam mésyääl mëbënlad á mboŋ míme bad ábe bédáá Dyöb.

³⁷ Ómén mekan mésyāēl mébenlad boj detómé mó áte, mbwiined ne Krístəə, mó awě adáá syánē boj áwōngān-ne syánē. ³⁸ Mbíi bwām nén meé chōmchōm éesaá éche éhele-ssé épánj edənge éche Krístəə ádáá syánē. Ken kwééd-ε, kέ'ε aloŋgé. Ken ángel-ε, kέ'ε benkamlene, kέ'ε ngíne éche édé ádyōb. Ken pónde eche dédíí áte nén, kέ'ε pónde echě ehúe. ³⁹ Ké ngíne e nkoj mímín, kέ'ε e nkoj nísé, chōmchōm éesaá átíté e nhəgtéd nísyāēl éche éhele épánj edənge éche Dyōb áwōjné syánē mbwiined ne Yesu Krístəə, awēd Sáŋgwéé.

9

Dyōb ne ábē bad bé Israél

¹ Nkale' mbále nêngáne mod awě adúbpé Krístəə, meékālēē metóm. Ómêm nlém ríme Edədəŋj éche Ésáá elýágteé, nílānge me nén aá chōm éche níhóbeé édé mbále. ² Ndutul e ngíne ne metake mé ngíne bédé me á nlém-tê ³ áyāl e ábēm bad, ábēm baányaj ábe syáabō sédé mekií mehōg. Áyāl echâb nhede' nén meé né Dyōb dēmbě me ebómán, ábēl-le meebág ne Krístəə. ⁴ Ábēm bad bédíi bad bé Israél. Dyōb áhóbe aá móteđé bó néé ábē bān, alúmté-'e bó éche ehúmé. Dyōb dēmpě á nchemten ne bó, ábē-'e bó mbéndé. Anlúmed bó ngáne bétáŋgéné mó edubé abe, bó-'aá ánlāá'é aá móðbelé chōm éche ánhōbpē aá móðbēl. ⁵ Bédíi bad bé mbyaa ríme ábēd betaabé bémbe se á mbooted. Áde Krístəə áchyáádté-'aá, mómpē néé moonyoŋ, áwāb mbyaa dóo ámbidtē. Mekenag mébē ne Dyōb á ngíndé ne á ngíndé, mó awě ákamlan chōm ásyāēl. Ébē nē.

⁶ Meehóbéé nén meé Dyōb déebenlé chōm éche ánhōbpē aá móðbēl. Édē bán saké bad bésyāēl ábe békídé aá mbyaa ní Israél bédé bad bé Dyōb. ⁷ Saá-kaá bān bésyāēl ábe Abrahame bédé bān bé Dyōb. Dyōb dénlāá Abrahame aá, “Á mbyaa ríme awoŋ mwān Aisige dóo bān ábe níhóbe meé mēbě we békídte.” ⁸ Nén álumte nén bán bān ábe békhyáá á nyaa e moonyoŋ béesaá bān bé Dyōb. Boj bān ábe békhyáá'é nhídtē ne ngáne Dyōb dénlāá'é Abrahame aá móðbēl, bóo békoo'é atój nêngáne bān bé mbyaa ríme Abrahame. ⁹ Áde Dyōb dénlāá'é Abrahame aá móðbelé mó dyam áde móhóbé, Dyōb dénhōb aá, “Métiám ámbid á pónde eche nítiidé. Ene pónde Seraa áwālē mwān a mwenchóm.” ¹⁰ Saá-kaá nē dēmpen. Saá nhóg móo Rebekaa ábe bān bé baachóm béké bénwōŋgē. Ane saá abédées awesýánē taa, Aisige. ¹¹⁻¹² Á pónde éche békhyáá'é ábē bān, áde békibí'é abel dé mbéb kέ' e mboŋ, Dyōb dénlāá Rebekaa aá, “Mwān ambáá ábē mbəlede awe mwān asad.” Dyōb dēmbel nén ábel ényinned nén bán rímē mewemten móð ámbenlédté abel mwān nhóg ábe ásē e anínií. Emboŋnéd mó ápwed mod awě adáá apwed, saké áyāle dyam áde ane mod ábél. ¹³ Eténlédé á kálag e Dyōb ngáne Dyōb áhóbe aá, “Mendəj Jakəbe boj níkōō Esao.”

¹⁴ Chán-nō déhōbpē bōob? Nédē deéhōb bán Dyōb ákwognad baahóg-ε? Aáy, éesaá nē. ¹⁵ Se' bōod, Dyōb dénlāá Mosee aá, “Méwōg kénzéé ngól awě nídáá ngól awóg, mélumédté e'boj béké nlém wéé kénzéé awě nídáá alúmed.” ¹⁶ Né-ó, mpwedtēd ní Dyōb méewóo'é dyamdyam ábel ne chōm éche bad békedé bán ébenled kέ' e éche békbeléé. Dyōb dóo ábenlad ábē e'boj béké nlém ábel kékéé éche áwémténé abel. ¹⁷ Eténlédé á kálag e Dyōb nén bán Dyōb dénlāá Farao aá, “Mpweđe we káké ábel boj ríbenled we álumet echem ngíne ne ábel boj ádēm dín ákanled nkōjsé áte nísyāēl.” ¹⁸ Né-ó, Dyōb álumte' ábe e'boj béké nlém wéé kénzéé awě ápwédé, áwēdē-'e kénzéé nló áte awě ápwédé aá áwúu nló áte.

Melingá mé Dyōb ne e'boj béké nlém e' Dyōb

¹⁹ Kapóg nyé mod nhóg nyéesedéed me bánken, “Nzé nē dóo édíí, cheé ékáá boj Dyōb ábē áhóbe' aábad békélé mewusé? Debíi bán modmod eéhélē-se ahób aá móðbenlé dyam áde Dyōb áhóbe aá ábel.” ²⁰ Boj we moonyoŋ, nzé-módé édíí ásedded Dyōb dyam? Mbeé e mōg eéhélē-se ésedde' mod awě abelé chó aá, “Cheé ékáá boj éhágé me nyaa echě éhágé me?” ²¹ Nyébíi nén bán ntumé-mbeé, awóó kunze ábelen hyag ábe ábenléé mbeé nyaa

eché ádáé. Nzé adəá, aheləsə atéd hyəg ábələn mbeé ébe; póg ebé mbeé e edúbé, eníníí-'e ebé mbeé eché békənladté póndé ésyəəl.

²² Kapógy Dyōb áhédé'áá ímmē melingá alúmed, áhédé-'e aá bad bénŷin eche ngíne. Boj anchored yəl bwâmbwam âwesen bad ábe bémbl̄ boj álinj. Ábe bad bén̄tāŋgēn-nē nkógsen akud. ²³ Kapógy-ke Dyōb dénwēmtēn-nē álúmed éche ehúmé é ngíne ámin e bad ábe álúmté e'boj bé nlém. Amaá ábē bad abojsen ákud éche ehúmé. ²⁴ Syánē dedé-'e átintē e ábē bad ábe áchénlē. Saá-kaá átintē e bad bé Israel děmpen dōo áchénlē syánē. Achénlē syánē dojge á bad káájne átintē e bad ábe béesé bad bé Israel. ²⁵ Á kálag e Hoseya, Dyōb áhóbé nén aá,

“Bad ábe bénkembé ábêm bad,
měchag bó meé bédé ‘Ábêm bad.’

Aloj áde ménkendəngé měchag dō meé ádīi ‘Aloj áde ndáé.’

²⁶ Melemlem mé hōm wée ménlāā-'áá bó meé ‘Nyéesaá ábêm bad’,
áhed-taá méchagké bó meé bédíi ábêm bān, bān bé Dyōb áde ábage’ alongé.”

²⁷ Nkal é'dəádəj Yesayaan anháéd tângene bad bé Israel aá, “Ké mesongé mé bad bé Israel mém̄buú áte née nsíi ímmē ndé á nkəg mé edib é nkwé, nguse chěmpen chōo ékūd e'soosoŋ. ²⁸ Sángwéé eebébédte póndé ábel mekan mésyəəl ímmē átóm̄tē mbakú aá móobél á nkörjsé.” ²⁹ Nén áde nêngáne Yesayaan ánhōbpē aá, “Nzé Sáj Dyōb á Ngumé enkénlyéognéd syánē dojge dé nchyáátén, né debágáá née myad mé Sodom ne Gomora.”

Paale akánnédé bad bé Israel

³⁰ Chán-nō déhōbpē bōob? Bad ábe béesé bad bé Israel bétímé békóbnédé á'sō é' Dyōb mbwiined ne adúbe áde bédúbpé Kr̄stə, kénée édíi bán bēewane'aá áte ákobned á'sō é' Dyōb. ³¹ Boj bad bé Israel bēwáné'áá áte bēhedé bán bēhíd mbéndé ábel boj békobned á'sō é' Dyōb, boj bénkēnhenlé. ³² Cheé ékáá boj bénkēnħel? Bénkēnhenlé áyāle nén bēwáné'áá áte ákobned á'sō é' Dyōb áyāle nsón ímme běn bēbélé saké áyāle adúbe áde bédúbpé Dyōb. Bēnkđ ekuu á aláá áde bad békōdeé ekuu, békwē-'e. ³³ Éténlédé á kálag e Dyōb tângene nē, nén bān,

“Nyénōne’, mbanne aláá á Zayōn
áde débél boj bad békōdē ekuu,
aláá áde débél boj bad békwag.

Boj kénzéé awé adúbpé mó éehúú'é ne mekáá mé ngēn.”

10

¹ A-baányaŋ, ndəá ne ímmē nlém ísyəəl nén meé ábêm bad bé Israel békud e'soosoŋ, nkânnad-te bó meé nē abenled. ² Mbíde bó mbóŋ nén meé bédéá Dyōb abele ne nlém ísyəəl. Boj békoo'é asōnten ngáne bétāŋgéné mó abele. ³ Béesōntēnē ngáne Dyōb ábeléé boj bad békobned áwe e'só. Bétímé bēhede nzii echâb chěn eché ēbél boj békobned á'sō é' Dyōb. Né-ō, béesudteé yəl áhíd nzii eché Dyōb átífé ábel bad békobned áwē e'só. ⁴ Kr̄stə abelé nsón ímme mbéndé éntāŋgēnnē abel, né-ō, kénzéé awé adúbpé mó, akobnad á'sō é' Dyōb.

E'soosoŋ é'bágnédé ne metúmbé mésyəəl

⁵ Se' bōd, Mosee antēl tângene akobned áde mod ákobnadté á'sō e' Dyōb áyāle áhídéé mbéndé. Anhōb aá, “Kénzéé awé abele chōm ésyəəl éche mbéndé éhōbēé, ákūd alongé áde déemaá.” ⁶ Boj éténlédé á kálag e Dyōb bān nyaa eche adúbe ábeléé boj mod ákobnéd á'sō é' Dyōb edíi, “Weehōbé áwoŋ nlém-tē nén wēé, nzé-módé ákē ámīn, ádyōb.” (Nédē, áhúd Kr̄stə ámīn, ásuded mó ásē.) ⁷ Ké-'e “Nzé-módé ákē ásē á echogé éche éewóo asog?” (Nédē áhúd Kr̄stə á echogé éche éewóo asog áp̄eeen mó ámbid á alongé.) ⁸ Chōm-éé kálag e Dyōb éhōbé édīi nén aá “Eyale é Dyōb édē we benben. Edé ekale chō, édē-'e we á nlém-tē.” Mmē nkalaŋ ndíi nkalaŋ ímme sékaleé nén bān nyētāŋgéné adúbe awóŋ. ⁹ Nzé ehōbné nsəl nén wēé, Yesue adíi Sángwéé, edúbpé-'e awóŋ nlém-tē nén wē Dyōb dēmpuúd mó, né wěkūd e'soosoŋ. ¹⁰ Áyāle nén nzé edúbpé á nlém-tē, Dyōb ábelé’

ékobnéd áwe é'sō. Nzé ehóbné nsəl ne weé módūbpē, ebélé ékūd e'soósoj. ¹¹ Kálag e Dyōb ehóbé nén aá "Kénezéé awé adúbpé mó, éehúú'é ne mekáá mé ngén." ¹² Nén ádé ne moosyáél, ken mod adé mod a Israél, ken mod eésaá mod a Israél. Dyōb ádíi Sángwéé a moosyáél nyaa póg, abude-'e kénezéé anamed awé ahédné mó nwôñgen. ¹³ Kálag e Dyōb ehóbe aá, "Kénezéé awé achágé dín áde Sángwéé aá áson mó, ákúd e'soósoj."

¹⁴ Boj chán békhele békhele mó bán áson ádāb alongé áde beedúbpéé mó? Chán-ne békhele békhele mó, nzé béeuwóge mímē nkalaŋ? Chán-nō békhele békhele mó nkalaŋ nzé bad békhele békhele mó? ¹⁵ Chán-ne bad békhele békhele békhele mó nkalaŋ áde mod éelóméé bó? Éténlédé á kálag e Dyōb nén bán, "Nzé mod apeéné nkalaŋ mí bwâm, ébelé épéen enyinje." ¹⁶ Boj saké moosyáél akobé nkalaŋ mí bwâm. Nkal é'déadəŋ Yesaya mwén anhób tângene nê aá, "A-Sáŋ, bó ahéé adúbpé nkalaŋ míme sékálé?" ¹⁷ Né-ó, adúbe ápag ne awog áde mod áwogé nkalaŋ, bad békhele békhele mó nkalaŋ míme Krístəə akal boj bad békhele mó. ¹⁸ Boj ndéa asedé nén meé ken, édé mbále nén bán bénkénwógré mímē nkalaŋ-e? Bénwōg mó bwâm. Éténlédé á kálag e Dyōb nén bán, "Ehób éche bad ábe békhele'áá mímē nkalaŋ énwōgnéd nköŋsé áte ísyə̄l.

Ábāb e'yale békhele'áá mímē nkalaŋ énwōgnéd nköŋsé áte ísyə̄l."

¹⁹ Ndéa asedé nén meé ken, bad békhele bénkénwógré mímē nkalaŋ-e? Mosee móo asébpé ahób nén aá Dyōb áhóbé aá,

"Ménaméd bad ábe békhele'áá mímē nkalaŋ énwōgnéd nköŋsé áte ísyə̄l."

Méenaméd bad ábe békhele'áá mímē nkalaŋ énwōgnéd nköŋsé áte ísyə̄l."

²⁰ Nkal é'déadəŋ Yesaya mómpé ankwentén ahób ngáne Dyōb dénhōbpé. Anhób á tâl e ékwéé aá,

"Bad ábe békhele'áá mímē nkalaŋ énwōgnéd nköŋsé áte ísyə̄l."

Menlúméd yél wéé bad ábe békhele'áá mímē nkalaŋ énwōgnéd nköŋsé áte ísyə̄l."

²¹ Boj Yesaya anhób tângene bad békhele'áá mímē nkalaŋ énwōgnéd nköŋsé áte ísyə̄l."

11

Dyōb déebáá' é ábē bad békhele'áá mímē nkalaŋ énwōgnéd nköŋsé áte ísyə̄l

¹ Boob-pó, ndéa asedé nén meéken, Dyōb ábáá ábē bad áyəl-e? Éesaá nê. Mmén ndíi mod a Israél awé abídé á mbyaa míme Abraham, á túmbé e Benjamin. ² Dyōb déebáá' é ábē bad áyəl. Bédíi bad ábe ápwédé se á mbooted. Nyébií chom éche éténlédé á kálag e Dyōb ngáne Elaijaa ácháá'áá Dyōb, álāŋgē mó mekan míme bad békhele'áá. ³ Anláá Dyōb aá, "A-Sáŋ, ábén bad békhele'áá mímē nkalaŋ énwōgnéd nköŋsé áte ísyə̄l."

⁴ Chán Dyōb dênkwenténne mó? Ankwentén mó aá, "Mbánné bad ekálé saámbe' ábē ábē bad. Bédíi bad ábe békhele'áá mímē nkalaŋ énwōgnéd nköŋsé áte ísyə̄l."

⁵ Né dós édíi káón ne boob. Nguse é bad békhele'áá mímē nkalaŋ énwōgnéd nköŋsé áte ísyə̄l."

⁶ Apwed áde ápwédé békhele'áá mímē nkalaŋ énwōgnéd nköŋsé áte ísyə̄l."

⁷ Apwed áde ápwédé békhele'áá mímē nkalaŋ énwōgnéd nköŋsé áte ísyə̄l."

⁸ Apwed áde ápwédé békhele'áá mímē nkalaŋ énwōgnéd nköŋsé áte ísyə̄l."

⁹ Dabide mómpé anhób aá,

"Nkânné' nén meé ébel bwém ábe é'wógté békhele'áá mímē nkalaŋ énwōgnéd nköŋsé áte ísyə̄l."

Nkânné nén meé békhele'áá mímē nkalaŋ énwōgnéd nköŋsé áte ísyə̄l."

¹⁰ Nkânné nén meé Dyōb ákwid békhele'áá mímē nkalaŋ énwōgnéd nköŋsé áte ísyə̄l."

Nkânné nén meé békhele'áá mímē nkalaŋ énwōgnéd nköŋsé áte ísyə̄l."

¹¹ Né-óó, nsedte nén mée ken áde bad bé Israel bénkodté ekuu boj békwe, bénkwé ne akwe ásyāel-e? Aáy eesaá nê. Abel áde bémbenlé mbéb dêmbeł Dyōb dêmbeł bad ábe béesé bad bé Israel etél ákud e'soosoŋ, ábel boj bad bé Israel bélé kónjí. ¹² Akwe áde bad bé Israel bénkwéé, ápiínédé bad bé nkōjsé ábíníi bésyāel nsimé híin. Abé-'e áde bad bé Israel bémbeł atóg áyāl e mekan mé edədədəj dēmpinéd bad ábe béesé bad bé Israel nsimé n̄ Dyōb. Nzé Dyōb áhele ápē bad ábe béesé bad bé Israel anamed nê, áde bad bé Israel bélé mbéb, né chán-nō nnam mépeé abé míme ábę́ áde bad bé Israel bésyāel békudté e'soosoŋ.

Bad ábe béesé bad bé Israel béebág kúmbe áyāle békúdē e'soosoŋ

¹³ Chōm éche íhedeé ahób nén bəob, nyé bad ábe nyéesé bad bé Israel, nyéé n̄lângéé. Ndíi mbapēe a nlómag a bad ábe béesé bad bé Israel, né-óó mbage' m̄mēm nsón edúbē ésyāel. ¹⁴ Kapōg nhelé m̄nbēl bānned bé Israel bélé kónjí bō donge á bad bōmpē békud e'soosoŋ. ¹⁵ Abáy áde Dyōb démbāngé bad bé Israel á yál dêmbeł Dyōb dēntím ásē ne bad bé nkōjsé bésyāel. Bəob-poá, chán-nō ébēé áde Dyōb dékobpē bad bé Israel ámbid ámpē néé ábē bad? Ébē byánán bad ábe bewédé běpúudé ámbid. ¹⁶ Nzé běbágé Dyōb eped é ewele e'sō néé mendē, nē alūmte bán échē ewele ésyāel édfi échē. Nzé běbágé-'e Dyōb nkaj m̄ bwel, né ngen chómpē edíi échē.

¹⁷ Bépagké donge á ngen á bwel é menzab ábe běwéné, běbādtē á ngen é bwel é menzab ábe é'kwoge' á ahín-tê. Nyé bad ábe nyéesé bad bé Israel nyédií n̄engáne échē ngen é bwel bě ahín éche chómpē ekude mendib míme mébídé á nkaj m̄ bwel é' bwâm. ¹⁸ Ngáne édíí-aá nê, nyéetângeneé néé nyédií kúmbe se nyénənē échinií ngen éche bésélé, nkójtéd. Nzé nyédié kúmbe nyéechatán nén bán saké nyé nyéchângé nkaj boj nkaj móō n̄chângé nyé. ¹⁹ Nyéhèle nyékume' ekáá á tâl bán běhúdé échē ngen ábel boj běbáde nyé áhed. ²⁰ Né adé mbále. Běhúdé bō áhed áyāle bénkendúbēé, nyé-'e bětímte nyé áhed áyāle nyédiúbpé. Boj nyéebág kúmbe. Boj pen nyébē mbwōg. ²¹ Néé Dyōb dénkembângé bad bé Israel akógsen, bō ábe bédé n̄engáne ngen éche énsébē abé, nyéwēmtan bán ábab nyé akógsen-ne? ²² Nyényíne nén bán, ped pōg Dyōb ábóó nlém, ped enínií-'e alelé áte. Alelé áte wéé bad ábe běpáné nzii boj aböjné nyé nlém nzé nyédié nyéhíde' eche nzii. Boj nzé nyéehídé chó, né áhūd nyémpē. ²³ Nzé bad bé Israel ámpē bětédte ábab e'wúu bě nló áte boj bětímne Dyōb, Dyōb détēd bō ámbid ámpē. Awóó ngíne ábel nê. ²⁴ Nyé bad ábe béesé bad bé Israel, nyé ábe nyédié n̄engáne ngen e bwel bě ahín-tê, néé Dyōb áhélé nyé ahúd á bwel bě ahín-tê, abádé nyé á bwel ábe běwéné, nyéwēmtan bán ééhélēé-se atéd bad bé Israel átiméd bō ámbid áhed ámpē-yé? Bad bé Israel bō bédé n̄engáne ngen e bwel echě ensébé abé áyāl e ábē bwel.

Dyōb áwóge' moosyāel ngol

²⁵ A-baányan, nhede mée nyésôjten dyam áde káéjne bəob modmod éesôjtenéé, ábel boj nyéewémtán bán nyétomténe debyéé awój. Nhede mée nyésôjten bán e'lēl bě nlém á abum ábe donge á bad bé Israel bélé káéj né bad ábe béesé bad bé Israel ábe bědubē bésyāel, bědúbpé. ²⁶ Nén débenléd ábel boj bad bé Israel bésyāel békud e'soosoŋ. Éténlédé á kálag e Dyōb nén bán,

“Nsodee ábíd a Zayon.

Ábōdēd abé dé mbéb áde mbyaa míme Jakobé n̄wóó.

²⁷ Á póndé echě měbōdēdtē míbab mbéb dōo mépeé á nchemten ne bō.”

²⁸ Bad bé Israel bédé bad bé ekoyí bě Dyōb bəob áyāle bědúbpé nkalaŋ m̄ bwâm, nén ábénlédé ábel boj nyé bad ábe nyéesé bad bé Israel nyékud e'soosoŋ. Kénéé édíí nê Dyōb apwédé bad bé Israel, adíi adəá-'e bō áyāle melé míme ámmwēé ne ábab beta. ²⁹ Nén adé áyāle nzé Dyōb apwédé mod boj anamté mó, né apwédé, anamté-'e mó. ³⁰ Bōód, nyéé nyéñwúén Dyōb nló áte, boj bəob awúen áde bad bé Israel běwúéné Dyōb nló áte, ábelé Dyōb áwóge nyé ngol, awóngén-ne nyé áwóge mó. ³¹ Né-óó bəob, bad bé Israel híin běwúéné Dyōb nló áte. Dyōb déwōg bō ngol, awóngén-ne bō áwóge mómpē. Ábel nê ábel

boj áwôg bómpē ngol melemlem ngáne ánwôgké nyé bad ábe béesé bad bé Israël. ³² Dyōb ábélé e'wúu bé nló áte é' bad é'dé née é'hédé bó á mbwôg âbel boj áwôg bó baásyääl ngol.

Bad bébē Dyōb mekenag

³³ Nyénøne' ngáne Dyōb ápédé nhon abé! Nyénøne' ngáne ábíí mam mésyääl, awónj-'e debyéé áde áchábé ámín. Modmod éehéleé-se asóntén ngáne Dyōb ábeléé mam. Modmod eehéleé-se asóntén-ne nyaa eche Dyōb ábeléé mam. ³⁴ Éténlédé á kálag e Dyōb nén bán "Nzé-módé ahèle se abíí mewémten mé Dyōb.

Nzé-módé ahèle aléb Dyōb.

³⁵ Nzé-módé akébē Dyōb chôm ábel boj Dyōb ásábe mó ámbid."

³⁶ Dyōb dôo áhágé bwém ésyääl. Mó akéá boj ábê bwém é'syääl é'bé. Mó-'aá awóó ábê bwém é'syääl. Ehúmé ébê ne Dyōb á ngíndé ne á ngíndé. Ébê nê.

12

Nyaa eché éhednadé bán

alongé á bad bé Krísto ábê

¹ Né-óó, a-baányaŋ, ngáne Dyōb áwogé syánē ngol bwâmbwam, ncháa' nyé mée nyébê née mende míme médé á alongé. Mmê mendé mésâŋ, mékobned-te ne Dyōb. Nén dôo ádé nyaa eché éhednadé bán nyébage Dyōb edúbpé. ² Nyéhídé' mbeltéd mí bad bé nköjsé. Boj nyémwe Dyōb áhærlén nyé nlém á abum, ábel nén nyéwôŋ abé dékðjé. Né débél nyéesöntén nyéhídé-'e mam ngáne Dyōb áhedeé. Nyéebíi mboj, nyébíi mam míme méwógté Dyōb menyinje, nyébíi-'e mam míme métængéné.

³ Ne nsimé míme Dyōb ábágé me, nlângé nyé nén mée, nyé modmod eenyíné yél aá mótoomténé abé tómaa ngáne módfí. Boj mod-té ányín yél ngáne ákoo abé. Mod-té ányín yél nchoo ne nde eché Dyōb ábágé mó née mod awé adúbpé. ⁴ Yél e moonyon edíi póg, ewóó páǵ, páǵ téé-'e ewóó míme nsón. ⁵ Melemlem nê dôo édíi ne syáā bad bé Krísto. Debuú áte boj dedíi yél póg ne Krístæ, syáā modmod eesaá ne mó mwén. ⁶ Dyōb ábenlé nímmé nsimé ábë syánē mod té eché nde, ékábné-'e áte. Nzé Dyōb ábágé mod nde áhób mekan á dín á Dyōb, ane mod áhðbë' mímé mekan nchoo ne adúbe áde awóó. ⁷ Nzé mod awóó nde ábelé bad, ábenle bó. Mod awe mó-'e awóó nde áyáged, áyágte bad. ⁸ Mod awé awóó nde áwéed bad nlém á abum, áwéde bó nlém á abum. Mod awé awóó nde ábíded chôm á ekáá áwóngén bad, áwóngan bad, eénõnē ámbid. Awé awóó nde ályáged bad, ályágte bad nyaa eché etángéné. Mod awé mó-'e awóó nde áwóg bad ngol, áwóge bad ngol ne menyinje.

⁹ Mod téé ákon bad adæŋ. Mod téé ákoo ebébtéd. Mod téé ásum mekuu ábel dyam á bwâm. ¹⁰ Mod téé ádæŋ mwânyan ne nlém ísyääl. Mod téé ábage waáb edúbé tómaa ngáne ábagéé eche yél. ¹¹ Mod eéchédé yél ábel nsón. Mod téé áwéed mekáá áte, ábenle-'e Sáñgwéé ne nlém ísyääl. ¹² E'lyág bé nlém ábe mod téé awóó ábéen bó menyinje. Mod téé áched yél á metake-té. Mod téé áwesen-ne ámekáne-té. ¹³ Átinté e nyé bad bé Krísto, nzé nyé mod nhóg atogé chôm, waáb awé awóó chó awóngén mó. Kénzéé awé apedé áwén, nyékob mó nken bwâm.

¹⁴ Nyékânné nén bán Dyōb ánamed bad ábe böhédé nyé á meséb. Nyékânné nén bán békud ebómán, nyékânné dásõ bán Dyōb ánamed bó. ¹⁵ Nyéwôg menyinje ne bad ábe böhágé menyinje, nyéleb-pe ne bad ábe böhleb'. ¹⁶ Nyébê nsal nhóg ne nhóg ne aníni. Nyéenýené díu ámín. Nyébê echoj ne bad ábe béesé dyamdyam. Mod eewémtán aá mótoomténé debyéé awón.

¹⁷ Nzé mod abelé wé mbéb weétimtán mó mbéb. Boj pen etángéné éwémtán ábel mboj á'so é' bad bésyääl. ¹⁸ Mod téé áhæd nzii ábé nsaj ne moosyääl. ¹⁹ A-baányaŋ, nzé mod abelé nyé dyam dé mbéb, nyé bén nyéetimtán mó. Nyétéde Dyōb dën ákógsen mó. Nhóbe nén áyále, éténlédé á kálag e Dyōb nén bán, Dyōb áhðbë aá, "Më-eé ntímtan mbéb ké íhéé míme mod ábélé. Më Sáñgwéé më-eé nhóbe'." ²⁰ Éténlédé á kálag e Dyōb hõm démpéé

pēn bán, “Nzé nzaa ewag ábōŋ bad bé ekoyí, ehé bó ndyééd, nzé píd ekóbé bó, ébe gó chōm éche bémwákē. Nzé ebélē nê, ekwágte bó, békédé-’e nzii eche békéjlanné.” ²¹ Mod eémwág-se mbéb nkamlán mó. Boj mímēn mboj nítom mbéb áte.

13

Nyébage benkamlēne edúbē

¹ Mod téé áwógné benkamlēne ábe békamlan mó. Áyāle nkamlēn ké nhóg méesaá míme Dyōb déetíidéé. Dyōb dó-’aá ábánné benkamlēne bésyāel á atii. ² Né-’o, kénzéé awé eewógné’ mod awé akamlan mó, né eewógnéé ntíi í Dyōb. Bad ábe békete nê, békédté yěl nkógsen. ³ Bad ábe békete bwám, békéwógē benkamlēne mbwág. Boj bad ábe békete ebébtéd bōo békéwóge benkamlēne mbwág. Nzé weéhédé weé móbâj nkamlēne, ébelé mekan mé bwám. Nzé ebélē nê, né ákēmté wé. ⁴ Nkamlēne adíi mbəledé a Dyōb awé Dyōb ábánné áwóngén wé. Boj nzé ebélē mekan mé mbéb étángéné mó abáj, áyāle ngíne eché áwóó ákógsen bad eesaá ngén. Adíi mbəledé a Dyōb awé Dyōb ábánné ákógsen bad ábe békete mekan mé mbéb. ⁵ Né-’o, mod atángéné benkamlēne awógen, saké áyāle ábáa’é nkógsen děmpen, boj kékéjne áyāle ábíí nén aá míme nlém nílángé mó aá mótāngéné abel nê.

⁶ Né-’aá, nyétángéné táásé ámpē asaa, áyāle Dyōb dōo bad ábe bésajte táásé békénléé. ⁷ Nyésábpe mod téé chōm éche nyétángéné mó asábe. Ken táásé-yé, ké’ e mōné ké níhéé míme békéngé nyé bán nyésábe áyāle bwém ábe nyéwóó. Nyébáa bad ábe nyétángéné abáj, nyébage-’e bad edúbē ábe nyétángéné edúbē abe.

Nyédəj nhóg ne aníníí

⁸ Mod eewánlé modmod alúm. Alúm áde nyé mod téé átángéné awále adíi ádəj nhóg ne aníníí. Kénzéé awé adəá waáb, né alónté mbéndé esyāel. ⁹ Mbéndé édé nén bán, “Mod eekábé asón á ndáb e’wóngé. Mod eewúé mod, mod eechibé. Mod eesíidé chōm é mod.” Échén mbéndé ne échíniíí esyāel chóo éládné boj ébé mbéndé póg. Ene mbéndé edíi nén bán, “Dəj mwányoj ngáne édáá echoj yěl.” ¹⁰ Nzé mod adəá mwányoj eebélléé mó mbéb. Né-’o, edənge élonté mbéndé esyāel.

¹¹ Ngáne nyébíí-’e nén bán póndé emaá ape eché nyétángéné akábned, nyétángéné akábned, áyāle póndé e’soosoj eche syáné edé békében tómaa ngáne énsébē abé áde dédúbpé Krístəa dúbpén. ¹² Ehíntén émáá ape, běn ékwogé asáa. Né-’o, détēde mbéltéd mé mbéb míme débélé’áá. Déwáa bwém é’ nzum áwan nzum e e’nyínēn békide. ¹³ Déwále abé á bwám née bad ábe békédá á e’nyínēn békide. Nyéekāg á ngande éche bad bémwákē míim boj mékobé bō, nyéekábé mesón. Nyéebéllé-’e e’tongé é’ mekan. Nyéesenlé’, nyéebág-ke kónjí. ¹⁴ Boj nyéwój abé áde Sájgú Yesu Krístəa. Nyéebágé mekan mé esíi mé ekob é yěl etál, nyéebéllé ngáne échēn ekob é yěl éche békélté nyé mbéb éhēdeé aá nyébel.

14

Mod eekáádté waáb

¹ Nyékobe bad ábe ádab adúbe déewúu’é áte. Nyéepéntān-ne tāngene mam míme békémténé nén bán békéngéné abel, ké’ békéngeneé abel. ² Adúbe áde dojge á bad ábágé bō etál ádyé kékéé boj bad ábe adúbe déewúu’é áte, békédyákē dojge á bwém. ³ Bad ábe békédyákē békényiné bad ábe békédyákē dojge á bwém nkónjtéd. Bad ábe bō-’e békédyákē dojge á bwém békáádté bad ábe békédyákē kékéé áyāle bō moosyāel békóbnédé ne Dyōb. ⁴ Nzé-módé édíi ákáad mbəledé a mod ampée? Eche Sáj chén chóo etángéné ahób aá dyam áde ábélé ádá bwám kékéé déesaá bwám. Boj Sájgwéé eche ngíne éwóngén ane mbəledé abel dyam á bwám. ⁵ Bad behógl békédté dojge dé e’pun bán ádá etógnén tómaa ábíniíí e’pun. Bad behógl-ke békédté nén bán e’pun ésyāel é’díi nyaa póg. Mod-té átēd nén aá kékéé éche mówémténé, étángéné ne mó. ⁶ Bad ábe békédté bán epun behógl édá etógnén tómaa ábíniíí e’pun, békete nê ábe Sájgwéé edúbē. Bad ábe bō-’e ámpē

bédyâg kékhéé, bómpē békéle nê ábe Sángwéé edúbé áyâl e ene ndyéed. Bad ábe bó-'e békédyâg dojge á bwém, bómpē békéle nê ábe Sángwéé edúbé, béságnan-ne Dyöb. ⁷ Syáné modmod eésáá á alongé ne mó mwén, modmod eewág-kaá ne mó mwén. ⁸ Nzé dedé á alongé, né dedé á alongé ábel ngáne Sángwéé áhedeé. Nzé dewédé-'e né dewédé áwóged Sángwéé menyinje. Né-oó, ken dedé á alongé, kék' e dewédé, á mekáá míme Sángwéé dôo dédií. ⁹ Nzom eché ekéá boj Krístæ awé, ápüü-'e, abé á alongé, edíi ábel boj ábê Sángwéé awé bad ábe békéde á alongé. ¹⁰ Cheé-ð ékéá boj ékáádté mwányoŋ? Kék' e, cheé ékéá boj ényiné' mwányoŋ nkónjtéd? Ébíi néen weé syáné moosyâl dëétyéem á nkáásé á'sô e' Dyöb. ¹¹ Éténlédé á kálag e Dyöb bán, "Dyöb áhóbé aá, ngáne índíí á alongé,
moosyâl atáñgéné me mebóbój abwóge,
moosyâl ákéné-'e me aá me-eé ndé Dyöb."

¹² Né-oó, syáné mod téé dëétyéem á'sô e' Dyöb, âláa mó chöm té eche débélé.

Mod eebelté mwányaj mbéb

¹³ Né-oó, syáné modmod eekáádté waáb, boj pen mod téé ámad áwé nlém-tê aá móatângeneé dyam abel mbéb áde débél boj mwányaj ákôd ekuu káa ahún á mbébte. ¹⁴ Abé áde índíí mod nhóg ne Sángú Yesue, ábelé nkoó abíi néen meé ndyéed kék' pög eésáá eché eesáá á'sô e' Dyöb. Boj nzé mod adúbpé aá ndyéed edé eché eesáá á'sô e' Dyöb, eedyág chó. ¹⁵ Nzé edyâg chöm kék' éhéé boj né ábelé' mwányoŋ anínií ebébtéd, né weewânleneé mwányoŋ edaŋge. Weémwâg-se chöm eche édyâgké ébébéd alongé áde mod awé Krístæ áwédé áwé nló. ¹⁶ Weémwâg-se kunze eche éwóó néen mod awe adúbe áwúú áte, ébél mod ábel mbéb, ábel boj bad békéb' we mekan mé mbéb áyâl. ¹⁷ Saké adyé á ndyéed ne amwé á mím dôo ádé etógnén á nkamlen í Dyöb. Mekan míme médé etógnén médíi áwóny abé áde atáñgéné á'sô e' Dyöb, abé nsaj ne abé menyinje míme ínhúú ne Edaádæŋ eche Ésáá. ¹⁸ Kéñzéé awé abenle Krístæ nê, akobnad á'sô e' Dyöb, bad ámpé békéle békéb bán abele dyam á bwâm.

¹⁹ Né-oó syáné déwéd yél áte débèle mekan míme mépëene nsaj, ne míme méwôŋgan syáné áwêd nhóg ne anínií áte. ²⁰ Ehób é ndyéed éebelé-se nyébébéd nsón míme Dyöb ábélé. Ndyéed ésyâl ésáá á'sô e' Dyöb. Boj édé awusé ádyé kékhéé eche ébél boj mod ampée ákwé. ²¹ Ébóó mod eebelé' chöm eche éhélé-se ébél boj mwányaj ákôd ekuu. Ken ádyé nyam-'e, kék' e ámwé mím, kék' e ádyé kékhéé émpée. ²² Kékhéé eche édúbpé tângene ínmén mekan, edíi átinté e nyé Dyöb. Nnam ne mod awé abíi aá móatângeneé dyam áde áde mbéb tângene dyam áde ámáá alúmed aá ábóó. ²³ Boj kéñzéé awé nlém nkogladté á abum néen aá móatângeneé nyaa e ndyéed pög adyé boj átim chó adyé, né Dyöb déhôb aá abelé mbéb áyâle eebenledé áde adúbe ábel chöm eche atáñgéné abel. Nzé mod abelé dyam áde nlém nkogladté mó á abum aá atáñgéné káa déetângeneé, né abelé mbéb.

15

Âwoged bad menyinje, saké échëd yél

¹ Syáné awe adúbe áwúú áte, detáñgéné néen déwóngéné bad ábe adúbe déewúú' e áte. Deébélé mekan dásô nyaa eché eböjnédé syáné bën. ² Syáné mod téé atáñgéné néen ábeléé mam nyaa eché ewógté mwányaj menyinje, áwéd mó adúbe áte. ³ Kék' Krístæ mwén eebelé'aá mam dásô nyaa eché ewógté' mwén menyinje. Boj abelé'aá ngáne éténlédé á kálag e Dyöb néen bán "Nzyáŋ ésyâl eche bad bésyâl' aá we, étimnédé me." ⁴ Mam mésyâl míme bêntenlé á kálag e Dyöb se' bôód, bêntel mó áyáged syáné. Nê démbé ábel déwôŋ e'lyág bé nlém ábe e'húú ne eyale é Dyöb eche ébèle boj déwesán, éwéde-'e syáné nlém á abum. ⁵ Nkânne néen meé Dyöb áde ábelé boj déwesán, áde áwéde-'e syáné nlém á abum, ábel nyébê á nchemten ne nhóg ne anínií ngáne nyéhídeé Yesu Krístæ, ⁶ ábel boj nlatén míme nyéddí míbel nyébê nsal nhóg áken Dyöb, Sáá awé awed Sángú Yesu Krístæ.

Nyékob nhóg ne anínií

⁷ Né-óó nyékob nhág ne anínií melemlem ngáne Krístəə ákóbé nyé ábel boj bad békene Dyöb. ⁸ Nlānge nyé nén meé Krístəə atimé mbəlede a bad bé Israél, ábel boj áloned akag áde Dyöb dēmbéé betaa. Né dénlūmēd-te nén bán Dyöb ákale mbále. ⁹ Ampé-’e ábel boj bad ábe béesé bad bé Israél, béké Dyöb mekenag áyāle ngøl eche awogé bó. Né-’aá éténlédé á kálag e Dyöb nén bán,

“Né-óó měkén we átinté e bad ábe béesé bad bé Israél, měkōn-ne nkéngé ákēn ádoj dñ.”

¹⁰ Éténlédé ámpē nén bán,

“Nyé bad ábe nyéésé bad bé Israél, nyewógen bad bé Dyöb menyinge.”

¹¹ Éténlédé-’e ámpē bán,

“Nyé bad ábe nyéésé bad bé Israél, nyékene’ Dyöb, bad bé nkōjsé bésyāé-l-le békene mó.”

¹² Nkal é’déadəŋ Yesayaa mómpē ahóbé ngáne éténlédé bán,

“Mod ăbíd á nchyáátén míme Jesé

awé ăpē ákamlen bad ábe béesé bad bé Israél.

Áwē-’aá bad ábe béesé bad bé Israél bésummé nlém.”

¹³ Nkānne nén meé, Dyöb áde ábage’ e’lyág bé nlém ábel nyélôn ne menyinge mésyāé nyébé-’e nsaj áyāle adúbe áde nyédúbpé. Né débél ngíne e Edéadəŋ éche Ésáá ăbél áden adúbe dékwogé’ akwog ne akwog.

Nzōm eché ekéá boj Paale átelé’ enén kálag

¹⁴ A-baányan, mměn mbíí bwám nén meé nyé běn nyewóo nlém mí bwám ábel mam ímme Dyöb áhedeé áá nyébel, nyésojténé-’e mam bwám, nyékwognéd-te áyáged nhág ne anínií. ¹⁵ Boj kénê, doŋge á mekan áde áde íténlé nyé á kálag-té wén. Ntelé mó, ákamten nyé mímén mekan mésyāél ésebán mbáa’ dyamdyam. Nsimé míme Dyöb ábágé me móo ríbélé boj ítelé ímmén mekan. ¹⁶ Dyöb ábágé me míme nsimé ábél mbəlede awe Yesu Krístəə, ákale bad ábe béesé bad bé Israél nkalaj mí bwám. Mbélé mímén nsón nééprise ákal nkalaj mí bwám míme ríhúú ne Dyöb, ábel nén bad ábe béesé bad bé Israél bébē mendé míme mbaágé boj mékobnéd á’sō é’ Dyöb. Dyöb dékob bó áyāle Edéadəŋ éche Ésáá ăbélé bésáá á’sō é’ Dyöb. ¹⁷ Né-óó, ngáne ídíí ne Yesu Krístəə, nwóó nzōm ákum ekáá á tâl áyāle nsón míme mbaenléé Dyöb. ¹⁸ Méehēlē-’e nhág dyamdyam démpée éetóméé áhób tângene nsón míme Krístəə ábelé boj níhel abel, ábel bad ábe béesé bad bé Israél bébèle ngáne Dyöb áhedeé áá bébel. Mekan míme níhbé ne míme mbaélé móo médé mekan míme bétáŋgéné ahób míme bétáŋgéné-’e abel. ¹⁹ Membél mímén mam á ngíne e e’chemléd ne menyáké, ne á ngíne e Edéadəŋ é Dyöb. Nén dēmbél menkál Nkalaj mí Bwám míme Krístəə bwám ngáne níkágé’áá bootya á Jerusalem ápe á mbwóg e Ilirikum.

²⁰ Nkénwōŋ nlém ákal Nkalaj mí Bwám mebwóg míme modmod éepēdēē mbéđ átub dñ áde Krístəə. Membel nê ábel boj meékág wéé mod ampée ámaa nsón abooted. ²¹ Nén áde ngáne éténlédé á kálag e Dyöb nén bán,

“Bad ábe béewógé néé békobé áyāl eché, bényin, ábe bó-’e békobé áyāl eché mbéđ, bésōnten.”

Paale abelé ntíi áké á dyad á Roma

²² Mímén meke míme níkágé’áá móo mékáá boj meéhēlē apé áwēn. ²³ Boj bōob, ngáne mímadé nsón échén ped é mbwóg, nwóó nlém áte bwâmbwam ápe áwēn, ngáne níkénwōŋgé mwé ne mwé. ²⁴ Měbwé áwēn nzé nkag á aloj á Spen. Nwóó mewémten meé měnyin nyé nzé nkag, meé nyéewōŋgén-ne me áké áwed. Boj pén, mědyéé ne nyé mwampin, dehódéd nhág ne anínií nlém, boj níkag. ²⁵ Boj bōob, ndé á nzii áké á Jerusalem áké déwōŋgen bad bé Dyöb ábe bédé áwed. ²⁶ Bad bé Krísto ábe bédé á mbwóg e Masedonia ne á mbwóg e Akaya bényiné néen bán ébōj bán bélad mōné bélóme betóótókéé béké bad ábe bédé átinté e bad bé Dyöb ábe bédé á Jerusalem. ²⁷ Bényiné néen bán ébóó béké béké nê, bán bétáŋgéné bó áwōŋgen. Ngáne édíí bán nnam míme Dyöb ábágé bad bé Israél, békobenlad mó ne bad ábe béesé bad bé Israél, ébóó bán bad ábe béesé bad bé Israél

bómpē békongen bad bé Israël bwém nêjgáne medyé, mōné ne mbóté. ²⁸ Nzé rímadé mímén nsón á Jerusalem, áde rímaá bó mōné abe ríme béladté bó, měhidé áke á aloj á Spen. Ene póndé dó-’áá métyéemmē ânyín nyé. ²⁹ Mbíí-’e meé nzé impedé, échêm epe ébél nyéekúd nnam ríme Krístæ ríme níloné mbon.

³⁰ A-bannéd, á dín áde Sájgú Yesu Krístæ, ne áyéle edənge éche éhúú ne échë Edəadəj, ncháa nyé nén meé syánē délad mekáá déwéd me akânned nén bán Dyöb áwôngén me.

³¹ Nyékânné nén bán Dyöb ánōn me ábel nén bad ábe bédubpe Krístæ béebelé me dyam dé mbéb ké ahog nzé ndé á Judeya. Nyékânné-’e nén bán mōné ríme mékiinédté betóotöké bé bad átinté e bad bé Dyöb á Jerusalem, békob mó. ³² Ámbid ené dóo mépeé áwén ne menyinje, nzé Dyöb áhede aá ébë áned, ábel boj nkóme áte nzé ndé ne nyé.

³³ Dyöb dé nsaj ábë ne nyé moosyáel. Ébë nê.

16

Paalë alómmé baáb melenten

¹ Ndéé meé nyébíi bán awe syánē mwányañ a mmwaád Fibii, awé awóngan ábel nsón á mwembé ríme ndé á dyad á Senkria, abele nsón mí bwám. ² Nzé apedé áwén nyékob mó nken á dín á Sájgú ngáne bad bé Dyöb bétángéné abel. Nyébe-’e mó nwôngén ké nhéé ríme áhédné nyé. Nyébíi bán mómpē akewóngén ekud é bad, awóngén-ne me ámpé.

³ Nyélénted me Priskaa bó nichóm Akwilaa ábe syáabðo sébelé’ nsón ríme Yesu Krístæ.

⁴ Bénkwentén awé á nló rímmé. Nságnan bó. Saá-kaá mwémpen nságnan bó, boj káájne mwembé rímmé bad ábe béesé bad bé Israël nísyáel, bómpé béságnan bó. ⁵ Nyélénted me káájne bad bé mwembé ríme ríbome’ áwab ndáb.

Nyélénted me awem nsón-a-nlé, Epanetuse, adíi mod awé abédé mod a’só ádúbe Krístæ á mbwág e Esia. ⁶ Nyélénted me Maria, akébel nsón bwâmbwam átinté echén.

⁷ Nyélénted me káájne Andronikuse bó Junia, ábe syáabðo sédé bad bé Israël, bémbe-’e á mbwág ne me. Bébyéené bwám átinté e bembapësé bá nlómag, bénđubé-’e Krístæ boj médubé.

⁸ Nyélénted me Amplatuse, adíi mod awé adé awem nsón-a-nlé awé rídéá á dín á Sájgú. ⁹ Nyélénted me káájne Ubanuse awé syáabðo sêbenle’ Krístæ nsón. Nyélénted me káájne Stakise, awem nsón-a-nlé. ¹⁰ Nyélénted me Apeluse, awé rímmé mbeltéd mí bwám nnyínnédé nén bán nkóbnédé ne Krístæ. Nyélénted me káájne bad bé abum á ndáb áde Aristobuluse. ¹¹ Nyélénted me Herodijone, awé adé awem mwányañ a Israël. Bad ábe bédé abum á ndáb áde Nasisuse ábe bédubpé Krístæ, nyélénted me bó á dín á Sájgú.

¹² Nyélénted me Trifane bó Trifosa, bebaád ábe bébenle’ Sájgwéé nsón. Nyélénted me Pësise awem nsón-a-nlé, awé akébel nsón bwâmbwam á dín áde Sájgwéé. ¹³ Nyélénted me Rufuse, awé Sájgwéé ápwédé ábèle mó. Nyélénted me káájne nyaá, atédé me néé awe mwán. ¹⁴ Nyélénted me Asinkrituse, Flegone, Hemese, Patrobase, Hemase, bannéd bá Krísto ábe bódþo békome’. ¹⁵ Nyélénted me Filoguse bó Julia. Nyélénted-te me bannéd bá Krísto bá baachóm, Olimpase bó Nériuse ne mwányañ a mmwaád ne bad bá Dyöb bésyáel ábe bédé ne bó.

¹⁶ Nyéhê nhóg ne anínií tâl ne edənge é Krístæ. Mwembé nísyáel nílómmé nyé melenten.

Nlyégtén mé asog

¹⁷ A-baányañ, ncháa nyé me-eé nyétéd póndé ne bad ábe békene’ nkabén átinté echén, ábe békante bad nzii. Béyágte nyé ayáge áde ápentan ayáge áde nyénsébëë ayáge. Nyéehidé ábë bad. ¹⁸ Nyéehidé bó áyéle saké awed Sájgú Krístæ bébenleé boj pen mam ríme mébójnéndé bén móo békeneé. Bényinte’ nsäl áte, békébë-’e mekan átéd bad ábe békeneé tân bwám nlém á abum. ¹⁹ Bad bésyáel békongé nyaa eche nyésúmé mekuu áhíd nkalaj mí bwám. Né-ó, mbééné nyé menyinje. Boj nhede nén meé nyébíi ábel mekan mé bwám, níhédé-’e nén meé nyéebëë dyamdyam tângene abel dé mbéb. ²⁰ Dyöb dé nsaj ákwágé Satane ahinten áwén ekuu-sé. Nsimé ríme awed Sájgwéé, Yesu Krístæ mbé ne nyé.

²¹ Timotie awé súmō sébèle nsón, alómmé nyé melenten. Lusiøse, Jasenø, ne Sosipataa, bänned bé Israël bómpē bélómmé nyé melenten. ²² Me, Tetiuse awé ntenle' Paale enén kálag, mémpē nlómme' nyé melenten née awen mwányaŋ a Krísto. ²³ Gayøse alómmé nyé melenten. Áwe ndáb dóo sédíí, áhed-taá mwembé míboméé. Erastuse, nkoó-moné a dyad, ne Kwatuse, awed mwányaŋ bómpē bélénté nyé. *

Mekáne mé asóg

²⁵ Syánē débe Dyöb ehúmé áyäle nén áwóó ngíne âwéd nyé adúbe áte. Nê dó-'aá ménláā' é nyé áde nkánlé nyé Nkalaŋ mí Bwám tâŋgëne Yesu Krístæ. Mmê nkalaŋ índíi mbále eché Dyöb dënkoó' é se etûn, ekênlúmédté bad. ²⁶ Boŋ bøəb alúmté syánē. Abídté mó áwed bøəb ne mekan míme bekal bé'déadəŋ bêntenlé á kálag e Dyöb. Abelé nê ábel boŋ bad bé meloŋ mésyääl bewógne mó. Nén ábénlédé ngáne Dyöb dénhöbpé aá ébenléd. Mó adé á ngíndé ne á ngíndé. ²⁷ Dyöb dëmpen dóo áwóó debyéé ásyääl. Débe mó mekenag áyäle chöm éche Yesu Krístæ ábélé, á ngíndé ne á ngíndé. Ébê nê.†

* ^{16:23} Donge á kálag dé'só ábádé nchoo 24: Nê, nsimé míme awed Sáŋgú Yesu Krístæ míbê ne nyé baásyääl. Ébê nê. Kálag émpéē ébádé mímén nchoo ámbid e nchoo 27. † ^{16:27} Donge á kálag áwóó nchoo 25-27 hén ne ámbid e nchoo 14.23; émpéē éwóó mó ámbid e mímén nchoo mwëmpen 14.23; donge áwóó mó ámbid e nchoo 15.33.

Kálag e'só echě Paalε áténlé
BaÁ Kɔrinto
Ndibned n̄ kálag

Kálag e'só eche Paalε átélé, bad bé Kr̄isto ábe bédé á mwembé n̄ Kɔrinto bō̄ ânteléé chó. Paalε átélé enén kálag tângene ndutul éche bad bé mwembé békúdáá á alongé ádab, békudé-'e ndutul tângene ádab adúbe. Póndé echě Paalε átélé enén kálag, dyad á Kɔrinto dō̄ ábédé nló n̄ dyad á mbwó̄g e Akaya á póndé e nkamlen e bad bé Roma. Ádē dyad démbyēn bwâmbwam áyəl e mekan nêngáne nyongé echě etómnádtáá áwed, mekan mé mbwó̄g m̄māb bémbeēn mó kúmbe, abel dé mekan mé mbinde déntō̄m áte áwed, bébenlē'áá-'e myō̄b hiin.

Mekan m̄me Paalε ákoo awéd áte médíi nkabén ne mbinde e mekan éche édē á mwembé-te. Ahóbe káajne tângene nyaa echě bad bénōneé e'wóngé, nlém m̄me bad bétângéné awónj átii ké dyam ábóó káa déeboo'ē, nyaa echě Edəádər̄ éche Ésáá ébagéé bad nde ne tângene mpuu. Akoó alúmed áte chōm éche nkalaŋ m̄ bwâm n̄hóbeé tângene m̄mén mekan.

Á eped dyô̄m ne é'láán Paalε ahóbe tângene edənge. Échē eped chó-'á bad bétómténé abíi átinté e enén kálag esyəál.

Nkabtéd n̄ kálag

Ndibned 1.1-9

Nkabén m̄me ndé a mwembé-te 1.10-4.21

Mekan mé mbinde ne alongé á túmbé 5.1-7.40

Mbeltéd m̄ Bad bé Kr̄isto ne bad ábe beedúbpe Kr̄istə̄ 8.1-11.1

Alongé á mwembé ne abele á Dyō̄b 11.2-14.40

Mpuu m̄me Kr̄istə̄ ne m̄ bad bé Kr̄isto 15.1-58

Ndē eche béládté bad bé Kr̄isto bé Jerusalə̄m 16.1-4

Mekan m̄me ménōne bad bén ne nsógtə̄ 16.5-24

¹ M̄e Paalε, awé Dyō̄b ápwédé ábé mbapēe a nlómag awé Yesu Kr̄istə̄ ngáne Yesu Kr̄istə̄ apwédé m̄e ábé awé mbapēe ngáne Dyō̄b déntii'ē, m̄e ne Səstene, awe syánē mwányan, séē séténlé nyé enén kálag. ² Mwembé m̄ bad bé Dyō̄b ábe bédé á dyad á Kɔrinto, nyéé n̄tenlé enén kálag. Dyō̄b áchénlé nyé ábé ábē bad ábe bésáá. Asánté-'e nyé abé áde nyédií ne Yesu Kr̄istə̄. Melemlem n̄ dō̄ ápwédé bad bempēe ábe bédé hō̄m-téé, ábe bébenlad d̄in áde awe syánē Sáñgwéé, Yesu Kr̄istə̄. Adíi awab Sáñgwéé, abé-'e awe syánē. ³ Nsimé ne nsaj m̄me n̄húú ne Dyō̄b, Titéé awéd ne m̄me Sáñgú Yesu Kr̄istə̄, m̄bē ne nyé.

Paalε aságnan Dyō̄b áyəl e
mwembé n̄ Kɔrinto

⁴ Nságnan Dyō̄b póndé téé áyəl echēn, áyəle nsimé m̄me ábágé nyé mbwiined ne Yesu Kr̄istə̄. ⁵ Abé áde nyédií mod nhó̄g ne Yesu Kr̄istə̄ ábélé Dyō̄b ábágé nyé chōm ésyəál nyaa echě elóné mbon. Abelé nyékale r̄ímē nkalaŋ nyaa eche ehednad, nyésojténé-'e mam mésyəál bwâm tângene m̄mē mekan. ⁶ Nén álumte bán nkalaŋ tângene Yesu Kr̄istə̄ m̄me sekánlé nyé n̄koo nyé asól á nlém-té. ⁷ Né-oó, nyéetogéé nde ké pō̄g ábèle Dyō̄b, ngáne nyésineé póndé eche Sáñgú Yesu Kr̄istə̄ álumédtē yəl. ⁸ Sáñgú Yesu Kr̄istə̄ mwēn-ee ábél adúbe áwúú nyé áte káajne á asog dé nkō̄nsé ábel nén á epun éche ápeé ákáad bad, bad béehō̄bē bán dyam dé mbéb ké ahó̄g ádē áde nyébél. ⁹ Dyō̄b ábèle' ngáne áhóbé áá móōbél, mó apwédé-'e nyé ábé mod nhó̄g ne awe Mwān, Yesu Kr̄istə̄.

Paalε áá nkabén m̄éebāg
átinté e bad bé Dyō̄b

¹⁰ A-baányaŋ, ncháa' nyé á dín áde Sáŋgú Yesu Krístæ nén meé, nyé moosyáel nyépe á nchemtæn áyāl e kéchéé éche nyéhóbeé ábel boŋ nkabén méebág átintê echén. Boŋ pen nyébē mod nhág á mewémten ne áyāl e kéchéé éche nyéhóbe bán nyébæl'. ¹¹ A-baányaŋ, nhóbe nén áyāle bad ábe Kloo bélängé me bán nyé bén ne bén nyésenle'. ¹² Chöm éche nhóbeé ádii nén, átintê echén, baahgó böhóbe' bán "Ndíi mod awé ahíde ayáge áde Paale", donge bán, "Ndíi mod awé ahíde ayáge áde Apolose", ábíníi bán, "Nhíde ayáge áde Petro", bémpée'-e bán "Ndíi mod awé ahíde ayáge áde Krístæ." ¹³ Nédē nyéhede ahób bán Krístæ akäbné áte-yé? Me Paale-eé bëmboméé á awög á nló ímén'e? Ké'e á dín ádêm, me Paale, dós bëndusénné nyé? ¹⁴ Nságnan Dyöb nén meé menkëndusénné nyé modmod éetómeé Krispusé bô Gayøs. ¹⁵ Né-óó, nyé modmod nyéhélëe se nyéhób bán nyékudé edusen á dín ádêm. ¹⁶ (Mendusén kááŋne abum á ndáb áde Stefanuse. Méekamtné pen me ndüséné mod ampée.) ¹⁷ Krístæ enkénlommé me ádusen bad. Boŋ pen anlóm me ákal nkalaŋ rí bwám, menkál-le mó esebán mbenlad e'yale ábe é'lümte debyéé á moonyoŋ. Nzé membénléd e'yale ábe é'lümte debyéé á moonyoŋ né nkalaŋ tâŋgène kwéed eche Yesue áwédé á awög, méebáá dyamdyam.

Paale aá Krístæ adii ngíne ne debyéé á Dyöb

¹⁸ Dyam áde nhóbeé ádii nén, nkalaŋ tâŋgène kwéed eche Krístæ áwédé á awög ndíi chöm éche édé eyókél wéé bad ábe béké á dük á muú. Boŋ ne syáné bad ábe béküd e'soóson, rímé nkalaŋ ndíi ngíne e Dyöb. ¹⁹ Éténlédé á kálag e Dyöb nén bán Dyöb áhóbé aá, "Mëbel debyéé áde bad ábe bëwëmtan bán bëwóó debyéé ányinnéd nén déesaá dyamdyam,

méluméd-te nén meé bad ábe bëwëmtan bán bëbíi dyam, bëbíi'ë dyamdyam."

²⁰ Né-óó, élúmté nén bán mod a debyéé eesaá dyamdyam, meléede a mbéndé a bad bë Israel eesaá dyamdyam. Bad ábe bélâŋje bad mekan ne debyéé enén póndé béesaá dyamdyam. Dyöb álumté aá debyéé dé nköjsé adii eyókél ngén.

²¹ Ngáne édii bán Dyöb ábénlédé áde debyéé ábel boŋ bad bë nköjsé bëebenläd ádab debyéé ábíi mó, mó Dyöb amaá atíi aá móosöŋ alongé á bad ngáne bédúbpé nkalaŋ míme sékaleé tâŋgène Krístæ. Kénée bad ábe bëbíi Dyöb bétédé nén bán pôle e e'yókél é' bad cháo sékaleé. ²² Bad bë Israel bédæ bán bényin e'chemléd é' menyáké boŋ bédübë, bad bë Grikia'-e bëhede debyéé áde áchábé ámín. ²³ Boŋ sé pen, sëkale nén bán Krístæ, Aneawé-Béwógté, anwé á awög. Ne bad bë Israel, rímé nkalaŋ ndíi dyam áde bérnkëndəngé awög ne awög dën, ne bad ábe bô'-e béesé bad bë Israel, rímé nkalaŋ ndíi eyókél ngén. ²⁴ Boŋ Dyöb áchénlédonge á bad ábë ábë bad. Bó donge á bad bédii bad bë Israel, ábíníi'-e bad bë Grikia. Ne ábén bad rímé nkalaŋ míme sékaleé ndíi Krístæ, mó adé ngíne e Dyöb, mó'-áá adé debyéé á Dyöb. ²⁵ Chöm éche ényinnad née eyókél é Dyöb étomé debyéé á moonyoŋ. Éche chó'-e ényinnad née ewəmwəm é Dyöb, étomé ngíne e moonyoŋ.

²⁶ A-baányaŋ, nyékamten nyaa é bad éche nyébédé á póndé eche Dyöb áchénléd nyé ábë ábë bad. Bad bë nköjsé bënnýin nyé nguse é bad née bad ábe bëwóó debyéé. Nyé nguse é bad nyébédé benkamlene. Nyé nguse é bad nyembid á túmbé é benkamlene. ²⁷ Boŋ Dyöb ápwéédé bad ábe bad bë nköjsé bëntédé née e'yókél é' bad. Abelé nê ákwaged bad ábe bëchágé yäl á nköjsé-te nén bán bëwóó debyéé. Dyöb dëmpwëd-te bad ábe nköjsé mínyinné née bad ábe béesé etógnén. Ambel nê ákwaged benkamlene. ²⁸ Dyöb dëmpwëd bad ábe bad bë nköjsé bënnýinné bán bédé nkójtéd, ápwëd ábe bënnýinné bán béesaá dyamdyam, bad ábe bënnýinné bán béesaá dyam dé abelen. Dyöb dëmbel nê álumed nén aá mam míme bad bë nköjsé bënyiné bán méde etógnén, méesaá chömköm. ²⁹ Ambel nê ábel boŋ modmod eékumé' ekáá á tâl á'sö' é' Dyöb. ³⁰ Chöm éche ábénléd nyé chóó ekáá boŋ nyébédé mod nhág ne Yesu Krístæ. Mekan míme Yesu Krístæ ámbenléd, ne syáné, debíi bán ádii debyéé á Dyöb. Nédē, Yesu Krístæ mó abelé boŋ syáné débelé mekan míme métáŋgéné, debé bad ábe bésáá, mó'-áá aködté syáné á mbéb-te. ³¹ Né-óó, éténlédé á kálag e Dyöb nén bán "Kéñzéé awé akume ekáá á tâl, ákume' ekáá á tâl dásö áyäle dyam áde Sáŋgwéé ábénléd mó."

*Paalɛ aběnlédé ngíne e Dyōb
âkal nkalaŋ tâŋgene kwéed eche Yesue*

¹ A-baányaŋ, áde rípédé áwēn âkale nyé nkalaŋ ríme nhóbe mam tâŋgene Dyōb,* meébənlád-taá e'yale é'mbáá ké'ε debyéé ámbáá. ² Membel nén áyāle áde mbédé átintê echén memmǎd á nlém-tê nén meé méebənlé dyam démpēe éetómēé âkal nkalaŋ tâŋgene Yesu Kr̄istəe ne kwéed eché áwédé á awəg. ³ Áde mbédé ne nyé menkēnkwognédté mměn âbel nsón, mbw̄ḡ m̄bédé me áte, nlém nhūnē-'e me á abum. ⁴ Áde n'yágté'áá nyé, nkánlé-'e nyé, pôle eché n'lângé'áá nyé eebédeé pôle eché etéde bad nlém á abum eché edé debyéé ámbáá áte. Meékanle'aá-'e nyé ne debyéé ámbáá âbel nén nyédúbe chōm éche n'lângéé nyé. Boj pen áde nkánlé'áá nyé nkalaŋ n̄ Dyōb, mekan ríme nhóbé'áá mélúmté'áá bán ngíne e Edədədəj é Dyōb edé áwéd-te. ⁵ Meehəde'aá meé nyédúbe nkalaŋ n̄ Dyōb áyāle mod áběnlédé debyéé ámbáá âkale nyé mó. Boj nhédáá meé nyédúbe m̄m̄e nkalaŋ ngáne Dyōb děn áběnlédé eche ngíne âbel nyédúbe.

Debyéé áde áhúú ne Dyōb

⁶ Kénē-'e ámpē, nzé sédé ne bad ábe bémáá awúu áte á adúbe-tê, s̄ebelé s̄ebənlád debyéé nzé s̄ekanle bō pôle. Ádē debyéé pen déebāgkē debyéé áde mod a nkōjsé áběnladté. Déesaa'-áá debyéé áde ké benkamlene bé nkōjsé bé' chii běbenladté. Ábē benkamlene bédíi bad ábe m̄mab nkamlen mēbēē á esóny é pondé. ⁷ Debyéé áde s̄ebənladté ádíi debyéé áde Dyōb ábágé sé. S̄ekale ntíi n̄ kun ríme Dyōb áběnlédé ádē debyéé abel. Ngen e'só Dyōb dénkēnlúmēdté modmod m̄mén ntíi áte. M̄mén ntíi ríme Dyōb átíídé ahóbé aá syánē ámpē děbē ásē e éche ehúmé á pónđé eché ehúé'. Dyōb déntíi aá móōbelé syánē n̄ se áde éehāgēē nkōjsé. ⁸ Nkamlene a nkōjsé ké nhóg enkēnsójténné ádén debyéé á Dyōb. Áyāle nzé běnsōjtēn chōm éche Dyōb ábeláá, né běnkēnwúú'é Sáŋgwéé a edúbé abome áde běmboméé mó á awəg. ⁹ Boj kénē-'e ámpē, éténlédé á kálag e Dyōb nén bán,

"Mam ríme Dyōb ábójséné âbèle ábē bad ábe bédéé mó, médíi mam ríme modmod éenýinēē mbēd,

m̄m̄e modmod ééwōgēē mbēd,

ríme modmod éékāmtēnēē-'áá áwe nlém-tê mbēd."

¹⁰ M̄mén mekan móo Dyōb álúmté syánē. Échē edədədəj chōō ánlōmmē álúmed syánē rímén mekan. Edədədəj énōne mekan mésyāāl áte, ébíi'-e mekan mésyāāl, káájne mekan mé Dyōb ríme mod éeheléé-se awámsén asōjten. ¹¹ Modmod eebyéé' e mewēmtēn mé mod ampée. Edədədəj éche édē mod áte chōō ébyéé' rímē mewēmtēn. Melemlem n̄ dōo modmod éebíi' e mewēmtēn mé Dyōb, étōmēé Edədədəj é Dyōb. ¹² Edədədəj éche syánē déwóó éhúú ne Dyōb. Deewóó' e edədədəj é nkōjsé. Dyōb ábágé syánē échén Edədədəj âbel désōjten mam mésyāāl ríme ábééné syánē rímē nsimé.

¹³ Né-ɔ́, s̄éebənládtē e'yale ábe moonyoŋ áběnladté áde debyéé áyáged bad. Boj s̄ebənlad e'yale ábe Edədədəj é Dyōb élyágtéé sé áhób. S̄ebənlad e'yale ábe Edədədəj élângéé sé tâŋgene rímē mekan. ¹⁴ Mod awé eewóó Edədədəj é Dyōb áte eedúbpéé mekan ríme Edədədəj é Dyōb élângéé bad áyāle anyíne mó eyákél. Eéhēlēē-'e mó asōjten áyāle Edədədəj éche Ésáá chěmpen chōō éwōŋgan bad ádol mekan mé Dyōb áte bwâm. ¹⁵ Mod awé awóó Edədədəj áte ádol mekan mésyāāl áte bwâm. Boj modmod eéhēlēē'-se asōjten mewēmtēn ríme ane mod. ¹⁶ Édē nén ngáne éténlédé á kálag e Dyōb nén bán,

"Nzé-módé abíi mewēmtēn ríme Sáŋgwéé?

Nzé-módé ahèle se aléb-pe mó?"

Boj syánē déwóó mewēmtēn ríme Kr̄istəe.

* ^{2:1} Mam tâŋgene Dyōb; donge á kálag dé'só áwóó: mam tâŋgene mekan mé e'kojnéd mé Dyōb.

3

Paale aá bembəledə bé Dyōb bṓ bō moosyəál bédíi

¹ A-baányaŋ bé Kr̄isto, meéhəle'aá sé nláá nyé mekan ngáne nílāngeé bad ábe adúbe ádāb áwúú áte áyāl e mekan mé Dyōb. Boj nlángé'áá nyé mam ngáne nílāngeé bad ábe bewóó mewém̄ten mé moonyoŋ a ekob. Nyébédé née nkáál, mentéd nyé née bad ábe bēmbootéd ábē mod nhóg ne Kr̄istəə. ² Abíi dōo nkáál rímmwáá'é, eedyágké ndyéed echē eləlé. Né-'áá me-'e mēmbootédté nyé mam míme méeləle áte tāngene nkalaŋ í Dyōb ayáged. Menkēnyágédté nyé mam míme méwúú áte, áyāle ene pónđé nyēnkēnkwogké ákob mó. Ké bəɔb-pe nyéekwōgēē ákob mó. ³ Áyāle nyédií nyéhíde' mekan mé ekob é yāl, nyéwánléné nhóg ne anínií kónjí, nyé běn ne běn nyéswaŋtán-ne. Bəɔb áde nyédií nyébeléé rímén mekan éélūmtēē bán nyédií nyéhíde échēn esíí é mekan mé ekob é yāl-e? A mbále, nyébeléé née bad ábe bewóó dásō nsôŋtēn mí moonyoŋ. ⁴ Chōm éche ékáá boj níhōbē nén édii nén, átintē echēn bad behóg běhōbe bán, "Ndíi mod awé ahíde ayáge áde Paale," ábíníi'-e bán, "Ndíi mod awé ahíde ayáge áde Apolose." Enén ndín e mbeltéd elūmte' bán nyéwóó dásō nsôŋtēn mí moonyoŋ.

⁵ Bəɔb-pɔ́, nzéé Apolose ádii? Nzéé me, Paale-'e ndíi? Bembəledə bé Dyōb ngēn bṓ sédíi. Sēwōŋgéné nyé ádúbe Kr̄istəə. Sé mod téé abele nsón míme Sáŋgwéé ábágé mó aá ábel. ⁶ Ndíi mod awé awéné mbál-e-bü, Apolose-'e mó adé mod awé asyōgé'áá ene mbál mendib áyāl, boj Dyōb dōo démbəl boj mbál níkwoge' saké sé. ⁷ Né-ɔ́, mod awé awéné ne mod awé asyōgé mendib bō modmod béesaá etógnén. Mod awé adé etógnén adíi Dyōb. Mó abele boj mbál níkwoge'. ⁸ Mod awé awéné ne mod awé asyōgé mendib bēbeléé nsón nhóg, Dyōb désabē-'e bō mod téé nchoo ne nsón míme ábelé. ⁹ Bembəledə bé Dyōb ábe bēbelé nsón nhóg bṓ sédíi. Nyé bad ábe nyédu bpé-'e nyédií nēngáne nzag echē Dyōb áwóó. Nhèle níhagtén-ne nyémpē ábē nēngáne ndáb echē Dyōb álōo'-é.

¹⁰ Mbēnlédé nsimé míme Dyōb ábágé me ábel nsón nēngáne nlóó-ndáb awé awóó debyéé álónj ndáb. Mensáá nsón í Dyōb átintē echēn, bembəledə bēmpēe békəené nsón míme nísáádé á'sō. Boj kénzéé awé alóo' atángéné atéd pónđé ngáne álōo'é ámīn e nsón míme bémáá asáa. ¹¹ Áyāle modmod éehēlēē-se ábel nsáaned mémpēe éetóméé míme mímaá abel. Mmē nsáaned ndíi ayáge áde n'yégté nyé tāngene Yesu Kr̄istəə nén meé, Dyōb ásso' áded alongé mbwiined ne Yesu Kr̄istəə. ¹² Donge dé bembəledə bēbenlad bwém nēngáne gōl, sílva ne meláá mé etógnén ákəen mmē nsón á'sō. Bembəledə bēmpēe-'e bēbenlad bwém bē nsón bēmpēe ábe é'bídé áyāl e mēl, ne ábe é'dé byaá, ákəen nsón á'sō míme bésáádē. ¹³ Pónđé épē echē moosyəál ányinné nyaa e nsón echē mod téé ápédé abel. Áyāle á epun éche Yesue ápēé ábídēd mam mésyāáél áwed. Ébē nēngáne mod awé ahédé bwém á dū, boj muú mbél anyín éche éhele-se éhyáŋ ne ecce éehelé-se éhyáŋ. ¹⁴ Nzé nsón míme mbəledə ábelé ámīn e nsón míme bémáá asáa méehyáa, né ákud nsábe. ¹⁵ Boj nzé nsón míme mbəledə ábelé ámīn e nsón míme bémáá asáa níhyáá, ane mbəledə éekudté chōmchōm, boj kénê, mwěn ádii abé mod nhóg ne Kr̄istəə. Boj pen ábē nēngáne mod awé abídné mehélé á ndáb-te echē ehyáa. Ádii abé á alongé boj chōm ésyāáél éche áwóó émad ahyáŋ.

¹⁶ Ndúbpé meé nyébíí bán nyédií abón áde Dyōb ádyee'é áte. Edəádaŋ é Dyōb édē átintē echēn. ¹⁷ Kénzéé awé abébte abón á Dyōb, Dyōb débēbēd ane mod, áyāle nén wéé Dyōb ádyee'é ádii hōm áde ádē ngəŋgú. Nyéběn-naá nyédií ádē hōm áde ádē ngəŋgú.

¹⁸ Modmod eédōgē yāl. Kénzéé awé awém̄téne átintē echēn aá mówōō debyéé á nkōŋsé-te wén, átimed yāl eyókél é mod ábel boj ákoŋ debyéé awóŋ. ¹⁹ Nlānge nyé néen áyāle, dyam áde bad bē nkōŋsé bénýinéé bán áde debyéé dōo Dyōb ányinéé née eyókél é akan. Debíi bán nén ádē mbále áyāle éténlédé á kálag e Dyōb nén bán, "Bad bēwém̄tan bán bēwóó debyéé boj Dyōb bēbenlad ádab debyéé děn ákób ádab akwâb." ²⁰ Éténlédé ámpē néen bán, "Sáŋgwéé abíí aá bad ábe bēwém̄tan bán bēwóó debyéé ádab debyéé déesaá dyamdyam." ²¹ Né-ɔ́, modmod eékūmnē baányoŋ ekáá á tâl, áyāle nyéé Dyōb ábágé bwém é'syāáél. ²² Dyōb álómé me, Apolose ne Petro áwōŋgen nyé. Bwém é'syāáél

ábe Dyöb áhágé á nköjsé, abagé nyé bó ábënled. Ké nyêbé á alongé ké' e nyêwé, Dyöb ábélé nê á mboj mímén. Mekan-ne mímé mebënlad ne nyé bojb ne mímé mebënled ne nyé á póndé eche ehúe' á'sō, médii á mboj mímén. Ábén bad bésyääl ne ábén bwém é'syääl Dyöb ábagé nyé bō. ²³ Nyêdii bad ábe Krüstæ, Krüstæ mó-' e abé ane awé Dyöb áwóo.

4

Paale aá Dyöb ápwédé bō ábèle Krüstæ

¹ Nyétéd sé nêngáne bad ábe bëbenle Krüstæ, ábe Dyöb ábélé aá bélânge bad mekan mé e'kojnéd. ² Chöm éche éhednad bán échê ndín é bembalede bëbel édii ábel nsón bwâm mímé echab sánj ábagé bō aá bëbel. ³ Boj me meewoo' e póndé ábel ne kchéé éche nyé ké' e mod ampée áwóo áhób tângene nsón mímé Dyöb ábagé me aá mibel. Ké mmén meeöhöbée tângene nsón mímé mibeleé, ké miboo' e méeboo' e. ⁴ Meenyinéé awusé ké ahög áyääl e nsón mímé mibeleé boj nê déelümtëe nén bán chöm ésyääl éche mibeleé étângéné. Sängwéé mwëmpen mó abíi nsón mímé mibeleé, ké nítângéné ké' e mëetângené. ⁵ Né-óó, nyéehöbé bán mod abelé nsón mí bwâm ké' e abelé nsón mé mbéb áde póndé éepedëe ábel nê. Ene póndé épé áde Sängú Yesu Krüstæ ápeé. Áde ápeé, äbídëd bwém ábe é'bédé á ehíntén-tê á e'nyínén bé ekide abídëd-te bad mewëmtën áwed mímé modmod érkëmbíí' e. Ene póndé dô-'aá Dyöb dékenné mod téé ngáne ápédé nsón abel.

⁶ A-baányañ bé Krïsto, nhóbe' mímén mësyääl áyääl echém ne Apolose âwóngén nyé ásöñten. Ntëde sé bad bëbe nêngáne elánsén ábel nyéyáge e'yale ábe bëhöbëe nén bán "Mod ábèle dásö mekan mímé méténléde." Modmod ekumné mod nhög ekáá á tâl se ányíné aníñí nköjtéd. ⁷ Dyöb áhágé mod nhög etógnén tómaa aníñí-ye? Cheé mod ádii éche Dyöb déebeleé boj abé? Cheé-ó mod ákuménné ekáá á tâl, áde édii bán kchéé éche mod ádii Dyöb dô' ábelé mó?

⁸ Bojb nén nyélümte byánán nyêwóo chöm ésyääl éche nyétógnéné. Nyélümte byánán nyësudé nhõn. Nyétëdté sé bembalede, nyé bën nyêwëmtan bán nyêdii kâj. Mendëj nén meé nyékoj kâj abé ábel boj sémpë sekamlan ne nyé. ⁹ Nwëmtan nén meé Dyöb ábélé aá sé bembapee bë nlómag sébë nêngáne bad ábe béesé etógnén átîntë e bad. Sëdii nêngáne bad ábe bétomté mbakú bán bëwë. Nhõbe nén áyäle bad bésyääl bénöne sé ânyín chöm éche ébenlad ne sé. Saá-kaá bad bënpen boj kâj ne ángel énöne sé. ¹⁰ Bad bényíne sé née e yókél é'bad áyäle sébenleé Krüstæ. Boj nyépen nyêwëmtan bán nyêwóo debyéé áyäle nyéddí nhög ne Krüstæ. Bad bëwëmtan bán séewoo' e ngíne ábel dyamdyam boj nyêwëmtan bán nyêwóo ngíne eché ehúu ne Dyöb. Bad bëebagéé sé edübé boj bëbage nyé edübé. ¹¹ Kâdjne ne bojb, séewoo' e chöm éche sédyágkë ne éche sémwágkë. Séewoo' e mbóté éche ékwogé sé ahé. Sêyögké mbéte akud ámekáá mé bad. Séewoo' e wéé sédyee' e. ¹² Sëbële ntü ní ngíne ábel boj sekud chöm éche séwönganné éched yä. Nzé bad bésyá' sé sélângé bō bán mekan mëbëen bō bwâm. Nzé bad bëbële sekude metake, sëwesan. ¹³ Nzé bad bëhöbe sé mekan mé mbéb áyääl, sêhöbe bō mekan mé bwâm áyääl. Ké bojb bad bëdii bényíne sé mbinde áwab dëd-te. Séesaá dyam dé abelen áwab.

¹⁴ Ntele nén saké áwoged nyé e'sôn boj ntenle nyé álél nyé tângene mekan mímé nyétángéné abíi. Áyäle nyéddí nêngáne ábêm bán ábe nídäá. ¹⁵ Kénéé édii bán nyêwóo bemeléede bë Krïsto híin, mod nhög mwëmpen mó adé nêngáne sáá awén. Apëen áde mëpíinédé nyé nkalaj mí bwâm ábélé ndíi nêngáne sáá awén a Krüstæ. ¹⁶ Né-óó, ncháa nyé nén meé nyébële mekan mímé mëmpë mibeleé. ¹⁷ Nén dô' ákéé boj nílomé Timotie áwén. Adii nêngáne awem mwän á dñi á Sängú. Ndäé mó, ayðgké-' e mekan abel ngáne éhednadte. Nzé apedé ákamtén nyé nyaa e alongé eche níwóo nêngáne mod a Krïsto. Ene nyaa e alongé edé nchoo ne chöm éche n'yägtëe mwembé ké níhéé mímé níkagké áte áyäged. ¹⁸ Nyé donje á bad nyéddé kúmbe, nyéwëmtan bán mëepaá áwén. ¹⁹ Boj nzé Sängwéé akwënténé, nkwogé ape áwén. Ene póndé-'aá mëhëdté áte ábíi chöm éche ábë bad ábe bëdë kúmbe békoo' e abel. Mëbii ké béköjté ngíne awón eché ehúu ne Dyöb ké' e nsəl ngén móo bëbëleé áte. ²⁰ Nkamlén ní Dyöb mëesaá chöm éche édë á nhöbtéd, boj

índíi ngíne eché elûmte' á mbeltéd. ²¹ Ahéé aboñnéde nyé, nyêdáé bán nzé mpedé áwén nkógsan nyé áyāl e kúmbe eche nyédíi ké'ε nyêdáé bán nzé mpedé nlúmed nyé nlém mé edənje, nchedne nyé yāl?

5

Paal ahóbé tângene akáb
dé mesón á mwembé n̄ Kɔrinto

¹ Nwogé nén bán mod nhóg átîntê echén akábe asón, nyaa e asón eché ké bad ábe béebí Dyōb bēeheléé se békāb. Chōm éche ílhobéé édíi nén meé, mod nhóg átîntê echén akábe asón ne saá mwaád. ² Chán-nō nyéhèle nyébé kúmbe áde édíi bán ane mod rímē mbéb ítângéné nyé dásō ndutul awóged. Mó awé abele enén ndín e dyam, nyêtângéné néé nyénáné mó átîntê echén. ³ Nhóbe meé nyébel n̄ áyāle kénéé méesaá ne nyé, nkamtan nyé póndé téé. Nhóbe byánán ndé ne nyé nén meé mmaá mbakú atómed, ⁴ ne kunze eche Sángú Yesu Kr̄istəə ábágé me, nhóbe nén meé nyékógsen ane mod awé abélé mímē mbéb. Nzé nyéládné, ébē byánán ndé ne nyé, awed Sángú Yesu Kr̄istəə ábe nyé ngíne ábel kchéhéé éche nyewémténe ábel. ⁵ Nhede meé nyébe ane mod á mekáá míme Satane ábel boj Satane ábébed échē ekob é yāl. Kénéé édíi bán Satane ábēbēd échē ekob é yāl, Yesue ásōj échē edádəj á epun éche ápēé ákáad.

⁶ Nyétângeneé kúmbe abé. Nyébíi nén bán mbumé n̄ ngun rísonle' nzé böhédé mwă esulten áwēd-te, melemlem n̄ dōo ane mod awé abelé mímē mbéb áhele ábel bad bëmpēe bëbel mbéb. ⁷ Nyéhûd esulten é nchun ésyāl, ábel boj nyébē n̄engáne mbumé mékōslē míme méewóo esulten, né'-áá nyékóó abé. Nyéde nén áyāle Kr̄istəə anwé á nló mímed. Mó ambé néé Mwǎn-a-Ñdyoŋ mí mbód awé bëmbéé néé mendé mé ngande e Nnyíme-ámīn, áyāl e mbéb mí bad. ⁸ Né-óó, nyewôg menyirge ne ene ngande, esulten é nchun éebág ámpē. Abé ádēd ábē póndé ésyāl n̄engáne abé á bad bë Dyōb, deébēlē e'bébtéd é' mekan, deebébé-'e nlém á abum. Boj pen déwōj abé dékōslē, déhíde Kr̄istəə ne nlém nhóg, dékale-'e mbále.

⁹ Kálag eché mēnteléé nyé menláá nyé meé nyéhōjné' bad ábe békábe mesón. ¹⁰ Saké bad ábe beedúbpe Dyōb bōo n̄ihobáá, kénéé édíi bán bō doŋge á bad békábe mesón, bédé ngoód, bédé bechib, doŋge ábenlé-'e myōb mé metóm. Weéhēlē-ssé ebáj échén ndín é bad á yāl kááj né ehídté á nkōjsé. ¹¹ Boj bad ábe mēnteléé nyé meé nyéhōjné bédíi bad ábe bëchágé yāl bán bédíi bad bë Kr̄isto boj békabé mesón, bëbë ngoód, bëbagé myōb mé metóm edubé, bëhōbë bad mekan mé mbéb á yāl, bëmwāg mím bwâmbwam mékōbë bō, bëbë-'e bad ábe bëchibe'. Nyéedyág ké ndyéed ne échén ndín é bad. ¹² Meewóo'é kunze ké pög áhób meé békógsen bad ábe béesé bad bë Dyōb. Bad ábe bédé á mwembé-te bōo nyétângéné akógsen. ¹³ Dyōb dōo dékāad bad ábe béesé á mwembé-te. Éténléde á kálag e Dyōb nén bán, "Nyéhûd mod awé abele mbéb átîntê echén."

6

Mod eesómné mwanyan
wéé bad ábe beedúbpe Kr̄istəə

¹ Nzé nyé mod ké ahéé awánléné mwanyan a Kr̄isto dyam, éekág wéé mod awé eedúbpe Kr̄istəə aá ákáad bō. Boj pen áke wéé bad bë Dyōb ábel bëtimed bō ásé. ² Nyébíi nén bán bad bë Dyōb bōo békāad bad bë nkōjsé. Né-óó, ngáne édíi bán nyéékaad bad bë nkōjsé, nyétângéné néé nyékáadteé mpínted mé mekan. ³ Nyébíi bán syánē-ee dékāad ángel. Néé édíi-'áá n̄, chán-nō déeheléé baá mam ábe bëtøge mbóó átîntê echén mbwe-téé amad? ⁴ Né-óó, nzé échē ndín é mam épédé átîntê echén, nyéétiṁ chó néé atéd, nyékéen wéé bad ábe mwembé méetédeé néé dyam bán bōbō bëmade nyé chó-ye? ⁵ E'sôn ne nyé. Nédē modmod eesaá átîntê echén awé awóó debyéé ákóm nsaj átîntê e mod bō mwanyan ábe bëwánléné-ye? ⁶ Boj mod atime mwanyan akeen á kóte, bad ábe bëedúbpe Dyōb békáadte-'e bùmō.

⁷ Asómén áde nyésômneé nhóg ne aníníí á kóte álûmte bán nyêkwédé ne akwé děn. Édé mboj mwânyorj âpanen we tómaa we âkeen mó á kóte. ⁸ Boj nyêtíme nyêpanne, nyêdoge-'e nhóg ne aníníí, nyêbele nê kájyne wéé baányorj bé Krísto. ⁹ Nyébíi nén bán bad ábe békabele e'bébtéd é' mekan béebáá á nkamlen í Dyöb. Modmod eédögé nyé. Bad ábe békabe mesón, bad ábe békabe myöb mé metóm, bad ábe békabe mesón á ndáb e e'wóngé, baachóm ábe bénarjnad baáb baachóm bëmpée, ábén bad bésyääl bó modmod béebáá á nkamlen í Dyöb. ¹⁰ Bad ábe békibe', bad ábe bédé ngoód, bad ábe békágé yél á amwé á mím, bad ábe békibe bad mekan mé mbéb á yél ne bad ábe békumne bad bwém bó modmod béebáá á nkamlen í Dyöb. ¹¹ Nyé dojge á bad nyêbeláá échén ndín é mekan. Boj á dín áde Sángú Yesu Krístæ ne á Edædæj éche ádæd Dyöb, békudé nyé rímén mbéb á yél, nyêdé bad ábe bésáá, Dyöb ábanné nyé née bad ábe bésáá, nyêkobnédé-'e á'sò é Dyöb.

Nyébenlad échen yél ábe Dyöb edúbé

¹² Nyé mod nhóg ahele ahób aá, "Nwóó kunze ábel kékchéé éche ídáá abel." Nê ádé mbále. Boj pén saké chörm ésyääl éche mod ábeléé éwóngan. Mod ahele ahób aá "Nwóó kunze ábel kékchéé éche ídáá abel." Boj chörm kékchéé éetângeneé née étedéé me ntâj. ¹³ Mod ampée ahele ahób aá "Bébél ndyéed áyâle abum, békél-le abum áyâle ndyéed." Nê ádé mbále. Boj Dyöb débél ábê bwém bëpë á asog. Dyöb déebeléé alongé á moonyon aá békabe mbinde é mekan boj abelé dó aá békabe Sângwéé, Sângwéé mó-'áatogné yél e moonyorj. ¹⁴ Dyöb démpuúd Sângwéé, nê dó-'áabénlédté eche ngíne ápuud syáné. ¹⁵ Nyéebíi' é nén bán échen yél chóo édé pág éche ábelé yél eche Yesue-yé? Né-oo, nhèle ntéd pág é yél éche Krístæ boj ríke rílatén ne yél e akwalee-yé? Éetângeneé abé nê mbé! ¹⁶ Ké'e nyéebíi' é bán mod awé atédé eche yél boj álatén yél e akwalee abelé búmō bétimé yél póg-e? Eténlédé á kálag e Dyöb nén bán, "Échê yél ábe étim yél póg." ¹⁷ Boj mod awé mó-'e adé nhóg ne Sângwéé abele átím mod nhóg ne mó á edædæj. ¹⁸ Nyéewoo' é dyam dé abel ne mbinde é mekan. Mbéb kékchéé mémpée ríme mod ábeléé ménenonéé eche yél. Mod awé akábé asón abelé mbéb tângene eche yél. ¹⁹ Nyéebíi' é bán échen yél édii abón áde Edædæj éche Ésáá édyee' é áte-yé? Dyöb dóo ábágé nyé échen yél. Saké nyé nyêwóó chó, Dyöb dóo áwóó nyé. ²⁰ Dyöb ácháné nyé ne nkun ríme níchábé ámín. Né-oo, nyébenled échen yél ábe Dyöb edúbé.

7

Paalé alébe bad tângene e'wóngé

¹ Bao'b-poó, mélâa nyé tângene mekan ríme nyétélé á kálag eché nyéténlé me. Ebóó bán mod eewóó' mmwaád.* ² Boj ngáne édii bán akáb dé mesón ábúú áte bwâmbwam, ébóó bán mwenchóm téé áwóó awé mmwaád, mmwaád téé-'e awóó awe nchóm. ³ Mwenchóm téé atângéné ábelé' mekan ríme mwenchóm atângéné mwaád abele, mmwaád téé-'e atângéné ábelé mekan ríme mmwaád atângéné nchóm abele. ⁴ Mmwaád mwén eekamlánné eche yél, nchóm mó akamlan mó, melemlem nê dóo mwenchóm éekamlánné eche yél, mwaád mó akamlan mó. ⁵ Nyé ábe nyêwóó, mod kékchéé waáb e'noj é'sé, éetómeé né nyé bén nyêchéméne bán nyébel nê á esój é póndé, ábel boj nyéwóó póndé e bwâm âkáne. Boj pén ámbid e nê nyétângéné abé ámpé ngáne nyénsébëe abé, ábel boj Satane eépiinád nyé mekagseñ ákáb asón. ⁶ Meehóbéé nén meé nnyágte nyé ábel nê, boj nhóbe meé nê dóo ebóó bán nyébel. ⁷ Mendâj pen meé bad bésyääl béké áde békubjeneé née me. Boj mod téé awóó nde eche Dyöb ábágé mó. Abelé dojge á bad aá békubjeneé mewémten áwóó mmwaád kékchéé nchóm, ábel-le ábínií áá békubjeneé.

⁸ Bao'b-poó nlârge nyé bad ábe békubjeneé bebaád kékchéé bechóm ne ábe béké bekúd meé, ebóó bán nyéwóó bebaád kékchéé bechóm ngáne me-'e méewóó' é. ⁹ Boj pén, nzé nyéehel yél akób, mod-téé awóó mmwaád kékchéé nchóm. Nhóbe nén áyâle édé mboj mod áwóó'

* 7:1 Eewóó' mmwaád, dojge á kálag áwóó: eénaajnáad mmwaád.

mmwaád kē'ε mmwaád âwóŋ nchóm, tómaa âwóŋ esíí é ngíne áte weé né móonwóŋ áde wéewoo'č.

¹⁰ Boob-poó, ne bad ábe béwóó bebaád kē'ε bechóm, saké me nhóbe' pen, Sáŋgú Yesue mó ahóbe'. Ahóbe nén aá mmwaád eetâŋgénéé nchóm atede. ¹¹ Boŋ nzé édé bán atedté nchóm, atáŋgéné adyee ésebán awóó' nchóm ampée, kē'ε bó nchóm bétim ásé. Mwenchóm-me eetâŋgénéé néé ánáné mwaád á e'wóngé.

¹² Boob-poó, ne nyé bad ábe nyêlyagé ásé, me-eé nhóbe' saké Sáŋgú Yesue. Nhóbe nén meé, mod awé adúbpé awé awóó mmwaád awé eedúbpe boŋ ákwentén aá búmō bedyee, ane mod eénané' ene ndín e mmwaád á e'wóngé. ¹³ Nzé mmwaád, awé mó-'ε adúbpé awóó mod awé eedúbpe awé akwenténé mó awóŋ, ane mmwaád eetâŋgénéé ane mod atede. ¹⁴ Nhóbe nê áyale nzé mod awé eedúbpe awóó mmwaád awé adúbpé, ákobnéd á'sō' é Dyöb, abé áde adíí mod nhóg ne mmwaád awé adúbpé. Melemlem, nzé mmwaád awé eedúbpé awóó mod awé adúbpé, ane mmwaád ákobnéd á'sō' é Dyöb abé áde adíí nhóg ne mod awé adúbpé. Nzé énkembé nê, né bán ábe ábén bad béchyáa' é békobnádté á'sō' é Dyöb. Boŋ édé nén bán békobnad á'sō' é Dyöb. ¹⁵ Boŋ pen nzé mod awé adúbpé awóó mod awé eedúbpe, boŋ awé eedúbpe ahóbé aá e'wóngé é maa nyétedé, é maa. Nzé nê ábénlédé, mod awé adúbpé awóó kunze ádyee né ésebán bénýagte mó ádyee á ndáb e e'wóngé. Dyöb áhede aá syáné débê nsaj ne nhóg ne aníni. ¹⁶ We, mmwaád awé adúbpé Yesue, kapóǵ ehéle ésōŋ alongé áde awoŋ nchóm awé eedúbpe. Melemlem ne we mwenchóm awé edúbpé, kapóǵ ehéle ésōŋ alongé áde awoŋ mmwaád awé eedúbpe.

Paalé aá bad bébê ngáne Dyöb dêmpwëdté bó

¹⁷ Boŋ pen Sáŋgú Yesue amaá atíi ngáne alongé áde syáné mod té átâŋgéné abé. Né-oó, syáné mod téé ábê nyaa eché ámbéé áde Dyöb dêmpwëdté syáné aá débê ábê bad. Ádén dyam dóo nílâŋgeé mwembé té. ¹⁸ Nzé edé mod awé bémmadté ayag boŋ ámbid e póndé Dyöb ápwéð we, weétiñé e'chemléd ahúd ábe é'lûmte nén bán bén'yág we. Melemlem, nzé edé mod awé bénkén'yagké boŋ Dyöb ápwéð we, weémwág-se býág we. ¹⁹ Ké býágé mod kē'ε býeyageé mó, nê déesaá etógnén. Chóm éche édé etógnén édíi áhíd mbéndé é Dyöb. ²⁰ Mod téé ábê nyaa eché ámbéé áde Dyöb dêmpwëdté mó. ²¹ Nzé wembé ntâŋj á póndé eché Dyöb dêmpwëdté we, nén déetagté we. Boŋ nzé echoŋ sánj ahóbé aá wéebáá ntâŋj ámpé, ekob áned. ²² Mod awé ambé ntâŋj Dyöb ádêhób aá mópwede mó adíi néé kunze áyale Sáŋgú Yesue ahúdé mó á mehan. Melemlem ne mod awé enkembé ntâŋj Dyöb adêhób aá mópwede mó. Apwed áde Dyöb ápwéð mó ábélé adíi ntâŋj awé Krístæø. ²³ Dyöb ácháné nyé ne nkun míme níchábé ámín. Né-oó, nyéewóglán bad ábe bélâŋge nyé mekan míme nyétné abel. ²⁴ A-baányaŋ, nhede meé mod téé áwóŋ alongé áde ánwöngé áde Dyöb ápwéð mó.

Paalé ahóbé tâŋgène bekúd ne bad ábe béewoo bebaád kē'ε bechóm

²⁵ Boob-poó, tâŋgène bad ábe béewoo bebaád kē'ε bechóm, Sáŋgú Yesue eelâŋgeé me chóm éche ítâŋgéné nyé aláa tâŋgène ádén atón. Boŋ kē nê, awôŋgen áde Sáŋgwéé áwóngéné me ábê mod awé bad bésumé nlém áyâl, mélâa nyé dyam áde míbíí meé átâŋgéné. ²⁶ Nyíné nén meé ngáne ndutul édíi enén póndé, ébóó bán mod adyee ésebán awóó' mmwaád kē'ε nchóm. ²⁷ Nzé mod amaá mmwaád awóŋ, eétëdté mó. Nzé mod eewoo mmwaád, eéhëdë mmwaád awé áwóó' é. ²⁸ Boŋ nzé mod awóó mmwaád, eébeléé mbéb. Nzé mmwaád-te awóó nchóm eébeléé mbéb. Ké nê-'ε bad ábe béwóó bebaád ne bebaád ábe béwóó bechóm békudé metake hiín á alongé ádâb. Nzom eché ekâboŋ níhobé nê edíi, nhede meé békudé mímén metake.

²⁹ A-baányaŋ, chóm éche íwémténé nyé aláa edíi nén, póndé eché déwóó á nkonyisé edé esóŋ. Né-oó, bootya boob mod awé awóó mmwaád ábíi nén aá mmwaád eesaá chóm éche étómténé etógnén abé áwé alongé. ³⁰ Melemlem ne bad ábe bésudne', béetédté nê néé dyam áde átómtené etógnén abé. Ábe bó-'ε bédé menyinge, béetédté nê néé dyam áde átómtené etógnén abé. Bad ábe béchané bwëm béstédté bán bwëm ábe béchanéé

bóo é'tómténé etógnén abé á alongé ádāb. ³¹ Bad ábe békide mekan mé nkōjsé ámbid, békanné nlém á yél e rímē mekan. Áyèle mekan mésyāsl ríme débeléé á nkōjsé-te chii, mépē á asog. ³² Nhede meé dyamdyam déetagté nyé nlém á abum. Mod awé eewóo mmwaád, Sángwéé móo ákamtanné póndé esyāsl, ngáne ábelé-'e boj awóged Sángwéé menyinje. ³³ Boj mod awé awóo mmwaád mekan mé nkōjsé mwěn ne mwěn móo ákamtanné póndé esyāsl. Póndé téé akamtan ngáne átāngéné mwaád menyinje awóged. ³⁴ Né-óó, akamtan mekan mébe akamten ahog. Mmwaád-te awé eewóo nchóm, ké'e mwán a mwaád awé eebíi mwenchóm, Sángwéé móo ákamtanné ne ngáne ábeléé mó. Mekan mésyāsl ríme ábeléé míme nlém ísyāsl mbág áhed ábel ásâñ á'só é' Dyob. Boj mmwaád awé awóo nchóm mekan mé nkōjsé mwěn ne mwěn móo ákamtanné. Póndé téé akamtan ngáne átāngéné nchóm menyinje awóged. ³⁵ Nhóbe mímén mekan mésyāsl ábel boj méwōngén nyé. Meehóbéé meé nyétángéné mó ahíd. Boj nhede meé níwōngén nyé áhíd chóm éche étángéné ábel boj nyébenle Sángwéé ne nlém nhog.

³⁶ Nzé mod anyíné aá móohenlé yél akób ásin káéñ mówóñ mmwaád awé áhóbé aá mówóo', ákag á'só áwóñ mó ngáne ímíme mewémten mélángé mó. Né déesaá mbéb. ³⁷ Boj nzé mod amaá atíi áwe nlém-té, áde békonyagteé mó boj akóbé yél, amadé-'e á nlém-té aá mówoyngé ane mmwaád awé áhóbé aá mówóñ, né abelé dyam áde ádé bwám. ³⁸ Né-óó, nzé mod awóo mmwaád né abelé dyam á bwám. Mod awé mó-'e akóbé yél boj eewóo mmwaád abelé dyam áde ábóó bwâmbwam.

³⁹ Mmwaád awé awóo nchóm átāngéné abé ne nchóm á alongé ádē ásyāsl. Boj pen nzé nchóm awédé, awóo kunze áwóñ mod awé ádáá. Ane mod pen átāngéné abé mod awé adúbpé Sángwéé. ⁴⁰ Boj ne me, nnyíné meé mmwaád awé nchóm awédé, ábē menyinje nzé adyeé né áde eewóo'é nchóm ampée. Mbíi nén meé Edéádəñ é Dyob chóo élyágte me áhób mímén mekan.

8

*Paale ahóbé tângene medyé
níme békageé e'diídinge*

¹ Bóob-póó, nhóbe tângene medyé níme bad békageé e'diídinge née mendé. Édé mbále ngáne élóbnédé nén bán "Syáné moosyásl debíi dyam." Ene ndín e e'bíi bé akan ebéle mod abág kúmbe. Boj edéngé éwéde syáné áte. ² Nzé mod awémten aá móbíi dyam, ane mod eebíi'é dyam ngáne átāngéné abií. ³ Boj nzé mod adéá Dyob, Dyob ábelé ábíi mó.

⁴ Bóob-póó, nhóbe tângene adyé dé medyé níme békageé ediídinge née mendé. Debíi nén bán e'diídinge, nédé myób míme békénlé mekáá, méesaá dyamdyam. Dyob ahog dëmpen dóo ádé. ⁵ Bad békóbe bán myób mémpéé míme békagéé bán myób médé á nkoj mí min ké'e á nkoj ínsé. Édé-'e mbále bán myób míme bad bén békénlé mekáá ne besángwéé békójsé híin bédé. ⁶ Boj kéné debíi bán Dyob ahog dóo ádé. Mó adé Titéé awé ahagé chóm esyāsl, mó akéá-'e boj debé á alongé. Sángwéé nhog mwëmpen-naá adé. Mó adé Yesu Krístəø. Mbwiined ne mó dóo békagé chóm esyāsl. Mbwiined ne mó dó-'aá dédií á nkōjsé. ⁷ Boj saké moosyásl abií mímén mekan. Donge á bad pen béménténé ábē e'diídinge edúbé abe nyaa eche káéñ ne chii nzé békagé medyé, béké békéntan bán békage mímē myób edúbé. Nlém méewúú'é bó á abum, né-óó békéntan bán mímē medyé mébéké békénsa'é á'só é' Dyob. ⁸ Ndyéed éehélléé-se ebéel bad békénsa'é á'só é' Dyob. Deéhélléé-se debé bad béké nsé dedyédé chó ké'e debé bad béké bwám áde déedyédé chó. ⁹ Nyétéd póndé pen ngáne nyébenladté kunze eché ebagnédé nyé bad béké Krísto. Nyébenlad chó nyaa eche nyéebénlé se áben baánya béké Krísto ábe mímab nlém méewúú'é á abum békénsa'é mbék-te. ¹⁰ Nzé mod awé nlém méewúú'é á abum anyíné nyé ábe nyéhóbé bán nyébíi akan nyédyág medyé á abón áde mímē myób, nyéebíi'é bán nén dëtéd mó nlém á abum ádyé medyé míme békagé ábē e'diídinge née mendé-yé? ¹¹ Né-óó, wé awé echagé yél wéé mod awé abií akan, ehede wéé mwányoñ awé Krístəø áwédé awé nló áwé áyèle ábóñ e'bíi béké akan-e? ¹² Nzé ebéle mbéké wéé mwányoñ, né Krístəø móo ebéle mbéké áyèle ebéle mwányoñ a Krísto ebébté, ebébté-'é mó nlém á abum. ¹³ Né-óó,

nzé ndyééd eche ídyágkē ebélé mwănned a Kr̄sto ahúne' á mbéb-te, né méedyáá ene ndyééd ámpē mbêd, ábel bon, éebél se mwănned ahún á mbéb-te.

9

*Kunze e bembap*εε bé nlómag
ne nsón míme bétángéné abel

¹ Mε, Paale ndíi mod awě awóó kunze nē̄gáne bad bémpeé ábe bédúbpé. Ndíi mbapées a nlómag. Nnyíné Yesue, Sá̄ngwéé awêd. Nyéē nyêdé nē̄gáne mbakú áyāl e nsón ríme Sá̄ngwéé ábélé mbwiined ne me. ² Ké bad bémpeé bé̄enyiné me nē̄gáne mbapées a nlómag, nyépen nyékobé me nén bán ndíi mbapées a nlómag. Abé áde nyéddíi ne Sá̄ngwéé nyé běn nyêdé néé e'chem ábe é'lumte bán ndíi mbapées a nlómag.

³ Mekan ímme mbelé nlängē bad ábe bék̄e me mam áyāl médií nén: ⁴ Séewoo'é kunze bad ábe sé ndyéed ne mmíítéd áyāl e nsón ímme sébeléé-yε? ⁵ Séewoo'é kunze átéed mmwaád awé adúbpé Kr̄istəá áhoon sé áke meke melemlem ngáne ábíníí bembapεe bé nlómag bék̄eléé-yε? Saá nê dōo Sángwéé baányan ne Petro bék̄eléé-yε? ⁶ Sé Banabase běnpen-εé sétángéné nsón abel átəgen échēd yāl-le? ⁷ Sánze ehéé ébelé nsón boj mwēn átəgné eche yāl? Nzé-módé áwōn nzag e besabé boj eedyág ké epum é sabé ehóg? Nzé-módé adé awé abôngé nyag ésebán amine' chó mebií ákud míslig?

⁸ Saké á nsônten mí moonyonj dëmpen nhóbeé mímén mam, mbéndé e Mose chómpé ehóbé melemlem. ⁹ Ehóbe nén aá, "Weetádé nyag nsəl eche esálte ngun." Bøob-pøó, nén álûmte nén bán Dyöb átéde nyag etógnén-ε? ¹⁰ Saá syánē bën-εé ákoyteé ahób-ε? Syánē bën-εé dekøá boj átélé nê. Mod awé akwele nzag abele áá móðkünd mbote, mod awé mó-'ε asálte ngun abele nsón aá móðkünd ngun. ¹¹ Sé bembapεé bé nlómag sêwéné mekan mé e'déadøj átintê echén. Édé mbéb nzé sêhédné nyé mekan mé nköjsé-ye? ¹² Nzé bad bëmpée bëwóó kunze áheden nyé bwëm, né sêwóó'é kunze áheden nyé bwëm tómaa bó-ye?

Boŋ séébenledéé enén kunze. Sêkwénténé metake mésyāāl, ábel boŋ nén déēkāā' akal dé nkalanj mí bwâm míme sékaleé tâŋgene Kr̄istəa. ¹³ Nyébíí bwâm bán bad ábe békale nsón á Ndáb-e-Dyöb, áhed dóo bó-'e békudeé echab ndyéed. Melemlem nê dóo bad ábe békale nsón ábe mende á menyán mé mende, áhed dóo békale békud akab dé mende. ¹⁴ Melemlem nê dóo Sáŋgwéé áhóbé áá bad ábe békale nkalanj mí bwâm békud ntɔgén wéé bad ábe békaleé mímê nkalanj.

¹⁵ Kénéé édíí nê, meébenledeé enén kunze ké póg. Saá-kaá nê ákéá boŋ ítelé' enén kálag ábel boŋ bébenle me rímén mésyāél. Měkwentén âwé tómaa mod ábel meewoo' nzom ákum ekáá á tâl tâhgene rímêm nsón. ¹⁶ Meewoo'é kunze ákum ekáá á tâl áyæle nkalaŋ mí bwâm míme nkaleé. Dyöb dën dôo áhóbé áá míbel rímén nsón. Medim ne me nzé meékale nkalaŋ mí bwâm. ¹⁷ Nzé mm  n-e   mempw  d rímén nsón ríme ímbeléé, né nsine nsábe. Bon ngáne méepw  deé mó, Dyöb dën dôo ábágé me mó aá míbel. ¹⁸ Nsábe nkaleé-   nkudeé? Nsábe ríme nkudeé íd  i n  n, nzé nkale nkalaŋ mí bwâm meéhedné bad nsábe, meéb  nl  dt   kunze ech   nkaleé nkalaŋ mí bwâm.

²³ Mbéle mímén mésyāēl áyāle nhede meé nkalan í bwâm ríkanlad, âbel boj ríkud nnam mîme rímê nkalan mîpeené. ²⁴ Nyébíí bán bad híin bényagte mehélé boj mod

nhóg abelé atóm baáb, ákūd-te nsábe. Né-ɔó, nyényagte ábel boj nyékud nsábe. ²⁵ Mod ké ahéé awě abojsan ânyaged mehélé abelé ásūdēd yǎl. Abelé nén ábel boj běwáad mó ekóté é edúbé é mbonja. Échê ekóté éebeméé, ébēb. Boj nsón míme sēbeléé, sēbelé mó ákud nsábe míme mébē á ngíndé ne á ngíndé. ²⁶ Né ákáá meényagtéé kéchán, meelúméé-’e ábêm e’chog kéchán. ²⁷ Né-ɔó, nwéde yǎl áte, nsudte-’e chó ábel boj ébel kéchéé éche nhedéé me ébel. Mbele nén ábel boj meémāā bad běmpēe nkalaŋ m̄ bwām akale boj mměn meékūdē nsábe.

10

Paalē aá bad béebenlád myōb mé metóm

¹ A-baányaŋ, ndáe meé nyékamten ábēd betaa ábe Mosseé ályágté’áá áde běbídé á Egipto. Dyōb dénlōmē bó mbag eché elyágté’áá bó. Bó moosyáel běmpōŋj á edib é nkwe te ésebán běhoo’. ² Apoj áde běmpōŋjé á edib é nkwe-te ne abé áde běmbēe ásē e mbag děmběl běnkūd edusen, běhídē-’e Mosseé. ³ Bó moosyáel běndyé ndyéed e edaádəŋ eche Dyōb dénlōmēe bó mbwiined ne menyáké. ⁴ Melemlem běmmwē-’e mmíítéd mé edaádəŋ míme Dyōb dénlōmēe bó mbwiined ne menyáké. Běmmwē mendib míme Dyōb děmbenlé boj mébíd á ndim e aláá-te eché embé ne bó. Ene ndim e aláá ebédée Krěstəe. * ⁵ Boj kénē Dyōb děnkēnwóggénné bó bad hín menyinge. Né děnkāŋ anwúu bó, ndim nhentéd bó áte á ehyáŋge.

⁶ Bōob-pōd, mímén mekan mésyáel médií něngáne eláŋsén ásím syánē etúu áte, nén deewóó nlém ábel mbéb ngáne běbélé’áá. ⁷ Nyéebenlé myōb mémpēe ngáne bó doŋge á bad běbenlé’áá. Éténlédé á kálag e Dyōb nén bán, “Ábē bad běndyé ásē, bědyág bwěm, běmwág mím, běbelé-’e mbinde é mekan.” ⁸ Syánē deekábé mesón ngáne bó doŋge á bad běbélé’áá. Nén děmběl Dyōb děnkōgsen bó, bó bad móom mé e’kálé mébē ne e’kálé é’láán běwé epun ehóg. ⁹ Syánē deékāgē Sáŋgwéé ngáne ábēd betaa běmbenlé boj nyě ewúu bó. ¹⁰ Syánē deenyojnád Dyōb áte ngáne bó doŋge á bad běbélé’áá. Dyōb dénlōm ángel e kwéed ewúu bó. ¹¹ Mímén mam mésyáel měmbenléd ábel mébē něngáne eláŋsén wée bad běmpēe, běntěl-les mó ásē ásím syánē etúu áte. Syánē dedé bōob á póndé eché nkōnsé nkwoğé aps á asog. ¹² Né-ɔó, mod a Krěsto ké ahéé awě awémténé áá mótyēēmē á adúbětē átēd póndé ábel boj eékwāg. ¹³ Mekāgsen ké méhéé míme métáné we, médií nyaa e mekāgsen eché etáne bad běmpēe. Boj Dyōb áwóó nlém mímē bad běhèle-se běsum mó nlém á yǎl, éemwaá’áa-’e aá ékud mekāgsen míme métómé we. Póndé eché mekāgsen mépēe, ábēl ebíd mó áte, abe áde ábeé we ngíne átóm mó áte.

Paalē aá bad běetâŋgenéé
ake á ngande é myōb mémpēe

¹⁴ Né-ɔó, a-baányaŋ, nyéebenlé myōb mé metóm. ¹⁵ Nhóbe áwēn née bad ábe míbíí meé běwóó debýéé. Nyéběn nyéadol áte chōm éche nílāŋgēé nyé. ¹⁶ Póndé eche syánē ábe dedúbpé démíideé mbwendé m̄ mím nhóg, debage Dyōb nsagnén míme Krěstəe. Melemlem ne ewele éche débelé déladné ádyé, debelé dedyé yǎl eché Krěstəe. ¹⁷ Ngáne édīí bán ewele édīí ehóg, kénēe syánē débúu áte, dedíí yǎl póg, áyāle melemlem mé ewele móo dédyágkē. ¹⁸ Nyénōne bad bě Israel, bad ábe bědyág medyé míme běbágé něngáne mende á menyán, bōmpē bělatan á menyán mé mende ábe Dyōb edubé. ¹⁹ Cheé nkoo’é ahób hén? Nhóbe meé e’diidíngé ábe bad běbagé mende, ne mímē mende míme běbagé, bědē dyam-ε? ²⁰ Aáy, chōm éche níhóbeé édīí nén meé, mende míme běbagé á menyán míme bad ábe běedubpe Dyōb, saké Dyōb dōj běbagé mó, e’daádəŋ bě mbéb bōo běbagé. Meéhēdēe meé nyéwōŋ dyamdyam abel ne e’daádəŋ bě mbéb. ²¹ Nyéehēlēe-sé nyémüidē mbwendé míme Sáŋgwéé nyémüidē-’e míme e’daádəŋ bě mbéb. Nyéehēlēe-sé nyéladné’ ádyé ndyéed á menyán mé mende míme Sáŋgwéé, nyéladné-’e ádyé á menyán

* ^{10:4} Ene ndim e aláá ebédée Krěstəe: Bad bě Israel běmbíí bán ndim e aláá embé ne bó ngáne běkágé’áá á ehyáŋge. Paalē aá ene ndim e aláá ebédée Krěstəe, Krěstəe-’e abédé ne bó.

mé e'dədədəj bé mbéb. ²² Dehede Dyōb kónjí ahé áte-yε? Dewēmtan bán dedé ngíne tómaa mó-yε?

Kéchéé éche débeléé débel chó âbe Dyōb edúbé

²³ Bad béhóbe nén bán “Dewóó kunze âbel kéchéé éche dédáá abel.” Nê ádé mbále, boj saké chōm ésyāāl ébóó abel. “Dewóó kunze âbel kéchéé éche dédáá abel”, boj saké chōm ésyāāl épεεne nsyáŋ. ²⁴ Nyé modmod eéhēdē chōm éche épīnad mwěmpen bwâm boj nyéhede chōm éche éwôŋgan bad běmpée. ²⁵ Nyéwóó kunze âdyé kéchéé éche nyécháné á dyon-té áde nyéesedtēé dyam áde débél boj nlém nkogléd nyé á abum tâŋgene éche chōm éche nyécháné. ²⁶ Éténléde á kálag e Dyōb nén bán, “Nkōjsé ne chōm ésyāāl éche édē áwēd-te bédí ábe Sáŋgwéé.” ²⁷ Nzé mod awé eedúbpe Dyōb alébpé we âhye dé adyé ndyéed, boj etíidé weé mókag, edyé kéchéé éche ábágé we ésebán esedte mó dyamdyam tâŋgene ene ndyéed. Nlém méekoglád we á abum âseded dyam tâŋgene ene ndyéed. ²⁸ Boj nzé mod alángé we aá “Enén ndyéed bēmbé chó née mende wéé e'diídjinge,” weedyág chó áyāl eché ne âbel boj nlém méekoglád modmod á abum. ²⁹ Nédē, saké ngáne nê débenlé boj nlém nkogléd we á abum boj bwâmbwam ngáne nê débenlé boj anínií mod átagé áte á nlém-té. Cheé ékāj boj nlém mMé nkoglad mod ampée á abum Míbel boj meébenlad kunze eché ebägnédé me? ³⁰ Nzé mbagé Dyōb meságnen áyāl ndyéed eché ábágé me, chán édíí bán mod ampée ahéle áhōbē me mam mé mbéb áyāl, áyāle móbágé meságnen. ³¹ Né-ɔ́, kéchéé éche mod ábeléé, ké ádyāg ké ámwāg, ábele chó ésyāāl nyaa eché ebage Dyōb edúbé. ³² Nyébèle chōm téé nyaa eché éepeénné mpuitéd, ken wéé bad bé Israél, bad ábe béesé bad bé Israél, ké'ε mwembé n̄ Dyōb. ³³ Nyébèle mam melemlem ngáne móbeléé. Nwane áte áwóged mod asyāl menyinge áyāl e chōm téé éche móbeléé. Meébélēé chōm éche ébónédé me boj mbéle chōm éche ébónédé moosyāl, âbel boj Dyōb ásoj alongé á moosyāl.

11

¹ Né-ɔ́, nyéhíde' rímêm mbeltéd ngáne me-'ε níhídeé mbeltéd ríme Kr̄istəa.

Paalé ahóbé tâŋgene akútēn dé nló á mwembé-te

² Bəob-poó, nkene nyé áyāl nyékamtan me póndé ésyāāl, nyéhíde-'ε elem éche mén'yāgēdtē nyé. ³ Boj ndéé meé nyésôjten nén bán Kr̄istəa mó adé nló ámín e baachóm bésyāāl, mwenchóm-me abé nló ámín e mwaád. Dyōb dó-'áá ádē nló ámín e Kr̄istəa. ⁴ Mwenchóm ké ahéé awé akânne' ké'ε ahóbé mekan á dín á Dyōb boj akútēn nló, awógté Kr̄istəa awé adé nló ámín eché e'sôn. ⁵ Mmwaád-te awé akânne' ké'ε ahóbé mekan á dín á Dyōb boj eekútene nló, awógté nchóm awé adé nló ámín eché e'sôn. Nhəŋlén ké nhóg méesaá átinté ene ndín e mmwaád ne mmwaád awé akəjnédé nló. ⁶ Mmwaád awé eekútán nló, émbé mboj né ankəj mó ngen póg. Ngáne édíí-'áá dyam dé akwágké mmwaád ákəən nló ké'ε ásélen nyoj, bebaád békútán rímab nló. ⁷ Mwenchóm eetâŋgenéé nló akútēn ngáne édíí bán ahég áde Dyōb áhágé mó á nwágén ríme álumte éche edúbé. Boj ahágé mmwaád álúmed edúbé é mwenchóm. ⁸ Dyōb dénkēnhágénné mwenchóm mmwaád, boj anhágén mmwaád mwenchóm. ⁹ Saá-kaá mmwaád ankəj boj Dyōb áhágé mwenchóm boj mwenchóm mó ankəj boj Dyōb áhágé mmwaád. ¹⁰ Áyāl e enén nzom mmwaád átâŋgené née áwóó e'chem á nló âbel boj ángel ényin. ¹¹ Kénê-'ε, ngáne dédíí nhóg ne Sáŋgwéé, mmwaád ééhēlēé-se abé ésebán mwenchóm, mwenchóm-me ééhēlēé-se abé ésebán mmwaád. ¹² Édē nê áyāl Dyōb dénhágén mmwaád mwenchóm, nê dó-'áá mmwaád-te áchyáá'é mwenchóm. Boj bwém é'syāl é'húú ne Dyōb. ¹³ Nyébén nyéñon áte, mmwaád atâŋgené akáne á elad é bad bé Dyōb áde éekuteneé nló-yε? ¹⁴ Nyaa eche Dyōb áhágé bad chén eelúmtéé nén bán édē akwágké mwenchóm átēde esid ékwog mó á nló bwâmbwam-ε? ¹⁵ Boj nzé esid échábé mmwaád ébèle áboj. Dyōb ábágé mó esid née ekútēn é nló. ¹⁶ Nzé mod ahede ádén dyam apenten, chōm ésyāāl éche níwóó ahóbé édīí nén meé, syánē ne mwembé n̄ Dyōb n̄syāāl, deewóó'ε nyaa empée eche débeléé rímén mekan, mwembé n̄ Dyōb-pe méewóó'ε.

Ndyééd e Sáŋgú

(Mat 26,26-29; Mak 14,22-25; Luk 22,14-20)

¹⁷ Bon tâŋgène mímén mekan míme nílângéé nyé boob, méeheléé-se nkéné nyé áyâle nzé nyêbomé ábele Dyöb, mekan mé mbéb móo nyébeléé saké mé bwâm. ¹⁸ Dyam dé'so, nwogé bán nzé nyêbomé néé mwembé, nkabén ímbelé ímbé átinté echén, ndúbpé-'e néen mée kapog nê ádé mbále. ¹⁹ Nkabén ítâŋgéné abé átinté echén pen, ábel boj bad ábe békoo Dyöb ahíd bénýinned. ²⁰ Né-oó nzé nyêbomé nêngáne elad é bad bé Dyöb, saké Ndyééd e Sáŋgú nyédyágké. ²¹ Áyâle nzé nyêbomé ádyé Ndyééd e Sáŋgú, mod téé adyâg eche ndyééd ésebán asine waáb, nê ábele baahóg békâg nzaa, ábíníí-'e míim mékób bô. ²² Nédé édé néen bán nyéewóó'é mímen mendáb míme nyétâŋgéné medyé adyé nyémwâg-ke míim áte-yé? Ké'e nyênyíne' bán mwembé í Dyöb méesaá dyamdyam, nyékwâgté-'e bad ábe béewoo chom éche bedyágké? Cheé nyéhedeé bán níláa nyé tâŋgène ádén akan? Nyéhede bán nkene nyé-yé? Meéhéléé-se ímbel nê.

²³ Nhôbe néen áyâle chom éche Sáŋgwéé án'yâgédé me chôo me-'e nílângé nyé néen, mímê nkuu dën áde békíí Sáŋgú Yesue ntûré, anté ewele, ²⁴ asagnén Dyöb, ákâb chó áte, áhôbê aá, "Echem yâl néen, ebägnédé áyâl echén. Nyébel néen ákamten me." ²⁵ Áde bémáá ndyééd adyé ambéel melemlem ne mbwendé míim. Anhôb aá, "Mímén mbwendé míim ndíi melé mékôbâl mé Dyöb míme mímén mekií mésogténé. Nyébel néen póndé téé ákamten me." ²⁶ Nén álumte néen bán póndé téé eché nyédyágké échén ewele nyémwâg-ke mímén míim, nyêkale kwéed eche Sáŋgwéé kâáy ne á póndé eche ápeé.

²⁷ Né-oó, kénzéé awé adyâg échén ewele, ámwâg-ke mímén míim nyaa eche éebâgê Sáŋgwéé edubé né abelé mbéb tâŋgène yâl ne mekií míme Sáŋgwéé. ²⁸ Né-oó, mod téé ásébe ásimen yâl boj ádyé ewele, ámwâg-ke mímén míim, boj eekoo ahé á nlém-tê aá yâl eche Sáŋgwéé chó edé, ákudté yâl nkôgsen adyé áde ádyágké échén ewele, ámwâg-ke mímén míim. ²⁹ Né dôo ákâá boj nyé bad híin nyéchiitéd, nyékonlé-'e, doinge-'e bêwédé. ³⁰ Boj nzé syâné desébpé yâl akáad, né Dyöb déekôgsenné syâné. ³¹ Boj Sáŋgwéé akáadte, akôgsan-né syâné áyâle mewusé míme débélé ábel boj eebâá syâné áyâl áde ákâadté nkôjsé. ³² Né-oó, a-baánya, nzé nyélâdné ádyé ndyééd e Sáŋgú, désiné nhôg ne anínií. ³³ Nyé ké ahéé awé nzaa ékobé, adyé ndyééd á ndâb, ábel boj nzé nyélâdné weébélé akan áde débél boj Dyöb ákâad wé. Tâŋgène mekan mémpêe, nzé mpedé, dôo mélâa'é nyé ngáne nyétâŋgéné abel.

12

Nde éche éhúú ne Edâdârj éche Ésáá

¹ Boob-pôo a-baánya, ndâá mée nyébíí mbále tâŋgène nde éche Edâdârj éche Ésáá ébagéé. ² Nyébíí néen bán áde nyénkembíí'é Dyöb, bênted nyé nlém á ábum, bêpaned nyé nzii ábele myöb míme méehôbakan. ³ Né-oó, ndâá mée nyébíí néen bán modmod awé Edâdârj é Dyöb élyâgtéé, éeheléé-se ahôb aá, "Ebómán ne Yesue." Né dôo'á modmod éeheléé-se ahôb aá, "Yesue adíí Sáŋgwéé," étoméé né Edâdârj éche Ésáá élyâgté mó.

⁴ Nde édé nyaa ne nyaa, boj melemlem mé Edâdârj móo mëbage échê nde. ⁵ Nyaa éche déhèle débél nsón í Dyöb édé nyaa ne nyaa, boj melemlem mé Dyöb móo bêbenleé. ⁶ Ngude eche débenleé nsón edé nyaa ne nyaa, boj melemlem mé Dyöb móo débenladté ádâ debyéé ábel nsón. ⁷ Mod-téé akudé chom éche Edâdârj élyâgtéé mó abel, nê ádé-'e á mbor mí moosyâl. ⁸ Edâdârj élyâgté mod nhôg áhôb dyam ne debyéé, melemlem mé Edâdârj mélyâgté anínií mod âyâged bad ne debyéé. ⁹ Melemlem mé Edâdârj míme mébèle boj mod nhôg awój adúbe aá Dyöb débél dyam áde áhôbá aá ábel boob ábél-'e dôo, mímê melemlem mé Edâdârj móo mëbage anínií mod ngíne áchood bad. ¹⁰ Échê Edâdârj ébagé mod nhôg ngíne ábel mekan mé menyáké, ábél-le anínií álângé bad mekan á dîn á Dyöb. Chôo ébágé-'e bad bëmpêe debyéé âsôjtén ké chom éche mod áhôb eé ké'e ábeléé éhúú ne Edâdârj é Dyöb ké'e éehúú' . Melemlem mé Edâdârj mëbage mod nhôg debyéé áhôb mehôb mémpêe, ábél-'e anínií debyéé âtoge mehôb míme ábê bad bêhôb e .

¹¹ Melemlem mé Edədəŋ móo mēbəle mímén mekan mésyāl, abage mod téé echě nde ngáne ádáá.

Elad é bad bé Dyōb édíi néε

yǎl póg eche ewóó pág híin

¹² Yǎl edíi póg boj ewóó pág híin. Kénée édíi-'aá bán yǎl edé pág ne pág, edíi yǎl póg. Melemlem nē dōo édíi ne Krístəø. ¹³ Melemlem nē dōo syánē moosyāl, bad bé Israél ne bad ábe béesé bad bé Israél, betâŋ ne kunze, Edədəŋ ehóg ébélé dekudé edusen boj debé pág éche ébélé ene yǎl póg. Dyōb áhédé-'e syánē melemlem mé Edədəŋ á nlém-tê.

¹⁴ Saké pág póg chó ebélé yǎl e moonyoŋ, boj pág híin. ¹⁵ Nzé ekuu éhèle-se éhób aá, “Áyāle nén meesaá ekáá, meesaá á yǎl e moonyoŋ,” nén déelúmtéé bán eesaá á yǎl e moonyoŋ. ¹⁶ Nzé etúu-'e éhèle-se éhób aá “Áyāle méesaá dǐd, méesaá á yǎl e moonyoŋ,” nén déeheléé-se álūmēd bán éesaá áyāl e ene yǎl. ¹⁷ Nzé yǎl esyāl embé dǐd děmpen, né chán ámwagké dyam awóğ? Nzé yǎl esyāl embé etúu chěmpen, né chán ámwagké chōm elod awóğ? ¹⁸ Boj édé nén bán Dyōb ábánné pág téé á yǎl e moonyoŋ ngáne ádáá. ¹⁹ Nzé pág póg chó yǎl e moonyoŋ émbéé, ne bēechágké chó bán yǎl. ²⁰ Édé nén bán pág édé híin boj yǎl póg chó éwóó chó. ²¹ Né-óó, dǐd déeheléé-se áláá ekáá aá, “Meetógneneé we.” Nló-'e mēeheléé-se níláá mekuu aá, “Meetógneneé we.” ²² Étímé anyinned pen nén bán pág é yǎl éche dényíneé bán éesaá dyamdyam chó etómtné etógnén abé. ²³ Pág é yǎl-le éche dényíneé bán éewóó'é edúbé chó débageé edúbé bwâmbwam. Éche dényíneé-'e bán éeboo'é alûmten, chó dékoo'é anɔn. ²⁴ Pág échě ébóó alûmten chó-'e éetógneneé échén pág. Dyōb ábélé yǎl e moonyoŋ nyaa echě pág éche ényinnad byánán éesaá etógnén, chó débageé edúbé bwâmbwam. ²⁵ Abelé nē ábel boj nkabén mēebág á yǎl e moonyoŋ, boj pen pág téé éwôngan waáb. ²⁶ Nzé pág e yǎl póg etage, échíníí esyāl chómpé ébelé étage'. Nzé pág póg ekudé mekenag, échíníí ámpé ébelé éwogén mó menyinge.

²⁷ Né-óó, nyé moosyāl nyé díi yǎl echě Krístəø, nyé mod téé-'e nyé díi pág echě ene yǎl. ²⁸ Dyōb ábágé bad nsón á mwembé-te nyaa ne nyaa. Asébpé abelé baahóg bembapéé bé nlómag, ámbid ené, ápwedé bekal bé'dé dədəŋ boj apwedé-'e bemeléede. Ampwěd-te bad ábe ámbeé ngíne ábel menyáké, ápwěd bad ábe ábágé ngíne áchhood bad, ápwěd bad ábe běwôngan bad, ápwěd bad ábe ábágé debyéé ályáged bad, ápwěd-te bad ábe ábágé debyéé áhób mehób mé bad běmpée. ²⁹ Saké bad bésyāl bédé bembapéé bé nlómag, saké bad bésyāl bédé bekal bé'dé dədəŋ, saké bad bésyāl bédé bemeléede, saké bad bésyāl bédé bebel bé menyáké. ³⁰ Saké bad bésyāl Dyōb ábágé ngíne áchhood bad, saké bad bésyāl Dyōb ábágé debyéé áhób mehób mémpée. Saké bad bésyāl Dyōb ábágé debyéé átoge mehób mémpée. ³¹ Nyébane nlém áyāl e nde éche etómtné etógnén abé.

Kéné-'e meédíi nlúmēd nyé nzii empée echě etómtné aboj tómaa échíníí.

13

Édé etógnén ádəŋ bad

¹ Nzé nhóbe mehób mé baányoŋ ne mé ángel boj meédəə baányoŋ, ehób échém édíi néε nkáy míme mbéle ntägag kέ'e ngáj echě békumeeé. ² Nzé mbyéé' nkalaŋ ní Dyōb akal, nzé nsöñtan mekan mé e'kojnéd mésyāl, nwóó debyéé ásyāl, nwóó-'e adúbe áde íhèle-se nhób meé mbəd éhəŋlen e'dii, boj meédəə bad, né meesaá dyamdyam. ³ Nzé mbage bad chōm esyāl éche ínwóó, nkwennténeé-'e ábę echem yǎl meé běhyád, áde méedəə'é baányoŋ, bwâm é'héé nē ábélé me? ⁴ Mod awě adəá bad, abelé áwesán, álūmté-'e e'boj bé nlém. Eesíidéé bad, eesaá kúmbe. ⁵ Mod awě adəá bad, eebágké ewanje, eéhëdtéé echě yǎl chěmpen bwâm, eewámsánné alij, eékonjéé-'e mekan mé mbéb á nlém-tê. ⁶ Mod awě adəá bad, eewógnéé mekan mé mbéb menyinge, mekan míme métáŋgéné móo áwógnéé menyinge. ⁷ Mod awě adəá bad, akobe mekan mésyāl, adúbpe mekan mésyāl, awóó' e'lyág bé nlém póndé esyāl, ákaá-'e nlém póndé esyāl. ⁸ Edəŋge éewóó'é asóg. Ahób dé mehób á dřn á Dyōb dépě á asóg, ahób dé mehób mémpée, ámaa, debyéé-'e áde mod

áwóo'é, ápē á asóg. ⁹ E'bíi bé akan ábesyáné béélónéé mbon, akal áde sékaléé nkalaŋ í Dyöb, séelónéé mbon. ¹⁰ Boŋ áde mekan ímme mélóné mbon mépēé, mekan ímme méelone mbon mépē á asóg. ¹¹ Áde ínbédé mwéndem nhóbé'áá née mwéndem, ímêm mewémten mémbéé mewémten mé mwéndem, ndolé-'e akan áte née mwéndem. Boŋ bɔɔb áde ñdíi mod ambáá, ntédté abé á mwéndem. ¹² Denyíne chōm bɔɔb nêngáne á ebudbud-té á dyené-te. Boŋ ámbid e póndé, syáné déénýin Dyöb, syáné ne mó dénɔnné-'e e'só ne e'só. Meébudeé Dyöb asójtén bɔɔb bwâm, boŋ póndé eche ehúe' mésójtén mó melemlem ngáne mómpé ásójténne me bwâm. ¹³ Né-oó, metôte méláán médé; âwóŋ adúbe, âwóŋ e'lyág bé nlém ne âwóŋ edəŋge. Boŋ atôte áde átómtené etógnén abé átinté e mímén méláán, ádfí âwóŋ edəŋge.

14

Ndε émpēe éche éhúú ne Edədəŋ

¹ Nyéwan áte ádəŋ bad, nyéwôŋ-'e nlém áte ákud mendé ímme Edədəŋ ébagéé nyé, bwâmbwam âláa bad mekan á dín á Dyöb. ² Mod awé ahóbe mehób mépēe eehóbéé wéé bad boŋ wéé Dyöb dóo áhóbéé. Á mbále, modmod eesójtánné dyam áde áhóbéé. Kénée ngíne e Edədəŋ élyágtéé mó áhób mekan, bad ábe álâŋgeé ímêm mekan, ne bó, ímêm mekan médií mekan ímme mod éesójtánné. ³ Mod awé ahóbe mekan á dín á Dyöb, ahóbe mó âwóŋgen bad âwúu áte, âwéd bad nlém á abum ne âhóded bad nlém á abum. ⁴ Bad ábe böhóbe mehób mépēe böhóbe mehób mépēe böhóbe mekan á dín á Dyöb böhóbe mó âwóŋgen mwembé ísyāəl. ⁵ Ndáe meé nyé moosyáél nyéhóbe mehób mépēe, boŋ métomtén adəŋ meé nyéhóbe mekan á dín á Dyöb. Mod awé ahóbe mekan á dín á Dyöb, atómé mod awé ahóbe mehób mépēe, éetóméé né atóké' chōm éche áhóbéé ábel boŋ áwóŋgen mwembé.

⁶ Né-oó, a-baányaŋ, nzé mpedé áwén boŋ nhóbe mehób mépēe, né chán méwóŋgenné nyé? Meéhélëe-se nwóngén nyé ké mwatiíd, nzé meépēene dyam áde Dyöb álúmté me, ké' e dyam áde mbíi, ké' e áhób mekan á dín á Dyöb, ké' e dyam áde méyägëdté nyé.

⁷ Détéd eloŋ ne ndingé, bwém ábe béesé á alongé ábe böhengladté ákum mesíké. Chán mod ahéle se abíi nkéngé ímme békónéé nzé békumé mó bwâm. ⁸ Nzé mod ahéde eloŋ atójé éche élăd bad áke á bel, boŋ eetóo chó bwâm, né chán áhèle ábél boŋ böhönséen ake á bel? ⁹ Né dóo édii ne nyé ámpē. Nzé nyéhede mehób mépēe ahóbe boŋ nyéhóbe mekan ímme méewoo nsójtén, nzé mod eebíi dyam áde nyéhóbeé, né nyéhóbe nêngáne epub éche étóme'. ¹⁰ Mehób médé á nkörjsé-te nyaa ne nyaa, ké ehög-ke éesaá éche éewoo nsójtén. ¹¹ Boŋ nzé meebyéé ehób éche mod áhóbéé, mod awé ahóbe chó ábē nken áwém, me-'e mbé nken áwé. ¹² Ngáne nyéhedeé bán nyébélé mekan ímme Edədəŋ é Dyöb élyágtéé nyé ábel, nyéwane áte nyébélé' mímme mébélé boŋ mwembé nkowgé bwâm.

¹³ Né-oó, mod awé ahóbe mehób mépēe atáŋgéné akáne ábel boŋ Dyöb ábel mó átoge chōm éche áhóbéé. ¹⁴ Áyäle nzé nkânné' ne ehób émpēe, échém edədəŋ chóo ékânné, boŋ mmén meebyéé' chōm éche nhóbéé. ¹⁵ Cheé-ó nítáŋgéné ábel? Ntáŋgéné akáne ne échém edədəŋ, nkáné-'e ne ímêm nlém. Mëkñéne nkéngé ne échém edədəŋ, nkñé-'e ne ímêm nlém. ¹⁶ Nzé ebenglad échón̄ edədəŋ ábe Dyöb mekeng, chán mod a ngén awé adé ásé, áhöbpé aá, "ébé nê" áde éesójténne dyam áde éhóbéé. ¹⁷ Ehele-se ékené Dyöb bwâm boŋ dyam áde éhóbéé déewóngán mod awé alyagé ásé ne awóŋgen dén. ¹⁸ Nságnan Dyöb nén meé nhóbe mehób mépēe tómaa nyé bad bésyāəl, ¹⁹ boŋ kéné, nzé dedé á mwembé-te, mědəŋ meé nhóbe metôte métáan ímme méwóŋ nsójtén, ábel boŋ bad býagé, tómaa áhób metôte ekálé dyóm ímme méewoo nsójtén.

²⁰ A-baányaŋ, nyéewoo' mewémten mé bëndem. Nyébê pen née bëndem ábe böhöfí chōm éche mbéb ñdíi. Boŋ á mewémten nyébê née bad ábe böhögé. ²¹ Éténléde á kálag e Dyöb nén bán me Sáŋgwéé nhóbe nén meé,

"Mëbelén bad ábe böhóbe mehób mépēe áhób wéé ábém bad.

Mébelén e'bêb é' beken bé bad, boj ké ábêm bad béewógénné mē."

²² Né-óó, ahób dé mehób mémpée ádíi e'chemléd ne bad ábe beedúbpé, saké ne bad ábe bédúbpé. Âhób-pe mekan á dín á Dyöb ádíi e'chemléd ne bad ábe bédúbpé, saké ne bad ábe beedúbpé. ²³ Nzé bad bésyääl böhóbe mehób mémpée áde bédíi á mwembé-te, boj dojge á bad ábe béesöjtene mekan mé Dyöb ké'e bad ábe beedúbpé Krüstæ bésolé, böhóbpé bán nyépag mën-s? ²⁴ Boj nzé bad bésyääl böhóbe mekan á dín á Dyöb, boj dojge á bad ábe béesöjtene chöm éche böhóbeé ké'e bad ábe beedúbpé Krüstæ bésolé, awög áde bëwögké nkalaj í Dyöb, débél bëbíi bán bëbèle mbéb, békwdé nkáá á'so é Dyöb. ²⁵ Mmê nkalaj möhüd bô mekan mme bënkokoo' é á nlém-tê. Békwd'-e ásé, bëbagé Dyöb edúbé böhöbén nén bán, "Ne mbále, Dyöb áde átinté echén."

Paale áá mpuutéd mébág á mwembé-te

²⁶ A-baányan, chöm éche nkoo' é ahób édii nén, nzé nyélädné á mwembé-te, mod nhög abelé awój nkéngé, ampée-e awój chöm éche áyágteé, ampée awój dyam áde Dyöb álümte mó, ampée awój dyam áde áhöbpé á ehób éppee, ampée-e abé awé atógke mehób mémpée. Nyébèle rímén mésyääl áwóngen mwembé. ²⁷ Nzé bad böhóbe mehób mémpée, bad böhöbén tómaa béláán, bô mod téé áhöbén ámbid eche waáb ámáá ahób. Mod-te atángéné abé awé atógke chöm éche böhóbeé. ²⁸ Boj nzé mod eésé awé atógke', mod awé ahóbe mehób mémpée, atángéné néé ádibé nsal, áhöbén áwe nlém-tê ne wéé Dyöb. ²⁹ Áde bad bëbë ke'e béláán bélângéé bad mekan á dín á Dyöb, ábinií bad bétángéné bëwöglän ábíi ké chöm éche böhóbeé etángéné. ³⁰ Boj nzé mod adé á mwembé-te awé akudé nkalaj mme Dyöb álumté mó, mod awé ahóbe akan ásög ahób. ³¹ Nyé moosyääl nyélângé bad mekan á dín á Dyöb nhögé-nhögé ábel boj mod téé áyágke, né áwéde-e mod téé nlém á abum. ³² Nde eché Edéadøj ébageé bad áláá bad mekan á dín á Dyöb, edíi ndé éche mod awé ahóbé mímé mekan áhëlesé ákamlén. ³³ Dyöb dëesaá Dyöb áde ápëeñe mpuutéd, nsaj móó ápëeñé.

Á mwembé mí bad bé Dyöb nysyääl, ³⁴ bebaád bédib nsal nzé bédé á mwembé-te, bétángéné abé ásé e baachóm ngáne mbéndé e Mose éhöbeé. ³⁵ Nzé dyam áde áde bédáá abíi, bëséded ábab bechóm á ndáb. Áyäle édé akwágké mmwaád áhöb dyam á mwembé-te. ³⁶ Nyé bad bé Körinto, áwén dôo eyale é Dyöb émbidtë-yë? Áwén dëmpen-ëé eyale é Dyöb êmpëé-yë?

³⁷ Nzé mod anyíne yël áá móðé mod awé alângé bad mekan á dín á Dyöb, ke'e aá mówöö ndé eché ehúú ne Edéadøj, atángéné abíi aá dyam áde nítenléé nyé ádii dyam áde Sängwéé áhöbé aá nyébel. ³⁸ Boj nzé ahóbe aá móhídté rímén mekan nyéhúd mó mïd áyä. ³⁹ Né-óó, a-baányan, nyébane nlém áláá bad mekan á dín á Dyöb, boj nyéekáé bad áhöb mehób mémpée. ⁴⁰ Nyébèle mekan mésyääl bwâm, nyébèle-e mó nyaa eché etángéné.

15

Mpuu mme Yesu Krüstæ

¹ Böob-pöö, a-baányan, nkamtan nyé nkalaj mí bwâm mme mënkaléé nyé. Nyénkob mó, rimbélé-e nyésumnéé áyä e adúbe áde nyéwóó. ² Nzé nyédi nyéchájnédé áyä e rímé nkalaj mme édii bán móó mpeene e'soóson, né nyéeküd e'soóson, éetómee né adúbe áde nyédúbpé Krüstæ, dô-e áde ngén. ³ Menkalé nyé nkalaj mme mënkuuté, mó'aá nítomténe etógnén abé. Mmê nkalaj, ídé nén bán Krüstæ anwé á nló mímëd ngáne eténlédé á kálag e Dyöb. ⁴ Eténlédé nén bán bénlimé mó, ápüü ámbid e e'pun é'láán. ⁵ Anluméd Petro yël, boj ámbid e pónéd anluméd-te ábíníi bembapëe yël. ⁶ Ámbid ené, tómaa mbwókél é bad étáan ábe böhídé' áá mó anluméd bô yël alúmed ahög. Ábê bad hín bédíi bédé á alongé chii, dojge-e bémáá awé. ⁷ Ámbid e pónéd anluméd Jemse yël, boj aluméd-te ábíníi bembapëe bé nlómag bésyääl yël. ⁸ Kéájne á asög anluméd mémpë yël, kénée édii bán ndíi mod awé bénchyäá' é á pónéd eché bad bénkëmbíi' é bán bëchyáa. ⁹ Nhöbe nén áyäle átinté e bembapëe bé nlómag bésyääl, méé ndé mbapëe awé

éesé etógnén. Meékwognedéé áchägned ké néé mbapéé a nlómag áyäle menhé bad bé mwembé ní Dyöb á meséb. ¹⁰ Boj nsimé ní Dyöb mibélé ndé chöm éche ídíí. Mmê nsimé míme Dyöb ábagé-'e me, méesaá ngén. Boj pen mbelé nsón tómaa ábíníí bembapéé bé nlómag, kénée édíí bán saké mmén mbelé'áá mímê nsón, nsimé ní Dyöb móo mibédé ne me. ¹¹ Né-óó, ké émbé bán meé nkanlé nyé mímén nkalaj, ké'e bembapéé bé nlómag ábíníí bój békálé mó, chöm ehjog chój syáabój moosyáél sékaleé, mó'aá nyédúbpé.

Paale aá ngáne Dyöb démpuúdté Krîstæ, bad bé Krîsto bómpe bëpuú

¹² Böob áde sékale-'áá nén bán Krîstæ apuúdé, chán-nô nyé donge á bad nyéhelle nyéhôbé bán bad ábe bëwédé bëepuú'é? ¹³ Nzé ahób áde nyéhôbëé nén bán mpuu méesaá ámbid e kwéed ádé mbále, né élûmte bán Krîstæ enkêmpuu'é. ¹⁴ Nzé Krîstæ enkêmpuú-'e, né nkalaj míme sékanleé nyé méesaá dyamdyam, né áden adúbe ámpé déesaá dyamdyam. ¹⁵ Né nê álûmte nén bán sêkale Dyöb metóm áyäl ahób áde séhôbëé bán apuúdté Krîstæ. Boj nzé édé mbále nén bán bad bëepuudéé nzé bëwédé, né Dyöb dênkêmpuúdté Krîstæ. ¹⁶ Nzé bad ábe bëwédé bëepuudé, né kâéjne Krîstæ eépuudéé. ¹⁷ Nzé Dyöb dênkêmpuúdt-te Krîstæ, né adúbe ádén déesaá dyamdyam, né nyédfí nyédfé-'e á mbéb te. ¹⁸ Né élûmëd-te bán bad ábe bédúbpé Krîstæ ábe bëwédé, békóó-'e. ¹⁹ Nzé e'lyág bé nlém ábe séwóó áyäl wéé Krîstæ é'sogé áyäl e ádén alongé dëmpen, né bad bétángéné se ngj atômtén dé awóó tómaa nyaa echë bëhele bëwóó bad bëmpéé.

²⁰ Boj édé mbále nén bán Dyöb ápúúdté Krîstæ. Mó abédé mod a'só âpuu átînté e bad ábe bëwédé. ²¹ Dyam áde mod nhóó ábelé dôo ákáá boj bad bëwág. Melemlem nê dôo dyam áde mod nhóó ábelé ákáá boj bad bëpuudé'. ²² Bad bësyáél bëwë abé áde bëdíí mod nhóó ne Adamé, melemlem nê dôo Dyöb débenlé bad bësyáél bëpuu abé áde bëdíí mod nhóó ne Krîstæ. ²³ Mod téé ápuu echë póndé echë átângéné apuu. Krîstæ, mó awé adé mod a'só âpuu, áde ápcéé ámpéé, bad ábe bëdë ábe Krîsto bómpe bëpuú. ²⁴ Ámbid ené, asög dépë. Ene póndé e'dâadæj ábe é'kamlan, benkamlene ne ngíne é nköjsé, Krîstæ ámâd echab ngíne. Dô-'áá ábeé nkamlen wéé Dyöb Titéé. ²⁵ Krîstæ ábë á nkamlen kâéj Dyöb ábel atóm ábë bad bë ekoyí áte, ábânë-'e bô ásë echë. ²⁶ Mod a ekoyí awé ádimténne atóm áte adíí kwéed. ²⁷ Édé nêngáne éténléde á kálag e Dyöb nén bán, "Dyöb ábánné mekan mésyáél ásë echë." Élûmte bwâm pen nén bán mekan mésyáél míme Dyöb áhôbë áá móbânné ásë e Krîstæ, Dyöb dën déesaá áwëd-te. ²⁸ Áde bwëm ésyáél bëmadrté abé ásë e nkamlen míme Krîstæ, mwëñ-ne Mwän a Dyöb, ábë ásë e Dyöb. Dyöb dô-'áá ábánné bwëm é'syáél ásë echë, ábel boj mwëñ Dyöb-pe ákamlen bwëm é'syáél ngen póg ne ngen ésyáél.

²⁹ Böob-poó, chán-nô déhôbpé áyäl e bad ábe békûdë edusen á nló mó bad ábe bémáá awé? Nzé bad ábe bëwédé bëetogné apuu, cheé ékáá boj bëdusán bad á nló mó bad ábe bémáá awé? ³⁰ Cheé-ó ékáá boj sébág á nsöl ní kwéed póndé téé? ³¹ A-baánya, mbâg á nsöl ní kwéed epun téé. Kûmbe echë mibééné nyé abé áde dédíí mod nhóó ne Yesu Krîstæ, Sângwéé awêd, chój ekæ boj nihôbë nén. ³² Nzé nnoré chój á nyaa e moonyo, nsyájé kë nhóó méesaá né nzum éche syáabé e'loo nyam séwánáá á Efesus. Boj nzé édé nén bán bad ábe bëwédé bëepuú'é, né dëéhôb bán, "Dedyâg, démwâg-ke, áyâle chän mod áwë."

³³ Nyéedögnad, "E'chój bë mbéb é'bébte abé á bwâm." ³⁴ Nyéewóó mewêmten ámpé néé e'yôkél é' bad, nyésog-ke mbéb abel. Nyé donge á bad nyéebí'é Dyöb. Ngáne nihôbë néen, néen átângéné nyé akwágké akóbed.

Ngáne bad ábe bëwédé bëpuú'é

³⁵ Boj mod ásedéd aáken, "Chán Dyöb áhële ápuúd bad ábe bémáá awé? Yâl éhéé bëwöngé?" ³⁶ Eyôkél é chöm, nzé ewené mbál-e-bü eebélëë-se ewé boj ekág-e? ³⁷ Chöm éche bëhágké á ndoob édíí mbál ngén, saké alín á bwel ásyáél áde ákwoge' bëwénëé, boj mbum, kapog mbum e ngun kë'e mbum empée. ³⁸ Dyöb dën dôo ábele' ngáne ádâá boj mbál téé íwón yâl echë íwóó. Abage mbál téé yâl echë etângéné. ³⁹ Yâl é bwëm é'syáél ábe é'dé á alongé éesaá nyaa póg. Baánya bëwóó echab ndin e yâl, nyam éwóó echâb,

menon méwóó echâb, súu-'e éwóó echâb. ⁴⁰ Bwém é'dé ábe é'dé á nkoj mímin, é'bé-'e ábe é'dé á nkoj ínsé. Bwém bé nkoj mí min é'wóó ábâb e'boj ábe bwém bé nkoj ínsé béewóó'ë. Bwém bé nkoj nsé-'e é'wóó ábâb e'boj ábe bwém bé nkoj mí min béewóó'ë. ⁴¹ Etondees awóó ábê e'boj, ngan ewóó ábê, betintine-'e bêwóó echâb nyaa e e'boj. Káájne átintê e betintine, e'boj ábe bêwóó é'dé nyaa ne nyaa.

⁴² Nén dôo ébëe ne bad ábe bëpuú. Yël echë bélîmmëé edíi yël eche ebébe', echë Dyöb ápuudteé edíi yël echë eebébë' ámpë. ⁴³ Yël eche bélîmmëé eebágké eloon, eewúé-'aá áte. Nzé Dyöb ápuúdté chô eboo' eloon bwâmbwam, ewúé-'aá áte. ⁴⁴ Áde bélîmmëé chô ebágké yël e ekob, boj nzé Dyöb ápuúdté chô ebágké yël e edäädæj. Yël e ekob edé, yël e edäädæj-'e ámpë edé. ⁴⁵ Éténlédé á kálag e Dyöb nén bán "Mod a e'só, Adamë, Dyöb dênhag mó abé nhægted míme ínwóó alongé." Boj Adamë a ndimten adíi Edäädæj éche ébage alongé. ⁴⁶ Saké mod a edäädæj mó asébpé abé. Mod a ekob mó asébpé abé boj mod a edäädæj mó-'e ábâg. ⁴⁷ Mod a'só ambíd á nköjsé, bênhagén mó ndoob. Awe mó-'e ampë ámpë, ádyöb dôo ábídé. ⁴⁸ Bad ábe bédé á nköjsé te, bédé nêngáne Adamë awé bênhagénné ndoob. Ábe bô-'e bédé bë dyöb, bédé nêngáne ane awé abídé ádyöb. ⁴⁹ Ngáne déwagné mod awé bêhágné ndoob, melemlem nê dôo déwâgënné ane awé abídé ádyöb.

⁵⁰ A-baányañ, chom éche ínhóbeé édíi nén, chom éche édé á nhægted ní yël e ekob ne mekií éeheléé-se ékûd bwém bé nkamlen ní Dyöb. Éche chô-'e eebé abé ne abé éeheléé-se ékûd bwém ábe bëbë abé ne abé. ⁵¹ Nyélâm metúu nyewôg dyam áde ínlângéé nyé áde bad bëebíí'ë. Syáné bad bësyâøl déewáá', boj pen Dyöb déhæjlén syáné baásyâøl ⁵² á esój é pondé. Mmê nhæjlén mébë á mehélé-te, nêngáne mod áhellesé ápëbëd dïd. Nén débenléd áde bétörngë eloj é asog. Áde bétörngë eloj, bad ábe bëwédé bëpuú, bëewáá ámpë, Dyöb déhæjlén-ne syáné baásyâøl. ⁵³ Ene yël eche eboøde' étim yël eche eebøó ámpë, yël eche chô-'e ewâg étim yël eche eewâg ámpë. ⁵⁴ Pondé eche yël echë eboøde' étimmé yël echë eebøodë', ne áde yël eche ewâg étimmé yël echë eewâg, élön ngáne éténlédé á kálag e Dyöb nén bán,

"Kwéed eesaá ámpë ne abé dën, Dyöb átómé chô áte."

⁵⁵ "A-kwéed, héé echoj ngíne átóm mod áte édíi? A-kwéed, héé echoj ngíne âwoged mod e'we édíi?"

⁵⁶ Mbéb móo nkáá boj kwéed ewón ngíne âwoged mod e'we, ngíne e mbéb-pe ehúú ne mbéndé. ⁵⁷ Boj séságnan Dyöb, mó abelé boj sétóm mbéb áte mbwiined ne eched Sáy, Yesu Krístæ.

⁵⁸ Né-ø, a-baányañ bé edænge, nyésumen bwâm, dyamdyam déehôbtë nyé mekuu ásé. Nyébë nyékeene nsón míme nyébenleé Sángwéé á'sö. Nyébíí nén bán nsón míme nyébenleé Sángwéé ké nhög méesaá ngén.

16

Bésángé mòné âwóngen bad

¹ Bøøb-poó, nílaa nyé tângene mòné míme nyénladté âwóngen bad bé Dyöb. Ngáne ménláá'ë mwembé míme ídë á Galesia mëé bëbel, melemlem nê dôo nyémpë nyétângéné abel. ² Sôndé téé nyé mod téé áhûd mwâ mòné ákoo. Nén âbë nchoo ne mod téé mímë nkudâg. Nzé nyébelé nén, né débël nzé mpedé, nyéetogénné mòné asaa ámpë. ³ Nzé mpedé, bad ábe nyépwédé, mëlomén bô kálag ákëen mímë mòné míme nyéladé á Jerusalém. ⁴ Nzé ébóó bán mémpë nkë, né bëwoón me.

Ntii míme Paale ábélé

⁵ Mëpë áwén nzé mmaá atóm á mbwóg e Masedonia, áyâle nwóó mewêmtén átóm á mbwóg e Masedonia. ⁶ Kapôg mëdyéé ne nyé, nhële mbé-'e ne nyé póndé esyaél echë ahéb ábágké ngíne, abel boj nyewôngen me ákëen échêm eke á'sö hõm ké áhéé áde nkagké.

⁷ Meédæ'ë meé dényinén ámín-ámín. Nwóó mewêmtén ábë ne nyé mwâ etûn é póndé nzé Sángwéé akwënténé. ⁸ Mëdyéé á Efesus hén káaj ne á póndé e ngande e Pentekos.

⁹ Nzii enédnédé me hén abel këse e nsón, kénée édíi bán bad hín bédé ábe bétângan me.

¹⁰ Nzé Timotie apedé áwēn, nyényin bán nyêkobé mó nken áyâle melemlem mé nsón ímme Sáŋgwéé ímme ábeleé, móo mémpē ímbeléé. ¹¹ Modmod eenyíné mó nkójtéd. Nyéwôŋgen mó ákeen échē eke á'sō ne nsaj âbel boj bâobé bad bé Krîsto bêmpêe ábe ñsinéé, bétân me hén.

¹² Bâob-poá, tângene awesýané mwânyan Apolose, menwéd mó nlém á abum bwâmb-wam âhye dé anon nyé nchoo ne bad bé Krîsto bêmpêe, boj pen eewóo'é nlém âpe bâob. Nzé etál ébâgnédé mó, áp .

Melenten mé asog

¹³ Nyétêd póndé, nyésumen á adúbe-tê. Nyéwúu nlém á abum, nyéwúu áte. ¹⁴ Kéchéé éche nyébeleré, nyélúmed bán nyêdâá nhog ne anínií.

¹⁵ Bâob-poá a-baányan, nyêbíí néen bán abum á ndáb áde Stefanuse d  o ábédé d  só á mbw  g e Akaya âdúbe Krîst  , b  b  g  -   echab y  l âbelé bad bé Dy  b. Nch  a nyé néen me  , ¹⁶ nyéb   ás   e nd  n é bad née éch  n, ne ás   e mod k   ah  é amp  e aw   abele ns  n née ímm  n. ¹⁷ Nd   menyi  ne epe éche Stefanase, F  tunatuse ne Akaikuse. B  p  d   áyâle b  b  l   ns  n ímme ny  nt  ng  nn   abel. ¹⁸ B  w  d   me nlém á abum ng  ne b  nw  dt   ny  mp   nlém á abum. K  chéé éche éch  n nd  n é bad éh  be  , ny  t  ng  n   b   ed  ub   abe. ¹⁹ Mwemb   ímme nd   á mbw  g e Esia íl  omm   ny   melenten. Akwilaa b   Prisilia ne mwemb   ímme mbome áwab nd  b, b  l  omme ny   melenten ne nl  m nhog á d  n áde Sáŋgw  é. ²⁰ Ábed baányan b   Krîsto ábe b  d   h  n b  l  omm   ny   melenten.

Ny  h   nhog ne anínií t  l. ²¹ Me Paale, mb  nlad éch  m ek  á âtele ny   ímm  n melenten. ²² K  nz  é aw   e  d  a   Sáŋgw  é eb  m  n ne mó. A-Sáŋg   aw  d, hy  g! ²³ Nsim   ímme Sáŋg   Yesue r  b   ne ny  . ²⁴ Nd  a   ny   bad b  sy  sl á d  n áde Yesu Krîst  .

Kálag echě elónténé ébę echě Paale áténlé

Baá Kɔrinto Ndibned ní kálag

Enén kálag chό edé kálag echě elónténé ébę, echě Paale áténlé bad bé dyad á Kɔrinto áde ábédé á Masedonia. Paale antél chό á póndé echě mam méekege'aá bōbę mwembé míme mbédé á Kɔrinto. Bad behóg átinté e rímē mwembé bénhōb Paale mekan mé mbéb á yěl, boj kénē Paale anwóy nlém bwâmbwam aá bōbōbō bétim ásē. Áde bêntimmé-'e ásē, Paale anwóg menyinge bwâmbwam. Á kálag-tē wén, Paale ahóbé ngáne bōbę bad bé mwembé bé Kɔrinto bémbeē. Áwēd-te ahóbé nzom echě ekaá boj átelé' enén kálag ne e'yale ábe é'wúú áte tângene nzyáy éche ákúdē ne atyéemén áde baahág átinté e mwembé bétyéémánná mó. Alúmté-'e rímē menyinge ngáne nyaa echě átélé enén kálag, ébélé bad bétédté abel dé mbéb boj bōbōbō bétim-me ásē. Acháa-'e mwembé aá bésaa mənē ne nlém nhóg âwóngen betóótöké bé bad bé Kr̄isto ábe békédé á mbwóg e Judeya. Á kálag-tē wē ámpē, Paale ahóbé mekan âlúmed aá móbédé mbapę a nlómag a mbále awě Yesu Kr̄istəa. Ambel nén áyāle nguse é bad ébédé á Kɔrinto échě ênchęg yěl bán bembapę bé nlómag bé mbále ábe Kr̄istəa, bán Paale-'e adé mbapę a nlómag a metóm.

Nkabtéd ní kálag

Ndibned ní kálag 1.1-11

Paale ne mwembé ní dyad á Kɔrinto 1.12-7.16

Âsaŋned bad bé Kr̄isto á mbwóg e Judeya mənē 8.1-9.15

Paale mbapę a nlómag a mbále awě Kr̄istəa 10.1-13.10

Melenten mé asóy 13.11-13

¹ Mę Paale, mbapę a nlómag awě Yesu Kr̄istəa ngáne Dyōb átíidé, mę-eé ntelé enén kálag. Mę ne awed mwănyan a Kr̄isto, Timotie, sélommę' nyé elad e bad bé Dyōb ábe bédé á dyad á Kɔrinto ne bad bé Dyōb bésyāel ábe bédé á mbwóg e Akaya, melenten.

² Nsimé ne nsaj ní Dyōb Titée awēd ne Sáŋgú Yesu Kr̄istəa, mbé ne nyé.

Dyōb áwéde' moosyəál nlém á abum

³ Syánē déken Dyōb, Sáá awě awed Sáŋgwéé, Yesu Kr̄istəa. Mó adé Titée awě awóge moosyəál ngol, abé-'e Dyōb áde áwéde' moosyəál nlém á abum. ⁴ Awéde' syánē nlém á abum áyāle ndutul ésyāel eche dékudeé, abel boj syánē ámpē déhel bad nlém awéd á abum ábe bōmpē békude nyaa e ndutul ké ehéé. Déwēd bō nlém á abum melemlem ngáne Dyōb áwédeé syánē nlém á abum. ⁵ Ngáne Kr̄istəa ákúdé'áá metake, néę syánē ámpē dékudeé metake áyāl eché. Né-ɔ́, abé áde dédií ne Yesu Kr̄istəa, Dyōb déwēd syánē ámpē nlém á abum bwâmbwam. ⁶ Nzé sékude metake édií áwéd nyé nlém á abum ne âwóngen nyé âkud e'soosoj. Nzé sékudé e'wéd bé nlém á abum né nyémpē nyéeküd e'wéd bé nlém á abum, nyéküd-te ngíne âwesen melemlem mé metake ne e'kaj bé nlém ngáne sémpē séwéséné. ⁷ Sêsumé nlém áwēn bwâmbwam. Sêbíí nén bán nzé nyékude' metake melemlem ngáne sémpē sékudeé, Dyōb déwēd nyé nlém á abum melemlem ngáne áwéde-'e sé.

⁸ A-báányan, sêdəá bán nyésônten nyaa e metake echě sékúdē á mbwóg e Esia. Metake míme sénkudté mēndenléd sé nyaa echě sénwémtenné bán séebáá á alongé. ⁹ Sénwémtén nén bán békídté mbakú bán békú sé. Boj sékudé'áá rímén metake abel séesumē' nlém awed yěl, boj pén sêsum wéé Dyōb, mó awě apuuudte bad. ¹⁰ Kénée édií bán sémbe á nsəl ní kwééd, ansōj sé. Nzé sêdē á ndutul-tē, Dyōb débē ásoj sé. Sêsumé-'e nlém nén bán ábē áson sé póndé téé eche sébęē á ndutul ámpē. ¹¹ Ásoj sé akânned áde nyékânnadté sé. Bad hín bélad mekáá ákânned sé, Dyōb-pe dénaméd sé. Nén débél bad hín bésagnēn Dyōb asoj áde ásóó sé.

Paale ahúdé eke ásē

¹² Dyam áde áde ábélé sédé kúmbe. Nlém nkénlé sé á abum nén bán, abé áde séwóó á nkörjsé-te wén, tanje nyaa eche sédíí ne nyé, ne nlém ríme ísáá ne nlém nhóg, ádíi nyaa eche Dyöb ábélé aá ébê. Ádén abé dénkembáá ne debyéé á moonyoŋ boŋ démbé ne nsimé n Dyöb. ¹³ Chöm éche sétenleé nyé édíi éche nyéhenlé aláj, nyésontén-ne. Nsumé nlém meé nyésontén ímén mekan póndé ésyāel. ¹⁴ Ngáne nyémáá doŋge á mekan tâŋgene sé asoŋten, ndúbpé nén meé nyéekoj sé asoŋten bwâm. Nén débél á póndé eche Sâŋgú Yesue ápeé, nyéehel ahób bán nyéde kúmbe ne sé melemlem ngáne sémpē sêhenlé ahób bán sédé kúmbe ne nyé.

¹⁵ Adúbe áde méndubéé meé nén áde mbále mentíi meé mésébē ape áwēn ábel boŋ nyétombwen ngen éche élonténé ébe. ¹⁶ Mentíi meé měhyé áwēn nzé nkag á mbwog e Masedonia, mentíi'-e ámpē meé á ehúu métyéem áwēn ábel boŋ nyewôŋgen me áke á mbwog e Judeya. ¹⁷ Áde měmbenlé mímén ntíi, énkembáá éche nheláá-se nhaplén nlém á abum. Meébélé mímêm ntíi á nyaa e moonyoŋ. Meesaá née mod awé akwentan aá, "Ee, měbél." Boŋ ámbid e póndé átim ahób aá, "Aáy, méebeenlé." ¹⁸ Á'so é' Dyöb áde ábelé ngáne áhóbé aá móðbél, nzé sélángé nyé bán sēebél dyam, sēbelé sēbél-le dó. ¹⁹ Nzom eché ekéa boŋ nén ábe edíi áyále nkalaj mí bwâm tâŋgene Mwän a Dyöb, Yesu Krístæa, míme me, Sailase ne Timotie sekánlé'áá nyé. Yesue eehobéé aá móðbél dyam boŋ eétimé dó abel. Yesu Krístæa abelé dyam áde áhóbé aá móðbél. ²⁰ Chöm ésyāel éche Dyöb áhóbé aá móðbél, abelé mébenlad abel áde ábélé boŋ debé ne Krístæa. Nén dóo ákáé boŋ áyále mekan míme Yesue ábelé syáné déhobé bán, "Ébē nē" ábel boŋ Dyöb ákud edúbé. ²¹ Dyöb dóo ábélé boŋ syáné debé dédubpé Krístæa. Dyöb dën dóo áwógté syáné ábé ne Krístæa. ²² Ahédé'-e syáné ábé e'chem ábe é'lümte bán syáné dedé ábé bad, ahé-'e syáné éche Edéadéj éche Esáá á nlém-tê âlumed nén bán deéküd bwém é'syāel ábe ahóbé aá móðbél syáné.

²³ Dyöb áde me mbói nén aá chöm éche nhobéé édé mbále. Nzom eché enkéj boŋ menkentím ámbid á dyad á Körinto, edíi áyále meehede'aá meé nwóged nyé ndutul.

²⁴ Séehedéé bán ébê byánán sényágté nyé ádúbe kéchéé. Boŋ pen sēbele nsón ne nyé, ábel boŋ nyébê menyinge áyále nyésúmné á adúbe-tê.

2

¹ Né-oo, memmád á nlém-tê nén meé méehyaá nyé anyín ámpē. Nzé mempē nwógté'áá nyé ndutul. ² Nzé nwógté nyé ndutul, mod eebáá awé áwógté me menyinge, áyále nwógté bad ndutul ábe bémbé bewógté' me menyinge. ³ Nén dóo dênkéj boŋ nítelé nyé enén ndín e kálag. Meéhede'aá meé nzé mpedé áwēn, nyé bad ábe nyewógté' me menyinge, nyewóged me ndutul. Ndúbpé nén meé nzé ndé menyinge, né nyé moosyáel nyéebé menyinge. ⁴ Nténlé nyé enén kálag nyaa eche nítelé áyále membé ndutul, metake mébé me á nlém-tê, nítelé'-e chó ne mésod. Menkentelé nyé chó ábel boŋ nyewôg ndutul, boŋ mentelé nyé chó ábel nyébíi ngáne ndáá nyé bwâmbwam.

*Paale aá bad bé Körinto
bélagsen mod awé abelé mbéb*

⁵ Nzé mod abelé dyam áde áwógté bad ndutul, saké áwém dëmpen dóo ábélé dó, né abelé dó wéé nyé moosyáel ámpē. Boŋ ádén dyam ádíi dyam áde méehobéé bwâmbwam.

⁶ Nkógsen míme bad híin átinté echén bébagé ene ndín e mod, nkowgnédé mó. ⁷ Boŋ nyétáŋgené née nyélagséné mó nyewéd-te mó nlém á abum, ábel ndutul eche ákúdé eetómtán mó adenled. ⁸ Né-oo, ncháa nyé meé nyéluménd mó bán nyéddíi nyédaá mó.

⁹ Nzom eché enkéj boŋ nítelé nyé enén kálag edíi ábíi nzé nyéebé mam mésyáel míme nhobé meé nyébel. ¹⁰ Kézéé awé nyélagséné, mémpē nlägséné mó. Dyam áde nlägséné, nzé édé bán nlägséné dó, né nlagsan dó áyáel echén. Krístæa abelé abíi'-e aá nlägséné dó.

¹¹ Debele nê ábel boŋ Satané eetómé' syáné áte, éesaá bán syáné deebíi'é mwane míme Satané.

Békale nkalaj tâŋgene melč mékōslé

¹² Áde ímpédé á dyad á Troas, âkal nkalañ m̄ bwâm m̄me Krîstæ, Dyöb dênnednéd me nzii âbel írme nsón. ¹³ Boj nlém ménkembáá me bwâm á abum áyâle menkêntanné Tituse, mwânned a Krîstæ awé súmô sêbele nsón. Né-óó, menlyágtén bô, nkâg-ke me á mbwâg e Masedonia.

¹⁴ Nságnan Dyöb áyâle ayðgké abel syáá dehele' m̄me nkalañ akal. Abé áde dédíí ne Krîstæ ábélé dedé nêngáne bad ábe Dyöb ákóbé boj ályâgté áke dé akal nkalañ m̄ bwâm mebwâg mésyâel. Dyöb ábélé bad bêbyéé Yesu Krîstæ áyâle ímâe nkalañ m̄me syáá dékaleé. Mmê nkalañ nkâg átînté e bad ngáne elod é bwâm. ¹⁵ Elod é bwâm, elod é Krîsto, chôa dédíí á'sô é' Dyöb. Nzé dekale nkalañ tângene Krîstæ, bad bésyâel ábe bêdûbpé mmê nkalañ, Dyöb déesoo' é adâb alongé. Boj bad bésyâel ábe bêdûbpé mmê nkalañ, Dyöb déesoo' é adâb alongé. ¹⁶ Ne bad ábe bêdé á nzii eché epagnédé Dyöb á yâl, nkalañ m̄ bwâm m̄me syáá dékanleé bô ndé áwâb nêngáne ebébtéd é elod éche éwûe' bô. Ábíníí-é ábe bêdé á nzii âke wéé Dyöb nkalañ m̄ bwâm m̄me syáá dékanleé bô, ndíí nêngáne elod é bwâm áyâle syáá delângé bô bân bêbê á alongé ne Dyöb á ngindé ne á ngindé. Nzé-óó adé awé ahelesé ábel enén nyaa e nsón? ¹⁷ Sêesaá ngâne bad ábíníí hín ábe békale eyale é Dyöb ábel boj békud nsyâj. Ne sé sêebeléé nê, áyâle Dyöb álomé sé âkal nkalañ m̄ bwâm, mmê nkalañ sêkale' mó ne nlém nhôg abé áde sédíí mod nhôg ne Krîstæ, debíí-é néen bân Dyöb dôo álomé syáné ábel m̄me nsón.

3

Bekal bê nkalañ m̄ melé mékôôlê

¹ Nyêwémténé bân sêhôbe' mekan m̄e bwâm tângene éched yâl ámpé-yé? Nyêwémténé bân sêebé nyé kâlag ké'e séhêd kâlag áwén, âlûmed nén bân sêkwognédé ábel nsón átînté echê, ngâne bad bêmpée bêbeléé-yé? Sêebenlé nê. ² Nyêdíí sé á nlém-tê nêngáne kâlag eché bêtéle boj bad bésyâel bélâa ábíi chôm éche édé áwêd-te.

³ Nyêlûmte' bân nyêdíí kâlag eché Krîstæ átélê boj alómén sé. Enén kâlag eesaá kâlag eché bêténlé ínke boj edíí eché Edâadâj é Dyöb áde ábage alongé étêlê. Bénkêntenlé enén kâlag á melâa mën, m̄me métânlé, boj bêntel chô á nlém m̄ baânyo. ⁴ Sêhôbe nén áyâle sêsumé nlém ne Dyöb abé áde sédíí ne Krîstæ. ⁵ Sé bén sêeheléé-sé sêhôb bân sêhele-sé sêbel mmén nsón. Sé bén sêeheléé-sé sêbel mó. Dyöb dôo ábélé boj sêhel mó abel. ⁶ Abelé sêkwognédé âkal mmê nkalañ m̄ melé mékôôlê. Méesaá nkalañ âhíd mbéndé é melé m̄e nchun. Bad ábe bêhíde ene mbéndé bêwâg, bêebâg-kaá ne Dyöb. Nkalañ âhíd melé mékôôlê m̄me sêyâgtéé, ndé néen bân Dyöb ábage bad Edâadâj éche Ésáá, ébèle-é bêbê ne mó á ngindé ne á ngindé.

⁷ Bao'b-pôó, Mosee an'yágéd bad âhíd mbéndé é Dyöb é melé m̄e nchun. Dyöb dêntêl échén mbéndé ámîn e melâa m̄me métânlé boj ábe Mosee aá áyâgté bad. Áde Dyöb dêmbeé Mosee échê mbéndé, ambel e'só é'pené' Mosee féréd, âlûmed bân échê mbéndé édíí échê. E'só é'pené'áá Mosee nyaa eché bad bê Israel bêehele'aá mó anon á'sô. Boj kénéé é'pené'áá bwâmbwam, mmê mwayé mêmbootéd asud mwâmpin mpin. Bad ábe bêhíid melé m̄e nchun bénwé, bénkembáá-áá ne Dyöb. ⁸ Né-óó, nzé sêyâgté bad nkalañ tângene Edâadâj é Dyöb, Dyöb dénlumêd bad nén aá mmê nkalañ ntómténé etógnén abé á alongé á bad. ⁹ Dyöb dénlumêd aá módê ngum áde âmbeé Mosee mbéndé. Échê mbéndé êmbel bad bêbíí bân ákôgsen bô áyâle mbéb m̄me bêbelé. Boj anabpê eché ngum alûmed abel áde ábélé boj sêkalé mmê nkalañ m̄me nlümté ngâne bad békobnadté áwe e'sô. ¹⁰ Mbéndé éche Mosee áyâgté'áá bad bao'b âhíd mbéndé é Dyöb émbé etógnén. Ayâged áde sêyâgtéé bad bao'b bân Dyöb délagsen bô mbéb, bêbelé-é ngâne áhedeé, dôo átômténé etógnén abé. ¹¹ Kénéé édíí bân Dyöb dénlumêd ngâne adíí etógnén áde ábélé melé m̄e nchun, melé m̄me mémbe á esón é pôndé, alûmté aá mótômténé etógnén abé abel áde ábélé melé méeökôôlê. Mmén melé méeökôôlê mó mélâyléné alongé á bad, mélâ-é abé ne abé.

¹² Né-oó ngáne sésúmén nlém bán nkalaj míme sékaleé índé etógnén bwâmbwam, sêkale mó ésebán sêbáa'. ¹³ Séesaá nêngáne Mosee. Mosee ankúdtén e'só âbel boj bad bé Israél bênyíné ngáne e'só ábe é'péne'áá mó é'díme. ¹⁴ Boj bénkênsônténné. Á mbále, bootyaa ene póndé ápe chii, bêeheléé asôntén nén bán apen áde e'só é'péne'áá Mosee, mímê mpentéd ñsúdé. Póndé ké ehéé nzé bad bewogé mod aláá kálag e melé mé nchun, bêesôntanné chörm éche bewogé. Édé nêngáne abad ákúténé bó mewémten. Nzé mod adé ne Krîstæ dëmpen dão ásôntanné. ¹⁵ Á mbále, bootyaa ene póndé ápe chii, póndé ké ehéé eché béláa mbéndé é Mosee, ébelé ébé byánán abad ákúténé bó nsônten nyaa eche bêeheléé chörm éche béláa'é abí. ¹⁶ Boj nzé bó ké ahéé adúbpé Sângú Yesue, chörm éche ébâg nêngáne abad éche ékutan bó nsônten ébelé éhide. ¹⁷ Baob-poó, Sângwéé adíi Edéadæj. Kéhéé áde Edéadæj éche Sângwéé édií, bad bêebâgké á mehanj-tê. ¹⁸ Syáné ábe Dyöb áhûdé abad áde dénkütén syáné e'só, abé ádéd ábèle' bad bêbíí ngáne ehûmé éche Sângwéé épédé abé. Bényíne' bán abelé syáné ngáne bad ábe bêbèle ngáne Dyöb áhede. Edéadæj éche Ésáá éhøylan syáné ahøylen ne ahøylen ábé ngáne Yesue ábel bad bényn ngáne ápédé ngíne abé. Sângwéé, mó awé adé Edéadæj, mó abele rímén mekan.

4

Yesue alúmté syáné ngáne Dyöb ápédé abé

¹ Ngol eché Dyöb ádií chó ekáé boj sékalé' mímén nkalaj. Né-oó, séedonlé mekuu ámbid ákal mó. ² Séebeenlé mekan mé e'sôn míme bad bêbèleé á mesoom-tê. Séedognéé nyé ehób é nsəl, séehøyln-naá eyale é Dyöb âdog nyé. Boj pen, sêyágte' bad eyale é Dyöb nyaa eché bad bésônténné chó. Ngáne sêyágteé eyale é Dyöb ne nlém nhög, modmod eehéeléé-se ahób á nlém-tê áá sêdoge mó. Sêbíí bán Dyöb ábíí kékéé éche sébèleé. ³ Nzé donge á bad bêhelle nkalaj mí bwâm míme sêyágteé asônten, né édfi wéé ábê bad beedúbpéé mó. Ngáne beedúbpéé Dyöb bêebáá ne mó. ⁴ Satane, nkamlene a nköjsé, akamlan mewémten míme bad ábe beedúbpé Krîstæ. Bêeheléé-se bésônten bán nkalaj mí bwâm lílumte ngáne Krîstæ ápédé etógnén abé. Krîstæ adíi néé Dyöb dën. ⁵ Né dão ákáé boj séekálé tângene éched yél. Boj sêkanle nyé bán Yesue mó adé Sângwéé. Sêdûi bembâlede ábén ayâl e Yesue. ⁶ Dyöb áde dénhôb aá, "E'nyínén bé ekide é'bê wéé ehíntén énsêbêé abé," mó abelé mímē nkalaj tângene Yesue ábé nêngáne e'nyínén bé ekide ábe é'péne' syáné á nlém-tê. Syáné baásyâl ábe dedúbpé Yesue bôô Dyöb ábenlé nê. Dyöb ábelé nê ábel boj bad bêbíí nén bán móde etógnén abíí áde bad bêbíí'é bán Yesue Krîstæ adíi néé mó.

⁷ Boj nkalaj míme Dyöb ábágé sé ákal, índíi chörm éche étomténé etógnén abé. Sêdîi nêngáne mbeé e mog eché chörm édií áte. Nén ábenléde ábel boj bad bêbíí nén bán ngíne eché echabé ámín ehúú ne Dyöb saké ne sé. ⁸ Sêkude nyaa é ndutul híin boj séelyágéé áwêd-te. Donge á póndé séebyéé' dyam áde sébèleé, boj sêehôb  é nén bán Dyöb déelumédté se chörm éche sétângéné abel. ⁹ Bad bétagte se póndé té boj Dyöb déetetedé sé. Bélögne sé, boj Dyöb déekwentánné aá bewíu sé. ¹⁰ Kéhéé áde sékagké ákal nkalaj mí bwâm sêhédé á nlém-tê nén bán bad bêhede' sé awúu ngáne bénwûu'-é Yesue, boj bad bêbíí bán Yesue adé á alongé, mó-'áá ahâg sé ngíne áte abé áde sédîi á alongé. ¹¹ Sêbíí nén bán kénée sédîi á alongé baob, sêdê benben ne kwéed póndé té áyâle sêbenle Yesue. Nén áde ábel boj bêbíí bán Yesue adé á alongé, mó-'áá ahâg sé ngíne áte abé áde sédîi á alongé. ¹² Né-oó, sêkwénténé kwéed ábel boj nyékud alongé áde déemaá'.

¹³ Sêdîi melemlem ngáne mod awé ahóbé ngáne étenléde á kálag e Dyöb nén bán "Ndúbpé w  , né-oó, nkale' tângene w  ." Melemlem ngáne ane mod ándub   Dyöb, sémpé sêdúbpé Dyöb, sémpé sêdîi sêkale'-e tângene mó. ¹⁴ Sêbíí bán Dyöb áde ápuúdté Sângú Yesue dépuúd-te sémpé áb   á alongé ámp   ne Yesue. Dyöb dépeén-ne sé ne nyé w   ádií. ¹⁵ Metake mésyâl míme sêkudeé médfi âwóngen nyé, ábel boj nzé bad híin bewogé eyale é Dyöb, nsimé n Dyöb m  b  l b  k  d alagsen dé mb  b, b  b  d-te mó asagnén. Nén débel bad híin b  kené' Dyöb.

¹⁶ Né-óó, séedonlé mekuu ámbid âkal nkalanj mí bwâm, kénée édíí bân ngíne esude' sé á yäl, kénê Dyöb áwede' sé nlém á abum, áhâg-ke sé ngíne áte mbwe té. ¹⁷ Baá metake ábe sékudeé baōb bëesaá ábe sétagteé nlém á abum. Sêkude metake baōb boj ehúmé éche ébë ne sé échäb ámin nyaa echë séekamténné metake míme sékûdé á nkörjsé wén, ébë-’ë ne sé á ngíndé ne á ngíndé. ¹⁸ Nê dôo ákéá boj séenyíné' metake míme sékudéé baōb néé dyam. Boj sêbânné nlém áyäl e bwëm ábe Dyöb ákóñnedé sé, kénée édíí bân séenyínéé bô. Bwëm ábe sényínéé baōb é'dé dásô áyäl e esój é póndé, boj bwëm ábe séeheléé-sé sênnýin baōb, bëbë á ngíndé ne á ngíndé.

5

Dékűd yěl ékőőlē ádyōb

¹ Sêbíí nén bán éched yäl éche sébééné á nköjsé edíí néé e'bem ábe sédyee'é áte. Nzé bépáá ábê e'bem, sêbíí nén bán sêwóó ndáb ádyöb eché moonyoŋ éeloo'é. Dyöb döö álóo' chô, eбe'-e' á ngíndé ne á ngíndé. ² Sêkooomad áte bɔɔb á ebem-tê wén, sêwane áte bán ene ndáb eché ebíde' ádyöb ékúten sé ngáne mbóté ékútanné mod. ³ Nzé sêdé ene ndáb áte, sêebáá nêngáne mod awé adé nsôb. ⁴ Abéen áde sébééné enén yäl á nköjsé te wén, sêkooomad áte adenled áde nén ádénléde sé. Éesaá nén bán sêhede enén yäl e nköjsé ahúd, boŋ sêhede yäl ékɔɔlē eche edé ádyöb, ábel enén yäl e nköjsé eché ewâg émaa, étim yäl eché eбe' á alongjé. ⁵ Dyöb döö ábónjséné syánē âkud mímén nhænlén alómmé'-e syánē échê Edædæŋ éche Ésáá âlúmed nén áá adén akan débenlé.

⁶ Né-ѡ, póndé téé desume' nlém nén bán abé áde dédíí ne échén yǎl á nkönsé, deésaá hǒm ahóg ne Sángwéé. ⁷ Sêdé á alongé á nkönsé ne échén yǎl, áyāle sêdúbpé mó saké ngáne sényínée mó. ⁸ Sêsumé nlém nén bán ábe syánē yǎl ékőslē, sêhede'-é éched yǎl é nkönsé atede áke débé ne Sángú Yesue. ⁹ Né-ѡ, mímed nlém ísyāel ítāngéné abé âwóged Yesue menyinje áyāl e kéchéé éche débeléé, ké ébé bán sêdé ne éched yǎl á nkönsé, ké'ε séesaá ne chó. ¹⁰ Syánē mod téé átyēem á nkáásé á'sō ábe Yesu Krístəə epun éche ákāadtē moosyāel, tângene mekan míme ábélá póndé eché ábédé á nkönsé. Mod té ákūd nsábe tângene mekan mé bwâm ké'ε mé mbéb míme ábélá.

Âb  á nchemten ne Dy b

¹¹ Ngáne sébíí bán Sáñgwéé ákāād bad, sébagé-'e mó edúbé, sêwane' áte nén bán bad bésöñtēn nén bán nkalaj míme sékaleé ndé mbále. Dyōb ábíí nyaa é bad éche sédíí, mbíí-'e meé nyémpē nyébíí nyaa é bad éche sédíí, ndúbpé-'e meé nyébíí-'e bán sêkale mbále. ¹² Séehóbéé mekan mé bwâm tângene éched yäl ámpē. Boj pen sêhede bán nyéwôŋ nzom âbéen sé kúmbe, âbel boj nyéwôŋ dyam âláa bad ábe bédé kúmbe áyäl e mekan míme bébeléé míme bad bényínéé, saké áyäl e mekan míme médé bó á nlém-tê. ¹³ Donge á bad bélhóbe bán sêhóbe mekan néé bad ábe nló méesá'a'é áte. Nzé nê ádé mbále, né Dyōb dôo sébagéé edúbé. Nzé sêhóbe mekan néé bad ábe nló ñsáá áte, né âwóngen nyé dôo séhóbéé. ¹⁴ Edənge éche Krístæ chôo étédé sé nlém á abum âbel mekan míme sébeléé, áyäle sêmadé á nlém-tê nén bán Krístæ awédé á nló mí moosyäál. Né-ó, édé nêngáne moosyäál áwédé. ¹⁵ Anwé á nló mí moosyäál âbel boj bad ábe bédé á alongé, alongé ádâb déélümté bán bédé á alongé áyäl echâb dëmpen. Boj pen bédé á alongé áyäl e Krístæ, mó awé anwé, boj Dyōb ápüünd-te mó á nló rímâb.

¹⁶ Né-óó, bootya bɔɔb, déenōnē mod nyaa eche moonyoŋ ánənəé. Kénēe édíí bán sénōnē’áá Krístəə á nyaa e moonyoŋ, séenōnēē mó nê ámpē. ¹⁷ Né-óó, kénzéé awě adé mod nhóóg ne Krístəə, adíi nhægtéd mékōõlē. Mmē mbeltéd mé nchun n̄syāəl mmáá atóm awóó-’e mbeltéd mékōõlē n̄syāəl bɔɔb. ¹⁸ Mmén mbeltéd mékōõlē ínhúú ne Dyöb. Abelé syánē detimé ásē ne Krístəə, abagé-’e syánē nsón âkale bad nén bán békéle béké nsan ne Dyöb. ¹⁹ Chöm éche ínhóbeé édíí áyāl e kwééd eché Krístəə áwédé á awög. Dyöb ábelé bad békéde á nchemten ne mó. Dyöb déetoo’áá mbéb ímme bad békéle, abagé-’e syánē nsón âkale bad nén bán békéle béké nsan ne Dyöb. ²⁰ Aláa áde Dyöb álāngeé sé mekan áláa bad sédíí bad ábe békébpe Krístəə. Sésíme nyé etúu áte á dín á Krístəə nén nyépe á

nchemten ne Dyöb. ²¹ Dyöb dêmpwëd Yesue âtag áyäl e mbéb nísyääl míme syánë débélë. Yesue enkëmbenlé mbéb ké nhög, boj kénë ankwentén atag áwed nló. Dyöb álágséné syánë mbéb ahóbe-'e aá déebélëë mbéb ámpë melemlem ngáne mómpë éebelée mbéb.

6

¹ Né-óó, sé ábe sêbele' nsón ní Dyöb ne Dyöb, sêcháa nyé nén bán nsimé ní Dyöb míme nyékudeé méébág ngén. ² Dyöb áhóbé ngáne éténldé nén aá,
“Áde póndé épédé echë etángéné, menwóg chöm éche nyéhóbé.
Áde epun é e'soósorj-'e épédé, menwóngén nyé.”

Nyénøne' póndé nén bøob echë etángéné, eche nyétángéné nsimé ní Dyöb akud. Nyénøne', epun épédé éche nyéhèle nyékud e'soósorj.

³ Séekáá' modmod nzii, ábel boj awusé déenýinnäd áyäl e nsón míme sébeleé. ⁴ Boj pen, nêngáne bembalede bé Dyöb, sélumte' yäl nyaa ésyääl ábë bad ábe bëbele' mekan míme métángéné. Sêwánlé e'kañ bé nlém é' ngíne tângene metake míme sekudeé, tângene alongé áde álenlad sé áte, ne ndutul éche étane sé. ⁵ Sékude mbéte, böhág sé á mbwøg, ndun e mod empeén epuutéd bëchodé sé yäl áte, sêbele ntü ní ngíne, sénangé' e'pin, sédyéé-'e nzaa. ⁶ Sélumte' ámpë bán sêdii bembalede bé Dyöb abel áde sébeleé mekan mé bwâm ne e'saj bé nlém, abe áde Dyöb ábágé sé nsônten ábii alongé áde sétángéné awón, awesen áde séwesanné, ne awóon áde séwórné bad bëmpée nlém m bwâm. Edæádæj éche Ésáá chòo élyágte sé, sêdáá-'e moosyäál ne nlém nhög. ⁷ Nkalaj míme sekaleé nídií nkalaj m mbále, ngíne e Dyöb chòo'-áá sébenladté ákal mó. Abel áde sébeleé mekan míme métángéné ábélë bad bëewoo' dyam dé mbéb ké ahög ábán sé á yäl. ⁸ Sëebë sébenlé Dyöb ké bëken sé, ké' e bëekene' sé. Ké bad böhág sé mekan mé mbéb áyäl ké' e mekan mé bwâm. Bad böhág bán sélumté bán sêdë ndín é bad éche séesaá, boj sêdii bad ábe sëhóbé bán sêdë. ⁹ Bad bëbii sé bwâm boj bëmpée bényíne' sé bán sêdii bad ábe bëesë dyam dé abelen. Bad bëwëmtan bán séebáá alongé boj kénë sêdii sêdë á alongé. Sékude metake á mekáá mé bad boj kénë, bëewúú' sé. ¹⁰ Sêdë á ndutul tê, boj kénë, sëwóge menyinge póndé ésyääl. Kénëe édií bán séebudeé chöm awón, boj kénë nsón míme sébeleé mibélë bad híin bëdúbpé Dyöb. Né-óó nê ábélë bëbûdë bwëm awón bøob. Kénëe séewoo' chomchom, nhon ní Dyöb nídií mmëd.

¹¹ Á-bad bé dyad á Körinto, séténlé nyé chöm ésyääl ésebán sêkojnad nyé dyamdyam. Sélumte' ngáne nlém nídií sé áte áyäle echén. ¹² Sêdáá nyé, séebáá'-áá alúmed bán sêdáá nyé. Nyé pen nyélumte sé nén nyéedæ' sé. ¹³ Nhóbe áwëñ bøob néë ábêm bän. Nyémpë nyédæj sé ngáne sémpë sêdáá nyé.

*Nyéebëlë' mekan míme bad
ábe bëedúbpé Krïstæ bëbelëé*

¹⁴ Nyéebág nlatén ne bad ábe bëedúbpé Krïstæ. Nhóbe nén áyäle bad ábe bëtångéné á'sö é' Dyöb, bëewoo' dyam abelen mekan míme e'bëbtéd é' bad bëbelëé. E'nyínén bé e'kide bëewoo' dyam abelen ehíntén. ¹⁵ Krïstæ eewoo' dyam abel ne Satanë. Mod awë adúbpé Krïstæ eewoo' dyam dé abelen mod awë eedúbpé. ¹⁶ Ndáb-e-Dyöb eewoo' dyam dé abelen ndáb echë bad bëbenleé myöb mémpée. Nhóbe nén áyäle dedíi ndáb e Dyöb, Dyöb áde ádë á alongé. Édé nén ngáne éténldé bán Dyöb áhóbé aá,
“Mébë ne ábêm bad, nídyëë-'e áwab.”

Bëbelé me nêngáne ádab Dyöb, me-'e métëd bø nêngáne ábêm bad.”

¹⁷ Sángwéé alânge ábë bad aá,

“Né-óó, nyétede, nyéebág-ke ne bad ábe bëedúbpé me.
Nyéewoo' dyam abel ne e'bëbtéd é mekan míme bëbelëé.

Mëkëb-pe nyé néë ábêm bän.

¹⁸ Mébë nyé sáá,

nyé-'e nyéebë ábêm bän.

Më Dyöb á Ngum me-eé nhóbe’.”

7

¹ A-baányaŋ bé edəŋge, ngáne Dyōb áhóbé aá módfí awesyánē Sáá, syánē-'e debé ábe bǎn, dëtcde mekan ímme méwógté syánē mbinde á ekob é yǎl ne á edəádəŋ. Syánē débe Dyōb edúbé, déwōŋ-'e alongé áde ásáá, nê débél débagé Dyōb edúbé ngáne éhedenadté.

Paale adé menyinje

² Nhede mée nyédəŋ sé ne nlém ísyāel. Séepānnēē modmod, séebéltēē modmod mbéb, séedōgēē-'e modmod. ³ Meehóbéé nén áhób nyé. Mensébé nyé atele nén mée, sêdáé nyé bwâmbwam, ké á kwééd ké'e á alongé, dëbë debé mod nhóg. ⁴ Nkumne nyé ekáá á tâl. Mbééné nyé kúmbe. Nyéwédé me nlém á abum bwâmbwam nyaa eché ntómténé menyinje abé kénée sekudéé metake bwâmbwam.

⁵ Áde sépédé á mbwóg e Masedonia, sênkênkóméé áte. Sêkudé'áá metake nyaa ne nyaa. Bad bëpentánnáá ne sé mbwóg-ke mbé sé áte áyâle sêkamtánnáá nyé. ⁶ Boj Dyōb áde áwéde bad ábe bëewoo e'lyég bé nlém, nlém á abum, dénwëd syánē nlém á abum alóm áde ánlömmé Tituse áwesýánē. ⁷ Saá-kaá éché epé chëmpen êmbel sêwóg menyinje, boj awéd áde nyénwëdté mó nlém á abum dénwôgëd sé menyinje. Anláá sé ngáne nyédáá me anyín bwâmbwam, aláá-'e sé ngáne nyénwôgké pél áyâle ndutul eche ebédé nyé á nlém-tê ngáne nyénkênwôgédte me menyinje. Anláá-'e me ngáne nyéwóó nlém áte ábë me ámbid. Áde Tituse áláŋgé sé mímén mekan, membé menyinje bwâmbwam.

⁸ Kénée édíí bán ene kálag eché mënteléé nyé ndutul, meésaá ngøl nén me nténlé nyé chó. Kénée édíí nén bán membé ngøl atel áde mëntenlé chó, nnyíné nén mée echem kálag eché nténlé nyé ewiídé nyé nê á esój é póndé. ⁹ Boj bøøb ndé menyinje, saké áyâle ménwôgëdté nyé ndutul, boj áyâle ndutul eche nyénwôgké ebélé nyêhâjélné áden abé dé mbéb nyêbèle' ngáne Dyōb áhëdëé. Nyénwôg ndutul ngáne Dyōb áhëdë'áá aá nyéwôg. Né-óó, ndutul ké ehéé eché sêmbenlé boj nyéwôg, enkëmbébenné nyé. ¹⁰ Nzé ndutul edé mod á nlém-tê ngáne Dyōb áhëdëé, ane mod abelé ahñjéln áde abé dé mbéb ábelé' ngáne Dyōb áhëdëé. Nén ábelé' ane mod ákùd e'soosoŋ, nê déewiidéé modmod ámpë. Boj bad ábe bédúbpé Dyōb, ndutul eché edé bó á nlém-tê áyâle bédíí baányoŋ ebélé' bëwâg á edəádəŋ. ¹¹ Boj ndutul embé nyé á nlém-tê ngáne Dyōb áhëdëé aá ébë. Né-óó, nyénøne' chom éche nê ápíinédé nyé. Nyêhëdë'áá bán mbíí nén mée nyéwane áte álúmed bad nén bán nyéebélëe awusé ké ahób bøøb. Meliŋgá mëmbé nyé áte nén bán ábë bad bëbélë awusé á etûn é póndé nyéde ahób bán nyélangé bó bán bësôg mbéb abel. Nyénwôg mbwóg nén bán Dyōb dékōgsen nyé nzé nyéde nyêbèle échén ndín é mekan. Nyéndəŋ me anyín bwâmbwam, nyénwóŋ nlém ábë me ámbid, nyékōgsan-ne bad ábe bëbèle mbéb. Abel áde nyébélë rímén mësyāel, álúmté sé nén bán nyéebélëe mekan mé mbéb. ¹² Né-óó, kénée ntélé ene kálag, menkëntenlé chó áyâle mod awë abelé epandé ké'e mod awë bëpánné boj ntelé chó ábel boj nyébíi á'sò é' Dyōb nén bán nyékoó sé adəŋ. ¹³ Nê dôo ákáá boj nyéwëdë sé nlém á abum.

Sáá-kaá e'wëd bë nlém á abum bënpen, boj sêmbé menyinje bwâmbwam anyín áde sénnyinné Tituse adé menyinje áde ápédé. Anláá sé ngáne nyébélë boj asog atag áte. ¹⁴ Membé kúmbe áláá Tituse ngáne nyéddíí bad bë bwâm, nyénkênwôgëd-taá me e'sôn áyâle nyénlüméd nén bán mekan ímme ménlää' é mó médë mbále, ngáne mekan mësyāel ímme sénlää' é nyé médií mbále. ¹⁵ Né ábelé rímme nlém ntíme' áwëñ tómaa ké ngen e'só, akamtën áde ákamtanné ngáne nyé moosyäál nyénwõngë nlém ábel mekan mëme ánlää' é nyé aá nyébel. Nlém ntíme mó áwëñ ámpë nzé akamténé ngáne nyénkobpé mó ne edúbë, nyéwõngén-ne mó ne nlém nhög. ¹⁶ Ndé menyinje áyâle nsumé nlém ísyāel áwëñ.

8

*Bad bë Krísto bëtérjégné
bad ábe bëtognéne awôŋgen*

¹ Bøøb-poó a-baányaŋ, sêhede bán nyébíi nén bán Dyōb ábágé mímë nsimé wéé bad bë Dyōb ábe bédé á mwembé ímme níde á mbwóg e Masedonia ábel boj bësále ekáá

áte. ² Békûdê metake mé ngíne mímme mékâge bô áte bwâmbwam. Kénéé édíí bân bédé atôg bwâmbwam, bésânlé ekáá áte bwâmbwam, bédé-'e menyinge. ³ Ndé mbóy nén meé, bêmbé chôm éche bénwöngé, bêntomtén-ne abe tómaa chôm éche bémbeé bêbage'. Bébagé'áá-'e ngâne nlém ímâb ménlâa' é bô. ⁴ Béñchâñ syánê bwâmbwam âbé menyinge âwóngen bad bê Dyôb bê Jerusalem ngâne bómpé bêbeléé. ⁵ Bêmbé l tómaa ngâne sérnwëmténné. Bénsébê ádâb alongé abe á mekáá mímme Sângwéé. Ámbid enê bêmbé ádâb alongé áwed mekáá ngâne Dyôb áhedeé aá bêbel. ⁶ Né-ôó, sêchâa' Tituse awé ambootéd ímmén nsón ne nyé nén bân ádîi áwóngan nyé, mímén nsón mímme nyésânlé ekáá áte, nyébâgê-'e bad kéchéé éche bétógnéné ne nlém nhág, nyépid mó á asog. ⁷ Bôob-pôó, nyébèle bwâm á menzii mésyâél. Adúbe áwúú nyé áte. Nyékale' nkalañ m bwâm, nyébíí mekan mé Dyôb, nyéwóó nlém âwóngen bad nyédaé-'e sé bwâmbwam. Né-ôó, sêhede bân nyébèle bwâm, káájne âsále ekáá áte, nyébage-'e bad kéchéé éche bétógnéné.

⁸ Meékamlánné nyé ábel nén. Boj ngâne ínyíné bad ábe bédúbpé bêwóngan bad bêmpée, nhede meé nyémpé nyélûmed ngâne nyédaá bad bêmpée. ⁹ Nyébíí ngâne eché Sáj, Yesu Krîstæ áwónganné nyé âsale ekáá áte. Kéchéé éche Dyôb áwóó mó awóó. Boj kénê á etútú échén antedé ímmê nhón ísyâél ádyôb ápê á nkönsé abé née ntogétoke m mod. Ambé l nê ábel boj nyékud nnam mímme Dyôb ábageé bad.

¹⁰ Mbage nyé elébé nén meé, mwé mímme ítómé nyémbé bad bê e'só âwój nlém âwóngen bad, nyémbé-'e bad bê e'só ábooted bad awóngen. ¹¹ Bôob-pôó, nyétângéné nsón mímme nyébôótédé amad. Nê débél bad bêbíí nén bân nyéde mbojsén abe ngâne nyéwóó ápid-te nê á asog melemlem ngâne nyémbôjsénné ábooted nê. ¹² Nzé ewóó ímmê nlém abe mod chôm ngâne éwóó chô, ébelé ékobnéd ne Dyôb. Dyôb déehedéé aá mod abe tómaa chôm éche áwóó.

¹³ Meehóbéé meé nwôngén mímme nyébagéé bad íwóngen bô boj nyé bën nyébê á metake-tê, boj nhede meé nyé moosyâél melemlem, nyéwôñ chôm éche ékwognédé nyé mod-téé. ¹⁴ Bôob-pôó abud áde nyébûdé bwêm awój, nyéwóngan bad ábe bédíí bêhede', ábel boj á pôndé eche nyémpé nyétôgnenné bómpé bêwóngen nyé. Nê débél mod téé áwôñ. ¹⁵ Éténlédé á kálag e Dyôb nén bân, "Mod awé ambud awój, enkênwóngé tómaa ngâne ántôgnenné, awe mó-'e enkêmbud awój, andfi anwój ngâne ántôgnenné."

Bélonmé Tituse bô á Kôrinto

¹⁶ Nságnan Dyôb abe áde ábágé Tituse ámpé nlém âwóngen nyé melemlem ngâne ábágé me. ¹⁷ Tituse eépâgké áwén áyâle sélângé mó bân ape, boj apag kááj ne áyâle awóó ímmê nlém âpe, apag áyâle mwén adâá ape. ¹⁸ Sêlômne mó mwânned a Krîsto ampée. Anén mwânned a Krîsto, abyééné átânté e mwembé ísyâél akal áde ákaléé nkalañ m bwâm. ¹⁹ Saké alóm áde sélóméé mó dëmpen, mwembé mëmpwed mó âhoon sé ngâne sébeléé nsón âwóngen bad ábel boj edûbé éche Sângwéé ényînned ne âlûmed nén bân sêwoó ímmê nlém âwóngen bô.

²⁰ Séehedéé bân modmod áhôb dyam dé mbéb tângene ímmén nsón mé asále dé ekáá áte mímme sébeléé. ²¹ Sêwóó nlém ábel dyam áde átângéné saké á'sô ábe Sângwéé dëmpen boj káájne á'sô é' baányoñ.

²² Sêlôme' mwânned a Krîsto áwén nchoo ne Tituse bô. Alúmté sé á menzii híin aá mówôô nlém áte âwóngen nyé. Bôob-pe áde ályâgé nlém áwén, anâbpé nlém awój âwóngen nyé. ²³ Tituse mó ne mó ayâgké me ahoon ábel nsón âwóngen nyé. Ábíñií bânned bê Krîsto ábe békag ne Tituse bédíí bad ábe mwembé mélómé á dñi ádâb, kékéé-'e wéé békíí mam ímme bêbeléé mépiinad Krîstæ edûbé. ²⁴ Né-ôó, nyélûmed ábén bad nén bân nyédaé bô. Abel áde nyébenlé nê, mwembé mímme ílómé bô mésôntén nén bân nén dôo ákâá boj sekumné nyé ekáá á tâl.

¹ Boob-poó, éesaá etógnén me âtele nyé tângene nsón mme séwônganné bad bé Dyöb. ² Mbíi nlém mme nyewóó áte áwôngen bó, mbééné-'e nyé kúmbe awórj áde nyewóó nlém âwôngen bad ábe bédé á mbwóg e Masedonia. Menláá bó nén meé, "Nyé ábe nyéde á mbwóg e Akaya, nyembé mbojsén se mpú-mwé ábe bó mòná." Nlém mme nyewóó âwôngen bad nítédé bó bad híin nlém á abum ábel melemlem. ³ Boob-poó, nlome' ábén bánned bá Krísto áwén, ábel boj ahób áde sêhóbeé bán sêkumne nyé ekáá á tâl déebág bán sêkale metóm. Boj ébê bán ngáne nílángé bó meé nyéebé mbojsén ábe bó mòná, nyéebé-'e nê dën. ⁴ Né-óó, nzé mpedé áde bad bá Krísto á'sô, ábel nyémad nwôngen mme níchábé ámín mme nyéhóbé bán nyéebé bó, abojsen. Nzé nyébelé nê, né nwôngen nísyääl mébë mbojsén nzé mpedé. Nén déluméd nén bán nyébagé ne nlém nhög saké áyäle sényágté nyé.

⁵ Nyébíi nén bán mod awé eébude awén, éebudté ahúd, awe mó-'e abudé awén ábúd-te ahúd. ⁶ Nyé mod té ábe mòná ngáne mme nlém nílángé mó. Mod eébágé sé nlém níkoglár mó á abum ké' eébé byánán bényágté mod. Dyöb ádádá mod awé abage ne e'sáy bá nlém.

⁸ Dyöb débe nyé kéchéé éche nyétógnéné ábel boj nyewój chörm ésyääl éche ékwógnédé nyé ásále ekaá áte ábe bad bëmpée. Nén débél nyéebude' bad mekan mé bwâm abele.

⁹ Étenlédé á kálag e Dyöb nén bán,

"Asánlé ekáá áte ábe betóótöké bá bad nwôngen,
bad béechaténné ábë e'boj bá nlém."

¹⁰ Dyöb döö ábage bad bwém ábe bëwéneé, ábagé-'e bad chörm éche bëdyáké. Ábe nyé bwém ésyääl ábe nyétógnéné áwén, ábel é'kwôg é'chyáá mbote eche ebuú áte bwâmbwam. Ábel nén áyäle e e'boj bá nlém ábe nyewóó. ¹¹ Dyöb débél nyébelé nhon áyäle chörm ésyääl, ábel boj nyésále ekáá áte. Nén débél bad híin bésagnén Dyöb áyäle nwôngen mme nyébagé bó mme níhúu ne sé. ¹² Ábel áde nyébelé nén, déesaá áwôngen bad bá Dyöb dëmpen, boj áde káynejne álumé bán bad híin bésagnan Dyöb bwâmbwam.

¹³ Mekan mme mímén nsón mme nyébelé nén mébídédté áwed, mébél bad híin bëbagé Dyöb edübé áyäle nyébelé ngáne nkalañ mì bwâm mme Krístæa níhóbeé, nyélumte-'e ábén e'boj bá nlém wéé bad bá Dyöb ábe bédé á Jerusalem, nyélumtē-'e wéé bad bá Dyöb bëmpée. ¹⁴ Béwóó nlém ányín nyé, békannad-te nyé áyäle nsimé ní Dyöb níde ne nyé. Mmê nsimé níchábé ámín bwâmbwam. ¹⁵ Nságnen mbe ne Dyöb áyäle abagé syáné nsimé mme nílélé ahægtén.

10

Paale alángé bad bá Körinto
aá mímë nsón nítángéné

¹ Me Paale, me awé mpwiítédé nsudte-'e yél nêngáne Krístæa, ncháa nyé. Baahög böhöbe' nén bán nzé ndé ne nyé mbelé níwogé mbwóg. Bán boj nzé meésé ne nyé, mbelé nítenlé nyé kálag éche éwúú áte. ² Ncháa nyé nén meé nyéebéle' ngáne ábë bad bëbeléé ábel boj nzé mpedé áwén, níhóben nyé ésebán mbáá' dyamdyam. Bad ábe mélhöbenné bédíi bad ábe böhöbe bán sëbele nsón ngáne bad bá nköjsé bëbeléé. ³ Kénéé édíi bán sëdé á nköjsé-te, sëewänëe nzum ngáne bad bá nköjsé bëwaneé. ⁴ Bwém ábe séwanneé nzum bëesaá melemlem ngáne ábe bad bá nköjsé bëwanneé. Boj bwém é' nzum é' ngíne é' Dyöb bóó sëbenladté ábëbed mebwóg mé ngíne mme ábëd bad bá ekoyí. Ábén bwém é' nzum bóó sëbenladté ásuded mpenten ké níhéé mme bad bëpëenéé mme méesé mbále. ⁵ Sëbenlad bó ámpé ámad mehób mé kúmbe mme böhöbeé mme mébële' boj bad bëébyé Dyöb. Sëbele' bad böhöylan mímab mewëmtén ábel mímab mewëmtén mésyääl mébë nyaa éche Krístæa áhedeé aá mébë. ⁶ Á pónde echë nyébenlé ngáne Krístæa áhedeé ne nlém nísyääl, döö sëbojsénné ákógsen kénzéé awé alúmté aá móobenlé ngáne Krístæa áhedeé.

⁷ Nyénəne' chōm éche édé nyé á'sō-te. Mod ké ahéé awě asumé nlém ne Krístəə ábſí aá ngáne módií, nē dōo sémpē sédíí ne Krístəə. ⁸ Ké menküm ké ekáá á tâl áyāle ngíne eche Sáŋgwéé ábágé me tómaa ngáne íkuméé bɔɔb, méewóhké e'sôn. Abagé mē ene ngíne áwéd nyé áte saké ásuded nyé adúbe. ⁹ Meéhēdēē mēé ényîned nén bán kálag éche ítlenléé nyé édií áwóged nyé mbwóg. ¹⁰ Nhóbe nén áyāle bad béhōbe bán kálag éche ítlenléé nyé éwúú áte, éwóó-'ε, e'yale bé mbéb áte. Béhōbe-'ε ámpē bán boj nzé mměn ndé, meewoó'é ngíne, kékchée éche nhóbeé-'ε éewóó'é ngíne ké póg. ¹¹ Bad ábe béhōbe nē békii nén bán kékchée éche ítélé á kálag, nzé meésé ne nyé, měbel chó nzé ndé ne nyé.

¹² Sēéhēlēē-sē sēhōb bán sēhəgtan yāl, kē'ē sé bán sēdē nyaa pōg ne bad ábe bēhōbe' mekan mé bwām áyāl echâb. Boj ngáne bēn ne bēn bēhəgtanné yāl, bēhōbē'-ē bán bēn ne bēn bētómne, bédé eyókél. ¹³ Boj sé pēn sēékūmēē ekáá á tâl tómaa ngáne sétángéné akum. Hōm áde Dyōb álómé sé aá sēbel nsón dōo sēbēneé kúmbe. Nsón mímme sēbeléé átíntê echēn mómpē índé nsón mímme sēbēneé kúmbe. ¹⁴ Sēékūmēē ekáá á tâl ábel nsón hōm áde Dyōb dénkênlómmé sé nsón abel. Sé'-aá sêbédé bad bē'sō ábíd nchabnedé áhye dé akale nyé nkalaj m̄ bwām mímme Kr̄istəə. ¹⁵ Sēékūmēē ekáá á tâl tómaa ngáne sétángéné akum, nédé sēékūmēē ekáá á tâl áyāl e nsón mímme bad bēmpēe bēbélē. Boj pēn sēsumé nlém néen bán ngáne áden adúbe ákwogéé, nē dōo nsón mímme sēbeléé mékwogéé bwāmbwam mebwōg mímme sēbeléé nsón. ¹⁶ Nén débél sēékäg mebwōg mémpēe mímme méchábnédé, sékale' Nkalaj m̄ bwām, ésebán sêkume' ekáá á tâl áyāle nsón mímme bad bēmpēe bēbélē mebwōg mémpēe.

¹⁷ Éténlé dé á kálag e Dyöb nén bán, “Kénzéé awě akume’ ekáá á tâl, atáŋgéné ákum ekáá á tâl, áyāle chöm éche Sáŋgwéé ábénlé mó.” ¹⁸ Saké ahób áde mod áhóbeé yél mekan mé bwám á yél dóo álûmte’ bán aköbnédé née mbapęe a nlómag, boj mod a mbále awě Dyöb áhóbeé mekan mé bwám á yél mó adé mod awě aköbnédé.

11

Paalε ne bembapεε bé nlómag bé metóm

¹ Ncháa nyé nén mée nyémwé íláa nyé mwă a akan ké nnyínnéd ké eyékél. Nyébân metúu. ² Nsíide' nyé nyaa eché Dyób áhele ásíí nyé. Nyêdíí nêngáne ngon e mmwaád eché eebíí mwenchóm. Ane mmwaád móó nhóbé mée mod nhóg áwōj, ane mod adíí-'é Yesu Krístæ. ³ Boj ké nê, ndé mbwóg nén mée ngáne Satane âmpoñgé Ife nló áte ne mímē mwane, melemlem nê dóo bépoñgé nyémpē nló áte nyaa eché nyéesummé mímēn nlém ñsyâøl ámpē wéé Yesu Krístæ nyéebeléé-'é mó ne nlém ñsyâøl. ⁴ Nhóbe nén áyâle nzé mod apedé boj akänlé nyé nkalaŋ míme méesë nkalaŋ míme Yesue míme sénkaléé nyé, nyébelé nyésëbën mó tâl. Ké'ë nzé akänlé nyé tângene edâadâj éche éesë edâadâj éche sénkaléé nyé, nyébelé nyékob. Ké'ë nzé mod akänlé nyé nkalaŋ mí bwâm míme méesë nkalaŋ mí bwâm míme sékänlé nyé, nyébelé nyékobën mó mekáá mébe.

⁵ Meedúbpree meé ábén bad ábe báchágé yél bán bédé bembapree bé nlómag bémbará bétomé me áyāl e nsón mme bēbeléé, nzé nhägténé syáābōo. ⁶ Nhele se meebyéé dyam ahób átinté e bad ngáne békéé, boj nwóó nsônten tângene dyam áde níhóbeé. Sékéluménd nyé rímén mekan áte híin mme sébeléé.

⁷ Áde nkánlē'áá nyé nkalaŋ mí bwâm míme nkâhúú ne Dyöb, menkênhóbpé meé nyésábe me. Mensudéd echem yäl âbel boŋ nyéwôŋ edubé. Áde mêmbeŋlé nén, dyam dé mbéb dôo mêmbeŋlé-ye? ⁸ Mbënlé'áá nyé, mwembé mémpée mésâbpé me, né-oo, ébédée byánán ndoge' rímê mwembé âwóngen nyé. ⁹ Áde mémbeɛ-ɛ ne nyé doŋge á póndé meewoo'aá chomchom boŋ meétagte'aá nyé, áyâle kchéé éche méntognenné ábêm baanyan bé Krísto ábe bémbeid á Masedonia békágé'áá me. Ngáne ménkéntagédté nyé ngen e'só, meétagéd-taá nyé póndé ké póg. ¹⁰ Ngáne nkaleé mbále néé mod a Krísto, modmod á mbwóŋ e Akaya eéhélë-ɛ se ábël se nsog ekáá akum á tél akob áde mEEKOBEE nsábe áwëñ. ¹¹ Nyéwémténé bán ahób áde nkâhobé meé meétagédté nyé ákob chom áwëñ ádii áyâle méedæ'ɛ nyé-ye? Dyöb ábií aá ndæá nyé.

¹² Ádén akan áde míbeléé bøób, mëbë míbelé dó, ábel boj méébágé bembapéé bé nlómag bé metóm etál âwónj nzom âkum ekáá á tâl âhób nén bán bëbèle nsón melemlem ngáne sémpé sébeléé. ¹³ Échê ndín é bad éche ékume' ekáá á tâl, bédíi bembapéé bé nlómag bé metóm. Bédoge bad áyâl e nsón míme bëbeléé, alúmed áde bélûmtéé y  l byánán bédíi bembapéé bé nlómag ábe Kr  st  t  . ¹⁴ Nén déék  mt   me y  l áte, áyâle nén ké Satane mómpé alûmte y  l byánán adíi ángel e Dy  b ech   es  á. ¹⁵ N  -  , éesa   me menyáké nz   bembalede ábe Satane b  mpé bélûmte y  l byánán bédíi bembalede ábe b  y  g  t   bad ábel mekan míme mét  ng  né ngáne Dy  b áhede  . K  áyne á as  g, nk  gsen míme b  kud  t   mét  ng  n   m  m  b mb  lt  d  .

Metake míme Paalé ákúdé nēe Mbapée a nlómag

¹⁶ Nhóbe ámpē nén meé, modmod eewémtán aá ndé eyókél. Boj nzé nyéwémténe bárndé eyókél, nyéwôg-koo chöm éche nílângeé nyé abel boj mémpé nkum ekáá á tâl mwämpin. ¹⁷ Kéchéé éche nhóbeé baab éesaá chöm éche Sáñgwéé áhóbé aá nhóbe. Nzé nkume' ekáá á tâl áhóbé kékchée baab, né nhóbe nêngáne eyókél é mod. ¹⁸ Ngáne édií bárndé bad hín békume ekáá á tâl née bad bé nköjsé, mémpé mëbél melemlem. ¹⁹ Nyébën nyéhóbéé bárndé debýéé dën-eé nyékudé, né ábélé nyékobe ne menyinje kékchée éche e'yókél é' bad éhóbéé. ²⁰ Ké mod átimté' nyé nêngáne ntâñ, ké ádyág nyé bwëm áyäł, ké'e ádogé nyé, ké'e áchägté yälmín, ké'e ábom nyé abén ásô, nyékobe mó. ²¹ Akwágké ákobé me nén, sénkénwóngé ene ndín e nlém abel nyé échê ndín é mekan á yäł.

Nhóbe baȏb nê̑ngáne eyókél é mod. Měbē kúmbe, nkumé-’e ekáá á tâl áyāl e mekan míme mbeléé melemlem nê̑ngáne bembapee bé nlómag bé metóm békelyé. ²² Bélángé nyé bán bédíi bad bé Hibru běn, mémpē ndíi mod a Hibru. Béhóbé bán bédíi bad bé Israel, mod a Israel móo mémpē ndíi. Béhobe bán bédíi bad bé mbyaa míme Abrahamé, mod a mbyaa míme Abrahamé móo mémpē ndíi. ²³ Béhóbé bán bédíi bembalede ábe Yesu Krístæa, mémpē nlâ̑nge nyé meé mbelé nsón tómaa bó. Nhóbe’ baȏb nê̑ngáne mod awé nló méesáa’é áte. Mbelé ntú n̑ ngíne tómaa bó, nkénké á mbwög ngen ne ngen tómaa bó, nkénkùd mbéte é ngíne tómaa bó, nkémbé-’e á nsəl n̑ soj ngen ne ngen tómaa bó. ²⁴ Bad bé Israel békébōm me ntój ngen eláán. Ngen póg bad bémpeé békébōm me meláá káón běpōn me awíu. Stíma ékékunnéd sé á edib é nkwé-te ngen eláán. Póndé póg nhoo’áá á edib é nkwé, nén dêmbenléd áyāl e epun ehóg ésyāel, nkuu ne mûte. ²⁵ Nkénké meke bwâmbwam. Á meke-tê wê, e’dib éképōn me ahóod. Mponé alongé abód ámekáá míme bechib, ámekáá míme ábêm bad bé Israel ne ámekáá míme bad ábe béesé bad bé Israel. Mponé alongé abód ádyad ámbáá, mpōn alongé abód áehyâ̑nge, mpōn alongé abód áedib é nkwé te, mpōn-ne alongé abód ámekáá mé bad ábe békébé bán bédé bad bé Krísto áde béesaá. ²⁶ Mbelé ntú n̑ ngíne, nnâ̑ngé epin ngen ne ngen. Donge á póndé meewoo’áá chom éche ídyágké ke’e ké chom éche mmwágké, meeyogke’áá-’e póndé awón âdyé ndyéed. Donge á póndé ahéb ábágáá me á yĕl bwâmbwam meewoo’áá-’e chom éche nhágké á yĕl. ²⁷ Ámín e mímén mésyāel, nwóo mímé nlém áte mbwe-té ânɔn mwembé n̑syāel míme ndé ásé echém bwâm. ²⁸ Nzé mod eewúu áte áyāl e mekan mé Dyōb, mbelé nwóo yĕl áte melemlem ngáne mómpē áwógeé. Nzé békelté mod mbéb, mbelé nwóo ndutul bwâmbwam.

³⁰ Nzé ñtâŋgéné ekáá akum á tâl, né chõm éche ñtâŋgéné ekáá akumen á tâl édíí mekan ímme mébele' boŋ bad bényín me nêŋgáne mod awé eewóo ngíne. ³¹ Dyöb, Sáá awé Sâŋgú Yesue, abíí aá meékâlëe metóm. Mekënag mébê ne mó á ngíndé ne á ngíndé. ³² Ade mbédé á dyad á Damaskos, nkamlene awé ambé ásē e kâŋ Arëtase ambané sánze ânɔn nsəl mé e'ké í dyad rísyääl âbel boŋ békôb me. ³³ Bad bénhë me á elój-tê, bébídéd me á wínde eché ebédé á eséd éche ênlæŋnéd dyad, bésüdéd me á ndɔɔb, dɔɔ rínyágté boŋ nkë-'e.

12

Dyōb álúmté Paalε mekan á ndóg-te

¹ Měbē nkumé ekáá á tâl. Kénée édíí bán nê déewōngānné. Boj měké á'sō âláa nyé tâhgene ndóó éche ínyíné ne mekan ímme Sángwéé álúmté me. ² Mbíí dyam áde dêmbenléd ne mod awé adúbpé Krístæä nhóó. Dyôm á mwé ne ñniin áde átómé ámbid, Dyöb dênsog mó ákéen mó ádyöb á ndágke eché etómténé achab ámín. Meebíí'é ké anké áwed á ekob é yäl k'ë á edædæñ, Dyöb dôo ábíí. ³ Mbíí'-ë chööm éche ébénlédé ane mod áwed, kénée méébíí'ë ké á ekob é yäl dôo ábédé k'ë á edædæñ, Dyöb dôo ábíí. ⁴ Krístæä ansog mó, ákéen mó á Paradis. Áhed Dyöb dénlâa mó mekan ímme eemwagké áá moonyon a ekob é yäl áhôb wéé bad bémpée. ⁵ Áyâl e ene ndín e mod dôo mékummé ekáá á tâl saké áyâl echém chën. Chööm éche mékuménné ekáá á tâl édíí mekan ímme mélûmte' bán nwóó yäl e moonyon. ⁶ Boj k'ë mendæñ k'ë ekáá akum á tâl, méenyínédté néé eyökél é mod áyâle mbále chôo mékanlé. Méekuménné échê ndín é mekan ekáá á tâl ábel boj nyéebâgë me edûbé áyâle échê ndín é mekan. Boj pen ndáé meé nyétêd me ngáne ñdíí áyâl e mekan ímme mbeléé ne ímme n'yágteé nyé. ⁷ Boj ábel boj meebag kúmbe áyâl e mímé mekan mé menyáké ímme Dyöb álúmté me, boj ábel-le nwóó, Dyöb dêmbeñ aá ñwôj nkole á yäl mó mbelé'áá me ñwôgë e'we bwâmbwam. Mmén nkole mbédeé néé mésénze mó Satane álomé átaged me ábel boj meebag kúmbe. ⁸ Nkánné wéé Sángwéé ngen éláán, ñchâa mó meé ákoben me mímén metake. ⁹ Boj chööm éche ánlâa'ë me ébédéé aá, "Nsímé mó mbaagé we ñkwogé we. Nwédé we áte nyaa eché étoméé metake mésyâel áte mó ewóó. Áyâle á pónde eché ngíne éebâgké mod áte dôo echem ngíne éwônganné mó áwéed mó áte." Bœb-poó, měbë menyinje ákum ekáá á tâl áyâl e mekan ímme mélûmte' bán ndíí moonyon a ekob, ábel boj bad bénŷin nén bán ngíne eché Krístæä édë me áte, chô-'áá ewéde me áte. ¹⁰ Né-oo, á yäl e Krísto, mbelé mbé menyinje k'ë áde méewúú'ë áte, k'ë áde bad bésyâë'ë me, k'ë áde mekan mélénlédé me áte, k'ë áde bad bétagteé me k'ë áde ñdíí á ndutul tê. Nhóbe nén áyâle pónde k'ë ehéé áde méewóó'ë ngíne, Krístæä abelé ábë me ngíne.

Paalé atôntan mwembé míme ndé á Kôrinto

¹⁴ Boob ndé mbojsén âpé áwēn ngen éche élonténé éláán boj pen méetagédté nyé. Mée pagké ábel boj nyébage me bwém boj nyébén-éé nyékéá boj ímpag. Nyétángéné abíi nén bán besáá ne benyaá bé bǎn bóo bétángéné ábab bán atógen saké bán bétágné benyaá ne besáá. ¹⁵ Měbē menyiñge ábənled kékheé éche íwóó kááyne yáll echém, áwóñgen nyé. Nzé ndé nyé bwâmbwam, nédē nyémpé nyéetángeneé me adəy bwâmbwam-é? ¹⁶ Nyébén nyébíí nén bán menkéntagédté nyé, boj mod ampée ahóbé áá membé akwâb, ídogné-’e nyé metóm. ¹⁷ Chán mēndogké nyé? Bad ábe ménlommé áwēn menláá bó mée bédog nyé-ye? ¹⁸ Mencháj Tituse mée ápé áwēn, nlómén-ne mó aníníí mwănned á Krísto. Nédē nyéhób bán áde Tituse ápédé áwēn, andog nyé-ye? Éesaá mbále nén bán sé Titus sêwoó mewémten mehóg-é?

¹⁹ Kapóg enén póndé esyáél nyéwêmtan bán sêhede échede yael nzom asuud ahób áde séhóbeé bán sêkânlé nyé mbále. Éesaá nê, kékchéé éche sélângéé nyé sélângé nyé chó néé bad ábe Krístæ ályágteé, Dyöb-pe áwóge' chöm éche séhóbeé. A-baányaŋ bé edənge, kékchéé éche sêbeléé, sêbele chó âwéd nyé áte. ²⁰ Mbáa' nén mée áde mépeé áwen mêtán néé nyébeléé mekan ímme méedə́é, mē-’e ámpē mëbel mekan ímme nyéedəngé. Mbáa'

nén meé áde mépéé, métān ngáne nyéběn ne běn nyésenlēé, nyésídeé nhóg ne aníníí, nyélijnēé nhóg ne aníníí, néé nyeedə́é bán mod ampée awón̄ edúbé, néé nyésyâjñéé, nyéhóbeé nhóg ne aníníí ámbid, néé nyédií kúmbé, néé nyébeléé-’e mam mé epuutéd.
21 Mbáa’ nén meé áde mépéé áwēn ámpē, Dyōb déwōgēd me e’sôn áwen é’sō. Mësudénné áyäle bad híin átîntê echên bédíi békabéle’ mekan mé mbéb ríme békabéle’ áá bɔób, ésebán békabélan ádab abé dé mbéb ábel ngáne Dyōb áhedeé. Békabéle’ mekan mé mbinde, békabé mesón, békabéle-’e mekan ríme mbinde ríme méwógte bó e’sôn.

13

Paalε abagé elébé é asóg

¹ Nén délõntēn ngen éláán áde m̄pagké áwēn. Éténlédé á kálag e Dyōb nén bán, “Nzé békáadte mod bétáŋgéné awóğ wéé mbónj ébe ké’ e éláán.” ² Áde m̄empéé áwēn ngen éche énlõntēn ébe, menláá nyé meé mékōgsen bad ábe bébele’ mbéb átíntê echēn. Ndíi nlâŋge-’e bó bøob, nlâŋge-’e bad bémpeé ábe bómpe bébele’ mbéb, ké bøob áde méesaa ne nyé. Áde m̄epéé ámpē, méewóggé modmod ngøl. ³ Ene póndé dðo nyébii’ e bán kékheé éche níhóbeé éhúú ne Kr̄istæ. Éesaá nén bán Kr̄istæ eewúú’ e áte áyāl e chōm ésyāl eche ábeléé, boj alûmte’ eche ngíne átíntê echēn. ⁴ Édé mbále nén bán Kr̄istæ nêŋgáne moonyon, enkênwóngé ngíne áde bêmboméé mó á awøg. Boj kénê, adé á alongé bøob, áyāle Dyōb dêmbeñléd eche ngíne âbane mó á alongé ámpē. Abé áde sédíí mod nhóg ne Kr̄istæ, sémpē nêŋgáne baányoŋ séewúú’ e áte. Boj sémpē séebé á alongé ne Kr̄istæ á ngíne e Dyōb, sébélē-’e nyé chōm ésyāl eche sétáŋgéné nyé abele.

⁵ Nyé mod téé mwěn átōŋ yěl asimén, ábíi ké alongé ádēn ádē nêŋgáne alongé á bad ábe bédúbpé. Ndúbpé meé nyé mod téé abíi nén aá Yesu Krístəa adé mó áte. Nzé nyé mod téé asimnén yěl né nyéebií nén bán á mbále nyêdé ne Krístəa. ⁶ Ndúbpé meé nyêchemé nén bán nsón mme sébeléé nílumte nén bán sédíi bembapéé bé nlómag bé mbále. ⁷ Sékânné Dyōb nén bán nyéebél’ awusé ké ahóg. Séekânnéé nê abel boŋ bad bénýñn bán sédíi bembapéé bé nlómag ábe békéle mímab nsón bwâm. Boŋ pen, sékânné’ nén bán, nyébélé mekan nyaa eché etângéné kénée édíi bán donge á bad bélhōb bán séelûmtéé chômchöm éche élumte’ bán sédíi bembapéé bé nlómag ábe békéle nsón bwâm. ⁸ Édé nén áyâle séehéleé-se sébél dyamdyam áde átângan nkalaŋ mí bwâm mí mbále. Boŋ pen chöm éche sébeléé édíi âwóngen bad ábíi ne ábel ngáne nkalaŋ mí bwâm írhóbeé. ⁹ Sébelé sêbé menyinje nzé sênyíné nyébélé mekan mme mélumte nén bán adúbe áwúú nyé áte, ké sépen sênyinnéd bán séewúú’ áte áyâle séenyinéé nzom ké pög âkogsen nyé. Sékânné’ nén bán Dyōb áwóngen nyé mímén mbeltéed míbê bwâm ne abé dën. ¹⁰ Nén dóo ákáá boŋ ñtelé’ mímén mekan, kénée édíi bán meésaá ne nyé. Ntenle nyé ábel boŋ nzé mpedé áwén meébënlâd ngíne eche Sângwéé ábágé me ákáne nyé áte. Kunze eche Sângwéé ábágé me edíi ábel boŋ írwóngen nyé áwéd nyé áte saké ábel boŋ míbënléed chó âsuded nyé.

Melenten mé asóg

¹³ Nkânné' nén mée nsimé míme Sángú Yesu Krístæ, edærge é Dyöb, ne nlatén míme Edéadæn éche Esáá épëeñéé, béké ne nyé.

**Kálag echě Paale áténlé
Baá Galesia
Ndibned n̄ kálag**

Békálé'áá nkalaŋ mí bwām tāŋgēne Yesue átintē e bad ábe béesě bad bé Israél, bad bēnköb-pe mó. Atoté démbid áyāl e mímén nkalaŋ áde áhóbe ké mod atāŋgéné mbéndé e Mosseš ahíd ábel boŋ ákoŋ mod a Krísto abé. Paale alúmté áte nén aá chōm éche ékəe' boŋ mod ákud alongé áde Krístəe ábagę́ édii adúbe áde áwóó. Boŋ átintē e mwembé míme míbédé a dyad á Galesia, dyad á mbwóg e Roma e Esia Maino, bad bēbédé ábe bétáŋgánnáá ayáge áde Paale, běhōbē nén bán mod atāŋgéné ahíd mbéndé e Mosseš ábel boŋ ákobned á'sō e' Dyōb.

Kálag echě Paale áténlé mwembé n̄ Galesia ebédé ábel boŋ bad ábe běhídé'áá adúbe áde déetáŋgēne bétim ámbid běhíde adúbe á mbále.

Paale aboótédé enén kálag álumed bad áte kunze echě awóó ábē mbapęe a nlómag awě Yesu Krístəe. Alúmté áte nén aá abé áde módií mbapęe a nlómag áhúú ne Dyōb saké ne moonyoŋ. Alúmté'-e áte nén aá míme nsón menkoŋ abé abel nsón átintē e bad bé Israél. Ahóbé'-e ámpē nén aá adúbe démpen dōo ákəe' boŋ bad běkobned á'sō e' Dyōb. Ásoged enén kálag, Paale alúmté áte nén aá abé á mod a Krísto ákag ne edəŋge éche ehúú mó á nlém tē, adúbe áde ádúbpé Krístəe.

Nkabtéd n̄ kálag

Ndibned n̄ kálag 1.1-10

Kunze echě Paale áwóó ábē mbapęe a nlómag 1.11-2.21

Nkalaŋ mí bwām mé nsimé n̄ Dyōb 3.1-4.31

Kunze e mod a Krísto ne chōm éche átāŋgéné abel 5.1-6.10

Nsógtēn 6.11-18

Paale alómé melenten

¹ Mē Paale, mbapęe a nlómag nhógoŋ, mē-eé ntelé enén kálag. Saké baányoŋ běpwédé mē ábē mbapęe a nlómag. Meébenlád-taá kunze e moonyoŋ. Boŋ mímém mpwedtéd níhúú ne Yesu Krístəe bó Dyōb Titée, awě apuúdté mó. ² Mměn ne bad bé Krísto bésyāel ábē bédé ne me hén, sélomme' mwembé n̄syāel míme níde á Galesia melenten. ³ Nsimé ne nsaj n̄ Dyōb Titée awēd bó Sáŋgú Yesu Krístəe míbē ne nyé. ⁴ Nyébíí bán Yesu Krístəe abagé eche yǎl áwé áyāl e mímed mbéb ábel boŋ áhûd syáne á mbeltéd míme mbéb míme níde á nkōŋsé-te chii. Abelé nē áyāle nē dōo Dyōb Titée ántii'e. ⁵ Mekənag mébē ne Dyōb á ngíndé ne á ngíndé. Ébē nē.

Nkalaŋ mí bwām mémpēe méesaá

⁶ Dyōb ápwédé nyé ábē ábē bad ámbid e nsimé míme Yesu Krístəe ábénlé nyé. Boŋ édé mē e'kōmtēn é' yǎl-áte ányín nén bán nyéwámséné Dyōb atede, nyéhíde ayáge démpēe ádě nyéwémténé bán ádě nkalaŋ mí bwām. ⁷ Nkalaŋ mí bwām mémpēe méesaá. Baahóg bédé ábe běpuutad nyé. Béhede nkalaŋ mí bwām míme Yesu Krístəe ahəŋlen. ⁸ Boŋ níláa nyé nén mēé, nzé kē sé, kē'e ángel ehúú ádyōb boŋ ekānlé nyé nkalaŋ mí bwām míme níde nhəŋlén ne míme sénkaléé nyé, e'dim é'bē ne mó. ⁹ Sém̄mád nyé aláa, nlâŋge'-e nyémpē mēé, kénzéé awě akānlé nyé nkalaŋ mí bwām míme níde nhəŋlén ne míme sénkaléé nyé, boŋ nyékōb-pe, e'dim é'bē ne ane mod. ¹⁰ Ngáne n̄hōbē nén, nyéewémtán nén bán nhede' mēé baányoŋ běchäge' mē dīn á bwām. Meéhēdē n̄. Dyōb dōo n̄hede' mēé áchäge' mē dīn á bwām. Nzé émbē nén bán ndíi nhede mēé baányoŋ běchäge' mē dīn á bwām, né meéesaá mbəledē awě Krístəe.

Nkalaŋ míme Paale níhúú ne Krístəe

¹¹ A-baányaŋ, nhede' meé nyébíi nén bán nkalaŋ mí bwâm míme íkánlé nyé, méēhū'ú'ne moonyonj. ¹² Moonyoŋ ké nhóg eelâŋgeé me mímê nkalaŋ, modmod eeyágte'áa me. Boŋ Yesu Krístæ mwěn móo alúmté me mímê mekan áte. ¹³ Nyêwogé ngáne ádêm alongé démbéē ngen e'só ádë nhídé'áá mbeltéd mí bad bé Israël. Nyêwogé nén bán ntagté'áá bad bé Krísto ne nhel ísyääl. Nhédé'áá meé mímad bó moosyääl. ¹⁴ Nhídé'áá ayáge á bad bé Israël tómaa běd bésyääl ábe syáābō sêbédé kôd. Menwóŋ'-e kén áte bwâmbwam âhid elem éche ábëd betaa. ¹⁵ Boŋ kéníeé ébédé nê, Dyöb démmäd me apwed né bëechyáá'é me. Anchélé me ne mímë nsimé, ábële mó. ¹⁶ Anlúméd me awe Mwän âbel boŋ íkanle bad ábe béesë bad bé Israël nkalaŋ mí bwâm míme ane Mwän. Áde ábélé nê, menkëntánné modmod meé áyéged me dyam áde ítâŋgéné abel. ¹⁷ Boŋ ábwög-ábwög menkë á mbwög e Arebia. Ámbid e póndé, mentím ámbid á dyad á Damaskos. Menkënkaá'-áa ké á Jerusalem áke dényin bad ábe bénsebë bembapës bé nlómag abé. ¹⁸ Ámbid e mwë ñláán dôo nkíi á Jerusalem ânyín Petro.* Membé ne mó áwed dyôm dé e'pun ne é'taan. ¹⁹ Menkënyínné mbapës a nlómag ampée ké nhóg ésebë Jemse, Sângú Yesue mwânyan. ²⁰ Mam míme ítlenleé nyé méde mbále. Dyöb ábíi aá saké metóm móo íkaleé. ²¹ Áde ínhúú á Jerusalem, menkë á mbwög e Siria ne á mbwög e Silisia. ²² Ene póndé né bad bé Krísto bé mwembé mé myad mé mbwög e Judeya bëebii'é me. ²³ Béwogé'áá wógén bán, "mod awë ahágé'áá bad bé Krísto á meséb mwěn atimé boob akanle bad aá bad bédûbe Yesu Krístæ, melemlem mé adúbe míme áhédé'áá abóded." ²⁴ Dyam áde Dyöb ábénlé me dêmbël békéné'áá Dyöb.

2

Bembapεε bé nlómag ábínií
béchémé nsón míme Paale

¹ Ámbid e dyôm á mwé ne íniin, menké á Jerusalém ámpē. Ene póndé menké áwed ne Banabase, menwálé-’e Titusé áyāl. ² Menké áwed áyāle Dyōb dénhōb aá nké. Áde ímbédé áwed, syáabe belyáged bé mwembé sénké kun. Mentánléd bó nkalañ mí bwâm míme ménkaléé bad ábe béesé bad bé Israél. Membel nê âbán nén nsón míme míbélé, ne míme índíi mbele’, méebōj’ ngên. ³ Bénkób dyam áde ménlāá’é bó. Ké Titusé awé ambé mod a aloj á Grikia awé abédé ne me, bénkênyágédté mó nén bán bétângéné mó ayag. ⁴ Kénê, donge á bad bé metóm ábe bénsoł átîntê e bad bé Krísto byánán bómpé bédé bad bé Krísto békédé’áá bán býag mó. Ábê bad bénsoł átîntê echêd á mesoɔm-tê ábel bénŷin ngáne débeléé mekan ne kunze esyaøl áyāle syánē dedé ne Yesue. Békédé’áá bán débê betâj, déhíde’ mbéndé e bad bé Israél. ⁵ Boj sénkênháá bó etâl kéké mwâmpin, áyâle sêhédé’áá nén bán nyébê nyébíi ngáne mbále e nkalañ mí bwâm ékoó abé.

Paale akánné Petro áte á dyad á Antyög

¹¹ Áde Petro ápédé á Antyøg, menkáné mó áte átîntê e bad áyæle abelé'áá dyam áde déeboo. ¹² Áde ápédé áwed peén, ammentén ndyéed adyé ne bad bé Krïsto ábe béesë bad

* 1:18 Petro: Kálag é só éwóó Səpase. Ádé dín ádíi melemlem néé Petro.

bé Israel. Boj áde donge á bad bé Israel békídé wéé Jemse á Jerusalem boj bępe á Antyog, Petro ambootéd mekuuadol ámbid. Eedyáge'aá ndyéed ámpē ne ábę bad ábe béesę bad bé Israel. Ambel nê áyäle abáá' áá epsepé é bad ábe békóbé' áá bán bétáygnéne bad ábe béesę bad bé Israel ayag. ¹³ Nê dêmbeł bad bé Israel ábe bémbeł bad bé Krısto bómpe bémbootéd mekuuadol ámbid. Kéáyngne Banabase mómpē anhíd bó ábel ádē awusé. ¹⁴ Áde ínyiné nén meé bęebelę mam ngáne nkalaŋ m̄ bwám ínhbęé aá bębel, menláá Petro á'sō wéé bó moosyäel meé, "Kénéé édii mod a Israel, etëdté mbeltéd m̄ bad bé Israel, ebélé mam bɔob née bad ábe béesę bad bé Israel. Chán-nō éhèle ényägtę' bad ábe béesę bad bé Israel áhíd mbeltéd m̄ bad bé Israel?"

¹⁵ Sóo běn awě dedé bǎn bé Israel se á nchyáátén, deésaá née bad ábe béesę bad bé Israel ábe débíí nén bán bęebíí' é mbéndé é Dyöb. ¹⁶ Boj kénê, debíí nén bán Dyöb déekobéé mod née mod awě asáá áyäle áhídeé mbéndé. Adúbe áde mod ádúbpé Yesu Krıstəe dō ábel' boj Dyöb ákob mod. Né-óó ké syánē ámpē dedúbpé Yesu Krıstəe ábel' boj Dyöb ákob syánē áyäle adúbe áde dédúbpé Yesue saké áyäle dehíde mbéndé. Dyöb déekobéé modmod áyäle áhídeé mbéndé. ¹⁷ Ahed áde déhedeé bán désâj á'sō é Dyöb áyäle adúbe áde dédúbpé Krıstəe, ábel' donge á bad bé Israel bénýiné' syánē née bebel békóbé áyäle deehídeé mbéndé é bad bé Israel ámpē. Nédē élümte' bán Krıstəe móo abelte' syánē mbék-bę? Aáy, nê déeheléé-se ábę. ¹⁸ Boj nzé ntimé ámbid ámpē boj nhíde' mbéndé éche mémmodaté atede, né nkwedé mbéndé. ¹⁹ Nzé békídé mbéndé chó ne chó, né nwédé. Né mbéndé chén-naá ewúú me. Boj Yesu Krıstəe anhúd me á mbéndé-te, ábel ínhel Dyöb abele. ²⁰ Awé áde Yesue ánwéé á awög ádē nén bán mémpē menwé. Meésaá á alongé ámpē. Krıstəe mó adé me áte. Né-óó, kékheé éche m̄bęleé á nkörjsé-te wén bɔob, m̄bęle' chó ne adúbe áde índúbpé Mwän a Dyöb awě adáá me, boj awé-'ę á nló m̄mêm. ²¹ Meésaá nhög awě ahèle ahób nén aá nsimé í Dyöb meesaá dyamdyam. Áyäle nén, nzé émbę nén bán Dyöb áhèlesé ákob mod áyäle ahídé mbéndé, nédē né Yesue awédé á awög ngén.

3

Mbéndé káká adúbe

¹ E'yökél é' bad bé Galesia. Nlem áhéé adyédé nyé nén? Nyéekamtánné ngáne ménlümédté nyé áte nén meé, Yesue awédé á awög á nló m̄me nyé moosyäel-ę? ² Ndę́ meé n̄seded nyé dyam ahög. Póndé eché nyékudé Edəadəj éche Ésáá, áyäle nyéhídé' áá mbéndé e bad bé Israel dō nyenkudté chó-yę? Ngé áyäle nyéndubę́e nkalaŋ m̄ bwám m̄me nyénwögke? ³ Chán nyédíí eyökél nén? Née nyémáá abooted dé abel ngáne Edəadəj é Dyöb éhedeé, mbeltéd m̄mén íhedeé atim á asög hén bɔob ngáne mewémten mé baányoŋ íhedeé-yę? ⁴ Nyékudé metake áde nyédu bpé Krıstəe. Nédē m̄m̄ metake médé ngén-ę?

⁵ Dyöb dêmbeł nyé Edəadəj éche Ésáá, ábel-lę menyáké átinté echén. Áyäle nyéhídé' áá mbéndé dō dënökęj boj ábel né-yę? Aáy, saké nê dënökęj. Nkalaŋ m̄ bwám m̄me nyéndubę́e móo ménökęj boj ábel nê. ⁶ Nyénøne mod née Abrahamę. Éténléde nén bán, "Andubé Dyöb. Nê dêmbeł, Dyöb dënökob mó nén mod awě asáá." ⁷ Nyésöñten-nóó nén bán bad bęsyäel ábe bédúbpé Dyöb ngáne Abrahamę ándubę́e bóo békóó bán ábe Abrahamę abé. ⁸ Eyale é Dyöb énhöb á'sō e' póndé nén bán Dyöb dékob bad ábe béesę bad bé Israel née ábę bad áyäle bédúbpé mó. Nén démbyę́en bootyā póndé eché Dyöb dénláá-'ę Abrahamę aá, "Méénaméd meloj mé nkörjsé mésyäel ámbid echöhj." ⁹ Né-óó Dyöb dénaméd moosyäel awě adúbpé mó melemlem ngáne ánnamédté Abrahamę.

¹⁰ Nyébíi-'ę nén bán e'dim é'dé ne baásyäel ábe békídé nlém nén bán ahíd á mbéndé dō débél boj Dyöb ákob bó. Éténléde á kálag e Dyöb nén bán, "E'dim ne kénzéé awě eehídé' mbéndé ésyäel éche éténléde á kálag e Dyöb." ¹¹ Bɔob-poo élümte nén bán modmod eekobnádté á'sō é Dyöb áyäle áhídeé chom-ęe mbéndé éhedeé. Nhóbe nê áyäle éténléde nén bán, "Bad ábe békobnádté á'sō é Dyöb áyäle bédúbpé, béküd alongé áde déemaá."

¹² Mbéndé eewoo' é dyamdyam ábel ne adúbe. Éténléde á kálag e Dyöb nén bán, "Nzé mod ahide' mbéndé ákud alongé, atängéné mbéndé ésyäel ahíd." ¹³ Boj Krıstəe ahúdé syánē á e'dim ábe dékudé á mbéndé-te. Éténléde á kálag e Dyöb nén bán, "E'dim ne kénzéé

awe bébómmé á awəg.” Né-ɔ́, áde bébómmé Kr̄istəə á awəg, ampém e’dim áyəle mbéb ímmēd. ¹⁴ Yesu Kr̄istəə ampém e’dim âbel nén, bad ábe béesé bad bé Israél békud nnam ímme Dyōb dénhōbpē aá, Abrahame ákūd. Nê ákáé adúbe áde dédúbpé mó, ábélé syánē ámpē dékudé Edəádəŋ éche ánhōbpē aá móðbě syánē.

Mbéndé ne dyam áde Dyōb dénhōbpē aá móðběl

¹⁵ A-baányaŋ, ndéa méé nítēd nhægtén ne mekan ímme mébənlad epun téé. Nzé bad béké bétédé nsəl, boŋ bétíidé dyam, bérpédé-’e á nchemten, modmod ééhēlē-’e se ahúd dó ásē. ¹⁶ Dyōb démbé Abrahame ne mwān akag. Kálag e Dyōb eehóbeé nén aá, “bán” byánán bad békúú áte. Ehóbé nén aá “mwān.” Kr̄istəə mó-’aá adé ane Mwān. ¹⁷ Chōm éche nkoo’é ahób édīi nén Dyōb démwē melé ne Abrahame Dyōb áhōb-pe aá móðlōnēd ádē akag. Mbwókel é mwé éniin ne móom mé mwé méláán, ámbíd e nê, dó Dyōb ábágé Mosee mbéndé. Échē mbéndé éehelé-’e se ébóó ímmē melé, se éhúd dyam áde Dyōb áhōbé ásē. ¹⁸ Nzé émbé nén bán, Dyōb ábage’ nyé kékéé éche átāngéné ábē bán abé áyəle nyéhídeé mbéndé, né ímmē nnam ímme ábageé nyé méesaá ámpē áyəle dyam áde ánhōbpē aá móðbělé Abrahame. ¹⁹ Cheé-ő émbé nzəm eché Dyōb ábagné mbéndé? Ambé chó álúmed bad chōm-’e abel dé mbéb ákoo abé. Ene mbéndé entāngén-ne abé káéj ne póndé eche mwān a myaa ímme Abrahame awé Dyōb démbéenné akag ántāngénē apé. Dyōb démbé mbéndé wéé ángel ábe Mosee. Mosee mó abédé mod-a-tinté a baányoŋ ne Dyōb. ²⁰ Baob-poó mod-a-tinté ahednad nzé bad bédé mbíd ébe. Boŋ Dyōb démbé Abrahame akag ne mó mwěn, áde mod-a-tinté éesaá.

Nsón ímme mbéndé éwóó

²¹ Nédē nén álumte bán mbéndé epentan akag á Dyōb-e? Aáy, éesaá nê mbé. Nzé émbé nén bán mbéndé embé eché ebage alongé áde déemaá’, né desáá á’sō é’ Dyōb ahíd áde déhídeé chó. ²² Boŋ kálag e Dyōb ehóbe nén aá, mbéb nháá nkōjsé nísyāəl. Né-ɔ́ ndé eché Dyōb dénhōbpē aá móðbě, abagé chó wéé bad ábe bédúbpé Yesu Kr̄istəə. ²³ Á póndé eche Kr̄istəə éépédé, mbéndé enhaŋ syánē, dembé-’e ásē e mbéndé káéj ne á póndé eche Dyōb dénlūmēdté nén aá bad bésüm nlém wéé Kr̄istəə. ²⁴ Né-ɔ́ mbéndé chó enɔné’áá sé káéj ne póndé eche Kr̄istəə ápédé ábel nén Dyōb ákob sé áyəle adúbe áde sédúbpé Kr̄istəə. ²⁵ Baob áde póndé épédé eché détāngéné nlém asum wéé Kr̄istəə, chōm éetāngeneé abé éche énɔne’ sémpē. ²⁶ Nyé moosyāəl nyédií bán bé Dyōb áyəle adúbe áde nyédu bpé Yesu Kr̄istəə. ²⁷ Nyékudé edusen, né-ɔ́, nyéde mod nhógb bɔob ne Kr̄istəə, nyéwóó-’e kunze bɔob néé mó. ²⁸ Né-ɔ́ nhænlén méesaá ken mod adé mod a Israél, ken mod eesaá mod a Israél, ken mod adé ntâŋ kéké kunze, ken mmwaád-e kéké mwenchóm. Nyé moosyāəl nyédií mod nhógb áyəle nyédu bpé Yesu Kr̄istəə. ²⁹ Ngáne nyédií bad bé Kr̄isto, nyédií bán ábe Abrahame, nyéekud-te nnam ímme Dyōb dénhōbpē aá móðbě Abrahame.

4

¹ Chōm-’e nhóbeé édé nén, mwān awé saá átíidé aá móðdyé eche mbwógs, nzé adíi adé mwéndem, abelé abé néé mbalede, kénée édii nén bán mó akoó ene mbwógs awón. ² Ene póndé, abelé awón bad ábe belyágnédé mó ne ábe bénonne’ mó ene mbwógs káéj né póndé eche saá átíidé epedé. ³ Melelem nê dó Dyōb syánē démbé-’e néé béndem áde Kr̄istəə éépédé. Póndé eched, ngíne é nkōjsé éntéed syánē ntâŋ. ⁴ Boŋ áde póndé eche Dyōb déntii’ é épédé, Dyōb dénlōm awe Mwān á nkōjsé-te. Ane Mwān ambíd á abum dé mmwaád, ákwōgs-ke ásē e mbéndé. ⁵ Dyōb dénlōm mó ákɔde syánē á mehaŋ mé mbéndé, ábel boŋ syánē détim bán bé Dyōb. ⁶ Abé áde nyédií-’aá bán bé Dyōb, ábélé Dyōb álómé Edəádəŋ é Mwān áwesýánē nlém-té. Échē Edəádəŋ ébélé baob, dechäge Dyōb bán, “A-Té.” ⁷ Né-ɔ́ nyéesaá betâŋ ámpē. Nyédií bán bé Dyōb. Abé áde nyédií-’aá bán bé Dyōb, Dyōb débě nyé kékéé éche átāngéné ábe bán abe.

⁸ Ngen e'só, áde nyénkembíí' Dyöb, nyébédé betâj ásē e myöb míme méesé dyamdyam. ⁹ Boj baōb áde nyébíí Dyöb, ké'e nhâb meé baōb áde Dyöb ábíí nyé, cheé ekáá boj nyéhédé mbíd atimen ábé betâj ámpé ásē e ngíne é nkönsé? ¹⁰ Nyéhíde donge dé e'pun née bín e'mbáá, nyéhíde-'e donge á ngon, donge á póndé áyâle mwé, ne donge á mwé née bín e' mbáá byánán Dyöb dôo nyé bénleé. ¹¹ Nê ábele' ndé mbwó̄g nén meé mbébté póndé áyâle nsón nisyâ̄l míme mbélé áyâle echén.

¹² A-baányañ, ncháa' nyé meé, nyébê née me, áyâle mémpé ndé baōb née nyé. Meésaá ásē e mbéndé ámpé. Nyéebelé-'e me dyam dé mbéb ké ahóg. ¹³ Nyébíí nén bán áde nisébpé nyé nkalañ m bwâm akale, ndyeéné áá nyé áyâle menkendyeé' bwâm. ¹⁴ Kénéé rímêm nkole nhéle' áá mbel nyébáj me áyâl, nyéekembáj' e me áyâl, nyéekennän-naá me. Nyéenköb me byánán ángel e Dyöb chôo nídií, ké'e byánán Yesu Kristæ nídií. ¹⁵ Ene póndé nyébé menyinje bwâmbwam. Héé rímê menyinje médií baōb? Mmén mbide nyé mbón nén meé, á póndé eched, nyéndäj me nyaa eché, nzé émbé nén bán mod ahelé'áasse ahúd mïd ábe waáb, aá ábenlad, né nyénhúd rímén mïd nyébë me. ¹⁶ Nédë ntimé mod a ekoyí awe nyé baōb áyâle nkánlé nyé mbále tângene nkalañ m bwâm-e? ¹⁷ Ábê bad ábe béyâgte nyé ayâge démpée, bêwóo nlém nén bán nyétimen bô, boj bêewôjneé nyé nlém m bwâm. Béhede bán nyéebág ne me ábel boj nyéwôj nlém ábë ne bô. ¹⁸ Ébóó áwój nlém ábel dyam, nzese rímê nlém ndé ábel dyam á bwâm. Ébóó áwój nlém ábel dyam póndé esyâ̄l, saké nzé nyédë ne me démpen. ¹⁹ A-bán bê nlém ábêm, nwóge' e'we baōb áyâl echén, melemlem ngáne mmwaád áwógeé e'we bê achád. Msewô̄g-ke ábê e'we káaj né abé á Krísto ásólé nyé áte bwâm. ²⁰ Mendäj meé mbé ne nyé baōb ábel mbíí ngáne nhóbeé áwén áyâle nyéhjôdté me yâl áte.

Elájjsén éche Hagaa ne Seraa

²¹ Nyé ábe nyéhede abé ásē e mbéndé, ndæá nyé asëded meéken nyébíí chom-éé mbéndé ékoo' e ahób-e? ²² Eténlédé á kálag e Dyöb nén bán Abrahame anchyáá bân bë baachóm bëbë, nhög ne mmwaád a ntâj, anínií-'e ne mmwaád a kunze. ²³ Mwän awé mmwaád a ntâj anchyáá-'e, anchyáá mó nyaa eche moonyoñ áchyáá' e mwän. Boj akag áde Dyöb démbeé Abrahame dôo dënökj boj mmwaád a kunze achyáá mwän. ²⁴ Ábén bebaád bëbë, dehele déhægtén bô ne melë mé Dyöb mébe. Hagaa adé nhægtén ne melë míme Dyöb démwëe ne bad bë Israel á mbaōd e Sinai á póndé eche ábágé Mosee mbéndé. Bad bësyâ̄l ábe bëdë ásē e rímê melë bëdii betâj. ²⁵ Hagaa adíi nêngáne melë míme Dyöb démwëe ne Mosee á mbaōd e Sinai, á aloj á Arebia. Bad bë Jerusalem bômpé bëdii baōb née Hagaa áyâle bô moosyâl bëdii betâj. ²⁶ Boj mmwaád a kunze, adé nhægtén ne Jerusalem awé adé ámîn. Ane mmwaád mó-aá adé nyaá awesýané. ²⁷ Eténlédé á kálag e Dyöb nén bán,

“Á-ekom é mmwaád, we awé weechyáá',
hé esaád é menyinje. We awé weewôgë e'we e' mwän mbêd, wog menyinje áyâle,
we awé awoj nchóm ántedéé, echyáá bân baōb
tómaa mmwaád awé nchóm ádii á ndâb.”

²⁸ Baōb-pōo a-baányañ, akag áde Dyöb démbeé Abrahame ábélé baōb nyéddí bân bë Dyöb melemlem née Aisige. ²⁹ Ene póndé, ébédé nén bán, mwän awe bénchyáá' e nyaa eché moonyoñ áchyáá' e, atägté áá mwän awé bénchyáá á ngíne e Edâadæj e Dyöb. Melemlem né dôo édii káaj né chii. ³⁰ Boj chán kálag e Dyöb éhóbé tângene né? Kálag e Dyöb ehóbe' néa aá, “Nän mmwaád a ntâj bô mwän. Mwän awé mmwaád a ntâj áchyáá eetângeneé mbwó̄g eche sáá adyé nchoo ne mwän awé mmwaád a kunze áchyáá.” ³¹ Né-ó a-baányañ, deesaá bân bë mmwaád a ntâj. Dedii bân bë mmwaád a kunze.

Séesaá á mehaj-tê ámpé

¹ Á mehaj-tê dôo Krísto áhûdë syánë ábel boj syánë deebág née betâj ámpé. Né-ó nyéwëd mekuu ásë, nyéemwâg-ke se modmod ahé nyé á mehaj-tê ámpé.

² Nyéwógleñ me. Më Paale, nlânge nyé nén meé nzé nyéwémténé né bán nzé býágé nyé, né nê débél Dyöb ákob nyé né bad ábe bésáá, né nsón mme Krístæä ábélé méeheléé-sse íwóngén nyé mbéed. ³ Nsimé nyé etúu áte ámpé né nén meé, kénzéé awé akwénténé aá býag mó ábel boj Dyöb ákob mó, atángéné mbéndé ésyääl ahíd. ⁴ Nyé ké ahéé awé awémténé aá mótañgéné mbéndé ahíd ábel boj Dyöb ákob mó, asénlédé ne Yesue, ahúdë-’e yäl á nsimé í Dyöb-te. ⁵ Sé ne sé, Edædæj é Dyöb ébélé selyágé nlém né bán Dyöb dékob sé nêngáne bad ábe bésáá áyäle sédúbpé Krístæä. ⁶ Ken býágé mod-ε, ken býeyageé mod-ε, nê déewoo’é dyamdyam abel ne abé áde dédií ne Yesu Krístæä. Chöm éche édé etógnén édii, ádúbe Krístæä. Ádê adúbe átángéné anyinned ne edænge éche déwójné nhög ne anínií.

⁷ Ngen e’só, nyékeéné’áá mekan bwâm. Nzé-módé ahëjléné nyé nlém á abum aá nyéehide’ mbále e nkalar ím bwâm ámpé? ⁸ Ahëjlen áde nyéhëjléné nlém á abum déeheléé-sse áhúú ne Dyöb, áyäle Dyöb dën dôo ápwédé nyé ábé ábe bän. ⁹ Mod nhög awé adé mbéb átinté echén, mó abébte’ baáb ábíníí bésyääl, nêngáne mbumé í ngun nsonléé nzé béhéded mwä esulten áwëd-te. ¹⁰ Boj pen ndúbpé né nén meé, Dyöb débél nyéehidé ayäge á bad býmpée boj nyéehid ádêm. Dyöb dékôgsen mod ké ahéé awé apuutad nyé, ábé kénzéé.

¹¹ A-baányaŋ, nzé émbé né bán ndíi nkale né nén meé bétángéné mod ayag boj Dyöb dékob mó né mod awé asáá ngáne baá Israel bédúbpé, né cheé ekáé boj bélë me á meséb? Nzé nkalé’áá né nén meé bétángéné bad ayag boj meékale’áá kwéed eche Krístæä áwéded á awäg, né nê déelijséé bad bé Israel. ¹² Ndæ né nén meé ábê bad ábe býpuutad nyé nló áte, békag á’sō, béké béselen yäl e mwenchóm esyääl.

¹³ A-baányaŋ Dyöb dénchélé nyé áhíde á mehaŋ-tê. Boj abé áde nyéesaá á mehaŋ-tê ámpé déebageé nyé kunze ábel kchéé éche échén ekob é yäl éhedeé. Boj pen, nyémod-téé ábénle waáb á edænge-tê. ¹⁴ Nyébèle’ né áyäle nzé béládé mbéndé ésyääl, chöm éche éhóbeé édii néen, “Edæj mwânyoŋ ngáne édáé echoŋ yäl.” ¹⁵ Boj nzé nyéetimé nyékwaglan, nyéwanne-’e nhög ne anínií néen nyam é mehín, nyétéd póndé. Nzé nyéetéde póndé, ne nyéewüü nhög ne anínií ne awúu ásyääl.

Edædæj é Dyöb ne ekob é yäl

¹⁶ Né-ó, nlébe nyé né nén meé nyémwë Edædæj é Dyöb élyágte nyé. Nê débél nyéebeléé mekan me mbéb ríme ekob é yäl éhedeé. ¹⁷ Mam ríme ekob é yäl édáé, méekagkké ne mam ríme Edædæj édáá. Mam-me ríme Edædæj édáé méekagkké ne mam ríme ekob é yäl édáé. Échén ngíne ébe éwane’. Nê ábèle’ nyéehëlëé dyam abel áde nyédaá abel. ¹⁸ Boj pen nzé Edædæj é Dyöb élyágte nyé, né nyéesaá ásé e mbéndé ámpé.

¹⁹ Mbeltéd mé ekob é yäl méeyägtädtéd. Ndíi mbeltéd néen akáb dé mesón, abel dé mekan mé mbinde, akáb dé akwalee. ²⁰ Abele á myöb mémpée, alem, ekoyí, nselag, kónjí, melingá, abun dé e’tál, ngabén, nkabén, ²¹ asíi á bad, sógké e mím, epuutéd ne mbeltéd mé mbéb mémpée néen mímén. Nsimé nyé etúu áte ngáne ménsim-maá bôód néen meé, bad ábe békale’ échê ndíi é mekan békudté nnam mé nkamlen í Dyöb.

²² Boj nzé Edædæj éche Ésáá édé mod áte, chôo ébèle boj ábelé mam ne edænge, ne menyinje, ne nsaj, ne nwesen, ne e’boj bélém, ne abé á bwâm, abé-’e mod awé bad býhele bésüm nlém áyäl. ²³ Edædæj chô-’áá ébèle’ boj mod ásudté yäl, acháé-’e yäl bwâm. Mbéndé éewoo’é dyam ábelen néen. ²⁴ Bad ábe bédé ne Yesu Krístæä býesaá ásé e nkamlen mí mam mé ekob é yäl ámpé. Ébèle ebé byánán býbómmé échab esíi é mam mé ekob é yäl á awäg, éwédé-’e áhed. ²⁵ Ngáne Edædæj é Dyöb ébágé syáné alongé dékôälé, démwë échê Edædæj chén élyágte syáné áyäle chöm ké ehéé éche débeléé. ²⁶ Deényené yäl ámín, déelijsé nhög ne anínií, deesíidé-’e nhög ne anínií.

¹ A-baányaŋ, nzé nyé mod nhóг nyéhúné á mbéb-te, nyé ábe nyédií nyébèle' mekan íme Edəádəŋ é Dyōb éhedeé, nyéteŋgéné née nyewóngéné mó áhúd mó á mbéb-te. Nzé nyewóngan mó, nyéchédēn mó yěl. Boŋ pen, nyétéd póndé ábel nén nyébén ámpē nyéehúné' á mekägsen-tê ábel mímē mbéb. ² Nyewóngan nhóг ne anínií áhíde á ndutulté. Nzé nyébèle nê, ne nyéhíde' ngáne mbéndé e Krístəe éhedeé. ³ Kénezéé awé awémténé aá mótoomténé abé, adoge yěl. Ene ndín e mod eesaá dyamdyam. ⁴ Mod téé átôn yěl asimén. Nzé mod abelé nsón mó bwám, né áwōgēn yěl menyinge. Né éehægtán-aá yěl ne bad bémpée. ⁵ Nhóbe nê áyäle mbeltéd mímmé mod téé ínnone' mén.

⁶ Kénezéé awé býágteé Eyale é Dyōb, aténgéné née áhágké mod awé ayágte' mó chöm é bwám ké éhéé éche áwóó, áwóngen mó.

⁷ Mod eedögē yěl. Mod eewémtán-ne aá móhèle módog Dyōb. Kéchéé éche mod áwéné, chóo áhüdté. ⁸ Kénezéé awé abele mam mé mbéb míme ekob é yěl éhedeé, ábíi aá mímē mam mén mépiinéd mó kwéed. Boŋ kénezéé awe mó-'e abele' mekan mé bwám ngáne Edəádəŋ é Dyōb éhedeé, ábíi aá mímē mam mébél móókúd alongé áde déemaá'. ⁹ Deekómé bwám abel. Nzé deetédnede ábel bwám, né dækúd nnam á póndé eché eténgéné. ¹⁰ Né-oó póndé téé eche etál ébágnédé syáné ábel bwám, débel bwám wéé moosyäel, tanje wéé bánned bé Krísto.

Elébé ne melenten mé asog

¹¹ Nyébén nyényîn mbónj mé e'yale ábé míbénlédé átele nyé enén kálag ne échém ekáá. ¹² Bad ábe békede nyé anyáged nén bán béténgéné nyé ayag, békede nê álumten yěl, ábel boŋ békud dín á bwám á'só é' bad. Bébáa' bán bad békéhág bó á meséb nén bán bétumé akal nén bán, kwéed eche Yesue áwédé á awög chénpen chóo ekäa boŋ mod ákúd e'choóchor. ¹³ Ké bad ábe býágé bén békéhídéé mbéndé, boŋ békede bán býag nyé ábel békume ekáá á tâl nén bán nyékwénténé nén bán býag nyé. ¹⁴ Dyam áde me pen míkuménné ekáá á tâl ádíi kwéed eché awesýáné Sáŋgwéé, Yesu Krístəe áwédé á awög áwed nló. Eche kwéed ebéle mam mé nköjsé méesaá me dyamdyam á díd-te, meewoo'-aa dyam ábelén nköjsé. ¹⁵ Ken býágé mod, ken býeyageé mod-ε, nê déewoo' é dyamdyam ábel. Dyam áde ádé etógnén ádíi Dyōb átimed mod ekóólé. ¹⁶ Nsaj ne ngøl e Dyōb ébê ne bad bésyäel ábe békide ádén ayáge. Ábê bad bôo bédé bad ábe Dyōb ápwédé.

¹⁷ Ásoged enén kálag, nlâŋge nyé nén meé, modmod eetagtán me mímmén mekan áyäle mebar médé me á yěl hén míme mélumte nén bán mbenle Yesue.

¹⁸ A-baányaŋ, nsimé míme Sáŋgú Yesu Krístəe míbê ne nyé moosyäel. Ébê nê.

Kálag echě Paale áténlé
 Baá Efesus
 Ndibned ní kálag

Kálag echě Paale áténlé bad bé Efesus ehóbe' tângene ntíi ní Dyöb, ápœen rímmê nhægtéd nísyääl, ríme ndé á nköjsé ne ríme ndé ámín höm ahóg. Krístæa mó-'aá adé nló ámín e rímmê nhægtéd nísyääl (1.10). Ehóbe-'e ámpē ngáne bad bé Dyöb bétángéné abé nêngáne mod nhóg abé áde bédíí ne Yesu Krístæa.

Á mbooted, enén kálag ehóbe' tângene abé áde bad bé Dyöb bétángéné abé nêngáne mod nhóg. Ngáne Dyöb ápwédé ábē bad, álagsén bó, ahúd-te bó á mbéb-te, mbwiined ne awe Mwän Yesu Krístæa. Ehóbe-'e ámpē ngáne Edædæj éche Ésáá élumteé aá dyam áde Dyöb áhóbé aá móöbél, débenléd. Âsoged, Paale alébé bad bé Dyöb bé Efesus ngáne abé ádab átángéné abé nêngáne bad ábe bédé mod nhóg á dín á Krísto. Paale abënlédé ngan híin álúmed ngáne bad bé Dyöb bétángéné abe abé áde bédíí mod nhóg ne Krístæa.

Nkabtéd ní kálag

Ndibned ní kálag 1.1-2

Krístæa ne mwembé rí bad bé Krísto 1.3-3.21

Alongé dékôdlé ábē ne Krístæa 4.1-6.20

Nsogten 6.21-24

Paale alômmme' bad melenten

¹ Me Paale, mbapœ a nlómag awé Yesu Krístæa ngáne Dyöb áhédé'áá, me-eé ntenle nyé enén kálag. Ntenle nyé bad bé Dyöb ábe nyédé á dyad dé Efesus. Nyédé mod nhóg ne Yesu Krístæa nyéhíde-'e mó ne nlém nhóg. ² Nsimé ne nsaj ní Dyöb Titée awêd ne ríme Sángú Yesu Krístæa ríbê ne nyé.

Nnam ríme bad ábe bédé nhóg ne Krístæa békúdé

³ Débé Dyöb mekenag. Mó adé Dyöb áde awed Sángwéé, Yesu Krístæa, abé-'e mó Sáá. Dyöb dóo ánámté syáné abe áde ábágé syáné bwém é'syääl ábe é'bídé áwé nkamlen rímin. Abelé nén abé áde dédíí mod nhóg ne Krístæa. ⁴ Byánán Dyöb déhág nköjsé, ampwéd syáné ábé ábē bad, abel áde ámbeñlé boj desáj, deewooó-'e atón dé mbéb ké ahóg áwe e'só. Adæj áde Dyöb ádáá syáné, ⁵ démbél antí se' boód aá débê ábe bän mbwiined ne nsón ríme Yesu Krístæa ámbeñlé syáné. Dyöb démbel nén áyæle nén dóo ántí'é aá móöbél ngáne ébójnédé mó. ⁶ Abelé aá débê ábe bän ábel boj dékene mó áyæle mekan mé bwâm ríme ábél. Abagé syáné echě ndale e nsimé ngén. Dekúdé rímmê nsimé abé áde dédíí mod nhóg ne awe Mwän awé ádáá bwâmbwam. ⁷ Abé áde dédíí mod nhóg ne Krístæa ne asyog áde ásyogé rímmê mekií áwesýáné nló, dóo ákáé boj ákodé syáné alagsen áde álágseñé syáné mbéb. Abel áde Dyöb ábél nén álumte syáné bän rímmê nsimé ndé kese e nsimé. ⁸ Abagé-'e syáné mó nyaa echě elóné mbon, ábûd-te syáné debyéé abe, ábél-le desónjtén mekan mésyääl. ⁹ Abelé mekan mésyääl ngáne áhédé'áá aá móbel. Abelé syáné debíí mekan ríme káej ne boob modmod éesónjténéé. Mmén mekan médíí mekan ríme ámbeñlé mbwiined ne Krístæa. ¹⁰ Dyöb átíidé aá móöbél rímmê mekan mésyääl á póndé echě etárgéné. Ene póndé áläd bwém é'syääl ábe é'dé á nkor rí min ne ísé, bébë ásé e Yesu Krístæa mó awé adé nêngáne nló. ¹¹ Dyöb ápwédé sé ábé ábē bad abel áde ábél boj debé mod nhóg ne Krístæa. Ambel nén áyæle ammad atíi se' boód. Abele mam mésyääl mébeñlad ngáne átíidé. ¹² Ambel nén ábel sé ábe sêbédé bad bë e'só ásum nlém wéé Yesu Krístæa séwále abé áde dékæj boj bad bëmpée békëen mó áyæl e echě ngumé echě echabé ámín. ¹³ Nyémpé nyéñwógl nkalaj rí mbále. Mmê nkalaj rí mbále ndíí nkalaj rí bwâm ríme mپíinédé nyé e'soosoj. Nyéndubé Krístæa, nyébé-'e mod nhóg ne mó. Nén démbél Dyöb démbé nyé Edædæj éche Ésáá éche ánhöbpé aá móöbë ábē bad. Échë Edædæj édí

nêngáne e'chem ábe é'lûmte bán nyêdíi bad bé Dyöb. ¹⁴ Échê Edædæj chôô élûmte syánë nén bán deékûd bwëm ábe Dyöb áhôbë aá móôbë syánë. Deékûd ábén bwëm á pôndé eche Dyöb dêhûdtë syánë ábe dedé ábe bad á mehañ-tê. Nén débél bad békéné Dyöb áyâle echë ngumë echabé ámîn.

Mekâne míme Paale

¹⁵ Nwogé bán nyêdúbpé Sângú Yesue, nwogé-’e bán nyêdaé bad bé Dyöb bésyâôl. Né-ô, ¹⁶ nsagnan Dyöb pôndé téé áyâle echê, nzé nkânnad nyé. ¹⁷ Nkânnne-’e meé, Dyöb áde echëd Sâj, Yesu Krîstæ, Titéé a ehûmë ábe nyé Edædæj é debyeé ne é nsônten mé mekan mé e'kojnéd âbel boj nyébii mó bwâm. ¹⁸ Nkânnne-’e ámpë nén Dyöb ákéled nyé nlém á abum, âbel nén nyébii bwëm é’ bwâm ábe nyésummë nlém áyâl, áyâle apwédé nyé. Nkânnne-’e nén meé nyésônten ngâne nnam ímme áhôbë aá móôbë ábë bad ímpédé achab ámîn. ¹⁹ Nkânnad-te nyémpë nén meé nyébii eche ngíne. Ene ngíne etómé bwëm é’syâôl, chô-’aá ewôngan syánë ábe dedúbpé mó. Mmén melemlem mé ngíne eche echabé ámîn, ²⁰ chôô âmbenlédté áde âmpuúdté Yesue, ábël-le ádyéé mó á ekâá émbáá áwë nkamlen ím mím. ²¹ Áhed-taá Krîstæ ákamlanné ngumë ne benkamlené bésyâôl. Áde dñ-në ádé ngíne tómaa mën mé benkamlené bésyâôl, ábe bédé bøob ne ábe bëbë á pôndé echë ehûé’. ²² Dyöb ábágé Krîstæ nkamlen ámîn é chöm ésyâôl, abelé-’e mó awë akamlan chöm ésyâôl, âbë nló, mé elad é bad ábe bédúbpé. ²³ Échê elad é bad ábe bédúbpé bëdîi néé yël echë Krîstæ. Échê elad é bad élôgte Krîstæ mbom, Krîstæ mó-’aá alôgte chöm ésyâôl eche édé këhéé mbom.

2

Dedé á alongé abé áde dédîi mod nhög ne Krîstæ

¹ Ngen e e'só, nyembé nêngáne bad ábe bëwédé áyâle nyéebele'aá mekan míme Dyöb áhôbë' aá aá nyébel, nyébelâá-’e mbéb. ² Ene pôndé nyéhídé' aá mbeltéd mé mbéb mí bad bé nköjsé. Nyêwógné' aá nkamlené awë akamlan e'dædæj bé mbéb ábe é'dé á pemet-tê. Kâejne chii échê edædæj édîi élyâgte' bad ábe bëebelé' ngâne Dyöb áhëdëé. ³ Syánë moosyâôl debédé néé bô, dékôdtë esíí mekan mé ekob é yël. Debél' aá ngâne mekan mé mbéb mé ekob é yël méhédé' aá débel, déhîdë-’e mekan míme mewêmtë mélângé' aá syánë aá débel. Mmén mbéb míme débél' aá mëmbël Dyöb déntângëen syánë ámpë akôgsen melemlem ngâne ántângënnë moosyâôl akôgsen. ⁴ Boj ngâne Dyöb átômténé ngol abé ádëñ-’e syánë bwâmbwam, ⁵ abelé syánë dedé á alongé abé áde dédîi ne Krîstæ, kénée édîi bán dembë néé bad ábe bëwédé áyâle deebelé'aá mekan míme Dyöb dénhôbpé aá débel. Nsimé í Dyöb móo nkâá boj nyékûd e'soosoñ. ⁶ Abé áde dédîi-’aá ne Krîstæ, Dyöb ápúúdté syánë ne mó, adidé-’e syánë hõm ahög ne Krîstæ á nkoy mímín. ⁷ Ambel nén âlûmed syánë ábë e'boj bé nlém mbwiined ne Yesue Krîstæ ábel boj á pôndé echë ehûé', bad bényin ngâne míme nsimé ímpédé nhon abé ñtom-me chöm ésyâôl. ⁸ Nsimé í Dyöb móo nkâá boj nyékûd e'soosoñ. Adûbe áde nyêdúbpé Krîstæ dôo ákâá boj nyékûd ábë e'soosoñ. Saké mekan míme nyébélé mëkâá boj nyékûd e'soosoñ. E'soosoñ ábe nyékûd é'díi nde e Dyöb. ⁹ Saké mekan mé bwâm míme nyébélé mëkâá boj nyékûd e'soosoñ. Né-ô, nzom ké pôg eesaá eche mod átângëné ekâá akum átâl. ¹⁰ Syánë dedîi ekâá é nsón é Dyöb. Abé áde dédîi mod nhög ne Yesu Krîstæ, ábágé syánë alongé âbel boj débele mekan mé bwâm. Nén dôo Dyöb déntî' se' bøôd aá déwôj ene nyaa e abé á alongé.

Abé nhög ne Krîstæ

¹¹ Nyé ábe nyéesë bad bé Israel nyéechatán ngâne nyémbëë bøôd. Bad bé Israel ábe bëchágé yël bán, “bad ábe bëyágé,” bëchäge nyé bán, “bad ábe bëeyagëé.” Boj mmén meyagag mé ekob é yël médîi chöm éche moonyon ábenleé mekáá. ¹² Nyéechatán bán ene pôndé nyénkembíí' Krîstæ. Nyénkembáá nlatén ne echoj é bad bé Israel, bad ábe Dyöb apwédé. Nyénkênwóngé dyam âbel ne melš míme Dyöb démmwëë míme n'lûmte' chöm éche Dyöb dénhôbpé aá móôbël. Abé áde nyémbëë á nköjsé-te, nyénkênwóngé

e'lyág bé nlém hōmhōm, nyénkembíí'-áá Dyöb. ¹³ Bööd nyêñchabnéd Dyöb á yël. Bon bööb abé áde nyédíí nhög ne Yesu Krïstæø, apeéné nyé benben ne Dyöb asyog áde ásyogé mímmé mekií áwen nló. ¹⁴ Krïstæø mwën mó apiinédé syánë nsaj. Abéle bad bé Israel ne bad ábe béesë bad bé Israel bédé mod nhög. Kwéed eche áwédé ehúdé ekøyí éche ébédé átinté echêd. Échê ekøyí ébédéé néé ekâjned éche ênkab syánë áte. ¹⁵ Abelé mbéndé é bad bé Israel énkêñwóngé ngíne ámpë. Ambel nén ábel boj álad bad bé Israel ne bad ábe béesë bad bé Israel bélë néé mod ekóólé nhög awé bóöbðö bélë mod nhög ne mó mwën Krïstæø. Né-óó, abel áde ábélë nén ápéénen nsaj átinté e bad bé Israel ne bad ábe béesë bad bé Israel. ¹⁶ Awé áde áwédé á awög, ábélë syánë dedé mod nhög ne Dyöb, atímté-'ë syánë ásë ne Dyöb. Né-óó, amadé ekøyí éche ébédé átinté e' syánë. ¹⁷ Krïstæø ampë ákanlé nyé ábe nyéësë bad bé Israel, nyé ábe nyêñchabnéd Dyöb á yël nkalañ mé nsaj, ankalé-'ë bad bé Israel, bó ábe bémbe Dyöb benben. ¹⁸ Mekan míme Krïstæø ábélë, mébélë syánë moosyäál dekudé nzii ápe á'sò wéé Titéé. Melemlem mé Edäädəñ ehóg chôó éwöñgan syánë ábel nê. ¹⁹ Né-óó, nyé bad ábe béesë bad bé Israel nyéësaá beken ámpë nyéësaá-'áá bad ábe békídé etùn. Boj pen nyáábe bad bé Dyöb nyédíí bad ábe békídé hõm ahög. Nyé moosyäál nyédíí néé bad ábe bédé á túmbé e Dyöb. ²⁰ Nyédíí néé bwëm ábe bélöñneé ndáb. Bembapee bé nlómag ne bekal bé é'däädəñ bôö bédé nsáanénd í ndáb. Yesu Krïstæø mwën-naá adé akon dé nchóméé. ²¹ Mó akæø boj ene ndáb etyéem, ékwogé', épë-'ë ndáb eche Esáá eche Sáñgwéé. ²² Abé áde nyédií mod nhög ne Krïstæø, aladé nyé ne bad bé Krïsto bëmpée. Abé áde nyédií-'áá bööb nyédií néé ndáb echë Dyöb ádyee' áte. Dyöb áde ádë nêngáne Edäädəñ.

3

*Paalε akānlé bad ábe
béesě bad bé Israël nkalaŋ mí bwâm*

Paalε akánnédé bad bé Efesú

¹⁴ Enén nzəm chóō ekəé boj m̄bwōgē' mebóbóny á sō wée Titée âkânned nyé. ¹⁵ Mó adé Titée a metúmbé mésyāēl, áwē dōō mǐn mé metúmbé mé nkoy rísé ne mé nkoy m̄ míñ mēbídé. ¹⁶ Ngáne m̄mē nhon m̄mē ákóñnéde nyé níchábé ámīn, nkânné nén m̄mē échē Edədəjé ébe nyé ngíne ábel boj nlém níwúu nyé á abum. ¹⁷ Nkânné-’e ámpē ábel nén adúbe áde nyédúbpé Kr̄istəə ábel ásumen nyé á nlém-tê. Nkânné-’e m̄mē nyédəj Dyōb, nyédəj-’e nhog ne aníníi. Nzé nyébèle nê, né nyéebé nêngáne alín á bwel áde m̄mē nkaj nkíí ásē bwâm, nyébé-’e nêe ndáb éche esúmnédé ásē bwâm. ¹⁸ Nkânné’ nén m̄mē nyé ne bad bé Dyōb bésyāēl nyébíi bán Kr̄istəə adəá syánē bwâmbwam, échē edərge éewoo-’áá asóg. ¹⁹ Nkânné’ ámpē nén m̄mē kénéé édíí bán modmod eéhélëë-’e ákoj abíi ngáne Kr̄istəə ápédé nyé adəj, Dyōb ábel nyésônten. Nkânné’ nê ábel boj abé ádëñ ábë nêe áde Dyōb.

²⁰ Dyōb áwóó ngíne âbel mekan míme méchábé ámín bwâmbwam tómaa mekan míme déhédné mó. Abéle mekan tómaa ké ngáne déhele dewémtén bán ăbĕl. Eche ngíne eche edé-'e syánē áte chóo ábenladté âbel írmén mekan. ²¹ Mekénag mébê ne mó áyâle ndèle é mekan éche ábelé, éche ényínnédé átîntê e elad é bad bé Dyōb, ényínnéd-te áyâl e mekan írme Krístæ ábélé. Mekénag mébê ne mó póndé ésyâsl, á ngíndé ne á ngíndé. Ébê nê.

4

Bad ábe bédúbpé Kr̥istəe

¹ Né-oó, me nêngáne mod a mbwög áyële nsón míme míbenléé Sáñgwéé, ncháa' néen meé, abé ádën ábë abé á bwâm ngáne Dyöb áhedeé, apwed áde ápwédé nyé. ² Kéchéé éche nyébeléé nyésuded yël, nyébë bad ábe bépwíidtéedé, nyéwesan-ne nhóg ne aníníi. Nyéluméed edënge awesen áde nyéwesanné nhóg ne aníníi. ³ Edëdënj éche Ésáá ébélé nyéédé mod nhóg. Né-oó, nyéwan áte âbé nsaj ne nhóg ne aníníi, âbel nén nyédi nyébë mod nhóg. ⁴ Syánë baásyääl dedíi yël póg, melemlem mé Edëdënj ehög chóo syánë dékúdé. E'lyág bé nlém e'hög bó-'áá déwóó áyël e melemlem mé nnam míme Dyöb dénhöbpë aá móöbe syánë áde ámpwëdté syánë. ⁵ Sáñgwéé nhóg móo syánë baásyääl déwóó'. Adúbe ahög dóo syáa baásyääl déwóó dékùd-te melemlem mé edusen. ⁶ Dyöb ahög dóo syánë baásyääl débernléé, mó-'áá adé Titëe awe syánë moosyääl. Mó akamlan syánë baásyääl. Abele' syánë moosyääl debele kéchéé éche áhedeé aá débel, adé-'ë syánë moosyääl áte ne échë Edëdënj.

⁷ Syánē mod té dekudé nsimé á nhægtéd míme Krístəø ábágé. Boj mímē nsimé méesaá nyaa póg. ⁸ Nê dóð ákéá boj étenléd á kálag e Dyðb nén bán,
“Ankë á hóm áde áchábé ámín.

Áde ákagké, ankeén ábē bad bé ekoyí ábe ántōmmē áte, ábē-’e ábē bad echě nde.”

⁹ Ngáne étenlédé nén bán, "Anké á hóm áde áchábé ámín." Chán nê ádí? Nê alûmte nén bán ansébé ape a hóm áde ádē se ásē, nédē á nköjsé wén. ¹⁰ Mó awě ampě a nköjsé mó adé melemlem me mod awě anké á hóm áde áchábé ámín tómaa mebwóg mésyāēl. Anké ámín âbel chōm ésyāēl elôn mbom. ¹¹ Mó mwěn mó abagé bad nde. Abelé donge á bad âbē bembapee bé nlómag, donge âbē bekal bé'dáédəj, ábēl donge âkal nkalaŋ mí bwâm, ábēl donge âbē belyáged bé bad ábe bédúbpé, ábēl-le donge âbē bemeléede âyáged bad ábe bédúbpé. ¹² Ambé ábē bad échén nde âbonjen bad bé Dyōb ábèle mó. Ambel nê âbel boj bad ábe bédúbpé bô ábe bédé nêngáne yěl eche Krístəə bewúu áte. ¹³ Nén débē káájne á póndé eche syánē débēē mod nhóg, adúbe áde dédūbēē Mwǎn a Dyōb, debíi'-e mó. Nzé dedé nê, nê débēl deélon mbon, debé nêngáne Krístəə awé alóné mbon. ¹⁴ Né déebáá nêngáne běndem ámpē. Nén débēl bad bé akwâb ábe býágte' ayáge dé metóm, béehenlé syánē adog, béehél-laá abel se dedubé mekan míme méetâjgene. Déebáá nêngáne bôlē ábe epub é ngíne éhueneé ped e mendib póg étimné' enínií. ¹⁵ Déebáá nê, boj pen dékale mbále délümte'-e edaŋge ne nhóg ne anínií. Débele nê âbel boj dékwog á menzii mésyāēl

débē nêngáne Yesu Krístəə awé adé nló. ¹⁶ Krístəə aladé ábē bad hōm ahóg, ngáne mebónj mé yěl méladeé yěl e moonyoŋ. Nzé pēd e yěl téé ebélé míme nsón ngáne étérngéné abel, ne yěl esyəél ēkwogé', ewúú-'e áte. Nê dōo édíí káéjne á elad é bad bē Dyōb, nzé mod-té adéa mwányaŋ.

Alongé dékōslē á mod a Krísto

¹⁷ Né-ɔ́, nkoo' nyé aláa á dñi á Sáŋgú nén meé abé ádēn déebág nêngáne abé áde bad ábe béebíi Dyōb. Mekan míme békamtanné médíi mekan míme méesé dyam dé abelen, méeheléé-'e se méwóngén bó. ¹⁸ Áyāle mímbab mewémten médé mewémten mé mbéb, běhídē nyaa e Dyōb. Béewoo'é alongé áde Dyōb ábageé áyāle běwúú nló áte béebíi-'áa nyaa e Dyōb. ¹⁹ Nzé běbelé dyam dé mbéb, akwágké déekóbéé bó. Bébágé yěl ábel mekan míme échāb ekob é yěl éhedéé. Béwóo nlém áte póndé ésyāél ábel mekan mé mbinde. ²⁰ Boŋ nyé, áde bén'yāgēdté nyé tāŋgene Krístəə, saké ene ndín e abé běnlāā-'e nyé bán nyétáŋgéné awónj. ²¹ Ndúbpé nén meé nyénwógo mam mé mbále tāŋgene Yesue. Abé áde nyémbē-'e mod nhógo ne mó běnlāā nyé mam áyāl echē. ²² Bén'yāgēd nyé bán nyétede abé dé nchun áde nyénsēbē̄ awónj. Ene póndé ádēn alongé démbéb áyāle nyénwój nlém dásō ábel mekan mé mbéb. Mímē nlém míme nyéwóó'áá-'e ábel mekan mé mbéb ímpánté'áá nyé nzii. ²³ Bén'yāgēd nyé nén bán nyémwé Dyōb áhəylēn nyé nlém á abum ábel boŋ nyéwój mewémten mékōslē. ²⁴ Dyōb ábagé nyé abé dékōslē áde ádē nêngáne áde abé. Né-ɔ́, abé ádēn ábē nêngáne ádē abé dékōslē. Ádēn abé dékōslē ádíí abé dékōslē á mbále ngáne Dyōb áhēdeé ásáj-'e.

²⁵ Né-ɔ́, modmod eékálē metóm ámpē. Syánē mod-té ákanle mwányaŋ mbále, áyāle syánē moosyāl dedíi née bad ábe béládné boŋ běbel yěl póg. ²⁶ Nzé nyéllí, nyéēmwāg-se melingá mébēlēd nyé mbéb. Nyéēmwāg-se mímēn melingá métom epun é bín. ²⁷ Nyéebágē Satane yěl ádog nyé. ²⁸ Bad ábe běchíbe' bésôg achíb. Boŋ pen běbenlad mímbab mekáá ábel nsón ne nlém nhógo ábel boŋ békud chōm, běwóngēn-ne betóótökē bē bad. ²⁹ Eyale é ebébtéd ké ehógo eebeidé modmod á nsəl. Boŋ pen nyébenlad e'yale é' bwâm ábe běwóngēn bad áwúú áte á adúbe tē. Nyébenlad e'yale á póndé eche ehednad, ábel é'wóngēn bad ábe běwóglan nyé. ³⁰ Nyéebēlē mam míme méwōgēd Edəádəj éche Ésáá ndutul. Edəádəj éche Ésáá chōo édē nêngáne e'chem ábe Dyōb áhēdē nyé ásin póndé eche ákōdēé nyé ne akōde ásyāél. ³¹ Nyéhûd mewémten mé mbéb mésyāél á nlém-tē, nyéchene-'e ekan é ngíne ne melingá. Nyéesenlē', nyéesyáé-'e bad ahób áde nyéhōbeé bó mekan á yěl. Nyéelúmté' e'béb bé nlém wéé modmod. ³² Nyélúmed e'boŋ bé nlém wéé nhógo ne anínií, nyéwój-ge nlém n̄ ngol. Nyélagsan nhógo ne anínií melemlem ngáne Dyōb álágséné nyé áyāle Krístəə.

5

Abé áde bad bē Krísto bétáŋgéné awónj

¹ Nyéwále abé áde áde nêngáne abé á Dyōb, áyāle nyéddíi ábe bán ábe ádáá bwâmbwam. ² Nyédəj bad běmpēe, melemlem ngáne Krístəə ádáá nyé boŋ awé-'e á nló míme syánē. Ambé yěl wéé Dyōb née mende ne ndé echē enwóged Dyōb menyinje bwâmbwam. ³ Ngáne édíí bán nyéddíi bad bē Dyōb, eeboo'é bán nyékábe' mesón, ké' e nyébèle mekan mé mbinde ké' e nyébē ngoód. Échén ndín é mekan eeboo'é ké awógned átinté echēn. ⁴ Éeboo'é bán nyéhōbe' mbinde ne e'nyegléd bē mehōb, ké' e nyébèle' e'kukú bē ngwel. Boŋ pen nyéságnan Dyōb. ⁵ Nyébíi nén bán kénzéé awé akábe mesón ké' e awé abele mbinde é mekan ké' e awé adé ngoód, eesönlé á nkamlen míme Krístəə ne míme Dyōb, éekud-taá bwěm é' bwâm ábe Dyōb áhōbé áá móobé. Mod awé adé ngoód adíí née mod awé abenle' myōb mémpēe.

⁶ Nyéēmwāg-se mod ádōgēn nyé e'yókél é' mehōb. Dyōb dékōgsēn bad ábe béebelé' ngáne áhēdeé boŋ běbelé échén ndín é e'bébtéd é' mekan. ⁷ Né-ɔ́, nyéēlatán ne bad ábe běbelé' échén ndín é e'bébtéd é' mekan. ⁸ Ngen e'só nyémbé á ehíntén-tē, boŋ bōob abé áde nyéddíi ne Sáŋgwéé ábélé nyédeé á e'nyínēn bē ekíde tē. Né-ɔ́, abé ádēn ábē ngáne abé

á bad ábe bédé á e'nyínen bé ekíde. ⁹ Nhóbe nén áyāle bad ábe bédé á e'nyínen bé ekíde tē békéle mekan mé bwām, békéle mekan míme métángéné ne mekan míme médé mbále. ¹⁰ Né-óó, nyéwanen ábúi mekan míme méwógte Sángwéé bwām. ¹¹ Nyéewóó dyam ábel ne mbeltéd míme méeboo míme bad ábe bédé á ehíntén tē békéleé. Boj pen nyélümed bad nén bán échē ndín é mbeltéd éeboo'é. ¹² Édē e'sôn átúb échē ndín é mekan dín éche bad bémpeé békéleé á mesom-tê. ¹³ Nzé mod abíté échē ndín é mekan áwed bad bénýin ngáne mén mékoo abé. ¹⁴ E'nyínen bé ekíde bóo é'koo mekan mé mbéb abíded áwed. Né dôo ákáá boj éhóbnéd nén bán,

“We awé ekúne’ kábnéd,
puú, weebág née mod awé awédé.

E'nyínen bé ekíde ábe Krístəe-’e é'pen we á yəl.”

¹⁵ Né-óó, nyétéd póndé ne nyaa e abé echē nyéwoo'é. Áden abé déébāg nêngáne abé áde e'yókél é' bad boj ábē nêngáne abé áde bad ábe békéleé debyeé. ¹⁶ Póndé ké ehéé eche etál ébágnédé nyé ábel bwām, nyébel. Áyāle mbéb ntómé áte enén póndé. ¹⁷ Né-óó, nyéebág nêngáne bad ábe bédé eyókél. Boj pen nyésönten chōm éche Sángwéé áhedeé aá nyébel, nyébel-le chó. ¹⁸ Nyéemwág mím se mékobé nyé áyāle nén nê áwógté mod e'sôn. Boj pen Edədəj éche Ésáá cháchá ebé nyé áte. ¹⁹ Nyékónne' nhóó ne anínií ngəse é Dyōb áwéd nhóó ne anínií nlém á abum. Nyékónne' ngəse éche ebídé á kálag e Dyōb, nyékónne' ngəse éche ékene Dyōb ne Krístəe, nyékónne-’e nkóngé ké ínhéé míme ínhúú ne Edədəj Éche Ésáá, áken Dyōb. ²⁰ Nyéságnan Dyōb, Titéé awéd póndé ésyāel áyāl e kchéé éche ébenlad. Nyéságnan mó á dín áde echén Sáj Yesu Krístəe.

Paalé alébe' baachóm ne ábab bebaád

²¹ Mod téé abele ngáne waáb áhedeé áyāle edúbé éche nyébagéé Krístəe. ²² Mmwaádtéé áwógne nchóm melemlem ngáne áwógnéé Sángwéé. ²³ Mwenchóm té awóó nkamlen ámīn e mmwaád, melemlem ngáne Krístəe áwóó nkamlen ámīn e elad é bad bé Dyōb. Chó-’aá édē nêngáne eche yəl mó-’aá abage chó e'soosoŋ. ²⁴ Né-óó, mmwaád-téé atángéné áwógné nchóm áyāl e mam mésyāel, melemlem ngáne elad é bad bé Dyōb éwógnéé Krístəe. ²⁵ Nyé baachóm ábe békéleé bebaád, mod téé ádəj mwaád, melemlem ngáne Krístəe ádáá elad é bad bé Dyōb boj ábē-’e ádē alongé áwé áwab nló. ²⁶ Anwé á nló mímāb ábel boj bésāŋ. Ambenléed mendib ne échē eyale ásáad bó. ²⁷ Ambel nén ábel boj elad é bad ébor áwe e'só. Ahedé áá mópeen échē elad é bad áwé, esebán atón á mbinde ké ehóó, ké'ε aban, ké'ε dyam dé mbéb ábág bó áyāl. Boj pen bésāŋ, béewōō-’e dyam dé mbéb ké ahóó áde mod ahéle ahóó bó áyāl. ²⁸ Melemlem nê dôo baachóm bétángéné ábab bebaád adəj ngáne bédáá échab yəl. Mwenchóm kénéé awé adəj mwaád, adəj eche yəl. ²⁹ Modmod eékōō'é yəl, boj abelé átəgné chó ánən-’e chó bwām. Melemlem nê dôo Krístəe ábeléé elad é bad bé Dyōb. ³⁰ Syánē dedé bad ábe békéleé eche yəl. ³¹ Éténléde á kálag e Dyōb nén bán, “Enén nzom chó ekáá boj mwenchóm átedé sáá ne nyāŋ, abé ne mwaád, boj búmō bad békéleé bétim mod nhóó.” ³² Áden dyam ádfí ndəle e dyam eche modmod éehéé-’e asönten. Boj ndúbpé meé mímén mekan méhóbe tângéne Krístəe ne elad é bad bé Dyōb. ³³ Né-óó, mwenchóm téé awé awóó mmwaád, adəj mwaád ngáne adáá eche yəl. Mmwaád a nchóm téé-’e atángéné nchóm edúbé abe.

Paalé alébe' bänbän ne ábab besáá ne benyaá

¹ Nyé bänbän, nyéwógne' áben besáá ne benyaá ngáne bad ábe bédé ne Sángwéé bétángéné abel. ² Éténléde á kálag e Dyōb nén bán, “Nyéwógne' áben besáá ne benyaá.” Átinté e mbéndé éche Dyōb ábágé, enén mbéndé chó ebédé mbéndé e'só eche Dyōb dénhōbēnné dyam. ³ Dyam áde ánhóbpé ádíi nén bán, “Nzé nyéwógne' áben besáá ne benyaá, né mekan mébēen nyé bwām, né alongé ádēn-ne décháb áte.”

⁴ Besáá bé băń-ne, nyéelijsé áben băń. Boj pęn nyénəne bó, nyéllebe bó, nyéyágte-’e bó nyaa eche Sáŋgwéé áhedeé.

Paalé alébe betâŋ ne bewóŋ bé betâŋ

⁵ Nyé betâŋ nyéwógne’ áben bewóŋ. Nyébage bó edúbé nyéwógne-’e bó ne nlém nhóg, melemlem ngáne nyéwógnéé Krístəə. ⁶ Nyéebenlé bó dásō á póndé eché bénýinéé nyé ábel békemed nyé. Boj nyé, nêngáne betâŋ ábe Krístəə, abele áde nyébenleé Dyōb ábîd nyé á nlém-tê. ⁷ Nsón ké íhéé mme nyébeléé, nyébel mó ne kán esyəál. Nyébelé mó byánán Dyōb dóo nyébenleé saké baányoŋ. ⁸ Nyébíi nén bán mod téé ákud nsábe áyāle nsón mí bwâm ké íhéé ríme ábél. Ábél ké ntâŋ kéké kunze.

⁹ Nyé bad-te ábe nyéwóó betâŋ ásé echén, nyécháa áben betâŋ bwâm. Nyéekímmé bó bán bétág. Nyébíi nén bán nyáabōo moosyəál nyédé ásē e Sáŋgwéé, nhóg awé adé ámīn, eékwōgnād-taá modmod.

Ngáne bad ábe bédúbpé
bétáŋgéné Satane atâŋgen

¹⁰ Âsoged, nlâŋge nyé nén mée; Nyébél nyébél ne Sáŋgwéé ábel boj eche ngíne eche ewúú áte éwéd nyé nlém á abum. ¹¹ Nyétéd bwěm é’ nzum é’syəál ábe Dyōb ábágé nyé ábel boj nyéhel akwâb áde Satane atóm áte. ¹² Nzum eché déwanéé eesaá nzum eche déwanéé ne baányoŋ. Boj ngume, ngíne, ábāb benkamlene ábe békamlan nkönsé mé ehíntén ne ngíne é ebébtéd éche edé ámīn, bōo déwanneé nzum. ¹³ Né-oo, nyétéd bwěm é’ nzum é’syəál ábe Dyōb ábágé nyé ábel boj nzé póndé e ebébtéd epedé, nyéhel bó atyéemem. Nyéewān nzum nyépíd á asog nyélyag nyésūmēn ngáne nyémbēz.

¹⁴ Né-oo, nyéboŋsen nyékale mbále póndé ésyəál. Nzé nyébelé nê, ébél nêngáne mod awé awáá ngéá á nkog awé aboŋséné ábel dyam. Nyébelé mam ríme métáŋgéné, áyāle ábel mekan ríme métáŋgéné ádii nêngáne mod awé ahédé mbóté eche békamleé e’kii ákúten yél á póndé e nzum. ¹⁵ Nyébél nyékale’ nkalaŋ mí bwâm. Móð rípeene’ nsaj. Nzé nyébelé nê, né ébél byánán nyéhédé metámbé á mekuu, mélbél nyésūmēn bwâm. ¹⁶ Ámīn e rímén mésyāál, nyébél nyédúbpé Yesu Krístəə. Adúbe ádēn débél nêngáne ekáŋgé éche ékáá nyé ábel boj mekoŋ mé muú ríme Satane álômméé nyé méebelé nyé dyamdyam. ¹⁷ Nzé nyékag awan nyébíi nén bán nyékudé é’soosoŋ á mekáá mé Dyōb, modmod éehél-laá nyé dyamdyam abel. Nyéebél nêngáne nwan-é nzum awé ahédé ekóté éche békamleé ekii. Nzé nyékag-ke nyétáŋgéné néé nyéwánlé nkawaté ríme Edəádəŋ éche Ésáá ábágé nyé. Mímén nkawaté ndé nêngáne eyale é Dyōb. ¹⁸ Nyékânné’ póndé ésyəál ngáne Edəádəŋ éche Ésáá élyágtéé nyé. Nyéláa Dyōb bán áwôngan nyé áyāl e kchéé éche nyébeléé. Nyétéd póndé, nyékânné’ póndé ésyəál ésebán nyékóme’. Nyékânnad-te bad bé Dyōb bésyāál. ¹⁹ Nyékânnad mémpe, nén bán póndé kékéé nzé nhóbé mée nhóbé dyam, Dyōb débél me e’yale ábe é’táŋgéné. Nén débél měhél bad nkalaŋ mí bwâm ríme bad bénkênsónténné aláa, ésebán mbáa’ dyamdyam. ²⁰ Yesu Krístəə apwédé me ábél ríme mésénze, ákal rímén nkalaŋ mí bwâm, ene nzom chó-’áá ekaé boj mbé bōob néé mod a mbwōg. Né-oo nyékânnad me nén bán Dyōb áwēd me nlém á abum ríkal rímén nkalaŋ mí bwâm ésebán mbáa’ dyamdyam.

Paalé aá Dyōb ánamed bad ábe bédúbpé

²¹ Tikikuse, awesýánē mwányaŋ a Krísto awé dédáá, abenle Sáŋgwéé ne nlém nhóg. Mó áláá nyé mekan tâŋgēne me. Nén débél nyébíi ngáne rídií ne chom éche ríbeléé. ²² Nlome mó áwēn ábel boj áláá nyé mam ríme mébenlad ne sé, áwēd-te nyé nlém á abum.

²³ Nsaj ríme Dyōb Titéé awēd, ne echéd Sáŋ Yesu Krístəə, ríbél ne nyé, bad ábe bédúbpé. Bébel nyébél nyédaŋ nhóg ne anínií, nyébél nyédúbe-’e Krístəə. ²⁴ Dyōb álumed rímén nsimé ne moosyəál awé adé awēd Sáŋgú Yesu Krístəə, edəŋge éche ébél abé ne abé.

Kálag echě Paale aténlé
Baá Filipi
Ndibned n kálag

Paale mó atěnlé mwembé míme ídé á Filipi enén kálag áde ábédé á mbwog. Abédé ndutul ne ayáge áde déetângene áde bad bémpeé býágté'áá. Kénéé rímén mekan mébénládtáá, Paale ambé menyinje, ásúm-me nlém áyāl e adúbe áde ádúbpé Yesu Krístæø.

Nzom eche ekaé boj Paale átēl enén kálag edíi ásagnen bad bé Krísto bé Filipi áyāle nwôngén míme bémbeé mó á póndé eche ántognenné nwôngén. Awédé bó nlém á abum, aláá-'e bó aá béké bésüm mekuu. Acháa bó aá béké asuded á yél áde Yesue, ésebán bémwag bán mekan mé esíi mé ekob é yél mékamlan bó. Akamtan bó aá abé áde bédíi mod nhógr ne Krístæø ádíi nsimé n Dyöb, aá Dyöb débél-le béké menyinje béké-'e nsaj ábe áde bédíi mod nhógr ne Krístæø.

Nkabtéed n kálag

Paale alénté, aságnéné, akánnéd-te mwembé n Filipi 1.1-11

Paale aá ábé á nkönsé ádíi ábélé Krístæø, áwé-'e débojnéd mó 1.12-30

Paale aá abé á bad béké Krísto ábé ngáne áde Krístæø 2.1-11

Paale aá bad béké Krísto ábé á nkönsé néé tintine 2.12-18

Paale akéné Timotie bó Epafroditus 2.19-30

Paale aá mod awé adúbpé Krístæø ákobnéd á'sō é' Dyöb 3.1-11

Paale aá mod téé áwan áte ápid mam á asog bwám 3.12-21

Paale alébe bad béké Krísto 4.1-9

Paale aságnan mwembé n Filipi 4.10-20

Melenten mé asog 4.21-23

Paale alómmé bad melenten

¹ Me Paale, nchoo ne Timotie, me-eé ntenle nyé enén kálag. Sédíi bembalede ábe Yesu Krístæø. Ntenle bad béké Dyöb, bad ábe bédé mod nhógr ne Yesu Krístæø ábe bédé á Filipi, nchoo ne belyáged ne bad ábe békéngan ákeen nsón n Dyöb á'sō. ² Nsimé ne nsaj míme ílhúú ne Dyöb awé Titéé, ne Sárgú Yesu Krístæø ímbé ne nyé.

Meságnen ne mekáne míme Paale

³ Nságnan Dyöb áde míbenléé, póndé téé nzé nkámténé nyé. ⁴ Mbelé mbé menyinje póndé téé nzé nkánnad nyé moosyáél. ⁵ Mbelé míbagé nsagnen áyāle nwôngén míme nyékébeé me ákal nkalanj mí bwám, bootyá á póndé echě nyewogé mó, boj nyédúbe-'e, ápe bøob. ⁶ Ndúbpé meé Dyöb áde ábóótédé rímén nsón mí bwám átinté echén, dékeén mó á'sō káej ápēen mó á asog á Epun éche Yesu Krístæø ápeé. ⁷ Ntárngéné enén ndín e mewémten awój áyāl e nyé baásyáél áyāle nyéde me á nlém-té. Ké áde ídíi á mbwog, ne áde nhóbeé mam tângene nkalanj mí bwám, nhóbe meé mímén nkalanj méesaá metóm, ídé mbále. Dyöb álúmté syáné moosyáél mímén nsimé ngáne débenléé mó. ⁸ Dyöb ádé me mbón nén aá nlém míme íwójnéné nyé áte, ídé melemlem ne nlém míme Yesu Krístæø áwójnéné nyé. ⁹ Nkânné-'e nén meé, edənge éche nyewójnéné Dyöb ne éche nyewóó ne nhógr ne aníníí ébé ékag á'sō. Nkânné-'e meé nyébíí mekan mé Dyöb, nyésonten-ne nhøylén átinté e mekan mé bwám ne mekan míme méesé mekan mé bwám. ¹⁰ Nén débél nyééhél mekan míme métómténé aboj abií. Nén débél nyééssanj-'e á'sō é' Dyöb, békóbén-naá nyé awusé ké ahógr á Epun éche Krístæø ápeé ámpé. ¹¹ Nén débél abé á bwám ádén áde áhúú ne Yesu Krístæø dényinnéd áyāl e mekan mé bwám mésyáél míme nyébeléé, ábel boj Dyöb ákul ehúmé ne mekenag.

Paale aá ábé á nkönsé ádíi ábélé Krístæø,
 áwé-'e débojnéd mó

¹² A-baányaŋ, ndəé meé nyébii nén bán mekan míme mébénlédé ne me hén, íkkóó awôŋgen ábel boŋ nkalaŋ mí bwâm nkalanad nkag á'sō. ¹³ Nén ábélé sénze ésyāel éche énone eyáde éche mod ambáá ne bad bémpée bésyāel hén, bébii nén bán ndé á mbwog áyāle ndíí mbøledes awé Krístæ. ¹⁴ Abé adé ndíí-'e á mbwog, áwédé ekud é bad ábe bédúbpé nlém á abum, bénábpé nlém awónj ákal eyale é Dyöb ésebán békáa' dyamdyam.

¹⁵ Édé mbále nén bán bó baahóg békáláne me kónjí, békale-’e alúmed bán bédé etógnén tómaa me. Boŋ pen, bó baahóg-ke békale míme nkalaŋ ne mewémten mé bwâm.

¹⁶ Bad ábe békale mó ne mewémten mé bwâm, békale mó áyāle bédáá me, békíí-'e nén bán Dyöb ákwénténé aá míbê á mbwog hén ábel boŋ nkalanad nkalanad mí bwâm méesaa metóm, ndé mbále. ¹⁷ Ábê ábe békáláne me kónjí békale-’e nkalanad mí bwâm ne mewémten mé bwâm, békale mó áhede échab yäl chén bwem. Békale nê, ne mewémten nén bán íwôg ndutul abé áde ndíí á mbwog.

¹⁸ Boŋ nén déewoo'é dyam dé abel. Áyāl e míme menzii mésyāel, nkalaŋ míme Krístæ móo békale-’e, ké békáláne mewémten mé bwâm, ké-’e mewémten mé mbéb, ákal mó. Né-oó, áyāle nê, mëbë menyiŋge. ¹⁹ Mëbë mbé menyiŋge áyāle mbíí nén meé mekáne míme nyékânnadté me ne nwôŋgen míme Edædæj éche Yesu Krístæ ébagé-’e, békél nkúd e'sooſon. ²⁰ Nwóó nlém áte ne menyiŋge mésyāel, nlyágé-'e nlém meé méewókgé e'sôn, boŋ méwôŋj e'wéd békáláne pónde ésyāel, tanje baoob, ábel boŋ kékheé éche míbelé-’e ébel ehúmé éche Krístæ ényínned, ké ndé á alongé ké-’e nwédé. ²¹ Ne me, abé áde ndíí á alongé ádii ábèle Krístæ, nzé nwédé-'e ébojnéd me. ²² Nzé édé bán ndé á alongé mëbë míbelé nsón míme ndé etógnén. Baoob-poo, meebei'’e ped eche ítângéné atéed. ²³ Mmén mekan mébe métyééémé me á'sō-te, étomé me áte éche ítângéné apwé. Ndæé meé ítæde hén míbê ne Krístæ, áyāle nén ábóó tómaa ábæ á nkörjsé wén. ²⁴ Boŋ áyāl echén, édé etógnén bán ndíí míbê á alongé. ²⁵ Ndúbpé nén, mbíí-'e meé mëbë mbé á alongé, mëbë mbé-'e ne nyé moosyāel ábel boŋ adúbe áde nyédúbpé Krístæ ákwogé, nyébé-'e menyiŋge áyāle nyédúbpé mó. ²⁶ Nén débél abé adé mëbë ne nyé ámpé, nyéenabé nzom awónj ábe Krístæ mekenag áyāl echém.

²⁷ Baoob-poo, abé ádén átângéné ábæ ngáne Krístæ áhóbeé áwé nkalaŋ mí bwâm. Nén débél ké mpedé ányín nyé ké-’e meépede, mëbii nén meé nyésumé mekuu nêngáne mod nhög, nyéwóó-'e mewémten mehög áwan áte ákæ chom éche nyédúbpé. ²⁸ Nyéebáá' bad ábe bétângan nyé. Nlém íwúu nyé á abum pónde ésyāel. Nén délüménd nén bán békudté e'sooſon boŋ nyéeküd. Dyöb dó-'aá átide mímén mésyāel. ²⁹ Dyöb ábénlédé ábæ e'boŋ békáláne pónde nyéeküd. Nlém íwúu nyé á abum pónde ésyāel. ³⁰ Syáné dewane nzum á yäl e nkalaŋ mí bwâm baoob. Melemlem mé nzum míme nyénnyinné nwane' móo ndíí íwanee' baoob.

2

Paale aá abé ádēd ábæ nêngáne áde Krístæ

¹ Abé áde nyédií nhög ne Krístæ áwédé nyé nlém á abum, échē edænge-’e épwiitad nyé nlém á abum. Nyéedé nlatén ne Edædæj éche Ésáá. Nyélümte' e'boŋ békáláne, nyéwóó-'e nlém n̄ ngol ne nhög ne anínií. ² Mmén menyiŋge mélön mbon nzé nyéwóó mewémten mehög, nyélümte melemlem mé edænge ne nhög ne anínií, nyéwóó nlém nhög, nyédé-'e nêngáne mod nhög áyāl e kékheé éche nyébelé-’e. ³ Nyéebél mekan míme mélümte bán échen yäl chén chow nyéhedeé bwâm. Nyéebél mekan míme mélümte nén bán nyédé kúmbe. Boŋ ne asuded á yäl, nyényin bad bémpée etógnén tómaa échen yäl. ⁴ Nyéebél mekan míme mépiinad nyé bën pen nsyáj, boŋ pen nyébelé káøjne mekan míme méwôŋgan káøjne bad bémpée. ⁵ Mewémten mímén míbê nêngáne míme Yesu Krístæ mémbës.

⁶ Abéedé nyaa eche Dyöb ádii,

boŋ kénê, enkénwóngé mewémten nén aá móchægned nén móo bó Dyöb bétáá.

⁷ Enkéntédté yäl etógnén,

boŋ ambél eche yäl nêngáne mbøledes,

bénchyāā-'e mó néε moonyoŋ.

⁸ Áde ábédé néε moonyoŋ, ansudéd eche yǎl, ákwentén-ne awé.

Ankwentén âwé káej ne kwéed e awog.

⁹ Né-oó, Dyōb dēmbě mó etál éche étomténe achab ámīn,

ábē-'e mó dřn áde átomé mǐn mésyāāl.

¹⁰ Dyōb dēmběl nén ábel boj á dřn áde Yesue,

nhægtéd n̄syāāl n̄bwôg mebóbój,

ké nhægtéd m̄me ndé á nkoy m̄mín, á nkoy n̄sé, ké-'e á mbwôg e baásē.

¹¹ Moosyāāl áhôb áá Yesu Kr̄stəe mó adé Sáŋgwéé,

ábel Dyōb Titée ákud edúbē.

Nyébē átintē e bad ngáne tintine

¹² A-baányaj bé edənje, ngáne nyéyógké'áá mekan abel míme Dyōb áhôbé aá nyébel áde m̄bédé ne nyé, édé etógnén bwâmbwam bán nyébel mekan míme áhôbé aá nyébel, bɔob áde méesaá ne nyé. Nyéwôj mbwôg í Dyōb áte nyésuded-te yǎl á'sō é' Dyōb. Nyéwan áte bwâmbwam ábel mekan míme Dyōb áhedeé, ábel boj e'soošoŋ ábe nyékûdé, é'lôn mbon. ¹³ Nyébel nê áyâle Dyōb áde ne nyé pónđé ésyāāl, ábel nyéwôj nlém ábel mekan mé bwâm m̄mí áhedeé aá nyébel, nyébenle-'e mó. ¹⁴ Nyébèle' chōm ésyāāl ésebán nyényonge áte, nyépentan-ne. ¹⁵ Nyébèle nén ábel boj modmod eehôbé' aá nyéwôo atón dé mbéb ké á hóg á yǎl, nyésâj-'e. Nén déběl nyéebé bǎn bé Dyōb ábe béewôo atón dé mbéb ké á hóg á yǎl, ábe bédé átintē e bad bé mbéb ábe bébèle mbéb pónđé ésyāāl. Nyéde átintē echâb á nkönsé-te n̄engáne betintine ábe bëpene'. ¹⁶ Nyébèle nén akal áde nyékaleé nkalaŋ m̄mí m̄peene' alongé áde déemaá'. Nzé nyébèle nén m̄bē kúmbe ne nyé á epun éche Kr̄stəe ápree áyâle nén délumēd bán awan áde íwáné'áá áte ne nt̄ míme m̄bélé, béebôj'é. ¹⁷ M̄bē n̄engáne nzom e m̄n eché bësyôgé ámīn e nsón míme nyébeléé, n̄engáne mende, áyâle adúbe áde nyédúbpé. Nhèle-se nkûd metake, nwé-'e áyâle nkale' nkalaŋ m̄ bwâm melemlem ngáne nyémpé áyâle nyédúbpé m̄mî nkalaŋ m̄ bwâm. Boj kénê ndé menyinje m̄wôgén-ne nyé moosyāāl menyinje. ¹⁸ Melemlem nê dâo nyémpé nyétângéné menyinje awog, nyéwôgén-ne m̄émpé menyinje.

Paalé atelé tângene Timotie bó Epafroditus

¹⁹ Nzé édé á ntí míme Sáŋgú Yesue, nwóó nlém âlóm Timotie áwēn mwâmpin m̄ pónđé, ábel boj pôle éche m̄ewôgké áyâl echêñ, éwêd me nlém á album. ²⁰ Meewoo'é modmod ampée néε mó awé akoó m̄mî nlém awój âdəj dé ábii ngáne nyédií. ²¹ Nhóbe nén áyâle bad ábe belyágé ásé échab yǎl chôa bétôjtanné, béebeléé ngáne Yesu Kr̄stəe áhedeé aá bébel. ²² Nyé běn nyébíí ngáne Timotie álúmté aá móbele nsón bwâm. Abelé nsón ne me ákal nkalaŋ m̄ bwâm ngáne mwâň ábeléé nsón ne sáá. ²³ Né-oó, nlyágé nlém meé m̄lôm mó áwēn áde ményinné ngáne mekan m̄bëenné me.

²⁴ Ndúbpé-'e nén meé Sáŋgwéé áběl mwâmpin m̄ pónđé mměn ámpé m̄epé áwēn.

²⁵ Nnyíné nén meé édé etógnén me âlóm awed mwânyaj Epafroditus áwēn. Abele nsón míme Kr̄stəe ne me, awôŋgan-ne âtângen bad ábe bétângan nkalaŋ m̄ bwâm, mó-'áá abédé n̄engáne mésenze míme nyélomé âwóngen me. ²⁶ Awóó nlém áte bwâmbwam ânyín nyé moosyāāl, anwôg-ke ndutul áde áwôgé bán nyéwôgé bán m̄nkolé. ²⁷ Édé mbále bán ankolé, ápōn-ne káej ne awé. Boj Dyōb dénwôg mó ngjol, saá-kaá mwëmpen, Dyōb dénwôg m̄émpé ngjol. Enkénkwenténné aá áwé ábel boj meénabpé abé á ndutul-té.

²⁸ Né-oó, nwóó nlém áte bwâmbwam âlóm mó áwēn ábel boj nyéwôg menyinje ânyín mó ámpé, me-'e ámpé meébûdē atag áte áyâl echêñ. ²⁹ Né-oó, nyébē menyinje ákob mó nken áyâle adúbpé Sáŋgwéé ngáne nyémpé nyédúbpé, nyébage-'e bad n̄engáne mó edúbé. ³⁰ Nyébage mó edúbé áyâle ampon awé, abé-'e á nsol n̄ soj abele áde ábenleé Kr̄stəe. Ambel nén ábel boj áwôŋgen me ábel nsón míme nyéběn nyéehele'aá-sé nyébel.

*Bad ábe bédúbpé Yesue
bóo békobnad á'sō é' Dyōb*

¹ Âsoged a-baányaŋ, nyébê menyiŋge abé áde nyédií mod nhóg ne Sáŋgwéé. Éetagtéé me âtele nyé mekan míme ménsébēé nyé atele. Nén adíi âkəe nyé. ² Nyétêd póndé ne ábê e'bébtéd é' bad. Échê mbwé, bad ábe békobna bán bétáŋgéné mod ayag. ³ Syánē-éé býágé nyaa eché etáŋgéné. Edéadəŋ éwôŋgan syánē ábe Dyōb edubé ngáne débenlēé mó. Syánē dedé menyiŋge ngáne dédií ne Yesu Krístəə. Debíi bán baányoŋ béeħeléé-se békobna syánē. ⁴ Kénē mměn nwóó nzom âlyág nlém á yěl e mekan mé moonyoŋ. Kénzéé átinté echén awě awémténé áá mówóó nzom âsum nlém á yěl e mekan mé moonyoŋ né nwóó nzom tómaa nê. ⁵ Áde békobna me bén'yág me ámbid e epun saámbé. Ndíi mod a Israel awě abídé á túmbé e Benjamín. Echem sáj ne nyaj békobna bad bé Hibru. Mbédéé mod a Farisia, nhidé mbéndé ngáne éhóbeé. ⁶ Menwón kán áte bwâmbwam nyaa eché nê dêmbeŋlé ítagté elad é bad bé Krísto. Modmod eéhele'aá-se ahób aá nwóó atón dé mbéb ké ahóg áyāl, áyāle nhidé'áá mbéndé é bad bé Israel ésyāl. ⁷ Boŋ ábe bwěm ésyāl ábe ñnyiné'áá née nsyáŋ béesaá dyam dé abelen boŋ, áyāle chōm éche Krístəə ábénlé me. ⁸ Saké nê děmpen, nnyíne chōm ésyāl meé éesaá dyamdyam nzé nhägténé chó ne ndale e dyam eché edé ábíi Yesu Krístəə, awem Sáŋgwéé. Áyāl échê chōm ésyāl éesaá dyam dé abelen, nnyíne'-e chó nêŋgáne mbinde ábel boŋ mbií Krístəə, ⁹ mbé'-e mod nhóg ne mó. Saké ahíd á mbéndé dōo ákáé boŋ nkobnéd á'sō é' Dyōb. Boŋ nkobnéd á'sō é' Dyōb áyāle ndúbpé Krístəə. Dyōb-paá ábél boŋ nkobnéd áwe e'só áyāle ndúbpé Krístəə. ¹⁰ Ndáá meé mbií Krístəə ñwóŋ'-e ngíne eché ánwóŋgē áde ámpuu'é. Ndáá meé mbé nkude metake melemlem ngáne ânkudté. Ndáá'-e meé nkud metake ngáne ânkudté káéj békobna me ngáne bénwūú' mó. ¹¹ Nlyágé nlém nén meé mímén mésyāl mébenléd ábel boŋ Dyōb ápuud me ámbid e kwéed echém.

*Paalé aá mówane áte
âpid mam á asog bwám*

¹² Meehóbéé nén meé mmaá mímén mekan amad ké'e meé mmaá atyéem á menzii mésyāl. Boŋ ndíi nwane áte ábé nyaa e mod eché Yesu Krístəə áhédé'áá aá mbé áde ápwédé me. ¹³ A-baányaŋ, meeħóbéé nén meé mmadé chōm ésyāl. Boŋ dyam ahóg áde míbeléé adíi, áchaten mekan míme métómé ámbid ne áwan áte áhíd mekan míme méhúe' á'sō. ¹⁴ Ndíi nwane áte áke á'sō káéj mípe wéé ñtáŋgéné asog ábel boŋ nkud nsábe míme Dyōb ábánnédé me ádyōb. Achénle me aá nké ádyōb mbwiined ne Yesu Krístəə.

¹⁵ Syánē moosyāl awě demaá akwōg á adúbe té déwále mímén melemlem mé mewémtén tâŋgēne mímén mekan. Boŋ nzé edé bán nyéwóó mewémtén mémpēe tâŋgēne mímén mekan, né Dyōb déwóŋgēn nyé ásôŋtén mó bwám. ¹⁶ Kéné'-e detáŋgéné déhídé mekan míme syánē démáá abíi.

¹⁷ A-baányaŋ, nyélabten nyébê nyéhíde mímêm mekuu, nyénone'-e bad ábe békobna mekan nyényinné ngáne sébéláá. ¹⁸ Nkánlé'áá nyé ngen ne ngen, boob-pe ámpē nlâŋge nyé ne mésad tâŋgēne bad híin ábe mímab mbeltéd nílumteé nén bán bédé bad bé ekayí tâŋgēne nkalaŋ míme nhóbe kwéed eché Krístəə áwédé á awog. ¹⁹ Échén ndíi é bad ádab asog adíi dū á muú. Chōm éche ékamlan bó édíi mekan mé esíi mé ekob é yěl. Bédáá ábel mekan míme bétáŋgéné békobna. Mekan mé nköjsé mémpen-naá békamtanné. ²⁰ Boŋ syánē pen dedíi bad ábe echab mbwógs édíi ádyōb. Desine'-e awesýánē Nsoode, Sáŋgú Yesu Krístəə bán ábíd ádyōb átim ámbid á nköjsé. ²¹ Ábenléd eché ngíne eché ábenladté ákamlan chōm ésyāl, áhøjlen échesyánē yěl é nköjsé, yěl éche éewóó ngíne, ábel boŋ dékud ndale é yěl ngáne ânkudté áde Dyōb démpuúdté mó.

¹ A-baányaŋ, ndə́ nyé anyín ámpē áyāle ndə́ nyé bwâmbwam. Nyêbelé ndé menyinge nyêdé-'e nêngáne nsábe ímmêm áyāl e nsón mímé ímbél. Né-oó, a-baányaŋ bé edənge, nyébê nyésum mekuu tângene adúbe áde nyédúbpé Sângwéé.

² Ncháa nén meé Yudia bó Sintike béké á nchemten áyāle bó bad béké bédíi baányaŋ bé Krísto. ³ Nlângé wémpé, awem nsón a nsón awé nlyágé nlém áyāl, nhede meé éwôngéen ábén bebaád ábé nsaj. Ábén bebaád béké, Klemene ne bad béké nsón bémpeé békédé me bénben. Syáabðó sébelé ntü ábel boj nkalaj mímé bwâm akal. Mmab mímé mésyáel médé á kálag e alongé. ⁴ Nyébê menyinge póndé ésyáel áyāle nyédíi bad ábe Sângwéé. Nhóbe ámpé, nyébê menyinge. ⁵ Abé ádén áluméed ásō e' bad bésyáel nén bán nyêchedne bad yäl. Sângwéé akwogé ape. ⁶ Nyéétágé áte áyāl e dyamdyam. Boj pen áyāl e kékéhéé éche étané nyé nyékânné Dyöb nén bán ábe nyé chóm éche nyétognéné. Nzé nyékânné-'e nyésagnan mó. ⁷ Nzé nyébelé-'e nê, Dyöb débél nyébê nsaj, nsaj mímé nchábé ámín tómaa ngáne baányaŋ béké bésôjtén. Mmén nsaj méwôngéen nyé ábel boj nyéétágé áte abé áde nyédíi bad ábe Yesu Krístæ.

⁸ Âsoged a-baányaŋ, nyékamtan ábén bwém póndé ésyáel. Nyékamtan kékéhéé éche édé mbále, kékéhéé éche ékwognédé chóm éche ebóó, kékéhéé éche étângéné, kékéhéé éche éewoo atón dé mbéb áyāl, kékéhéé éche bad bétângéné adəj ne kékéhéé éche nyenyiné bán ébójnédé nyé. Nyékamtan mekan mímé mébóó bwâmbwam ne mímé bad béké béké bán mébóó. Échén ndín é mam chóo nyétângéné ahé á mewêmten-tê póndé ésyáel. ⁹ Kékéhéé éche n'yágté nyé boj nyékob-pe ne kékéhéé éche nyewogé áwêm ne éche nyenyiné néé ímbél, nyébèle chó. Nzé nyébèle nén, Dyöb, mó awé abage nsaj, ábë ne nyé.

Paale aságnéné nwôngéen mímé ákúdé

¹⁰ Abé áde ídíi mod awe Sângwéé, ábél ndé menyinge bwâmbwam, áyāle káájne á asog nyélúmté bán nyébônge me. Mbíi nén meé nyéwóó mewêmten ábóó me póndé ésyáel, boj etál éebagnedé nyé ábel áned. ¹¹ Meehóbéé nén áyāle ntóge' chóm. N'yákgé ákob kékéhéé éche étané me á alongé. ¹² Mbíi ngáne mod ábágké ésebán awóó chóm éche átognéné, mbíi-'e ngáne ébágké mod ábud dé awón chóm éche átognéné. Mmémentené ákob kékéhéé éche étané me. Mmémentené abé áde ímbúd chóm éche ídyágké awón, mímémenten-ne ádyee nzaa. Mmémentené abé áde íwóó tómaa ngáne ítognéné, mímémenten-ne abé áde méewóó' chóm éche ítognéné. ¹³ Kékéhéé éche étane me, ngíne eche Krístæ ábagéé me ébél métom chó áte.

¹⁴ Nyébelé bwám âwôngéen me áyāl e ímmêm metake. ¹⁵ Nyé bad béké Filipi nyébíi bwám nén bán áde mbóótédé nkalaj mímé bwâm akal áde mbídé á Masedonia, nyé bénpen-ee nyébédé mwembé mímé ménwôngéen me. ¹⁶ Ké áde mémbéé á dyad á Tesalonika, nyénlómé me nwôngéen ngen ne ngen. ¹⁷ Meehóbéé nén áyāle nhede meé nyélômme me nde. Boj nhede meé nnyine' ngáne Dyöb ánamteé nyé anamed ne anamed. ¹⁸ Nkudé chóm ésyáel éche nyékélóméé me, nkud-te kékéhéé nê. Epafrodituse ampiinéd me bwém ábe nyénlóméé me. Édíi byánán nyébagé Dyöb nde eche ewóó elod é bwám. Dyöb ákóbé ímmê mende, mébójnédé-'e mó. ¹⁹ Ádêm Dyöb débë-'e nyé kékéhéé éche nyétognéné átînté e ímmê nkúú mé nhon, mbwiined ne Yesu Krístæ. ²⁰ Ehúmé ébë ne ádëd Dyöb, awëd Titéé á ngíndé ne á ngíndé. Ébë nê.

Melenten mé asog

²¹ Nyéleled bad béké Dyöb bésyáel ábe bédúbpé Yesu Krístæ. Ábesyáné baányaŋ ábe bédé ne me bélommé nyé melenten. ²² Bad béké Krísto bésyáel bélommé nyé melenten, bwâmbwam abum á ndáb áde Kaisee. ²³ Nsimé mímé Sângú Yesu Krístæ ímbé ne nyé moosyáel.

Kálag eché Paale áténlé Baá Kolose Ndibned ní kálag

Paale, mbapē a nlómag nhóg awe Yesu Krístəə móō antěl enén kálag áde ádíí á mbwōg á dyad á Roma. Antelé bad bé dyad á Kolose. Saké Paale andibé mwembé míme míbédé á Kolose. Epafrase móō andibé mwembé míme míbédé áwed. Epafrase ambé á dyad á Efesus. Anwóg eyale é Dyōb áwed, adúbe-’e Yesu Krístəə. Anhidnéd échē eyale, áke ákal chó á Kolose, ádibē-’e mwembé áwed. Ámbid e póndé, Paale anwóg nén bán bemeléede bé metóm bérpéné ayáge ádě déeboo á mwembé-te wê. Ábē bemeléede býágté áá nén bán, kénzéé awé ahede’ Dyōb abíi, awé ahede-’e e’soosoj akud, atángéné néé ábagéé ngíne ne benkamlene bé nköjsé edubé. Bán mod atángéné-’e néé áhídeé mbéndé néé áyag mod ne áhíd mbéndé émpée tângene ndyéed échē mod éetângeneé adyé, ne ekud é mam émpée. Mmén mekan mésyāəl-lóó móō ménkəj̄ boj Paale áténlé bad bé mwembé mé Kolose enén kálag, álēb bó ábel békibí mbále tângene Yesu Krístəə ákamlen bad bésyāəl ne ákamlen ngíne é nkōj̄ nísé ne mmín. Mwénpen-naá ahèle ahúd syánē á mbéb-te.

Nkabtédi kálag

Ndibned ní kálag 1.1-8

Nsón míme Krístəə 1.9-2.19

Alongé dékōj̄lē ábe ne Krístəə 2.20-4.6

Nsógtən 4.7-18

Paale alómmé bad melenten

¹ Mē Paale, mbapē a nlómag nhóg áwé Yesu Krístəə, ngáne Dyōb átíidé mē-eé ntenlé nyé enén kálag. Se Timoti, awesýánē mwanyan a Krísto, sélommé nyé melenten. ² Ntenlé nyé bad bé Dyōb ábe nyéde á dyad á Kolose. Nyéde ne Krístəə, nyéhíde-’e mó ne nlém nhóg. Nsimé ne nsaj ní Dyōb Titéē awéed mbé ne nyé.

Paale aságnéné Dyōb á mekáne-té

³ Póndé téé sékannad nyé, séságnān Dyōb, Sáá awé awéed Sángwéé, Yesu Krístəə.

⁴ Séságnan Dyōb áyāle sŵogé bán nyédu bpé Yesu Krístəə, nyédaé-’e bad bé Dyōb bésyāəl. ⁵ Sêbíí nén bán nyébele’ nē áyāle nyésumé nlém nén bán nyéeküd nnam míme Dyōb ákójnédé nyé ámīn. Nyémmād mam awog tângene mímmé nnam ádě bésébpé nyé nkalarj mí bwám mí mbále akale. ⁶ Mmén nkalarj mí bwám mé nsimé ní Dyōb níkanlad mebwōg ne mebwōg nkag ásō. Epun e é’so éche nyéwogé nyénsontén bán Dyōb ákójté nlém mí bwám awón ne bad bé mbéb. ⁷ Epafrase, mbalede awe Yesu Krístəə mó ankale nyé mímmé nkalarj. Adíí mod awé syáabō sêbele’ nsón, sêdəá-’e mó bwâmbwam. Abenle’ Yesu Krístəə ne nlém nhóg. Abé áde ádíí-’e ne nyé, nsón míme sénténgenné abel mó ábeléé. ⁸ Mó alángé-’e sé aá Edéadəj é Dyōb ébélé nyédaé bad bé Dyōb.

⁹ Né-óó, bootya póndé eché sŵogé mímmé mam, sékannad nyé póndé téé. Sékanne nén bán Dyōb ábel nyékoj chōm éche áhedeé aá nyébel asonten. Sékanne nén bán Dyōb ábe nyé debyéé ne nsonten ábel nyésonjtén mam mé Edéadəj bwám. ¹⁰ Né débél ádēn alongé débél ngáne alongé áde bad bé Dyōb átângéné abé. Nyéebéle’ mam mímmé méwógté mó menyinje. Mekan mé bwám mó ne mó-’eé nyébeléé. Nyaa eché nyésonjtén-naá Dyōb, échágké acháge ne acháge. ¹¹ Sékanne-’e ámpē nén bán, Dyōb ábē awéed nyé áte ne eché ngum eché echabé ámīn, ábel nén nyéhel awesen, nyékan nlém, nyébé-’e menyinje áyāl e mam mésyāəl. ¹² Nyéeságnén Titéē áyāle chōm ésyāəl. Mó-’aá abelé boj nyékwognéd ábē bad ábe békobe akab á bwém ábe ákójnédé ábē bad hōm áde e’nyínén bé ekide é’díí. ¹³ Ahúdé syánē ásē e ngíne e nkamlene a ehíntén, apeéné syánē ásē e nkamlen míme awe Mwān a nlém. ¹⁴ Dyōb álágse né syánē mímed mbéb akade áde ákódté syánē ne mekií míme awe Mwān ásyogé á awog.

¹⁵ Modmod eenyínnéé Dyöb díd. Boj bad bénsöjtén ngáne Dyöb ádíí áde bényíné Krístæø áyäle adíí nwágén ní Dyöb. ¹⁶ Édé nê áyäle, mbwiined ne Krístæø dóø Dyöb áhágé bwém é'syääl á nkönj mí míñ ne nísé. Ahägé bwém ábë bényînnéé díd ne ábë bénnyínnéé díd. Mó ahägé benkamlene, ne ngíne ésyääl. Dyöb áhágé bwém é'syääl mbwiined ne mó, mó-'aá Dyöb áhágké ábë bwém é'syääl. ¹⁷ Bédéhób bán böhage' kékchée á nköjsé-te né Krístæø adé alongé. Mj-'aá akaé boj bwém é'syääl ebë á e'dii. ¹⁸ Mó adé nló mme bad ábe bédúbpé mó, bô-'aá bédé nêngáne eche yël. Mó abage ábë bad alongé áyäle mó adé mod a'só awé Dyöb ápúúdté awé ábë-'e abé ne abé. Nén dêmbeñléd ábel nén ábë nkamlene ámín mekan mésyääl. ¹⁹ Mmén mekan médé nê áyäle nén Dyöb dën-eé ádë. ²⁰ Dyöb dêmbeñl nén aá chöm ésyääl étim ásë ne mó Dyöb mbwiined ne Krístæø. Ábén bwém é'bédé bwém bë nkönj nísé ne bwém bë nkönj mí míñ áyäle asyog ádë awe Mwän ásyogé mekií á awög. Böob-poó, chöm ésyääl éhèle ebë nsaj ne Dyöb.

²¹ Nyé ne nyé nyembé nchabned ne Dyöb, nyáabe Dyöb nyéebédeé áyäle mewemten mé mbéb míme nyénwöj'é ne mbeltéd mé mbéb míme nyébélé'áá. ²² Boj böob, Dyöb ábélé nyétimé ásë ne mó, awé áde awe Mwän Krístæø awé abédé moonyoñ áwédé á awög. Dyöb dêmbeñl nê ábel nén nyébë wéé módií, nyébë bad ábe bésáá, nyéewoo atón dé mbéb ké ahög á yël, bëeköbné-'e nyé awusé ké ahög. ²³ Ebë nén bán áden adúbe adíi awúú áte nyéehudé-'e mekuu ásë ne asum áde nyésumé nlém áyäel e nkalañ mí bwám míme nyéwogé. Mmê nkalañ mí bwám míme nyémáá awög, ndíi nkalañ míme nkánléde nköjsé áte nisyääl mó-'aá me Paale, ntimé mbalede a Dyöb ákal.

Nsón míme Paale

²⁴ Ndé menyinje böob ne metake míme nkudeé áyäel echén. Ngáne nkudeé mímén metake, mmade metake míme Yesue mímmé ntáyngéné abé, áyäel eche yël, nedé bad ábe bédúbpé mó. ²⁵ Dyöb ábélé me mbalede ábele bad ábe bédúbpé Krístæø. Alómé me aá nkönj nyé échë eyale akale bwám. ²⁶ Bööd, éché eyale émbë dyam ádë bad bénkénsöjténné. Boj böob abele ábë bad bëbíi chö. ²⁷ Dyöb áhede' nén aá ábë bad bëbíi nén bán nhon ne ehúmé éche Krístæø edé káájne ne bad ábe béesë bad bë Israël. Kun eché edé áwéd-te edíi nén bán, nyésum nlém nén bán nyéeküd ehúmé éche Dyöb áhábë aá mójbë ábë bad. ²⁸ Né-'aá ákáá boj sélängé bad tângene Krístæø kékheé wéé sékagké. Sélébe', séyägté-'e bô ne debyéé ásyääl áde Dyöb ábágé sé. Sëbele nê áyäle sëhede nén bán békobned á'sö é' Dyöb nêngáne bad ábe mekuu mémáá awéndned ásë á adúbe-të. ²⁹ Boj nwane áte bwâmbwam. Ngum eché Krístæø eche edé me áte, chö-'e ebage me ngíne áwan áte.

2

¹ Ndæá meé nyébë ngáne nkémpéé awan áte áyäel echén, ne áyäel e bad bë dyad á Laudesia, nyébë-'e ngáne nkémpéé awan áte áyäel e bad bémpeé ábe bénnyinné me díd. ² Mbële nê áwéd bô nlém á abum ábel boj edəngé éche édé átinté echén ébel nyébë mod nhög. Nhede me nyáaböö nyésum nlém ne asum ásyääl née bad ábe bésöjténe dyam á Dyöb áde bad bénkénsöjténné. Ádë dyam-me adíi Krístæø mwën. ³ Krístæø móð ahële ábel boj nyéwöj debyéé ásöjténe mekan mé Dyöb. Mmê mekan médé etógnén bwâmbwam. ⁴ Nlängé nyé nén ábel boj mod eedogné nyé e'nyin bë nsal áte se nyéwémtén nén bán dyam áde álängé nyé átângéné. ⁵ Ndæá meé nyébë nén bán kénée mmén méesaá ne nyé, ndé ne nyé é edədëj. Kénée méesaá-'aá ne nyé, ndé menyinje nén adúbe áde nyédúbpé Krístæø ályágé ádë ngíne.

Bad bë Krísto béesaá ásë e mbéndé é nköjsé ámpé

⁶ Né-oó, ngáne nyékobé Krístæø née Sángwéé awen, nyébë nyébële' ngáne áhedeé. ⁷ Adúbe áde nyédúbpé chöm-éé ábëñ bemeléede bëyägté nyé édé mbale. Nyésagnan-De Dyöb póndé té áyäle chöm ésyääl. ⁸ Nyéemwág-se mod atéd nyé ntâj áhíd e'höhö bë áyäge dé metóm áde bëyägtéé. Ayäge ádë bëyägtéé nyé adíi ayäge ádë békobé wéé ábab beta ne áde áhíde mbéndé é mekan mé nköjsé. Ádë ayäge adíi ayäge ádë áhúú

ne baányoŋ ngêñ déehúu'é ne Kr̄istəø. ⁹ Nyéēmwāg-se ábê bemeléede bé metóm bédog nyé áyâle nén ngíne ne abé á Dyōb ádë yâl e moonyoŋ echë Kr̄istəø áte. ¹⁰ Né-ɔ́, nyêloné mbon áyâle nén nyéndé ne Kr̄istəø, Mó-'aá akamlan ngíne ne benkamlené bésyääl. ¹¹ Abé ádë nyéddí ne Kr̄istəø, Kr̄istəø ayagé nyé. Éesaá nêngáne moonyoŋ áyageé mod. Kr̄istəø mó ayagé nyé é edéadəj-tê. Ahúdë ádë abé dé mbéb. ¹² Áde bêndusénné nyé, édé néé nyênwé, bélímé nyé, Dyōb ápūud-te nyé ne Kr̄istəø. Nén dêmbenléd ne nyé áyâle nyêndubé nén bán ngíne e Dyōb echë epuúdté Kr̄istəø épüúd nyémpé. ¹³ Ngen e'só nyêmbé byánán nyéwédé áyâle nyébóó'áá mbéndé é Dyōb. Ene póndé-'e né Kr̄istəø éehûdëë nyé abé dé mbéb áyâl. Boŋ baōb, Dyōb ábágé nyé alongé dékâslé apuud áde ápúúdté syánë ne Kr̄istəø. Alägséné syánë rímmé mbéb ísyääl. ¹⁴ Édé nêngáne apínné mbéb ríme syánë wéé ântenlé mó. Nédë rímmé mbéb méesaá ámpé. Dyōb ábómmé rímmé mbéb á awög abome áde békommé Kr̄istəø á awög boŋ awé-'e. ¹⁵ Dyōb déntom ngíne ne benkamlené bé nkönsé áte. Atóm áde ántómmé bó, dényinnéd ne moosyaäl ne awé áde Kr̄istəø ánwëë á awög.

¹⁶ Né-ɔ́, nyéēmwāg-se bad bélângé nyé bán nyébelé awusé áyâle nyedyágké donge dé medyé, ké'ë áyâle nyémwágké donge dé mmítéed, ké'ë áyâle nyéebâgké donge á ngande ásë, ké'ë ngande echë ebâg nzé ngon étubé túbén, ké'ë ngande e Epun é Nkóme áte. ¹⁷ Échë mbéndé ésyääl ébédé-'e néé e'diídinge ábë élumté'áá mam mé bwâm ríme Dyōb déntängénné alóm. Kr̄istəø mó-'aá alonté rímmé mam mésyääl. ¹⁸ Nyéēmwāg-se mod anyágéd nyé aá nyétângénné yâl asuded. Nyéēmwāg-ke se mod anyágéd nyé nén aá nyétângénné ángel edúbë abë ngáne ábageé. Nzé nyébelé nê né nyéebôd nde echë Dyōb áhôbë aá móbbë nyé. Kérnëé awë ayágte' nê, ahjbe' aá mónyiné á ndjog-te. Ene ndín e mod edé kúmbe ngêñ ne mekan mé mbéb ríme ríbide' mó á nlém-tê, boŋ eewoo'é nzom ké póg âbë. ¹⁹ Ene ndín e mod esogé Kr̄istəø awë adé nló mí bad ábe bédúbpé adúbe. Ngáne nló nkamlanné yâl esyääl, melemlem nê dôø Kr̄istəø ákamlanné bad ábe bédúbpé mó bésyääl âbel békë mod nhôg. Ngáne nsid níladéé mebóŋ mé yâl mé mod boŋ abé mod nhôg, nê dôø Kr̄istəø áladéé bad ábe bédúbpé mó âbë mod nhôg ásë echë. Mmê nlatén ríkwoge-'e ngáne Dyōb átïidé.

Awé ne âbë á alongé ne Kr̄istəø

²⁰ Édé baōb byánán awé áde Kr̄istəø áwédé, nyéwédé ne mó. Né-ɔ́ nyéesaá ásë e mbéndé é nkönsé ámpé. Cheé-ɔ́ ékéá boŋ nyébé nyéhîdë' échë mbéndé byánán nkönsé ñdïí nkamlan nyé? ²¹ Ábë bemeléede bé metóm bélângé nyé nén bán, "Nyéechângé échén, nyéewóglán échínií á nsel, nyéesitán échë." ²² Échë mbéndé ésyääl énøne' bwëm ábë békâg dyamdyam ámpé nzé mod amaá bó abenled. Échë mbéndé édií mbéndé ne ayáge áde bad bën békâgné nló. ²³ Échë mbéndé ébelé ényimnâad byánán édé debyéé áte bwâmbwam áyâle nén, éyâgte bad nén bán bën bétângénné néé bewóó nlém âbel mekan ríme mékámé abel, âlumed nén bán békoo Dyōb ahíd. Éyâgte bad bán bésuded yâl, békane-'e yâl á metake-tê bwâmbwam. Boŋ ké bad bénhüü échë mbéndé ahíd, éeheléé bó awôngén âsog mewêmtén mé mbéb awóy.

3

¹ Édé baōb byánán apuud áde Dyōb ápúúdté Kr̄istəø, nyémpé nyépuúdë ne mó. Né-ɔ́, nyébë nyóngé áyâl e mam mé mën, wéé Kr̄istəø ádïí á nkamlen á ekâá émbâá é Dyōb.
² Nyébë nyésum nlém áyâl e mam mé mën, nyéesumé nlém áyâl e mam mé nkönsé.
³ Nyébíí nén bán, awé áde Kr̄istəø áwédé, édé nêngáne nyémpé nyéwédé. ⁴ Kr̄istəø mó áde alongé ádëd, áde ápeé-'e á nkönsé-te wén nyémpé nyéebë ne mó ne ehúmé ésyääl.

Alongé dé nchun ne alongé dékâslé

⁵ Né-ɔ́, nyéhûd mekan mé ekob é yâl nlém ne ahúd ásyääl. Nyéhûd nlém áyâl e mam nêngáne, akâb dé mesón, mbinde é mekan, esíí é mam mé ekob é yâl, âwóy mewêmtén mé mbéb ne ngoód. Nzé nyéddé ngoód né édé nêngáne nyébagé Dyōb démpéé edúbë.

⁶ Dyōb dékōgsēn bad bésyāēl ábē bēbele' échén ndín e mekan. Échén ndín é mekan élijse' Dyōb, né-áó, ákōgsēn bad ábe bēbele chó heén. ⁷ Échén ndín é mekan choo nyébéláá ngen e e'só, áde esíi é mekan mé nkōjsé ékámlannáá nyé. ⁸ Boj bōob mekan nēngáne meliñgá, pél, ekoyí, ábēbed mod dín, ne ábēb nsəl áte, nyétángéné mó asog dé abel. ⁹ Nyéekanlé' nhög ne anínií metóm. Nyéebélē' rímén mekan ngáne édií bán nyémaá ádēn abé dé mbeltéd mé mbéb atede. ¹⁰ Bōob-poó nyémaá nkob mékōslé ahé. Dyōb áhédé nyé ádēn alongé dékōslé áte, akwogte'-e dō ábel nyébē née mó, nyékon'-e mó awé ahégé nyé abíi bwám. Awój áde nyewóó ádēn alongé dékōslé ábélle ¹¹ nhæjlén méesaá átíté e mod awé adé mod a Israél ne awé eésé, ké'e mod awé býágé ne awé býeyagé. Ken mod adé mod a nken-e, ken mod e ahín-tê-yé, ken ntâj-e, ken kunze-yé. Krístæ mō adé dyam ásyāēl adé'-e bó mod asyáel áte.

¹² Né-áó, nyétángéné nlém n̄ ngol awój, nyétángéné nlém aboŋ, nyétángéné'-e yäl asuded. Nyétángéné apwiited, nyétángéné'-e awesen. ¹³ Nyétángéné nhög ne anínií awesen. Nzé mod bō waáb békúú waáb álagsén mó. Ngáne Sángwéé álágséné nyé, nyémpé nyétángéné nyélagsén nhög ne anínií. ¹⁴ Ámín e mímén mésyāēl, nyédaŋ nhög ne anínií. Edəŋge choo élade' chōm ésyāēl. ¹⁵ Krístæ abelé nyédaŋ nsaj ne nhög ne anínií. Né-áó mímē nsaj nítángéné chōm ésyāēl échě nyébéléé alyaged. Nyétángéné nyésagnen-ne Dyōb póndé ésyāēl. ¹⁶ Eyale éche Krístæ ébē nyé á nlém-tê bwám abé ne abé. Nyébenlad échē eyale ne debyéé ásyāēl alyaged ne álél nhög ne anínií. Nyékonné' Dyōb ngäse éche édé á kálag e Dyōb. Nyékonné' Dyōb ngäse éche ékémte' Dyōb ne Krístæ, ne nkáŋge ké níhéé míme mǐpíidé nyé ákemed Dyōb. Nyékonné' mó ásájnén mó ne nlém n̄syāēl. ¹⁷ Kéchéé échě nyéhóbeé, ké'e échě nyébéléé, nyébélé chó á dín áde Sángú Yesue. Nyéságnan Dyōb Titée á dín á Yesu.

Alongé dékōslé áde nyétángéné awój

¹⁸ Nyé bebaád bé bechóm, nyewógne áben bechóm. Né dōo bad ábē bédúbpé Sángwéé bétángéné abel. ¹⁹ Nyé baachóm ábe nyewóó bebaád, nyédaŋ ábēn bebaád, nyéetagté'-e bō ngén.

²⁰ Nyé bänbän, nyewógne áben bésáá ne benyaá áyäl e kékéhéé échě nyébéléé. Né dōo Sángwéé ádáá aá nyébel. ²¹ Nyé bésáá bē bän, nyéekanjé áben bän. Nzé nyékanjté' bō, né nyéshunte bō yäl áte. ²² Nyé betâj, nyewógne áben bewón póndé ésyāēl. Nyéebenlé bō nsón dásō póndé echě bénýinéé nyé ábel békemed nyé. Boj nyébenle bō ne nlém nhög áyäle nén Sángwéé móó nyébagéé edubé. ²³ Nsón ké níhéé míme nyébéléé, nyébélé mó ne nlém n̄syāēl. Nyébélé mó, nyébíi'-e nén bán Dyōb dōo nyébenléé saké baányor. ²⁴ Nyébíi nén bán nyéeküd nsábe míme Sángwéé ákójnédé ábē bad. Krístæ mó adé mod awé nyékoo'é abele. ²⁵ Dyōb dékōgsēn kénzéé awé abelé mbéb áyäl e mbéb míme ábélle. Dyōb déekwognádté modmod.

4

¹ Nyé bad ábe nyewóó betâj ásē echén nyewále áben betâj nyaa echě Dyōb áhedeé, nyécháe'-e bō bwám. Nyébíi nén bán nyémpé nyewóó mod ámín awé nyédií ásē eché.

Paalé awéde' bad nlém á abum

² Nyébélé nyewéed yäl áte á mekáne-tê. Nzé nyékonné'-e nyébáné nlém ne kékéhéé éche nyélângéé Dyōb, nyésagnen-ne mó. ³ Nyékânned-te sémpé ábel nén Dyōb ánedned sé nzii ákal nkalaŋ tângene Krístæ míme bad békénsónténné bōod. Mmē nkalaŋ míme nkaleé móó nkáé boj mbé á mbwøg. ⁴ Nyékonné' nén bán nkale mó bwám nyaa echě nítángéné abel. ⁵ Nyébíi ngáne nyébéléé mekan nzé nyédaŋ ne bad ábe bédúbpé Krístæ. Póndé téé eche etál ébágné ne nyé, nyébenle' bō mekan me bwám. ⁶ Nzé nyáabðo nyékale', nyéched ehób á nsəl, nyékale pôle éche éborje bad nlém á abum. Nzé nyébélé' né, né nyéebíi ngáne nyékwentanné kénzéé awé asédté nyé dyam.

Melenten mé asog

⁷ Tikikuse, mwănned a nlém a Kr̄sto ālāā nyé mam míme mébenlad ne mē hén. Mómpē adíi mbəlede awě abenle Sáŋgwéé ne nlém nhóg nchoo ne me. ⁸ Nlóme' mó áwēn âbel boj áláa nyé ngáne sédíí, áwēd-te nyé nlém á abum. ⁹ Nlóme' bō Onesimus. Onesimus mómpē adíi mwănned a Kr̄sto awesýánē awě dédáá. Mómpē abenle Kr̄stəə ne nlém nhóg. Adíi mod awě abídé áwēn dyad. Bó Tikikuse bélāā nyé mam míme mébenlad hén.

¹⁰ Aristakuse awě súmō bedé á mbwəg hén alénté nyé. Banabase mwănyan mómpē alénté nyé. Memăd nyé aláa tâŋgēne Makəse. Nzé apedé, nyékob mó nken. ¹¹ Yesue awě béchəgeé bán Justus, mómpē alente' nyé. Ábén bad béláán bĕnpen bō bédé bad bé Israël ábe bédúbpé Kr̄stəə, ábe syáābō debele' nsón ákal nkalaj tâŋgēne nkamlen í Dyōb. Békewēd me nlém abum bwâmbwam. ¹² Epafrase mómpē alénté nyé. Mómpē adíi mod awě abídé áwēn dyad, abé-’e mbəlede awe Yesu Kr̄stəə. Akânnad nyé póndé téé. Aá Dyōb děn ábel nyékoj chōm éche áhedeé aá nyébel abíi, nyébel-le chó. ¹³ Mměn mbíde' mó mbój nén mée abelé nsón bwâmbwam áyāle echēn ne áyāl e bad bé Kr̄sto ábe bédé á Laudesia ne á Hirapolis. ¹⁴ Lukas, dógtęe awě dédáá bō Demase, bōmpē bélómmé nyé melenten. ¹⁵ Nyélénted me bănned bé Kr̄sto ábe bédé á Laudesia. Nyélénted-te me Nimfaa, ne bad ábe bédúbpé bésyə̄sl ábe bélome' áwe ndáb. ¹⁶ Nzé nyêmaá enén kálag aláj, nyélóm chó á Laudesia ábel bōmpē beláj chó. Nyémpē nyényin nén bán nyéláá kálag echē nílómmé bad bé Laudesia. ¹⁷ Nyéláa Achipuse bán ányin nén aá mómadé nsón írime Sáŋgwéé ábágé mó aá ábel.

¹⁸ Mē Paale mměn-ee mběnlédé échém ekáá átele nyé mímén melenten. Nyééchatán nén bán ndé á mbwəg. Nsimé í Dyōb móbē ne nyé.

Kálag e'só eché Paale áténlé
Baá T̄esalonika
Ndibned n̄ kálag

Dyad á T̄esalonika dóo ábédé nló mé alonj á mbwóng e Masedonia. Áde Paale ábídé á dyad á Filipi, anké á T̄esalonika ádibé mwembé áwed. Ámbid e póndé, Paale anhidé á T̄esalonika áke á dyad á Beria. Anhidé áwed ámpē áké á dyad á K̄orinto, áwed-taá ákúdé kálag eché mod awé búmō bébèle nsón, Timotie, álómmé mó, âláa mó tāngene mekan míme mébenlad á mwembé míme ndé á T̄esalonika.

Paale antelé mwembé míme ndé á T̄esalonika, enén kálag e'só áwéd bó nlém á abum tāngene adúbe áde bédúbpé Sáñgwéé bédāj-’e mó. Áwēd-te, ankamtén bó nyaa e alongé eché ánwōngé áde ábédé ne bó, ákōj-’e bó mekan alúmed áte tāngene epé éche Kr̄istæ ápéé ámpē, éche êmpéén mpuutéd átinté e mwembé míme ndé á T̄esalonika. Anlúmed bó áte ngáne áwóó nlém áte átim ámbid áwāb ábel boj áwēd bó nlém á abum tāngene mam miempée míme ménjone’ ádab adúbe. Anláá bó mekan míme bétāngéné abel áwóged Dyōb menyinje ne ngáne alongé ádab átāngéné abé asin áde bésineé epé éche Sáñgwéé.

Nkabtid n̄ kálag

Ndibned n̄ kálag 1.1

Meságnen ne mekēnag 1.2-3.13

Elébé tāngene abé á bad bé Kr̄isto 4.1-12

Elébé tāngene epé éche Kr̄istæ 4.13-5.11

Elébé é asog 5.12-22

Nsógtan n̄ kálag 5.23-28

¹ Me Paale, nchoo ne Sailase bó Timotie, me-eé ntenle’ nyé enén kálag. Ntenle nyé bad ábe bédé á mwembé míme ndé á dyad á T̄esalonika, nyé ábe nyébad ábe Dyōb Titéé, nyébé-’e bad ábe Sáñgú Yesu Kr̄istæ.

Nsimé ne nsaj míme Dyōb m̄bē ne nyé.

*Paale aságnan áyāle adúbe
áde bad bé T̄esalonika bérwóó*

² Séságnan Dyōb áyāl e nyé moosyáél póndé té, séhāg nyé á mekáne póndé-té nzé sékânné’. ³ Nzé sékânné’ ádéd Dyōb eched Sáj, s̄ebelé sékamtán nsón míme nyébeléé áyāle adúbe áde nyédúbpé. Sékamtan ngáne edənge éche nyewójné bad bémpeé ébélé nyébèle ntū áwónjgen bó, n̄engáne alyág áde nyélyágé nlém áyāl e epé éche awesyáné Sáñgwéé, Yesu Kr̄istæ, ábélé mekuu méwúú nyé ásē. ⁴ A-baányaŋ, s̄ebíí nén bán Dyōb ádáá nyé apwedé-’e nyé ábē ábē bad. ⁵ S̄ebíí nén áyāle áde sémpeé áwēn boj sékanlé nyé nkalaŋ mí bwám, saké e'yale běnpen bōo sémpeénné. Boj ngíne e Edəadəŋ éche Ésáá chó embél boj sékalé nkalaŋ ne ngíne, s̄enkōj-’e adúbe nén bán kchéé éche séhōbeé édē mbále. Nyébíí ngáne abé ádéd démbēé áde sémbēé ne nyé. Chōm éche ênkāŋ boj ábē n̄ édīi áwónjgen nyé. ⁶ Ne nyé, nyéhídé’áá nyaa e abé eché sénwōngé, nyéhídé-’e abé áde Sáñgwéé. Edəadəŋ éche Ésáá êmbél nyewóg menyinje akob áde nyéñkobpé nkalaŋ míme sémpeénné áwēn. ⁷ Né-óó, abé ádēn démbē n̄engáne elájsén átinté e bad ábe bédúbpé, ábe bédé á mbwóng é Masedonia ne Akaya. ⁸ Nyéé nyékaé boj nkalaŋ míme Sáñgwéé íwógnéd mebwóng miempée. Saké á mbwóng é Masedonia ne á Akaya děmpen-eé íwógnédé. Boj adúbe áde nyédúbpé Dyōb dōmpē áwógnédé hōm ásyāāl. Né-óó, nzom ké pōg eesaá eché séhōbeé ádén akan ámpē tāngene nyé. ⁹ Ábē bad běn bōo bětime ahjōb ngáne nyéñkobpé sé nken áde sépédé áwēn. Béhōbé-’e ngáne nyétimné Dyōb, nyétēdē-’e abele á myōb mé metóm boj nyébenlé Dyōb děn áde ádē á alongé. ¹⁰ Béhōbe-’e ngáne nyésineé epé éche Mwān a Dyōb awé abide ádyōb. Ane Mwān a Dyōb, Yesue, awé asoo’ syáné ásē e nkógsen n̄ Dyōb míme ínhúe’, móō Dyōb děmpuúdté.

2

Paale abelé nsón á Tesalonika

¹³ Nzōm empée edé echē ekəé boj sêbagé Dyōb mesagnen póndé ésyāél. Áde sêmpeénné eyale é Dyōb áwēn, nyênwóg chó, nyékōb-pe chó. Nyenkénkobpé chó nêngáne eyale éche éhuú ne moonyoŋ boj nyenkob chó nêngáne eyale éche éhuú ne Dyōb, ngáne chën-ne ékónté abé. Échê eyale chó-'áa Dyōb ábenladté átînté echên, nyé ábe nyédúbpé, âwóngen nyé. ¹⁴ A-baányan, melemlem mé mam ímme mêmbernléd ne mwembé mí bad bé Dyōb ábe bédúbpé Yesu Krîstæ ábe bédé á Judeya, móō mébénléde ne nyémpé. Nyékudé metake á mekáá ímme ábén̄ bad melemlem ngáne bómpé bénkudté metake á mekáá mé bad bé Israël. ¹⁵ Ábê bad bé Israël bó donge bénwūn Sângú Yesue, bémpeé-'e bewúú bekal b'édadaj. Ábê bad bé Israël-'e bó donge-'áa bennán sé áwâb dyad-tê. Béewógtéé Dyōb menyinge, bétýéeman-ne moosyáél. ¹⁶ Bébèle nê ábel boj séekanlé bad ábe béesé bad bé Israël eyale é Dyōb, ábel boj békudé e'soósor. Bébáde mbéb ámín e mbéb póndé ésyāél, káəjne á asog-ke, Dyōb átângéné bó akógsen.

Paal awóó nlém áte ânyín
bad bé Dyōb bé T̄esalonika

¹⁷ A-baányaŋ, sêhóbe néń bán sêpágnédé nyé á yđl á esój é póndé. Kénée séesaá hőm ahóg ne nyé, sêdíi sêkamtan nyé. Ngáne sénwōŋgē mewémten bwâmbwam ânyín nyé, sênwän áte bwâmbwam ânyín nyé ámpē. ¹⁸ Nén ábédé áyäle sêhedé'áá ape áwën. Mmën Paale, nwané áte ngen ne ngen âpe boŋ Satane enkênháá sé etäl. ¹⁹ Nyéé nyékäá boŋ sêwónj e'lyág bé nlém, nyéé nyékäá boŋ sêbé menyinje, nyéé nyékäá-'e boŋ sékumé ekáá á tâl, áyäle nsábe míme sénonéé á'sō âkud á póndé eché Sângú Yesue ápéé. Nyébën-eé nyékäá. ²⁰ Ne mbále, nyéé nyékäá boŋ sékumé' ekáá á tâl, boŋ sêbé-'e menyinje.

3

¹ Né-ó, áde sénkênhenlé adyee ésebán sêdé ne nyé, sêntí néni báni sêédyee ne sé bén á dyad á Atëns. ² Sénlóm Timotie, awesyáné mwânyaj áwëni. Syáâbôs sêbele nsón ni Dyob âkal nkalañ mì bwâm tâjgene Krîstæ. Sénlóm mó áwëni áwôngén nyé áwëd nyé áte á adûbe-tê ne áwëd nyé nlém á abum. ³ Sêhede báni áwëd nyé nlém á abum âbel bon mímén

metake méebele'-se nyétimēn mbíd. Nyébën nyébíí bwâm nén bân Dyöb ámáá atíí nén aá syáā baásyääl dëékünd mímén metake míme nyékudëé.⁴ Nyébíí nén bân áde sébédé ne nyé, sénláá nyé á'sō é' póndé nén bân sëékünd metake. Nyé bën nyébíí'-e bân nén dën-eé ébénlédé.⁵ Nén dðó dënökäj boj nlóm Timotie. Menkênhenlé nlém akaŋ ámpē, né-ɔó, menlóm mó âhye dé ahed áte ngáne adúbe ádíí nyé. Membel nê áyäle mbáá'áá meé ane awé abele' boj bad béhún á mekägsen-tê, ahèle ahúnéd nyé á mekägsen-tê. Nén délümëd bân sêbelé nsón ngén.

⁶ Bœb-pœ́, Timotie abídé áwēn apedé ámbid áwed, aláŋgé-’e sé kəse e nkalaj, aá nyêdíi nyêdúbpé, nyêdíi nyêdǽ-’e nhög ne anínií. Aláŋgé-’e sé aá nyêdíi nyékamtan sé ne nlém mí bwâm, aá nyêdíi nyêdǽ sé anyín ngáne sémpē sédáá nyé anyín. ⁷ Né-óó, a-baányaŋ, átinté e échëd ndutul ne metake mésyääl, nlém ínwúú sé á abum áyäł echën. Áden adúbe döö áwéde sé nlém á abum. ⁸ Bœb-pœ́, séebé menyinje abé áde sédíi ámīn, ngáne mekuu méwúú nyé ásē áyäle adúbe áde nyédúbpé Sángwéé. ⁹ Bœb sêhele sêságñen Dyöb áyäł echën. Sêságñan mó áyäle menyinje ríme sédíi áyäł echën áwe e’só. ¹⁰ Sêkânné’ nkuu ne mûte, bwâmbwam nén bán séhel ape áwēn ámpē, âbel boj dényínen, séwôngen-ne nyé âbel adúbe áwúú nyé áte.

¹¹ Nhède mée ádesyánē Dyōb, Titéε ne awesyánē Sáŋgú Yesue bélúmed syánē nzii séhel ape áwēn ámpē. ¹² Nhédé mée Sáŋgwéé ábel edərge éche nyéwójné nhóg ne anínií ne bad bémpée ékwōg akwōg ne akwōg melemlem ngáne edərge éche séwójné nyé ékwōgeé akwōg ne akwōg. ¹³ Sêkânné' nén âbel boŋ Sáŋgwéé áwēd nyé nlém á abum âbel nén nyéewóó' atón dé mbéb ké ahóg á yǎl, nyésâŋ-’e á’sō ábe ádesyánē Dyōb Titéε, áde awesyánē Sáŋgú Yesue ápéé ne ábē bad.

4

Nyéwôŋ abé áde áwógte Dyōb menyinge

¹ A-baányaŋ sêhóbe ámpē nén bán, nyên'yágé áwēd nyaa e abé echě nyétáŋgéné awónj, ábel boŋ nyewóged Dyōb menyiŋge. Enén ndín e abé chó'-aá nyewóó. Baoob-pao, sêcháa', sêlânge-'e nyé á dín á Sáŋgú Yesu nén bán, nyébê nyékene' enén ndín e abé á'so. ² Nyéběn nyébíi mam mme sén'yágédtē nyé, sé nêŋgáne bad ábe Sáŋgú Yesue ábagé kunze. ³ Dyōb áhede aá nyébê nêŋgáne bad ábe bésáá. Nyéekábé mesón. ⁴ Nyé mod-té ábíi ngáne ákobee' eche yǎl.* Nyébèle nê nyaa echě etáŋgéné, ne nyaa echě nê débeé nyé edúbé átinté e bad. ⁵ Yǎl échén éebág yǎl éche éwóó' esii bwâmbwam áyǎl e mekan mé ekob é yǎl ngáne bad ábe béebíi Dyōb bewóó'ě. ⁶ Áyǎle ádén dyam, modmod eébénlē mwânyan epandé atéd-te chõm éche édé échě. Sênláá nyé ímmén mekan ngen e'só sêsim-mé nyé etúu áte nén bán Dyōb dékõgsen bad ábe béebele nê. ⁷ Dyōb dénkempwedté syáne' awónj abé á mbinde, boŋ ampwéd syáne' awónj abé áde ásáá. ⁸ Kénezéé awé eékobe ayáge áde séyágté mó, saké moonyon móó ábáá á yǎl, boŋ Dyōb dôo ábáá á yǎl. Dyōb dôo'-e ábage' nyé échě Edáadən éche Ésáá. ⁹ Nzom kē pág éesaá echě n̄tenleé nyé ngáne nyé mod téé átáŋgéné mwânyan adəŋ, áyǎle Dyōb děn ámáá nyé ayáged ngáne nyé mod téé átáŋgéné mwânyan adəŋ. ¹⁰ Á mbále nê děn-naá nyédáá áben baányaŋ bé Krísto bésyáel ábe bédé á mbwógi Masedonia esyáel. Kéne, a-baányaŋ, sêcháa nyé nén bán nyédaŋ bó tómaa nê pónde esyáel. ¹¹ Sêcháa nyé ámpē nén bán mod téé áwōŋ alongé áde ápwíitdédé, modmod eénōnē chõm éche waáb ábeléé, mod téé ábelé-'e mme nsón. Nén dôo sénláá' nyé bán nyébèle'. ¹² Abel áde nyébenlé nén, bad ábe béeédubpe, béebeé nyé edúbé, nyé mod téé ábongé-'e eche yǎl.

Sáŋgwéé ăpě təléd

* 4:4 Nyé mod-té ábíí ngáne ákóbeé eche yěl; Donje á kálag áwóó Nyé mod té ábíí ngáne ácháñgeé mwaád.

¹³ A-baányaŋ, sêhede bán nyébíí mbále tâŋgene bad ábe békédé, âbel boŋ nyéelébê nêŋgáne bad ábe békewóo e'lyág bé nlém. ¹⁴ Ngáne sêdúbpé néŋ bán Yesue anwé, ápuu'-e, sêbíí néŋ bán áde Yesue ápeé, Dyöb débél bad ábe békúbpé ábe békédé, békpuú, béké ne Yesue.

¹⁵ Ayáge áde séyágteé nyé baoab ádii ayáge áde Sángwéé. Ádê ayáge ádii nén bán, syánē ábe dēebé á alongé epun éche Sángwéé ápéé, déebáá á'sō se bad ábe béwédé bébé ámbid.

¹⁶ Sáŋgwéé mwěn ábíd ámín, esaád é ngíne éwōgnéd, ehób éche ángel embáá éwōgnéd, esaád é eloŋ é Dyöb-pe éwōgnéd. Ene póndé dyam dé'só, bad ábe béndübē Krístæø, bépuí.

¹⁷ Ambid enê syáā ábe dedé á alongé ábe dedé á nköjsé, deélatén ne bô, déké ámin á mbag-tê âtán Sáŋgwéé á pemé-tê. Né-'aá débëë ne Sáŋgwéé á ngíndé ne á ngíndé. ¹⁸ Né-óó, nyébenled ádén ayáge âwéđ nhóg ne anínií nlém á abum.

5

Nyébê mbojsén áyāl e epε éche Sángwéé

¹ Baoob-poó a-baányaŋ bé Krísto, nzəm ké póg eésáá âtele nyé âláa nyé póndé ne epun eché rímmén mekan mébenlédté. ² Áyāle nyé běn nyébíí bwâm nén bán epun éche Sângwéé ápagké, ápě täléd, melemlem nêngáne nchîib ápagké nkuu áde mod éesinéé mó.

³ Áde bad béhóbéé nébán, “Nsaj ndé, dyamdyam déesaá áde sébáá’é,” dóo ebébted épi’é bó täléd. Ébē melemlem ngáne e’wé bé achád é’piideé mmwaád awé adé nkog. Modmod éebíd-taá échén ebébted áte. ⁴ Boj a-baányaŋ, nyé pen nyéesaá bad bé mbéb ngáne bad ábe bédé á ehíntén-tê. Né-óó, epun éche Sáŋgwéé ápagké éétané nyé täléd melemlem ngáne nchíb ápagké täléd. ⁵ Nyé baásyääl nyédfí bad bé e’nyínen bé ekíde, nyébé bad bé bín ábe é’kénlé. Syáné déesaá bad bé nkuu ké’e bad bé ehíntén. ⁶ Né-óó, deebág néé bad ábe bédé nêngáne békúne’. Boj syáné détêd póndé décháa-’e éche syáné yöl. ⁷ Nkuu dóo bad békunee, bad ábe mím mó-’e mékóbéé, nkuu dóo bémwáké mím boj mékóbé bó. ⁸ Boj ngáne syáné dédií bad bé bín ábe é’kénlé, syáné décháa éched yöl. Adúbe ne edənge éche édé syáné áte békéb nêngáne mod ahédé mbóté eché békénlé e’kii ákúten tälá póndé e nzum. E’lyág bé nlém-’e ábe nyewóó áyäl e e’soosoŋ ábe nyékudté é’bê nêngáne mod awé ahédé ekóté éche békénlé e’kii. ⁹ Dyöb déntii áá móðsöŋ syáné mbwiined ne awesýáné Sáŋgwéé, Yesu Krístæ. Enkéntíi’é áá mímé melingá mépii syáné. ¹⁰ Yesuc anwé á nló mímëd ábel boj ké nzé édé bán syáné dedé á alongé, ké’e dewédé, dëbë ne mó. ¹¹ Né-óó, nyewéñ nhóg ne anínií nlém á abum, nyewéñ-te nhóg ne anínií áte ngáne nyébél’áá bôód.

*Elébé ne mel*enten mé asog

¹² A-baányaŋ, sêcháa nyé âbe edúbé bwâmbwam wéé bad ábe béwôŋgan nyé. Bóo belyágte nyé, béyägté-’e nyé ngáne alongé ádēn átângéné abé nêngáne bad bé Krísto.

¹³ Nyécháá bó ne édúbé éche échábé ámín, nyédəŋ-’e bó áyāle nsón míme bébeléé. Nyébē nsaj ne nhóg ne aníñíí. ¹⁴ A-baányaŋ, sélâŋge nyé nén bán, nyélêb bad ábe béebelé chömkhöm. Nyéwêd bad ábe béwóó mbwóó áte, nlém á abum. Nyéwôŋgen bad ábe béeuwúú áte, nyéwesen-ne nhóg ne aníñíí. ¹⁵ Nyényin nén bán modmod éétimtëé mbééb áyāl e mbééb. Bon pen nyéwane áte póndé ésyāál âwój nlém míbwâm wéé nhóg ne aníñíí ne wéé bad bésyāál.

¹⁶ Nyébâg menyiŋge póndé ésyâel. ¹⁷ Nyékânné' póndé ésyâel. ¹⁸ Kéchéé éche ébénlédé ne nyé, nyéságnan Dyöb. Mmén mekan móo Dyöb áhedeé aá nyébele' abé áde nyédíí mod nhóg ne Yesu Krîstæa. ¹⁹ Nyéetímte Edædæŋ éche Ésáá áte áyâle nsón mme ébeleré. ²⁰ Nyéebáá' nkalan á yël ímme Dyöb áhóbé aá nyékal. ²¹ Boŋ pen nyékag mam mésyâel mme böhöbeé. Nyéchâñned mam mme böhöbeé mme métâñgéné. ²² Nyéewóó' dyam âbel ne mam mme böhöbeé mme méetâñgene.

²³ Dyōb děn, mó awē abage syánē nsaj ábel nyésâj áyāl e mam mésyāel. Nyébane edəádən ne yāl échēn ésyāel bwâm, éewoó' atón dé mbéb ké ahjog á yāl kéáñne á pónde

echě awesyánē Sáŋgú Yesu Kr̄stəə ápεé. ²⁴ Dyōb áde áchénlé nyé ábεle' ngáne áhóbé, ábεl-le áned.

²⁵ A-baányaŋ, nyékānnad sé.

²⁶ Nyélentad sé ábesyánē baányaŋ bésyāŋ, nyéhē bó tâl.

²⁷ Nlānge nyé á dñi áde Sáŋgwéé nén mεé nyélâŋ enén kálag wéε ábesyánē baányaŋ bésyāŋ.

²⁸ Nsimé míme awesyánē Sáŋgwéé, Yesu Kr̄stəə míbê ne nyé.

Kálag eché elónné ébe eché Paale áténlé

Baá T̄salonika Ndibned n̄ kálag

Kálag eché elónténé ébe eché Paalel ánteléé bad bé mwembé ímme ídé á Tésalonika, ehóbe tângene adúbe áde bad bénwöngé néen bán epe éche Krístæø ápéé ámpé, émáá ape áte. Paalel antelé bad bé Krísto enén kálag átii bó nsôjten ímme bénwöngé tângene ímmén mekan. Ímmén mewémten ímme baahgó á mwembé-te bénwöngé, mêmbełl bó donge á bad bénkwän mekáá áte, bénkëntéd-taá e'boj bé nlém ábe donge á bad bé Krísto bélumté' áá néé dyam. Paalel anlúmed bó áte néen aá, Krístæø ádêhób aá mópag ámpé, ebébtéd ne mod-e-ebébtéd bôð bésébé ape. Ane mod e ebébtéd mó ătängën Krístæø, alúmed-te káéjne lúmtén aá mó mwén-éé módë Dyöb. Paalel ansím bó etúu áte aá bédíi bewêd ádab adúbe áte kénée békudeé ndutul ne metake. Ansím-më bó etúu áte ámpé aá békewäné mekáá áte boj bó mod téé ábèle nsón ábel boj áhel eche yäl atögén, melemlem ngáne mó Paalel ne bad ábe bôðbôð békiele nsón.

Nkabtéd n̄ kálag

Ndibned n̄ kálag 1.1-2

Mekənag ne e'wéd bé nlém á abum 1.3-12

Elébé tâŋgène epε éche Kr̥istəə 2.1-17

Elébé tâ̄ngene abé á bad bé Krísto 3.1-15

Nsógten ní kálag 3.16-18

¹ Mε Paale, nchoo ne Sailasé bó Timotie, mε-εé ntenle' nyé enén kálag. Ntenle nyé bad ábe bédé á mwembé míme ídé á dyad á Tésalonika, nyé ábe nyédé bad ábe Dyōb Titée awēd, nyēbé-'e bad ábe Sángú Yesu Kristə. ² Nsimé ne nsaj míme Dyōb Titée ne míme Sángú Yesu Kristə míbē ne nyé.

Dyōb dékāād bad nyaa echě etáŋgéné

³ A-baányaŋ sétâŋgéné néé sésagnanné Dyōb áyāl echēn póndé téé. Étâŋgéné bán sébel né áyāle adúbe ádēn ákwōge, akwōg ne akwōg, edəŋge-’e éche nyewójné nhág ne aniníí chó-’e ékwōge’. ⁴ Né-ɔó, átintê e mwembé í Dyōb, sébēn sékumne nyé ekáá á tâl tâŋgēne awesēn áde nyewéséné ne adúbe áde nyewóó, ataged áde bétagteé nyé ne metake mésyāl ímme nyekudeé.

⁵ Mmén mekan mésyāäl mélümte' nén bán nyaa eche Dyöb ákáadteé etáŋgéné. Mmén mésyāäl mó-'áá mékäj̄ boj̄ Dyöb átéd nyé née bad ábe békwoñnéde âbé áwē nkamlen. Mmén nkamlen móo níkéá boj̄ nyékudé metake. ⁶ Dyöb ábæle mekan nyaa eché etáŋgéné. Bad ábe bëbæle' boj̄ nyékudé' metake, Dyöb dépiinéd bó metake. ⁷ Dyöb débél nyékudté metake ámpē, äbél-le sé-'e ámpē sseekudté. Nén débenléd áde Sáŋgú Yesue ábíté ádyöb ne éche ángel é ngíne, muú míme íchodne-'e méləjnéd bó. ⁸ Äkōgsen̄ bad ábe bëbáá Dyöb á yĕl bëbáj̄-'e áhíd nkalaŋ mí bwâm míme níhóbe tâŋgene awesýané Sáŋgú Yesue. ⁹ Äkōgsen̄ bó ne metake míme mébë á ngíndé ne á ngíndé. Bëebáá wéé Sáŋgwéé ádií, béenyín-naá ngáne éche ehúmé épédé achab ámīn. ¹⁰ Áde ápëé échê epun, bad bé Dyöb bëbë mó mekenag, bad ábe bëedübpe bësyääl-le, bënyäg bwâmbwam. Nyémpë nyéébë átinté e ábén bad áyäle nyéndübë nkalaŋ míme sénláá'ë nyé.

¹¹ Abé áde mímén mekan mésyāél médíí sé á nlém-tê dão ákáé boŋ sékānnād nyé. Sêkânné bán áded Dyöb âbel nyékwogned âkud bwém é' bwâm ábê áhedeé nyé abele apwed áde ápwédé nyé âbé ábē bad. Sêkânné-'e bán ábenled eche ngíne âbel boŋ mekan mé bwâm mésyāél míme nyéhedeé, adúbe áde nyédúbpé Krístəə nyékud mó. ¹² Sêkânné nén âbel boŋ dín áde awesýánē Sáŋgú Yesu Krístəə áwōŋ edúbé átîntê echēn, nyé-'e ámpē nyéékǔd edúbé áyāl echê. Nsimé míme áded Dyöb ne míme Sáŋgú Yesu Krístəə, móo mébél boŋ nén ábenled.

2

Mod-e-ebébtéd āpɛ

¹ Bɔɔb-pɔó a-baányaŋ, sêtenle nyé tâŋgēne epe éche awesýánē Sâŋgwéé, Yesu Krístæ ápéé ámpé ne aladən áde déladnëé âbé ne mó. Ncháa nyé néñ mëé, ² nyéewámsán apuudted á mewémten, kék' nyéetédnád áte ahób áde bad böhóbeé bán Epun éche Sâŋgwéé émaá ape. Kapóg bad böhémtnan bán sênhób ádén akan áde söhób' áá mam íme Edáedəŋ elyágté' áá sé aá söhób, kék' áde sekánlé' áá nyé nkalanj m̄ bwâm kék' bán sêntelé nyé mó á kálag-tê. Boj sênkëmbenlé nê. ³ Nyéemwág-se mod ábenléd nzii kék' póg ádog nyé. Áyäle Epun éche Sâŋgwéé ápéé éepaá kék'nyne á póndé eché mpuutéd n̄ ngíne mépéé á nköjsé, mod awé mó-'e adé ebébtéd anyinned. Dyöb ámaá atí aá ane mod ákék' á ehyáŋ é muú. ⁴ Ätyéemén kék'chéé éche bad böhágéé bán dyöb kék' kék'chéé éche bad böhagéé edúbé, ábâné-'e eche yäl ámín echâb. Åsöł, ádyéé-'e ásé kék'nyne á ndáb e Dyöb, áchágé-'e yäl aá móó módë Dyöb. ⁵ Nyéechatán néñ bán áde mbéde ne nyé menláá nyé mímén mekan. ⁶ Nyébí dyam áde ácháŋgé ane mod boj eépédé bɔɔb. Ádë dyam ácháŋgé mó ábel ápe á póndé eché etângéné. ⁷ Mekan mé' ekognéd mé ebébtéd mémáá abooted dé abenled. Ane awé acháŋgé mímén mekan abel boj méebenläd bɔɔb, mó ábë acháá mó kék'nyne á póndé eché Dyöb débenle boj áhide. ⁸ Ene póndé-'áá mod a ebébtéd anyinnédtë. Adíi mod awé Sâŋgú Yesue áwūū' ne eché pemë e nsal, abébéd-te mó apen áde yäl épenné mó áde ápéé. ⁹ Mod-e-ebébtéd ápë ne ngíne eche Satane. Åbelé nsón mé edogké álumé eche ngíne, ábel' e'chemlé ne menyáké nyaa ne nyaa. ¹⁰ Ábenléd-të medogké mé ebébtéd nyaa ne nyaa wéé bad ábe ádâb alongé débôó'ë. Ádâb alongé débôó áyäle böhmbâj mbále akob, ábel boj békud e'soosoj. ¹¹ Né-ɔó, Dyöb dêmbeł böhónj mewémten mé mewusé mé ngíne ábel boj böhûbe metóm. ¹² Nén débël bad ábe böhédubpe mbále boj bêtimé' böhögé menyinge ábel mbéb, békud nkôgsen.

Dyöb ápwédé nyé âkud e'soóson

¹³ A-baányaŋ, nyé ábe Sáŋgú Yesue ádáá, sétáŋgéné sésagnān Dyōb póndé téé áyéł echēn. Séságnan mó áyéłe apwedé nyé bad bé Tesalonika âbé bad bé só âkud e'sooсоj ángíne e Edəádəŋ éche Ésáá âbel boj nyébê ábē bad ábe bésáá. Ambéł-lę nyékūd e'sooсоj adúbe áde nyédúbpé mbále. ¹⁴ Apwedé nyé âkud e'sooсоj mbwiined ne nkalaj m̄ bwâm míme sékánlé nyé. Abelé néñ âbel boj nyémpē nyébê ásē e ehúmé éche awesýánē Sáŋgú Yesu Kr̄istəa. ¹⁵ Né-čó, a-baányaŋ, mekuu méwúu nyé ásē nyéhíde-'e ayáge áde sékúdē, boj sémpē sêyáged nyé. Sêyágté' áá nyé akale áde sékánlé' áá nyé ne atele áde séténlé' áá nyé kálag. ¹⁶ Awesýánē Sáŋgwéé, Yesu Kr̄istəa mwěn ne Dyōb Titéę awéđ, mó awě adáé syánē aběnlédé mímē nsimé âbe syánē e'wéđ bé nlém á abum ábe béemaá', ábē-'e syánē e'lyág bé nlém ályág nlém áyéł e mam mé bwâm. ¹⁷ Áwéđ nyé nlém á abum awéđ-tę nyé áte póndé esyāäl âbel ne âhób mekan mé bwâm.

3

Paal aá bad bé Kr̄isto békânnad bó

¹ A-baányaj, tângene mekan mémpēe, nhóbe nén meé nyébê nyékânnad sé nén bán nkalaj m̄ bwâm m̄me Sângwéé m̄bê ríkanlad átîntê e bad bémpēe nkag á'sô, bad békob-pe mó ne edûbé melemlem ngáne émbëë ne nyé. ² Nyékânné-'e ámpë nén bán Dyöb ásoj sé ámekáá mé bad ábe bëbëbë nlém ne ámekáá mé e'bëbtéd e' bad, áyâle saké bad bësyääl ábe bëwóge nkalaj m̄ bwâm bédûbpe mó. ³ Bon Sângwéé abele' ngáne áhóbé aá móðbël, áwëd nyé áte ákâä-'e nyé ábel bon Satane eébëlë nyé ebébtéd. ⁴ Sësumé nlém nén bán Sângwéé ábel nyébël këchée éche sélângé nyé bán nyébël, nyéëbë nyébël-'e chó. ⁵ Sângú Yesu Krïstæ mwën ábel nyésõnten ngáne Dyöb ápédé nyé adøj, nyéwesen-ne melemlem ngáne ânwesénné.

Paal aá mod atóngéné nsón abel

⁶ A-baányaŋ, sésíme nyé etúu áte á dín áde Sáŋgú Yesu Krístəə, nén bán nyéēdōlē bad bé Krísto á yěl ábe békwané mekáá áte béehidē-’e ayáge áde séyágté nyé. ⁷ Nyé běn nyébíí bán séē nyétáŋgéné ahánten. Sénkénkwánné mekáá áte áde sébédé ne nyé. ⁸ Sénkêndyáá chōm é mod éche séesábpéé, boŋ pen sêbelé’áá nsón ne ntú n̄ ngíne, nkuu ne mûte âbel boŋ séetāgté nyé modmod. ⁹ Sêbelé’áá nén saké nén bán sénkénwóngé kunze âláa nyé nén bán nyéwóngen sé. Boŋ sêbelé’áá âbel boŋ kékheé éche sébeléé ebé nêngáne elájjsén éche nyémpé nyétáŋgéné ahíd. ¹⁰ Áde sébédé ne nyé, sêyōgké’áá nyé etúu asím áte nén bán, “Mod awé abáá nsón abel, béebagé mó chōm éche ádyéē.” ¹¹ Sêhóbe nén áyäle sêwogé nén bán doŋge á bad bédé átinté echén ábe békwané mekáá áte, béebeléé chōmchōm, běhág-ke nsəl áyäł e mekan mé bad. ¹² Échén ndín é bad sésíme bó etúu áte, sélâŋge-’e bó á dín áde Sáŋgú Yesu Krístəə nén bán běbwəg yěl, bébelé m̄mbab nsón âkud ndyéed e epun é běn. ¹³ A-baányaŋ, nyéekómé’ âbel mboŋ. ¹⁴ Nzé mod abáá chōm éche sétélé á kálag-tê wén ahíd, nyébane mó m̄id á yěl. Nyéewóó’ dyam âbel ne mó âbel boŋ ákwâg. ¹⁵ Kénê, nyéetédé mó née mod a ekoyí. Boŋ pen nêngáne awen mwányaŋ a Krísto, nyéláa mó bán átēd póndé.

Melenten mé asóg

¹⁶ Sángú Yesue mw  n, m   aw   abage sy  n   nsan  ,   be ny   nsan   p  nd   esy    l ne    menzii m  sy    l. S  k  nn  -   b  n mw  n   be ne ny   moosy    l.

¹⁷ Me Paale, mm  n-  e ntel   m  m  n melent  n ne   ch  m ek  a. N  n d  o ad   n  ng  n e'chem   y  l e   ch  m k  lag   sy  l. N  n d  o ntele   k  lag. ¹⁸ Nsim   m  me awesy  n   S  ngw  e  , Yesu Kr  st  a, m  b  ne ny   moosy  l.

Kálag e'só echě Paale áténlé
Timotie
Ndibned n̄ kálag

Timotie abédé kódemod echě endúbé Krístæ. Ambíd á Esia Maino. Nyaá abédéé mmwaád a Israél, sáá-’e mod a Grikia. Ahöjné áá Paale ábelé-’e nsón n̄ Dyöb ne mó. Kálag e'só echě Paale áténlé Timotie ekoo' metón méláán ahób.

Dyam d̄é só, ene kálag esíme bad etúu áte átéd póndé ne ayáge dé metóm áde ábédé á mwembé-te. Ádén ayáge dēnladtén mekan r̄mme bad bé Israel böhídé’áá ne r̄mme bad ábe béesé bad bé Israel böhídé’áá. Ádē ayáge ábédé néen bán nköjsé r̄mme bad bédíí áte ídē ebébté, bán nzé mod ákünd-te e'soósor atárgéné abíí mekan mé e'korjnéd ábelé-’e mekan n̄engáne ákii dojge á ndyéed ne ádyee ésebán mod awoo' mmwaád kē’e mmwaád awoo' nchóm. Enén kálag ehóbe ámpē ngáne bad bétárgéné mwembé alyáged, ngáne bétárgéné Dyöb edúbé abe, ne nyaa e abé echě bad ábe belyágte mwembé ne ábe békongan á mwembé-te bétárgéné awóy. Ásoged, Paale alébe Timotie ngáne átárgéné mbalede awe Yesu Krístæ a bwám abé ne nsón r̄mme átárgéné abel átinté e bad ábe bédúbpé Krístæ.

Nkabtéed n̄ kálag

Ndibned n̄ kálag 1.1-2

Elébé târgene mwembé ne bad ábe belyágte mó 1.3-3.16

Timotie akudé elébé târgene r̄mme nsón 4.1-6.21

Paale alómmé Timotie melenten

¹ Me Paale, me-eé ntelé enén kálag. Ndíí mbapée a nlómag awé Yesu Krístæ. Ndake echě nkudé ábel r̄mme nsón ehúú ne Dyöb, mó awé asoo syáné áyäl e mbéb, ehúú-’e ne Yesu Krístæ, mó awé adé syáné e'lyág bé nlém. ² A-Timoti, we-eé n̄tenleé enén kálag. Edíí n̄engáne awem mwán mwén, adúbe áde édúbpé Krístæ. Nsimé, ngol ne nsanj r̄mme nhúú ne Dyöb Titée awéd ne Yesu Krístæ, Sángwéé awéd r̄mbé ne we.

Paale alébe Timotie târgene
 bemeléede bé metóm

³ Áde nkágé’áá á mbwág e Masedonia menláá we meé élyag hê á dyad dé Efesus ábel boj weémwág weé dojge á bad belyágte’ ayáge áde déetârgene. ⁴ Weémwág-ke-se ábê bad békébté póndé ákal pôle éche eesé mbále ne pôle éche éhóbe târgene ábab betaa ábe mod eeheléé-se atóy. Nzé belyágte échê ndín é pôle épene mpenten, éewōngānné bad áwónj alongé áde álumte bán bédúbpé Dyöb. ⁵ Nzom echě enkäj boj nláá we meé éyágte bad ayáge áde átárgéné edíí ábel boj bad bédøj nhóg ne anínií. Etárgéné edønge awóy éche ébíde’ á nlém r̄mme ísáá, nlém r̄mme mbíí dyam áde átárgéné ne áde déetârgene, mbíí-’e adúbe áde adé mbále. ⁶ Dojge á bad békéidéé mímén mekan, nê ábelé békáné nzii ahób áde békébeé e'kukú é’ mekan. ⁷ Ábê bad békóó nlém áte ábê bemeléede ábe belyágte mbéndé é Dyöb boj béesonteneé mekan r̄mme bélângéé bad, béesonteneé-’e mekan r̄mme békébeé bán békóó abíí.

⁸ Debíí néen bán mbéndé eboó nzé bad békénlad chó ngáne éhednad-té. ⁹ Debíí’e néen bán Dyöb déebeléé mbéndé áyäle bad ábe békéle’ ngáne áhedeé. Boj Dyöb ábelé mbéndé áyäle bad ábe békéidé mbéndé ne bad ábe békébelé’ ngáne áhedeé. Abelé mbéndé áyäle bad ábe békéle Edádøj é Dyöb áte, ne bad ábe békéle mbéb. Békéle mbéndé áyäle bad ábe békéle mbwág n̄ Dyöb áte, ne ábe békébe Dyöb mekan mé mbéb áyäl. Dyöb ábelé mbéndé áyäle bad ábe békéle’ abab besáá ne benyaá, ne bad ábe békéle’ bad béképée. ¹⁰ Békéle mbéndé áyäle bad ábe békéle mesón, baachóm ábe bénajnad baachóm béképée, bad ábe békéle bad boj bésom bó née betây, bad ábe békéle metóm, bad ábe béképée melé mé metóm á póndé e nkáásé ne bad ábe békéle’ kékéé éche eesé

nchoo ne ngáne ayáge á bwâm áhóbeé. ¹¹ Ádê ayáge ádê nchoo ne nkalaj mí bwâm míme Dyöb ábágé më âkale bad. Mmê nkalaj mí bwâm íhuú ne Dyöb dé ehúmé áde bad békeneé.

Nságñen áyâle ngol e Dyöb

¹² Nságñan Yesu Krístæ, Sángwéé awêd, mó abage me ngíne ábel mímmê nsón. Nságñan mó áyâle anyín áde ányiné aá mëbél mó nyaa eche etáñgéné, ápwéð-te me âbele mó. ¹³ Ambel nê, kénéé édíi bán ngen e'só nhóbeé áá mó mam mé mbéb áyâl, ítagté bad ábe bédúbpé mó, míbenlái-te e'yle bé mbéb áyâl echê. Boj Yesu Krístæ anwóg me ngol áyâle menkämpaá adúbe awój, menkembíi'-áá chörn éche íribeléé. ¹⁴ Sángwéé ambé mímmê nsimé míme méesé ahægtén, ábel ndúbé Krístæ, ábel'-é aá nlümed bad bémpé edænge áyâle dedé nhög ne Yesu Krístæ. ¹⁵ Yesu Krístæ ampé a nköjsé ásoj bebel bé mbéb. Mmén-ne mbédé mod awé atómtánnáá mbéb abel tómaa moosyâl. Enén pôle edé mbâle detáñgéné'-é chô akon dé adúbe. ¹⁶ Boj Dyöb dénwôg me ngol áyâle ahedé'áá aá Yesu Krístæ álúmed aá mímmê nwesen méewoo'é asog áyâl e me awé ntómtánnáá mbéb abel tómaa moosyâl. Nén démbenlái nêngáne elánsén wéé bad ábe bédubé, béküd-te alongé áde déemaá'. ¹⁷ Ehúmé ne edubé bëbë ne Dyöb á ngíndé ne á ngíndé. Mó adé kâj eché edé á ngíndé ne á ngíndé. Mó'-áá adé ane awé bad bëenyinné dïd awé eewág-ke. Mwëmpen-ee áde Dyöb. Êbë nê.

¹⁸ Á awem mwän Timoti, mekan míme nlüngéé we meé ébel, médii mekan míme Dyöb dénlâa'é bad aá bëhâb bán mébenlái áyâl echöj. Ábë e'yle é'wëd we áte. Abenled áde ébenladte ayáge á mbâle é'bel we ébë nêngáne mod awé awane nzum bwâm. ¹⁹ Ényin-ne nén weé móchâjnédé ne adúbe ádê édúbpé Krístæ, ébële'-é mekan bwâm ngáne nlém nlüngé we. Donje á bad bëebeléé ngáne mímbab nlém nlängé gó. Nén ákâá bëchénné ádab adúbe bëebíi'é wéé bëkagké. ²⁰ Átînté e bad ábe íhóbeé nê, nhög adé bán Himenose, aníñíi'-é bán Alesandaa. Ábén bad ntëdté gó á mekáá míme Satane ábel boj bëbíi nén bán éeboo'é áhób Dyöb mekan mé mbéb á yâl.

2

Elébë tângene ábe Dyöb edubé

¹ Dyam dé'só, nwéde we aláa nén meé nyékânnad moosyâl. Nyékânnad bad bémpé. Nyékânnne nén bán Dyöb álome nyé bwëm ábe nyétognéné, nyéságñan-ne mó áyâle mboj míme ábenleé nyé ne bad bësyâl. ² Nyékânnad kâj é bad ne bad bësyâl ábe bédé á nkamlén. Nén débél alongé áde syáné débë nsaj ésebán mehób médé, débelé ngáne Dyöb áhedeé, débagé'-é mó edubé á menzii mësyâl. ³ Ákânned bad ábóó. Nén áwógte Dyöb ádê ásóó syáné menyinje. ⁴ Dyöb áhede aá moosyâl ákud e'soosoj bësöjtene ne mbâle eché Eyale é Dyöb ékaleé. ⁵ Ébyéené nén bán Dyöb ahog dëmpen dôa ádê. Mod nhög mwëmpen-naá adé awé apëene Dyöb ne baányoñ á nchemten. Ane mod adfi Yesu Krístæ. ⁶ Ambé ádê alongé áwé á nló mí moosyâl. Ene kwéed eché awédé a nló mí moosyâl enlûmed á pôndé eché etáñgéné nén bán Dyöb áhede aá moosyâl ákud e'soosoj. ⁷ Áyâle nén dôa ákâá boj Krístæ álomé me néé mbap  a nlómag áke dé akal mímmê nkalaj tângene adúbe á Krísto ne mbâle, wéé bad ábe bëesé bad bë Israel. Dyam áde íhóbeé ádê mbâle. Meekâl  metóm.

⁸ Né-   h  m k   áhéé adé bad b   Kr  sto b  ladne  , nhede n  n meé baach  m ábe b  b  g   ech   y  l   bele Dyöb b  nyene mek  á am  n b  bage mek  ne. Áb   bad b  et  ngene   meling   ah   á nl  m k  a b  et  ngene   bad ab   ábe b  senle'. ⁹ Nhede'-é ámp   n  n meé beba  d b  h  g mesaj mímm   bad b  nyinn   n  n bán m  t  ng  n  . Mm  b mesaj m  t  ng  n   b   y  l ak  ten bwâm éseb  n m  t  de baach  m nl  m á abum. B  enabp   esid é nl   nyaa ech   et  m   áte, b  eh  g bw  m é' g  l, b  ew  a' nsaj míme b  benl   b  n b   mel  á m   et  gn  n, b  eh  g-ke mb  t  e éche ét  mt  n   nkun ab  . ¹⁰ Boj pen mímb   mbelt  d mí bwâm n  l  med n  n bán b  d  i beba  d ábe b  benle Dyöb. ¹¹ Mmwa  d at  ng  n   ády  s   pi  b, ás  d  d y  l boj áw  gl  n ngáne baach  m b  y  g  te  . ¹² Meeh  be   n  n meé mmwa  d aw  o kunze

âyáged káa âkamlen baachóm. Mmwaád atáŋgéné ádyēē piſb. ¹³ Nhóbé nén áyāle Dyōb dénsēbē Adamē ahág boj áhágé' Ife. ¹⁴ Ébyéené-'e nén bán mmwaád móo Satane ândogké boj abóó mbéndé, saké Adamē. Né-óó mmwaád mó ambóó mbéndé. ¹⁵ Boj Dyōb désōŋ alongé dé mmwaád á póndé e achád nzé adíi asumé nlém wéé Krístæ alúmté-'e edəŋge ne bad bémpēe, eewoo-'e atón dé mbéb ké ahág áyāl.

3

Paale atěnlé Timotie tâŋgène belyáged bé mwembé

¹ Nzé mod ahede aá móbē nlyáged a mwembé, né apwedé kase e nsón. Enén pôle edé mbále. ² Baoob-poó, mod awe alyágte mwembé, atáŋgéné abé mod awé bad béehbēē mekan mé mbéb á yäl, atáŋgéné-'e dásō mmwaád nhóg awoj.* Abé mod awé akóbe yäl, abé mod awé adole dyam áte bwám, abé mod awé adélté yäl áte, abé mod awé akobe beken, abé-'e mod awé abíe bad ayáged. ³ Eebág mod awé abagé yäl á amwé á mím, káa mod awé apeene epuutéd. Boj ábê mod awé apwiitédé, ábê-'e mod awé eesenlé'. Eebág mod awé atómténé mòné adəŋ. ⁴ Atáŋgéné abé mod awé acháŋgé eche ndáb bwám, ábōngé-'e ábe bän nyaa eché bewógnéé mó běbagé-'e mó edúbé á menzii mésyāāl. ⁵ Nhóbe nê áyāle nzé mod eehéle eche ndáb akamlen, chán-nō áhenlé mwembé n̄ Dyōb akamlen? ⁶ Eetáŋgéné se abé mod awé adúbpé Krístæ ekóólé ekóólé. Ésebé nê, né ábē kúmbe, chó ěbél ákwé, ákūd-te nkógsen melemlem ngáne Satane ánkweé boj ákūd-te nkógsen. ⁷ Ábad ámpē, ane mod atáŋgéné abé mod awé káóŋne bad ábe béesé á mwembé běbagéé edúbé. Nén débél eekudté akwágké éehún-naá melám ríme Satane áhiínédé mó.

⁸ Bad ábe bewóngan ábel nsón á mwembé, ébê melemlem néé bó. Bétáŋgéné abé á bwám awój, běbé-'e bad ábe běhóbe dyam ne nlém nhóg. Béetáŋgéné bad ábe ábê běbágé yäl á amwé á mím, káa bad ábe bédé metoj áyāle mòné. ⁹ Bétáŋgéné běhíd mbále eché Dyōb ábeléé boj bad běbíi tâŋgène mewémten ríme áhedeé aá bewóng ne abé áde áhedeé aá bewóng. Bétáŋgéné běbel nê ne nlém ríme mbií chörn éche étáŋgéné. ¹⁰ Belyáged běděhób bán běpwede bad ábe bewóngan á mwembé-te, bétáŋgéné bad ábe běhedeé apwed asebe dé asimen. Nzé bényíné nén bán mod awé bésímné eewoo'é awusé ké ahág á yäl nê ane mod akwognédé ábel rímmé nsón. ¹¹ Kéájne ábāb bebaád bétáŋgéné abé á bwám awój. Béebág bebaád ábe běhóbe bad ámbid, běbê bebaád ábe békóbe yäl, běbé-'e bebaád ábe bad běhèle-se bésǖm nlém á yäl ne kchéé éche běbèleé. ¹² Mod awé awóngan ábel nsón á mwembé atáŋgéné dásō mmwaád nhóg awój. Atáŋgéné abé mod awé abóngé ábe bän ne bad bémpēe ábe bédé áwe ndáb bwám. ¹³ Nhóbe nê áyāle nzé bad ábe bewóngan ábel nsón á mwembé běbèle nsón bwám, bad běbē bó edúbé. Nén débél bewóng nlém áhób tâŋgène adúbe áde bewóó ne Yesu Krístæ.

Dyam dé e'kojnéd áde děntim abyēn

¹⁴ Á Timoti, kénée édíi bán nwóó nlém ápe áwōŋ mwampin póndé, ndíi ntenle we enén kálag. ¹⁵ Ntenle we rímmén mekan ríme étáŋgéné abel ábel nén ké meélyøge ape, ehele ebíi nyaa e abé eché bad bě Dyōb bétáŋgéné awále. Bad bě Dyōb bōo bédé mwembé n̄ Dyōb, Dyōb ádē-'e á alongé. Mmē mwembé móo ndé nēngáne akon ne nsáaned ríme nícháŋgé mbále Eyale é Dyōb bwám. Áhed dō-'aá ene mbále ébwógnédé. ¹⁶ Dyōb ábélé syáá debíi nén bán rímmé nkalaj ndé etógnén bwâmbwam. Ndé nén bán:

Krístæ ampě, abé-'e moonyon,

Edéadəŋj éche Ésáá énlümēd sé nén bán adíi Mwǎn a Dyōb,
ángel-le énnýin mó.

Bénkalé bad bě nkōŋsé bésyāāl, běndubé-'e mó.

Dyōb démpuúd mó ákē-'e ádyōb ne ehúmé ésyāāl.

* ^{3:2} Atáŋgéné-'e dásō mmwaád nhóg awój káa atáŋgéné dásō mwaád awoj ngen pög ne ngen ésyāāl káa mod atáŋgéné dásō mwaád mwěmpen anaŋned.

4

Paalę alébé Timotie târjene bemeléede bé metóm

¹ Edéadəŋ éche Ésáá énhōb bwâm nén aá, mímén mesú dojge á bad bétedé adúbe á mbále ádāb, bédubpē bad ábe býágte ayáge dé metóm. Ádén ayáge dōo e'déadəŋ bé mbéb é'hedeeé aá bédúbe. ² Ábén bad bébélé' byánán békale mbále boj metóm móo békaleé. Nzé býágte chörn éche étârjene bélumte nén bán béebíi'é nhæjlén átinté chörn éche étârjéné ne éche étârjene. ³ Ábén bemeléede bé metóm, býágte bad bán béewójné, bán bad béedyág-ke dojge dé medyé. Dyōb dênhäg rímē medyé ábel nén bad bedyág mó. Bad ábe béebíi nkalaŋ mí bwâm, bédubpē mó, bésagnanne Dyōb áyále rímē medyé. ⁴ Ábê bemeléede béeétârjeneé, áyále kéchéé éche Dyōb áhágé ébóó. Nzom ké pój eesaá ábaj dojge dé medyé. Né-óó, désagnen Dyōb akud áde dékudeé ábén bwém. ⁵ Mod eékié ndyéed, áyále Eyale é Dyōb ne mekáne békale chó éboj adyé.

Paalę aláŋgę Timotie
ngáne átârjéné mbalede
a bwâm awe Krístəe abé

⁶ Nzé eyágte bad ábe bédubpē Yesue rímén mekan né wěbē mbalede a bwâm awe Yesu Krístəe. Wéwédnēd-te áte á edéadəŋ-té áyále nkalaŋ rímme édubpē ne áyále ayáge dé eyale é Dyōb áde éhídeé ámbid. ⁷ Weewóó dyam dé abelen ne pôle éche élumte bán bad beedubpē Dyōb, ne e'yokél é' pôle. Boj pén eyágke' póndé té ábel ngáne Dyōb áhedeé aá ébel. ⁸ Édé etógnén mod áyáged yǎl e nköjsé, áwéd chó áte. Boj étomténe etógnén abé nzé mod awédé yǎl áte ábel ngáne Dyōb áhedeé áyále e chörn ésyáel. Débel ngáne Dyōb áhedeé áyále, Dyōb áhábé aá móobé syáné alongé áde déemaá', bōob ne á póndé eché ehúe'. ⁹ Ádén dyam áde nhóbé nén áde mbále. Nyétârjéné dō adúbe. ¹⁰ Né-óó, nén dōo ákáá boj dényodé, déwanté' e yǎl áte áyále delyágé nlém ne Dyōb áde ádé á alongé. Mó abage baásyáel e'soosoj, bwâmbwam bad ábe bédubpē mó.

¹¹ Nyín nén weé mólāŋgē bad ábe bédubpē rímén mekan, weé móyágtē-'e bō mó. ¹² Weémwág-se modmod anyín we nkónjtéd áyále édíi kódemod. Boj pén lúmed bad ábe bédubpē abé a bwâm ábel boj bōmpē békale melemlem. Nyaa eché éhóbéé dyam, abé áde éwóó, nyaa eché édáá bad, nyaa éche édubpē Dyōb ne abel áde wéebeléé mekan mé mbinde ábê née elájsén weé bad ábe bédubpē. ¹³ Ényín nén weé mólāa' Eyale é Dyōb nzé bad béládné á mwembé-te. Élāŋge bō chörn éche échê Eyale é Dyōb éhóbéé, éyágte-'e bō kááj né mpedé. ¹⁴ Weétedtē nsón rímme Dyōb ábágé we née nde, áláá bad mekan rímme Dyōb dênhōbpē aá éláa bō á póndé eche belyágé békale mwembé bémbaránne we mekáá á nló. ¹⁵ Belé rímén mekan ne nlém nhág ábel boj baásyáel bényin nén bán ebélé mó bwâm, ekeene-'e mó á'sō. ¹⁶ Étôn yǎl acháá bwâm ne kéchéé éche éyágteé bad. Kéené' né á'sō, ábel boj Dyōb ásoj we alongé, ásōj-'e alongé á bad ábe éyágteé.

5

Paalę aláŋgę Timotie ngáne átârjéné
dojge á bad acháá á mwembé-te

¹ Weekánné mod a mbáá áte. Cháá mó melemlem ngáne ehélé-se echáá sóó mwén. Cháá bad ábe bëepede we kôd née baányoŋ békale baachóm. ² Cháá bebaád bémbaránne nhéjné éhéléé-se echáá nyoó mwén. Écháá-'e ngondéré née baányoŋ békale bebaád. Weewójné bō mekan mé mesón á mewémten.

³ Bekúd ábe bëewóó bad ábe bénone bō éwōŋgan bō. ⁴ Boj nzé nkúd achyaá bán káá bán ábe ábê bán, bétârjéné mó atøgen. Nén ádé dyam dé'só áde bad ábe békale ngáne Dyōb áhedeé bétârjéné abel. Ábab benyaá ne besáá bëntøgen bō, bōmpē bétârjéné bō atøgen. Nén áwógté Dyōb menyinje. ⁵ Nkúd awé adé mwëmpen boj eewóó mod awé awôŋgan mó, weé Dyōb dëmpen dōo ályágéé nlém. Ábê ákânné', áhedené-'e mó nwôŋgen nkuu ne müte. ⁶ Boj nkúd awé asólté yǎl á mekan mé nköjsé, awédé á edéadəŋ, kénéé

ádíí á alongé. ⁷ Láá bad bé mwembé mímén mekan ábel boj mod eehóbé bó mekan mé mbéb á yél. ⁸ Nzé mod a Krísto eétogné bad bé túmbé ábē, bwâmbwam áde abum a ndáb, né alûmte nén aá móodúbpéé Krístæ. Ene ndín e mod mímë mbeltéd nílumte nén bán adíi mod awé abelé mbéb tómaa mod awé eedúbpé Krístæ.

⁹ Nkúd awé éhele-se etój weé atáñgéné nwôngéen akud, adíi nkúd awé atómé móom mé mwé ntóób. Atáñgéné abé-’e nkúd awé a nwój nchóm nhógo mwémpen. ¹⁰ Ane nkúd atáñgéné abé mmwaád awé bad bényíné bán míme mbeltéd ímbóó. Atáñgéné abé mmwaád awé apééné bän ámín bwâm, abé mmwaád awé akobe beken awe ndáb bwâm, abé mmwaád awé asudte yél, ábenlé bad bé Dyöb nyaa eché áwóbpé’áá bó mekuu. Atáñgéné mmwaád abé awé awóngéné bad ábe bémbe á ndutul-tê, ábé-’e eche yél ábel mekan mé bwâm. ¹¹ Boj weetoo bekúd ábe bédé etum nêngáne bekúd ábe békud nwôngéen. Weetoo bó áyäle nzé bêwóó esíí áwój bechóm ámpé bêebeléé Krístæ ngáne éhednadté. ¹² Nzé bêwóó-’e bechóm bêmpé né békwoñnéde ákud nkógsen, áyäle bêelöntéé akag áde bénhëe nén bán bêebelé Krístæ. ¹³ Saá-kaá nê dëmpen, bêwóó abé áde bêebeléé chöm, bêhyóme ndáb ne ndáb. Ámín enê bêhóbe bad ámbid, bêhág nsäl áyäl e mekan mé bad, bêhóbe-’e mekan míme bénkéntáñgéné ahób. ¹⁴ Né-oó, ndéá meé e’tum bé bekúd bêwóóñ bechóm, bêchyáa bän, bêbônge-’e échâb ndáb. Nén débél bêebeléé mekan míme bad ábe békóó syáné bêhôbëe syáné mekan mé mbéb á yél. ¹⁵ Nhóbe nén áyäle ábén bekúd dojge bêbôotéde mekan abel míme Satane áhedeé aá bêbel. ¹⁶ Mmwaád ké ahéé awé adúbpé Krístæ awé awóó bekúd áwé abum á ndáb, atáñgéné bó atógen, saké nén bán ápêmted mwembé mímë nted. Nén débél mwembé etál ábóo bekúd ábe bêewóó bad ábe bêbônge bó.

¹⁷ Mwembé míbe bad bémbeáá ábe belyágte bó bwâm edúbé ne nsábe, bwâmbwam ábê belyágded ábe bêbèle nsón mé akal ne áyágded Eyale é Dyöb. ¹⁸ Édé nê áyäle éténléde á kálag e Dyöb nén bán, “Weetadé nyag nsäl eche esâlte ngun.” Éténléde ámpé nén bán, “Bebel bé nsón bétáñgéné míbab nsábe akúd.” ¹⁹ Weedúbpé mekan míme bad bêhôbeé belyágded bê mwembé áyäl, éetómeé né mbóoj ébe káa éláán étyéémé nén bán nê ádë mbále. ²⁰ Nzé mod ámbáá a mwembé abelé mbéb, káné mó áte á’sô é’ mwembé ábel boj bad bémbeáá bêmpé bêbâj mbéb abel. ²¹ Nlänge we á’sô é Dyöb ne Yesu Krístæ ne á’sô é ángel éche épwédnédé meé ébel chöm eche étáñgéné abel, ésebán ekwognad modmod. Weétimé-’e modmod ambid. ²² Weewámsán mod mekáá abán á yél áwóged mó mod a mbáá a mwembé. Nzé ebéle nê boj ane mod atímé mbéb abel, ne wémpé ebéle mbéb. Mmøy weébëlë mekan mé mbinde. ²³ Weemwág mendib mwémpen ámpé. Mwág mwă mím ábel nén abum áde ákwaglan we áte póndé ésyäel ámaa.

²⁴ Dojge á bad bêbèle mbéb á nhéne míme moosyaél ábíí, békáad-te bó. Ábíñíí-’e bêbèle mbéb á mesoñm-tê míme bad bêebíí’é kááj né bêhédé áte. ²⁵ Melemlem nê dão dojge á bad bêbèleé mboj míme míbyééné ne moosyaél. Bêmpé-’e bêbèle mboj a mesoñm-tê míme bad bêebíí’é kááj né bêhédé áte.

6

¹ Bad ábe bédé betanj bésyäel bétáñgéné bêbage bad ábe bédíí ásé echâb edúbé ábel boj modmod eehóbé Dyöb mekan mé mbéb áyäl, eehóbé-’e ayáge ádëd mam mé mbéb áyäl. ² Betanj ábe bédé ásé e bad ábe bédúbpé Krístæ bêewémtan bán ngáne ábab besáá bédíí bad ábe bédúbpé, bêetáñgénéé bó edúbé abe. Bétáñgéné bó abele tómaa ngáne bêhélé’áá-se bêbèle bad ábe bêedúbpé Krístæ. Bétáñgéné abel nê áyäle ábab besáá ábe bêbenléé bédíí bad ábe bédúbpé Krístæ bêbé-’e bad ábe ábab bembælede bédáá-’e.

*Paalé ahóbe tâñgène ayáge dé
metóm ne nhon míme nítáñgéné*

Éyágte bad mímén mekan éwëd-te bó nlém á abum âhid mó. ³ Dojge á bad bédé ábe býágte’ ayáge áde déetâñgène. Ádab ayáge déesaá melemlem ne ayáge áde awed Sáñgú

Yesu Kr̄istəə áde ayágte bad âbel ngáne Dyōb áhedeé. ⁴ Ábê bad bélóné ne kúmbe, béebíi-'áá dyamdyam. Nyaa eché ábê bad bédáé mpenten mé e'yale ne nselag edíi bó néé nkole. Nén ápεεne kónjí átinté echâb, ápεεnē mehób átinté echâb, bad béhɔbē-'e baáb mehób mé mbéb áyāl, běwōjnē nhóg ne anínií mewémten mé mbéb. ⁵ Nén ábεle-'e běpentan póndé té nyaa eché běheléé-se běbíi chōm éche étáŋgéné. Béeheléé-se bésójtén chōm éche édē mbále ne éche éesé mbále. Běwěmtan bán nzé běbenle Dyōb, né běbē nhōn. ⁶ Boj mod ábē menyinge bwâmbwam nzé abεle' ngáne Dyōb áhedeé nzé atéde-'e aá kéchéé éche mówóó ékwógnédé mó. ⁷ Depedé á nkōjsé, deépεεnē chōmchōm, nzé dewédé-'e, déeswéénné chōmchōm. ⁸ Né-óó, nzé dewóó ndyéed eche dédyāgkē ne chōm éche déhāgkē á yěl, né nē ákwógnédé syánē. ⁹ Boj bad ábe běhede nhōn asud, běbelé běhún á mekāgsen-tē, běbē ngáne bad ábe běkwédé melám. Běbelé běhēdē mekan abel híin míme mééboo ne mekan híin míme méébojne bó. Nén ábεle bětage bwâmbwam. ¹⁰ Mod kē ahéé awě awóó nlém áte bwâmbwam âbud mōnē awónj, abεle ábεle' e'běbtéd é' mekan âkud mímē mōnē. Né ábεle donge á bad bětédté âdúbe Kr̄istəə, békúdē-'e ndutul híin á nlém tē.

Paalε abagé Timotie elébē

¹¹ Boj wε, á-Timoti, mod a Dyōb, báj ábê e'běbtéd é' mekan. Nané mekan ámbid míme métáŋgéné á'sō é' Dyōb, édər̄ bad, éwesan póndé ésyāel, épwiited-te. ¹² Wéd yěl áte ébē ésum nlém wée Dyōb ébenle-'e mó. Alongé áde déemaá' áde Dyōb ábágé wε, wéd dó achâjnēd. Dyōb děmbě wε ádē alongé áde wěnhōbpē á'sō é' bad híin wée mōdūbpē Kr̄istəə. ¹³ Á'sō é' Dyōb, mó awě abage bwěm ésyāel alongé, ne á'sō ábe Yesu Kr̄istəə, mó awě ankal mbále á'sō wée Pontus Payledē, nlâjge wε nén meé, ¹⁴ ébεle chōm ésyāel ngáne Dyōb áhóbé aá ábel, káéjne póndé eche awēd Sáŋgwéé, Yesu Kr̄istəə ápεé. ¹⁵ Āpě á epun éche Dyōb Titée átíídé aá ápε, Dyōb ane awě ábē bad běbagé mekenag. Mwěmpen-naá adé Nkamlēne a mbáá a nkōjsé nsyāel. Mó adé Kōj e kōj ésyāel abé-'e Sáŋgwéé a besáŋgwéé bésyāel. ¹⁶ Mwěmpen-εé awóó ngíne ábē á alongé á ngíndé ne á ngíndé, adé-'e á e'nyínen bé ekide ábe é' pene bwâmbwam nyaa eché modmod éeheléé-se ápē běnben. Mó adé ane awě modmod éenýinēé mbēd, modmod eéhēlēé-'e-se anyín mó. Edúbē ábē ne mó, ábē-'e á nkamlen á ngíndé ne á ngíndé. Ébē nē.

¹⁷ Sím bad ábe bédé nhōn etúu áte nén wée běekumé ekáá á tēl, běesumé-'e nlém áyāl e mímāb nhōn, bwěm ábe é'maa', boj běsum mímāb nlém wée Dyōb. Mó adé ane awě abage syánē chōm é'syāel éche détógnéné ábel boj débē menyinge. ¹⁸ Láá bó wée běbele mboj áwójgen bad, ngáne bad ábe běbúdē mōnē awónj běbágkē nhōn, mekan mé bwâm míme běbeléé míbē mímāb nhōn, běwōj-'e nlém áwójgen bad ne kéchéé éche Dyōb ábágé bó. ¹⁹ Nzé bad běbele nén ábē nēngáne békóngé mímāb nhōn ádyōb. Nén débē nēngáne nsáaned míme nísúmnédé bwâm ábel boj nísôgtēn mekan míme méhúé' á'sō ábel békud alongé děn áde ákójté alongé abé.

²⁰ A-Timoti, nsón míme Dyōb ábagé wε tōj mó acháə. Weewóó póndé ne mehób míme bad běhōbeé míme méewōngān ábe Dyōb edúbē, ne mehób míme donge á bad běhōbeé bán chōm ehóg édē mbále, bad běmpēe-'e běhɔbē bán chōm épēe chōo édē mbále. Boj bó moosyāel běbele awusé nzé běhōbe bán, "Mε-εé ndé mod awe abíi." ²¹ Donge á bad ábe běwěmtan bán běbíi mam míme médé, boj běn běekoó'é adúbe áde Dyōb á mbále ahíd.

Nsimé n̄ Dyōb míbē ne nyé moosyāel.

Kálag eche előnténé ébę echě Paale áténlé Timotię Ndibned í kálag

Kálag eche Paale áténlé Timotie eche elonténé ébe éhbé bwâmbwam tângene elébé éche ábageé Timotie néé mod awé búmō bëbèle nsón í Dyöb ne awé awôngan mó. Dyam áde Paale ákoo ahób áwëd-te ádíi nwesen. Alébe Timotie awéde-’e mó nlém á abum aá ábë ábenle’ Yesu Krïstæ ne nlém nhög. Paale akoo Timotie etíú asím áte aá átêd póndé ne mpenten mé eyókél mme méewöngän bad bon ntimé mpuutad bad. Ámín e mímén mésyääl Paale akamtan Timotie áyäl e ádë alongé, mó Paale nyaa eche ádúbpé Krïstæ, awesen áde áwesanné, edënge éche álúmté wéé bad ne metake mme ákudeé akal áde ákaleé Eyale é Dyöb.

Nkabtéd ní kálag

Ndibned n̄ kálag 1.1-2

Mekənag ne élébé 1.3-2.13

Elébé ne asím dé etúu áte 2.14-4.5

Paalε ahóbé tâŋgène eche nyaa 4.6-18

Nsógtən 4.19-22

Paale alómmé Timotie melenten

¹ Mε Paale, mbapēe a nlómag awē Yesu Kr̄istəə mε-εé ntélé enén kálag. Dyób áhede aá nkálañ tēngene alongé áde áhóbé aá dekudé abé áde dédií nhóg ne Yesu Kr̄istəə.

² A-Timoti, wε-εé ñtenléé enén kálag. Edíi awem mwán a nlém. Nsimé, e'boŋ bé nlém ne nsaj míme ñhuú ne Dyōb Titée ne Yesu Kr̄istəe awesýánē Sáŋgwéé, míbê ne nyé.

Paal aságnéné Dyöb, awédé-’e Timotie nlém á abum

³ Nságnan Dyōb áde m̄bənleé ne nlém nhóg melemlem ngáne ábêm betaa békénlé'áá mó. Nságnan mó póndé té áyāl echōj̄ nzé nkânné', nkuu ne mûte. ⁴ Nzé nkämténé ngáne wénsudénné bon échii, mbelé índēj̄ we anyín bwâmbwam, âbel bon nílôn ne menyinge.

⁵ Nkamtan nén meé ekoó Yesu Krístǣ adúbe, rímē melemlem mé adúbe mó̄ nyoó ambáá, Lɔise, ne nyoó, Yunise, bómpé bénwōngé. Bɔəb-pɔ́, mbíí meé ádē adúbe dǎo wémpé éwóó. ⁶ Enén nzɔ́m chó ekéá boŋ nkamtán we nén meé nde eché Dyōb démbéé we áde mémbānné we mekáá á nló, ébē ébenlad chó. ⁷ Dyōb déebéleé aá syánē déwōñ mbwōg áte âbele mó. Boŋ pen échē Edəádəñ ébage syánē ngíne âbele mó, ébele delûmte bad edənge, ébele-’e dechhângé échesyánē yĕl.

⁸ Né-ɔ́ó, weewógé e'sôn âláá bad tâ̄ngene awesyánē Sáñgwéé, Yesu Krístəə. Weewógé-’e e'sôn áyāl echêm kénée nídíí mod a mbwōg áyāl eché Krístəə. Boj pen ne ngíne eché Dyöb ábágé wé, kwéntén âkud metake ne me akal áde dékaléé nkalaŋ m̄ bwám. ⁹ Dyöb dāo ásóó syánē, achélé-’e syánē ábē ábē bad. Abelé néñ saké áyāle dyam áde débélé boj áyāle m̄mē ntíi mën m̄me ám̄benlé nkörjsé nídêhób bán m̄bootad. Abage syánē m̄mē nsimé alóm áde alómé Yesu Krístəə á nkörjsé áyāl e syánē. ¹⁰ Baōb-pe, Dyöb álúmté syánē nsimé apé adé Yesu Krístəə, Nsoode awé̄d ápédé. Abódté ngíne e kwééd, abé̄nlédé-’e nkalaŋ m̄ bwám âlúmed syánē alongé áde déemaá.

¹¹ Dyōb ápwédé me nēŋgáne mbapēe a nlómag ne meléede âkal mímê nkalaŋ mí bwâm.
¹² Enén nzəm chó'-áá ekəá boŋ nkudé mímén metake. Boŋ meewógéé akwágké ké ahógo
áyâle mbíí ane awé ínsúmáe nlém áyâl. Mbíí'-e nén meé ákəá chōm éche ábágé áwêm
mekáá kâáŋne á epun é nkáásé. ¹³ Ayáge áde átâŋgéné áde n'yágté we, ékon dó acháe.
Ábê nêŋgáne elársén éche étâŋgéné ahíd. Édúbe Yesu Krístəə, édəŋ'-e bad bëmpée abé
áde édií mod nhógo ne Yesu Krístəə. ¹⁴ Edədəŋ éche Ésáá édé syánē áte, chóá éwôŋgan
we âbel boŋ nkalaŋ mí bwâm míme Dyōb ábágé áwôn mekáá écháe mó bwâm.

¹⁵ Ebíí wéé bad bé Krísto bésyāél bémbarj me á yěl áde míbédé á mbwógi e Esia. Faygeduse bó Hemogenes bómpé bémbarj átinté e bad ábe bémbarj me á yěl. ¹⁶ Nkánne' nén meé Dyöb áluménd ndáb eché Onesiforusé ábē e'boj bé nlém áyale awédé áá me nlém á abum póndé té. Enkénkwágénné me áá ndé á mbwógi. ¹⁷ Áde ápédé á Roma peén, ambootéd me ahed kááj anyín-ne me. ¹⁸ Nkánne meé Dyöb áluménd mó ábē e'boj bé nlém á Epun é nkáásé. Mmörj ebíí-'e bwám nwóngen ríme ábagé'áá me á dyad dé Efesus.

2

Paalé aá Timotie atángéné

abé sánze e bwám eche Yesu Krístæ

¹ Bøob-poá á awem mwán Timoti, nsimé ríme Yesu Krístæ ábagé we, míbê íwede we áte. ² Mekan ríme wénwógi néé n'yágtéé ekud é bad tângene Krístæ, wémpé yágéd bad mó ábe bédé bad ábe bómpé békerele býágéd bad bémpe. Bébê bad ábe býágéd-te bó. ³ Wémpé ékwénten ákud metake, ébê ngáne sánze eche Yesu Krístæ. ⁴ Sánze eché edé á nsón, ebelé éhedé áá mówóged awé mod ambáá menyinge, né-óó eesóléé mekan áte ríme bad ábe béesé sánze békere. ⁵ Nyaa empée eche éhele ébél Krístæ edé nêngáne mod awé anyagte mehélé ne bad bémpe. Éehélléé-se ákud nsábe éetóméé né ahídé mbéndé éche bétíidé ányaged mehélé. ⁶ Mbéllé-nzag awé abelé ntú móo atángéné mod a e'só abé ákud mbote. ⁷ Döl mekan áte ríme nkáásé áyale Sángwéé ábél esóntén mó mésyāél.

⁸ Kamté nén wéé Yesu Krístæ ambíd á myaa ríme Dabide, Dyöb dêmpuúd-te mó áde awédé. Mmén nkalañ mí bwám móo nkaleé bad. ⁹ Akal áde nkaleé mmén nkalañ mí bwám dño ákáá boj nkudé metake kááj békere-ké me á mehan nêngáne mod awe abóó mbéndé. Boj modmod éehélléé-se ahé Eyale é Dyöb bengbengobé. ¹⁰ Né-óó, nwéséné metake ríme nkúdé ábel bad ábe Dyöb ápwédé, bómpé békud e'soosoj ábe Yesu Krístæ ábeé bó, béké-'e ásé e ehúmé éche ébél ne á ngíndé. ¹¹ Enén pôle edé mbále, edé nén bán,

"Nzé syáné dewédé ne Krístæ,
né syáné deebé-'e á alongé, ne mó.

¹² Nzé dedé dewesan mekan ne mó,
deékamlén ne mó,
nzé debáá mó á yěl
né mó-'e ábáñ syáné áyáll.

¹³ Nzé déebéllé' ngáne Krístæ áhedeé áá débel,
mópen ábél chom esyáél éche áhóbé áá móobé,
áyále eehélléé-se abáj eche yěl á yěl."

Paalé aá Timotie ábél mbéllé-nsón a bwám

¹⁴ Ébél ébèle bad ábe bédúbpé békamtan mmén mekan. Ésím bó etúu áte á'só é' Dyöb wéé béepentán nhógi ne anínií tângene e'yale. Ene ndín e ntántén eewóngánné boj pén ebébte adúbe áde bad ábe bémóglan. ¹⁵ Wéé yěl áte ábel Dyöb ányin nén aá edé mod a nsón awé eékwágé ábel nsón ríme ábeléé, ébél-'e mod awé ayagte nkalañ mí mbále nyaa eché etángéné. ¹⁶ Weewóó dyam ábel ne e'kukú é' mehób, ne mehób ríme méesé etógnén áyále nzé bad békere éché ndín é mehób, né débél bénabpé mekan abel ríme Dyöb déehedéé áá béké. ¹⁷ Donge á bad ábe békere échén ndín é mehób bédíi Himenose bó Filetus. Mmab mehób médií nêngáne sii eche edyág mod áte ésebán emaa'. ¹⁸ Bétédíté adúbe áde átárngéné, bétímé býágte bán syáné ábe dedúbpé, Dyöb ámáá syáné apuud. Enén ndín e ayagte ebébte donge á bad adúbe. ¹⁹ Boj kéné, mekan ríme Dyöb ámáá anabe, méehéylánné. Áwedé mím-naá e'yale éténléde nén bán, "Sángwéé abíí bad ábe bédé ábél bad," éténléde-'e nén bán, "Bad bésyáél ábe békere bán bédé ne Sángwéé, bétángéné bésog mbéb abel."

²⁰ Ándáb e mod ambáá, donge á mísé ádé áde békénlé gól, donge sîlva, donge-'e ádé áde békénlé hyag. Békénlad donge nzé dyam dé edubé ádé, donge-'e békénlad póndé kékéé. ²¹ Nzé mod kékéé asogé mekan mé mbinde abel, ábél nêngáne mísé ríme

bébenladté nzé dyam dé edúbé adé. Ane mod abelé asán, eche Sáŋ-’e abenlad mó. Ane mod abâg mbojsén âbel dyam á bwâm ké áhéé.

²² A-Timoti, weébélē mekan mé mbéb ímme kódébad ébèleé. Boj pen éwane áte ébèle mekan ímme métângéné, ébê édúbe Krístæ, édæŋ bad bémpeé, ébê-’e nsaj ne bad. Éhíde ímén mekan nchoo ne bad bémpeé ábe békânné Dyöb ne nlém nhó. ²³ Weewóó dyam âbel ne e’yókél bé mpenten mmé méewoo-’e nwônjgen ké nhó áyâl e mod. Ebíí weé mpenten ímpene nselag. ²⁴ Syáné ábe dedé-’e bembalede bé Dyöb deésenl. Boj pen, detângéné débôj nlém ne mod ké ahéé, detângéné déyâgté bad bwâm déwesán-ne bad. ²⁵ Déyâgte bad ábe bétýéeman syáné âbel boj békânné mam ímme böhóbeé syáné á yâl méesaá mbâle. Décheden bó yâl nzé debele nê. Délyâg nlém nén bán Dyöb débél böhém ádâb awusé böhâjlén, bósójtén-ne mbâle eche eyale é Dyöb ékaleé. ²⁶ Nén débél debyéé dépêbó á nló-te, békânné Devâlê á melám tê. Devâlê ammad bó akób ádogé-’e bó âbel mekan ímme áhédé’áá áá békâl.

3

*Paalé ahóbé tângene ebébtéd
éche ébâ á e’pun békâl*

¹ A-Timoti, nhede mceé ébíí nén weé á e’pun békâl, mekan mbebé ebébtéd. ² Ene póndé bad békâl ábe bédâá chom, ábe bédâá mâné, ábe bédé kúmbe, ábe bédé epame, ábe békâl nsel áte, ábe béeowgné ábab besâá ne benyaá, ábe béebagé mesâgnen áyâl e chomchom, ábe békâl ngâne Dyöb áhedeé. ³ Bad békâl-’e ábe békâlmté bad bémpeé edâng, ábe béeowó nlém n̄ ngol, ábe békâl bad metóm áyâl, ábe békâl yâl akób, ábe bédé ekaj, ábe beedâá bwâm. ⁴ Békâl ábe békâl bad ntûré, ábe békâl ehohó é abé, ábe békâlmtan bán békâlmténé abé, békâl ábe bédâá menyinje mé nköjsé, beedâá’ Dyöb. ⁵ Bad békâl ábe békâlmté byánán békâl ngâne Dyöb áhedeé boj békâlwaá bán ngíne e Dyöb áhâjlén ádâb alongé. Weekâg échén ndín é bad bénben. ⁶ Ábén bad donge ádâ ade adoge bad, bésol áwab mendâb bédoge bebaâd ábe béeowó debyéé ábe békâl áwâd-te. Ábén bebaâd békâl mbéb bwâmbwam nyaa eche ímme mbéb ídénléde bó née nted. Mewémten mé mbéb mó ne móo nkamlan bó. ⁷ Békâl Meyâge nyaa ne nyaa boj békâl ayâge á Dyöb á mbâle abí. ⁸ Ngâne Janesé bó Jambres békâlmténé Mosee bôd, melemlem nê dôo ábén bemeléede békâl metóm békâlgné ayâge á mbâle. Mewémten mé mbéb móo békâl. Dyöb ábâá bó á yâl áyâle békâlgné adûbe awo. ⁹ Boj békâlmté bad dásô á esón é póndé áyâle bad békâlmtan échab edimdim, melemlem ngâne êmbenlédé ne Janesé bó Jambres.

Paalé adíi alébe’ Timotie

¹⁰ Boj we a-Timoti, ehidé ayâge ade n'yâgté bad bwâm, ehidé abé ade íwóó, ehidé-’e chom éche nhedéé abel áwêm alongé. Ebíí weé ndúbpé Dyöb, ebíí awesen ade íwesanné, edângé éche n'lûmtéé bad. Ebíí ngâne nkâá nlém áyâl e nsón ímme mbeléé. ¹¹ Ebíí ngâne bad békâlmtéé me, ebíí-’e metake ímme nkudeé áyâl ené. Ebíí ndín é mekan éche békâlmtéé me á myad mé Antyog, Ekoniom ne á Listra. Ebíí ngâne ménkangé nlém áyâl e metake ímme ménkudté áwed. Boj Sângú Yesue ansón ádêm alongé ásé e ímme metake mésyâdl. ¹² Ne mbâle mod ké ahéé awé abele mekan ngâne Dyöb áhedeé abé ade adíi ne Yesu Krístæ, atângéné ákud metake ámekâá mé bad. ¹³ Boj e’békâlmtéé é’bad ne bad ábe bédoge’ échab yâl, bénabpé mekan abel ímme métângéné ebébtéd abé, bédoge bad, bad bémpeé-’e bédogé bó. ¹⁴ We pen a-Timoti, ébâ ábèle mekan ímme éyâgké ímme ébíí-’e nén weé méde mbâle, áyâle ebíí bad ábe békâlgné we mó. ¹⁵ Ebíí-’e weé se ámwendemé móbâi chom éche eyale é Dyöb édâi. Échén eyale é Dyöb chôo ébágé we debyéé ásôjten nén weé Dyöb ásóó we áyâle édúbpé Yesu Krístæ. ¹⁶ Chom ésyâdl éche békâlmtéé á kâlag e Dyöb ehúú ne Dyöb. Éwôngan áyâged bad, éwôngan áláa bad ímmab mewusé, éwôngan bad átii mewusé ímme békâlmtéé, élângé-’e bad ábel mekan ímme métângéné. ¹⁷ Eyale é Dyöb éwôngan ábel boj mod awé abenle Dyöb ábâ mbojsén ákwogned-te ábel nsón m bwâm nsyâdl.

4

¹ A-Timoti, á'so é' Dyöb ne Yesu Krëstæø, mó awé ákäad bad ábe béwédé ne ábe bédé á alongé, á dín áde mó awé äpë ámbid abé-'e nkamlene a moosyæál, nkoo we rímmén mekan aláa meé: ² Ékale' nkalaj ím bwâm ké áde bad bédáá mó awóg ké'e áde beedæ'ë. Ébel bëbíí bán chöm éche éhóbeé édé mbále, ébel bésôg mewusé abel, éwéde-'e bó nlém á abum, éyágte-'e bad rímmén mekan ne nwesén nísyæél. ³ Póndé épë echë bad bëehedté bán béwôg ayáge áde átângéné, boj pen bëbelé' mekan ríme rímbab nlém rílángé bó aa bëbel. Bemeléede-'e ábe bédáá bán bélângje bó mekan ríme bédáá awóglén bëñ ne bënnáa bëwöglanné. ⁴ Bad bëbâñ mbále e Dyöb awóglén, bëbâg metúu âwóg pôle é metóm.

⁵ Bon wé a-Timoti, écháø echonj yäl bwâm póndé ésyäøl. Éwesen metake, ébele nsón m̄ mod awé akanle bad eyale é Dyöb ébele-’e nsón nísyäøl m̄me Dyöb ábagé we áá ébel.

⁶ Me pen, póndé emaá me ape eché békéé me ngáne ndé, póndé emaá me abé benben átede adén alongé. ⁷ Néé mod a nsón awé Krístəø, nwané nzum e bwâm, mmadé nsón míme Krístəø ámbeé me aá míbele mó. Nhídé-’e adúbe nyaa eché etáŋgéné. ⁸ Bəøb-pe, nsábe n̄sine me, míme n̄lûmte néñ bán mbele nsón míme n̄táŋgéné ngáne Dyöb áhedéé. Mmê nsábe móo Sáŋgwéé, mó awé akáadte bad nyaa eché etáŋgéné ábeé me á epun é nkáásé. Saá-kaá mm̄empen ábeé mó boŋ ’abé káéjne bad bésyəäl ábe bésine’ échē epe.

Paale alébe Timotie

⁹ A-Timoti, éwan áte éwámsen ape áwêm. ¹⁰ Nhóbe nén áyāle Demase abáá me áyāl akií á dyad á Tesalonika áyāle adəé mekan mé nkōjnsé. Kresense akií á mbwóğ e Galesia, Tituse mó-'e ákē á dyad á Dalmatia. ¹¹ Lukase mwěmpen mó adé ne me. Nzé epag, épēen Makəse áyāle šwōngēn me áyāl e nsón míme ínwóó. ¹² Nlómé Tikikuse á Efesus. ¹³ Nzé epag, épīinéd me echem kóte. Mentedé chó á dyad a Troas á ndáb wée Kaapuse. Épīinéd-te me nhíbe ní kálag, bwâmbwam ní ngob é nyam. ¹⁴ Alesandaa awe alúe e'kii abelé me ebébtéd bwâmbwam. Sájgú Yesue škōgsen mó áyāle mbéb míme ábelé. ¹⁵ Wémpē étéden mó póndé áyāle antyéémén sé bwâmbwam áyāle nkalanj míme sekaleé.

¹⁶ Ngen e'só eche ntyéémé a nkáásé modmod enkénkwognédté me. Moosyáél ambáj me á yäl. Nkánne néñ meé Dyöb álagsen bó. ¹⁷ Kéné Sángwéé ambé ne me, ábē-'e me ngíne. Néñ démbél menhél nkalaj mí bwám akal nyaa eché bad ábe béesé bad bé Israel bénwögké mó. Sángwéé anhúd-te me á nsəl n̄ ngii. ¹⁸ Sángwéé ăsōj me alongé áyāl e ebébtéd ké éhéé eche étán me ăkeén-ne me áwē nkamlen mí míñ ne nsan̄. Edúbé ébē ne mó á ngíndé ne á ngíndé.

Melenten mé asóg

¹⁹ Lentéd me Priskaa bó Akwilaa, élented-te me abum á ndáb áde Onesiforus. ²⁰ Erastus me anlyëg á dyad á Körinto, nítëdë-'e Trofimus me anlyëg á dyad á Miletus, áyële akönlé'á.

²¹ Éwan áte ényîn nén weé mópedé áwêm, ahéb á ngíne ádêhób bán ápag. Yubuluse, Pudense, Laynuse, Klodia ne bánned bé Krïsto ábíníí bésyääl bélénté we.

²² Sáŋgwéé ábê ne wε. Nsimé n̄ Dyōb mbê ne wε.

Kálag eche Paale áténlé

Titus_ε

Ndibned n̄ kálag

Titus_ε eebédeé mod a Israel boj antím mod a Krísto, áwōngān Paale, búmō bébelé nsón n̄ Dyōb. Paale antelé Tituse enén kálag alyág áde ánlýāgkē mó á mbwógré Kret ânōn nsón m̄ mwembé. Enén kálag ekoo' metote méláán anōn á dīd.

Dyam dé só, Paale akamtan Tituse nyaa e abé eché belyáged bé mwembé bétáŋgéné awój, tanje ngáne bad bé Kret bénwōngé abe dé mbéb. Paale alébe-'e Tituse ngáne átáŋgéné bad nyaa ne nyaa aléb á mwembé-te. Ábén bad bédíi bechun bé bad, kódébad ne ngɔndére, ne betâj. Ásóged, Paale alébe Tituse ngáne abé á mod a Krísto átáŋgéné abé bwâmbwam ábé nsaj ne nhógré ne aníníí, ábel ekoyí éebāg, mpenten méebāg, nkabén-ne méebāg á mwembé-te.

Nkabtéd n̄ kálag

Ndibned n̄ kálag 1.1-4

Belyáged bé mwembé 1.5-16

Nsón m̄me bad téé bétáŋgéné abel á mwembé te 2.1-15

Elébé ne asím dé etúu áte 3.1-11

Nsógtén 3.12-15

Paale alómmé Tituse melénten

¹ Me Paale, mbalede a Dyōb ne mbapēs a nlómag awé Yesu Krístəə, me-eé ntelé enén kálag.

Yesue ampwéđ me, alóm-me me ábel boj adúbe áde bad ábe Dyōb ápwéđé ákag á'sō ne ábel boj békíi mbále tâŋgene Yesue, békere' ngáne Dyōb áhedeé. ² Nén ábele bad bé Krísto bérwōj e'lyág bé nlém ákud alongé áde déemaá', dō Dyōb, mó awé eékálē metóm ánhōbpē aá móðbě, nkōnsé índéhób bán mbootad. ³ Á póndé eche etáŋgéné-'e Dyōb dêmbele aá bad békíi mímē nkalaŋ. Dyōb dêmbele rímē nkalaŋ áwêm mekáá, me-'e nkál mó ne kunze eche mó Dyōb, awesáné Nsoode ámbeé me.

⁴ Ntenle we, Tituse, awem mwán a mbále á adúbe áde syáné moosyáél déwóó. Nsimé ne nsaj m̄me n̄hiúú ne Dyōb Titée ne Yesu Krístəə awé Nsoode, m̄bē ne we.

Paale ahóbé tâŋgene nsón m̄me Tituse
ábenlé á mbwógré Kret

⁵ Mentedé we á Kret, mbwógré eche mendíb mélájnédé ábel boj étí mekan m̄me méhedenad abel, épwed belyáged bé mwembé dyad té. Ékamten ngáne ménlāā'we meé ébel. ⁶ Nlyáged atáŋgéné abé mod awé béeheléé sé békobén awusé. Atáŋgéné awój dásō mmwaád nhógré, ábe bän-ne bétáŋgéné bédúbé Yesue. Bétáŋgéné abé awój áde modmod éehéleé-se ahóbé aá bérwúú nló áte ké'e aá bédé epuutéd. ⁷ Nlyáged a mwembé nêŋgáne mod awé ahíde nsón n̄ Dyōb ámbid, eetáŋgené néé áwóó awusé á yěl. Eetáŋgené epame abé, ké'e abé mod awé awâmsan alij. Eetáŋgené-se abé mod awé abagé yěl á amwé á mím káá mod awé apesne epuutéd. Eetáŋgené-'e se abé metog. ⁸ Boj pen atáŋgéné abé mod awé akobe beken abé-'e mod awé adəá akan á bwâm. Atáŋgéné abé mod awé abíe' dyam abel, abé mod awé abele mekan m̄me métáŋgéné, abé mod awé asáá, abé-'e mod awé akobe eche yěl. ⁹ Atáŋgéné abé mod awé aksóo nkalaŋ m̄ bwâm, nkalaŋ m̄me bad bétáŋgéné nlém asum áyāl adúbe ngáne býágté mó mó. Nén débél áhél bad bérpée ahébe áhíd nkalaŋ m̄ bwâm nyaa eche etáŋgéné áhél-le mewusé m̄me bad ábe bétáŋgan m̄mē nkalaŋ abíded áwed.

¹⁰ Nhóbe nén áyāle bad híin békewenteneé áhíd nkamlen m̄me belyáged bé mwembé. Bédíi bad ábe bérhóbe e'yale ábe bérwóó nsônten bédoge-'e bad. Bad híin ábe býágté enén ndín e ayáge bédíi bad ábe bédé á epépé éche éhóbe nén bán bétáŋgéné bad ayag.

¹¹ Weémwāg se ábē bad býágte áyāle bébékte bad bé Krísto híin ndáb áte ayáged áde býágteé mekan míme béewóo'é kunze áyáged. Býágte' échê ndín e mekan ábel békud mōnē. ¹² Mod nhógo awé ambíd á Kret se' boód awé abédé mod a debyéé, anhób aá, "Bad bé Kret békale metóm póndé ésyāel. Bébéké nlém á abum, bédíi bad ábe béehele nsón, bedyág-ke ndyéed bwâmbwam." ¹³ Ábē e'yale ábe ane mod ánhôbpé áyāl e ábē bad é'dé mbále. Né-oo, bad ábe bédúbpé Yesue boj böhíde ádê ayáge dé metóm, ékon bó mímab mewusé aláa ábel bédúbe ayáge áde átângéné. ¹⁴ Nén débél beedúbée pôle é metóm éche bad bé Israél, böhíd-taá mekan míme bad ábe békáá ayáge á mbále áyāl böhóbeé. ¹⁵ Ne mod awé asáá, chöm ésyāel ésáá boj ne mod awé eekénle áte ne awé eedúbpe, chömchöm áyāle mímab mewémten ne nlém mEEKÉNLÉE áte. ¹⁶ Bad ábe býágte ádê ayáge dé metóm böhóbe nén bán békí Dyöb, boj mímab mbeltéd ílúmte nén bán békibí'é mó. Bébèle mam míme bad békóó, békibéé-é ngáne Dyöb áhedeé, békibéé dyam á bwám ké ahógo abel.

2

Paale aá Tituse áyágte ayáge áde átângéné

¹ A-Titus, éyágte bad ayáge áde átângéné. ² Éyáged baachóm bémbará wéé böhýáe échab yél bwám, békibele mam nyaa eché bad békagéé bó edubé béké-é bad ábe békibéé mam abel. Békag á'só bédúbpé Krístæ, békag á'só bédæ bad békibéé, békag-ke á'só békibéé metake míme békudeé áyāl e adúbe áde bédúbpé. ³ Éyáged-te bebaad bémbará wéé mímab mbeltéd ílúmed nén bán békage Dyöb edubé. Eláa bó wéé böhóbë nhógo ne aníníi mam áyāl ábébed bó dín, békagé-é échab yél á amwé á míim. Boj eláa bó wéé býágte bad mam míme métângéné. ⁴ Békibele mímén mekan ábel boj böhel e'tum é' bebaad ayáged ngáne bétângéné ábab bechóm ne ábab bán adøj. ⁵ Býáged bó bán béké bebaad békibéé wónjé békibéé. Bésum nlém wéé ábab bechóm békibéé, býáged-te bó nyaa eché bétângéné mímab mendáb aboo bwám, nyaa eché békibéé bebaad ábe békibéé yél ásé e ábab bechóm. Nzé bebaad békibele mímén mekan mésyāel, bad böhóbpé nkalañ míme Dyöb ábágé bad dyam dé mbékibéé áyāl.

⁶ Melemlem ébel kódébad écháe yél. ⁷ Á mbeltéd mímôn-é nísyāel, ébel mekan mé bwám nyaa eché bad böhídté mímôn mekuu. Nzé eyágte, chöm éche éyágteé étângéné ébékibéé, ébékibéé-é mod awé ahíde mekan ámbid bwám. ⁸ Ényin nén wéé ayáge ádôj átângéné ngáne bad békibéé etál áhób wé mam mé mbékibéé áyāl. Nén débél bad ábe bétângan wé békibéé áyále nén békibéé nzii áhób syáné dyam dé mbékibéé á yél.

⁹ Éyáged betâj nén wéé békibéé ábab besáá á menzii mésyāel, békibele-é mam míme mewógté bó menyinge. Béetângeneé néé békibéé békibéé bó. ¹⁰ Béechibnē-é bó. Boj pén bétângéné alúmed bán ábab besáá békibele békibéé bó nlém áyāl. Nén débél bad békibéé mewémten mé bwám tângene nkalañ míme Dyöb, awesýáné Nsoodé, míme déyágteé.

¹¹ Dyöb álomé mímē nsimé átînté e syáné abel áde ábelé nzii eché moosyáel áhelle ákúd e'sooosoñ. ¹² Ábē e'boj békibéé nlém é' Dyöb é'yágte syáné áchene mekan míme Dyöb déehedéé áá débel ne ásog esíi awój ábel mekan míme bad békibéé nkójnsé ábe békibéé Dyöb békibéé. Éyágte syáné ábel mekan nêngáne bad ábe békibéé mam abel, ábel mekan míme métângéné ne ábel mekan míme Dyöb áhedeé ánkójnsé wén. ¹³ Debelé nén ngáne désineé ne e'lyág békibéé nlém mam míme mepé échê epun áde ádæd Dyöb, mó awé adé Ngum ne awéed Nsoodé, Yesu Krístæ ápéeé ne éche ehúmé. ¹⁴ Yesue ambé eché yél ákade syáné ásé e mbékibéé nísyāel ábel-les syáné debé bad ábe békibéé, debé-é ábel bad békibéé, ábe békibéé nlém áte ábel mekan mé bwám. ¹⁵ Éyágte bad mímén mekan. Ébenlad kunze eché Dyöb ábágé wé, áwéed bad nlém á abum ne álää bad mímab mewusé ábel böhøjlen. Weémwāg-sé modmod anyín wé nkónted.

3

Paale ahóbe ngáne
abé á bad békibéé átângéné abé

¹ Nlâŋge wε mεé ékamten bad ábe éyágteé weé bésuded yǎl ásē e benkamlenε ne ásē e bad bém̄báá. Wεé béwógne bó béké-’e mbojsén ábel dyam a bwām ké áhéé. ² Éláa bó wεé bééhōbē modmod dyam dé mbéb á yǎl, békáa’ mpenten, bépwiited, bécheden-nε moosyə́l yǎl. ³ Ngen e’só syánē běn ámpē debédé eyókél, deewógne’aa Dyōb, dempán nzii, debédeé née betāŋ awóŋ áde déwóó’áá esíí áyāl e mekan mé nkōjsé, déhédé-’e menyinje mé nkōjsé. Dekónáá bad, désiídé-’e bad alongé ádēd ásyə́l. Bad bénkoó syánē, syánē běn-ne dékōō nhóg ne anínií. ⁴ Boj Dyōb, awēd Nsoodε, anlúméd syánē ábē e’boj bé nlém ne échē edəŋge. ⁵ Ansōŋ ádesyánē alongé. Saké nsón m̄ bwām m̄me syánē dēmbenlē mēmbel boj ábēl n̄e, boj ambel n̄e áyāle m̄me nlém n̄ ngol. Anlóm Edəádəŋ éche Ésáá áwobe syánē mbéb ábel nén déchyáad ekóólé. ⁶ Dyōb ábúdē syánē Edəádəŋ éche Esáá abe mbwiined ne Yesu Kr̄istəø, awesýánē Nsoodε. ⁷ Dyōb abélē n̄e, ábel boj m̄mē nsimé m̄bel dékobned áwe e’só boj syánē ámpē déwóŋ e’lyág bé nlém nén bán dēkūd alongé áde déemaá’. ⁸ Enén pôle echē nhóbεé edé mbále.

Nhede mεé nkōj nyé m̄mén mekan aláa ábel boj bad ábe bédúbpé Dyōb békii ngáne békεlεé mekan mé bwām. Nén dōo ébóó bán débεl̄, n̄e dō-’áá dépiinéd moosyə́l nsyáŋ. ⁹ Boj nyétεde e’kukú bé mpenten, akal á pôle tāŋgene ngáne mbyaa mēmbootédtε. Nyétεde-’e ngabén ne ntāŋten tāŋgene mbéndé é bad bé Israel. Ábén bwēm bēepεenéé nsyáŋ, béesaá-’áá dyam dé abεl̄en. ¹⁰ Mod té awé apεene ngabén átīntē e bad bé Kr̄isto, nzé ebagé mó elébé ngen pōg ne ngen ébe boj eewóge wε, weewóó dyam ábel ne mó. ¹¹ Ébíi nén wεé ene ndín e mod abébé abεle-’e mbéb. Mbéb m̄me ábélé ílūmte bán akwíde eche yǎl nkáásé.

Elébé ne melenten mé asóg

¹² Nzé nlómé Atemase ké’e Tikikuse bó mod nhóg áwóŋ, éwān áte áhyε dényín me á dyad á Nikopolis áyāle áwed dōo n̄tíidé mεé měbē á póndé e ahéb á ngíne. ¹³ Éwan áte ábel boj Zenase, mod a mbéndé bó Apolos bēhide áke eke éche bēhédéé akε. Nyín nén wεé mówōŋgēnē bó nyaa eche bēetókgé chōmchōm éche bēbenlédté áke. ¹⁴ Ébel-le ábesóó bad békége ábel mekan mé bwām. Béwōŋgen ábel mekan m̄me méhédne bán mod ábel. Béebεl̄ mekan m̄me méesé dyam dé abεl̄en.

¹⁵ Bad ábe bédé ne me bésyə́l bélénté wε. Lentéd me ábesyánē baányaŋ bé Kr̄isto bésyə́l ábe bédáá sé.

Nsimé n̄ Dyōb m̄bē ne nyé moosyə́l.

Kálag echě Paale áténlé

Filēmōne Ndibned ní kálag

Filēmōne abédé mod awě andúbē Krístəe abé-'e mod awě awóó edúbē bwâmbwam á mwembé-te. Kapóg abédé á mwembé míme ídē á Kolose. Anwój ntâj awě bêchégé'áá bán Onesimus. Ane ntâj ansöb wée Filemōne dó-'áá ámbíd e póndé ábómne Paale. Paale abédé á mbwág ene póndé. Paale mó ankéj boj Onesimus abé mod a Krísto. Kálag echě Paale áténlé Filemōne, antel chó aá Filemōne bó awe ntâj bétim ásē, aá mó Paale mólōme' awe ntâj ámbíd, nén Filemōne akob mó ámbíd saké áyéle ádíí awe ntâj děmpen boj ákob mó nêngáne mwányaŋ á Krísto.

Nkabtéd ní kálag

Ndibned ní kálag 1-3

Paale akené Filemōne 4-7

Paale acháá' Filemōne átēd Onesimus ámbíd 8-22

Nsógtēn 23-25

Paale alómmé bad melenten

¹ Mē Paale, awě adé á mbwág á dín á Yesu Krístəe, me-eé ntelé enén kálag. Sé Timoti, mwányaŋ a Krísto awēd, sélommé nyé melenten. Sélente' we Filemōne, nsón e echoj awēd awě mómpē abele' nsón míme sébeléé. ² Sélente' káéjne Afia, awēd mwányaŋ a mmwaád a Krísto. Sélente' Achipuse awě mómpē akale' nkalaŋ mí bwâm ne ngíne esyáél ngáne sémpē sekaleé. Sélente-'e bánned bé mwembé ábe békome' áwoj ndáb. ³ Nsimé ne nsaj ní Dyób Titée awēd ne Sájgú Yesu Krístəe, míbē ne nyé.

Edərge ne adúbe áde Filemōne

⁴ A-Filemōn póndé téé nzé nkânné', mbelé ísāgnān Dyób áyéle echôj. ⁵ Nságnan Dyób áyéle nwogé nén bán edéé bad bé Dyób bésyáél, esumé-'e nlém wée Sájgú Yesu Krístəe. ⁶ Nkânné' nén meé, nlatén míme syánē déwóó nêngáne bad ábe bédúbpé Krístəe, míbel nyékoj mekan mé bwâm mésyáél míme Dyób ábágé syánē asoñten. Nén débél ehúmé éche Krístəe ényínned. ⁷ A-mwányaŋ, edərge éche éwójné bad ábe bédúbpé Krístəe, éwógté me menyiŋge bwâmbwam éwéde-'e me nlém á abum. Ewógté bad bé Dyób menyiŋge.

Paale aá Filemōne ákob Onesimus

⁸ Né-óó, kénée édíí bán nwóó kunze ákamlen we á dín á Krísto ábel dyam áde étáŋgéné ábel, ⁹ edərge éche íwánléné we ébélén cháká' we cháká. Mē Paale, nhóbe nén nêngáne nchun mí mod míme ídē-'e á mbwág baoj á dín á Krísto. ¹⁰ Ncháká we á nló míme Onesimus. Adíi baoj nêngáne awem mwán. Mē-eé nkæ boj adúbē Krístəe ádē abédé á mbwág hén ne me. ¹¹ Ngen e'só, enkembáá we etógnén. Boj baoj adé sóo etógnén. ¹² Nlóme' mó ámbíd áwój baoj, adíi mod awě ídáá bwâmbwam. ¹³ Mendéj meé ábê ábê ne me ábel boj áwójgen me á etál échôj baoj áde ídíí á mbwág hén á dín dé nkalaŋ mí bwâm. ¹⁴ Kéné, meédæ'é meé nnyáged we áwójgen me. Boj pen mědæj meé éwójgen me áyéle mmön edéé me awójgen. Né-óó, meéhélëe-se míbél dyamdyam ésebán mmön ekwénténé. ¹⁵ Kapóg Dyób dóó dêmbeé aá Onesimus ápágned we á yál é esój é póndé, ábel boj nzé atimé ámbíd áwój ábē ne we ne abé ásyáél. ¹⁶ Bootya baoj, saké ntâj ngéen adíi. Adíi awēd mwánned a Krísto. Ndǽ mó bwâmbwam, we-'e ámpē etáŋgéné mó adæj ké tómaa ngáne ídáá mó. Etáŋgéné mó adæj ngáne ntâj awój, édæj-'e mó néé awoŋ mwányaŋ a Krísto.

¹⁷ Né-óó, nzé etéde me nêngáne mod awě nyúmō nyébole nsón, etáŋgéné mó akob melemlem nêngáne wékobpé me. ¹⁸ Nzé édē nén bán abčnlé we epandé, ké'e awánlé we alúm, né měsabé we. ¹⁹ Mē Paale, mměn-eé ntelé nén ne échém ekáá. Měsabé we.

Boj̄ pēn, weéchatán nén weé abel áde mbélē boj̄ ékud alongé dékōōlē, édē nēngáne wémpē ewanlé me alúm. ²⁰ Né-oó, a-mwānyaj̄, ncháa' nén meé éwōngēn me á dín á Sáñgú. Wógéd me menyijge á dín á Krísto.

²¹ Atel áde nítélé enén kálag ábélē nsumé nlém nén meé, wěbelé me kéchéé éche nílángé we meé ébèle me. Mbíí meé wěbel-le ké tómaa ngáne níhóbé meé ébel. ²² Dyam démpēe áde níhóbé meé níláa we ádíi nén meé, énabned me toj̄ áwoj̄ ndáb áyāle ndúbpé nén meé Dyōb déwōg nyé mekáne, abídéd me á mbwōg, ntán nyé ámpē.

²³ Epafras, awě súmō sêdé á mbwōg á dín á Yesu Krísto, mómpē alômme nyé melenten. ²⁴ Káájne Makōs, Aristakus, Demas, ne Lukas ábe syáâbōo sêbèle nsón bómpē bélénté nyé.

²⁵ Nsimé ríme Yesu Krístəə mibé ne nyé moosyəál.

Kálag e Hibru Ndibned ní kálag

Mod awé atelé enén kálag antel chó áwéd bad bé Krísto nlém a abum áyāl e metake míme bó doŋge á bad békúdé'áá adúbe áde bénđubēē Yesue. Alúmté áte nén aá melé míme Yesue ápééné métómé melé míme ménsēbē abé. Alúmté-'e áte ámpē nén aá béehūntē nlém nén bán Dyōb déelónédté akag áde ábágé. Á melé mé'sō míme Dyōb démwēē ne ábē bad mbwiined ne Mosee, beprise bōo békágé'áá Dyōb mende á nló mí bad. Boj bōob, Yesue mó adé mod a tîntê a bad ne Dyōb abé-'e prise ambáámbáa awe atómé bekal bé'déadəj bé' bōod, atóm ángel, atóm-me káéjne Mosee, áyāle eche yēl chén chōo ámbeé néé mende, ngen póg ne ngen ésyāel. Hōm áde ádíi Átómténé Asáj tómaa hōm áde beprise bé' bōod békágé'áá mende á nló mí bad, mende míme ábágé-'e mékwógnédé.

Nkabtéed ní kálag

Krístæe mó alúmté bad ngáne Dyōb ákoo abé 1.1-3

Krístæe atómé ángel 1.4-2.18

Krístæe atómé Mosee bō Josua 3.1-4.13

Krístæe adé prise awé atómé beprise bésyāel á mbyaa míme Levi 4.14-7.28

Melé míme Krístæe nítómé melé mé'sō 8.1-9.28

Mende míme Krístæe ábágé nítómé mende míme beprise békágé'áá bōod 10.1-39

Adúbe atómé chōm ésyāel 11.1-12.29

Abé áde áwógté Dyōb menyiŋge 13.1-19

Mekáne mé asog 13.20-21

Melenten mé asog 13.22-25

Dyōb áhóbé wéé bad mbwiined ne Mwǎn

¹ Se' bōod, Dyōb dénhōb wéé ábēd betaan, anláá bekal bé'déadəj mam âláa bō. Anhōb áwāb ngen ne ngen, ábēnléd-te menzii híin âhōb áwāb. ² Boj á e'pun bē asog hén, ahóbe wéé syánē, álānjége awe Mwǎn mam âláa syánē. Wéé ane Mwǎn dōo Dyōb ápoo boj áhəgē' nkoy mí míin ne ní sé. Mó-'áá Dyōb átífé aá mó awóó nhagtéed nísyāel. ³ Ane mwǎn móo adé e'kin-áte bē ehúmé é Dyōb, mó-'áá alûmte syánē ngáne Dyōb ákoo abé. Adíi melemlem néé Dyōb-pe ádíi. Ngíne e eyale é nsəl échē ane Mwǎn ebélé mekan mésyāel mékag á'sō ngáne métáŋgéné abé. Ahúd áde áhúdé syánē á mbéb-te, abélé syánē moosyāel desáá. Ámbid e nê, andyeé Dyōb á Ngum é ekáá é mbáá ádyōb.

Mwǎn a Dyōb atómé ángel

⁴ Né-ɔó, Mwǎn a Dyōb atómé ángel. Melemlem nê dōo dín áde Dyōb áchágé mó aá, "Mwǎn" átómé dín ádāb á "ángel." ⁵ Dyōb déehōbēē wéé ángel ké póg mbēd aá, "Edíi awem Mwǎn, chii, ndíi sóó."

Dyōb déehōbēá wéé ángel ké póg aá,

"Měbē Sáá,

mó-'e abé awem Mwǎn."

⁶ Boj Dyōb ádēhōb aá mólōme' awe Mwǎn a'só á nkōjsé-te, anhōb ámpē aá, "Ángel échêm ésyāel étáŋgéné mó edúbé abé."

⁷ Anhōb tâŋgene ángel pēn aá,

"Abélé eche ángel édé néé epub.

Échê Ángel eche édé ábē bembəlede,

abélé édīi néé muú míme níchodne'."

⁸ Boj Dyōb dénhōb tâŋgene Mwǎn aá,

"A-Dyōb,

wεékamlén á ngíndé ne á ngíndé.

Wεékamlén ábōŋ bad nyaa echē etáŋgéné.

⁹ Edéé mam ríme métáŋgéné, ék̄j̄-’e mam ríme méeboo.

Né-’áá ákáé boŋ Dyōb, ádōŋ Dyōb,

ápwēd we âbē etógnén tómaa baásyāl ábe nyáābōŋ nyēdé,
ápwēd-te we âbē menyinje tómaa baásyāl ábe nyáābōŋ nyēdé.”

¹⁰ Dyōb áhóbé ámpē aá,

“A-Sáŋ wε-εé ehəgé nkōŋsé se á mbooted,
nkōŋ m míñ-ne ndíi abwōg áde éhágne échonj ekáá.

¹¹ Ábē bwěm é’syāl běpě á asog, boŋ we pēn wεébē abé ne abé.

Ábē bwěm é’syāl běmaá ásé néé mbóté.

¹² Wεényəg bō áte ngáne bényəgęe mbóté,

wεéhəŋlén-ne bō áte ngáne běhəŋlanné mbóté.

Boŋ we pēn wěbē ebé melemlem, ádōŋ alongé-’e déewóngé asog.”

¹³ Dyōb déēlāŋgēē ángel kē pōg mbēd aá,

“Dyεé me é ekaá émbáá hén

káéŋ ne á pónđé eche mébenlé

boŋ ékoŋtéd ábōŋ bad bē ekoyí ámīn ne mekuu.”

¹⁴ Cheé-ō ángel édíí? Édíí e’dəádəŋ ábē é’benle Dyōb. Dyōb álóme-’e bō âwóngen bad ábe békūd e’soosoŋ.

2

¹ Né-óó ngáne débíí rímmén mekan, detáŋgéné kéchéé éche déwóngé nlém asum áyāl ábel boŋ deépānē’ nzii. ² Mekan ríme Dyōb dénlāa’ é ángel aá éláa ábēd betaa ménwōŋ ngíne. Bad bésyāl ábe bénkēnhíd rímmé mekan, ábe bénkēmbēl-le ngáne rímmé mekan méhōbé’áá, běnkūd nkōgsen ríme běntāŋgēnné akud. ³ Chán-nō nyéwémténé bán dehele debíd rímmén nkōgsen áte nzé deewōŋne nkalaŋ mí bwām pónđé? Mímmē nkalaŋ mó-’áá ímpēene’ enén ndín e e’soosoŋ. Sáŋgú Yesue mwěn mó asébpé bad akale tāŋgene ábén e’soosoŋ. Bad ábe bénwōg-ke mam rímmé ánhōbpē, běmbēl syánē denyín nén bán médé mbále. ⁴ Dyōb dōmpē dénlūmēd syánē áte nén aá rímmē nkalaŋ ídē mbále. Ambel nē alúmed áde álúmté e’chemléd, mekan mé menyáké ne menyáké híin. Anlúmēd nē ámpē ne mekan rímmé bad běbél’áá á ngíne e Edəádəŋ éche Ésáá éche Dyōb démbēé bō. Dyōb děmbě bad Edəádəŋ éche Ésáá ngáne ébonjnédé mó.

Ane awé alyágte syánē ákud e’soosoŋ

⁵ Saké ángel chōo Dyōb ábánné aá ékamlén nkōŋsé mék̄j̄lē rímmē séhōbeé bán mépě.

⁶ Boŋ éténlédé hōm ahōg á kálag e Dyōb pēn nén bán,

“A-Dyōb, cheé moonyoŋ ádíí awé éwóŋné pónđé?

Cheé mwǎn a moonyoŋ ádíí éche ékáé boŋ énōnē mó?

⁷ Áyāl e esój é pónđé, wembēl enkēmpaá ángel. Wembané mó á atii dé ehúmé ne edúbē.

⁸ Wembě mó ngíne ákamlén chōm ésyāl.”

Abē adé ébágé mó ngíne ákamlén chōm ésyāl, álūmte’ bán chōmchōm éesaá éche éesě ásē e nkamlén rímmé. Kénée édíí-’áá nē, deenyínéé bōob nén bán chōm ésyāl édé ásē echē.

⁹ Boŋ denyíné’ ngáne Yesue ádíí. Áyāle esój é pónđé Dyōb děmbēl enkēmpaá ángel. Bōob, Dyōb ábágé mó ehúmé ne edúbē nēc kēj áyāle metake ríme ákúdē ne kwééd eche áwédé. Dyōb álúmté syánē rímmē nsimé awé áde Yesue áwédé á nló m̄ bad bésyāl.

¹⁰ Bwěm é’syāl é’díí é’ Dyōb, mó-’áá anōne’ bō. Ngáne édíí nén bán Dyōb áhēde’ aá bad híin békud etál ábē ábe bān, békud-te ehúmē, émbē mboŋ nén bán ábel mod awé ásalé bō nzii ákud metake. Nē débēl ákwognéd ábē mod awé ábēl boŋ bad békūd e’soosoŋ. ¹¹ Yesue awé abeľe’ boŋ bad bésáŋ, ne bad ábe bésáá, bō moosyāl bědīi bān bē Sáá nhōg. Né-’áá ákáé boŋ Yesue eekwágé’ áchəg bō aá baányaŋ. ¹² Éténlédé nén bán anlúáá Dyōb aá, “Méélāa ábēm baányaŋ ngáne ádonj dīn ápédé abé.

Měkěn wε nzé syáābōo sēlădné hōm ahóg.”

¹³ Anhób ámpē aá,

“Meeśum rímêm nlém ne Dyōb.”

Anhób-pe ámpē aá,

“Me nén, syáābe bän ábe Dyōb ábágé me.”

¹⁴ Ngáne édíí nén bán ábê bän bé Dyōb bédíi baányorj ábe běwóó ekob é yěl ne mekií, Yesue ámpē antéd yěl e moonyorj née bō. Ambel nē ábel boj kwéed eche ánwēē ébóded ngíne eche Satane awě abele' boj bad běwâg. ¹⁵ Awé áde ánwēē áhúdē bad á mehaj ábe běmbē betâj á alongé ádāb ásyāēl áyāle mbwōg ní kwéed. ¹⁶ Ényinnédé bwâm nén bán saké ángel ánhyeé awôngen. Boj ampē áwóngen bad bě mbyaa míme Abraham. ¹⁷ Né-óo éhédnádtáá nén bán Yesue ábê melemlem née baányorj á menzii mésyāēl ábel boj ábê prise ambáámbáa awě awóó nlém ní ngol, abé-'e mod awě běhèle bésun nlém áyāl. Abele áde ábenléé Dyōb, ábélé Dyōb álagsan bad mbéb. ¹⁸ Ngáne édíí-'aá bán mwěn antág, ákūd-te mekägsen, awôngan bad nzé bédé á mekägsen-té.

3

Yesue atómé Mosee

¹ Né-óo a-baányaŋ, nyé ábe Dyōb áchénlé ábé ábē bad, nyénōne' Yesue. Mó adé mbapee awě Dyōb álómé, abé-'e Prise ambáámbáa a mekan ríme séhóbé bán sédúbpé. ² Dyōb démpwed mó, ábenlé-'e Dyōb ne nlém nhóg melemlem ngáne Mosee ábénlé'áá Dyōb ne nlém nhóg á abum á ndáb á Dyōb. ³ Mod awě alóó ndáb, běbelé běbe mó edúbé tómaa ndáb eche álóó. Melemlem nē dōo Yesue ákwógnédé ákud edúbé eche étómé edúbé eche Mosee. ⁴ Ndáb téé ewóó mod awě alóó chó. Boj Dyōb dōo álóó chōm ésyāēl. ⁵ Mosee abédé mbalede á abum á ndáb á Dyōb, awě abenlé'áá Dyōb ne nlém nhóg, álūmté' bad mam á'sō é' póndé míme Dyōb débenlé. ⁶ Yesu Krístǣ pēn abédé̄ Mwǎn a Dyōb, ákamlán-ne abum á ndáb á Dyōb ne nlém nhóg. Syánē ámpē dedíi bad bě abum á ndáb á Dyōb nzé édé nén bán dedé déchájnédé, desumé-'e nlém ne chōm eche débééné kúmbe, eche désúmé-'e nlém áyāl.

Elébé ne bad ábe beedúbpe

⁷ Né-óo, nyéwôg chōm-éé Edəédaŋ eche Ésáá éhóbé. Éhóbé aá,
“Chii nén nzé nyéwogé ehób é Dyōb,

⁸ nyéewúéné' Dyōb nló áte ngáne ábēn betaa bénwūenné Dyōb nló áte á póndé echě běnkunnénné Dyōb yěl.

Běnkunnén mó yěl

á póndé eche békágé mó é ehyángē.

⁹ Á ehyänge wē, běnkág me,
bényín-ne mam míme mbélé é etún é móom mé mwě méniin.

¹⁰ Nē dōo děnkęj boj nílīn ene nyongel e bad boj nhób meé,
‘Awab nlém-tē, bétamnadj,
béehidé-'aá nzii echém.'

¹¹ Né-óo, menlīŋ, mmwé-'e melě meé
‘Béesonlē áwēm abwōg dé nkóme-áte mbéb.’ ”

¹² A-baányaŋ nyétéd póndé ábel nyé modmod nyéewóó nlém mé mbéb míme méedubpē' Dyōb, ábel boj nyéetédté Dyōb áde ádē á alongé. ¹³ Boj pēn nyéwéde' nhóg ne aníñíi nlém á abum epun téé, ngáne échê epun échágnédé bán “Chii”, ábel boj mbéb méedogé nyé modmod áwúen Dyōb nló-áte. ¹⁴ Syánē dedíi mod nhóg ne Yesu Krístǣ, nzese delyagé dechájnédé kááne ne á asog ne mekan ríme désébpé adúbe tāngene Dyōb.

¹⁵ Demaá anyín nén bán éténléde á kálag e Dyōb nén bán,

“Nzé nyéwogé ehób é Dyōb,

nyéewúéné' Dyōb nló áte

ngáne ábēn betaa bénwūenné Dyōb nló áte á póndé eche běnkunnénné Dyōb yěl.”

¹⁶ Benzébádé bénwōg ehób é Dyōb boj békunnén Dyōb yēl? Ábē bad bésyāēl, saá bad ábe Mosee ámbidēnnē á Egipto bébédé-yē? ¹⁷ Benzébádé Dyōb dēnliín-naá é etūn e móom mé mwé méniiin? Saá bad ábe bémbe mbéb bōo bénnaá ndim é ehyānge-yē? ¹⁸ Benzébádé Dyōb démwēē melē aá béesónlé áwe abwōg dé nkóme-áte mbēd? Saá bad ábe békembél ngáne áhédé'áá-yē? ¹⁹ Né-ōo, denyíne' nén bán, bénkênhenlé asól áyāle bénkendubéé Dyōb.

4

Nkóme áte ríme bad bé Dyōb békudté

¹ Ahób áde Dyōb dénhōbpē aá syánē dēsōl áwe abwōg dé nkóme-áte ádii étyéémé. Né-ōo détēd póndé ábel boj nyé modmod eebóó' asól áhed. ² Syánē ámpē dewogé nkalaj mí bwām melemlem ngáne bōmpē bénwōgkē. Bénwōg mímmé nkalaj mí bwām boj ménkēnwōngénné bō ne awōngēn dēn áyāle nén, bénkendubéé mó. ³ Bōob-pōó, syánē ábe dedúbpé mímmé nkalaj, desóle' ádē abwōg dé nkóme-áte. Boj ne bad ábe bēedubpe pēn, Dyōb dénhōb aá,

“Menlij, mmwé-’e melē nén meé,

‘Béesónlé áwêm abwōg dé nkóme áte mbēd.’ ”

Anhób nē, kénée édií bán ammād ríme nsón amad se áde áhágé nkōjsé, abwōg dé nkóme áte dēmmād-te abé. ⁴ Éténlédé á kálag e Dyōb tāngene epun éche élonténé epun saámbé nén bán, “Dyōb dēmmād ríme nsón. Né-ōo ankómé áte epun éche élonténé epun saámbé.” ⁵ Éténlédé á kálag-té wē ámpē bán Dyōb áhóbé aá,

“Béesónlé áwêm abwōg dé nkóme-áte mbēd.”

⁶ Né-ōo, etál édii ébágnédé dojge á bad âsól á hōm dé nkóme-áte. Boj bad ábe bénwōg nkalaj mí bwām se' bōd, békênhenlé asól, áyāle nén békembénlé mekan ríme Dyōb dénlāá' é bō aá bébel. ⁷ Né dêmbél, Dyōb dêmpwēd epun émpēe, áchāg-ke chó aá “Chii.” Anhób nē etūn é póndé ámbid eché ábēd betaa bénkembénlé ngáne áhōbpē aá bébel. Anhób nē mbwiined ne e'yale ábe Dabide ábe mímaá nyé atele nén meé,

“Chii nzé nyewogé ehób é Dyōb,

nyewúné’ Dyōb nló-áte.”

⁸ Nzé émbé nén bán hōm áde Josua ânkéénné bad dōo dēnkōj hōm dé nkóme-áte abé, né ámbid e póndé Dyōb dénkênhōbpé tāngene epun émpēe. ⁹ Né-ōo hōm dé nkóme-áte áde ádē nēngáne nkóme-áte ríme Dyōb dénkōmēē áte áde ámáá nkōjsé ahág ályágé ásine ábē bad. ¹⁰ Kénnéé awé asólé á abwōg dé nkóme-áte á Dyōb, akōmme áte áyāle amadé ríme nsón, melemlem ngáne Dyōb dénkōmēē áte áde ámáá nkōjsé ahág. ¹¹ Né-ōo syánē déwan áte dēsōl ádē abwōg dé nkóme-áte, ábel boj syánē modmod deebóó asól áhed. Deehídé' mekuu míme bad ábe bénkembél ngáne Dyōb dénhōbpē. ¹² Debíí nén bán Eyale éche éhúú ne Dyōb, édē alongé, édē-’e ngíne. Ékóbpé' tómaa páá e nsəl míbe. Ésóle' mod áte kááj se á mbom ní ngob e yēl ne edéadəj. Ésóle-’e mod kááj se á mebón mé yēl ne á e'hid-té. Échê eyale écheme' mewémten mé mod ne kéchéé éche mod áhēdeé abel. ¹³ Á e'só é' Dyōb, chōmchōm éesaá á e'kojnéd. Chōm ésyāēl édē á tâl e ékwéé. Dyōb dō-’aa détángéné mekan mésyāēl mímmé débeléé aláa.

Yesue adíi ndale e prisé ambáámbáa

¹⁴ Né-ōo, ngáne déwóó Prisé Ambáámbáa, Yesue Mwān a Dyōb, awé akií ámīn á'sō é' Dyōb, déchâjned adúbe áde désumé nlém áyāl. ¹⁵ Awesýánē Prisé Ambáámbáa asónténé mechínzé mímēd, áyāle nén mómpē ankúd melemlem mé mekāgsen míme dékudeé á menzii mésyāēl, boj kéné, enkênhenlé mbéb. ¹⁶ Né-ōo ne e'sum bé nlém désíde benben ne atii dé nkamlen á Dyōb áde ábage nsimé. Deewogé mbwōg ké nhág. Débel nē ábel boj Dyōb áwōg syánē ngjol, ábāg-ke syánē nsimé mímmé méwōngān syánē póndé téé eche détángéné nwōngēn.

5

¹ Prise ambáámbáa téé awě Dyōb ápwéde átintē e bad, ápwede mó ábèle mó á dín áde ábē bad. Ane prise móo akobe' mendē wéé bad boj ábagé mó wéé Dyōb néé nde ne mendē ábel boj Dyōb álagsen bad mbéb. ² Ahèle bad yěl acheden ábe bépane' nzii áyāle bēebí'é chōm éche bēbeléé áyāle nén mwén ámpē adíi moonyoŋ awě awóó mechínzé mé ngob e yěl. ³ Né ábélé atáyngéné néé ábageé mendē káéyne áyāl e míme mbéb měn, ábagé-'e áyāle mbéb mí bad. ⁴ Modmod mwén eéhēlēe-sé ábe yěl edubé é prise ambáámbáa. Dyōb dōo ápwede' mod ábē prise, melemlem ngáne ámpwédté Arōne.

⁵ Melemlem nē dōo-aá Kr̄istəa mwén énkēnchágédté yěl ábē prise ambáámbáa. Dyōb dōo démpwed mó. Dyōb dénlāā mó aá,

"Edíi awem Mwǎn.

Chii ndfí Sóó."

⁶ Né ádē á kálag e Dyōb hōm démpēe bán Dyōb dénlāā mó aá
"Wéébē prise abe ne abé,
néé Melkizedege."

⁷ Áde Yesue ábédé á nköjsé, akánné'áá, áchāā Dyōb, áchyee' awé á ngíne, mésod mébídé mó á mīd. Akánné'áá wéé mod awě ahèle ásōŋ alongé ádē. Dyōb dénwōg mó mekáne áyāle anwóŋ mbwóŋ ní Dyōb áte. ⁸ Kénéé ábédé Mwǎn a Dyōb, an'yágé áwógen Dyōb mbwiined ne metake míme ánkudté. ⁹ Dyōb démbél ankognéd abé-'e prise ambáámbáa awě akwognédé, ábel bad ábe bégwone mó békud e'soošon ábe e'dé á ngíndé ne á ngíndé. ¹⁰ Dyōb démbané mó á atii aá mó adé prise ambáámbáa néé Melkizedege.

Elébé ábel mod eétedté adúbe

¹¹ Nwóó mam híin áhób tāŋgene ádén atón. Élénlé me áte ngáne mébenlé boj nyéssónjtén mó, áyāle nén nyéewámsánné dyam asóŋtén. ¹² Nhōbe nén áyāle nén nyéntáyngén bad abé bōob ábe býágte' bad bēmpēe. Boj nyéddíi nyéhēdnad ámpē bán mod áyáged nyé mam ríme nyémmadté abíi tāŋgene nkalaŋ ní Dyōb. Nyéddíi nyéddé néé bān bē nkáál ábe bēhēdnad abíi saké ndyéed. ¹³ Kénezéé awě adíi amwáa' abíi, ádíi néé nkáél. Eébí'é mboj ne mbéb. ¹⁴ Ndyéed pēn edíi áyāle bad ábe bémáá akwog. Mod ambáá adíi mod awě ayágké, awě aménténé-'e mboj ne mbéb ábíi.

6

¹ Né-óó dékeene adúbe á'sō nēngáne bad ábe bémáá dyam abíi. Deetâyngeneé néé détédeé póndé ámpē áyáge mam ríme bén'yāgēdté syánē tāŋgene Kr̄istəa se á mbooted. Demmād ayáge, debíi-'e nén bán bad bétáyngéné békúné mbíd, bétēdē abel dé mekan mé mbéb ríme mépeene' kwééd. Demmād-te abíi nén bán bétáyngéné Dyōb adúbe, ² býágte' bad tāŋgene edusen* ne tāŋgene abán á bad mekáá á nló. Debíi-'e nén bán bétáyngéné bad ayáged tāŋgene mpuu ne tāŋgene mbakú e nkáásé eché ēbē abé ne abé. ³ Deétedté mímén mekan. Dékag á'sō nzé Dyōb ábágé etél.

⁴ Nhōbe nén áyāle nzé bad bétēdté ádab adúbe, mod eéhēlēe-sé ápēen bō ámbid ámpē, bétēdē rímbab mbéb bétimén Dyōb. Nhōbe bad ábe bēnkūd e'nyínén bē ekide, bēwóglén nnam ní Dyōb, békūd-te Edəadəŋ éche Ésáá néé bad bēmpēe. ⁵ Béwógléné e'boj bē eyale é Dyōb, bénýin-ne ngíne eché ēbē á póndé eche Dyōb dékamlénné. ⁶ Nzé ábē bad bémáá-'e mímē mekan anyín boj bétíme bétēdté ádab adúbe, mod eéhēlēe-sé ápēen bō ámbid ámpē átēde mbéb áhíd Dyōb. Abáy áde bēbáa'é Mwǎn a Dyōb áyāl, ébelé ébē byánán bēbomme' mó á awög ámpē, békwaqtē-'e mó á'sō é' bad bēmpēe. ⁷ Ndōob eche mbúú éyágké achóoted boj mendib mésol ásē, ebélé bwěm é'kwog bwám. Ábē bwěm é'belé é'wōŋgān bad ábe bēwéné bō. Né álumte bán Dyōb ánamte' ene ndōob. ⁸ Boj nzé ene ndōob ekwogte' mekād ne e'sum bē mbéb bēmpēe, né eesaá dyam de abelen. Né káéy ne á asog bēhyāād-te chó.

* ^{6:2} Edusen: eché edusen énkembáá edusen éché bédúsánnáá bad ábe bédúbpé Kr̄istəa běnpen. Bad bē Israël bōmpē bénwōŋ elem éche bédúsánnáá bad, bédusán-ne bwěm bēmpēe.

⁹ A-baányaŋ, kénéé nílâŋgeé nyé néñ, ndúbpé néñ meé nyêbèle' mekan nyaa eche nyékudté mekan mé bwâm mé e'soosoŋ. ¹⁰ Dyöb ábèle' rímé mekan nyaa eché etâŋgéné. Eéchatánné nsón ké nhóg míme mod ábélé, eechatán-naá edəŋge éche mod álúmté mó ngáne nyédíi nyébenléé bad bé Dyöb bëmpée. ¹¹ Mmèd nlém nídfí néñ bán nyé mod téé nyébë nyéwôŋ ene kán káéŋ ne á asog̊ ábel boj nyékude' chöm ésyääl éche nyésumé nlém áyääl bán Dyöb débe nyé. ¹² Séehëdëe bán nyébë bad ábe bëehëdë chömchöm abel. Boj sëhede' bán nyébë bad ábe bëhíde' mekuu míme bad ábe bëwesan áyäle bëdúbpé Dyöb. Échë ndín é bad ékùd chöm ésyääl éche Dyöb áhóbé aá móðbë bó.

Dyam áde Dyöb áhóbé déehidtéé ásé

¹³ Se' bøód áde Dyöb dénhöbpé aá móðbelé Abrahame dyam, ammwé melé aá mótagégné áde akag alóned. Áde dín dën dão ámmwëenné melé áyäle néñ modmod eebédeé awé atómé mó awé áhélé'áá-se amwé melé áwe dín. ¹⁴ Anhób aá, "Nhóbé néñ meé, ntâŋgéné we anamed,

mëbél-le mímöŋ mbyaa míbūñ áte bwâmbwam."

¹⁵ Abrahame anwesén ásüm-me nlém, né-óó anküd chöm éche Dyöb dëmbëénné mó akag.

¹⁶ Nzé mod amwâg melé abenlad dín áde mod awé atómé mó. Mpenten ké níhéé-'e rímé bad bëwóo'ë, melé móo méyânle'. ¹⁷ Dyöb áhédé'áá ábë bad ábe ámbeé akag alúmed áte néñ aá, móðhúdté dyam áde móhóbé ásé. Né-óó amwé melé ásógtan akag áde ábágé.

¹⁸ Né-óó Dyöb ábágé syáné mekan mébe rímé mëehäylán áyäle Dyöb déeheléé-se ákal metóm. Abagé syáné akag, amwé-'e melé. Abelé nê ábel syáné awé dekií áwé ábel ákæs syáné, déwôŋ e'wéd bé nlém, désüm-me nlém ne mekan míme áhóbé aá móðbë syáné.

¹⁹ Ábë e'lyág bé nlém é'díi néé chöm éche ébélé alongé ádëd ásúmnédé, ákojnéd-te. Ébë e'lyág bé nlém bôo békëŋ boj detóm abad dé mmwe ámîn, dépe á abwág á hõm áde ásáá wéé Dyöb adíi. ²⁰ Yesue mó asébpé asól áhed á nló míme syáné ábojseñ syáné e'dii. Bøob atimé prisë ambáámbáa awé adé ángíndé melemlem néé Melkizedege.

7

Melkizedege abédé Prise

¹ Melkizedege abédé kâŋ e dyad á Salem, abé-'e prisë a Dyöb á Ngum. Ambomén Abrahame áde Abrahame áhúé'é á bel ábe ánwûñ'ë kâŋ é bad, ánämëd-te Abrahame.

² Abrahame-'e ábë mó akab á bwém ahög átînté mekab mé bwém dyôm míme ánhüénné á bel. Dyam dé'sô, dín á Melkizedege á ehób é Hibru adíi bán, "Kâŋ eche ebële mam míme nítâŋgéné." Atón áde álonténé mébe ádfí bán "Kâŋ e Salem," awé adé "Kâŋ e nsay."

³ Étenledéé hõmhõm néñ bán Melkizedege anwón saá, ké'ë mbyaa. Béetele-'áa ngáne bëchyáá mó, ké'ë ngáne áwédé. Adíi prisë á ngíndé ne á ngíndé melemlem néé Mwän a Moonyon adíi Prise á ngíndé ne á ngíndé.

⁴ Nyéno-ne-óó nyaa e ndale e mod eché Melkizedege ábédé. Abrahame, sáá ambáá awéed, ambé mó akab ahög átînté e mekab mé bwém dyôm míme ánhüénné á bel. ⁵ Mbéndé e Mosee ebagé kunze néñ bán bad bé mbyaa míme Levi ábe bëdë beprise békobe' akab á bwém ahög átînté e mekab dyôm téé, wéé ábâb bad bé Israel, kénéé émbëë bán bòmpé bëbédéé mbyaa míme Abrahame. ⁶ Melkizedege enkëmbídté á mbyaa míme Levi, boj kénê ankëb akab á bwém ahög átînté e mekab dyôm wéé Abrahame. Annamëd-te Abrahame, Abrahame awé Dyöb dëmmadté akag abë. ⁷ Ébyééné néñ bán mod awé anamte' mod atómé mod awé ánámté. ⁸ Bøob-póó, prisë éche ébídé á mbyaa míme Levi ábe békobe' akab ahög átînté e mekab mé bwém dyôm, bësyääl bëdfí baányoŋ ábe bëwâg. Boj Melkizedege awé ankëb akab ahög átînté e mekab dyôm, adíi mod awé eewéde, ngáne kâlag e Dyöb élûmtéé. ⁹ Dehele dehób bán Levi awé akob'áá mekab wéé bad mwën ámpé abagé akab wéé Melkizedege mbwiined ne sáá ambáá Abrahame. ¹⁰ Dehele dehób nê áyäle néñ, áde Melkizedege ákíí Abrahame abomen, né bëechyáá'ë Levi.

¹¹ Dyöb dëmbë bad bé Israel éche mbéndé á póndé eché bad bé túmbé e Levi bëbédé beprise á aloj á Israel. Nzé nsón míme ábë beprise bëbelé'áá ménkwognéd ábel bad

békobned á'sō é' Dyōb, né nzɔm enkembáá eché prisē ampée ábídeé néé Melkizedege awé eebíde á mbyaa míme Arɔne.* ¹² Nzé mpwedtéd mé beprise ínhéyléné túmbé, né mbéndé chómpē etángéné ahəŋlen. ¹³ Mod awé nhóbeé mímén mekan áyəl, ambíd á túmbé empée. Modmod eebidé-'áá awe túmbé mbéd awé abelé nsón míme prisē. ¹⁴ Ébyééné bwâm nén bán Sáñgwéé awêd ambíd á túmbé e Juda. Mosee enkéntúbpé dřn nén aá beprise békid á túmbé e Juda.

Yesue adíi néé Melkizedege

¹⁵ Dyam ádě déhóbé tângene ahəŋlen á mbéndé ábúdé anyînned ne abíd áde prisē ampée ábídé néé Melkizedege. ¹⁶ Saké mbéndé é baányoŋ chôw émbél boŋ abé prisē. Boŋ adé prisē áyəle awóó ngíne ábé á alongé abé ne abé. ¹⁷ Éténlédé á kálag e Dyōb nén bán, "Edíi prisē á ngíndé ne á ngíndé,
melemlem néé Melkizedege."

¹⁸ Nzé denɔné ped póg, Dyōb ásídté mbéndé é' bōd á nkəg, áyəle énkênwúú'é áte, énkênkwógnéd-taá. ¹⁹ Debíi nén bán mbéndé eebélexe-se chomchom ébé ngáne étángéné abé. Nzé denɔné-'é ped eníníi, chom é bwâm épédé éché ekáá boŋ dewónj e'lyág bé nlém. Chó-'áá épese syánē bénben ne Dyōb.

²⁰ Dyam démpée áde débíi ádíi nén, Dyōb démwē melč aá Kr̄istəə ábē prisē abé ne abé. Boŋ áde bêmpwedtē beprise bëmpée, Dyōb dénkêmmwáá melč ké nhóg. ²¹ Boŋ áde Dyōb ápwédé Yesue prisē, anhób aá,
"Sáñgwéé amwédé melč,
éehúd-taá mm̄melč ásē,

aá,
'Edíi prisē á ngíndé ne á ngíndé.' "

²² Mm̄melč mélumte nén bán Yesue mó adé e'chemléd ábě é'lûmte syánē nén bán melč míme Dyōb ámwédé méehidtéé ásē. ²³ Beprise bé' bōd bëmbuú áte áyəle nén kwéed ebélé'áá béehèle'aá nsón akseen á'sō. ²⁴ Boŋ ngáne Yesue ádíi á alongé abé ne abé, ábē prisē á ngíndé ne á ngíndé. ²⁵ Né-ɔó, Yesue akwognédé ásoŋ alongé á bad ábe bëpag wéé Dyōb áwe mbíd. Akwognédé ásoŋ bó ne asoŋ ásyəl áyəle nén, adé á alongé póndé ésyəl ákânned bó.

²⁶ Éhédnádtáá nén bán déwōŋ ene ndín e prisē ambáámbáá awé asáá, mod eéhēlēe se ahób mó awusé ké hóg áyəl, eewoo'é atón á mbinde ké hóg á yəl, awé apagnédé bad bé mbéb áyəl, bëbānē-'é mó ámīn e atii dé nkamlen ámbáá. ²⁷ Eesaá néé beprise ábíníí ábe bétángéné bëbage mendé epun-té. Ábē beprise bésébpe mendé abé áyəle mímab mbéb, boŋ bëbagé mendé áyəle mbéb mí bad bëmpée. Boŋ Yesue ambe yəl néé mendé áyəle mbéb mí bad. Ambél-le nê ngen póg ne ngen ésyəl. ²⁸ Mbéndé epwede baányoŋ ábē beprise bëmbáámbáá. Baányoŋ bëbèle' mewusé. Boŋ Dyōb démpwéd awe Mwän ne melč áde ámáá mbéndé abe. Abelé-'é ane Mwän aköbnédé á ngíndé ne á ngíndé.

8

Yesue mó adé syánē prisē ambáámbáá a melč mékđōlē

¹ Atón áde sékoo'é ahób ádíi nén; dewoo' ene ndín e prisē ambáámbáá awé adyeé é ekáá embaáá é atii dé nkamlen á Dyōb á Ngum ámīn. ² Abenle' Dyōb wéé bwém ábě é'sáá é'díi á hōm áde ákoo' ebem é Dyōb abé. Sáñ Dyōbé mwén móo alóó échē ebem, saké baányoŋ.

³ Bépwede prisē ambáámbáá téé ábe Dyōb ndé ne mendé mé elém. Né-ɔó, anén prisē ambáámbáá mómpē atángéné chom awóŋ éche ábeé Dyōb. ⁴ Boob-poó, nzé émbé nén bán ambé á nkönsé, né éebáá prisē ne abé děn, áyəle nén beprise bédé ábe bëbage Dyōb mendé ngáne mbéndé éhedeé. ⁵ Nsón míme ábē beprise bëbèleé ídíi néé e'chemléd ne ediídinge é' mekan míme médé ádyōb. Debíi nê áyəle nén, áde Mosee áhóbé aá móloō' ebem é Dyōb, Dyōb dénsim mó etúu áte aá, "Nyín nén wéé móloō chom ésyəl á yəl e

* 7:11 Arɔne: Arɔne ambíd átumbé e Levi. Mó abédé prisē ambáámbáá e'só e bad bé Israel.

échê ebem nyaa e nlóntéd eche nílúmté we á mbôod mîn.” ⁶ Boj bôob, nsón míme prisë míme békagé Yesue ntómé nsón míme ábê beprise bér bôod. Melemlem nê dôo nchemten míme Yesue ápééné átîntê e Dyöb ne ábê bad, ntómé nchemten mé’sô míme bêmpéenné, áyâle nén, Dyöb ábágé bad akag áá móðb  b  bw m é’ bw m.

⁷ Nz  émb  n n b n mel  mé’sô m nkwogn d  ab l bad b kobned á’sô é’ Dy b, mel  m mp e  m eh dnad-t a . ⁸ Boj Dy b d nn y n awus  ne áb  bad, anh b-p  a ,
“Me S ngw   nh be’ n n me  e’pun é’ b n é’ h u 
 de m mw   mel  m k sl 
ne bad b l Is rael
ne bad b l Juda.

⁹ M m  mel  m eb   n e  mel 
m me m mw  
ne  b b  betaa
 de n ch ng  b  l ek  
boj mb d n b  l aloj   Egipto.
B nk nh d  r m  mel .

N -  , menh d b  d d y l.

¹⁰ Dy b  h b   mp  a ,
Me S ngw   me -   nh be’.

B ob-p   mel  m me m mw   ne bad b l Is rael
  p ond  ech  eh u ’  s o m d i  n n:

M b l b b   ch m mb nd ,
b w nj-  nl m  h id ch .

M b l  d ab Dy b,
b -  b b   b m  bad.

¹¹ B  modmod  ey g d t  wa b,
modmod  el  -  a  mw ny j n n a   b i Dy b,
 y le b  moosy l b b  m ,
bootya b sad, k o j ne b mb  .

¹² M  lags n r m ab mb b,
m ekamt n-na  m m b  m w s .

¹³ Ah b  de Dy b  h b   t ng ne mel  m k sl ,  l um t ’ n n b n ab l mel  m  n chun
nt m  p ond . Ch m k h    che  t ome p ond ,  che  ch n - , mw mp n r  p ond   eb    amp  ne ab  d n.

9

Ab le   Dy b  d  ek b    y l
ne ab le   Dy b  d  Ed  d 

¹ B ob-p  , k o j ne mel  m s o m n w j mb nd   che b h d ’  b le Dy b, b n w j-
ge abw g   h m   nk js  w   b b nl ’   Dy b. ² B nl j eb em  che  n w j to j  be .
To j ech  emb   s o b ch g ’   ch  b n H m  de  s  . At i  d  etr k n   b d   w d-te,
t be  ab , ne ew le  che b b g  Dy b m nde. ³ Ab d  d emb   de  k b   to j e’s o ne to j
emb d  te. E ne to j  che eb d   mb b d  e ab d  b ch g ’   ch  b n H m  de  t om n    As j. ⁴   to j-t  w , meny n r m be b b nl  g l r m be b hy rt ’   e’t w   m n   b  Dy b
ed ub  m b d   h d. Nty g r m be b ch g ’   b n nty g m  mel  m omp  m b d   h d.
M m  nty g b nk t n  m  p d  es  l ne g l.   nty g-te w , ap m  a  g l  de  b d   m na 
 te ab d   w d-te. Nt n  r m  Ar j n  r m  m nk g by a , m b d   w d-te. E’p d    mel  
 be  b n t n l  mb nd   y l b omp   b d   w d-te. ⁵   nty g m n  w , bw m  b d 
 be,  b   b b l    nw g n    ng l,  b   l um t ’   eh m    Dy b. M p b  r m   b   bw m
m nk t n  eb d    nty g w    b d   h m  d  al gs n  d  mb b . Boj  b   bw m  sy  l
de h l   d k j  b  ah b b ob.

⁶ Bémáá'áá chōm ésyāāl anabe boj, beprise bésóle á toj é'sō epun-té bébelé' mímbab nsón. ⁷ Boj prise Ambáámbáa mwěmpen móo asóle á toj eché edé áte. Asóle áhed mwětté ngen pogg. Eesóléé mbéd áde éewanléé mekií mé nyam ábe Dyōb mende áyāl e mbéb mímmē ne mí bad běmpée, míme bébelé ésebán běbíi bán běbelé mbéb. ⁸ Edədədəj éche Ésáá ébélé mímén mam âlúmed syánē áte nén aá, abenled áde dédii débenladté ebem é nköjsé, ábélé nzii eesaá syánē ápe á Ebem éche Ésáá wéé Dyōb ádii. ⁹ Échē ebem élumte mekan míme mébenlad chii. Élumte syánē nén bán nde ne mende mé nyam míme bad běbágé'áá Dyōb, méeheléé-sé mébel nlém míme mod awě abage mende se nkéle á abum. ¹⁰ Mmén mbeltéd ísyāāl rínōne' dásō adyé á ndyéed, amwé á mímm ne nyaa é mekan émpée híin eché bad běbelé'áá ásáad yěl. Mmē mbeltéd ndíi mbéndé e ekob é yěl ngén, éche émaá á pondé eche Dyōb dénabéé mam mésyāāl.

Mekií míme Yesue móo médé nde eché esáá

¹¹ Kr̄istəə amaá ape. Móo adé Prise Ambáámbáa a mekan mé bwâm míme mémáá ape. Abele míme nsón á ebem éche étomé ebem é nköjsé, élón-ne mbom tómaa ebem é nköjsé. Saké baányoj bélóó échē ebem. Éesaá ebem éche édé á nköjsé. ¹² Áde Yesue ásólé á ebem-té wé, ansól ádē Hōm áde Átómtné Asáj ngen pogg ne ngen ésyāāl. Saké mekií mé mbód ne mé nyag ânkéenné áwēd-te ábe mende. Boj mímm mekií mén móo ántedtē. Ambenléd mó ákōde syánē á mbéb-te ábel débē á alongé á ngíndé ne á ngíndé. ¹³ Ngen e'só, bétédé'áá mekií mé mbód ne mé nyag, bétéd-te mbúmbú é etum é nyag éche béhyájté, bémwagtáad bad á yěl ábe béesáa á'sō é' Dyōb, ábel bésāj. ¹⁴ Nzé édé nén bán mekií mé nyam méhele méwōy ngíne ábel bad bésāj, né élumte nén bán mekií míme Kr̄istəə méwóó ngíne bwâmbwam, eche ehele esáad bad. Abagé eche yěl eche eewóo mbéb ké nhog née mende, ákōde syánē moosyāāl. Ambel nén á ngíne e Edədədəj éche Ésáá éche édé á ngíndé ne á ngíndé. Mmē mekií móo mésárte syánē nlém á abum ábel nén deébélē mekan mé mbéb míme mépiinéd syánē kwéed. Boj pen detángéné Dyōb dé alongé abele.

¹⁵ Né-'áá ákáá boj Kr̄istəə abé mod atinté a melé mékōjle ábel nén bad ábe Dyōb ápwédé békud nnam míme mébē abé ne abé. Mmē nnam móo Dyōb áhōbē áá móobé ábe bad. Kweéd eché Kr̄istəə áwédé chō ekəá boj nén ábenlad. Eche kweéd ekōdté bad ásē e mbéb míme běmbenlé áde melé mé nchun médíi mékámlánnáá bō. ¹⁶ Boob-pōá, melé médíi née nlyáge. Pondé ké ehéé áde mod alyágkéé, étángéné alúmed nén bán mod awě abele mímm nlyáge amaá awé boj běhídé chōm éche ályágké. ¹⁷ Nén ádē áyāle nén, á pondé eché mod áwédé dōo míme nlyáge mibágkē ngíne. Méebágkē ngíne á pondé eche mod awe abelé mímm nlyáge ádii adé á alongé. ¹⁸ Né dōo ákáá boj ké melé mé'sō míme Dyōb démmwēé ne baányoj ménkēnwōy ngíne ésebán mekií mésyágké. ¹⁹ Se' bōd, Mosee anláá bad mbéndé ésyāāl éche Dyōb dénhōbpē áá bad běhíd. Áde ámáá bō aláa, antéd mekií mé nyag ne mé mbód, ákumtén ne mendib. Ambenléd ngen e bwel é' hisob ne nyoj é mbód éche éyáge', ámwagtéd mímm mekií á kálag eche mbéndé ébédé áte, ámwagtéd-te bad á yěl. ²⁰ Áde ámáá mímm mekií amwagted, anhōb aá, "Mmén mekií móo mélumte' nén bán melé mé Dyōb méehəylánné." ²¹ Melemlem nē dōo Mosee ámmwagtédté mímm mekií ámīn e ebem é mende, ne ámīn e bwěm é'syāāl ábe běbenládtáá ábe mende. ²² Á mbále, émbē nén bán á mbéndé, chōm ké ehéé éche bémwágtédé mekií áyāl chōo bad bétédé'áá bán ésáá. Mbéb-pe méewóo'é alagsen ésebán mekií mésyágké.

Kr̄istəə eche yěl eché ábágé née nde chōo ehúdē mbéb

²³ Né-oó, nén dōo dēnkärj boj ebem é nköjsé né bwěm é'syāāl ábe é'dé áwēd-te bésájté bō ne mekií mé e'lém. Ábē bwěm é'syāāl é'bédéé nwágén mé mekan míme médé ámīn míme mékójté abé. Boj ábē bwěm ábe é'dé ámīn, běntāngéen née bésájté bō ne mekií míme métómé mekií mé e'lém. ²⁴ Kr̄istəə enkênsónlé Hōm áde Ásáá áde baányoj bōbó

bébélé, áde ádé á nwágén á hōm áde ákónté abé. Ádyōb děn dōo ânkéé asól. Anké-'e áwed nêngáne mod awé ahóbpe' syánē wéé Dyōb. ²⁵ Enkénkaá-'áá áwed ábe yěl néé mendé ngen ne ngen. Enkénkaá nêngáne príse ambáambáá ákagké mwé téé á Hōm áde Átómtné Asáy ábe mendé mé mekií mé elém. ²⁶ Nzé néé émbéé, né Krístæ antángén néé átageé ngen ne ngen taase nköjsé mbootad. Boj chó-'e énkémbáá nê. Krístæ ampé ngen póg ne ngen ésyāél bɔɔb áde nköjsé nkagké aps á asog. Ambé eche yěl nêngáne mendé áhúd mbéb mí baásyāél. ²⁷ Né dōo moonyoŋ asyəál átángéné awé ngen póg, boj ámbid e póndé ákud nkáásé í Dyōb. ²⁸ Melemlem nê dōo Krístæ ábágé eche yěl ngen póg ne ngen ésyāél áhúd mbéb mí bad híin. Ápě-'e ngen éche élonténé ébę, saké áhúd mbéb mí bad, boj ápě ásoŋ alongé á bad ábe bésine mó.

10

*Krístæ ábágé eche yěl
ngen póg ne ngen ésyāél*

¹ Mbéndé éche Dyōb dêmbeé bad bé Israél ébédée ngén nêngáne nwágén mé mekan mé bwám míme méhúe' á'sō. Échē mbéndé éeheléé-sé ékoŋ syánē alúmed ngáne mímē mekan mēbēé. Beprise békage' Dyōb mende abe ne abe, mwé ne mwé-té. Chán-nō échē ndín é mbéndé éche békageé échē ndín e mendé éhèle ébél bad ábe bédé benben ne Dyōb bésáy? Eeheléé. ² Nzé émbé nén bán békéhlé'áá, né bénkénsókgé Dyōb mende abe-yę? Né bénsoŋ áyəle nén né bad ábe békage Dyōb mende bésáá'áá ngen póg ne ngen ésyāél, né békage'áá-'e áte bán békéhlé mbéb. ³ Boj rímé mende mén-eé métímé mékamtan bad mwé ne mwé téé nén bán békéhlé mbéb, ⁴ áyəle nén mekií mé nyag ne mé mbód mēheléé se méhúd mbéb mí bad mbéb.

⁵ Nén dō-'áá děnkęŋ boj áde Krístæ ápédé á nköjsé-te aláá Dyōb aá,
“Saké mende ne nde éhedeé.

Ebojnséné me yěl e moonyoŋ eché mébeé we néé mende.

⁶ E'lém ábe békajnté á menyán,
mende-'e ámpé míme bad békageé we áhúd mbéb mí bad,
békewōgtéé we menyinje.

⁷ Dó-'áá níhóbeé meé,
‘Mé nén A-Sáy,
mbökjséné ábel ngáne éhedeé
melemlem ngáne éténléé áyəl echém á kálag echōj.’”

⁸ Ansébé ahób aá, “Saké mende ne nde éhedeé saá-kaá e'lém ábe békajnté á menyán áhúd mbéb mí bad é'wógté we menyinje” kénée édií nén bán bad békéhlé'áá mímén mekan ngáne mbéndé e Mosee éhedeé. ⁹ Ambé ambád aá, “Mé nén A-Sáy, mbökjséné ábel ngáne éhedeé.” Né-ɔó, Dyōb ásídté mende mé' bōod á nkəg ábel boj átimed mende rímé Krístæ. ¹⁰ Akwenten áde Yesu Krístæ ákwénténé ábel ngáne Dyōb áhedeé boj ábe eche yěl nêngáne mende, ábelé syánē desáá á'sō e' Dyōb ngen póg ne ngen ésyāél.

¹¹ Nsón míme beprise bé Israél nídi átyéem ábe Dyōb mende mehógi ne mehógi epun téé. Mmén mende mó-'e mēheléé se méhúd mbéb mí bad mbéb. ¹² Boj Krístæ pen abagé mende mehógi míme méwóó ngíne áhúd mbéb mí bad ngen póg ne ngen ésyāél. Ámbid ené, andyeé Dyōb á ekáá émbáá. ¹³ Áhed-taá ádyéé ásin póndé eché Dyōb débenlé boj ákəgtéd ábē bad békoyí ámīn ne mekuu. ¹⁴ Áyəle mende mehógi mwémpen míme ábágé, ábelé bad ábe áhúd mímb mbéb bésáá nyaa eche elóné mbon.

¹⁵ Edədəŋ éche Ésáá chómpé élúmté syánē áte nén bán nê áde mbále. Énhōb aá,
¹⁶ “Sáŋgwéé ahóbé aá

‘Mmén melé móo syáabō sémwéé
á póndé eché ehúe' á'sō.
Mébél békí échém mbéndé,
mbél-le ngáne békhaténné chó mbéb.’”

¹⁷ Anhób ámpé aá,

“Méekamtén-naá mbéb
ne mewusé mímāb ámpē.”

¹⁸ Dyōb ámáá bad mbéb alagsen. Mende ké mehóg méesaá ámpē míme bad bétángéné abe ákud alagsen dé mbéb.

Syánē dépe bennben ne Dyōb

¹⁹ Né-oó, a-baányaj dewóó kunze âsól ádē abwóg á Hōm áde Átómténé Asáj. ²⁰ Yesue adíbnédé syánē nzii e ekóólé eché epesene’ alongé abe áde ábágé eche yél. Eche yél edé nêngáne abad áde dénkāj syánē ápe wée Dyōb adíí. ²¹ Syánē dewóó ndale e prisé awé anone’bad bé Ndáb e Dyōb. ²² Né-oó, syánē désíde bennben ne Dyōb ne nlém nhóg, dësum-me nlém nísyāäl áwé. Nén ádē áyāle mekií míme Yesue ásyágé á awəg, mébél nlém níkénlé syánē á abum, awōbpé-’e syánē ne mendib míme mésáá áte. ²³ Dëwēd adúbe áde dédúbpé achâjnēd, dësum-me nlém áhed, áyāle dedúbpé nén bán Dyōb áde ábèle dyam áde áhóbé aá móóbél, éche ehób éehūnēē á ndoob. ²⁴ Dénən ngáne déhèle dewéd nhóg ne anínií nlém á abum, ábel dédəan débèle-’e mekan mé bwâm. ²⁵ Deebág bán deébomēē póndé ésyāäl ngáne donge á bad bébeléé. Boj pen débē déwéde’ nhóg ne anínií nlém á abum, tanje bɔob áde nyényinéé bán Epun éche Sájgwéé ápeé édé bennben.

²⁶ Nzé dedíí dekoo’ mekan mé mbéb abel áde démáá mbále abíi, né mende ké mehóg méesaá ámpē míme méhūd ímmē mbéb. ²⁷ Boj nzé mod adíí akoo’ mbéb abel, né mbwóg móó móbél mó áte nén aá Dyōb dékwid mó nkáá é Epun é Nkáásé. Béhyāad mó á ebonde é muú é ngíne eché éhyāad bad ábe bétángan Dyōb. ²⁸ Kénzéé awé eehídé’ mbéndé eche Mosee, boj bad bébe ké’e béláán békíb mbój nén bán eehídéé mbéndé, bébelé békíb móó, békíb mó ngol. ²⁹ Nzé mod-te eetéde Mwān a Dyōb néé dyam, eetéde mekií mé melé mé Dyōb míme mébél boj asáj néé dyam, ásyāä-’e káójne Edəádən eche epesene nsimé, né chán nkógsen míme ene ndín e mod níhèle móbél? ³⁰ Debíí mod awé anhób aá, “Mékōgsen bad. Mëtimtén bó áyāle mbéb ríme békíb.” Anhób-pe ámpē aá, “Sájgwéé ákāad ábē bad.” ³¹ Édé ebébtéd ne kénzéé awé ahúné á mekáá mé Dyōb dé alongé ákud nkógsen.

³² Boj nyéechatán ngáne nyémbéé-sé á mbooted áde nyékúdé e’nyínén bé ekide. Ene póndé, kénée nyéenkudté metake mé ngíne, nyéenkaj nlém. ³³ Póndé ebédé eché bad békíb-’áá nyé e’són á’sō é’ bad, bétagté-’e nyé. Donge á póndé ámpē nyébágé’áá ne bad ábe békíb-’áá nyé e’són á’sō é’ bad, bétagté-’e nyé. Donge á póndé ámpē nyébágé’áá ne bad ábe békíb-’áá nyé e’són á’sō é’ bad, bétagté-’e nyé. ³⁴ Nyéwennádtáá bad ábe békíb-’áá nyé e’són á’sō é’ bad, bétagté-’e nyé. ³⁵ Né-oó, nyébél nyéwéd nlém á abum, áyāle nén Dyōb ábage nyé nsábe míme níchábé ámín. ³⁶ Nyéttángéné awesen ábel nén nyébel ngáne Dyōb áhedeé, nyékud-te chóm éche Dyōb áhóbé aá móóbél nyé. ³⁷ Éténlédé á kálag e Dyōb nén bán,

“Mwāmpin mí póndé,
mod awé atángéné ape, ápɛ,
éebébéd-taá póndé.

³⁸ Ábêm bad ábe békíb-’áá nyé e’són á’sō é’ bad, bétagté-’e nyé. ³⁹ Ábêm bad ábe békíb-’áá nyé e’són á’sō é’ bad, bétagté-’e nyé.

Boj pen kénzéé awé atímné mbíd,
míewogénné mó menyinge.”

³⁹ Syánē pen deesaá nyaa é bad éche étimén mbíd ébój-’e. Dedíí bad ábe békíb-’áá nyé, békíb-’áá nyé.

11

Adúbe

¹ Adúbe ádíí âwónj nlém weé móókúd chóm éche móosumé nlém áyāl. Amad nén weé chóm éche móónyinnéē díd ékóó abé. ² Adúbe áde bad békíb-’áá nyé, békíb-’áá nyé.

³ Adúbe dőá ákéá bonj desóntén nén bán eyale é nsəl chóá Dyöb áhágné nköñsé. Né-óá, bwém ábe dényînnéé díid é'húú ne chöm éche déenýînnéé díid.

⁴ Adúbe dőə dēnkęŋ̊ boy Abele ábe Dyöb mende mé bwâm míme méntōm míme Keene ámbeé Dyöb. Ádē adúbe dőə dēmbél boy Dyöb ábéén mó menyinje née mod awé abele mekan míme métáŋgéné. Nén dénnýinéd ne akob áde Dyöb dēnkobpé mende míme Abele. Adúbe dó'-áá kékéə boy, kénée ámáá awé, abé álāngé bad mam.

⁵ Adúbe áde Enøge dðo dënökjan boj eenyînne' kwéed dïd. Boj pen Dyðb dënkeén mó ámín, bénkênnýin-naá mó ámpë. Éténlédé nén bán, byánán Dyðb dékeén mó ámín, abel'áá mekan ímme méwógté'áá Dyðb menyinge. ⁶ Modmod eéhëlëé-se awogéd Dyðb menyinge áde éedúbpæé Dyðb. Nén ádé áyâle kenzéé awé ahede ape benben ne Dyðb, atengné adúbe nén aá Dyðb ádé, adúbe-'e aá Dyðb désabé bad ábe béhede mó abfi.

⁷ Adúbe dőa dēnkăŋ̊ boŋ̊ Noa awóggén Dyōb áde Dyōb dénlāa'é mó mam ríme mēbenlé á'sō é' póndé. Kénée édíi bán póndé eched enkênyínenné rímmé mekan dīd, ambēl ngáne Dyōb dénlāa'é mó. Anlóŋ̊ bōle é'mbáámbáa. Áwēd-te dőa bōobé ádē abum á ndáb bénsōnlé békūd-te e'soosoŋ̊ áde mendib ménlönné nköŋ̊sé áte n̄syāəl boŋ̊ chōm ésyāəl éhó. Abel áde Noa âmbenlé n̄e, dénlümēd bán mbeltéd mí bad bé nköŋ̊sé ñdē mbéb. Adúbe pen áde Noa ánwōŋ̊gē dēmbēl Dyōb déntēd mó née mod awē abele mekan ríme métäng̊né.

⁸ Adúbe dőə dēnkăr̄ boŋ Abrahame awóğén Dyōb áde Dyōb dénlāā'émó aá áhíde ádyad wéé ábédé, áke hōm démpée á mbwóǵ eche Dyōb dēmboj̄sénné mó abe. Anwóğén Dyōb ákē'-e, kénéé énkembíí'é wéé ákagké. ⁹ Adúbe dőə dēnkăr̄ boŋ áke ádyēé á mbwóǵ echē Dyōb dénlāā'émó aá móhōbē móōbe mó. Ambé áwed néé nken. Aisige bó Jakob bómpe bédyéé'áá á e'bem-tê. Dyōb dénlāā bómpe melelem ngáne ánlāā'é Abrahame. ¹⁰ Abrahame adyeé'áá á e'bem-tê wé ásine' póndé eche ádyee'é á dyad ámbáá áde ásúmnédé, áde Dyōb děn átíídé boŋ alój'-e. ¹¹ Adúbe dőə dēnkăr̄ boŋ Seraa abé nkog kénéé ámmadté kôd e achád atóm. Andubé nê áyâle andubé aá, nzé Dyōb áhōbé aá móōbél dyam, abelé alóned dó. ¹² Né-ɔó, kénéé Abrahame ámmadté achun bwâmbwam nyaa echē éehelé'aá-se achyáá mwǎn, nchyáátén ísyâél ménhūú ne mó. Mmê nchyáátén mêmbruú áte nêngáne betintine ábe bédé ámîn, móó-é áte nêngáne nsíí mme índé aá nkag mé edib é nkwé, mme bêeheléé-se bétón.

¹³ Ábê bad bé' boód, bénwōŋ adúbe káéjne á kwééd. Kénéé běn bénkēnkudté chōm éche Dyöb dénlāā'é bó aá móhōbē móo móōbē bó, boŋ bennyyin ábê bwěm nchabnede bewógén-ne bó menyinge. Bēnkēmbáj-gaá ahób bán bédíi beken ábe béewoo hōm áde bédyyee'é á nköŋsé-te. ¹⁴ Bad ábe bélóbe échê ndín é mekan bélumte néen bán běhede hōm áde běchágké ádāb. ¹⁵ Nzé bédíi békámtánnáá wée běmbidtē, né běnhěd nzii átim ámbid. ¹⁶ Boŋ běntím běhedé dásš mbwág éche eboó, nédē mbwág e ekombe é mǐn. Né-áó, Dyöb déekwāgnéé bó nzé běchágé mó bán ádāb Dyöb, áyäle amaá bó echab mbwág abonseen.

¹⁷ Kénéé édíí néñ bán Abrahame móō Dyōb dénlāā’é aá bän bébuú mó áte, adúbe dáo denkǟj boj abé mbojsén ábe Aisige awé abédé mímē mp̄om mí mwän néé mende áde Dyōb ákágé mó. ¹⁸ Aisige móō Dyōb dénlāā’é Abrahame aá, “Mbween ne Aisige dáo ncháatén míme nílängé we meé wéküd mébídte.” ¹⁹ Abrahame andúbe aá Dyōb áwóó ngíne ápuud kē mod awé amaá awé. Né-oo, dehele dehób bán Abrahame anküd Aisige ámbid áde ápúúdé. ²⁰ Adúbe dáo dênkǟj boj Aisige ahób aá Jakobé bó Esao béküd nnam póndé éche ehúe’ ásō. ²¹ Áde Jakobé ádíí benben ne kwéed adúbe dáo dênkǟj boj ánämēd mwän-téé awé Josebe. Anwúlén á ntón míme átômneé, ábe Dyōb edúbé. ²² Áde Josebe ádíí benben ne kwéed, adúbe dáo dênkǟj boj ahób ásō é’ póndé aá bad bé Israel bélid á Egipto. Dó-’aá dênkǟj boj alégtén ngáne bétángéné mímē ndim abel.

²³ Adúbe dōo dēnkęj bon Mosee sáá bó nyan békōō mó á etūn é ngon éláán áde bémáá mó achváa. Bénnvín néñ bán Mosee aboó elóon bwâmbwam, bénkembán-gaá

âbóo mbéndé éche kâj éntomédte.* ²⁴ Adúbe dôo dênkâj boj áde Mosee ámáá akwög, enkênkwentén aá bêchâge mó bân mwän awé mwän a mmwaad awe kâj e Egípto. ²⁵ Ankwentén âkud metake ne bad bé Israél tómaa âwög bwâm á mbeltéd mé mbéb-te á esój é póndé. ²⁶ Ne mó, annyín nén aá âkud akwágké á nló ríme Ane-awé-Bésineé, áde nsábe mme ntómé nhon í Egípto ísyâel. Ambel nê áyâle asiné'áa nsábe mme Dyöb débeé mó á póndé eché ehúe'.

²⁷ Adúbe dôo dênkâj boj Mosee áhídé á Egípto ésebán abáa' melingá mme kâj e Egípto. Ankañ nlém abé áke nêngáne mod awé anyíne Dyöb áde mod éenyinné díd. ²⁸ Adúbe dôo dênkâj boj atíi Ngande e Nnyíme-ámîn. Anláá bad aá bémwagted mekií á mmwe mé e'kob âbel boj nzé ángel e Dyöb epedé âwúu bân b  s  , eewúé' bân b  s   be bad bé Isra  l.

²⁹ Adúbe dôo dênkâj boj bad bé Isra  l b  ch  b   edib é nkweé éche b  ch  geé b  n Edib é nkweé éche Éy  ge'. B  nchab   ch   byánán b  kag á nd  b   m  n. Boj áde bad bé Egípto b  h  b   b  n b  mp   b  chabe, b  nh  . ³⁰ Adúbe á bad bé Isra  l dôo dênkâj boj e'k   ábe b  nl  jn  d dyad á Jeriko é'kw   áde bad bé Isra  l b  hy  mn  d b   epun sa  mb  . ³¹ Adúbe dôo dênkâj boj akwalee awé b  ch  g  'áá b  n Rahabe enk  nw   áde bad ábe b  nw  n Dyöb nl   áte b  nw  e  . N  n d  mb  nl  d áyâle ank  b   bad bé Isra  l nken awe nd  b  , áde b  l  m  e b   âhy   dé an  n dyad áte á mes  om-t  .

³² Mb   nkag á's  -ye? P  nd   e  sa   ech   nk  le nl  á ny   mam áyâle bad nêngáne Gidione  , Barage  , Saamsine  , Jeftaa  , Dabide  , Samwe  le ne bek  l b   ed  d  j b  syâel? ³³ Adúbe áde áb   bad dôo dênkâj boj b  t  m melo   áte r  me b  b  b   b  nw  n bel. B  ly  gt  'áá bad ábe b  b  d  d ás   ech  b   nyaa ech   et  ng  n  . B  nk  d-te bw  m ábe Dyöb d  nh  bp   a   m  b  b   b  . B  nk  j ns  l n  ngii. ³⁴ B  nd  m  d e'bonde  ' mu  . B  mb  d á mek  á m   bad ábe b  h  d  'áá b   p  á aw  en. K  née á mbooted b  nk  nw  ng   ng  ne boj Dyöb d  mb   b   ng  ne, b  b  d  e   s  n  ze é ng  ne b  wanne  ' s  n  ze é melo   m  mp  e  , éche s  n  ze t  t  m  ' meh  l  . ³⁵ Adúbe dôo dênkâj boj do  ge dé beba  d ány  n né   áb  b   bad ábe b  mm  d aw   b  t  m  e ámb  d á along  .

Do  ge á bad pen b  nk  d mb  te k  áj b  w  . B  nk  nw  nt  nné Dyöb ab  j á y  l âbel b  t  de b  . B  mb  l n   áyâle b  mb  l b  n b  pu   b  k  d along   áde ad   b  w  m t  maa d   nk  js  . ³⁶ Do  ge d  mp  e d  nk  d metake, aw  l áde bad b  w  l  á b  , b  b  m  -e b  . B  nh  j do  ge b  h  -e b   á mbw  g. ³⁷ Do  ge áb  d  d áde b  nw  n   mel  á, b  mp  e-e' b  s  l b   áte e's  j é'be. B  nw  n b  mp  e p  á. Áb   bad b  w  á'áá e'k  b   é'mb  d b  hy  mn  '. B  b  d  e   bet  t  k   b   bad, b  k  ud  ' metake, b  k  ud  -e ndutul á mek  á m   bad b   ek  y  . ³⁸ Eeh  dn  d-t  a   b  n bad b   bw  m né   b   b  b   á nk  js   m   mb  b   w  n. B  t  mn  dt  á á ehy  nge ne á mb  d m  n, b  dy  e' á e'l  á-t   ne á e'l  m-t  .

³⁹ Adúbe áde áb   bad b  syâel d  nkâj Dyöb áb  én b   menyij  . Boj k   n  , b  nk  kudt   ch  m eche Dyöb d  nh  bp   a   m  b  b   áb   bad. ⁴⁰ N  n d  mb   áyâle Dyöb d  mm  d atíi a   m  b  b   sy  n   ch  m éch   t  m   ch  m éche ánh  bp   a   m  b  b   b  . Ant  i n  n a  , nchoo ne sy  n   d  o áb   bad b  kwogn  d  t   áwe e's  .

12

Dy  b d  o áde sy  n   S  á

¹ Ng  ne édi  -'áá b  n en  n ndun e mod el  jn  d   sy  n   ed  -'e mb  n, t  ngene adúbe áde déw  o  , det  ng  n   des  d  d k  ch  é éche k  áj sy  n   nz  i á nk  g, d  t  d  -'e mb  b   r  me nk  á sy  n  . Det  ng  n   né   dék  á nl  m âny  ged meh  l   r  me Dyöb áh  b   a   dény  ged. ² Det  ng  n   né   dés  m   m  d w  e   Yesue mw  n, áyâle mó aly  g  t   sy  n   âw  j adúbe. Mw  n-na     w  ng  n sy  n   k  áj d  p  d-te d  o á as  g. Ankwentén âw   kw  ed e e's  n á aw  g, enk  nt  d-t  a   ád   akw  gk   né   dyam âbel n  n ákud menyij   r  me Dyöb ák  jn  d   mó. N   áb  l  -'e ba  b  , ady  e' á ek  á é mb  á á at  i dé nkaml  n á Dy  b.

* ^{11:23} K  j e Egípto ent  m  d mb  nd   a   b  w  u b  n b   baach  m b  syâel ábe b  chy  á ek  jl   ábe b  d  e mw   m  b   átim   ás  .

³ Nyékamten ngáne Yesue ânkwenténné metake akud á mekáá mé bad bé mbéb ábe bênkoo mó. Nyékamten rímmé metake ábel boj nyéekómé', nyéedülé-'e mekuu ámbid.

⁴ Nzum eche nyéwanéé ábóded mbéb, eépédeé ndágke eche nló rímmén íhèle ítóm.

⁵ Nyéechatán e'yale ábe Dyöb dêmbenlédte áwéd nyé nlém á abum, achag áde ânchagké nyé áá ábe bän. Anhób aá,

"A-mwän, nzé Dyöb ákánné we áte áyäle mbéb ríme ébélé,
etéd rímmé nkáne áte née dyam dën.

Nzé Dyöb ákógséné we, yöll eehóó' we áte.

⁶ Bíí nén wéé mod awé Dyöb ádáá, móo ákánnéé áte.

Mod awé átéde née awe mwän, móo ákógsanné."

⁷ Né-oo nyéwesen rímmé nkógsen áyäle nén, ílûmte nén bän Dyöb átéde nyé née ábe bän. Mwän ahieé adé awé sáá éékkogsanné áyäle awusé áde ábelé? ⁸ Nzé nyéeküdë nkógsen

áyäle mbéb ríme nyébélé ngáne bän bé Dyöb bésyääl békudeé, né nê álûmte' nén bän nyéekoo'é bän bé Dyöb abé. Né nyédfí bän ábe béchyáá á asón. ⁹ Nzé ábëd besáá bé nkörjsé böhle békägsen syáné áyäle mbéb ríme débelé, débagé-'e bó edubé, né detángéné Sáá awëd awé adé ámín edubé abe tómaa nê, ábel débë á alongé. ¹⁰ Á esój é pónde dôo ábëd

besáá bé nkörjsé békägsanné syáné, kékhan áde ébójnédé'-e bó dôo bëbeleé. Dyöb pen ákógsan syáné áwóngén syáné ábel nén débë bad ábe bésáá ngáne mwën ámpë ásáá.

¹¹ Á pónde eche dékúdë nkógsen, dewóge mbéb áte, deewögéé bwâm. Boj ámbid e

pónde, kenzéé awé rímmé nkógsen n'yágté debyéé, abelé abé nsaj, ábelé-'e mekan ríme

métángéné.

¹² Né-oo, mekáá mème mêmmod nyé achii áte, nyéwéd mó áte. Nyéemwág-ke se mekuu méságé nyé ásé. ¹³ Nyébë nyéhídé' nzii eché etyéémé ábel nén bad ábe bésyagte', beenabpë eped atim, boj bedyee bwâm.

Elébë áwögëen Dyöb

¹⁴ Nyéwan áte ábë nsaj ne moosyääl. Nyéwan-ne áte ámpë áwón abé áde ásáá, áyäle ésebán mod asáá, eéhëlëe-sé anyín Sángwéé. ¹⁵ Nyényin nén bän nyé modmod nyéeböö'é nsimé ní Dyöb akud. Nyényin-ne nén bän nyé modmod nyéesaá nêngáne mbél mé mbéb ríme nzé ríkwogé ímbelé ímpëen ndutul, ímbébéd-te mbél mémpëe. ¹⁶ Nyényin-ne nén bän nyéekábéé mesón, nyéebélé-'e mam née bad ábe béewöhne Dyöb pónde ngáne Esao ámbenlë. Esao ansom kunze eché ánwöngé née mwän a'só á etútú é ebwög é ndyéed ehög. ¹⁷ Nyébíí nén bän, ámbid e nê, Esao ahedé'áá aá sáá ánamed mó, boj sáá ambán mó anamed. Kénée áanchi'é bwâmbwam, nzii enkénbaá áhæjlen dyam áde dêmbenléd.

¹⁸ Nyékamten nén bän hõm áde nyétyéémé bøob ádïi á'sö é' Dyöb. Nyétyéeméé nêngáne bad bé Israel bénnyéémmé bënben ne mbøod e Sinai e nkörjsé eché muú ní ngíne ímbidé'áá ámín. Ádë bénnyéémmé áhed, nganjlen e ehíntén embé áhed, bïn é'südën áte, ekukud é ngíne-'e étome'. ¹⁹ Bénwög esaad é eloj, bëwög-ke ehób. Mbwög ní ngíne ménkob bó. Bénchäj Dyöb nén bän eehóbé' ámpë. ²⁰ Bénchäj Dyöb nê, áyäle dyam áde ánlää'é bó aá bëbel dénwögëd bó mbwög bwâmbwam. Anhób aá, "Chömköm éekidtán enén mbøod. Nzé ké nyam ekidténe chó, bélüm chó meláá káejé ewé." ²¹ Mekan rímmé bénnyinné ménkobéd bó mbwög bwâmbwam. Mbwög ménkob káejne Mosse. Anhób aá, "Mbwög nínajte me." ²² Boj nyépen, nyépedé bënben ne mbøod e Zayon. Nyépedé bøob á dyad áde Dyöb dé alongé. Ádë dyad ádïi Jerusalem awé adé ámín. Áwëd-te, ángel biib, éládné áte ne menyinje. ²³ Nyémpë nyépedé á nlatén mó bän bë'sö bé Dyöb ábe Dyöb átélé mën ádyöb. Nyépedé wéé Dyöb áde ákáadte' moosyääl. Nyépedé átinté e e'dædæn ábe bad bë bwâm ábe Dyöb ábelé békwognédé. ²⁴ Nyépedé wéé Yesue awé adé mod atinté a bad ne Dyöb á melé mékjöslé. Nyépedé bøob wéé Yesue ámwágtédé nyé rímmé mekií. Mmë mekií mebágé syáné nsimé tómaa mekií mème Abële. *

* 12:24 Mekií mème Abële méhede' metuutén, boj mekií mème Yesue mépeene dásö alagsen.

²⁵ Nyényîn nén bán nyéekônléé Dyöb metúu tângene dyam áde áálângéé nyé. Bad ábe bénkênwógén mod awé Dyöb dêmbanéé á nköjsé-te âléb bad, benküd nkógsen. Ngáne bénkudté nkógsen, syánē ámpē detângéné nkógsen akud nzé deewóge elébé éche ébídé ádyöb. ²⁶ Boód áde ánhðbpé akan, nköjsé ménsgnéd ásē. Boob-pe ahðbé nén aá, “Mäböl nköjsé ínsagnéd ámpē. Saá-kaá nköjsé mwëmpen mésagnéd, mëböl káájne ekombe é mën chómpé ésagnéd.” ²⁷ Ahðb áde áhðbé aá, “Ámpē” álûmte’ syánē nén bán Dyöb déhùd bwém ésyääl ábe bésagnéd ásē. Ábê bwém é díi bwém ábe áhágé. Äbel nê äbel boj bwém ábe béesagnéd élyag.

²⁸ Né-াৰ, দেসানেন দ্যোব আয়েল নেন অবাগে স্যানে ম্বুওগ এচে মড এহেলে এ-সে অসাগেড আসে। দেসানেন দ্যোব, দেবাগে-’এ মো এডুবে ন্যা এচে এওগেড মো মেণ্যিংজে। দেবেলে-’এ নে নে ম্বুওগ নে এডুবে এস্যাএল। ²⁹ নে ম্বালে, দ্যোব আডেড আডী নে মুু মীমে নিহাণ্টে চোম এস্যাএল।

13

Abé áde áwógte Dyöb menyinje

¹ Edənge é Bad bé Kr̄isto ébē ékag á'sō átîntê echêñ. ² Nyéebág bán nyéekobeé bad beken póndé ésyāēl. Doŋge á bad békéköb ángel nken, áde béebíi'é bán ángel chóo édē.

³ Nyékamten bad ábe bédé á mbwəg. Ébê byánán nyáābō nyêdé áwed. Nyékamtan-ne bad ábe békude metake ásē e bad bémpēe. Ébê byánán nyémpē nyékude' mímē metake.

⁴ Mod-téé awé adé á ndáb e'wóngé ábage e'wóngé edúbé. Mod eekábé mesón á ewwóğ. Nyéēchatán nén bán Dyób dékáād bad ábe békábe' e'tongé é' mekan ne ábe békábe mesón.

⁵ Nyéesumé nlém áyèle edənge é mənē, nyébé-'e menyinge ne kéchéé éche nyéwóó áyèle nén Dyöb áhóbé aá, “Méechenéé nyé mbêd, méebáj-'aá nyé áyāl.” ⁶ Né-óó, dehele dehób ne nlém ínsyāél nén bán,

“Dyōb dōá ádé nwôngene awêm,
méebângé dyamdyam,
cheé moonyon áhele ábēl me?”

⁷ Nyékamten bad ábe bélýágté'áá nyé baód, ábe bénkalé nyé eyale é Dyöb. Nyényin nsón mme abé ádāb ábélé. Nyéhíd ímmāb mekuu, nyédúbe ngáne bómpē bénđūbē.

⁸ Yesu Krístæa adé melemlem póndé ésyāél. Ngáne ámbéé chän, nê dôo ádíí chii, nê dâ'-aá ábëé abé ne abé. ⁹ Nyéémwág-se ayáge ké áhéé áde adé nhøylén áhøylén nyé nlém á abum. Ébóó nén bán nsimé n̄ Dyöb mûmó ínwéde nyé áte saké mbéndé tângene adyé dé medyé. Échê mbéndé éewõnganné bad ábe béhíde chô.

¹⁰ Dewóó menyán mé mende ríme beprise ábe békage mende á ebem é Dyōb béewóó'é kunze âdyé chōm áhed. ¹¹ Prise ambáámbáa, abage Dyōb mende áyāle mbéb mí bad. Abelé atéd mekií mé nyam é mende asólén mó á Hōm áde Átómíténé Asáŋ. Bébelé bétéd ndim ní nyam pən, békídén ámbid e eyáde békhyáad mó. ¹² Né dōo dēnkäj boŋ Yesue ámpē átag, awé ámbid e e'ké é' dyad ábel boŋ mímē mekií mébel bad bésâŋ. ¹³ Né-ó syánē ámpē déke détân mó ámbid e eyáde ábel boŋ syánē ámpē dékud e'sôn ábe ânkudté. ¹⁴ Déke détân mó áhed áyāle nén deewóó'é dyad áde ásúmnédé á nkönsé-te wén. Boŋ desumé nlém ábē á dyad áde áhúe' á'sō. ¹⁵ Né-ó, débē dékene Dyōb mbwiined ne Yesue. Mmēd mekenag mébê nêngáne mende ríme débageé Dyōb. Dékag dékale' nén bán mó adé Sáŋgwéé. ¹⁶ Nyéechatán nén bán, nyêtáŋgéné bwám abel wéé bad bempée. Kéchéé éche mod áwóó-'áá, áwôngan nhóó ne aníníí. Échê ndín é mende chóó éwógté Dyōb menyiné.

17 Nyéwógne bad ábe bélyágte nyé, nyésuded-te yäl ásé e nkamlen mímāb áyäle bôo bénöne nyé. Bétyéem-me á'sô é' Dyöb âláa mó ngáne bénóné'áá nyé. Nyéwógne bó ábel boŋ bébê menyinge ânöñ nyé. Ésebé nê, né békôg ndutul ânöñ nyé. Né nê déewôngén-naá nyé.

¹⁸ Nyékânnad sé. Sêbíí nén bán nlém nkénlé sé á abum áyâle chöm ésyâel éche sébelé. Sêhedé'áá bán sébel chöm ésyâel nyaa eché etângéné. ¹⁹ Mbáde nyé achâj nén mæé nyékânnad sé âbel nén Dyöb âbel íwâmsen atim ámbid âbe ne nyé ámpé.

Mekáne mé asóg

²⁰ Dyōb dóo ábage' bad nsaj, dō-'aá ápúúdté Yesue, Sáŋgwéé awêd. Bøob-pøó, Yesue adíi née ndèle a Nnən-a-mbód awé békénlédé mímē mekií ábel nchemten míbê á ngíndé ne á ngíndé, átîntê e Dyōb, ne éche mbód. ²¹ Nkânné nén mæé, Dyōb ábel nyébê mbojssén ábel chóm-té éche áhedeé aá nyébel, nyébé-'e nyóngé ábel mam míme métáŋgéné. Yesue áwôŋgan nyé ábel mam míme méwógté Dyōb menyinje. Ehúmé ébê ne Yesu Krístæ abé ne abé. Ébê nê.

E'yale bé asóg

²² A-bánned, ncháa nyé mæé, nyékon échén elébé awóg. Enén kálag eché ríténlé nyé eéchabéé áte. ²³ Ndæá mæé nyébíi nén bán békídté mwânyan awêd, Timotie, á mbwøg. Nzé awámséné me atán, né súmð séepé áwén.

²⁴ Nyélented me bad ábe békéngte nyé bésyääl, nyéluled-te bad bé Dyōb bésyääl. Bad bé Dyōb békéngte ábe békídté á Italia, békéngte békídté nyé melenten.

²⁵ Nsimé ní Dyōb míbê ne nyé moosyääl. Ébê nê.

Kálag eche
Jemse
Ndibned n̄ kálag

Kálag eché Jemse átélé ehóbé tângene mekan íme bad bé Krísto bétángéné abé póndé ésyāel á alongé ádāb. Bad bé Dyōb ábe bérpájtédé áte nkōjsé áte ísyāel bōo Jemse ânteléé chó. Aběnlédé ngan hín âlēb bad bé Krísto tângene metón hín. Mmē metón médii, âbē nhon ne âbē atóg, mekägsen, abé á bwâm, ânōn bad nkōjtéd, adúbe ne mbeltéd, ngáne bad bé Krísto bétángéné echém abenled, âwój debyéé, nsəlag, kúmbe ne asuded á yđl, âbíded mbakú á yđl e bad, âkum ekáá á tâl, âwesen, ne âkáne.

Jemse awédé áte á kálag tē wē nén aá mbeltéd nkag ekuu ehógo ne adúbe.
Nkabtéd n̄ kálag

Ndibned n̄ kálag 1.1

Adúbe ne âwój debyéé 1.2-8

Âbē atóg ne âbē nhon 1.9-11

Âkag ne âkud mekägsen 1.12-18

Âwój ne âbel 1.19-27

Ngabén eéhedenádté 2.1-13

Adúbe ne mbeltéd 2.14-26

Ngáne mod a Krísto ábenladté echém 3.1-18

Mod a Krísto ne mekan mé nkōjsé 4.1-5.6

Elébé émpée 5.7-20

¹ Me Jemse, mbølede a Dyōb ne awé Sángú Yesu Krístæ, me-eé ntenle nyé enén kálag. Nlente nyé metúmbé dyom ne mébe mé bad bé Israel íme mérpájtédé áte nkōjsé áte ísyāel.

Jemse aá bad bédúbe Krístæ
béwôj-’e debyéé

² A-baányaŋ, póndé ké ehéé eché nyaa e mekägsen ké ehéé étáné nyé, nyétéd nê e’boj é yđl áte. ³ Nyébíí nén bán ímén mekägsen íme nyékudeé áyāl e adúbe áde nyéwóó, mewéde nyé nlém á abum. ⁴ Nlém íwúu nyé á abum káej á asog âbel boj mbeltéd ímén ítyéem bwâm nílôn-ne mbon, âbel boj nyéewóó’ abé dé mbéb ké ahógo alongé ádēn.

⁵ Nyé ké ahéé awé atóge’ debyéé, áchârj Dyōb aá ábe mó. Dyōb dōo ábage moosyæl debyéé ne nlém nhógo, ésebán akwognad modmod, ábe-’e mó. ⁶ Boj pen nzé nyécháa Dyōb nyédúbé bán ábe nyé chom éche nyésédté mó ésebán nlém nkáadte nyé á abum. Mod awé nlém nkáadteé á abum ádíi née edib é nkweé éche éhode’, epub éhúene’ mendib ped enén étimne enínií. ⁷ Ene ndín e mod eewémtán aá móðkünd chom wéé Sángwéé. ⁸ Adíi mod awé awóó nlém móbe, eecháŋnád-taá hóm ahógo áyāl e kchéé éche ábeléé.

Betóotöké bé bad ne behon bé bad

⁹ Mod a Krísto awé eésé etógnén á’sō é’ bad bérpée atángéné abé kúmbe nzé Dyōb áchágté mó ámín. ¹⁰ Mod a Krísto awé adé etógnén á’sō é’ bad bérpée atángéné abé kúmbe nzé Dyōb ásúdté mó. Nhóbe nén áyāle ámaá melemlem ngáne ébéenéé mbonja e nkéákæ awé adé á ahín-té. ¹¹ Nzé enyen épene ne ngíne ábe e’hyé bé ekide é’belé é’hyáad ane nkéákæ, éche mbonja-’e ébelé ésoo, e’boj é’bab-pe é’belé é’maa. Melemlem nê dōo behon bé bad bémáa’é anan áde bénaneé rímab nhon ámbid.

Jemse aá mekägsen méehuu’é wéé Dyōb

¹² Nnam ne kénzéé awé awéséné mekägsen, áyāle nzé atómé rímē mekägsen áte, Dyōb débe mó nsábe íme ídē alongé áde áhóbé aá móðbë bad ábe bédáá mó. ¹³ Nzé mod akudé mekägsen eetángeneé ahób aá, “Mmén mekägsen méhúú wéé Dyōb.” Mod

eéhēlēē-sé ákəg Dyōb ne ebébtéd, melemlem ngáne Dyōb-pe déekəgée mod âbel mbêb. ¹⁴ Mewêmten mé mbéb mé mod mwén móo mékəə boj ahún á mekəgsen-tê, ene póndé-'áá rímē mekəgsen métédeé mó nlém á abum boj mehañ mó. ¹⁵ Ómê mewêmten rímē mébâg mod áte mó-'áá mépeene mbéb, nzé mímê mbéb-pe ríkwogé mod áte, mpiinad mó kwéed.

¹⁶ A-baányaŋ bé edəŋge nyéedōgnād. ¹⁷ Ndε e bwâm ké ehéé ne kchéé éche élóné mbon éhúú ne Titéé awé adé ámīn. Titéé mó ahəgé bwém é'syāəl ábe é'pene ámīn. Ábén bwém é'pene-'ε nhəŋlén ne nhəŋlén, boj Dyōb pen déehəŋlanné. ¹⁸ Dyōb dêmbel ntíi ábe syánē alongé dékəšlē abe áde âmbéé syánē échē eyale é mbále. Ambel nê âbel boj átinté e mímē nhəgtéd nísyāəl, syánē débē ngáne mbote e'só echē bēbagé mod née mende.

Jemse aá bad bé Dyōb bēbèle
ngáne eyale é Dyōb éhōbēé

¹⁹ A-baányaŋ bé edəŋge, nyébíí rímén mekan. Mod téé ábē mehél âwog dyam áde mod ampée áhōbēé, mod eewámsán dyam ahōb pen, mod eewámsán-ne alij. ²⁰ Melingá mé mod méemwagké-se ábēl mekan rímē Dyōb áhedeé áá ábel. ²¹ Né-ó nyétede mekan mé mbinde ne mekan mé ebébtéd mésyāəl rímē nyébēleé. Ne asuded á yěl ásyāəl, nyékob eyale éche Dyōb áwéné nyé á nlém-tê. Échē eyale chōo Dyōb ábenladté áson ádēn alongé.

²² Nyébēle ngáne eyale éhōbēé. Nyéedōgē yěl se nyéwōgē chō wögén. ²³ Kénzéé awé awóge' eyale é Dyōb, ésebán abele' ngáne éhōbēé, adíi née mod awé anōne' ábe e'só á dyené. ²⁴ Amaá eche yěl anyín, boj aké áde ákagké, abelé áchatén ngáne e'só é'díi mó. ²⁵ Boj bad ábe békoo' mbéndé echē etáŋgéné anōn áte, mbéndé eche ehúde' bad á mehañ, nzé běhíde chō ngáne éhēdnadté saké bán béláa' chō boj běchatén-ne, boj pen, běhíde chōm éche éhōbēé, Dyōb dénaméd bó áyāl e kchéé éche bēbēleé.

²⁶ Mod ké ahéé awé awémténé aá móbēle' ngáne Dyōb áhedeé boj eekóbe éche echém, ene ndín e mod adoge eche yěl, ádē abele á Dyōb-pe, ádē ngén. ²⁷ Abele Dyōb nyaa eche esáá ne eche etáŋgéné á'sō é' Dyōb Titéé, adíi anōn menyuu ne bekúd ábe bétage', ne ácháə yěl bwâm ésebán mekan mé mbinde mé nkōjsé méwōge mod áyāl.

2

Jemse aá bēetēdē baahōg
etógnén ábíníí-'ε nkójtéd

¹ A-baányaŋ, nyé nēŋgáne bad ábe bédubpé echēd Sáj, Yesu Kr̄istəə, Sáŋgwéé awé échē edubé échábé ámīn, nyéetâŋgéné née nyényíne mod á díd-te se nyétede mó etógnén ké-'ε nkójtéd. ² Détēd bán mod asólé wée nyéládné, ahédé nzēd é gôl, ahédé-'ε kase é mbóté, ntogétoke mí mod mómpē níslé, ahédé mbóté é mbinde. ³ Nzé nyébagé mod awé ahédé kase é mbóté edubé boj nyéláŋgé mó bán, "Hyé édyee enén kase e e'dii," boj nyéláŋgé-'ε ntogétoke mí mod bán, "Tyéém hē," ké'ε bán, "Dyéé á ndəob tē hē," ⁴ né nyélúmté bán baahōg bétómé ábíníí, né nyékáadé-'ε bad ne mewémten mé mbéb.

⁵ A-baányaŋ bé edəŋge, nyéwóglan. Éesaá mbále nén bán Dyōb ápwédé betóótōkē bé bad á nkōjsé te aá bédubé Kr̄istəə-yε? Ádē adúbe dó-'áá ádē mímāb nhən, apwedé-'ε bó âbē bad ábe békene nyé á kóte-yε? ⁷ Éesaá mbále bán bōō běhōbe dřn dé edubé áde ane awé akamlan nyé mekan mé mbéb áyāl-'ε?

⁸ Nyéebēl dyam áde átâŋgéné nzé nyékoo' mbéndé e nkamlen eche Kr̄istəə ahíd eche eténlédé nén bán, "Édəŋ mwányon ngáne édáá echoj yěl." ⁹ Boj nzé nyétede baahōg etógnén ábíníí-'ε nkójtéd, né nyébēle mbéb, né mbéndé e Dyōb-pe ekóbé nyé née bad ábe békene nyé á kóte-yε? ¹⁰ Kénzéé awé ahíde mbéndé boj abóó mbéndé póg, né abóó mbéndé ésyāəl. ¹¹ Mod awé ahōbé aá, "Nyéekábé mesón á ndáb e e'wōŋgé," mó ahōbé ámpē aá, "Nyéewúé' bad." Né-ó, nzé mod eekábé mesón boj awúé' bad, né abóó mbéndé. ¹² Nyéhōbe dyam, nyébēle-'ε mekan née bad ábe békíí bán Dyōb dékāād bó, nchoo ne

eche mbéndé éche éhúde bad á mehanj-tê. ¹³ Mod awé eewóge mod ampée ngol, Dyöb-pe déewógké mó ngol nzé akáadte bad. Boj mod awé awóge bad bëmpée ngol, éewógké mbwóg mbwe míme Dyöb ákáadteé bad.

Jemse aá nzé adúbe déekii ne mbeltéd né áwédé

¹⁴ A-baányaŋ, nzé mod ahóbé aá móðubpē Krístæa boj eébélē mekan míme mélumte bán awoo adúbe, bwâm é'héé é'dé áhed? Ádê adúbe áhæle ásōŋ adé alongé-yε? ¹⁵ Détêd nén bán mwányoŋ a Krísto nhög eewóo'é chöm éche áhágké á yäl, eewóo-'áa ndyéed e epun é bín. ¹⁶ Boj nyé mod nhög alángé mó aá, "Ékag bwâm, ékud chöm éche éhágké, ékùd-te ndyéed éche édyágké." Nzé nyélángé mó nê ésebán nyébagé mó chöm éche átognéné, né bwâm é'héé nyébélé mó? ¹⁷ Melemlem nê dão édíi ne adúbe. Nzé mod awoo adúbe áde éebeléé ngáne ádê adúbe áhóbéé, né ádê adúbe áwédé.

¹⁸ Mod nhög älää me aá, "Mod nhög awoo adúbe, anínií-'ε abele mekan mé bwâm," me-'ε mëtimtén mó meé, "Lúmed me ngáne mod áhæle awój adúbe ésebán abele mekan mé bwâm, méluméd we ádêm adúbe áyäl e mekan mé bwâm míme mbeléé." ¹⁹ Edúbpé nén weé Dyöb ádíi ahög. Nê ádê bwâm. Kájne e däädaj bé mbéb bómpé é'dubpé nê, é'næe-'ε ne mbwóg. ²⁰ A-eyókél é mod, ehede weé bélúmed we nén bán nzé mod awoo adúbe boj eébélē ngáne ádê adúbe áhóbéé, né ádê adúbe déesaá dyamdyam-ε? ²¹ Cheé ênkärj boj Abrahame, awesýáné sáá ambáá, ákobnéd á'sō é' Dyöb née mod awé abele' mam míme Dyöb áhóbé? Saá akwënten áde ánkwendénné ábe awe mwän Aisige née mendeyé? ²² Nyényiné nén bán adúbe áde Abrahame ne míme mbeltéd békágé'áá ekuu ehög, míme mbeltéd-te mënökärj áde adúbe álón mbon. ²³ Nén démbél eyale é Dyöb énnýinnéd mbále ngáne éténléde nén bán, "Abrahame andúbé Dyöb. Nén démbél Dyöb dënkok mó nêngáne mod awé abele mekan míme métängéné." Né-ó, bad bêchäg Abrahame bán nsón a Dyöb. ²⁴ Nyényiné nén bán mbeltéd mí mod míbele boj mod ákobnéd á'sō é' Dyöb née mod awé abele' mekan míme métängéné, saké adúbe dëmpen. ²⁵ Melemlem nê dão émbëë ne akwalee awé bêchägé'áá bán Rahabe. Ankobnéd á'sō é' Dyöb áyäle bad bé Israel ábe bénlömmé bán bëhye bénor dyad áte á mesoóm-tê. Anköb bó nken, abídéd-te bó á dyad-tê, nzii empée á mesoóm-tê. ²⁶ Ngáne yäl e moonyoŋ eché eewóo edaádaj éwédé, melemlem nê dão adúbe áde déekäg ne mbeltéd áwédé.

3

Jemse aá mod-té ákamlan éché echém

¹ A-baányaŋ, nyé bad híin nyéebág bemeléede bé eyale é Dyöb. Nyébíi bán Dyöb dékäad se bemeléede tómaa ngáne ákáadte ábíníí bad. ² Syáné baásyääl debele mewusé á nhóbtéd. Kénzéé awé eébélē awusé á nhóbtéd adíi mod awé adé abé átyéémé, ahæle-'ε eche yäl akób abel boj eébélē awusé. ³ Détêd elájsén ne hóse. Nzé mod ahede aá hóse abel ngáne áhedeé, abelé ahé chó chöm á nsəl-tê. Eché chöm chó-'áá ábenladté ályágé ene hóse kékéé wéé áhedeé aá éke. ⁴ Ké'e détêd elájsén ámpé ne bøle é'mbáá ábe é'dé á edib é nkwë-te. Kéneé édíi bán é'kélé bwâmbwam, epub é ngíne chó-'áá ékeene bó, mod awé adole' ábê bøle mwä abámbé móð ábenladté ákéen bó kékéé áde ádáá. ⁵ Melemlem nê dão édíi ne echém. Kéneé édíi bán édé mwämpin á yäl e moonyoŋ, édé kúmbe bwâmbwam áyäl e míme mbeltéd.

Nyényin ngáne mwä muú ahæle se ahyáád ahín ámbáá. ⁶ Echém ámpé édíi nêngáne muú. Édíi ped e yäl e moonyoŋ póg, ébelé' mbéb í kamlan yäl e moonyoŋ esyääl. Ébelé' alongé á moonyoŋ ásyääl abé nêngáne ákobná muú, muú míme mbidé á dü-á-muú, míme méedimé'. ⁷ Moonyoŋ akamlan nyaa é nyam ésyääl. Akamlan nyam é mehín, ákamlan menor, ákamlan nyam éche édole abum ásé, ákamlán-ne nyam ésyääl éche édé á edib é nkwë-te, ambootéd-te chó akamlen se á mbooted. ⁸ Boj modmod eéhëlëë-se ákamlén echém. Echém édíi chöm é mbéb éche modmod éeheléé-se ákamlen, élóné-'ε ne e'wé bé mbéb ábe é'peene' kwéed. ⁹ Chó débenladté ákén Sángú Dyöbe, awêd Titéé, chó-'áá débenladté ábe moonyoŋ ebómán. Moonyoŋ mó-'áá Dyöb áhágé áwágéen mó. ¹⁰ Á

melemlem mé nsəl dōo e'yale bé mekənag ne ebómán békídéé. A-baányaŋ, éetâŋgénéé abé nê. ¹¹ N'yélé mé edíb nhóg méeheléé-se mēbídéé mendíb ímme mésáá ne mé mbinde abíded ahóg. ¹² A-baányaŋ, alín dé asáá déeheléé-se áchyáá e' pum é píe. Ké'e alín á sabé déeheléé-se áchyáá e' pum é' mesáá. Edíb-pe éche ébídte mendíb mé nkwe, éeheléé-se ébídéd mendíb ímme mésáá.

Debyéé áde áhúú ne Dyöb

¹³ Mod adé átinté echén awé awóó debyéé awón'-e nsônten-e? Álúmed nê ne alongé á bwám áde áwóó, áyāl e kékheé éche ábeléé. Ábel nê ne asuded á yäl áde debyéé áde áwóó ábelé boj awón. ¹⁴ Boj nzé nyéwóó kán áte eche edé mbéb, nyétôntan-ne dásō échen yäl, nyéebenláp debyéé áde nyéwóó ábel mbéb tângene ayáge á mbále, akum áde nyékuméé ekáá á tâl, ¹⁵ ene ndín e debyéé eehúé'e ne Dyöb. Edíb debyéé áde áhúú ne bad bé nköjsé. Ádíi debyéé áde áhúú ne bad ábe békewóó Edáédaŋ é Dyöb, debyéé dé edáédaŋ é mbéb. ¹⁶ Kéhéé wéé bad békewóó kán áte eché edé mbéb, bétôntan-ne dásō échab yäl, mpuutéd mibélé mbéb, nyaa e ebébtéd ké ehéé'-e ebág áhed. ¹⁷ Boj debyéé áde áhúú ne Dyöb ádé nhænlén. Kénzéé awé awóó ádē debyéé eewóó'e atón dé mbéb ké ahóg áyāl. Ene ndín e mod adáa nsaj, apwiitad, achede yäl áwóglén bad bémpe, awóó ngol bwâmbwam. Abenle bad mekan mé bwám ésebán akwagnad modmod, abele'-e nê ne nlém nhóg. ¹⁸ Nzé bekóm bé nsaj békere nsón ímme mpeene' nsaj átinté e bad, nê débél bad békere mekan ímme Dyöb áhedeé.

4

Jemse aá bad bésuded yäl, Dyöb ákamlén bó

¹ Cheé épene nzum ne nsəlag átinté echén? Éesaá mbále bán esíí é awón á bwém éche éwane nyé nzum áte, chóo ékəa' boj nyébelé nén-e? ² Ehede chöm boj weékudeé chó, nê ábelé ewúú mod. Ewóó esíí áte bwâmbwam âkud chöm boj weéhleé chó akud. Nê ábelé nyéesenle, nyéwanne'-e nhóg ne aníníí nzum. Nyéeküdëë chöm éche nyéhedeé áyäle nyéesëdtëë Dyöb chó. ³ Nzé nyéhede Dyöb chöm, nyéeküdëë chó áyäle nyéhede chó mewémten mé mbéb. Nyéhede bwém dásō áwóged échen yäl menyinje. ⁴ Nyéedé nêngáne bad ábe bédé á ndáb é mewóngé, boj békabé mesón. Nyéebii'ë bán ábane nlém ne mekan mé nköjsé ábelé nyé bad bé ekoyí bé Dyöb-e? Né-oó kénzéé awé adáa nlém abane ne mekan mé nköjsé, abelé eche yäl mod-a-ekoyí a Dyöb. ⁵ Nyéwémténé bán ngén-eé éténléde á kálag e Dyöb nén bán, "Dyöb ábánné nlém aá edáédaŋ éche móhédé syáné áte, ébê éché, adé'-e kónjí ne chó-ye?" ⁶ Boj Dyöb ábage syáné nsimé abe ne abe. Nê dó'-áá ákáá boj étenléde á kálag e Dyöb nén bán, "Bad ábe bédé kúmbe, Dyöb ákunnad bó yäl, boj ne bad ábe bésúdté yäl, Dyöb ábage bó nsimé."

⁷ Né-oó, nyésuded yäl á'só e' Dyöb. Nyéwúen Satane nló áte. Nzé nyébelé nê, mó-'e átóm mehélé. ⁸ Nyépe Dyöb benben, mómpé ápë nyé benben. Nyé bad bé mbéb, nyésôg mbéb abel. Bad-te ábe békewóó nlém mibéb, nyébane mímnen nlém ábel mekan ímme mésáá. ⁹ Nyésuden áyäle e mímnen mbéb. Nyélebe', nyéchye'-e. Nyésôg awóó, nyélebe' lebén, nyésôg menyinje awóó, nyésuden sudnén. ¹⁰ Nyésuded yäl á'só ábe Sáŋgwéé. Nzé nyébelé nê, áchágéed nyé.

Jemse aá mod eekáádté mwányaŋ

¹¹ A-baányaŋ, nyéehóbé nhóg ne aníníí mam mé mbéb á yäl. Kénzéé awé ahóbe mwányaŋ mam mé mbéb á yäl, k'e akáadte mó, né ahóbe mbéndé e Dyöb mam mé mbéb áyäl, né ahóbe'-e aá ene mbéndé eéboo'e. Nzé ehóbé weé mbéndé e Dyöb eéboo'e né weébélëë chöm éche mbéndé éhóbé aá békere. Boj né etédé etál éché éesé échóy ábé mod awé akáadte. ¹² Mod nhóg mwémpen-eé adé awé abage' mbéndé, mwémpen-naá akáadte bad. Mwémpen-eé ahele ásóŋ alongé á bad, mwémpen-naá ahele abébéd dó. Boj wé, nzé-módé édíi ákáad mwányaŋ?

Jemse aá mod eebág kúmbe

¹³ Bɔɔb-pɔó, nyewóglan, nyé bad ábe nyéhóbe bán, “chii k’ε chǎn, séēké dyad dekalengome, séēdyeé áwed mwé nhóg, sékabé nyorjé, sékudé-’e nsyáj.” ¹⁴ Nyébíí dyam áde débenléd chǎn-ε? Chán nyébíí bán alongé ádén ádé? Alongé ádén ádú nêngáne mbag. Ébag á esój é pondé, ámbid enê, weenyínéé chó ámpé. ¹⁵ Chōm éche nyétáŋgéné ahób édú nén, “Nzé Dyōb ákwénténé, né séebé á alongé, sébél-le ádén dyam k’ε ádinií.” ¹⁶ Boj bɔɔb, nyétimé nyékume ekáá á tâl ne kúmbe esyáál. Enén ndín e akum dé ekáá á tâl eetâŋgénéé. ¹⁷ Né-ɔó, kénzéé awé abií dyam á bwám áde átâŋgéné abel, boj eébèle dó, abelé mbéb á’só é’ Dyōb.

5

Jemse aá behon bé bad bétéd póndé

¹ Nyé behon bé bad, nyewóglan me! Nyéhágke e’saad áyáál e metake míme mépií nyé. ² Mmén nhon míme nyékumé mímaá abo, síi-’e émáá nyé asan adyé. ³ Échen gôl ne sílva éche nyélímmé ásé, émáá ngag akób. Ene ngag eche ekóbé ábê bwém, chóo ébél boj Dyōb ákógsén nyé, émád-te nyé ásé née muú. Nyékummé yâl nhon enén póndé eché edé benben ne e’pun bé asog. ⁴ Nóné, weesábpéé bad ábe békénlé we nsón á nzagté. Etimé edogé bó dogén. Nén ábélé ábê bad ábe wéesábpéé ádab awé áwógnad á’só wéé Titéé, Dyōb á Ngum. ⁵ Abé áde nyédií á nkörjsé hén ádú áchog alongé, nyébèle-’e kchéé éche nyédaá. Nyékodte mímen mewémten, kénéé nyébíí bán epun éche Dyōb dékōgsenné ábê bad bé ekoyí ékwógé ape. ⁶ Nyéhóbé bán bad ábe békéle mekan míme métâŋgéné á’só é’ Dyōb bédé bad bé mbéb, nyewúú-’e bó. Béeheléé nyé atyéemén.

Jemse aá bad békénsen metake

⁷ Né-ɔó a-baányañ, nyewesen kááj Sáŋgwéé ápe. Nyétéd elájjsén ne mod awé abele nzag. Abelé ásin kááj ne póndé eché ápádté mbote é bwám. Awesan kááj ne á póndé eche mbúú e’só ébootadté achó, ne áde édimtanné achó. ⁸ Nyémpé nyewesen, nyewédté nlém á abum, nyésine’ epe éche Sáŋgwéé, édé benben. ⁹ A-baányañ, nyéenyoŋgé áte tâŋgène nhóg ne aníníí ábel boj Dyōb déehbé aá nyéde bad bé mbéb. Nyébii nén bán mod awé akáadte’ adé nyé benben. ¹⁰ A-baányañ, nyétédé e’chemlé ne bekal bé’dádæn. Békálé’áá nkalaj á dín áde Sáŋgwéé, békudé metake, békésán-ne mímê metake. ¹¹ Ne mbále, syáá dechäge bad ábe békénsené bán bad ábe békúdé nnam. Nyewogé ngáne Jobe ânwéssenné áde ákúdé metake, nyényin-ne ngáne Dyōb démbenlé mó bwám á asog. Sáŋgwéé aboó nlém bwâmbwam awóó-’e nlém í ngol.

¹² Ámin e mímen mésyáál, a-baányañ, nyéebenlád dín dé nkøj mímin, k’ε dé nkøj ísé, k’ε chōm émpée ámwé melé. Boj pén, nzé ehóbé “E” abé ee, nzé ehóbé-’e “Aáy” abé aáy. Nzé nyébelé nén, né Dyōb déekógsenné nyé.

¹³ Kénzéé awé adé á metake tê, ákânné. Kénzéé awé awóge menyiŋge, ákóne ákené-’e Dyōb. ¹⁴ Kénzéé awé eédyee bwám, áchag belyáged bé mwembé, békânned mó. Nzé békânnad mó békânnad mó dyög á dín áde Sáŋgwéé. ¹⁵ Nzé édé bán békânned mó ne nlém nhóg, né Dyōb déwög bó mekáne, né débél-le mod a nkole ádyéé bwám. Sáŋgwéé ábél áhídé á anoj dé nkole, ádyéé bwám, k’ebéb-pe móo ámbenlé Dyōb délagsén mó. ¹⁶ Né-ɔó, nyépale mbéb áte wéé nhóg ne aníníí, mod téé ákânned-te mwânyañ, ábel boj nyédyee bwám. Mekáne míme mod awé abele mam míme métâŋgéné á’só e’ Dyōb, médé ngíne bwâmbwam, mébèle-’e nsón. ¹⁷ Elaijaa abédéé moonyoŋ melemlem ngáne syáne. Póndé póg ankáné bwâmbwam áa mbúú eechög, mbúú enkêñchó-’áá etún é mwé níláán ne eped. ¹⁸ Ámbid enê ankáné ámpé, Dyōb ábél mbúú echó, bwém é’bootéd-te akwog.

¹⁹ A-baányañ, nzé nyé k’ahéé atédté áhíd nzii e mbále e Dyōb, boj mod ampéé abelé atímne mbíd, ²⁰ ábíi nén aá, kénzéé awé abelé boj mod awé abelé mbéb asog mbéb abelé, né asoó alongé áde mod awé abelé mbéb. Nén débél-le mbéb híin míme ane mod ákébenlé, Dyōb déenønné mó á díd.

Kálag e'só eche
Petro
Ndibned ní kálag

Kálag e'só eche Petro ântenlé, bad bé Krísto bőo ânteléé chó. Á kálag-tê wê achagé bó aá, “Bad ábe Dyöb ápwédé.” Ábén bad bémpted áte á ped e akuu á mbwög e eché bchéhége’áá bán Esia Maino. Nzom eché enkăj boj átel enén kálag, ebédéé âwéd bad bé Dyöb nlém á abum áyäle metake mme békudé’áá ne adúbe áde bénwōngé. Áwëd-te, abage bô e'lyág bô nlém ábe nkalaj mì bwâm mme Yesu Krístæ mbagéé bô. Mmê nkalaj mì bwâm rihóbe tângene, kwéed, mpuu ne epé éche Yesue ápëé ámpë. Áluméd-te bô áte aá békwenden metake ne e'lyág bô nlém. Anluméd bô áte aá bébii néen bán rímé metake médíi mekägsen ânyín nzé adúbe áde bawánlé ádë adúbe á mbále. Bébii-’e néen bán béküd nsábe á “Epun éche Yesue Krístæ ápëé.” Anluméd-te bô áte ámpë aá alongé ádab átärjéné abé ngáne alongé á bad ábe böhíde Krístæ.

Nkabtéed ní kálag

Ndibned ní kálag 1.1-2

Dyöb dôo ábage e'soósor 1.3-12

Elébé ábel mekan mme mésáá 1.13-2.10

Mekan mme bad bé Krísto bétärjéné abel á póndé e metake 2.11-4.19

Asuded á yäl ne ábele Dyöb née mod a Krísto 5.1-11

Nsógtæn 5.12-14

¹ Me Petro, mbapëe a nlómag awë Yesu Krístæ, ntenle nyé bad ábe Dyöb ápwédé, ábe bémptedé áte boj béké beken á mbwög é Pontus, Galesia, Kapadosia, Esia ne Bitinia. ² Á ntíi mímë Dyöb Titée, ammäd nyé apwëd. Échë Edéadëj-’e ébélé nyéedé bad ábe bésáá. Abelé nê ábel nyébèle mekan mme Yesu Krístæ áláangé nyé aá nyébel. Abelé nê, ábel rímë mekií mme mésyögké á awög mébel nyékud alagsen dé mbéb. Nsimé ne nsaj ní Dyöb mibé ne nyé abé ne abé.

Dewóó e'lyág bô nlém

³ Mekengag mélbê ne Dyöb áde ádë Sáá awë awëd Sángwéé, Yesu Krístæ. Apuúdté Yesu Krístæ. Né-ó dekudé alongé dékôslé. Abel áde ábél nê, ábágé syáné e'lyág bô nlém bô alongé áde déemaá’. ⁴ Desine’ káejne nhon mme Dyöb ákójnédé ábë bad. Akójnédé nyé mó ádyöb. Áhed-te méeboj’ë, méebeb-paá. ⁵ Dyöb ábënlad eché ngum ákæ nyé adúbe ádë nyédúbpé mó, káej né nyékudé e'soósor. Ábë e'soósor bénymnéd á epun é asog.

⁶ Nyédi nyébê menyinje ne nê, kénée édíi néen bán nyéékùd metake nyaa ne nyaa é esój é póndé. ⁷ Mmë metake mápë ákæg nyé adúbe, áluméd néen bán adúbe áwúú nyé áte ne mbále. Gôl ehële ebéb, boj kë nê, békël böhé chó á dû ásáad chó. Nzé böhële békël nê ne gôl, né bétärjéné áden adúbe dómpe akæg ábel nén áwúú áte áyäle áden adúbe átómé gôl. Nzé áden adúbe átómé mekägsen áte, né Dyöb déken nyé, ábe nyé ehumé ne edubé ádë Yesue álumédte bad bô nköjsé bësyäel yäl. ⁸ Nyédaá mó kénée nyéényinéé mó. Nyédúbpé-’e mó kénée nyéényinéé mó bôob. Ké bôob-pe nyétomténe menyinje abé nyaa eché mod éeheléé-se ahób. ⁹ Chom eché nyékudé áyäle adúbe áde nyédúbpé mó édíi e'soósor ábe ábën e'déadëj békudté.

¹⁰ Bekal bô dëadëj bénhëb mam á'sô é' póndé tângene ábë e'soósor ábë Dyöb dëbeé nyé née nsimé. Béntöj ábë e'soósor ahed áte ábel bésöjtæn bô. ¹¹ Edéadëj éche Krístæ émbë bô áte áláá bô á e'sô é' póndé ngáne Krístæ átagké ne ehumé eché ákudté ámbid e póndé, boj bémbe böhëd áte. Böhëd’áá áte ábii póndé eché mímë mam mëbenlédté ne wéé mod awë mëbenlédté. ¹² Dyöb dénluméd ábë bekal bô dëadëj áte aá nsón rímë békël méesaá nsón mme bën békudé nsyäj áhed, boj ndíi nsón mmenyé. Dyöb dénlomé bad Edéadëj éche Ésáá eché ébídé ádyöb. Échë Edéadëj chôo émbël boj

baahög békálé Nkalaj m̄ Bwâm m̄m̄ nyéwógeé bɔɔb. M̄m̄n̄ mam m̄ō bekal b̄'d̄ad̄āj b̄ehobé'áá. Kéə̄jne ángel éd̄áá m̄m̄n̄ mekan asō̄jten.

Mb̄eltéd m̄m̄n̄ n̄sā̄j

¹³ Né-ɔ̄, nyépûd abad, nyéb̄e mbojsén âbel nsón m̄me Dyōb áhēd̄ē. Nyétéd póndé nyésum-me nlém n̄syā̄l áyā̄l e nsimé m̄me Dyōb d̄eb̄ē nyé á póndé ech̄e Yesue áp̄ē ámp̄ē alúm̄d̄-te nyé ȳl. ¹⁴ Ngáne éd̄í bán nyédī bad ábe b̄eb̄ele mekan m̄me Dyōb áhēd̄ē, nyéēmwā̄ḡ-se mam mé mbéb̄ m̄m̄ nyéb̄elé'áá b̄ōd̄ m̄eb̄é m̄ekamlán ád̄en alongé. ¹⁵ Dyōb ád̄e apw̄ed̄ nyé asáá. Né-ɔ̄ nyémp̄e nyé̄tā̄jḡén̄ asá̄j á mb̄eltéd m̄m̄n̄ n̄syā̄l. ¹⁶ Éténlédé á kálag e Dyōb nén bán, "Mb̄eltéd m̄m̄n̄ n̄sā̄j áyā̄le mb̄eltéd m̄m̄m̄ n̄sáá."

¹⁷ Dyōb ákáadte' moosyā̄l nyaa p̄oḡ. Eékwognáádté modmod. Nzé nyékâne-'e áw̄ē, nyéchäge mó bán Tité̄e. Né-ɔ̄, nyéwōn̄ mbwōḡ n̄ Dyōb áte á alongé ád̄en ásyā̄l á nk̄ōjnsé-te wén wé̄e nyédī beken. ¹⁸ Nyéb̄í nén bán Dyōb ákódté nyé á ekukú é abé-te. Ekukú é abé ech̄e áb̄en betaa bénlyāgn̄edt̄ nyé saké ch̄om̄ n̄ē ḡol̄ k̄ē s̄il̄va ech̄e éb̄ebē ch̄ō ánk̄ōdn̄edt̄ nyé. ¹⁹ Nd̄ale e mekií ech̄e Yesu Kr̄ist̄ā ch̄ō ánk̄ōdn̄edt̄ nyé. Kr̄ist̄ā aw̄e adé n̄ē n̄dyōj m̄ mbód̄ m̄m̄ méewōo awusé k̄ē ahöḡ á ȳl. ²⁰ Nk̄ōjnsé n̄d̄ehōb bán m̄bootad, Dyōb d̄emm̄ad mó apw̄ed̄. Bōj b̄ōb̄ á asoḡ hén alúmté ȳl wé̄e bad b̄e nk̄ōjnsé. Abelé n̄ē áyā̄le nyé. ²¹ Kr̄ist̄ā ak̄ē nyédūbp̄e Dyōb. Nyéh̄ele-se nyédūb̄e Dyōb nyésum-me nlém n̄syā̄l áw̄ē, áyā̄le apuúdté Kr̄ist̄ā abídté-'e ech̄e ehúm̄e áw̄ē.

²² Abel áde nyébeleé mekan mé mbále áb̄elé nyéssáá. Né áb̄elé-'e nyáábe bad b̄émp̄ee ábe b̄édūbp̄e Yesue nyédājn̄é. Né-ɔ̄ nyédāj nh̄og ne aníñí ne nlém n̄syā̄l. ²³ Nyéb̄í nén bán Dyōb ábágé nyé alongé dék̄ōl̄ mbwiined ne ech̄e eyale. Éch̄e eyale ép̄eén̄ alongé éesaá-'áá ch̄om̄ éche éb̄ebē. Éb̄e abé ne abé. Dyōb áde ád̄e á ngíndé ne á ngíndé d̄ō ábágé nyé ád̄e alongé saké moonyōj. ²⁴ Éténlédé á kálag e Dyōb nén bán,

"Moonyōj adíí n̄ē nk̄éák̄ē,

áb̄e e'bōj-'e é'dé n̄en̄gáne mbonja ech̄e ékwoge á ahín-t̄ē.

Nk̄éák̄ē ayé̄nlē, mbonja-'e ésoode.

²⁵ Bōj eyale é Dyōb éb̄e abé ne abé."

Éch̄e eyale éd̄íi nkalaj m̄ bwâm m̄me békânlé nyé.

2

Nyédūmeláá m̄ē alongé

¹ Né-ɔ̄, nyétede m̄m̄n̄ mb̄eltéd mé mbéb̄ n̄syā̄l. Nyéekâlē metóm̄, nyéelúmté á d̄id̄te ngén̄ nén bán nyébele bwâm áde nyéebeléé, mod eesíidé waáb̄, e'yale b̄e mbéb̄ b̄éeb̄idé-'e nyé á nsəl̄. ² Nyé̄tā̄jḡén̄ awan áte ákud n̄dyéed e ed̄ád̄āj ech̄e esáá, melemlem ngáne bán b̄e nk̄éál b̄echyeē'e abíi, âbel nén nzé nyédyédé ene n̄dyéed, nyékwoḡ ákud e'soosōj. ³ Nyéwóglén̄ ene n̄dyéed, nyéb̄í-'e b̄ōb̄ ngáne Sá̄ngwéé ábeléé mekan mé bwâm. ⁴ Nyéhyag wé̄e Sá̄ngwéé, mó adé n̄ē aláá dé alongé áde belōj b̄e ndâb̄ b̄enchenéé, bōj Dyōb ányín d̄ō aá ákwógn̄edé, ápw̄ed̄, ákōō-'e d̄ō. ⁵ Nyéhyag-k̄ō nyéb̄e n̄ē meláá mé alongé m̄me Dyōb áb̄enladt̄e áló̄j eche ndâb̄ e ed̄ád̄āj. Áw̄ēd̄-tē'áá nyébenléé mó. Nyééb̄e bepris̄e ábe bésáá, nyébagé mó mende mé ed̄ád̄āj m̄me m̄ekóbn̄edé áwe e'só mbwiined ne Yesu Kr̄ist̄ā. ⁶ Éténlédé á kálag e Dyōb nén bán,

"Nt̄édé aláá dé etógnén̄

n̄sumé á Zayon.

Kéñzéé aw̄e adúbp̄e mó éekwágké."

⁷ Ádén aláá-ɔ̄ ád̄e etógnén̄ ne nyé aw̄e nyédūbp̄e mó bōj ne bad ábe b̄éedúbp̄e mó ád̄íi n̄en̄gáne

"Aláá áde belōj b̄e ndâb̄ b̄embânḡe ab̄enled,
d̄ō átím̄e aláá dé etógnén̄ abé."

⁸ Éténlédé ámp̄e nén bán,

"Mó adé aláá áde bad b̄élúmeé ám̄in"

abé-'e ndim e aláá eché ebélé bad békwag.
Bad békwag áyēle béeōgnēē Dyōb. Nê dóo Dyōb átíídé aá ébenled ne bó."

⁹ Boŋ nyé, nyéēsaá nê. Nyéđíi bad ábe Dyöb ápwédé, beprise bé Dyöb ádě ádé kâŋ. Nyéđíi alonj áde ásáá, Dyöb děn-naá áwóó nyé âbel nén nyélúmed bad bémpee ngáne ápéde bwâm abé. Dyöb áhúdé nyé á ehíntén-tê, apesené nyé á e'nyínen bé ekíde. ¹⁰ Ngen e'só nyénkembáá bad boŋ bœb nyéēnyéđé bad bé Dyöb. Ngen e'só ngol e Dyöb enkempaá áwēn boŋ bœb Dyöb áwogé nyé ngol.

Nyébê betâŋ bé Dyǒb

¹¹ A-bănned nhéde mée nyésôjten nén bán nyêdii beken, nyêtome-’e á nköjsé wén tómén. Né-óó nyéebanné nlém ne mekan mé ekob é yël áyèle nén nê áwanne ábëen e'déadëj bën nzum. ¹² Nyewále alongé á bwâm átîntê e bad ábe beedúbpe Dyöb, ábel boj ké bénhöb bán nyêdii bad bé mbéb, bényin rímén mbeltéd mí bwâm. Nê dékäj bëbe Dyöb edubé mbwe ríme Dyöb dépeé á epun é asog.

¹³ Á dñ á Sáŋgú, nyéwógne bad bé nköjsé ábe bédé á nkamlen, ken nkamlené ambáámbáa, ¹⁴ké' e kâŋj échě édé ásē e nkamlené ambáámbáa, echě álómé âkógsen bebel bé mbéb ne âkemed bad ábe békere' bwâm. ¹⁵ Dyöb áhede nén aá mekan mé bwâm mímmé nyébeléé mékúdtén mehób míme ábê e' yákél é' bad békere' nyé áyâl, míme békébíi' e'. ¹⁶ Nyéesaá betâŋ, nyéddíi kunze. Boŋ pen nê déebageé nyé nzom âbel mbéb. Nyébê néé bembalede bé Dyöb. ¹⁷ Nyébage moosyâel edúbé. Nyédâŋ- e' bad békere' ábe békere' bédúbpé Krístæ. Nyébáa Dyöb. Nyébage kâŋj Embáámbáa edúbé.

Metake míme Kr̄istəə mébē syánē e'chemléð

¹⁸ Nyé bad ábe nyêdé bembalede, nyésuded yäl ásē e bad ábe nyébenleé ne edúbé ésyäel. Nê déebag ne ábe bébóó nlém bënpen, boj nê ábê ne káájne ábe bébék nlém. ¹⁹ Dyöb débë menyinje ne nyé nzé nyéweséné e'we é' metake míme nyéenkembáá nyékude áyäl echê. ²⁰ Nzé ebélé mbéb, boj ewéséné mbéte áyäle mímë mbéb, ne nsyáj nhéé wékudté? Boj nzé ewéséné metake ké áyäle dyam á bwâm áde ébélé, né Dyöb débë menyinje ne we. ²¹ Mmén metake mébójnédé nyé awë Dyöb ápwéde, áyäle nén Krístæa mwën antág á nló mímën. Anlyágé-'e nyé elangsén ábel nyéhíd mímë mekuu. ²² Enkembenalé mbéb ké nhög, modmod enkênwög-kaá mó eyale é mbéb á nsəl. ²³ Áde bad bésyáá mó, enkéntimténne bó. Áde bétágté'áá mó, enkênsidté bó. Boj ambë mésyäel á mekáá mé Dyöb áde ákáadte bad bésyäel nyaa pög. ²⁴ Krístæa mwën ampém mímed mbéb áwe yäl á awög ábel nén deewóó dyamdyam ábel ne mbéb, débele-'e mekan míme Dyöb áhdedé, á alongé ádëd. Échê sii ébélé nyékudé e'choóchoj. ²⁵ Nyémbé néé ídyoj mí mbód míme míbóó boj baoë Dyöb ápéené nyé ámbid áhíd mod awë anøne nyé ngáne nnøn-ambód áñønëé éche mbód.

Babaád na ébhaghachóm

¹ Nyé bebaád bé bechóm-me nyéwógne áben bechóm ábel boj ké émbē nén bán békéhídēe eyale é Dyöb, mímēn mbeltéd mí bwâm míbel bómpē bétimned Dyöb, bédúbél-e mó. Ké nyéetgogne bó dyamdyam aláa, ² bényin áden abé á bwâm áde ásáá. ³ Nyéésümé nlém nén bán áben e'boj é'bíde dásō áyâle ekâj é mbíd ebwög née anabe dé esid, ahé á bwém nêngáne e'bón, nsáj, ne e'bésé ké'e kase é mbóté. ⁴ Boj békíi nyé dásō ne e'boj ábe é'bíde nyé áte. Ábê e'boj békéhöylánné áyâle é'bíde ne edéadéj éché épwiítédé éché éetagtán-ne. Ábê e'boj bós Dyöb ányínéé áá é'dé etógnén. ⁵ Né dós bebaád ábe bésáá békéhídéé ábe bénsum nlém ne Dyöb békéhídéé áá boj é'báb e'boj é'bíd áwed. Béwógné' áá ábab bechóm. ⁶ Seraa mwěn ambé né. Awógné' áá Abrahame áchágé-e mó áá asáj. Nzé nyébélé' mam mé bwâm ésebán nyébáa dyamdyam, né nyédií Seraa ábe bän. ⁷ Nyé baachóm-me ábe nyéwóó bebaád, nyéetgéné áben bebaád edúbél abe. Mod téé ábê ne awé mwaád, ánöne mó bwâm. Béepedéé nyé e'wúu áte, boj nyáabós nyéekük alongé

nyaa póg. Ádê alongé ádíi nsimé míme Dyōb ábageé. Nzé nyéewânle bó ngáne éhedneé, né Dyōb déewókgé nyé mekáne.

Nyébele bwâm ké nyékudé metake

⁸ Âsoged, nyé moosyáél nyébê mod nhôg, nyéwôn nlém míme mpwiítédé, nyésudédté yâl. ⁹ Nyéetimté mbéb áyâle mbéb. Nzé mod ahôbé nyé dyam dé mbéb áyâl, nyémpé nyéehôbé mó dyam dé mbéb á yâl, nyékáné kánnén bán Dyōb ánamed mó, áyâle nnam móa Dyōb dénhôbpé áá móobé nyé áde ámpwëdté nyé. ¹⁰ Éténléde néen bán,

“Kénezéé awe ahëde alongé dé menyinge,

áhëdë-’ë áá mónyîn e’pun é’ bñin é’ bwâm,
eehôbë’ mekan mé mbéb,
eékâlë-’ë metóm.

¹¹ Ásôg mbéb abel, ábële mekan mé bwâm.

Áwanen âbë nsaj ne moosyáél.

¹² Áyâle Dyōb anjné bad ábe bëbële mekan mé bwâm
awoge-’ë bô mekáne.

Boj akunnan bad yâl ábë bëbële mbéb.”

¹³ Nzéé-ë ahële ádæj nyé mbéb abel nzé nyéwóo nlém áte ábel mekan mé bwâm? ¹⁴ Boj ké nyéntäg-ke ké tagén ábel mekan míme Dyōb áhëdeé, né Dyōb dé naméd nyé. Nyéewogé mbwôg, nyéetägë-’ë áte. ¹⁵ Boj pen nyébe Krïstæe edûbë, néen móodé Sângwéé á alongé ádëen. Nyébê mbojsén póndé esyâél átimten kénézéé awé asëdté nyé dyam tâjgene nlém míme nyésümë wée Krïstæe. ¹⁶ Nyékéled nlém á abum. Nzé nyébele nê, nyésudëd yâl ne edûbë esyâél, nyékéled-te nlém á abum wée bad ábe bëhôbe nyé mekan me mbéb áyâl, áyâle nyéhídeé Krïstæe. Békwâg nzé bényiné áden abé á bwâm. ¹⁷ Nyébii néen bán édë bwâm mod ákud metake áyâle dyam á bwâm áde ábélë, nzé nê ádë á ntíi n Dyōb, tómaa ákud metake áyâle dyam dé mbéb. ¹⁸ Krïstæe mómpé ankûd metake awé-’ë áyâle mímed mbéb ngen póg ne ngen esyâél. Abédëe mod awé abele mekan míme Dyōb áhëdeé, boj anwé á nló míme bebel bé mbéb. Ambel nê, ábel dépë wée Dyōb. Bad bénwûn mó boj échë ekob é yâl chôo énwë. Dyōb dêmbeél échë edaádëj émbë ébë á alongé. ¹⁹ Échë edaádëj chô-’áá ánkëénné á mbwôg ákë dé akale e’dâádëj eyale é Dyōb. ²⁰ Ábén e’dâádëj é’bédëe e’dâádëj ábe bénkénwôgén Dyōb se’ bôod áde Dyōb dênhabitédté bô e’këd áte ábel bétede ríbab mbéb á póndé echë Noa álóó’áá bôle é’mbáá. Bad waam bënpen bôo bëmbë á bôle-tê. Bénkûd e’soosoj áyâle mendib. ²¹ Nén ádë melemlem nêngáne edusen. Échë edusen chôo ébële bôob boj bad békûd e’soosoj á ngíne e mpuu míme Yesu Krïstæe. Edusen éesaá awobe á yâl áhûd mbinde boj édii ákwenten dé abele Dyōb ne nlém míme ñsáá. ²² Krïstæe akií ádyôb, áwed-taá ádyéé Dyōb á ekáá é mbáá boj ákamláán ángel esyâél, benkamlene ne ngíne échë édë ámîn.

4

Alongé á bad ábe bédúbpé

ábë ngáne Dyōb áhëdeé

¹ Né-óó ngáne édii bán Krïstæe ankûd metake é ekob é yâl, nyémpé nyêtájgéné nyébë mbojsén áwón melemlem mé mewêmtén nêngáne ánwöngé. Áyâle, kénézéé awé atagé é ekob é yâl, asogé mbéb abel. ² Ngáne édii-’áá nê, alongé ádëen á nkörjsé wén ábë ngáne Dyōb áhëdeé saké bán mpûlé mé nkörjsé mûmô nkamlan nyé. ³ Mekan míme bad ábe bëebii Dyōb bédæ’ë abel móa nyémpé nyébélë’áá. Ene póndé emaá atóm, ekwõgnédé-’ë. Nyékabé’áá mesón, nyéwón nlém áte ábel mam mé mbéb, nyêmwágé’áá mím mékôbë nyé, nyéchagé’áá ngande échë bad bémwágé’áá mím mékôbë bô, bëbelé-’ë e’tongé é’ mekan, nyé bënlé-’ë myôb mémpëe, dyam áde déeboo. ⁴ Bën ábe nyáâbôo nyébeláá mímen mbeltéd mé mbéb bôod, bédë menyáké bôob ânyin nyéesaá ne bô ámpë ábel epuutéd ne e’kukú é’ mekan. Né-’áá ákáá boj bësyâá nyé. ⁵ Boj bëtyëem á nkáá á’sô é’ Dyōb áde ábónjséné ákáad moosyáél. Ákâad ábe bédë alongé ne ábe bëwédé. ⁶ Nén

dóo dékăr̄ boj nkalaŋ mí bwâm níkanléd kááŋ ne wéé bad ábe béwédé, ábel boj kénéé bénkāadítē bó áde bédíí á nköjsé-te, béwé-'e ngáne moosyäál áwágké, béhèle-se béké á alongé ngáne Dyöb ádíí.

Nyébenlad nde éche Dyöb ábágé nyé bwâm

⁷ Asog dé mekan mésyäál ádé benben. Né-oó nyébwög yél nyétéd-te pónédé ábel nén nyéhel akáne. ⁸ Ámín e rímmén mésyäál, nyédəŋ nhóg ne anínií ne nlém nísyääl. Nyédəŋ nhóg ne anínií, áyale edəŋge ekúdtan mbéb híin. ⁹ Nyékob nhóg ne anínií nken ésebán nyényonje áte. ¹⁰ Dyöb áwóó nde híin, abagé-'e mod téé eché nde. Nyébê bembalede bé bwâm nyébenlad-te échén nde áwóngen nhóg ne anínií. ¹¹ Ane awé abíe' dyam ahób, ahóbé dó néé nhóg awé akale' e'yale ábë' é'bídé wéé Dyöb dën. Ké nzéé-'e awé awóngan baáb, ábelé' nē ne ngíne esyäál eché Dyöb ábágé mó. Né débidé ehúmé é Dyöb áwed á yél e mekan mésyäál mbwiined ne Yesu Krístæ. Ehúmé ne ngíne esyäál békagnédé mó á ngíndé ne á ngíndé. Ébë nē.

Metake rím̄ bad bé Krísto békudeé

¹² A-baányaŋ, nyéebág menyáké ne mekägsen mé ngíne ríme mépiide nyé bɔɔb. Nén déebág nyé nken. ¹³ Nyébê menyinge pén nén, nyékude' metake melemlem ngáne Krístæ ákudé'áá, ábel nén nyélôn ne menyinge á pónédé eché Dyöb délumédté ehúmé éche Krístæ. ¹⁴ Nzé bad bésyáə nyé áyale nyédií bad ábe bélidé Krístæ, né yél eboó nyé áte, áyale ehúmé é Edéadəŋ é Dyöb édé ne nyé. ¹⁵ Boj pén nzé nyékude metake éebág nén bán nyékude rímmé metake áyale nyéwúú bad, ké'e áyale nyéchibé, ké'e áyale nyédií bad béké ebébté, ké'e áyale nyéssolé mam mé bad áte ríme ménené nyé. ¹⁶ Ké né-'e, nzé nyékudé metake áyale nyédií bad ábe bélidé Krístæ, né déekwágté nyé. Nyésagnen Dyöb sagnen nén bán békágé nyé bán bad béké Krísto. ¹⁷ Áyale pónédé edé eché Dyöb débootédté bad akáad, ábootéd-te ne ábë bad. Nzé Dyöb áhèle ábootéd-te ne syánë awé dedé bad béké Krísto, chán-nō ebéenné bad ábe békbelé' mam ngáne nkalaŋ mí bwâm ní Dyöb nhedé. ¹⁸ Éténlédé-'e á kálag e Dyöb nén bán,

“Nzé éhèle élénléd kááŋne mod awé abele ngáne Dyöb áhedeé áte ákul e'soosoŋ,
né chán-nō ebéenné bebel béké mbéb ne bad ábe beedúbpe Dyöb?”

¹⁹ Né-oó, bad ábe bétage' ngáne Dyöb átíidé, béké békbelé mekan mé bwâm, béké-'e yél á mekáá mé Dyöb áde áhágé bó, mó awé ábelé kékchéé eché áhóbé.

5

Petro alébe bad ábe belyágte mwembé

¹ Më néé nhóg awé alyágte', ndəá mëé míbë bad ábe belyágte' átinté echén elébé. Ndé nhóg awé ambé metake ríme Yesue ásé. Ehúmé éché Dyöb débeé Krístæ épé awém ámpé. Nlébe' nyé nén mëé, ² nyénøne bad ábe Dyöb ábánné ásé echén melemlem nénjáne nnón-a-mbód ánøneé éche mbód. Nyénøne bó áyale nyédaá bó anøn. Nyéenønë bó byánán bénýágté nyé ánøn bó. Nyébelé' rímmé nsón saké é etútú é nísyááŋ, boj ébë bán nyéwóó nlém ábel mó. ³ Nyéekamlán bad ábe bédé ásé echén ne ngíne. Nyébê bad ábe bélidé mekuu rímmab. ⁴ Áde káŋ e benøn-bé-mbód épéé, ábë nyé nsábe ríme níchábé ámín. Mmë nsábe mébë á ngíndé ne á ngíndé.

⁵ Nyémpé ábe nyédié ásé e bad ábe belyágte', nyésuded yél, nyésuded-te yél nzé nyéwóngan nhóg ne anínií. Áyale éténlédé á kálag e Dyöb nén bán Dyöb ákunnan bad ábe bédé kúmbe yél, boj abage bad ábe bésúdté yél nsimé. ⁶ Né-oó nyésuded yél ásé e ngíne e Dyöb ábel boj mwén ácháged nyé á pónédé eché eböñnéndé mó. ⁷ Nyéchene mekan mésyäál ríme métage nyé áwe mekáá, áyale atédé mam ríme métage nyé néé rímmé.

⁸ Nyékob yél, nyétéd-te pónédé. Mod a ekoyí awén, Satane, ahönge néé ngii eché edume áte, ahede mod awé ányabéé áte. ⁹ Nyéemwág-se atóm nyé áte. Áden adúbe déesudé'. Nyébíí nén bán bad bémpeé ábe bédúbpé néé nyé nköjsé áte nísyääl bómpe békude metake rímmé nyémpé nyékudeé. ¹⁰ Nyékude' metake boj rímmé metake méechabpé áte.

Ámbid e nê, Dyōb áde ábage' nsimé ñsyāēl děn débě nyé kchéé éche nyébódé. Ăbēl nyésūmēn, awéd-te nyé áte. Adíi Dyōb áde nsimé mímē ñkwógnédé moosyāél, mbē-'e póndé esyāēl. Mó apwédé nyé âkud éche ehúmé échě ébē á ngíndé ne á ngíndé. Nyéeküd-te chó áyâle nyéedé ne Kr̄stəa. ¹¹ Ngíne esyāél edíi echê á ngíndé ne á ngíndé. Ébē ne.

Melenten mé asog

¹² Sailase mó awóngéné me âtel anén mwă kálag. Adíi me née mwănned mbănné-'e mó nlém á yđl. Ntenle nyé enén kálag âwéd nyé nlém á abum, âláa-'e nyé nén meé mímén mam mímé íténlé nyé médíi nsimé ñ Dyōb mí mbále. Nyéehúdé mekuu áhed. ¹³ Baányoñ bé mwembé mí Babilōn ábe Dyōb ápwédé née nyé, bélómmé nyé melenten. Awem mwăñ awé ñkwógté á adúbe-tê, Makōse mómpē alómmé nyé melenten. ¹⁴ Nyéhê nhóg ne aníñí tâl âlumed edənge. Nsañ mbē ne nyé bad bé Kr̄sto bésyāēl.

Kálag eche elónténé ébe eche Petro Ndibned ní kálag

Kálag eché elónténé ébe eché Petro ántenlé, bad bé Krísto bésyāél bōo ánteléé chó.
 Ene póndé bad békédé ábe býágté'áá bad ayáged dé metóm. Ádē ayáged dé metóm ábélé'áá bad békéle e'tongé é' mekan. Né-oó, Petro antél ene kálag álúmed aá míme mekan méeboo'é. Anlúmed bó áte nén aá béétângeneé éché ndín é mekan ahíd. Aá dyam áde bétángéné abel ádíi, ábíi mbále tângene mam mé Dyöb ne Sájgú Yesu Krístæ ne ádúbe bó ne nlém nhög. Bad ábe bénynné Yesue bégwók-ke mekan míme áyágté'áá, bōo békéle boj ábén bad békíi mímē mekan. Atón ahág áde Petro ánkongé anon áte ábédé tângene bad behág ábe békumté'áá bán Yesu Krístæ éepaá ámpé. Anlúmed bó áte nén aá atoo áde Krístæ átongeé ápē, ádíi áyále Dyöb déehedéé aá modmod ábôd alongé, boj áhede' aá bad bésyāél békede abel dé mbéb, békide Krístæ.

Nkabtéed ní kálag

Ndibned ní kálag 1.1-2

Mpwedtéd mí mod a Krísto 1.3-21

Bemeléede béké metóm 2.1-22

Epe e asog éche Krístæ 3.1-18

¹ Mε, Simón Petro, mbaledé ne mbapé a nlómag awé Yesu Krístæ, ntenle nyé bad ábe nyédúbpé Yesu Krístæ melemlem ngáne sémpé sédúbpé mó. Yesu Krístæ adíi syáné Dyöb abé-'e Nsoode. Abele' mekan míme métángéné. Mwén-naá akáá boj syáné moosyāél dedúbé mó. ² Nsimé ne nsaj ní Dyöb míbád mbé ne nyé abíi áde nyébíi Dyöb, nyébíi-'e Yesue, awesáné Sájgwéé.

Nyébélé' mekan míme mélumte'
nén bán Dyöb dóo ápwédé nyé

³ Ngíne e Dyöb ebágé syáné mam mésyāél míme déhedeé á alongé, ebélé-'e syáné debélé' ngáne Dyöb áhedeé. Nén ábénléde áyále debíi mó. Abénléde eché ngum ne ábē e'boj békéle nlém ápwéd syáné ábē ábē bad. ⁴ Éche ehúmé ne ábē e'boj békéle nlém é'bélé ahóbé aá móbékéle syáné ndèle é mekan é bwám. Abelé mímén mésyāél ábel boj nyéesólé' mbeltéd mé mbékéle nkójsé áte. Esíi é mekan mé ekob é yél chóo ébelé' bad éché ndín é mekan. Nzé nê ábénléde né abé ádén désaj née abé á Dyöb. ⁵ Né-oó, bōob áde édíi nê, nyéwan áte ábel mekan mé bwám. Saá-kaá nê děmpen. Nyéttângéné awan áte ámpé ábē bad ábe békénlad debyéé ábel mekan. ⁶ Ábád ámín e debyéé, nyébíi ngáne nyékóbeé échen yél. Saá-kaá akób á yél děmpen. Nyébélé' bad ábe békaa' nlém. Ámín e e'kañ békéle nlém, abé ádén átângéné ábē ngáne abé á bad békéle Dyöb átângéné abé. ⁷ Saá-kaá ábel mam míme Dyöb áhedeé děmpen. Edéngé ébékéle átinté echén nyé Bad békéle Krísto. Saá-kaá edéngé átinté e nyé Bad békéle Krísto békénlad, boj nyédañ moosyāél. ⁸ Nzé ádén abé ákwoge-'e nyé áte, né debyéé áde nyéwóó tângene Sáá awéed, Yesu Krístæ, déebáá ngén, boj débékéle nyécháyá' e'pum. ⁹ Boj kénzéé awé ádén abé déesaá áte, adé nêngáne mod awé eéchábé' anyínén, kéké' awé akwedé ndím. Acháténé-'e aá Dyöb áwóbpé mó, álagsén-ne mó mbékéle.

¹⁰ Né-oó, a-baányañ nyénabe awan áte álúmed nén bán Dyöb dóo áchénlé nyé, ápwédé nyé ábékéle ábékéle bad. Nhóbe nén áyále nzé nyébelé nê, né nyéehúnné á mbékéle te mbékéle.

¹¹ Nén débékéle Dyöb débékéle nyé kunze esyáél ásól ne ábékéle á nkamlén mímín wéé Sáá ne Nsoode awéed, Yesu Krístæ ákamlanné néé kéké' ngíndé ne á ngíndé.

¹² Né-oó, kéké' néé nyémáá mímén mekan mésyāél abíi boj nyédañ moosyāél mbále eché edé áwéed-te, mékéle nkamtén nyé mó. ¹³ Nnyíné-'e nén meé, bōob áde ndíi ndé á alongé, éhedenad nén bán nkamtan nyé mímén mekan póndé téé ábel boj nyékwandé. ¹⁴ Mbíi

meé nkwegé mímén nkōjsé atede. Sāngwéé awêd, Yesu Kr̄stəə abelé mbíí nê. ¹⁵ Nwane-'e áte âlāa nyé mímē mekan âbel boj ké nwé ké wéén, nyéhel mó akamten póndé téé.

*Mbóy édé éche ényínné
ehúmé éche Yesu díd*

¹⁶ Saké pôle éche bad bénábpé sékánlé'áá nyé áde sénhōbpé bán Yesu Kr̄stəə áp̄e ámp̄e ne ngum. Sébén sénýínné éche ehúmé díd. ¹⁷ Sébédé áhed áde Dyōb Titée ábagé mó edubé ne ehúmé. Ehób émbid ámín éche Dyōb á Ngum álānggēé mó aá, "Awem mwān a nlém mó nén, mó awógté' me menyinje." ¹⁸ Sébén sénwogé échē ehób áde syáabō dебédé á mbōod echē esáá.

¹⁹ Né-óó syánē dekoó adúbe nén bán e'yale ábě bekal-bé-e'déadəj bénhōbpé é'dé mbále. Éboj nén bán nyétōj bō awóglən. É'díi née etrukáj éche échodoné' á ehínten-té kááj né Epun épédé échē bín bésāá' boj Kr̄stəə, tintiné a mbwembwe, ápen nyé á nlém-té. ²⁰ Ámín e mímén mésyāəl, nyétángéné asōjten nén bán modmod eéhēlēē-sé ábenléd áde debyéé átoge mekan míme bekal-bé-e'déadəj bénhōbpé ngáne éténlédé á kálag e Dyōb. ²¹ E'yale ábe bekal-bé-e'déadəj bénhōbpé bénkēmbáá á ntíi m̄ moonyon, boj Edéadəj éche Ésáá chóá élyágté'áá bad ábe bénhōb ábē e'yale. Ábē e'yale bénhūū ne Dyōb.

2

*Bemeléede bé metóm
ne ebébtéd éche békudté*

¹ Se' bōod bekal-bé-e'déadəj bé metóm bém̄bid átinté e bad. Melemlem nê dão bemeléede bé metóm bēb̄idtē átinté echēn. Bébenléd mwane áp̄eен ayáge dé metóm. Ádē ayáge débēbēd bad ábe bédubpé dō. Ábē bemeléede bē metóm bēbāj Sāngwéé awē ahúdē bō á mbéb-te á yāl. Nén dékāj bén bēwāmsēn yāl ebébtéd akude. ² Bad híin bēhīd échāb mbinde é mekan. Mbeltéd míme ábē bad mébēl bad bēmpēe bēhōbē' mam mé mbéb tānggēne Nzii e mbále. ³ Adəj á chōm áde ábē bemeléede bē metóm débēl bēkanlé nyé pôle éche bénábpé ábel békoben nyé bwēm. Dyōb dēmmād mbakú abíded se' bōod aá móokōgsēn bō. Mmē nkōgsen nísine-'e bō. Échē ebébtéd édé-'e bō á nzii.

⁴ Dyōb dénkēnchenéé ángel éche êmbēl mbéb, boj ambwém bō á ehyáj é muú, áhedtaá bédíi á mehanj é ehíntén-té, bésine' Epun é nkáásé. ⁵ Dyōb dénkēnlagsén-naá bad bē' bōod. Ambēl mbūú enhchó kááj mendib ménlōne, méhōód bad bésyāəl ábe bénkēnwōj abé á bad bē Dyōb. Noa awē alánggé'áá bad aá bēbēle' mekan míme métánggéné mwěmpen-ee Dyōb dēnsonjé alongé, nchoo ne bad saámbé bēmpēe. ⁶ Ámbid e nê, Dyōb dénkōgsēn myad mé Sodom ne Gomora. Anhyáád mó métim mbúumbú, álúmed chōm éche ébenléd ne bad ábe bēewoo abé á bad bē Dyōb. ⁷ Dyōb dénkōgsēn mímē myad boj ansōj alongé áde Lōte, áyāle Lōte abédéé mod a bwām awē enkēndāj mbinde é mbeltéd éche ábē bad bē mbéb bēbél'áá. ⁸ Ane mod a bwām adyeé'áá hōm ahōg ne ábē bad bē mbéb. Epun ne epun téé anyiné'áá, áwōgē-'e e'bébtéd é' mekan ábe ábē bad bēbél'áá ne ábe bēhōbē'áá. Mmē mekan mébēbté'áá mó nlém á abum áyāle abédéé mod a bwām. ⁹ Né-óó, Sāngwéé ábíí ngáne áhúdēé bad ábe bēwōo abé á bad bē Dyōb á mekōgsen-té. Boj ábē akōgsén bad bē mbéb kááj ne é Epun éche ákāādtē bad bésyāəl. ¹⁰ Ábē akōgsén bad, tanje bad ábe békodte esíi é mekan mé ekob é yāl, ábe békobé-'e nkamlen.

Ábē bemeléede bē metóm bédé kúmbé, bēbē-'e epame. Béebagé-'áá ngume éche édé ámín edubé ké ehōg. Bésyāə' échē ngume káájne syáán ésebán bēwōgé' mbwogé' nhōg. ¹¹ Ké ángel éche éwōo ngíne ébē-'e ngum tómaa ábē bemeléede bē metóm, ééhōbēē échē ngume éche édé ámín mekan mé mbéb áyāl á'sō wéé Sāngwéé mbēd. ¹² Boj ábē bemeléede bē metóm bēbēle' mekan née nyam é mehín. Échyáádté-'e ábel békob chō bēwūu. Bébēle' kēchée éche épíidé bō á nlém-té. Ábē bemeléede bē metóm bēhōbe' dyam téé áde béesoñtenéé mam mé mbéb á yāl. Né-óó, Dyōb débōdēd bō melemlem nēnggáne bad bēwūe' échē nyam. ¹³ Dyōb débēl bétág bwāmbwam áyāle bétágté bad

bémpée. Bédəə' échâb esíí é ekob é yĕl akóded. Béékwágé-'aá abel nê ké mûte. Béwóge' bwâm âbel échê ndín é mekan áde bédýágkē ndyééd hōm ahóg ne nyé. Né-ɔó, békébte nyé dîn, bépiináad-te nyé akwágké. ¹⁴ Nsón mímâb nísyääl ñdfi âkâb mesón ne kénzéé awé bénýiné. Échab esíí âbel mbéb éemaá'é mbéb. Bédoge' bad ábe adúbe déewúú'é áte, békéhûnte' bó á mbéb-te. Ngoód edé bó á mekií-te bwâmbwam. Bédíí bad ábe Dyöb ábágé ebómán. ¹⁵ Bétedté nzii eché etáñgéné, békéhídé' nzii empée. Békéhídé' mbeltéd míme Balame, * mwän awé Beo. Balame andăj mɔnéné míme bésâbëë mó âbel mbéb. ¹⁶ Bon Dyöb dêmbeł ésel éche Balame énhëb wéé Balame. Ésel, nyam eché eehòbé' akan, énhëb wéé Balame ne ehòb é moonyoŋ, ékáné mó áte. Nén dêmbeł mímê mbeltéd mé mpemíne míme ane nkai é'dædæŋ Balame ménsoğ.

¹⁷ Ábén bad bédíi née n'yélé ímmé ínléné. Bédíi née mbembag éche epub ékεεnεé. Ndib e ehíntén eché Dyōb ábánnédé bó esine bó. ¹⁸ Bébóó' nsəl áte ngén. Bébenlad esíi é ekob é yél átéd bad nlém á abum. Bad ábe bétédéé nlém á abum bédíi bad ábe békálé bédé mekuu ahúd á echoj é bad bé mbéb. ¹⁹ Bélânge' bad bán nzé békálé ádab ayáge né békálé á mehanj-tê, né békálé' békálé kékchéé éche bédáá, áde édií néen bán mbéb ínháá běn. Mbéb ínháá běn áyāle néen dyam ké áhéé áde ákamlan mod, ane mod abelé abé ntâj ásē e ádē dyam. ²⁰ Nzé mod adúbpé Sánjú Yesu Kr̄istə, Nsode, né amaá alongé dé mbéb dé nkörjsé ahide áte. Nzé amaá-'e dó ahide áte boj atímé ámbid áwēd-te ámpē, ádē alongé átédé-'e mó ntâj, né nyaa eché ádíi boob edé mbéb tómaa ngáne ánsébēé abé. ²¹ Né émbē mbon nzé békálé nzi e mbále abíi tómaa ámad chó abíi boj bétimé' békálé' mbéndé é Dyōb éche ésáá á yél. Alyágned dáo bénlyágnédé tómaa ngáne ánsébēé abé. ²² Nén ábèle' ngan eche békálé néen bán, "Mbwé edyág ábē e'chó," ne eche békálé néen bán, "Ké chán bénwōgēdté nguu mendib éechatánné eloob," édé mbále.

3

Epun échě Sáñqwéé ápeé ámpē

¹ A-baányarj, enén kálag chó elónténé kálag ébe eche ítenléé nyé. Átintê échê kálag, nkämténé nyé mam mme nyémáá abíi ábel boj nzé nyéwémténé mekan mme ítéé, méwöngan nyé áwóyj mewémten mme métángéné. ² Nhede meé nyékamten mekan mme bekal bé'dádæj bé Dyöb bénhðbpé se' bøód bán mëbenléd. Nyékamten-ne chöm-éé Sángwéé, Nsoode awêd ánlää'é bembapéé bé nlómag aá béláa nyé.

³ Dyam dé'só, nyêtáŋgéné asônten nén bán á e'pun bé asog, donge á bad débid ábe esíi é mekan mé ekob é yäl ékamlanné ádāb alongé. Béwelé nyé, ⁴ běhōbē bánken, "Anhób aá móopé ámpē, héé-õ adíí bɔɔb? Ábēd besáá békwe bɔɔb échábé áte, boj káéyne" bɔɔb mam médii médé melemlem ngáne mémbéé se á mbooted mé nkönsé." ⁵ Bén békoo' ahúd á mewémten nén bán Dyöb děmbenléd échē eyale é nsəl áhag nkoy m̄ m̄in ne n̄ sé. Ambél nkönsé mbid á mendib-te, ambenléd-te mendib áde áhagé nkönsé. ⁶ Mendib mwěn-naá ámbernlédté ábēbed nkönsé m̄e bɔ́d. Anlóm mbúú. Ene mbúú enhó káéyj mendib melóné nkönsé áte n̄syāēl, chōm ésyāēl éhó. ⁷ Melemlem mé eyale m̄me Dyöb děmbenlédté áhag nkoy m̄ m̄in ne n̄ sé, móo ábēnlédé ákəə mó ábel boj ábēbed mó ne muú. Asinne' nkoy m̄ m̄in ne n̄ sé m̄e' chii epun é nkáásé. Échē epun dōo ábōdēdté bad ábe béewōo abé á bad bé Dyöb.

⁸ Boŋ a-baányaŋ, nyéēchatán dyam ahóg. Nyéēchatán néŋ báŋ ne Sáŋgwéé, nhəŋlén méesaá átinté e epun ehóg ne ekálé é mwé. ⁹ Sáŋgwéé eétoŋgéé âlóned áde akag. Donge á bad békuned pén báŋ atonge'. Boŋ awéšéné nyé áyale eéhédéé aá modmod ábôd alongé. Ahede' aá bad bésyāəl békuned mbíd bétede abel dé mbéb. ¹⁰ Boŋ epun éche Sáŋgwéé ápeé, ápę təléd, melemlem nêngáne nchib ápagké. Échē epun, abobe dényōŋ ne esaád é ngíne, chōm ésyāəl éche édé ádyob éhyāŋ, ényón-'ɛ. Nkɔ̄nsé ne chōm ésyāəl

* 2:15 **Balamε**: Balamε ambé nyóngé bwâmbwam âkud nsábe míme kên Balage ásâbêê mó nyaa eché ámbeê mbonsén ké âbel bad bé Israël mbéb. Nén ádé á kâlag e (Nôm 22,4-35).

éche édé áwēd-te éhyāŋ, ényóŋ-'ε. ¹¹ Ngáne édií bán chōm ésyā̄l étáŋgéné anyóŋ, nyaa é bad éhéé-᷑ nyétáŋgéné abé? Abé ádēn átáŋgéné asáŋ, nyéwōŋ-'ε abé á bad bé Dyōb. ¹² Nyéwále ádén abé ngáne nyésineé epun éche Dyōb átiidé aá Kr̄istəə ḥap̄. Nyéwan-ne áte ábel éwâmsen ape. Échê epun muú méhyā̄ad abobe ámīn, muú ményā̄mēd chōm ésyā̄l-le éche édé áwedé-mîn. ¹³ Boŋ desine' akag áde Dyōb ábágé syánē aá móðb̄l abobe dékō̄lē ne nkō̄jsé mé ékō̄lē. Bad bésyā̄l ábe béb̄e á nkō̄jsé mékō̄lē béb̄elé' mekan ímme nítáŋgéné.

¹⁴ Né-᷑, a-baányaŋ boob áde nyésineé échê Epun, nyébel ngáne Dyōb dényinné nyé néé bad ábe bésáá, nyébel-le ngáne éehóbpé aá nyébelé mekan mé mbéb. Nyéb̄e-'ε nsan̄ ne mó. ¹⁵ Nyéb̄ii nén bán atoo áde Sáŋgwéé awēd átoŋgeé ḥape, ádī ábel boŋ ábe bad pónđé ákud e'soosoŋ. Nén dōo Paale ámpē ámbenlédté debyéé áde Dyōb ábágé mó, átele nyé kálag. ¹⁶ Atelé ádén atón á kálag échê ésyā̄l. Donge a mekan áde áwe kálag-té áde álélé asôŋtēn. Échê ndín é mekan chōa bad ábe béewoo nsôŋtēn, ábe adúbe-'ε déetyéeméé béhəŋlanné nsôŋtēn ímme ndé áwēd-te nyaa eché eetáŋgēne. Melemlem nê dōo béhəŋlanné e'ped běmpēe á kálag e Dyōb-te. Abel áde béb̄ele'-áa nê dékāŋ běb̄od ádāb alonjé.

¹⁷ Boŋ a-baányaŋ, nyé pen nyémaá mímén mekan abíi. Né-᷑, nyétēd pónđé ábel boŋ bad ábe béehidé' mbéndé é Dyōb, béehūntē nyé ne mewusé míme býégtéé nyé. Nzé nyéhíde mímāb mewusé, né adúbe ádēn déetyéemmé. ¹⁸ Boŋ pen nyéb̄e nyéwōŋ abé áde Sáŋgwéé, Nsoode awēd, Yesue Kr̄istəə, ḥabādē nyé mímē nsimé abe. Edubé éb̄e ne mó bootya boob ne á ngíndé. Éb̄e nê.

Kálag e'só eche
Jōne
Ndibned n̄ kálag

Metōte méde mébe míme mékáá boj Jōne átel kálag e e'só. Atōte dé e'só ádii áwéd bad ábe áténlé chó nlém á abum âbel béké mod nhóó ne Dyōb ne awe Mwān, Yesu Kr̄stəə.

Metōte míme mélonténé mébe médíi, Jōne alângé bad ábe áténlé chó aá bétéd póndé ne ayáge dé metóm áyále débékébéd abé áde bédíi mod nhóó ne Dyōb ne Yesu Kr̄stəə. Ádē ayáge dé metóm áhóbe nén bán ebébtéd épag ne abé áde moonyoŋ ábágkē á nkōjsé tē, bán né-óó, Yesue, Mwān a Dyōb eéhèle'aá-se ákōŋ moonyoŋ abé. Ábē bemeléede bé metóm békébéd nén bán nzé mod ákūd e'soosoŋ, atángéné néé ábáá mekan mé nkōjsé á yǎl. Béyágte ámpē nén bán e'soosoŋ békébéd dyamdyam âbel ne abé á bwám ne áwón̄ edən̄ge ne nhóó ne aníníí.

Álumed aá ádē ayáge déetângéné Jōne alúmté á kálag tē wén aá Yesue ankōŋ moonyoŋ abé akoó-'e alúmed áte nén aá bad ábe bédúbpé Yesue boj bédəŋ-'e Dyōb bétângéné néé bédáá nhóó ne aníníí.

Nkabtéed n̄ kálag

Ndibned 1.1-4

E'nyínén bé ekide ne ehíntén 1.5-2.29

Bán bé Dyōb ne bán bé **Satane** 3.1-24

Mbále ne awusé 4.1-6

Chōm éche edən̄ge édii 4.7-21

Adúbe áde átómé mekan mésyāəl áte 5.1-21

Eyale é alongé

¹ Ntenle' nyé tângene ane awé adé Eyale é Dyōb éche épëene' alongé. Abédé se á mbooted, sénwóng mam tângene mó, sénnyínén mó mǐd, sêmbán mó dǐd áyāl, sêmbán-ne mó ekáá á yǎl. ² Mó awé apëene' alongé antím moonyoŋ awé bényînné dǐd, dennyín-ne mó. Sêbíde' mó mbón, sélângé-'e nyé mam tângene mó awé abage' alongé áde déemaá', mó awé ambé ne Titéé, boj átím abyéén átînté echéd. ³ Chōm éche sényíné, éche séwóngé-'e, chōo sélângéé nyé, âbel boj nyébéké nlatén ne sé. Mmēd nlatén-ne índíi nlatén míme déwóó ne Titéé ne awe Mwān Yesu Kr̄stəə. ⁴ Sêtélé enén kálag, âbel boj mmēd menyinje mélôn mbon.

Alongé á bad ábe bédé á e'nyínén bé ekide

⁵ Bəəb-póó, pôle eché séwóngé á nsəl wéé Yesu Kr̄stəə boj sélângé-'e nyé edii nén, Dyōb ádfi e'nyínén bé ekide. Atón dé mbéb ké ahóó déesaá mó á yǎl. ⁶ Nzé dehóbé bán dedé nlatén ne mó áde alongé ádēd ádii ádii alongé dé ehíntén, né dekale metóm né míme syánē mbeltéd-te méehidéé mbále. ⁷ Boj nzé dewóó alongé dé e'nyínén bé ekide ngáne Mwén-ne ámpē áwóó, né syánē déebé nlatén ne nhóó ne aníníí, mekií míme Yesue awe Mwān, mó-'e méwobé mímesyánē mbéb ísyāəl.

⁸ Nzé dehóbé bán deewóó' é atón dé mbéb ké ahóó á yǎl, né dedoge' échéd yǎl, né mbále-'e eesaá syánē áte. ⁹ Nzé depanle' mímesyánē mbéb áte, né ábél ngáne áhóbé, ábél-le chó nyaa eché etángéné. Álagsén syánē mbéb, áwobé-'e mímesyánē mbéb ísyāəl. ¹⁰ Nzé dehóbé bán deebeléé mbéb, né dehóbé' bán Dyōb ádii nkal a metóm, né eyale é Dyōb éesaá-'áá syánē áte.

Kr̄istəə. Mó achâŋge' syánē Titéε. ² Kr̄istəə mwěn-εé ambé nêŋgáne nde eché Dyōb dêmbeŋlédte âkɔde syánē áyāl e mbéb míme dêmbeŋlé. Ambel nê âbel dékud alagsen. Saá-kaá mbéb mímesyánē měmpen, boj mbéb míme bad bé nkɔŋsé bésyāl.

³ Nzé dehíde' mbéndé é Dyōb né édē mbále bán debíi mó. ⁴ Kénzéé awé ahóbé aá móbī mó, boj eehídé' éche mbéndé, né ene ndín e mod adíi nkal a metóm, né mbále kék póg eesaá-’aa mó áte. ⁵ Boj kénzéé awé abele' ngáne eyale é Dyōb éhōbeé, edəŋge éche ene ndín e mod ádáé Dyōb élóné' mbon. Nén dóo ábele' boj debíi ne mbále bán dedé ne Dyōb. ⁶ Kénzéé awé ahóbé aá módē ne Dyōb, ádē alongé átāŋgéné abé nêŋgáne alongé áde Yesu Kr̄istəə.

Mbéndé e ekóólé

⁷ A-baányaj bé edəŋge, enén mbéndé eché nítenlēé nyé eesaá mbéndé e ekóólé, edíi mbéndé e nchun eché nyénwōngé se á mbooted. Enén mbéndé e nchun edíi nkalaj mí bwám míme nyémáá awóó. ⁸ Boj kéné, mbéndé e ekóólé chó nítenlēé nyé bōob, mbále eché edé-’ε á mbéndé-te wē, enyinnédé á alongé áde Kr̄istəə, enyinnéd-te á alongé ádēn, áyāle nén ehíntén ébóótédé amaa, e'nyínén bé ekíde é' mbále é'máá abooted dé apen.

⁹ Kénzéé awé ahóbé aá módē á e'nyínén bé ekíde boj ákōo mwánya, ene ndín e mod adíi adé á ehíntén-tē. ¹⁰ Kénzéé awé adéa mwánya adé á e'nyínén bé ekíde-tē. Né-ɔó, ene ndín e mod éebélē dyamdyam áde ábelte' bad bēmpēe mbéb. ¹¹ Boj kénzéé awé akóo mwánya, awóó alongé dé ehíntén. Ene ndín e mod akag á ehíntén-tē eebyéé-’aa wéé ákagké áyāle ehíntén ébélle adé née mod awé akwedé ndím.

¹² Nyé ábe nyéndé nêŋgáne ábém bán, ntenle nyé áyāle Dyōb álágséné nyé mbéb á dín áde Yesu Kr̄istəə. ¹³ A-besáj, ntenle nyé áyāle nyébíi ane awé adé se á mbooted. A-kódébad, ntenle nyé, áyāle nyétómé ane awé adé ebébtéd áte.

¹⁴ A-bánbān, ntenle' nyé áyāle nyébíi Titéε. A-besáj, ntenle nyé, áyāle nyébíi ane awé adé se á mbooted. A-kódébad ntenle nyé, áyāle nyéwúú áte, eyale é Dyōb édē nyé áte nyétómé-’ε ane awe adé ebébtéd áte.

¹⁵ Nyéedāá nkɔŋsé kék bwém ábe é'dé áwēd-te. Nzé mod adéa nkɔŋsé, né eédāá' Titéε. ¹⁶ Bwém é'syāl ábe é'dé á nkɔŋsé te, nedē bwém ábe moonyon a ekob áwóó'ésií áte, bwém ábe mǐd médāá'anyín ne bwém ábe bad békumneé ekáá á tál, béehúú'ne ne Titéε, é'díi bwém bá nkɔŋsé. ¹⁷ Nkɔŋsé ne ábe bwém é'syāl ábe baányon bérwóó'ésií áte áyāl echâb, nítome tómén, boj mod awé abele' ngáne Dyōb áhedeé, abág ne Dyōb ángíndé ne á ngíndé.

Jōne aá nyétéd póndé ne bad ábe bétâŋgan Kr̄istəə

¹⁸ A-bánbān, asog ákwóggé ape. Bénlāā nyé bán Mod a Ekoyí awé Kr̄istəə áp, bōob-pe bad bá ekoyí híin ábe Kr̄istəə bémáá ape. Né-ɔó, debíi bán asog ákwóggé ape. ¹⁹ Ábē bad bénkénkongé bad abé bédé mímesyánē nlatén, né-’aa dēnkāj boj bétēdē syánē. Nzé bémbe bad ábe bédé áwesýánē nlatén, né bémbe béké ne syánē, boj bénchené syánē ábel boj ényinned ne mbále nén bán bénkénkongé abé ne syánē. ²⁰ Boj ne nyé, Ane-awé-Bérwógté abagé nyé Edədādəj éche Ésáá. Né-ɔó, nyé moosyáél nyébíi mbále. ²¹ Meétēnlēé nyé enén kálag áyāle nyéebíi' mbále, boj ntenle' nyé chó áyāle nyébíi mbále, nyébíi-’ε nén bán metóm kék mehóo méebidēé á mbále-tē. ²² Nzéé-’ɔ adé nkal a metóm? Nkal a metóm adíi kénzéé awé ahóbé aá, Yesue eesaá Ane awé Dyōb Áwógté. Ene ndín e mod chó edé Mod a Ekoyí awe Kr̄istəə, abáá' Titéε á yǎl, ábāá-’ε Mwǎn. ²³ Mod éehēlēé-sé abáj Mwǎn a Dyōb á yǎl se abé ne Titéε. Kénzéé awe akobé Mwǎn a Dyōb, akobé káájne Titéε. ²⁴ Nyényin nén bán nkalaj míme nyéwóggé se á mbooted ídē nyé áte. Nzé nkalaj míme nyéwóggé, ídī ídē nyé áte, né nyémpē nyébíi ne Mwǎn a Dyōb nyébíi-’ε ne Titéε. ²⁵ Chōm éche Kr̄istəə áhóbé aá móobé syánē édīi alongé áde déemaá'.

²⁶ Ntenle nyé mímén mam áyāle bad bédé ábe békede nyé adog. ²⁷ Boj ne nyé, Kr̄istəə abagé nyé Edədādəj éche Ésáá. Abé áde échē Edədādəj édīi nyé áte, nyéetógnené modmod áyáged nyé. Échē edədādəj éyágte nyé mam mímesyāl, mam míme éyágte-’aa nyé médé

mbále, méesaá metóm. Né-óó, nyébê nyébê ne Krístængáne Edædæn éche Ésáá éyégté nyé.

²⁸ Bœb-poó, a-bänbän, nyébê mod nhógo ne mó, ábel boj epun éche ápæé, nlém íwúu syánë á abum, deewogé-’e e’són átyéem mó á’só. ²⁹ Nyébíi bán Krístængáne abele mekan míme métángéné á’só é’ Dyöb, né-óó, nyébíi bán kenzéé awé abele’ mekan míme métángéné, adíi mwán a Dyöb.

3

*Jōne ahóbé ngáne alongé
áde bän bé Dyöb átángéné abé*

¹ Nyényin ndín e edænge eché Titée ádáá syánë. Échê edænge échábé ámín káéj békhege syánë bán bän bé Dyöb, bën-naá dékoo abé. Nzom eché ekæ boj bad bé nköjsé békhege syánë edíi áyæle békhege syánë abíi. ² A-baányaŋ bé edænge, syánë dedíi bän bé Dyöb bæk. Éébyéenëe bwâm pen chööm-éé syánë débëë. Boj debíi bán póndé eché Krístængáne ápæé, syánë déébëë nêngáne mó, áyæle nén dënyin mó ngáne adíi. ³ Kenzéé awé asumé nlém wée Krístængáne née asánté eche yäl ngáne Krístængáne mwén ámpé ásáá.

⁴ Kenzéé awé abelé mbéb, akwedé nkáá áyæle aboo mbéndé e Dyöb. Mbéb ídii aboo á mbéndé e Dyöb. ⁵ Nyébíi bán epe éche Krístængáne ámpæé á nköjsé ebédëë amad mbéb. Krístængáne mwén-ne eewoo’é mbéb ké nhógo yäl. ⁶ Kenzéé awé adé ne Krístængáne éebélëë mbéb. Kenzéé awé abele mbéb, eenyinéé Krístængáne eebíi-’áa mó.

⁷ A-bänbän, nyéemwág se mod ádog nyé. Kenzéé awé abele mekan míme métángéné adíi mod awé abele mekan míme métángéné á’só é’ Dyöb, ngáne Krístængáne ábeléé mekan míme métángéné. ⁸ Kenzéé awé abele mbéb, adíi mwán awé Devæl áyæle Devæl ambooted mbéb abel sé á mbooted. Nzom eché enkäj boj Mwán a Dyöb ápë á nköjsé, ebédëë ábëbed nsón míme Devæl ábél. ⁹ Kenzéé awé adé mwán a Dyöb, éebélëë mbéb, áyæle abé á Dyöb adé mó áte, éehélëë-’e-se ábelé mbéb áyæle Dyöb döö adé mó Sáá. ¹⁰ Chööm éche ékoo’ syánë alúmed bad ábe bédé bän bé Dyöb ne ábe bédé bän bé Satan edíi nén bän, bad ábe békhege mam míme métángéné ne bad ábe békhege baányaŋ bé Krísto, béesaá bän bé Dyöb.

Jōne áá bad bédæn nhógo ne aníníi

¹¹ Nkalaj mì bwâm míme nyéwögké se á mbooted míbédëë nén bän, dédæn nhógo ne aníníi. ¹² Deebág née Keene. Keene abédëë mod awé Satan, anwúu-’e mwányan. Cheé ênkäj boj Keene awúu mwányan? Anwúu mó áyæle mekan míme mwén ábél’áá mëbédé mam mé mbéb boj míme mwányan métángéné á’só é’ Dyöb. ¹³ Né-óó, a-baányaŋ, nyéebág menyáké ngáne bad bé nköjsé békóo nyé. ¹⁴ Dedæn bannned bé Krísto békhege, nê döö ábél’áá boj debíi bän dehïdté ásé e ngíne e kwéed dekudé alongé áde déemaá’. Kenzéé awé eédæn bannned bé Krísto békhege, alyagé adé ásé e ngíne e kwéed. ¹⁵ Kenzéé awé akjó mwányan a Krísto, adíi mod a ewúen, nyébíi-’e nén bän alongé áde déemaá’ dëesaá mod a ewúen ké nhógo áte. ¹⁶ Krístængáne ambé adé alongé á nló mímëd. Nén döö ábél’áá boj debíi chööm éche edænge edíi. Né-óó, syánë ámpé detángéné née débágé adé alongé á nló míme bannned bé Krísto békhege. ¹⁷ Nzé mod adé awé adé nhon, boj anyiné mwányan awé atógo’ boj eewoo nlém mì bwâm áwónjengen mó, chán áhelasé ahób aá módæn Dyöb? ¹⁸ A-bänbän, edænge éche déwánléné nhógo ne aníníi, éetângeneé abé dásö á nsel-tê ne á pôle boj étângéné abé á mbelted ne á mbále-tê.

*Jōne áhóbé chööm éche ébèle’
boj deewogé mbwág á’só é’ Dyöb*

¹⁹ Nzé delúmté nhógo ne aníníi edænge, né debíi bän dedé bad bé mbále ne debíi-’e bän nlém méwúu syánë á abum á’só é’ Dyöb. ²⁰ Póndé ké ehéé eché mímëd mewémten mélángé syánë bän debelé mbéb, debíi bän Dyöb ábíi mam mésyääl tómaa ngáne syánë débíi. ²¹ A-baányaŋ bé edænge, nzé mímesyánë mewémten méélângé syánë bän dedíi bebel bé mbéb, deewogéé mbwág ké nhógo nzé dekânné’ á’só é’ Dyöb. ²² Dekude kékheé

éche désédté mó áyāle dehíde' éche mbéndé débelé-'e mam mme méwógté mó menyinje. ²³ Mbéndé eché ábágé, edíi nén, dédúbe á dín áde awe Mwān Yesu Krīstāe, dédəj-'e nhóg ne aníníi. Melemlem mé mbéndé móo Krīstāe mómpē ámbeé syánē. ²⁴ Kénezéé-'e awé ahíde' mbéndé é Dyōb, abág mod nhóg ne Dyōb, Dyōb-pe ábē mod nhóg ne mó. Nén dó-'áá débeléé boj debíi bán Dyōb áde ne syánē. Debíi áned áyāle Edəádəj éche ábágé syánē.

4

*Jōne ahóbé aá bad bétéd
póndé ne e'dəádəj bé metóm*

¹ A-baányaŋ bé edəŋge, nyéedúbpé bad bésyāäl ábe békóbe' bán békóoo Edəádəj é Dyōb. Boj pen, nyékag bó ábíi nzé edəádəj éche édē bó áte éhúú ne Dyōb. Nyékag bó áyāle ekud é bekal bé'dəádəj bé metóm békópédé á nkōjsé-te. ² Chōm éche wébenlé boj ebíi mod awé Edəádəj é Dyōb édíi áte édíi; kénezéé awé ahóbé aá Yesu Krīstāe apedé á nkōjsé néé moonyonj, né ane mod awóó Edəádəj é Dyōb. ³ Boj kénezéé awé ahóbé aá Yesue eépedeeé á nkōjsé néé moonyonj, eewóó'é Edəádəj é Dyōb áte. Edəádəj éche ene ndín e mod awóó áte édíi edəádəj éche ehúú ne Mod a Ebébtéd. Nyénwóg bán échén edəádəj épé, bōob-pe émáá ape á nkōjsé-te.

⁴ A-bánbān nyéedíi bad bé Dyōb, nyétómé-'e ábē bekal bé'dəádəj bé metóm áte, áyāle Edəádəj éche édē nyé áte édē ngíne tómaa Satane awé akamlan bad bé nkōjsé. ⁵ Ábē bekal bé'dəádəj bé metóm bédíi bad bé nkōjsé, né-óó, mekan mme békóbeé médíi mekan mé nkōjsé, bad bé nkōjsé-'e békóoglan bó. ⁶ Syánē dedíi bad bé Dyōb. Kénezéé awé abíi Dyōb awóoglan syánē, kénezéé-'e awé eésē mod a Dyōb, eewóglánné syánē. Né-óó, nén dáo mod áhele abíi nhəylén átíté e Edəádəj é mbále ne edəádəj é metóm.

Jōne aá Dyōb ádáá syánē

⁷ A-baányaŋ bé edəŋge, dédəj nhóg ne aníníi áyāle nén edəŋge éhúú ne Dyōb. Kénezéé-'e awé adəá mwānyaŋ a Krīsto adíi mwān a Dyōb, abíi-'e Dyōb. ⁸ Kénezéé awé eédəə baányaŋ bé Krīsto, eebíi'é Dyōb, áyāle kékchéé éche Dyōb ábeléé élumte' edəŋge éche awóojné bad. ⁹ Dyōb álumté syánē edəŋge ne nén, alómé mímé mpom m Mwān á nkōjsé-te ábel boj dékud alongé áde déemaá' mbwiined ne mó. ¹⁰ Chōm éche édē edəŋge édíi nén, saké bán syánē dedəá Dyōb, boj nén Dyōb ádáá syánē, anlóm-mé awe Mwān ákóde syánē áyāl e mbéb mme débélé.

¹¹ A-baányaŋ bé edəŋge, ngáne édíi bán Dyōb átómténé syánē adəj, syánē ámpē detáŋgéné dédəj nhóg ne aníníi. ¹² Mod eényinéé Dyōb mbéed. Nzé dedəá nhóg ne aníníi, né Dyōb débē ne syánē, échē edəŋge-'e éche ádáá syánē élón mbon.

¹³ Nén dó-'áá débél boj débíi bán syánē dedé ne Dyōb, Dyōb-pe ádē ne syánē, áyāle abagé syánē échē Edəádəj. ¹⁴ Syánē denyíné, delâŋge-'e bad békópée nén bán Titéé alómé awe Mwān ábē Nsoode a nkōjsé. ¹⁵ Bad ábe békóbe' bán Yesue adíi Mwān a Dyōb, Dyōb ádē ne bó, bó-'e bédé ne Dyōb. ¹⁶ Né-óó, syánē debíi, dedúbpé-'e edəŋge éche Dyōb ádáá syánē.

Kékchéé éche Dyōb ábeléé élumte' edəŋge éche awóojné bad, bad-te ábe edəŋge édíi áte, bédé ne Dyōb. Dyōb-pe ádē ne bó. ¹⁷ Edəŋge éche édē syánē áte, élóné mbon ne nén, nlém méwūū syánē áte á mbwé mé nkáásé, áyāle nén dedé mod nhóg ne Dyōb á nkōjsé-te hén melemlem ngáne Krīstāe ámbeé ne mó. ¹⁸ Mod awé Dyōb ádáá eewóggéé mbwógg. Edəŋge éche élóné mbon énane mbwógg nýsyāäl. Abáj dé nkógsén dóó ápēene mbwógg. Né-óó, kénezéé awé mbwógg nýdíi áte, edəŋge éelónéé mó mbon áte. ¹⁹ Delumte' edəŋge áyāle Dyōb ásébpé syánē edəŋge alúmed. ²⁰ Nzé mod ahóbé aá módəá Dyōb boj akóó mwānyaŋ a Krīsto, ane mod akale metóm, áyāle mod awé eédəə mwānyaŋ awé ányinéé, éehélléé-sé ádāj Dyōb áde eényinéé. ²¹ Né-óó, enén mbéndé chóó békágé syánē; kénezéé awé adəá Dyōb ádəj káéyne mwānyaŋ.

*Jōne aá bad ábe bédúbpé
Kr̄istəə bétómé nk̄ojsé áte*

¹ Kénzéé awě adúbpé aá Yesue mó adé Ane awě Dyōb Áwógté, adíi mwǎn a Dyōb. Kénzéé-’e awě adé sáá-a-mwǎn adé kéájne mwǎn. ² Nyaa echě débíe’é bán dedé bán bé Dyōb edíi nén bán syánē dedé Dyōb, dekonje-’e échē mbéndé. ³ Ádəj Dyōb adíi áhíd éche mbéndé, éche mbéndé-’e éetómteneé awúu áte syánē áhíd chó. ⁴ Kénzéé awě adé mwǎn a Dyōb atómé nk̄ojsé áte. Nzɔm echě atómé nk̄ojsé áte, edíi nén, dedúbpé bán Yesue mó adé Ane awě Dyōb Áwógté. ⁵ Modmod ampée eésaá awě atóme nk̄ojsé áte éetómeé mod awě adúbpé aá Yesue adíi Mwǎn a Dyōb.

Jōne ahóbé bwěm é’láán ábe é’bide Yesue mbój
⁶ Yesu Kr̄istəə ampé á nk̄ojsé. Bēndusén mó ne mendib boj ámbid e póndé echě áwédé á awög rímē mekií mēnsyøgé. Saké edusen é mendib chémpen êmbenléd ne mó, boj áde áwédé rímē mekií mēnsyøgé. Edéadəj éche Ésáá chóō élumte syánē aá nén ádē mbále, áyāle Edéadəj éche Ésáá éekaléé metóm. ⁷ Nyaa édē éláán ábii mbále tângene Yesue. ⁸ Debíi mbále tângene Yesue áyāle Edéadəj élángé syánē, bēndusén mó ne mendib, ansyøg-ke rímē mekií áde áwédé. Échén nyaa éláán ésyøäl élumte syánē bán Yesue adíi Mwǎn a Dyōb. ⁹ Ngáne dedúbpé mekan ríme bad bélhbéé, kéchéé éche Dyōb álāngé syánē etómténé etógnén abé tómaa mekan ríme bad bélāngé syánē. Nén ádē áyāle Dyōb děn dōo álāngé syánē, tângene awe Mwǎn. ¹⁰ Kénzéé awě adúbpé Mwǎn a Dyōb, abíi nén aá rímén mekan mésyøäl médē mbále. Boj kénzéé awě eedúbpé Dyōb, edíi nēngáne ahóbe’ aá Dyōb adíi nkal a metóm, áyāle eedúbpé mekan ríme Dyōb áhóbé tângene awe Mwǎn. ¹¹ Chōm éche Dyōb álāngé syánē édīi nén; abelé syánē dekudé alongé áde déemaá’. Ádén alongé adíi alongé áde awe Mwǎn ábageé. ¹² Kénzéé awě adé nhóg ne Mwǎn a Dyōb akudé ádē alongé, kénzéé-’e awě eésé nhóg ne Mwǎn a Dyōb, eékudeé ádē alongé.

*Déwōnjgen nhóg ne aníníí
âkud alongé áde déemaá’*

¹³ Ntenle’ nyé ábe nyéédúbpé á dñi á Mwǎn a Dyōb, ábel boj nyébíi bán nyékudé alongé áde déemaá’. ¹⁴ Desumé nlém nén bán, kéchéé éche déhédné Dyōb ngáne ébójnédé mó, abelé awög syánē mekáne. ¹⁵ Ngáne débíi-’e bán awóge’ syánē áyāl e kéchéé éche déhédné mó, detángéné abíi bán abage syánē kéchéé éche déhédné mó.

¹⁶ Nzé mod anyiné mwányaŋ abele mbéb ríme méepiinéd mó kwééd, atángéné akánnéd mó. Dyōb débě ane mod alongé. Bad ábe nhóbeé meé nyékánned bédíi bad ábe mbéb rímāb méebeléé boj échāb edéadəj éwé. Mbéb ndé ríme mbéle boj edéadəj éwé. Nzé mod abelé ene ndín e mbéb meeħbéé meé nyékánned ane mod. ¹⁷ Mewusé mésyøäl médii mbéb, boj donje dé mbéb ádē áde déebelé boj edéadəj éwé.

¹⁸ Debíi nén bán kénzéé awě adé mwǎn a Dyōb eébēlēé mbéb, áyāle Mwǎn a Dyōb akənge mó, Ane awě adé Ebébtéd eéhēlēé-’e-se ábel mó mbéb. ¹⁹ Debíi bán dedíi bán bé Dyōb debíi-’e nén bán Ane awě adé Ebébtéd akamlan bad bésyøäl ábe bēebíi Dyōb. ²⁰ Debíi nén bán Mwǎn a Dyōb apedé á nk̄ojsé-te abagé-’e syánē nsôjten ábii Dyōb á mbále. Dedé-’e mod nhóg ne mó áyāle dedé mod nhóg ne awe Mwǎn, Yesu Kr̄istəə. Mwěnpen-naá adé Dyōb, mwěn-naá abage bad alongé áde déemaá’. ²¹ A-bānbān, nyéewoo’ dyamdyam ábel ne myōb mé metóm.

Kálag echě elónténé ébe eche
 Jōne
Ndibned n̄ kálag

Kálag echě Jōne echě elónténé ébe elumte bán, “Nlyáged a mwembé” móo atenlé “Mmwaád nhóg ne ábe bän.” Ane nlyáged a mwembé awě atelé enén kálag adíi Jōne, mmwaád awě átenlé chó ne ábe bän bédíi bad ábe bédé á mwembé-te. Chōm éche Jōne átelé á kálag-tê wén édé néen bán bad bédəj nhóg ne aníníi, bétéd-te pónré ne bemeléede bé metóm, ne ádab ayáge.

Nkabtéd n̄ kálag

Ndibned 1-3

Edəŋge étómé chōm ésyāēl 4-6

Elébé tâŋgène ayáge dé metóm 7-11

Nsógtén 12-13

Melenten

¹ Mε, nēŋgáne nlyáged a mwembé, me-eé ntélé enén kálag. Ntenle, we mmwaád awě Dyōb ápwéđé, ne ábōj bän. Ndáe we ne mbále, saá-kaá mměmpen ndáe nyé, boj káéjne bad ábe békíi mbále bédáe nyé. ² Ndáe nyé áyále mbále echě syánē débíi, débíi-’e chó á ngíndé ne á ngíndé.

³ Dyōb Titéē ne Yesu Kríštæ, Mwän awě Titéē béké syánē nsimé, bélúmed syánē ngol, béké-’e syánē nsaj. Ábén bwém ésyāēl béké ábe syánē ngáne débeléé mekan mé mbále adəj áde dédáé nhóg ne aníníi.

Jōne aá dédəj nhóg ne aníníi dédəj-’e mbále

⁴ Mbédé menyinje bwâmbwam âwógo bän doŋje á bän ábōj békide’ mbále melemlem ngáne Titéē ahóbé aá syánē déhíd. ⁵ Né-ɔ́, a mwän a mmwaád, ncháa we néen méé dédəj nhóg ne aníníi. Enén mbéndé echě ítelenje we, eesaá mbéndé e ekjólé. Edíi mbéndé eche ebédé ne syánē se á mbooted. ⁶ Échén edəŋge éche nhóbeé édíi néen bán syánē detáŋgéné dehíd mbéndé e Dyōb. Ene mbéndé ngáne nyémoosyāél nyéwogé se á mbooted, edíi néen, nyéttáŋgéné nyéddəj nhóg ne aníníi.

⁷ Bad bék medogké híin bédé a nköjsé-te chii. Bédíi bad ábe békewentene néen bán Yesu Kríštæ achyáádté á nköjsé néen moonyoŋ. Ábē bad bédíi bad bék medogké ne bad ábe bétâŋgan Kríštæ. ⁸ Nyéttéd pónré ábel boj ntü mímén méebôj’ ngén, boj pén, nyékul nsábe míme níloné mbon.

⁹ Kéñzéé awě atédté áhid ayáge áde Kríštæ boj atimé ahíde’ ayáge démpé, eesaá ne Dyōb. Boj kéñzéé awě ahíde’ ayáge áde Kríštæ, adé ne Titéē adé-’e ne Mwän. ¹⁰ Né-ɔ́, kéñzéé awě apedé áwén boj ápēen ayáge áde déehúu ne Kríštæ, nyéekobé mó áwén mendáb, nyéelenté-’e mó ké lentén néen mod a Krísto. ¹¹ Nhóbe néen áyále kéñzéé awě alénté mó, alädténé mó ábel e’bébtéd é’ mekan ábe ábeléé.

Jōne ahóbé e’yle bék asog

¹² Nwóó mam híin âláa we boj meéhēdē we mó atele á kálag-tê. Boj pén nwóó nlém áte ápē wé ábel boj dényínen e’só ne e’só, ábel mímesyánē menyinje mélôn mbon. ¹³ Bän ábe mwányorj a mmwaád awě Dyōb ápwéđé, bélommé nyé melenten.

Kálag echě elónténé éláán eche
Jøne
Ndibned ní kálag

Kálag eche Jøne eché elónténé éláán elúmté bán Jøne, “Nlyáged a mwembé” mó átelé chó. Gayøse nlyáged a mwembé ampée móō áténlé chó. Áwēd-te Jøne akene’ Gayøsse áyāle nwôngen ímme ábageé bad bé Krísto bémpeé, alângé-’e mwembé áá bétéd póndé ne mod awé béchagéé bán Diotrefesø. Jøne akené-’e Demetrusø áyāle nsón m̄ bwâm ímme ábelé.

Nkabtéd ní kálag

Ndibned 1-4

Békésné Gayosse 5-8

Béchágé Diotrefese dĕn dé mbéb 9-10

Béchágé Demétruse dñ̄ á bwâm 11-12

Nsógtén 13-15

Jone alente Gayose

¹ Mε nêŋgáne nlyáged a mwembé, mε-εé ntenle' wε Gayøse, enén kálag. Ndáé wε ne mbále.

² A-mwānyan̄ a edəŋge, nkānne' nén mée mam mésyāāl ríme ébeleré mékeen we bwām, mmōŋ-’é ámpē édyee bwām, melemlem ngáne edaédañ échôñ ámpē édyee bwām.

³ Menwóg menyinje bwâmbwam áde donge ábesyánē baányan bé Krísto bépédé hén boj böhób ngáne ne mbále ébeleé mekan míme Dyöb álúmté syánē áá débele', mbíí'-e nén meé elyágé ebele' míme mekan. ⁴ Chömcöhöm eewôgtéé me menyinje tómaa âwóg bán bad ábe bédé ngáne ábêm bän békéle ngáne Dyöb áhedeé.

*Jøne aá bad békôngan bad bé
Kr sto ábe b b le ns n n  Dy b*

⁵ A-mwányan a edənge, ébele mekan ne nlém nhóg âwóngen ábesyánē baányań bé Kršto, kénée wénkembíí'é bó donge á bad. ⁶ Bélángé mwembé míme ndé hén edənge éche élúmté bó. Nhede meé éwōngén ábén bad nzé bétédté nyé âke hōm démpē. Ébel áned áyale nê dáo Dyób áhdeé. ⁷ Ábén bad békágé áá mebwóg ne mebwóg âbele Yesu Krístæ, bénkénkwenten-naá âkob nwōngen ké nhóg míme míbídé wéé bad ábe béedúbpe Krístæ. ⁸ Né-oo, syánē ábe dedúbpé Krístæ detángéné dewóngen ábê bad ábel boj syáā ne bó débele nsón âláa bad nkalaŋ mí mbále.

*Jōne achəgē Diotrefesē dīn dé
mbéb ákēn-ne Demetruse*

⁹ Menthelé mwembé míme índé áwôŋ dyad kálag, boŋ Diotrefes eékwenteneé ábel chöm éche ítélé áyēle ahede' aá móbê nlyaged a mwembé. ¹⁰ Né-ó, áde mépeé mélāā bad bé mwembé bésyāāl mam míme Diotrefes ábeléé. Akaltad sé metóm áyāl. Byánán nê déekwognedéé, abá'a bänned bé Krísto nken akob, ákēē-'e bad bémpée âkob bó nken, ánané-'e bó á mwembé-te.

¹¹ A-mwānyaj a edəŋje, weehántán abé á bad ábe bébele mbeltéd mé mbéb, boj éhâjtan abé á bad abé bébele' mbeltéd mí bwâm. Kénzéé awé abele mbeltéd ímí bwâm adíi mwâñ a Dyöb. Kénzéé-’e awé abele mbeltéd mé mbéb, eebíí’é Dyöb. ¹² Baásyääl béhôbe Demétruse mam mé bwâm á yël. Abele mekan mé bwâm ímme mélûmte’ bán adíi mod a bwâm. Më-’e ámpë nhóbe’ mó mekan mé bwâm á yël, nyêbíí’-e néñ bán kéchéé éche nhóbe édé mbále.

Jōne ahóbé e'yale bé asóg

¹³ Nwóó mam híin âláa wε, boŋ méēhēdēē meé ítel mó ásē. ¹⁴ Nwóó nlém áte ânyín wε mwămpīn mí póndé, ene póndé-'áá dényīnēnnē e'só ne e'só, boŋ dékal. ¹⁵ Nsaŋ míbê ne wε. Běn bésyāəl bélómmé wε melenten. Lentéd me běd bésyāəl, nhóg ne nhóg téé.

**Kálag eche
Jud_ε
Ndibned n̄ kálag**

Kálag eche Jude ântenlé, antel chó âtângan bemeléede bé metóm ábe bélúmté'áá bán bédé bad ábe bédúbpé Kr̄istəø. Enén kálag eéchabéé áte. Chómpē ewágné kálag eché elonténé ébe eché Petro átélé (2 Petro). Jude awéde' Bad bé Kr̄isto nlém, aá bésüm mekuu ámbid e mbále e nkalaj m̄ bwám. Aá m̄mē nkalaj m̄ bwám méehəylánné. Aá Dyōb dēmbé mó wéé ábē bad ngen póg ne ngen ésyāél.

Nkabtéd n̄ kálag

Ndibned n̄ kálag 1-2

Abé ne ayáged dé bemeléede bé metóm ne ebómán éche békudté 3-16

Bélabe bad âwúu áte á adúbe tê 17-23

Nnamed mé asog 24-25

Jude alómé melenten

¹ Mε Jude, ndíi mbaleds awe Yesu Kr̄istəø, mbé-'e Jemse mwănyarj. Mε-εé ntenle' nyé bad ábe Dyōb ápwédé enén kálag. Nyébií nén bán Dyōb Titée adəé nyé, Yesu Kr̄istəø-'e anone' nyé. ² Ngol e Dyōb, nsaj n̄ Dyōb ne edəngé é Dyōb ébâd abé ne nyé.

Bad bé metóm

³ A-baánya, nkénwanén nyé atele bwâmbwam tângene e'soóson ábe Dyōb ábágé syáné mbwiined ne Yesu Kr̄istəø. Boj bɔob nnyíné meé ébóó bán ítele nyé tângene mekan mémpée. Nwéde nyé nlém á abum nén meé, nyésüm mekuu ámbid e mbále e nkalaj m̄ bwám. Mmén nkalaj m̄ bwám méehəylánné. Dyōb dēmbé mó wéé ábē bad ngen póg ne ngen ésyāél. ⁴ Nhóbe' nén áyðle bad ábe béewoo abé á bad bé Dyōb bésólé átinté echén á mesoøm-tê. Ábê bad béhóbe' nén bán nsimé m̄me Dyōb ábágé syáné ne alagseen áde álagsanné syáné mbéb, ábágé syáné kunze ábel mbinde é mekan. Dyōb dêmmád nkógsen m̄me ábê bad békúdé atíi se' bɔód. Ábê bad békobéé Yesu Kr̄istəø áde édií-'áá bán Yesue mwěmpen móo adé syáné Sáá abé-'e Nkamlené.

⁵ Kénéé nyébií m̄mén mekan m̄syāél, ndáé meé íkamten nyé ngáne Sáñgwéé ánhüdté bad bé Israél á mekáá mé bad bé Egipto boj ámbid e póndé abódéd alongé a bad ábe bénkénsum nlém áwé. ⁶ Nyékamten-ne ángel ámpē éché énkêndyeé hōm áde Dyōb dênnabnédé tó, boj bênhidé ádē abwóg á hōm wéé béntângéenné abé. Dyōb ábánné bó á mehañ á mbwóg mé ehíntén wéé bébëé abé ne abé ké ámbid e Epun émbáá é nkáásé. ⁷ Ndáé meé nyékamten káájne myad mé Sodom ne Gomora ne myad m̄me mébédé bó benben. Bad ábe békédé m̄mê myad, békábé'áá mesón, bélidé-'e mekan mé esíí mé ekob é yël m̄me moonyon éetângeneé abel. Békúdé nkógsen m̄ muú m̄me m̄edimé'. Mmén nkógsen ídē álúmed bad bémpeé bán nén áhelené ábenléed ne bó.

⁸ Boj kénéé, ábê bad ábe bésólé átinté echén bómpe bédíi bénanje nló bán nkamlen ídē áwâb mekáá. Mmén nló m̄bèle' békèle' mbinde é mekan, béenýinéé nkamlen n̄ Dyōb néé dyam, bésyāé-'e ngume éche édé ámín. ⁹ Boj ké Maikélé, ángel embáá enkéntédté ne mó mwén ásyáñ Satane áde búmá bérpentánnáá tângene mod awe átēd ndim m̄me Mosee. Anláá mó dásó áá, "Sáñgwéé ákógsen we." ¹⁰ Boj ábê bad ábe bésólé átinté echén pen, kéchéé éche béesôñteneé békóbe chó mam mé mbéb áyāl. Kéchéé éche épédé bó á mewémten chóá békèleé. Békèleé néé nyam é mehín. Mmén mekan mén móo mépiinad bó kwééd. ¹¹ Medim ne bó. Bómpe békèle' ngáne Keene awé anwúú mwănyarj ámbeñlén. Á etútú é mənē, békèle békél kékéé, ngáne Balame. E'wúú bá nló-áte ábâb békél bómpe békèle melemlem n̄yéngáne Koraa ánwéé áyále anwúén Dyōb nló áte. ¹² Ábê bad békwaçéé, né-óz nzé nyáábóo nyéládné ádyé ndyéed álúmed edəngé éche Sáñgwéé,

bébelé béké nêngáne mbinde átintê echén. Échab y l ch n ch o  b t ntann . B d i  n  e mbag ech  pub ek en   ech  l umte  b n mb u  ech , ´de eech  . B d i  n  g ne mel m me m echy  ' e  p m k   p nd  ech  mel m echy  ' . B n p  aw  n  g ne bw l ab  b w bn  nk j   s  . ¹³ B d i  n  g ne ed b  nkw  eche h ode  ne ng ne. Ahod ´de h ode   eb d te  mbinde a  nkin. N  d   d   ab  d  mb b  b d    wed. B d i  n   betintine ab  b tamnad. Ndib e eh nt n ech  Dy b  k jn d  b  esine b ,  b -  ab  ne ab .

¹⁴ En ge aw  anl nt n ny ng l sa mb  mbyaa m me Adame, anh b se' b od  a s  ' p nd  t hg ne ab n bad. Anh b  a , "Ny n ne", S ng     p en e'k l  ne e'k l  e'  ng l  eche s  . ¹⁵  k  d  bad b  nk js  b sy  l.  kw d  bad b sy  l ab  d ab ab  d esa  n   ab  a  bad b  Dy b  nk  , ak gs n -ne bad b  mb b  ab  b ew o  mbw g  n  Dy b .  k gs n  b  ay le mam m  me b h be  t hg ne m ." ¹⁶ Ab n bad b y g ke  anyoo at  b y g k -   bad ah b  ng n . B b le  dyam d  mb b  k  h   ´de b d   ab l. B k me ek   a  t l, b ny nt -   ns l at  ab l b k ud bw m.

Ny b  ny ke ne ad ube  a mb le a s  

¹⁷ Bo  a ba yan , ny  p n ny k mt n mam m me b mb p e  b  nl mag ab  S   aw , Yesu Kr st   b nl   ny . ¹⁸ B nl   ny  b n " de e p n b  as g  b p e , bad b p , b wel  ny , b h de ' e ch  es   e mek n m  ek b  e  y l." ¹⁹  ch n nd n  e  bad ch o   p e ne ' nk b n  at nt e  e  bad b  Dy b . Es   e mek n m  mb b  m  nk js   k ml n b , b ew o -   Ed  d n  e  Dy b  at . ²⁰ Bo  a ba yan , ad ube  ´de  s    a de ny w o  ab   kw ge '  k ag  a s  . Ny k nn , ng ne e  Ed  d n  e che  s    ly g te  ny . ²¹ Ny ke ne along d n  a s   ny aa e che ny chem l d t  n n b n Dy b  ad   ny . Ny s ne , ny ly g  nl m  n n b n S   aw d  Yesu Kr st    p ,  ben l d  m me nl m  n  ng l, ny k ud along d n  ´de d ema '.  bel n n ay le ad   ny .

²² Ny w n  nl m  n  ng l w  e  bad ab  b ed ub pe ne nl m  nh g . ²³ Ny son along d  a bad b mp e . Ny h d  b  d   a  mu  meh l . B mp e  b d   ab  ny t ng n  nl m  n  ng l aw n l n , bo  p n ny t d n  b  p nd . Ny t ng n  k  j ne e ch  mb t  ak o  by n n  es   e mek n m  mb b  m  ek b  e  y l  k ob t  ch o  mbinde.

Mek ne m  mek n g 

²⁴ Eh m   b  ne Dy b  ´de ab le  bo  ny eh n  a mb -te . Mw n -a  ap e ne ' ny  ab w g  a  h m  w  e  mw n  ad   ne eh m .  p e n ny  ´de e se n  at n  d  mb b  k  ah g  ´de ny  a  y l, ny b -   men n ge . ²⁵ Ed  b   sy  l  b  ne m . Mw mp n  m   ad  Dy b  ´de  s    along d n  ad   mb wi ned ne ch m -   Yesu Kr st   S ng    aw d  ab l . Eh m , ed ub , ng m , ne nk ml n  n sy  l n d   m m , se  a  m boot d , b o b , ne  a  ng nd .  b  n .

**Kálag e
Mam míme mébenléd
Ndibned ní kálag**

Ndibned ní kálag e mam míme mébenléd míme Dyöb álúmté Jøne. Jøne mó atelé chó á póndé eche bad ábe bénđubé Krístǣ békúdé'áá metake áyæle adúbe áde bénđubéē néñ bán Yesu Krístǣ adíi Sáñgwéé. Atoté áde Jøne ákoo ahób á kálag tê wén adíi ábe bad ábe áténlé chó e'lyég bé nlém ne áwéd bó nlém á abum. Mekan míme Jøne ábúdé atel á kálag tê wén médii mekan míme Dyöb dénlümédté mó á ndóg-te áá mébenléd.

Kénée édií bán mewemtén mébuú áte tângene nsõñten míme ndé á kálag tê wén, atón áde dën ákoo abé áwéd-te adíi néñ; kéáj ne á asog, Dyöb détöm ábë bad bé ekoyí ne Satane áte. Dyöb débél néñ mbwiined ne Sáñgwéé, Yesu Krístǣ. Dyöb désabé ábë bad ábe bédúbpé mó ne nlém nhög, anamed áde ánamédté bó ábë á nkoy mímének mécõolé ne nkoy n sé mé ekáolé.

Nkabtéd ní kálag

Ndibned 1.1-8

Ndóg e'só ne kálag eche béténlé mwembé saámbé 1.9-3.22

Nhíbe ní kálag míme íwoó e'diben saámbé 4.1-8.1

E'loj saámbé 8.2-11.19

Dragøne ne nyam ébe 12.1-13.18

Ndóg híin 14.1-15.8

E'bwøg bé meliñgá mé Dyöb saámbé 16.1-21

Dyöb ábébté Dyad á Babilon, nyam ekwedé nzum, nkal e'déadéj a metóm, ne Devæle 17.1-20.10

Mbakú e asog 20.11-15

Nkoy mímének mécõolé, nkoy nísé mécõolé, Jerusalém a ekóolé 21.1-22.5

Nsogten 22.6-21

¹ Enén kálag ehóbe mekan míme mébenléd míme Yesue Krístǣ ábélé boj mébyéen. Dyöb dêmbé mó mímén mekan aá mébyéen ábel boj áluméed ábë bembalede mam míme mékwogé abenled. Krístǣ ambél awé mbalede, Jøne abíi mímén mekan alóm áde ánlömmé ángel áwé. ² Jøne mó-'e anhób mam mésyääl ngáne ánnýinné. Mímén mam móó ánhobpé tângene nkalaj míme níhuú ne Dyöb, ne mbój eché ámbidté Yesu Krístǣ. ³ Nnam mibé ne kénzéé awé aláa' enén kálag ábel boj bad bémpeé bémwog mímen nkalaj tângene mekan míme mébenléd. Nnam mibé-'e ne kénzéé awé awogé mímen nkalaj boj ahíd-te mam míme méténlédé á kálag-tê wén. Póndé emaá abé benben eché mímén mekan mésyääl mébenlédté.

Jøne alómmé mwembé saámbé melenten

⁴ Me Jøne, ntenle mwembé saámbé míme ndé á mbwog e Esia. Nsimé ne nsaj ní Dyöb míbé ne nyé. Dyöb áde adé, áde démbé, ne áde débél, ne e'déadéj saámbé bélömmé nyé nsimé ne nsaj. Ábë e'déadéj é'dé á'so bé atii dé nkamen adyöb. ⁵ Yesu Krístǣ mómpé alómmé nyé nsimé ne nsaj. Mó adé ane awé ahóbé mbale tângene Dyöb nyaa eché débíi bán edé mbale. Mó abédé mod a'so awé ansébé apuu, abé-'e nkamen a këj é nkönsé.

Adéá syáné, abelé-'e mbéb mécaklanné syáné ámpé, asyøg áde ásyøgé mímen mekií a nló mímēd. ⁶ Abelé syáné néé beprise ábe bénbenle Dyöb eche Sáñ awé akamlan bó. Éche ehúmé ne mímen nkamen mibé abé ne abé. Ébë nê.

⁷ Nyénøne', áhüé' ne mbag, mod-té-'e ányin mó, káejne bad ábe bémbeł boj awé, abome áde bémbo meé mó á awog. Metúmbé mé nkönsé mésyääl-le mélëb mó. Nê dën dôo ébë, ébë nê.

⁸ Sáñ Dyöb á Ngumé ahóbé aá, "Me-eé ndé Álfaa mbé-'e Ómégaa." Mó adé Dyöb áde adé, áde démbé ne áde débél.

Jøne anyíné Kr̥istəə á ndóg-te

⁹ Ndíi Jéne, awen mwânyan. Ndé nhág awě mómpē adé melelem ngáne nyé ákaj nlém âwesen metake míme mépiide bad ábe bédé á nkamlen ímme Yesu Krístæ. Bêmbané me á mbwág eché mendib mélájnédé eche bêchagéé bán Patmos áyâle menkâl Eyale é Dyöb níláá-'e bad mekan míme ínyíné tângene Yesue. ¹⁰ Edádæj éche Ésáá êmpií me á Epun é Sângú.* Menwág ehób é ngíne ébídé me ámbid, émbé néé esaád é eloŋ. ¹¹ Énhôb aá “Mam mímé ényíné, tel mó á kálag-tê, élóme mímén mwembé saámbé míme ndé á Efesus, á Semaina, á Pegamum, á Tiatira, á Sadis, á Filadelfia ne á Laudesia.”

¹² Dóo nkúnné ânyín ehób eche éhóbé'áá áwêm, boj ínyiné metii ímme békánné etrukaj ámín saámbé mé gôl. ¹³ Átinté e ímme metii saámbé dóo ínyiné mod awé awagné moonyoj. Anhé mengombe ímme méchábé káéj mépē mó á mekuu-sé, awáá-'e etûd é gôl á tâl. ¹⁴ Esid é nló épúbé'áá mó féréd née mbóm, mïd méchodoné mó áte née muú. ¹⁵ Mekuu mémbé mó née ekii éche bêchagéé bán brâns eche bêhédé á dû boj ébé byánán épene' áte, ehób-pe édumé mó áte née mendib ímme mésobpe'. ¹⁶ Betintine saámbé békabé mó á ekáá émbáá, páá e nsel ímbe eché ekóbpe bwâmbwam ebíd mó á nsel-tê, e'só-'e é pené mó née enyen éche étômtan apen.

¹⁷ Áde nnyíné mó, menkwé mó á mekuu, mbé néé mod awé awédé. Dóo ábáné me éche ekáá émbáá á yäl boj áhōbē aá “Weebáá”, me-eé ndé Mod a Mbooted mbé-’e Mod a Asog. ¹⁸ Me-eé ndé ane awé adé alongé. Menwé boj bɔɔb ndé á alongé abé ne abé. Nwóó nkamlen ámīn e kwééd nwóój-ge ámīn e mbwóóg e kwééd. ¹⁹ Bɔɔb-poó tél mekan ásē ríme ényínéé, míme mébenlad bɔɔb ne ríme mébenléd. ²⁰ Kun e e'kojnéd echě edé tāngene betintine saámbé ábe bédé me á ekáá émbáá ne metii mé etrúkáj saámbé me gôl edii néen: Betintine saámbé bédii ángel é mwembé saámbé, metii mé etrúkáj saámbé-’e médii mímē mwembé saámbé.”

2

Jōne alómmé mwembé mé Efesus pôle

*J*øne alómmé mwembé
mme ndé á Semaina pôle

⁸ Anláá-’e me ámpē aá, “Telé-’e ángel echě edé á mwembé míme índé á Semaina nén wεé,

"Mod awé adé mod a'só abé-'e mod awé adé mod a ndimten, awé anwé boŋ abé á alongé ámpē, mó alómé enén pôle. ⁹ Mbíí mímēn metake mbíí-'e meé nyédíi betóótökē bé bad, boŋ kéné nyédíi behon bé bad. Mbíí e'bébtéd é' mam ábe bad ábe béké béké béké béké Israël kénéé béesaá, béké béké nyé áyāl. Béké béké béké béké Satane ké' e bad ábe

* 1:10 Epun é Sângú ébédéé melemlem nêngáne mbwe n̄ Sôndé.

bédé áwē echoŋ. ¹⁰ Nyéebáá' metake míme méhúe' nyé á'sō. Nlâŋge nyé meé, Satane ábél béké nyé doŋge á bad á mbwɔg, wéé nyékudté metuné áyāl e epun dyōm. Ábel nê ákəg áden adúbe. Ké nyéwág ké wúen, nyébē nyédúbe me. Nzé nyébelé nê, né me-'e měbe nyé alongé áde déemaá' nēngáne nsábe mí mod awé atombwéné. ¹¹ Kénezéé awé awóó metúu áwóge' chom éche Edə́dəŋj élâŋgeé mwembé. Bad ábe bétómé mbéb áte béewáá kwéed e edə́dəŋj."

Jøne alómmé mwembé míme índé á Pegamum pôle

¹² Anláá-'e me ámpē aá "Telé ángel eché edé á mwembé míme índé á Pegamum.

"Ané awé awánlé páá e nsəl míbe eché ekóbpe', mó alómmé nyé enén pôle. ¹³ Mbíí wéé nyédyé'í, wéé Satane míme nkamlén índíí. Nyébē nyésum nlém áwêm. Nyémbé nyéduíbé me ne nlém nhók ké á póndé eché Antipase. Antipase ambíd me mbón e mbále, bénwūú'í mó átinté echén wéé Satane ádyee'í. ¹⁴ Boŋ nwóó nguse e mam áhób nyé áyāl. Baahóg bédé átinté echén ábe békide ayáge áde Balame. Balame mó anlúméd Balage ngáne ásöleldté bad bé Israel á mbéb-te adyé áde békágé'áá medyé míme békágé'áá myöb mémpée néé mendé, ambél-le békabé mesón. ¹⁵ Chom émpée éche íwójná nyé édíí nén báñ, baahóg bédé átinté echén ábe békide adúbe áde Nikolausé áyágteé. ¹⁶ Né-ɔó, nyétede áden abé dé mbéb. Nzé nyéetede, né mewámsen ape áwanen ábē bad, mbenléd páá eché ebídé me á nsəl áwanen ábē bad. ¹⁷ Kénezéé awé awóó metúu áwóge' chom éche Edə́dəŋj élâŋgeé mwembé. Bad ábe bétómé mbéb áte, měbe bó mána míme íkójnédé bó, měbě-'e bó aláá áde ápúbe'. Ámín e ádē aláá, bétélé dín dékōolé áde modmod éebíí'í étómeé mod awé békéé ádē aláá."

Jøne alómmé mwembé míme índé á Tiatira pôle

¹⁸ Anláá me ámpē aá, "Telé ángel eché edé á mwembé míme índé á Tiatira nén wéé,

"Mé Mwán a Dyōb awé měd méchodonéé áte néé muú, mekuu-'e mébé mó néé ekii éche békagéé bán brôns boŋ ébé byánán echodnē'. ¹⁹ Mbíí nsón míme nyébeléé. Mbíí edəŋge éche nyewánléné me, mbíí-'e adúbe áde nyéduíbpé me. Mbíí abele áde nyébenléé me, ne nlém míme nyékáá awesen áde nyewéséné. Mbíí-'e nén meé, nsón míme nyébeléé bæk, nítomé míme nyénsébëë abel. ²⁰ Boŋ chom éche íhóbeé nyé áyāl édíí nén meé, nyewesen mmwaád awé békagéé bán Jesebelé. Achäge yǎl aá módií nkal é'də́dəŋj a Dyōb. Ayágte', ádogné ábém bembalede ádē adúbe ákáb mesón ne ádyé medyé míme békágé myöb mémpée néé mendé. ²¹ Mbagé mó póndé meé átede mímē mbeltéd mé mbéb boŋ eehēdëë akáb dé mesón atede. ²² Nyénøne', mébwém mó ne bad ábe ákabnéé mesón á anoj dé nkole, béküd-te metuné mé ngíne. Mëbel nén nzé béesóge mímē mekan mé mbéb abel ne ane mmwaád. ²³ Mewūú bad ábe békide chom éche áyágteé, mwembé ísyääl-le mëbii nén bán me-eé ndé ane awé abíí mewémten ne nlém mí moosyäál áte. Mod kē ahéé awé abelé mbéb né-'aá mékōgsenné mó.

²⁴ "Boŋ nlâŋge nyé bad ábe nyélyagé ásé á Tiatira, ábe nyéehídé áden ayáge, nyé ábe nyéeyágké mekan míme békagéé mekan mé kun mé Satan, meéhëdëë meé ítaged nyé ámpē. ²⁵ Boŋ pen, nyébē nyésum nlém áwêm káéjne áde mépéé. ²⁶ Bad ábe bétómé mekan mé mbéb áte boŋ békbelé-'e mam míme ílángé bó meé békbel, káéj ne á asog dé ádab alongé á nkönsé te wén, měbe bó kunze ákamlen meloŋ mësyääl. ²⁷ Békamlén bad békamlé meloŋ ne ekáá éche éhyédé, békagté-te bó áte ngáne mod ákadté mbeé é mög áte. ²⁸ Melemlem ngáne echem Sáj ábágé me ngíne, néé mémpē měbeé ngíne wéé bad ábe bétómé mekan mé mbéb áte. Né-ɔó, áyäle bétómé mekan mé mbéb áte, měbě bó tintine a mbwembwé. ²⁹ Kénezéé awé awóó metúu, áwóge' chom éche Edə́dəŋj élâŋgeé mwembé."

Jōne alómmé mwembé
íme ndé á Sadis pôle

1 Ane mod awé anwágén moonyoŋ anláá me ámpē aá, “Telé ángel eche edé á mwembé íme ndé á Sadis nén weé,

“Me awé nwánlé e dæádæj é Dyöb saámbé, nwalé-’e betintine saámbé, me-ee nlómmé nyé enén pôle. Mbíí nsón íme nyébeléé. Bad békóbté nén bán nyédé á alongé, boj nyéesaá á alongé. **2** Nyékábned. Nyéhede mímêm nsón asog dé abel, boj baoob nyéwèd yøl áte nyébel mó bwám, áyøle nnyíné nén meé nímen nsón méekwögnedé á’sō ábe ádém Dyöb. **3** Né-oó, nyékamten chom éche nyén'yägëé ne eche nyéñwögké, nyéko chó, nyétede-’e áden abé dé mbéb. Boj nzé nyéekábnede, né mëpë nêngáne nchib, nyéebíí-’e póndé eché mépée. **4** Nyéwóó nguse é bad á dyad á Sadis ábe béewógté échab mbóté mbinde. Bébë ne me, békóbté éche épúbe’ áyøle békóbté adib. **5** Né-oó, kénzéé awé atómé mekan mé mbéb áte, mómpé áwaa mbóté éché épúbe, melemlem ngáne bó, méehúd-taá mó dín á kálag e alongé. Mëhöb á’sō ábe echem Sán ne á’sō ábe éche ángel nén meé bédíi ábêm. **6** Kénzéé awé awóó metúu áwóge chom éche Edæádæj élângéé mwembé.”

Jōne alómmé mwembé
íme ndé á Filadelfia pôle

7 Anláá me ámpē aá, “Telé ángel e mwembé íme ndé á Filadelfia nén weé,

“Mod awé asáá abé-’e mod a mbále, mó alómé enén pôle. Awóó ngíne ákamlen nêngáne Dabide ákámlánnáá. Nzé adibpé modmod ééhélëé adib, nzé adibé-’e modmod ééhélëé adibe. **8** Mbíí nsón íme nyébeléé. Nóné’, ndibnédé we ekob éche edé we á’sō-te, modmod ééhélëé-’e chó adib. Mbíí meé ngíne eché nyéwóó edé mwämpin boj kéné nyéhíde échém eyale, nyéehíbeé bán nyéebíí’ me. **9** Nyénøne’, bad ábe bédé echoj éche Satanë, ábe békóbté bán bédé bad bé Israel kénéé béesaá, bédíi bad ábe békale metóm. Mëbël bëpë áwöñ, békowé we á mekuu. Mëbël-le bó moosyäál bëbíí bán ndǽ we. **10** Ngáne édíí bán nyéhíde échém eyale éche ínlângé nyé meé nyékañ nlém áwesen metake, mémpé meékaé nyé á póndé e metake íme mépë á nkörjsé, ákag bad bësyäál ábe bédé á nkörjsé-te. **11** Nkwogé ape, nyédíí nyésum nlém áwêm ábel boj modmod eékobné nyé nímen nsábe. **12** Bad ábe bétómé mekan mé mbéb áte, mëbel bó akon á ndáb eché ádém Dyöb, bëebídtaá áwëd-te ámpé mbéb. Mëtel bó dín áde ádém Dyöb áyäl, mëtél dín á dyad áde ádém Dyöb, Jerusalém a ekóólé awé ahúú ne ádém Dyöb, ámín. Mëtel-le bó ádém dín dékôslé á yøl. **13** Kénzéé awé awóó metúu áwóge’ chom éche Edæádæj élângéé mwembé.”

Jōne alómmé mwembé
íme ndé a Laudesia pôle

14 Anláá-’e me ámpē aá, “Telé ángel eché edé á mwembé íme ndé á Laudesia, nén weé,

“Ane awé adé Ébë nê, awé abele ngáne Dyöb áhedeé, abé mbón e mbále, mbwiined ne mó-’aá se á mbooted Dyöb dênhägké chom ésyäál, mó alómé enén pôle. **15** Mbíí nsón íme nyébeléé. Mbíí meé nyéehóo’ nyéehünné-’áa. Nyémbé nyéhóo’ ké’ nyéhunne’.

16 Né-oó, ngáne nyédíí etoné, nyéehóo’ nyéechodté-’áa, mëbïdëd nyé áwêm nsäl tê.

17 Nyéhóbe nén bán nyédé nhon, nyéwóó bwëm é’syäál, nyé bán nyéetogéé-’e chomchom. Boj nyéebíí’ bán nyédíi bad ábe bétómtan atag ábe békóbténe etyag, ábe bédé atog, ábe békwdé ndim, bëbë-’e nsôb. **18** Né-oó, nlébe nyé nén meé nyéchan gôl áwêm eché bétómté á muú-te, ábel nén nyébë nhon. Nyéchan-ne mbóté áwem éche épúbe nyéwáa chó, ábel boj e’sôn ábe nímen nsôb mpeeneé, bëenyinnad. Nyéchan-ne dyög áwêm áde nyéwögëdté á mëd ábel boj nyényinne’. **19** Bad ábe ndáá nkâne bô áte nkôgsân-ne bô. Né-oó, nyéwöñ kán nyétede-’e áden abé dé mbéb. **20** Nyénøne’, ntyéémé á ekob nkume-’e chó. Kénzéé awé awogé me ehób boj ádibë ekob, mësôl, ndyé ndyéed ne mó, mó-’e adyé ndyéed ne me. **21** Bad ábe bétómé mekan mé mbéb áte, mëbe bô kunze adyee ne me á atii dé nkamlen, melemlem ngáne mmén ámpé méntommé bad bë ekoyí áte boj ndyéé ne

echem Sáy áwē atii dé nkamlen. ²² Kénezéé awě awóó metúu áwóge' chōm éche Edəédəŋ élângéé mwembé."

4

*J*ōne anyíné atii dé nkamlen áde ádē ámīn

¹ Ámbid enén dōo ínyíné ndóg empée. Mennyín ekob ádyōb éche édibnédé. Dōo níwogé ehób éche ésébpé ahób áwêm, ébédé née eloŋ, élângéé me néen aá, "Hyág ámīn hén, mělūmēd wé mekan ímme métângéné abenled ámbid e enén póndé." ² Ábwōg-ábwōg dōo Edəédəŋ é Dyōb épíidé me. Hé dōo-aá ínyíné atii dé nkamlen, ínyíné-'e ngáne mod ádídé dōo. ³ Ane mod awě andií ádē atii dé nkamlen, yěl epené'áá mó áte née meláá ímme béchagéé bán jáspa ne kanélian. Ngubélen-ne ámpē enləjnéd atii dé nkamlen. Ene ngubélen epené'áá áte née aláá áde béchagéé bán emeran. ⁴ Metii mé nkamlen mémpée móom mébe ne méniin ménləjnéd ádē atii dé nkamlen, bad bém̄báá-'e móom mébe ne béniiin bêndií ím̄m̄ metii mé nkamlen. Bénwāā mbóté éche épíube béké-'e e'kóté békamlen é' gôl á nló. ⁵ Á atii dé nkamlen hē, emwedmwed ébídé'áá, e'saad ébídé', dyōb-pe ákumé áte. E'kag saámbé ábe é'chodne' é'bédé á'sō ábe ádē atii dé nkamlen. Ábē e'kag saámbé é'díi e'dəédəŋ é' Dyōb saámbé. ⁶ Chōm éppee ébédé á'sō ábe ádē atii dé nkamlen éche émbē née edib é nkwē éche ewágne dyené boŋ ényinné'áá áte.

Nyam éniin ênləjnéd ádē atii dé nkamlen pēd ésyāel éniin. Míd mébédé bō yěl esyāel, á'sō ne ámbid. ⁷ Nyam e'só ebédé née ngii, nyam eché elonténé ébe ebédé née nyag, eché elonténé éláán enwón e'só é' moonyon, eché chó-'e elonténé éniin embé née mbye awě apumme'. ⁸ Échē nyam éniin téé, enwón mepab ntóob, míd-te ménlōn bō yěl esyāel, káájne á mepab-té. Békóné'áá bwém nkuu ne müté ésebán békōmmé áte. Békóné'áá bán,

"Sáy Dyōb á Ngumé, asáá, asáá, asáá.

Mó ambé, mó adé, mó-'áá ăp̄."

⁹ Échē nyam éniin ékōnné ane awě adiídé atii dé nkamlen mó awě adé á alongé abé ne abé. Békōnné mó nkángé ímme írbage mó ehúmē, edúbé ne meságnen. ¹⁰ Póndé eché békónéé né, ábē bad bém̄báá móom mébe ne béniiin bénkwé ásē á'sō wéé ane awě adiídé atii dé nkamlen, awě adé á alongé abé ne abé, békagé mó edúbé, békōmmé ábab e'kóté békamlen á'sō ábe ádē atii dé nkamlen békōnné bán,

¹¹ "Awed Sáygwéé ne ádēd Dyōb, ekwōgnédé

ăkud ehúmē, edúbé ne ngíne,

áyāle néen wé-eé ehagé bwém é'syāel,

mmōj-eé etíidé áhagé bō ne ábel é'bē."

5

Mwǎn-a-Ndyoŋ mí mbód mó
akwōgnédé ádibe nhíbe ní kálag

¹ Héé ínyíné nhíbe ní kálag á ekáá émbáá éche ane awě adiídé atii dé nkamlen. Mím̄e nhíbe ní kálag, bēntel mó bwém áyāl pēd ésyāel ébe, bénýāg bédib-pe mó ne e'diben saámbé.* ² Dōo ínyíné ángel e ngíne ehóbe ne ehób éche échágké aá, "Nzé-módé akwōgnédé ábóo e'diben boŋ ádibé-'e nhíbe ní kálag áte?" ³ Boŋ ké ádyōb, ké á nkōjné sé ké 'e á mbwōg e baásé, modmod eebédé awě ahelé'áá rím̄e nhíbe ní kálag adibe áte ké 'e ânōn mó áte. ⁴ Menchií bwâmbwam áyāle néen bénkényínné modmod awě akwōgnédé ádibe rím̄m̄ nhíbe ní kálag áte ké 'e ânōn mó áte. ⁵ Dōo mod ambáá nhág álângéé me aá, "Weéchyéé". Nōnē', Ngii-e-nyame awě abídé á túmbé e Juda, á mbyaa rím̄e kâj Dabide atómé nzum áte. Ahèle ahúd-te ábē e'diben saámbé, ádibé-'e rím̄m̄ nhíbe ní kálag áte."

* ^{5:1} E'diben saámbé é'bédé e'twé ábe bépennáá nhíbe ní kálag, mod awě adibpé'áá-'e bō abédé mod awe ene kunze êmbagnédté.

⁶ Dóo nnyíné Mwǎn-a-Ñdyoŋ mí mbód atyéémé átintê e atii dé nkamlen ne échê nyam éniin, bad bém̄áá bélájnédé mó. Mmê nnyoŋ mí mbód mémbē née mme běwúú. Ménwōŋ meséb saámbé, ne mǐd saámbé. Mmê mǐd saámbé móo médé e'déadəŋ e' Dyōb saámbé ábe Dyōb álómé nkōjsé áte nsyāəl. ⁷ Ane Mwǎn-a-Ñdyoŋ mí mbód anké nhíbe n kálag atéd á ekáá émbáá éche ane awé andií atii dé nkamlen. ⁸ Áde átéde né échê nyam éniin ne ábē bad bém̄áá móom mébe ne běniin, běnkwě ásē a'só wéé ane Mwǎn-a-Ñdyoŋ mí mbód. Ábē bad bém̄áá bó mod té anwálé nílende ne kúmbe é gôl, elón e'twé áte. Ábē e'twé e'dfi mekáne mé bad bé Dyōb. ⁹ Bénkōn nkéngé mékōslé nén bán,

“Ekwōgnédé átéd nhíbe n kálag,
ne ádibe e'dibēn ábe běndibpé.
Ekwōgnédé áyāle nén bénwūū wε,
ékōdnéd-te bad bé Dyōb ímmōŋ mekií.

Ebelé bétímé bad bé Dyōb.
Bém̄id metúmbé ne metúmbé,
běhóbé mehób nyaa ne nyaa,
běbíd meloŋ ne meloŋ,
běbē-'e ndín é bad ésyāəl.

¹⁰ Abelé syánē beprise ábe běbenle ádēd Dyōb,
békamlán-ne á nkōjsé.”

¹¹ Dóo nínóné ámpē boŋ nŵogē ehób e' ángel biſb, élájnédé ádē abwōg dé atii dé nkamlen wéé échê nyam ne bad bém̄áá běbédé. Échê ángel ébédé e'kálé ne e'kálé, e'dun ne e'dun. ¹² Bénkōn ne ehób éche échágké bán,

“Mwǎn-a-Ñdyoŋ mí mbód mme bénwūū'é
akwōgnédé ákud ngíne, nhōn, debyéé, ngum,
edúbé, ehúmé ne mekenag.”

¹³ Dó-'aá nŵogé nhagtéd nsyāəl mme nđé ádyōb ne á nkōjsé, á mbwōg e baásē, á edibé nkwě-te, bwěm ésyāəl ábe e'dé áwēd-te békóne bán,

“Mekenag, edúbé, ehúmé ne ngum
běbē ne ane awé adiídé atii dé nkamlen,
běbē-'e ne Mwǎn-a-Ñdyoŋ mí mbód, abé ne abé.”

¹⁴ Échê nyam éniin éhóbé'áá bán, “Ébē nē.” Bad bém̄áá-'e běnkwě ásē běbagé-'e mó edúbé.

6

*Jone anyíné Mwǎn-a-Ñdyoŋ mí
mbód adíbpé e'dibēn ntóób*

¹ Dóo nnyíné ane Mwǎn-a-Ñdyoŋ mí mbód adíbpé edibēn ehób átintê e e'dibēn saámbé. Héé nŵogé nyam póg átintê e échê nyam éniin éhóbé aá “Hyág!” Ehób ébédé chó née dyōb ákume áte. ² Héé nínóné boŋ nnyínē hósé eché épúbe'. Mod awé andií chó anwálé épwesé běbē-'e mó ekóté e nkamlen. Abédé mod awé ayōgké nzum atóm áte akagé'áá-'e áke détóm nzum émpēe áte éche áwanné ne bad bé ekoyí.

³ Dóo nnyíné ane Mwǎn-a-Ñdyoŋ mí mbód adibpe edibēn éche élonténé e'be. Dóo nŵogé nyam eché élonténé e'be, átintê échê nyam éniin ehóbé aá, “Hyág!” ⁴ Héé hósé empée, eché eyøge bwâmbwam, ébídé áwed. Běmbé mod awé andií chó kunze bán áhûd nsaj á nkōjsé-te ábel boŋ baányoŋ běwúe' nhág ne aníníí. Běmbé-'e mó sáŋkalaa a nkwáté.

⁵ Áde nnyíné ane Mwǎn-a-Ñdyoŋ mí mbód adibpe e'dibēn ábe e'lonténé e'láán, dóo nŵogé nyam eché élonténé e'láán, átintê e échê nyam éniin ehóbé aá, “Hyág!” Héé nnyíné hósé eché ehíne'. Mod awé andií chó anwálé kílo á ekáá. ⁶ Dóo nŵogé ehób nēngáne ehób éche ébídé átintê e échê nyam éniin, ehóbé nén aá, “Asii á ngun ahág

ngēn áyāl e nsábe mé nsón mé epun é bīn ne mesii mé báli méláán míme méelele nkun áyāl e nsábe mé epun é bīn. Boj pen mod eebébté mōl ne mīm."

⁷ Dóo ane Mwān-a-Ñdyøj mí mbód adíbpé ediben éche élonténé é'niin. Héé íwogé nyam eché elonténé éniin ehóbe' aá "Hyág!" ⁸ Héé ínyíné hósé eché edé mbále. Mod awé andií chó béchágé' aá mó bán Kwééd, Mbwág e kwéédé-'e áhídé mó ámbid. Bémbé bō ngíne ákamlen eped é nköjsé ehóg átinté e'ped éniin. Bénhöb bán ábenlad nkwátē, nzaa, nkole ne e'loo nyam áwúene bad, á nköjsé te.

⁹ Dóo ane Mwān-a-Ñdyøj mí mbód adíbpé ediben éche élonténé é'taan. Héé ínóné á menyán mé e'twé sé, boj ínyiné' e'dádədəj ábē bad ábe bénwūu' é ayðle békálé' aá eyale é Dyöb böhöbë-'e mam mé mbále tāngene Dyöb nyaa eche sébíi bán mbále chó edé. ¹⁰ Ábē e'dádədəj é'hóbé' aá ne ehób éche échágké bán, "A-Sáj Dyöb a Ngum, we awé esáa ebé-'e mbále, káøjse póndé ehéé wékāadté bad bé nköjsé boj ékūn mekií mímed míme bésyágé?" ¹¹ Héé bébágé bō mod téé mengombe míme mépúbe', béláá-'e bō bán bésine mwāmpin mí póndé, káøj ne á póndé eche mesongé mé baányaç bé bembæledé ne baányaç bé Krísto mélonné, ábe bénwūu' é bómpe melemlem ngáne bénwūu' é bō.

¹² Dóo ane Mwān-a-Ñdyøj mí mbód adíbpé ediben éche élonténé ntóób. Héé ínyíné ngáne ndəob énáojnédé ne ngíne, enyen-ne énhin bwâmbwam, ngon esyæál-le éyæge' néé mekií. ¹³ Betintine bénhün á nköjsé ngáne e'pum é' mel é'soodéé nchøle áde epub éságté alín á bwel. ¹⁴ Abobe dénnýøj nêngáne bédáá nhíbe n kálag áte míme bénnyí' é áte. Mbøod ésyæál ne mbwág ésyæál éche mendib mélájnédé bennhidé á e'dii. ¹⁵ Héé kâj é nköjsé, ndæle é bad, bad bémbará bé sánze, behon bé bad, ngíne é bad, betâj ne kunze békóngé yäl á pwög é meláá tê ne á meláá míme mébédé á mbøod mën. ¹⁶ Béchágé' aá mbøod ne meláá böhöbë bán "Nyéhûnted sé ámín nyékúten sé ábel boj ane awé adé á atii dé nkamlen eenyíné sé, melingá mé Mwān-a-Ñdyøj mí mbód-te méepiidé sé. ¹⁷ Epun é ebébté éche mímab melingá mébídé áwed émáá apé, modmod éehcnlé-'aá chó atâjgen."

7

*Bembæledé bē Dyöb
békúdē e'chem a'só é' mbøm*

¹ Áde nê atómé, mennyín ángel éniin étyéémé á metóngé mé nköjsé mériin. Échê ángel énkâj metóngé mé nköjsé mériin míme epub étómeé ábel boj epub étômē' aá nköjsé, ké'e á edib é nkwé ké'e tāngene bwel ké e'hög. ² Dóo ínyíné ángel empée ebíde á ped eché enyen ébídeé, awánlé e'chem é' Dyöb dé alongé. Héé ene ángel ne ehób éche échágké, échagéé échíníí ángel éniin eche bémbará ngíne ábébed nköjsé ne edib é nkwé ³ boj álângé bō aá, "Nyéebébté nköjsé, ké'e edib é nkwé ké'e mel, káøjne á póndé eché débâdëe bembæledé bē Dyöb e'chem á mbøm." ⁴ Dóo íwogé mesongé mé bad míme bémbará e'chem á mbøm. Bébédé Mbwåkel ekælé póg, móom mé e'kálé mériin ne e'kálé é'niin. Mmê mesongé mémbid átinté e metúmbé mé aloj á Israel mésyæál dyôm ne mébe. ⁵ Mesongé mé bad míme bémbará e'chem á mbøm á túmbé e Juda mébédé dyôm dé e'kálé ne é'be. Á túmbé e Ruben mébédé dyôm dé e'kálé ne é'be, á túmbé e Gad mébédé dyôm dé e'kálé ne é'be. ⁶ Á túmbé e Ashëe mesongé mé bad mébédé dyôm dé e'kálé ne é'be, á túmbé e Naftali mébédé dyôm dé e'kálé ne é'be, á túmbé e Manase mébédé dyôm dé e'kálé ne é'be. ⁷ Á túmbé e Simione mesongé mé bad mébédé dyôm dé e'kálé ne é'be, á túmbé e Levi mébédé dyôm dé e'kálé ne é'be, á túmbé e Isaka mébédé dyôm dé e'kálé ne é'be. ⁸ Á túmbé e Zebulon mesongé mé bad míme bémbará e'chem á mbøm mébédé dyôm dé e'kálé ne é'be, á túmbé e Joseb, mébédé dyôm dé e'kálé ne é'be, mébé-'e á túmbé e Benjamin dyôm dé e'kálé ne é'be.

Nsábe míme bad bē Dyöb békudté

⁹ Áde nén atómé dóo ínyíné nkúú mí bad. Bémbuú áte nyaa eché modmod éehele'aá bō atój. Bémbid meloñ ne meloñ, bémbará metúmbé ne metúmbé, béké nyaa é bad ésyæál

béhōbē-'e mehōb nyaa ne nyaa. Béntyēēm á'sō bé atii dé nkamlēn ne é' Mwān-a-Ñdyoŋ mí mbód. Bénhē mengombe míme mépúbe' bewálé-'e e'kikag é' mií á mekáá. ¹⁰ Béhōbē'áá ne ehōb éche échágké bán, "E'soosoŋ é' baányoŋ é'húe ne ádēd Dyōb, Dyōb áde ádífidé atii dé nkamlēn, é'húe-'e ne awe Mwān-a-Ñdyoŋ mí mbód." ¹¹ Bad ábe bénləŋnéd ádē atii dé nkamlēn békédéé ángel ésyāəl, bad bém̄báá, ne échē nyam éniin. Béñkwě ásē á'sō bé atii dé nkamlēn békagé-'e Dyōb edúbē. ¹² Béhōbē'áá bán, "Ébē nê! Nnam, ehúm̄é, debyéé, meságneŋ, edúbē, ngíne, ne ngum békē ne ádēd Dyōb abé ne abé! Ébē nê."

¹³ Dóo mod ambáá nhógo ásédtéé me aá ken, "Benzéé bén ábe békáá mengombe míme mépúbe"? Héé békídé?" ¹⁴ Mentimtén mó meé, "A-sáŋ, wε-eé ebíi." Dóo álāŋgeé me aá, "Ábén bad bōo bétómé metake me ngíne áte; békóbpé mímāb mengombe ne mekií mí Mwān-a-Ñdyoŋ mí mbód, békópté mó. ¹⁵ Né-'áá ábélé boŋ béké á'sō bé atii dé nkamlēn á Dyōb, békagé-'e Dyōb edúbē nkuu ne müté áwe ndáb e mekáne. Ane awé adé á atii dé nkamlēn, adé áhed póndé ésyāəl ânɔn bō. ¹⁶ Nzaa éewaá bō ámpē mbēd, píd-te ámpē éekóbpé bō mbēd. Enyen éebákédté bō, békewógaá e'chode békide é' ngíne. ¹⁷ Áyāle nén ane Mwān-a-Ñdyoŋ mí mbód awé adé átinté e atii dé nkamlēn, mwēn ânɔn bō. Ályāgēd-te bō wée mendib míme míbídé á n'yélé míme míbage' alongé médíi. Dyōb-pe ámpē dépīnē bō mésod mésyāəl á mīd."

8

Mwān-a-Ñdyoŋ mí mbód adíbpé edibén éche élonténé saámbé

¹ Dóo ane Mwān-a-Ñdyoŋ mí mbód adíbpé edibén eche élonténé saámbé. Áde adíbpé chó, ekide énhōo áte ádyōb, dyam-éé áde eped é háwa. ² Héé nínyíné ángel saámbé éche étyéémé á'sō e' Dyōb, békágé bō e'loŋ saámbé.

³ Dóo nínyíné ángel empée epedé, etyéémé á'sō e' menyán mé e'twé, awánlé díse á gôl áde békýântéé e'twé áte. Bémbud mó e'twé abé bán áladten mekan mé bad bék Dyōb békagé-'e Dyōb.

⁴ Mwēntud míbídé'áá áyāl e e'twé ábe ángel énwälē, nkág ámīn ne mekáne míme ene ángel ékánnádtáá bad bék Dyōb. Ene ángel entyéém á'sō e' Dyōb. ⁵ Héé ene ángel étédé kúmbe eche e'twé é'bédé áte, atéd muú míme mémbid á menyán mé e'twé, alónéd áwēdte, boŋ ásyōg á nkōjnsé. Nén dēmbel dyōb ákumé áte e'saad ébíde, emwēdmwē étóme, ndob-pe énəŋnad.

Ángel etóó e'loŋ béké 'só e'niin

⁶ Dóo échē ángel saámbé éche énwälē e'loŋ saámbé ébójnséné átój abé e'loŋ.

⁷ Ángel e'só entóŋ échē eloŋ. Héé meláá mé mbúú ne muú míme méládténé ne mekií békóótédé asoo á nkōjnsé. Eped ehōg átinté e'ped bék nkōjnsé é'láán emmad ahyáŋ. Eped é ahín é mel ehōg átinté e e'ped é'láán ne byaá e'syāəl bém̄mad ahyáŋ.

⁸ Ángel eche élonténé ébe entóŋ échē eloŋ. Héé chōm éche éwagné née sáŋkalaa a mbōod eché ehyáa' éhúné á edib é nkwé te. ⁹ Eped e edib é nkwé ehōg átinté e'ped é'láán, éntim mekií. Donge ahōg-ke átinté e monge méláán mé bwēm ábe é'dé á alongé bénwē á edib é nkwé te wē. Donge á stíma ahōg-ke átinté monge méláán éche ébédé á edib é nkwé te wē chómpē emmād abéb.

¹⁰ Ángel eché élonténé éláán entóŋ échē eloŋ. Héé sáŋkalaa a tintine awé achōdné'áá née ekag ábídé ádyōb, ahún ámīn e eped ehōg átinté e'ped bék e'dib é'láán ne ámīn e mendib míme mébídé' á n'yélé. ¹¹ Dín áde ane tintine ádíi "E'chəə." Eped é mendib ehōg átinté e e'ped é'láán, é'cháá'áá. Bad híin ábe bém̄mwē mímē mendib bénwē áyāle nén mécháá'áá.

¹² Ángel eché élonténé éniin entóŋ échē eloŋ. Dóo chōm ébómé eped é etondéé ehōg átinté e'ped é'láán, ébōm eped é ngon ehōg átinté e'ped é'láán, ébōm eped é betintine ehōg átinté e e'ped é'láán. Né dēmbel eped ehōg-téé átinté e'ped é'láán ábe ábén bwēm

bénkwé ehíntén. E'nyínén bé ekide bénkembáá á eped é műte ehógr átíté e'ped é'láán, bénkembáá'-áá á eped é nkuu ehógr átíté e'ped bé nkuu é'láán.

¹³ Dóo ínóné boj ínyiné' mbye apumme se ádyob te álēbpé-'e ne ehógr éche échágké aá, "Medim, medim, medim mébē ne bad ábe bedyéé' á nköjsé á póndé eche échínií ángel éláán étōngé ábab e'loj, ábe békwogé atój."

9

Eloj éche élonténé é'taan

¹ Ángel eché elonténé étáan entój éché eloj. Dóo ínyiné tintine abídé ádyob ahún á nköjsé. Bémbé mó e'kii bé echógr éché éewoo asog. ² Andibé nsəl mé echógr éché éewoo asog. Mwéntud mémbid áwēd-te míme índé nēngáne mwéntud míme mibidé á muú n ngíne. Mmē mwéntud, mémbe enyén éche épéné'áá éehelé'aá ekide anyined. ³ Dóo bengóméé békibidé á mwéntud tē wē, bésud á nköjsé. Bémbé-'e bō ngíne nēngáne bengaabobe bé mpwen ábe bédé á nköjsé. ⁴ Bénlāá ábē bengóméé bán béebelé nkəákəe kē'e byaá kē'e mel ebébtéd kē ehógr. Boj bán békibé ebébtéd dásō wéé bad ábe békibé e'chem é' Dyob á'sō é' mbom. ⁵ Békembaá ábē bengóméé kunze áwúu ábē bad. Boj békibé bō kunze átaged bō á etún é ngon étáan děmpen. Metake míme ábē bad békibé nzé ábē bengóméé békibé bō, mébē née metake míme mod ákudeé nzé ngabobe a mpwen alédé mó. ⁶ Á etún e éché ngon étáan, ábē bad békibé kwéed boj bénnyinné. Bédəj bán békibé, boj kwéed ényagéd, ebáj bō áyəl.

⁷ Ábē bengóméé békibé née hóse éche békibé nēe ákueen á bel. Bwém ábe é'bédé bō á nló é'bédé née e'koté békibé nkamlen é' gôl, e'so-'e é'bé bō née e'so é' baányon. ⁸ Nyoj ébédé bō née nyon é bebaád, mesoj-'e mébē bō née mesoj mé ngii. ⁹ E'kíd é'bédé bō á tál ábe é'bédé née e'kii ábe bad békibé'á ákudten tál á póndé e bel. Ntəgag míme mímab mepab mébél'áá mbédé née ntəgag mé e'bambam ábē hóse híin édoleé áke á bel. ¹⁰ Bénwōj nkón békibé' e'nsyag née nkón n ngabobe a mpwen. Mmē nkón mó-'áá n wóó ngíne ábel baányon ebébtéd á etún é ngon étáan. ¹¹ Békibé kāj eché ekamlan bō. Ene kāj edíi ángel eché enjone' echógr éché éewoo asog. Áde dín adíi á ehógr é Híbru bán Abadone, ábē-'e á ehógr é Grikia bán Apolyoné (nē adé nén bán mod awé abébte).

¹² Né medim mé'sō métómé ámbid enén, medim mémpée mébē médii méhúe'.

Ángel etoo eloj éche élonténé ntóób

¹³ Ángel eché elonténé ntóób entój éché eloj. Dóo n wógr née ehógr ébédé á metóngé méniin mé menyán mé e'twé mé gôl mme mébédé á'sō é' Dyob. ¹⁴ Éché ehógr élāngé ángel eché elonténé ntóób, eché ewánlé eloj nén aá, "Huné ángel éniin éche Dyob ábánné á mehaj á edib embáá é Yufretes." ¹⁵ Ene ángel enhuné éché ángel éniin. Bémmád bō abojsen áwúu dojge ahógr átíté e mojge mé bad méláán ene póndé chén, éché epun chén, ene ngon chén mímé mwé měn. ¹⁶ Bénlāá me mesojé mé sánze éche édídé hóse. Ébédé mbwókel é e'dun é'be. ¹⁷ Nén dóo ményinné éché hóse ne bad ábe bédídé chó á ndógr-te. Bad ábe bêndií chó bénwāá e'kii ábē békibé'á ákúten tál á póndé e bel. Ábē e'kii é'yágé'áá née muú, é'bé-'e ebəj née blúu, é'bé-'e ebəj née nsule. Nló mibédé éché hóse née nló n ngii, muú, mwéntud ne muú míme índé ebəj née nsule békibé-'e chó á nsəl. ¹⁸ Mmē medim méláán, nédé muú, mwéntud ne ebəj éche édē née nsule, ábe é'bídé áá éché hóse á nsəl bénwūu dojge ahógr átíté e mojge mé baányon mé méláán. ¹⁹ Ngíne edé éché hóse dásō á nsəl ebé-'e á nkón. Mmab nkón índé née nyă, ne nló áyəl, békibélad-te mó ábel bad ebébtéd.

²⁰ Moonyon anínií asyəál awé alyagé ásē awé mímé medim ménkénwúú' é bénkéntedéé abele á myōb míme bén békibé. Bénkénsogké e'dəádəj békibé abele, bénkénsog-kaá myōb mémpée abele, myōb míme békibénlé gôl, sîlva, brôns, kē meláá, kē'e hyōn, myōb míme méenyinné', méewōgné', méehelé-'e ake. ²¹ Béetédté-'áá ádāb abel dé mbékibé átimen

Dyōb. Béētēdtēē awúu á bad, béētēdtēē akum á ngaj, béētēdtēē akáb dé mesón, béētēdtē-’áa echib.

10

*Jōne ányíne ángel
echě ewánlé mwā nhíbe í kálag*

¹ Hê dōo hnyíné ángel e ngíne empée ebídé ádyōb, esude' ásē, mbag éləjnéd mó, ngubélen-ne ebé mó á nló. E'só bémbé mó née enyen, mekuu-'e mébé mó née mekon mé muú. ² Anwálé mwā nhíbe í kálag awě bédíspé áte, ásūm ekuu é ekáá é mbáá á edib é nkwě-te, ásūm-mé ekuu é ekáá é emwed á nkin. ³ Héé áhóbé ne ehób éche échágké éche éwágné ehób é ngii echě edume áte. Áde álébpé esaád, ngin saámbé ênkwentén ne ndumag. ⁴ Áde ékúmé áte kumén, nhedé'áá chom éche böhóbé abooted dé atel, boj hñögé née ehób ebídé ádyōb nén bán “Koo mekan mme ngin saámbé éhóbé, mébê kun, weételé” mó ásē.”

⁵ Dōo ángel echě ménwōgké née ásúmá ekuu ehog á edib é nkwě-te boj ásūm-mé échinií á nkin átídé ekáá é mbáá ámín ⁶ boj ámwág melé á dín á Dyōb áde ádé á alongé abé ne abé. Mó áhágé nkoj m míne ne edib é nkwě ne bwém ésyāl abé édé áwēd-te. Ene ángel enhób aá “Abébed á póndé ké ahog déebáá ámpē. ⁷ Boj áde ángel echě elonténé saámbé étōngé échě elon, Dyōb débél dyam áde ántii' é aá móbél áde ádé á e'kojnéd-te. Abél ngáne ánlāá' é abé bembaled, bekal bē'daádər.”

⁸ Héé ehób éche ménwōgké née ebídé ádyōb élāngéé me ámpē nén aá, “Käg étêd nhíbe í kálag mme ídfbnédé áte mme ídáe á ekáá é ángel echě etyéémé ne ekuu ehog á edib é nkwě échinií-’e ebé á nkin.” ⁹ Dōo íkíí wéé ene ángel boj ílāngé mó meé ábe me ane mwā nhíbe í kálag. Dōo álāngéé me aá “Kob nén, édyé. Áchaeád we abum áte boj anyin we á nsal née e'chuu.” ¹⁰ Dōo íkóbé mwā nhíbe í kálag áwe ekáá, ndyé-’e mó. Anyin me á nsal née e'chuu. Boj áde mímáá mó amii, anchaeád me abum áte. ¹¹ Dōo bélāngéé me bán, “Etángéné mekan ahób mme mébenléd ne melon hín, bad nyaa ne nyaa, mehób nyaa ne nyaa ne kâj é bad hín.”

11

Jōne anyíne mbójé ébe

¹ Dōo běbágé me ntój mme ídáe née chom éche böhagnéé bwém, boj bélāngé me bán, “Käg éhag ndáb e Dyōb, éhag-ke menyán mé e'twé, étōng-’e bad ábe běbage Dyōb edubé áhed. ² Boj weéhágé eyáde pen áyále nén běbágé chó wéé bad ábe běbíí Dyōb. Bédyajtédyad áde Ásáá ámín á etún é móom mé ngon méniin ne ébe. ³ Měbě échém mbójé ébe kunze áhób mekan mme mébenléd á póndé echě ehúe' á etún é e'pun ekále ehog mbwókel ébe ne móom ntóób. Béwāá-’e mbóté é melebe.” ⁴ Échén mbójé ébe édii mel mé menzab mébe ne metii mé etrukaj mébe ímme métyéémé á'so abé Sájgwéé awé akamlan nköjsé. ⁵ Nzé mod awémténé-’e bō ebébtéd abel, muú mbid bō á nsal mme hñyánte ábab bad bē ekoyí mímád-te bō ásē. Nén dōo kenzéé awé awémténé bō ebébtéd abel běwūú' é mó. ⁶ Ábén bad běwóó ngíne ákaj abobe ámín ábel nén mbúú eechog á póndé echě bélāngéé bad mam ímme Dyōb áhóbé aá mébenléd. Běwóó-’e ngíne ábel e'dib é'tim mekií, běwój-’e ápueen medim á nköjsé póndé ké ehéé echě bědáá.

⁷ Áde běmád-taá mam ahób ímme bělómé bō ahób, ene nyam echě ebídé á echog échě éewóó asog étyéémén bō nzum, etóm bō áte ewúú-’e bō. ⁸ Mmāb ndim-mé ménaá á nzii echě epoo' á dyad ámbáá tē wéé běmboméé awab Sájgwéé á awog. Béchage ádē dyad á ngan-tē bán Sodom káa Egipto. ⁹ Á etún é e'pun é'láán ne eped, bad běbíd melon ne melon, metúmbé ne metúmbé, mehób nyaa ne nyaa, ne bad nyaa ne nyaa bénōn ímāb ndim ésebán békwentan bán bělime mó. ¹⁰ Bad ábe bédé á nköjsé běwōgēn ábén bad běbe echab kwéed menyinge. Béchag ngande, běbág-ke nhog ne anínií nde alúmed menyinge. Běbél nê áyále ábē bekal-bé-e'daádər běbe běpínaádtáá bō metake

bwâmbwam áde békédé á nköjsé te. ¹¹ Boj ámbid e ábê e'pun é'láán ne eped, pemé e alongé embíd wéé Dyöb esól bó áte bépuu bétyéém-me ámín. Mbwög ní ngíne ménkob bad ábe bényin bó. ¹² Dóo ábê bekal-bé-e dædæj békagké ebídé ádyöb néé élângéé bó néen aá, "Nyéhyag ámín hén." Dóo bésolé á mbag-tê bék-e-'e ádyöb. Ábab bad bé ekayí bényin néé békagké. ¹³ Ábwög-ábwög ndoob énæjnéd ne ngíne. Eped é dyad ehög átinté e e'ped dyom ábe ádê dyad ámbáá émpanjted áte. E'kélé e'bad saámbé bénwë áde ndoob énæjnéd nê. Mbwög ménkob bad ábe belyágé ásé, békagé Dyöb á ngumé, mó awé adé ámín, edubé.

¹⁴ Medim míme mélonténé mébe méntom. Boj nóné! Medim míme mélonténé meláán mékwogé ape.

Ángel etoo eloj échë élonténé saámbé

¹⁵ Ángel echë élonténé saámbé entój échë eloj. Dóo ehög éche échagké ebídé ádyöb éhög néen bán, "Nkamlén mé nköjsé ntímié nkamlén míme awé Sájgwéé, Dyöb ne awé Krístæ, ákamlén-ne á ngíndé ne á ngíndé." ¹⁶ Hé dóo ábê bad bembáá móom mébe ne bénin ábe bédíidé metii mé nkamlén á'sö e' Dyöb békwdé ásé á'sö e' Dyöb békagé mó edubé. ¹⁷ Béhóbé néen bán,

"Sésagnéné we a-Sáj Dyöb á Ngum, we awé edé ane ne awé ambé.

Sésagnéné we áyale ebénlédé echöj ngum eboótédé akamlén.

¹⁸ Bad ábe béebeñlé we bénlij áyäle meliñgá mímönj mé ngíne mëmpé.

Pondé epedé echë békáadteé bad ábê békwdé.

Pondé epedé echë áböj bembaledé, bekal bér dædæj,

ne bad ábe béebeñle we ábe békage we edubé, bad bésyääl,

ken bad ábe bédé etognén-e ké'e ábe béeset etognén, wésabéé bó.

Ene pondé dóo wébékédté bad ábe békabte bad á nköjsé te!"

¹⁹ Hé dóo nnyíné ndáb e Dyöb echë edé ádyöb néé édibné. Á ndáb-te wé-'e, nnyín Ntyág mé Melé. Emwedmwed étomáá, e'saad é'bide', ádyöb ákumé' áte, ndoob énæjnád ásé, meláá mé mbúú mé ngíne-'e méhúne.

12

Jone ányíné mmwaád ne dragon

¹ Hé dóo e'chemléd é' ngíne é'bídé ámín. Mmwaád ambé awé eche mbóté émbéé enyen, ngon chö-'e ebé mó á mekuu sé. Ekoté é nkamlén éche betintine dyom ne békabté bédíí áyäl ebédé mó á nló. ² Ambé dyem, ákwög-ke achyáa. E'we ne metake mé achád míme áwogé'áá mëmbél akánéd awé ámín.

³ E'chemléd bér menyáké békabté békabid ámín. Dóo dragon ebídé täléd. Enkälb bwâmbwam, éyagé-'e. Enwóoj nló saámbé ne meséb dyom. Nló téé ménwaaä ekoté é nkamlén. ⁴ Andolén mímén nkon donge ahög átinté e monge mé betintine méláán ábe békabté ádyöb, abwém-me bó á nköjsé-te. Ene dragon entyéém mmwaád awé ahedé'áá achyáa á'sö-te ábel néen nzé achyáá ádyé mó mwän. ⁵ Dóo ane mmwaád achyáá mwän a mwenchóm awé atángéné melonj mésyääl akamlén ne ekáá éche éhyédé. Boj bénsg mwän, békéen mó wéé Dyöb ádii ne ádē atii dé nkamlén. ⁶ Ane mmwaád antóm mehélé á ehyájge wéé Dyöb démbojnsenné aá békabte mó á etün é e'pun ekálé ehög mbwókel ébe ne móom ntóób.

⁷ Hé dóo nzum ékúmmé ádyöb. Maikelé bó éche ángel bénityéémén ene dragon nzum. Ene dragon chö-'e ámpé ne éche ángel bénityéémén bó nzum. ⁸ Boj Maikelé ne éche ángel bénityom ene dragon ne éche ángel áte. Dragon ne éche ángel bénkénwóngé etál ádyöb ámpé. ⁹ Dóo békabté ene sánkalaa á dragon á nköjsé-te. Ene dragon chö ebédé ene nyé e'boód echë békabté bán Devèle ne Satane, awé adoge' nköjsé nsyääl. Bémbwém-me éche ángel ésyääl ásé á nköjsé nchoo ne mó.

¹⁰ Hé dóo nwyogé ehög éche echagké ebídé ádyöb éhög néen bán, "Bao-b-pao, e'sooson é' Dyöb é'pédé. Dyöb álúmté eche ngíne e nkamlén néé kâj. Awé Krístæ alúmté echë

ngíne baob. Áyæle ane awé ahóbé'áá á'sō é Dyöb nkuu ne müte aá ábesyánē baányan
bébélé mbéb, béhúnté mó á nkönsé. Abánáá bó mam áyèl á'sō é Dyöb nkuu ne müte.

¹¹ Mekíí mé Mwān-a-Ñdyoŋ mí mbód ne mbón e mbále eché békídé’áá bémbełl bétóm Satane áte. Bénkwéntén ké kwééd âkal eyale é Dyōb áyäle nkalaj míme békálé’áá míbédé mbále. ¹² Né-oó, míne ne ábe bésyääl ábe bédé áwed, bénwōg menyinge. Boŋ ndutul ēbē ne bad ábe bédé á nköjsé ne ábe bédé á edib é nkwȏ áyäle nén Devələ asudé ásē áwēn ne melingá mé ngíne ngáne ábíí áá eche pónde edé esoŋ.”

¹³ Póndé echē ene dragōn ényíné áá békunté mó á nkōjsé, embootéd ane mmwaád awě anchyáá mwān a mwenchóm anan. ¹⁴ Boj bēmbě ane mmwaád mepab mébē ríme sánkala a mbyε, ábel nén ápume ápe hōm áde bēbójséné mó á ehyájge, hōm áde ákudté ntōgén á etún é mwě níláán né eped, wée békáé'é mó wée ene nyă. ¹⁵ Dóo ene nyă ésadé ane mmwaád aléed á yăl. Ádē aléed dēnsyøgé néé edib émbáá, ábel nén éhóod ane mmwaád. ¹⁶ Boj ndəob enwóngén ane mmwaád émií edib éche émbid ene dragōn á nsəl. ¹⁷ Dóo dragōn élíjné ane mmwaád, boj ákág ákumé' bel ne nchyáátén ríme ane mmwaád nísyāəl níme nílyágé ásē, bad bésyāəl ábe bēbèle ngáne Dyōb áhedeé boj bēbīdē'-ε Yesue mbón. ¹⁸ Dóo ene dragōn étyéémé á nkin mé edib é nkqw.

13

Jōne anyíné nyam ébε

¹ Hê dôða ínyíné nyam ebíde' á edíb é nkwě-te. Ene nyam enwój meséb dyôm ne nló saámbé, ewój-’e e’kóté bé nkamlen dyôm áwe meséb mǐn. Nló téé ménwôj dín áde ásyâé’ Dyöb. ² Ene nyam eché ményinné embé néé ebwé é ngə, rímmé mekuu-’e mékəl mébé-’e nyoŋ áyâl néé mekuu mé nyam e ahín eché ekaa’ ewój-’e nyân éche échábé eché békchägëé bán Béé. Mmē nsäl mémbë néé nsäl í ngii. Drägøne ambë ene nyam eché ngíne, ábe-’e chó ádë atii dé nkamlen ne ngíne e nkamlen. ³ Ene nyam enwój nló nhóg rímmé mémbë byánán íkudé sii eché empon chó awúu, boj sii eched étim amaa. Yâl enkóm bad bé nkörjsé bésyâl áte áyâle enén nyam, bëbootéd-te chó ahíd. ⁴ Bad békchägëé’áá dragøne edúbë áyâle ambë ene nyam rímmé nkamlen. Békchägëé’áá ene nyam chómpë edúbë békchägëé néen bán, “Nzé-módé adé nêngáne enén nyam? Nzé-módé ahele atyéémén chó nzum?”

⁵ Bêmbé ene nyam kunze âhbé e'yale é' kúmbe ne e'yale ábe e'syáé' Dyöb. Bêmbág-ké chó kunze ábenled mímë nkamlen á etùn é móom mé ngon éniin ne ébe. ⁶ Dóo ene nyam énédté mímë nsəl áte boŋ ébootéd Dyöb asyáŋ. Ansyáŋ dín á Dyöb, asyáŋ abwòg á hòm wée Dyöb ádyee'é, asyáŋ-é bad bésyáel ábe bédé ádyöb. ⁷ Dyöb démbé-é ene nyam kunze âwan nzum ne ábë bad, âtóm-me bó áte. Ambé-é mó kunze âkamlen metúmbé ne metúmbé, melonj ne melonj, mehób té ne bad nyaa ne nyaa. ⁸ Moosyáél awé adyee' á nkönsé ábe chó edúbé. Bad ábe béké chó edúbé bédii bad ábe bétélé dín á kálag e alongé e Mwán-a-Ñdyøj m̄ mbód awé bénwū'é. Béntel bó mën se á póndé eché Dyöb dênhagké nkönsé. Moosyáél awé adyee' á nkönsé ábe chó edúbé. Moosyáél awé bételéé mó dín á kálag e alongé se á póndé eché Dyöb dênhagké nkönsé. Mwán-a-Ñdyøj m̄ mbód awé bénwū'é mó awóó enén kálag.

⁹ Kénzéé awě awóó metúu áwóge'. ¹⁰ Kénzéé awe édíí nén bán atéñgéné ake á mbwøg
ákë á mbwøg, kénzéé-'e awě atéñgéné awé ne nkwáté, nkwáté-'aá béwüñnné mó. Nén
áhedenad bán bad bé Dyöb béwøn̄ e'kañ bé nlém, békhaned-te ngíne-ngíne ne eyale é
Dyöb.

¹¹ Hê dôo nnyiné nyam empée ébídé á ndoob-tê, enwóoj meséb mébe nêngáne mwän-aniyøj m̄ mbód, éhōbē-'e dyam née dragøne. ¹² Ebënládtáá ngíne eché nyam e'só, ébelé-'e áned áwe e'só-te dën. Abelé-'e nköjsé ne bad ábe bédé áwèd-te aá bébage' ene nyam e'só edübé. Ene nyam ebédeé nyam eché enwón sii eché empon chá awíuu bon ene sii émaa.

¹³ Ene nyam eché elónténé ébe embél mekan mé menyáké mé ngíne. Embél muú rímbid ádyób nhún á nköjsé bad bésyāél bényín-ne. ¹⁴ Andög-ke bad ábe bédé á nköjsé bésyāél ne rímmé mekan mé menyáké ríme ákudé kunze ábel. Abelé'áá-'e nê á'sō wéé ene nyam

echē enkūd sii boj ene sii épon chō awúu. Anláá bad aá bébel ediídinge éche bēbagéé edúbé éche éwágné nyam echē enkūd sii e nkwátē boj ebé ebé á alongé.

¹⁵ Bembé nyam echē elónténé ébe kunze áhébe pemē e alongé á ediídinge é nyam e'só ábel nén échē ediídinge éhel dyam ahób éwúu-'e bad bésyāél ábe békwentene mó edúbé abe. ¹⁶ Ene nyam ennyágéd bad bésyāél, ken bad ábe bédé etógnén ké'e ábe béesé etógnén, nhon ne ntogétōke, ntān ne kunze, aá bhéh bó e'chem áwab ekáá émbáá ké'e áwab e'só é'mbom. ¹⁷ Modmod eéhèle'aá chömcchöm achan ké'e asóm ésebán awóó ábē e'chem. Ábē e'chem é'bédéé dín áde enén nyam ké'e eche nómbe.

¹⁸ Nén áhédne debyéé. Mod ké ahéé awé awóó nsôrjtēn áhéd áte chöm éche nómbe echē ene nyam édií. Ene nómbe edíi nómbe e dín á mod. Ane mod eche nómbe edíi mbwókel ntóób ne móom ntóób ne ntóób.

14

Jone anyíné Mwǎn-a-Ñdyoŋ mí mbód ne ábē bad

¹ Hê dōo nínóné boj nnyiné' Mwǎn-a-Ñdyoŋ mí mbód atyéémé á mbəd eche béchagéé bán Zayon. Bad bélédé ne mó mbwókel ekálé, móom mé e'kálé mériin ne é'niin ábe bénwōŋ áde dín ne dín áde Sáá áwab mesó mé mbom. ² Ene pónré dōo nwigé ehób ébídé ádyob. Échē ehób ébédéé née ntogag mé eláá éche ésobpe, ébé-'e née ntogag mímě mbag nzé ngin etómé. Ehób éche ménwōgkē ébédéé nēngane ntogag míbad ábe békume n'lende.

³ Ábē bad mbwókel ekálé ne móom mé e'kálé é'niin ne é'niin bentyéem békōnē' nkángé mékōlē á'sō bé atii dé nkamlē ne á'sō é' nyam ché éniin éche édé á alongé, ne á'sō é' bad bémáá. Modmod enkéhhenlé mímē nkángé ayáge nzese bó bad mbwókel ekálé móom mé e'kálé mériin ne é'niin ábe Dyob ákódté á nkörjsé-te. ⁴ Ábén bad bélédéé bad ábe bēewōgē mbinde e mmwaád áyale néen bēebíi'nsob mé mmwaád. Ábē bad bōo běhíde, Mwǎn-a-Ñdyoŋ mí mbód kékéé wéé ákagké. Ábén bad bōo békódté átinté e baányoŋ. Bó-'aá bédé née e'pum bē'só ábe běbágé Dyob ne Mwǎn-a-Ñdyoŋ mí mbód née mende.

⁵ Metóm ké mehóg méesaá bó á nsəl, bēewoo-'aa awusé ké ahogá yōl.

Ángel éláán épééné nkalaj mí mbakú e Dyob

⁶ Hê dōo nnyiné ángel empée epumme' se ádyob. Ene ángel empéén nkalaj mí bwám írime rídé abé ne abé. Mmē nkalaj mó-'aá álángé'áá bad ábe bédé á nkörjsé, bad nyaa ne nyaa, metúmbé ne metúmbé, mehób nyaa ne nyaa, ne meloŋ ne meloŋ. ⁷ Ene ángel enhób ne ehób éche échágké aá, "Nyébage Dyob edúbé, nyébage-'e mó mekenag áyale nén eche pónré e nkáásé emaá ape. Nyébage' edúbé ne ane awé ahagé ámín ne ásē, edib é nkwé ne n'yélé."

⁸ Ángel empée echē elónténé ébe enhid mó, éhobé nén aá, "Ndəle e Dyad, Babilon amaá ne amaa ásyāél! Ambél bad bē meloŋ bésyāél bémwmé míme míme ngíne. Mmē míme mébédéé esíi' é nkábtéd mé akwalee."

⁹ Ángel empée eche elónténé éláán enhid bō, éhobé ne ehób éche échágké aá, "Kénezéé awé abage' ene nyam eche ebídé á edib é nkwé-te ne échē ediídinge edúbé boj ákudte ábē e'chem áwe e'só é' mbom ké'e á ekáá, ¹⁰ mómpé ámwé míme míme níde melingá mé Dyob. Bésyágé mó á kōb e melingá mé Dyob ne ngíne esyāél. Kénezéé awé abage ene nyam edúbé ane mod ákud metuné mé muú míme n'hunne' bwâmbwam á'sō é' ángel éche ésáá ne Mwǎn-a-Ñdyoŋ mí mbód. ¹¹ Mwéntud míme míbide á muú míme nhyânte' bō, nchágké' ámín á ngíndé ne á ngíndé. Nkuu ne mûte, nkóme áte méesaá ne bad ábe běbágé ene nyam ne échē ediídinge edúbé. Né-'aá édií ne kénezéé awé awóó e'chem é' dín ábe ene nyam." ¹² Nén áhédnad bán bad bē Dyob békaj nlém. Bad ábe běbèle ngáne mbéndé é Dyob éhédéé boj bédúbe-'e Yesue.

¹³ Dó-'aá nwigé née ehób ébídé ádyob éhobé aá, "Tél ásē nén wéé, bootya bəob, nnam ne bad ábe běwédé, áyale bédúbpé Sángwéé." Edədəŋ éhóbe nén aá "Ee, békūd nkóme áte áyale nsón míme běbélé, békūd nsábe áyale nsón míme běbélé."

Jōne anyíné bépáde' mbote á nkōjsé

¹⁴ Dóo n̄nóné boj n̄nyinē mbag eche épube'. Á mbag m̄n w̄e, mod andyee' awé awágné Mwān-a-Moonyon. Ekóté é nkamlen é ḡl ébē mó á nló, páá eché ekóbpe eche běpádnéé bwém n̄njgáne ngun, chó-'e ebé mó ekáá. ¹⁵ Ángel empée embíd á ndáb e Dyōb-te élébpē ane awé andyee' á mbag m̄n ne ehōb éche échágké aá, "B̄enléd echoj páá ápád mbote, áyāle póndé epedé eché běpadéé. Mbote é nkōjsé émáá ayəg." ¹⁶ Dóo ane awé adyee' á mbag m̄n átómteé páá á nkōjsé, apád-te mbote é nkōjsé ésyāāl.

¹⁷ Dóo ángel empée eché chó-'e ámpē enwálé páá eché běpádnéé bwém n̄njgáne ngun ébídé á ndáb e Dyōb eché edé ámīn.

¹⁸ Ángel empée empē eché ewóó ngíne ámīn e muú, embíd á menyán mé e'twé boj álēbpē ángel eché ewánlé páá eché ekóbpe ne ehōb eché échágké aá, "B̄enléd echoj páá, éladen mechaj mé e'pum é' mel á nzag éche édé á nkōjsé, áyāle e'pum é'yágé." ¹⁹ Dóo ene ángel étómté eche páá á nkōjsé boj áladé ábē bad ábwémē bó wée Dyōb álūmtéé mímē melingá mé ngíne, ngáne béladeé e'pum é' mel boj běbwém á bwāl bé e'pum é mel. ²⁰ Bēndyāŋ ábē e'pum é' mel á bwāl ábe béesé á dyad tē. Mekií mémbūl, mébē e'che ásē dyam méta mehōg ne eped, méchāb-pe áte dyam mbwókel é máyl ébe.

15

*Jōne anyíné ángel saámbé
ne medim saámbé*

¹ Hē dōo n̄nyiné e'chemléd běmpēe ádyōb ábe běmbē ngíne, bénkōmēd me yēl áte. Menyín ángel saámbé éche éwánlé medim saámbé. Mmē medim móó médē medim mé asog áyāle móó Dyōb débenlédté álūmed mímē melingá ámād-te áte.

² Dóo n̄nyiné chōm néé edib é nkwé éche édé néé dyené, éche békúmténe ne muú. Menyín-ne néé bad bětyéémé á nkāg mé échē chōm éche ébédé néé edib é nkwé, běwálé n̄lende n̄ Dyōb. Ábē bad běbédée bad ábe běntōm ene nyam áte, ne échē ediídinge ne n̄mbe e dīn áde ene nyam e'só. ³ Békóné'aá nkāngé míme mbalede a Dyōb, Mosee, ne míme Mwān-a-Ndyōn mí mbód, bán,

"A-Sáŋ Dyōb á Ngum,
mímōŋ mbeltéd n̄dē ngíne n̄kómté-'e mod yēl áte.

Á kāj e meloŋ,* echōj nyaa etáŋgéné, edé-'e mbále.

⁴ A-Sáŋ, nzé-módé eebáŋ wē?

Nzé-módé eebáŋ wē edúbé?

Mmōŋpēn-naá esáá.

Bad bē meloŋ bésyāāl běhyé wē edúbé abe.

Mmōŋpēn-naá esáá."

⁵ Áde nén átómé dōo n̄nyiné néé bědibpé ebem é Dyōb á ndáb e Dyōb. ⁶ Dóo ángel chē saámbé éche énwalé medim saámbé ébídé á ndáb e Dyōb-te w̄e. Bénhē mbóté échē ésáá éche ekine' áte, běwáá-'e bengáá bē ḡl á tēl tē. ⁷ Dóo nyam pōg átinté nyam éniin, ébágé échē ángel kúmbe é ḡl saámbé, échē élóné ne melingá mé ngíne mé Dyōb, mó awé adé abé ne abé. ⁸ Dóo mwéntud mé ehúmé é Dyōb ne ngíne e Dyōb bělóné á ndáb é Dyōb-te. Modmod-te ekēnhenlé asól á ebem tē w̄e kááj né medim saámbé míme échē ángel saámbé mépédé á asog.

16

Kúmbe saámbé é melingá mé ngíne mé Dyōb

¹ Dóo n̄wogé néé ehōb éche échágké ébídé á ndáb e Dyōb te w̄e, élāngé échē ángel saámbé aá, "Nyékag, nyésyōg melingá mé ngíne mé Dyōb míme médē á kúmbe saámbé te á nkōjsé te."

* 15:3 Doŋe á kálag dé'só áwóó: kāj e meloŋ; doŋe-'e áwóó: kāj e bad bē Dyōb.

² Hê dôo ángel e'só ékíí ene kúmbe e melingá mé ngíne mé Dyöb asyög á nköjsé-te. Melög míme médé ebébtéd, míme méwag bwâmbwam mémbid bad á yäl. Ábê bad békédéé bad ábe bénwöñ e'chem ábe ene nyam béké-'e bad ábe békágé'áá échë ediídinge edúbë.

³ Dôo ángel echë elonténé ébe ésyögé ene kúmbe e melingá mé ngíne á edib é nkwë te. Mêntim nêngáne mekií mé ndim mí mod. Chörm-té éche békédé á alongé á edib é nkwë-te wë énwë.

⁴ Dôo ángel echë elonténé éláán ésyögé melingá mé ngíne míme mébédé áwë kúmbe', á e'dib ne á n'yél tê. Ábê e'dib bêntim mekií. ⁵ Dôo íwogé ángel echë ekamlan mendib ehóbe' áá, "Mbakú e nkáásé echôn etángéné. Wë awë edé, awë ambé-'e. Wë awë Esáá."

⁶ Mbakú échôn etángéné áyäle bênsyög mekií míme ábôñ bad ne ábôñ bekal-bé-e'déadøñ, né-ó ebagé bô mekií ámwé. Mmê nkögsen mó-'áá bétángéné akud. ⁷ Dôo íwogé néé ehób ébídé á menyán mé e'twé éhöbë néen aá, "A-Sáñ Dyöb á Ngum, mbakú echôn etángéné edé-'e mbále."

⁸ Dôo ángel echë elonténé éniin ésyögé melingá mé ngíne míme mébédé áwë kúmbe-té á etondëe. Dyöb dêmbe Etondëe ngíne áhyáad bad néé muú. ⁹ Bad bénhyän ne e'chode bé ekide é' ngíne. Héé bésyäá dïn á Dyöb mó awë ákamlan mmê medim. Boj bénkênhæjlénné mbeltéd mé mbéb átimen Dyöb ábe mó ehúmé.

¹⁰ Dôo ángel echë elonténé étáan ésyögé melingá mé ngíne míme mébédé áwë kúmbe á atii dé nkamlen áde ene nyam echë ebídé á edib é nkwë-te. Hê dôo nkamlen míme ene nyam íkwédé ehíntén áte. Bad ábe béké-'áá ene nyam béládë'áá ábab e'chém áyäle e'we ábe bégwogé. ¹¹ Bénsyäá Dyöb ámín áyäle mewë mé melög míme bégwogé'áá. Boj bénkêntedéé mmâb mbeltéd mé mbéb átimen Dyöb.

¹² Dôo ángel echë elonténé ntóob ésyögé melingá mé ngíne míme mébédé áwe kúmbe-té á edib é mbáámbáá é Yufretës. Echë edib énlén, ábojseñ nzii ábel boj kâj échë ébídé wëe etondëe ábídéé éhel atóm. ¹³ Dôo rínyíné néé e'déadøñ bë mbéb é'láán ábe é'dé néé e'bûd é'bídeé. Ábê e'déadøñ, ehög émbid á nsel míme dragøne, ehög ébíd á nsel míme nyam echë embid á edib é nkwë-te, échíníí-'e ébíd á nsel míme nkal e'déadøñ a metóm. ¹⁴ Ábê e'déadøñ é'díi e'déadøñ bë mbéb ábe é'bele menyáké, é'hyóme' nköjsé áte ísýäál, bétané kâj é bad, béladé bô áte, ábel bëbojseñ nzum e epun éche Dyöb á Ngum ákáádté bad. ¹⁵ Yesue ahóbë aá, "Nyénóné, mëpë á epun éche modmod éebíí-'e, ngáne nchib ápagké. Nnam ne ane awë adyeeé epin, awálé-'e eche mbóté áyäl ábel boj eékâg nsôb boj awög akwágké á'sö é' bad." ¹⁶ Ábê e'déadøñ bënläd échë kâj áte á hõm áde békagéé á ehób é Hibru bán Amagadon.

¹⁷ Dôo ángel echë elonténé saámbé chó-'e ésyögé melingá me ngíne míme mébédé áwë kúmbe-té á pemë-tê. Ehób éche échágké émbid á atii dé nkamlen á ndáb é Dyöb te, éhöbë néen aá, "Ébénléde." ¹⁸ Emwedmwed étomé'áá, dyöb ákumé' áte, nging-ne étomé'. Ndøob ennøjnéd ne ngíne nyaa echë éébénlédeé ámpë taa moonyon abág á nköjsé. Ndøob ennøjnéd ne ngíne nyaa echë ebédé ebébtéd. ¹⁹ Hê dôo dyad á ngíne ámbáá ákábné áte mojge méláán, myad mémbáá míme mébédé á meloj mésyäál mémpâa. Dyöb dënksamten ngíne-e-dyad, Babiløne, ábel-le aá bad ábe bédé ádë dyad békud nkögsen adéhób aá móbel bémwë mím míme mé melingá mé ngíne. ²⁰ Dyad kë ahéé áde mendib ménløjnédé démböö, mbööd ésyäál-le ényón. ²¹ Meláá mé mbúú míme médé e'del dyam móom mé kílo ménin ne étáan, mébídé'áá ámín méhüntâd baányon ámín. Ábê bad bénisyäá Dyöb áyäle ábê e'dim é' meláá-mé-mbúú bëntömtén ebébtéd abé.

mé nköjsé ésyāel énájnáádtáá. Bad bé nköjsé bémwágé'áá mím míme ane mmwaád mékóbē bó békabé-'e mesón ne mó.”

³ Dóo Edéédərj é Dyōb épíidé me, boj ángel ékceené me á ehyárge. Áhed dó-'aá ínyíné mmwaád nhág. Ane mmwaád andií nyam eché eyage. Ene nyam enwóoj mǐn míme mésyéə Dyōb yěl esyāel. Ene nyam enwóoj nló saámbé ne meséb dyōm. ⁴ Ane mmwaád anwáá mbóté eché eyage', ndín eche kāj éhāgkē ne eché etómtánnáá ayag. Ankútén yěl esyāel ne bwěm é' gôl ne bǎn bé meláá mé etógnén ábê bépene áte ne bwěm bé etógnén bémpée. Anwálé kâb e gôl á ekáá éche elóné ne mekan mé nkólojgó ne mekan mé mbinde mé akáb dé mesón. ⁵ Dín ábédé mó á'sō é' mbōm née kun e e'kojnéd áde mod énkembí'é, ábédé bán, “Babilōn, Dyad á ngíne. Nyaá a békwalée ne mekan mé mbéb á nköjsé te.” ⁶ Dóo ínyíné ane mmwaád, mekií mé bad bé Dyōb ne mekií míme bad ábe békale' ngáne Yesue áhedeé, mékóbé mó née mím.

Áde ínyíné mó, menyáké mé ngíne ménkob me. ⁷ Dóo ene Ángel ésedteé me aáken, “Cheé ékáá boj menyáké mékóbē wé? Mélāā wé kun e mmwaád ne e nyam eché ádíidé, eché ewóó nló saámbé ne meséb dyōm. ⁸ Ene nyam eché wényinné, ekébē á alongé boj eesaá á alongé bōob. Embíd á echogé éché ewóó asog, áke wéé bēwūú'é chó. Bad ábe bédé á nköjsé, ábe Dyōb déeteléé rímāb mǐn á kálag eche ewóó mǐn rímé bad ábe békúdé alongé ádé déemaá' byánán áhág nköjsé, menyáké mékób bó. Yěl ékōm bó áte ânyín nyam eché embé á alongé boj eésé á alongé boj étim abé alongé ámpē. ⁹ Né dóo debyéé ne nsônten békéndadté. Mmē nló saámbé míme ene nyam éwóó ídíi e'kone saámbé ábe ane mmwaád ándií'é ámīn, mibé-'e kāj saámbé. ¹⁰ Átinté échê kāj saámbé, étáan émaá awé, póg edíi edé á nkamlen, enínií póg-ke eépédéé á nkamlen. Boj áde épéé, édyee á esón é póndé. ¹¹ Ene nyam eché embé boj eésé bōob, chô elonténé kāj waam. Échê kāj saámbé chóó éwóó chó, ekag-ke wéé éwéé. ¹² Meséb dyōm míme ene nyam médíi kāj dyōm éche eékudé nkamlen. Boj békúd ngíne ákamlen née kāj nchoo ne ene nyam áyále hawa póg. ¹³ Ntii nhág móo échê kāj dyōm éwóó, békage-'e ene nyam echab ngíne ne rímāb nkamlen. ¹⁴ Béwān nzum ne Mwān-a-Ñdyoj m̄ mbód. Mwān-a-Ñdyoj m̄ mbód átōm bó áte á nzum. Nén débenléd áyále mó adé Sángwéé a baásyāel, abé-'e kāj e kāj esyāel. Adé ne bad ábe Dyōb áchénlé boj ápwēd-te, ábe békelenle mó ne nlém nhág.”

¹⁵ Dóo ene ángel élângéé me aá, “E'dib ábe ényíné wéé ane mmwaád-a-akwalee ádyéé, é'díi bad, amute, meloŋ ne mehób. ¹⁶ Meséb dyōm míme ényíné bōobé ene nyam békóó ane akwalee. Békobén mó chōm ésyāel eché áwóó, békél abé nsôb. Bédyé mó nyam, békayáad-te mó á muú. ¹⁷ Békél né áyále Dyōb áhédé bó rímé ntíi á nlém-té, míme áhedeé aá békel. Dyōb átíidé nén aá échê nyam éwōoj ntíi nhág, ábel mó née mod nhág. Békél ene nyam echab ngíne e nkamlen káájnne póndé eché e'yale ábe Dyōb áhóbé békénné. ¹⁸ Mmwaád awé ényíné adíi dyad ámbáá áde ákamlan kāj é nköjsé.”

18

Jone anyíné ngáne Dyōb ákógséné Babilōne

¹ Áde rímén mekan métómé dóo ínyíné née ángel empée ébídé ámīn, eché ewóó nkamlen í ngíne, éche ehúmé épéné' nköjsé áte ísyāel. ² Dóo ákáné áte ne ehób éche échággé aá, “Akwedé, Babilōne, ndèle e dyad akwedé! Atimé dyad dé e'déédərj békéb, abón dé e'déédərj ábe béesáá é'syāel, ne abón dé menon míme méesáá* ne rímé bad békóó.

³ Áyále bad békéb meloŋ mé nköjsé bésyāel bénwōj esíi ábel mekan mé mbéb míme ábeléé byánán abagé bó mím míme mékóbé bó. Kāj é nköjsé ékábné mó asón. Esíi é ngíne ábel mekan mé mbéb éché-'e, ébékél bekáb bénwōjé békéndé nhón.”

⁴ Dóo íwogé ehób émpée ébídé ámīn néen bán,

“Ábém bad, nyébíd ádē dyad áte,

ábel néen nyéelatán bó ábel mbéb boj nyéekudé akab dé nkógsen míme békudté.

* 18:2 Mbéndé é bad békéb Israél elúmté'áá néen bán donge dé menon ne donge á nyam déesáá'é, né-óó békedyáge'aá ábén bwěm.

⁵ Mbéb ríme nkúmné mó á yél ndé e'che se ádyób,
Dyób-pe ákámténé rímē mekan mé mbéb ríme ábélé.

⁶ Běl mó melemlem mé dyam míme mó-'e ábélé wé.
Sábé mó ngen ébe áyāle mekan mé mbéb míme ábélé.
Hágé mó mím ngen ébe á kâb eché áhágké wé ébe mó

⁷ Éwōgēd mó ndutul ne metake ímme médé ngen ébe ne nhāgtéd mé ehúmé ne esíí éngíne ábel mekan mé mbéb éche ábágé yél.

Ahóbe' áwe nlém-tê áá,
‘Ndyéé néé ndæle e mmwaád, meésaá nkúd, méeléb-paá mbêd.’

⁸ Né-óó, medim mésyāāl mépií mó epun ehóó.

Ímê medim médíi: Nkole, achii dé awé ne nzaa.
Béhyāād mó ne muú, áyēle Sán Dyōbe, mó awé ăkāād mó, awóó ngíne.”

⁹ Kêñ é nkönsé éche ékábnáá mó mesón, bélatán-ne mó ne esíí é ngíne ábel mekan mé mbéb, bëchií bélëb-pe pónde eché bényinné mwëntud rímbíde' áde áhyáa'ë. ¹⁰ Bétyéem nchabnede áyèle béwóge mbwóg bán bómpe béküd metake míme ákúdë. Bébónë bán, "Etyäg, etyäg ne ndæle e dyad, a ngíne e dyad á Babilon, á etûn é háwa póg ngën dão ékúdë nkögseñ néñ-ë?"

Bad bémbáá bé stíma ne bad ábe békag ne stíma, bad ábe bébélé nsón á stíma tê, bad ábe békabe nyongé á edib é nkwé te, béntyéem nchabnede, ¹⁸ anyín áde bényínné mwéntud mibide' áde béhyântee mó. Bénlébé e'saad bán, "Ndèle e dyad ké pôg eebédéé nêngáne enén!" ¹⁹ Dóo bésyøgeé e'bumbú áwab nló áyâle bêchyéé'áá, bélébé-'e, böhöbë bán, "Etyæg, etyæg, ne ndèle e dyad, eché bewóy bé stíma bésúdé nhon ne ábe bwém. Á etûn é háwa pôg ngén abódé chôm ésyâæl.

²⁰ “Bw  l-am  n   asy   l   w  g menyi  ge   y  le nk  gsen m  me ane mmwa  d   k  d  .   bad b   Dy  b, bembap  s b   nl  mag ne bekal-b  -e' d  d  d  , ny  w  g menyi  ge   y  le Dy  b   b  d  t  d   ny   mbak   t  ngene m  .”

²¹ Dóo ángel e ngíne ényéné nyé ndim e aláá abwém-me dó á edíb é nkwé te, áhōbē aá, “Nén dóo bébwémmé ndèle e dyad embáá, Babilone, ásē ne ewanje ésyāél, bad béenyín-naá dó ámpē mbēb. ²² Ene póndé ntəgag ímme bechəg bé nílende, ne bekón bé nkāngé, ntəgag ímme betój bé ngombé ne betój bé e’loj méewógnédté áwōj dyad-tê ámpē. Bad bé nsón mé mekáá ábē béebáá ámpē, ntəgag mí mesin míme mékōge’ bwém méewógnédté ámpē. ²³ Áwōj dyad tê, etrukán éepenné ámpē mbēb, ehōb é sómbé bó

nchóm éewógnédté ámpē mbêd. Ádê dyad bébêbêd dô áyâle ábê bekâb bé nyongé bôo bêbédé ndale é bad á nköjsé, bad bé meloj mé nköjsé mésyâel-ls bêndognéd áyâl e echôj nganj.”

²⁴ Dyöb ákógséné Babiloné áyâle bad bé Babilon bêwúú bekal-bé-e'dâdâr, ne bad bëmpêe ábe bêwédé á nköjsé.

19

¹ Áde ene Ángel émáá rímmén mekan mésyâel ahób, dôo íwogé chom nêngáne ehób éche échâgké é ndun e mod ébídé ámîn, bêbôné bân “Mekenag mébê ne Dyöb. E'soosoñ, ehûmé ne ngíne bêhúú ne ádëd Dyöb. ² Echë mbakú edé mbâle etângéné-'e áyâle akáadíté akwalee ambáá awé abëlté bad bé nköjsé bësyâel mbéb ne áde akâb dé mesón, akuné-'e mekií ríme ábê bembâlede ríme ane mmwaâd ânsyøgké.” ³ Dôo bêbôné ámpê bân, “Mekenag mébê ne Dyöb. Mwëntud ríme rímbide' ngâne ene ndale e dyad éhyâa'é ríkag ámîn á ngíndé ne á ngíndé.” ⁴ Ábê bad bëmbâá móom mébê ne bëniin ne échê nyam éniin bênkwé ásé á'sô é' Dyöb bëbagé-'e mó edûbé, mó awé adiídé atii dé nkamlen, bêhôbê néen bân, “Ébê nê! Mekenag mébê ne Dyöb.”

*Jõne anyíné ngande e e'wóngé
e Mwän-a-Ñdyoñ mì mbód*

⁵ Dôo íwogé ehób ébídé á atii dé nkamlen, éhôbê' néen aá, “Nyékene’ ádëd Dyöb. Nyé ábe nyêdë ábê bembâlede, nyé ábe nyêbage mó edûbé, ken bad ábe bédé etógnén-e ke'e ábe béesë etógnén.” ⁶ Dôo íwogé chom nêngáne esaâd é ngíne é ndun e mod, ébídé byánán mendib ríme mésobpe', ébédé ámpê née dyöb ákumé' áte ne ngíne. Échê esaâd éhôbê néen, “Mekenag mébê ne Dyöb. Áyâle awed Sângwéé, Dyöb á Ngum adé á nkamlen. ⁷ Syánë déwóge' menyiñge bwâmbwam, déhôbe bân dedé menyiñge dékëné-'e mó, áyâle pôndé e e'wóngé eche Mwän-a-Ñdyoñ mì mbód epedé, sómbé-'e emaá aboñsen. ⁸ Áyâle akwögnédé, Dyöb ábágé mó kunze âhë mbóté eche bëbâjnédé kâse e abad áde bêchâgée bân línen. Ápene' áte ásáá-'e.” Ene kâse e mbóté edé nêngáne mekan ríme bad bé Dyöb bëbelëé ríme Dyöb áhedeé.

⁹ Dôo ene ángel élângéé me aá, “Tél nén we, Nnam ne ábê ábe bélébpé á ngande e e'wóngé eche Mwän-a-Ñdyoñ mì mbód.” Anhób áwêm ámpê aláá-'e me ámpê aá, “Ábén e'yale é' mbâle é'húú ne Dyöb.”

¹⁰ Dôo íkwédé ásé áwe e'só ábë mó edûbé. Anláá me aá, “Weébëlë nê, mémpê ndíi mbâlede a Dyöb née we, mbé née bad bëmpêe ábe bédúbpé Krïstæø, mbé-'e née nhög awé atyéémé áyâl e mbâle eche Yesue áyâgté. Dyöb dôo nyétângéné edûbé abë. Ene mbâle eche Yesue ábídté áwed, chôo ebage bad ngíne âkal nkalañ nì Dyöb.”

*Mod awé adiídé hósé eche épúbe'
atómé nyam echë ebídé
á edib é nkwé-te áte á nzum*

¹¹ Menyín meé ádyöb ánédnédé. Héé nñóné boj nnyiné' hósé echë épúbe', mod awé mó-'e andií chô bêchâgë'áá mó bân Ane Awé Adé mbâle ábélé-'e bad âbíi mbâle tângene Dyöb. Akógsan bad nyaa echë etângéné áwanné-'e ábë bad bé ekoyí. ¹² Mïd mébédé mó áte née muú ríme nchodne', anhë-'e e'kóté bé nkamlen híin á nló. Anwóy dïn á yël áde modmod eebíi' é etotoméé mwén. ¹³ Anwáá-'e megombe ríme bêchûbë á mekií-te, dïn áde bêchâgë-'e mó ádií Eyale é Dyöb. ¹⁴ Sánze éche edé ádyöb énhë kâse é mbóté éche bëbâjnédé abad áde bêchâgée bân línen, épûbë' ésâñ-'e. Bêndií hósé éche épúbe' bêhîdë mó. ¹⁵ Páá echë ekóbpe' bwâmbwam embid mó á nsøl-tê. Chôo ábenleé ákógsen bad bé meloj. Ákamlén-ne bô ne ekâá éche éhyédté. Ákogtéd bwâl bé e'pum áte ábel ámîn besabé ábe bêbenleé mím, âlûmed rímmé melingá mé ngíne mé ébëbtéd ríme Dyöb á ngumé. ¹⁶ Dïn ádë áwë mengombe ne áwë epøj mîn nén bân, “Kâj e kâj ésyâel ne Sângwéé a besângwéé bësyâel.”

¹⁷ Dóo nnyíné ángel etyéémé á enyen-tê boj ábōnné menon míme mépúmmé'áá ádyōb ne ehób éche échágké aá "Nyéhyag nyéladen áyāle sáŋkalaa a ngande echě Dyōb déboŋsénné. ¹⁸ Nyéhyag nyedyé nyam é kāj, nyam é sánze émbáá, nyam é ndèle é bad, nyam é hōsé ne nyam é bad ábe bédíidé chó. Nyéhyag nyedyé nyam é baányoŋ bésyāəl, é kunze ne é betāŋ, bad ábe bédé etógnén ke'ε ábe béesé etógnén." ¹⁹ Dóo nnyíné nyam ne kāj é bad é nkōjsé ne échab sánze éládné áwan nzum ne ane awé ansébé ape ádīi hōsé echě épúbe' ne éche sánze. ²⁰ Dóo békóbé ene nyam ne nkal é'déadəŋ a metóm. Ane nkal é'déadəŋ a metóm ambé chó á'sō-te, álūmtē e'chemléd ádog bad ábe békudé e'chem ábe ene nyam, bēbagé-'ε échě ediídinge edúbé. Áde bédíi á alongé, bémbwēm bó bad bēbe á edib é nzab é muú, bénhyāŋ ne muú míme n̄hunne' bwâmbwam. ²¹ Ane awé adiídé hōsé ambenléd páá e echě embid mó á nsəl tē awúú bad ábe belyágé ásē, échē kāj ne échab sánze. Menon mésyāəl ménkōd áde bedyédé échāb nyam.

20

Devəle ābē á mehan á etūn é ekálé é mwě

¹ Áde ane mod átómé ábē bad bé ekoyí áte, dóo nnyíné née ángel ébídéé ádyōb ésudé ásē ewálé e'kii bé echög échě éewóo asog, ewálé-'ε sáŋkalaa a ngobéngōbē awé adelé. ² Dóo ákóbé dragōne, ene nyă e'bōd echě edé Devəle, ebé-'ε Satane, áhaŋ mó á etūn é ekálé é mwě. ³ Ambwém mó á echög échě éewóo asog ádīb, ápēn-ne chó ábel boj eéhəlē bad bé nkōjsé adog ámpē kāəŋne á pónđé echě ekálé é mwě émaá'ε áte. Ámbid enē bénhūd mó á mehan á esój é pónđé.

⁴ Dóo nnyíné metii mé nkamlēn, bad ábe Dyōb dēmbeé kunze ákamlēn, bó bēndyeé áhed. Mennyín-ne e'déadəŋ é' bad ábe bénwē. Bénwūn bó áyāle mbóŋ echě bēbídé'áá Yesue ne áyāle akal áde békálé'áá nkalaj míme n̄húú ne Dyōb. Bénwūn bó áyāle bēebage-'áá ene nyam edúbé ke'ε échě ediídinge ne áyāle akob áde bénkēnkobpé e'chem á mbōm ke'ε á ekáá. Bétím ámbid á alongé, bōbē Yesu Kr̄istəə bēbē á nkamlēn á etūn é ekálé é mwě. ⁵ Nén dóo débē mpuu mé e'só. Bad ábe bēnlyág ásē ábe bénwē bénkēntimmé ámbid á alongé kāəŋne ámbid e ekálé é mwě. ⁶ Nnam m̄bē ne ábē ábe bēbē mpuu mé'sō áte. Bédií bad ábe bésáá. Kwéed echě edé kwéed e edéadəŋ éewóngé ngíne ámīn e bad ábe bédé mpuu mé'sō áte. Boj bēbē prisē é Dyōb ne échě Kr̄istəə bēbē-'ε á nkamlēn ne mó á etūn é ekálé é mwě.

Jōne anyíné Satane akwedé nzum

⁷ Áde échē ekálé é mwě épēé á asog, bēhūd Satane á mbwōg. ⁸ Abíd áde ábīdtē á mbwōg, áke metóngé mé nkōjsé méniin, ádōg bad bé nkōjsé. Mmén metóngé mé nkōjsé médfí Gōg, ne Mágōg. Satane álād bó áwan nzum, bēbuú-'ε áte nēngáne nsíí míme n̄dē á edib é nkwě. ⁹ Dóo békíí nkōjsé áte n̄syāəl, béləŋnéd abwōg á hōm áde Dyōb ádáá, wéé ábē bad bédíi, boj muú mémbid ámīn n̄hyāād bó baásyāəl bam. ¹⁰ Devəle awé andog bó, bémbwēm mó á edib é nzab é muú míme n̄hunne' bwâmbwam, wéé ene nyam ne nkal é'déadəŋ a metóm bédíi. Áhed dóo békudté metake mé ngíne nkuu ne műte á ngíndé ne á ngíndé.

Dyōb ákáádté bad á asog dé nkōjsé

¹¹ Dóo nnyíné mod adiídé atii dé nkamlēn ámbáá áde ápúbe'. Áhed-taá nkōjsé ne abobe ámīn bénnyōŋ'ε awé e'só-te bēetime abé ámpē. ¹² Héé nnyíné bad ábe bémáá awé, bad ábe bédé etógnén ne ábe béesé etógnén, bētyéémé á'sō bé ádē atii dé nkamlēn. Kálag éche Dyōb dēntenlé mímāb mbeltéd áte, bēndibé chó áte, bēndibé-'ε empée áte. Ene chó enwón m̄n mé bad ábe bēbē abé ne abé ne Dyōb. Dyōb dékāād bad ábe bēwédé, nchoo ne mbeltéd mímāb ngáne éténléé á kálag-tē wē. ¹³ Bad ábe bēwédé á edib é nkwě-te bēnkě wéé Dyōb ábel békáad bó. Ábíníí bad-te ábe bēwédé ábe bédé á mbwōg e kwéed, bōmpē bētyéem á'sō é' Dyōb ábel békáad bó nchoo ne mímāb mbeltéd. ¹⁴ Bémbwēm Kwéed ne

Mbwóg e kwééd á edib é nzab é muú. Enén kwééd e edib é nzab chó edé kwééd e edéadəŋ.
¹⁵ Kéñzéé awé bénkéntenlé dín á kálag e alongé, bémbwém mó á edib é nzab é muú.

21

*J*øne anyíné nkøjsé ne nkoj mí mínl mé ekóólé

¹ Áde nkáásé ítómé, díðo nnyíné nkoj mí mínl mékøjlé ne nkøjsé mé ekóólé. Nkoj mí mínl ne nísé mé só bennyyøn, edib é nkwé-'e énkémbáá ámpé. ² Héé nnyíné Dyad áde Ásáá, Jerusalém e ekóólé, ahúé', ábídeé ámín wéé Dyöb. Dyöb démbojsén mó ngáne bebaád bébojsanné sómbé eché ekag á e'wóngé. ³ Díðo ríwogé ehób éche échágké ébídé á atii dé nkamlen éhöbē néen aá, "Nyénøne", e'dii é' Dyöb é'dé ne baányøn bøøb! Dyöb dédyéé hõm ahög ne bó, bó-'e béké ábë bad. Dyöb dédyéé hõm ahög ne bó. ⁴ Ápínlé bó mésod mésyääl á míld. Kwééd eebáá ámpé, bad béelebpé ámpé, béechií-'aá ámpé, béewog-kaá e'we ámpé. Ébë néen áyæle mam mí nchun métómé."

⁵ Díðo ane awé adiídé atii dé nkamlen áhöbeé aá, "Nyénøne", mbøle' bwém é'syääl ekóólé!" Anhób ámpé aláá-'e me aá, "Tél néen, áyæle e'yale ábe níhöbeé é'dé mbále é'dé-'e ábe moosyääl ádubëe." ⁶ Anhób ámpé aláá-'e me aá, "Émáá. Më-eé ndé Álfaa mbé-'e Ómégaa, më-eé ndé mbooted mbé-'e asog. Kéñzéé awé píd ékóbé, mëbe mó mendib míhyéé míme mod ámwaké boj abé á alongé abé ne abé. Mëbë-'e nyé mó ngéen. ⁷ Mod awé átõm metake áte, adúbe áde ádúbpé me, mëbe mó ábén bwém é'syääl. Mëbë áde Dyöb mó-'e abé awem mwän. ⁸ Boj ne bad ábe bëwóó mbwog áte, ábe bëewoo adúbe, ábe békéle' mbinde é mekan, bad bë ewüen, bekáb bë mesón, bekum bë ngaj, bad ábe békéle' myöb mí metóm ne bekal bë metóm bësyääl, ádab abwog á hõm ádíi edib é nzab é muú míme níhunne' bwâmbwam. Enén kwééd chó edé kwééd e edéadəŋ."

*J*øne anyíné Jerusalém a ekóólé

⁹ Díðo ángel póg átînté e ángel saámbé éche énwälé kúmbe saámbé éche élóné ne medim saámbé épédé boj élängé me aá, "Hyäg, méluméd we sómbé, mmwaád awé Mwän-a-Ñdyøn mí mbód." ¹⁰ Díðo Edéadəŋ éche Ésáá épíidé me boj ene ángel ékeené me á mbøod mínl eché echabé ámín bwâmbwam. Ambané me áwedé-mínl alúmed me Jerusalém, dyad áde ásáá, ngáne ábídeé ámín wéé Dyöb, ¹¹ ápené-'e ne ehúmé é Dyöb. Ádë dyad ákínáá áte néen aláá dé etógnén áde álélé akud, ákiné áte néen jáspa ánnýinné-'e áte. ¹² Ádë dyad dénwöj sáñkalaa a e'ké ábe e'chabé ámín. Bénwöj nsøl míe e'ké dyôm ne mébe, ne ángel dyôm ne ébe éche énøne míme nsøl míe e'ké nísyääl. Áyæl e míme nsøl míe e'ké, bëntél mínl mé metúmbé dyôm ne mébe míe bad bë Israel. ¹³ Ábë e'ké bénwöj ped éniin. Ped e á akuu enwöj mmwë míe e'ké níláán, ámekunekune mmwë níláán, ámehüléhülé mmwë níláán á ped e mbøj níláán. ¹⁴ E'ké ábe bënłæjnéd ádë dyad bënsumén ámín e meláá dyôm ne mébe. Ámín e míme meláá, bëntél mínl míme bembapës bë nlómag dyôm ne béké ábe Mwän-a-Ñdyøn mí mbód.

¹⁵ Ángel eché elängé'áa me mímen mekan, enwálé ntój ní gôl míme áhagné'áá ádë dyad, míme nsøl míe e'ké ne ábë e'ké é' dyad. ¹⁶ Ádë dyad dénwöj metóngé ménin, e'chab áte ne e'kél áte é'bédé nyaa póg. Ene ángel embenléd míme ntój áhög ádë dyad. Ábédé ekélé é máyl ehög ne mbwókel étáan. Á e'chab áte, e'kél áte ne e'chab ámín békédyéé nyaa póg. ¹⁷ Ene ángel anhág káájne e'che bë e'ké, é'bédé móom míe méta ntóob ne ntóob. Ambenléd nhægtéed míme bad bësyääl békénladté. ¹⁸ Békénléd jáspa álój ábë e'ké. Békénléd gôl eché eésé mbinde áte, éche epene áte néen dyené álój ádë dyad. ¹⁹ Meláá míme bënsuméé ábë e'ké ámín, mébédé bän bë meláá ábe békénlé nkun nyaa ne nyaa. Aláá dé nsumé dé e'só, ábédées jáspa, áde alónténé mébe, ábédées safia, áde alónténé méláán áget, áde alónténé ménin émeral, ²⁰ áde alónténé métáan, ónis, áde alónténé ntóob kanélia, áde alónténé saámbé krisolit, áde alónténé waam béril, áde alónténé abog topas, áde alónténé dyôm kaladóni, áde alónténé dyôm ne ahög hyasín, áde alónténé dyôm ne mébe ametîs. ²¹ Mímen mmwë dyôm ne míbe mbédées meláá míe etógnén, mmwë

nhog téé mibédéé aláá dé etógnén ahog. Nzii eche empöŋ á dyad tê ebédéé gôl eché eésé mbinde áte eché epene' áte.

²² Á dyad-tê wê, menkennýinné ndáb e Dyōb áyâle Sâj Dyōb é Ngumé ne Mwân-a-Ñdyoŋ mí mbód, bédí née ndáb e Dyōb. ²³ Ádê dyad déehednéé bán áwôŋ enyen ké' e ngon áwêd-te áyâle ehúmé é Dyōb édíi ábe e'nyínén bé ekide, Mwân-a-Ñdyoŋ mí mbód-te ápene' née éche etrükán. ²⁴ Bad bé nköŋsé bésyâel békelenléd ábe e'nyínén bé ekide ábel ímmab mam ímme bétâŋgéné abel epun ké éhéé. Kâj é nköŋsé épeén ímmab nhon á dyad-tê wê. ²⁵ Ímmê mmwe mé e'ké dyôm ne ímbé béepenné mó mbêd, áyâle nkuu méebáá áwêd-te mbêd. ²⁶ Bépeén bwém é' bwâm ne nhon mí bwém é' bad bé nköŋsé áwêd-te. ²⁷ Dyam á mbinde ké ahog, ké' e mod awé abele' e'bébtéd é' mekan, ké' e mod awé akale metóm ké nhog eesónlé á dyad-tê wê. Bad ábe mîn médií á kálag e alongé eche Mwân-a-Ñdyoŋ mí mbód běnpen bôo bésôl áwêd-te.

22

*Jøne anyíné edib éche ébage
alongé á ngíndé ne á ngíndé*

¹ Dôo ene ángel élûmtseé me edib é mendib ímme mébèle boj mod abé á alongé á ngíndé ne á ngíndé, ényînné áte nêngáne dyené. Échê edib ébídé'áá á atii dé nkamlen áde Dyōb ne Mwân-a-Ñdyoŋ mí mbód, ² époo' átintê e nzii á dyad-tê. Á nkin mé échê edib, ped ébe, nyaa e bwel pôg eche echyâa' e'pum ábe e'béle boj mod abé á alongé abé ne abé ebédé áhed. Ímmê mel méchyâa'áá e'pum nyaa dyôm ne ébe, méchyâa'áá ngon té. Bad bé nköŋsé békelenládtáá ábab byaá ákud e'choóchoj. ³ Chömkööm éche Dyōb ábágé ebomán éebáá á dyad-tê wê. Atii dé nkamlen áde Dyōb ne Mwân-a-Ñdyoŋ mí mbód mébédé áwêd-te, bembalede bé Dyōb-pe békagé mó edubé. ⁴ Bényin Dyōb e'só ne e'só, áde dîn-ne démbé bô á mesó mé mbom. ⁵ Nkuu méebáá ámpé, béehéd-taá etrükán kâa enyen ânyínén ekide áyâle Sâj Dyōbe ábë ábab e'nyínén bé ekide, békë-'e á nkamlen á ngíndé né á ngíndé.

Jøne anyíne epe éche Yesue

⁶ Dôo ene ángel élâŋgeé me aá, “Ábén e'yale ábe nílâŋgé nyé é'dé mbâle, né-óó nyédûbe bô. Sâj Dyōbe awé abage bekal bê'dâdâdj échê edâdâdj âbel boj békale ímmê nkalar, alómé eche ángel âlumed ábë bembalede mam ímme mékwogé abenled.” ⁷ Dôo Yesue áhôbeé aá, “Nyénøne’, nkwegé ape. Nnam ne bad ábe békide’ mekan ímme bétélé á kálag-tê wén ímme mébenléd bôob ne á póndé eché ehúe’ ásô.”

⁸ Me, Jøne nwogé nnyín-ne ímmén mekan. Áde nwyogé ímmén mekan nnyín-ne mó, menkwé ásé ásô é ángel eché enlûmed me ímmén mekan, ábe mó edubé. ⁹ Boj anláá me aá, “Weébélê né! Mëmpé ndíi mbalede a Dyōb née we, ne née ábíníí baányoŋ bé Krîsto ábe bédé bekal bê'dâdâdj ne bad ábe békide’ chom éche éténlédé á kálag-tê wén. Dyōb dôo nyétâŋgéné edubé abe.” ¹⁰ Dôo álâŋgeé me ámpé aá, “Nyéeköññad bad mekan ímme mébenléd ímme méténlédé á kálag-tê wê áyâle mékwogé abenled. ¹¹ Bad ábe békale mbéb békë békale’ mbéb. Ábe békale mekan mé mbinde békë békale’ mekan mé mbinde. Ábe békale mekan ímme métâŋgéné békë békale’ mekan ímme métâŋgéné, ábe bô-'e bésâá békë bésâń.”

¹² Dôo Yesue áhôbeé aá, “Nyénøne’, nkwegé ape, ásábe mod-té nchoo ne nsón ímme ábél. ¹³ Me-eé ndíi Álfaa mbé-'e Ómégaa, awé Asébpé ne awé Adimténé, mbé-'e Mbooted ne Asög.”

¹⁴ Nnam ímbé ne ábë ábe békale mbéb mekombe, békale kunze áponj á mmwe mé e'ké ásól á dyad-tê ábel bedyâe e'pum é' bwel ábe e'béle mod abé á alongé abé ne abé. ¹⁵ Bad ábe békale mbéb ne abé békale mekan mé mbinde, bad ábe békale ngan, bad ábe békale mesón, bad ábe békale myob mé metóm ne bad ábe békale akal dé metóm ne ábe békale metóm.

¹⁶ Me Yesue, me-eé nlómé echem ángel âlâa nyé ábe nyéedé á mwembé-te ímmén mekan. Ndíi ane awé abidé á mbyaa ímme kâj Dabide, tintine a mbwembwe awé apene’.

¹⁷ Edədədəŋ é Dyōb ne Sómbé békébe nén bán, “Hyäg.” Kénzéé awé awogé nén, mómpē áhôb aá, “Hyäg.” Ane awé píd ékóbé áhye ámwê mendib mímmé mébele boj bad béké á alongé á ngíndé ne á ngíndé. Mod ké ahéé awé ahede’ mímmén mendib átēd mó ngén.

Jöne ahóbé ehóbé é asogé

¹⁸ Nsíme mod ké ahéé etúu áte awé awogé e’yle abé é’ténléde á kálag tê wén tângene mekan míme mébenléd. Nzé mod abádé kékéhéé á kálag tê wén, né Dyōb débädé mó medim míme bétélé á kálag tê wén. ¹⁹ Mod ké ahéé-’e awé áhûd ké eyale ámín e mekan míme méténléde á kálag tê wén tângene mekan míme mébenléd, Dyōb déhûd ádē asii dé e’pum é’ mel é’ bwel abé é’bèle boj mod abé á alongé á ngíndé ne á ngíndé. Dyōb déhûd-te éche etál á Dyad áde Ásáá. Mmén mekan méténléde á kálag tê wén.

²⁰ Ane awé abíde mbón tângene mímmén mekan mésyääl ahóbe nén aá, “Ne mbále, nkwegé ape.” Ébê nê, hyäg a-Sángú Yesu.

²¹ Nsimé míme Sángú Yesuë míbbé ne bad bésyääl.*

* ^{22:21} Bad bésyääl; doŋge á kálag dé’só áwóó Bad bé Dyōb káa Bad bé Dyōb bésyääl.